


Yus Papí: Shuarjái  
Yus Yamaram Chicham  
Najanamu



New Testament in Shuar (EC:jiv:Shuar)

# Yus Papi: Shuarjai Yus Yamaram Chicham Najanamu New Testament in Shuar (EC:jiv:Shuar)

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

## Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
fb10d1f0-e2d5-5d8e-8a74-10846708c857

## Contents

MATEU . . . . .	1
MĀRKUS . . . . .	59
RŪKAS . . . . .	96
JUAŅ . . . . .	158
TŪRAMU . . . . .	201
RŪMANAM . . . . .	261
1 KURINTIUNAM . . . . .	285
2 KURINTIUNAM . . . . .	309
KARASEANAM . . . . .	325
IPISIUNAM . . . . .	335
JIRIPIUSNUM . . . . .	343
KURUSEŅAM . . . . .	349
1 TĪSARŪNIKIANAM . . . . .	355
2 TĪSARŪNIKIANAM . . . . .	361
1 TIMIUTĒUN . . . . .	364
2 TIMIUTĒUN . . . . .	371
TITIUN . . . . .	376
JIRIMIŪŅKAN . . . . .	379
ISRAERNUM . . . . .	381
SĀŅTIAK . . . . .	399
1 PĪTIUR . . . . .	406
2 PĪTIUR . . . . .	414
1 JUAŅ . . . . .	418
2 JUAŅ . . . . .	424
3 JUAŅ . . . . .	425
JŪTAS . . . . .	426
APUKARĪPSIS . . . . .	428

## Yúsan Shiir Chichamen MATEU aarmia nu

### *Jesukrístu weat̄ri* (Rúkas 3.23-38)

<sup>1</sup> Jesukrístu weat̄ri ju áiniawai. Tura ashí nan̄kaamas ti uunt weat̄ Tawitcha Apraámsha áiniawai.

<sup>2</sup> Apraáma uchirí Isak. Tura Isaka uchirí Jakup. Jakupa uchirísha Jutá ni yachj̄j̄jai.

<sup>3</sup> Tura Jutá uchir̄in Páresan tura Sarancha Tamar jurermiayi. Páresa uchirísha Esrum, nuna uchirísha Aram.

<sup>4</sup> Nuna uchirísha Aminiatáp. Nuna uchirísha Nasuñ. Nuna uchirísha Sarmuñ.

<sup>5</sup> Sarmuñka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isai.

<sup>6</sup> Nuna uchirísha uunt akupin Tawit. Uunt akupin Tawitia uchiríncha Sarumúnka Patsepa jurermiayi. Patsepasha emka Uriása nuweeyayi.

<sup>7</sup> Sarumúnka uchirí Rupuam. Nuna uchirísha Apías. Nuna uchirísha Asa.

<sup>8</sup> Asa uchirísha Jusapát. Nuna uchirísha Juram. Nuna uchirí Usías.

<sup>9</sup> Usías uchirí Jutam. Nuna uchirí Akas. Nuna uchirí Esekías.

<sup>10</sup> Esekías uchirí Manasés. Nuna uchirí Amuñ. Nuna uchirí Jusías.

<sup>11</sup> Jusías uchirí Jekunías ni yachj̄ armia nujai. Nuñ Papirúnianmaya shuar Israer shuaran mesetjai nupetkar Papirúnia nun̄kanam achirar júkiarmiayi.

<sup>12</sup> Nu ukunman̄ka Jekunías uchirí Saratiár akiiniamiayi. Tura nuna uchirí Surupapír.

<sup>13</sup> Surupapíra uchirí Awiut. Nuna uchirí Iriakím. Nuna uchirí Asur.

<sup>14</sup> Asura uchirí Satuk. Nuna uchirí Akim. Nuna uchirí Eriut.

<sup>15</sup> Eriuta uchirí Ereasár. Nuna uchirí Matañ. Nuna uchirí Jakup.

<sup>16</sup> Jakupa uchirí Jusé Marí áishriya nu. Marisha Jesusan jurermiayi. Nu Jesuska shuáran uwemtikiartin asa Kristu tu anaikiamuiti.

<sup>17</sup> Tuma asamtai Apraámnumiã Tawitnium Jesusa weat̄ri katurse (14) áiniawai. Tawitniumiãsha Papirúnianam jukimionma nuñsha katurse weat̄ áiniawai. Papirúnianam jukimionmayasha Krístunam ataksha katurse áiniawai.

### *Jesukrístu akiiniamu* (Rúkas 2.1-7)

<sup>18</sup> Jesukrístu akiiniamu júnis ámiayi. Ni nukurí Marí Jusejai anaj-manairuyayi. Tura tsaniatsāin̄ Yusa Wakanj̄ ajaprumtikiamiayi.

<sup>19</sup> Ajaprukmetaisha Jusé Marin iniatsāatsuk nin ajapatniun enentáimpramiayi. Tura ti pen̄ker asa aya iniaisatniun wakerimiayi aents nekainiatsāin̄.

<sup>20</sup> Nuna tu enentáimia pujái, mesekranam Yusa suntari tarí chicharuk tímiayi “Juséá, ame weat̄rum Tawitchakait. Tuma asam Marijjai nuatnaiki-atin ashamkaip. Uchin jurertatna nuka Yusa Wakanj̄niuiti.

<sup>21</sup> Uchin áishman̄kan takustatui tura nuna naari *JESUS* anaikiattame. Ashí ni shuarín ni tunaariya uwemtikiartin asa Jesus anaikiatniuiti” tímiayi.

<sup>22</sup> Yus ni etserniur*ijjaj* yaunchu timia nu uminkiatu tusa nu túrunamiayi. Juna áamtikramiayi:

<sup>23</sup> “Nuwa natsa ajapruktatui tura uchin takustatui. Nuna náarisha Emanuér anainiaktatui.” Tu áarmaiti.

Emanuérsha nu chichamnum “Yus *ijjaj* pujuwiti” tawai.

<sup>24</sup> Jusesha mesekranmaya shintiar Yusa suntari timia núnisar Marin nu-atkamiayi.

<sup>25</sup> Tura uchin júreatsain tsaniñchamiayi. Tura jurermatai uchin Jesus anaikiamiayi.

## 2

### *Ti neka apach Jesusan eakarmiania nu*

<sup>1</sup> Jutia nunkanam Pirin pépru ana nu*j* Jesus akiiniamiayi. Nuisha nú nunka akupniur*i* Irutisauyayi. Akiiniamtai ti neka apach nantu tátainmaaniya Jerusaren péprunam táarmiayi.

<sup>2</sup> Taar inintruiniak “¿Israer shuara úunt akupniur*i* tu*j* akiiniat? tiarmiayi. Nantu tátainmaani pujaati ni yaar*i* wáinkiam*j*i. Tura tikishmatratu*t*ai tusar winia*j*i” tiarmiayi.

<sup>3</sup> Irutis nuna antuk nusháa enentáimpramiayi. Tuma asamtai ashí Jerusarennumia shuarsha antukar nusháa enentáimpramiayi.

<sup>4</sup> Irutis nuikia ashí Israer-patri uuntrincha tura yaunchu akupkamun jintinniuncha untsukarmiayi. Tura Kristu akiiniatniur*i*n inintrusmiayi.

<sup>5</sup> Tutai chichainiak “Jutia nunkanam Pirin pépru ana nu*j* akiiniatniuiti, tiarmiayi. Yaunchu Yúsnan etserin tu áaruiti:

<sup>6</sup> “Jutia nunkanam, Pirin pépru, ishitiáphich ana nuyá nekas uunt akupin winittiwai. Nii ashí Israer shuaran, Wíi shuar ásar*m*atai, pé*n*ker wáinkiat*t*wai,” tawai Yus.” Tu tiarmiayi.

<sup>7</sup> Nuna tu*n*iakui Irutis ti neka apachin úusan, urutia yaa emka wáinkiamarum tusa aniasarmiayi.

<sup>8</sup> Nuyá Pirinnum akupeak “Nu*j* werum uchi pé*n*ker inintrusrum wáinkiatarum. Tura wáinkiarum ujatkatarum. Wisha werin tikishmátuutaj” tímiayi.

<sup>9-10</sup> Tutai ti neka apach wear*m*iai. Tura yaa, yajaya wáinkiar*m*iania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nu*j* ejeniar*m*iai.

<sup>11</sup> Jeá wayawar uchincha ni nukur*i* Mar*ijjaj* wáinkiar*m*iai. Tura uchin tikishmatrar*m*iai. Nuyá ni kajuntriyan kurincha, mirá kun*ku*inniasha, chíkich kun*ku*inniasha súsarmiayi.

<sup>12</sup> Nuyá mesekranam Yus “Irutisaini weerap” tutai chíkich jintianam waketiarmiai.

### *Ejiptunam pisaamu*

<sup>13</sup> Ti neka apach waketrantai Yusa suntari mesekranam Jusen ujakmiayi. “Nantakim uchi ni nukur*ijjaj* Ejiptu nunkanam jukim nu*j* pujustá. Irutis uchin máataj tusa eaktatui. Tura ukunam an*nk*ant ajasmatai ujak*taj*me” tímiayi.

<sup>14</sup> Tutai Jusé kurat shintiar nú káshik uchincha nukur*ijjaj* Ejiptunam jukimiayi.

<sup>15</sup> Irutis jáatsain nu*j* pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi:

“Ejiptunmayan winia Uchirun untsukmajai.”  
Tu áarmiayi.

*Irutis uchin máawarat tusa akupkamu*

<sup>16</sup> Irutissha ti neka apach nin anaŋka yajá waketran nekáa ti kajekmiayi. Ti kajek ashí áishmanchin Piriñnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiará uwin takakun tura nú uchichin máawarat tusa akupkamiayi.

<sup>17</sup> Nuka Yusnan etserin Jeremías aarmia nu uminkiamiayi. Juna áarmiayi:

<sup>18</sup> “Ramá nunkanam ti úutainiak uur ajainiawai. Raker ti uutu asa atsankrachminiaiti ni uchirí jákarmatai.” Tu áarmiayi.

<sup>19</sup> Tura Irutis jakamtai Yusa suntarij mesekranam Jusen ujakmiayi.

<sup>20</sup> “Uchin máataj tiarmia nuka jákarai. Yamaikia ataksha uchi ni nukurjijjai jukim Israer nunkanam waketkitia” tímiayi.

<sup>21</sup> Tutai Jusé nantaki uchincha nukurjijjai jukin Ejiptunmaya Israer nunkanam waketkimiayi.

<sup>22</sup> Túrasha Irutisa uchirí Arkiráu Jutía nunkanam uunt akupin ajasun nekáa nuñ wétinian aránkamiayi. Mesekranmasha ujakma asa nuñ pujutsuk Kariréa nunkanam wémiayi.

<sup>23</sup> Nuñ jeá Nasarét péprunam pujusmiayi. “Nasarénumia átatai” Yusnan etserin yaunchu tu etserkamu nuñai uminkiamiayi.

### 3

*Imiakratin Juan atsamunam etserkamiania nu  
(Márkus 1.1-8; Rúkas 3.1-9, 15-17; Juan 1.19-28)*

<sup>1</sup> Nuyá imiakratin Juan Jutía nunkanam aents atsamunam etserki tímiayi.

<sup>2</sup> “Enentáim yapajjatarum. Tsawant ishichik ajasai Yus juñ akupin ajastin.” Tu etserkamiayi.

<sup>3</sup> Nú Juanŋan yaunchu Yúsnan etserin Isayas juna áarmiayi:

“Shuar atsamunam aents untsumuí. Untsumuk “Atumí enentái Uunta jinti iwiarturtarum tura naka awajsatarum” tawai.” Tu áarmiayi.

<sup>4</sup> Nu Juanŋsha kamiyu ure najantramun entsauyayi. Emenmamkesha nuapeyayi. Tura yutai-títikriátsnasha chinijjai yúuyayi.

<sup>5</sup> Tura Jerusaréñ péprunmaya shuarsha tura ashí Jutía nunkanmaya shuarsha Jurtan entsanam matsamiarmia nú shuarsha mash Juánkan tariarmiayi ni chichamen anturkatai tsasar.

<sup>6</sup> Tura ni tunaarñ paant etserkarmatai Juan Jurtan entsanam imiainarmiayi.

<sup>7</sup> Juanŋsha Pariséuncha Satuséuncha imiatti tusa wininian wáiniak tímiayi “Napia áaniutirmincha, ¿ya atumniasa ti asutniátñiunmaya uwempratniuncha ujatmakmarum? tímiayi. Asutiátin tsawant ishichik ajasai.

<sup>8</sup> Tuma asamtai enentáim yapajjámuitkiuñkia péñker wekaamurmijjai paant iniakmatarum.

<sup>9</sup> Atumsha “Iikia Apraám weaitji” tu enentáimtumasairap. Nuñai uwemprashtratume. Yus wakerakka ju kayan Apraáman tiranŋki najankainti, tímiayi.

<sup>10</sup> Numi ajaktinia áintsan kampuwarñ jacha atuttsamuiti. Tura numi péñker nereatsna nuka tsupikia jinium apeamu ártatai.

<sup>11</sup> Wikia aya entsajain imiajrumé atumi enentái yapajjáwakrumin. Antsu winia ukuruñ winiana nuka péñker awajtamsataj tusa imiantinia áanis tura

jía áanis Yusa Wakanin enketramprattarme. Wijjaj nankaamantu asamtai wikia tsuntsumpruan ni sapatrínkisha atitrachminiaitjai.

<sup>12</sup> Aruusa nerejaj túruinia áintsan átatui. Awajtiutairin achikiuiti tura nujaj saepen awajtittiwai. Tura neren pénger ikiustatui, antsu saepenka jinium apeattawai. Nu jisha tuke kajinchaiti.” Tu tímiayi Juan.

### *Juan Jesusan imiaimiu amia nu*

(*Márkus 1.9-11; Rúkas 3.21-22*)

<sup>13</sup> Nuyá Jesus Kariréa nunkanmaya winis Jurtan entsanam támiayi Juan imiatti tusa.

<sup>14</sup> Juansha emka nakitiak Jesusan tímiayi “Ame winia imiatminiaitme. Túrutamniaiatmesha ¿urukamtai winia tarutnium?” tímiayi.

<sup>15</sup> Tura Jesus tímiayi “Ántsan asati yamaikía. Núnisrik ashí Yus akupkamu umirkatniuitji.” Tutai Juan iniaisamiayi.

<sup>16</sup> Tura Jesus imiani entsaya jíinkímtai nayaimp<sup>i</sup> uranmiayi. Tura Yusa Wakaní yámpitsa áintsan Jesusan tarimiayi. Niisha wáinkíamiayi.

<sup>17</sup> Túramtai nayaimpinmaya Yus chichaak “Juka winia Uchiruiti. Ti anea-muiti. Ti shiir enentáimtajai” tímiayi.

## 4

### *Uunt iwianch Jesusan anankataj tímiania nu*

(*Márkus 1.12-13; Rúkas 4.1-13*)

<sup>1</sup> Nu túrunamtai Yusa Wakaní Jesusan iwianchjaj nekapmamtiksatts aents atsumanam jukimiayi.

<sup>2</sup> Nuí kuarenta (40) tsawant, káshisha tsawaisha yurumtsuk pujak tsukarmiayi.

<sup>3</sup> Nuí uunt iwianch Jesusan nekapsataj tusa tarí tímiayi “Nekas Yusa Uchirínkiumka ju kaya apatuk najanata.”

<sup>4</sup> Tutai Jesus tímiayi “Yus-Papinium áarmaiti: “Aents aya apatkujajin iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

<sup>5</sup> Tutai uunt iwianch Jerusarén péprunam juki Yusa Uunt Jee cháikín iwiak

<sup>6</sup> tímiayi “Nekas Yusa Uchirínkiumka juyá akaikim iniaata. Kame Yus-Papinium áarmaiti:

“Yus ni suntarin akatar akúptúrmaktatui. Nawemin kayanam ajiintsumnin wenkurmaktatui” tawai” tímiayi.

<sup>7</sup> Tutai Jesus tímiayi “Núnisan Yus-Papinium áarmaiti: “Ame Úuntrum Yus “Nekapsataj” tiip” tawai” tímiayi.

<sup>8</sup> Ataksha uunt iwianch naint yakí wájakmanum iwiakmiayi tura nuyá ashí nunkanmaya péprun shiira nuna iniaktusmiayi.

<sup>9</sup> Tura tímiayi “Winia tikishmatrurakminkia juna mash amastatjai.”

<sup>10</sup> Tutai Jesus tímiayi “Werumta, uunt iwianchi. Yus-Papinium aarma awai: “Ame Úuntrum Yúsak tikishmatrata tura Niñki shiir awajsata” tawai” tímiayi.

<sup>11</sup> Tutai uunt iwianch Jesusan ikiuak wémiayi. Túramtai Yusa suntarí tariar atsumamurin súsarmiayi.

### *Jesus Kariréa nunkanam etserkamiania nu*

(*Márkus 1.14-15; Rúkas 4.14-15*)

<sup>12</sup> Juan sepunam enketui taman antuk Jesus Kariréa nunkanam wémiayi.

<sup>13</sup> Tura Nasarét péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkarin pujumiayi. Ti yaunchusha Jakupu uchirí Sapurúnsha tura Niptarísha nu nunkanak nuj pujustaitсар achikiaruyayi.

<sup>14</sup> Jesus nuna túramtai yaunchu Yúsnan etserin Isayas aarmia nu uminkiamiayi. Juna áarmiayi:

<sup>15</sup> “Sapurúnsha Niptarísha nayaantsanam tijiuch Jurtañ entsa amainini nunkan achikiarmiayi. Nuka Kariréaiti Israer-shuarsha matsatania nuj.

<sup>16</sup> Nu aents kiritniunam pujuiniayatan ti tsáapnian wáinkiarumiayi. Jákatniunam pujuiniaj tsáapin tsáapnirmiayi.” Tu áarmaiti.

<sup>17</sup> Nuyá Nuyá etseruk tímiayi “Tunaarum enentáimturum enentáim yapaajiátarum. Ju nunkanam Yus akupkatin tsawant ishichik ajasai.”

*Jesus kuaru aents namakan achinian ni unuiniamurj ajasarat tusa achikmiania nu*

*(Márkus 1.16-20; Rúkas 5.1-11)*

<sup>18</sup> Jesus Kariréa antumianka kánmatkarin wesa jimiara áentsun nuámtak yáchinniun wáinkiamiayi. Chikichik Antresauyayi, chikichcha Semunkauyayi. Nu Semun núnisan Pitru náartiniuyayi. Namakan achin ásar namakan nekajaj nankiak yujaarmiayi.

<sup>19</sup> Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamá namak achíarmena núnisan shuaran-ea awajsatjarme.”

<sup>20</sup> Tutai ni nekarin ikiukiar Nin nemariarmiayi.

<sup>21</sup> Nuyá ishichik wésañ ataksha nuámtak yachinniun wáinkiamiayi. Jakupu Juanjaj mai Sepetéu uchirí áarmiayi. Niisha kanunam enkemsar ni nekarin ni aparjijaj iwiarainiak pujuriarmiayi. Tura Jesus “Nemartusta” tutai

<sup>22</sup> nu chichamaik kanuncha tura aparincha ikiukiar Jesusan nemariarmiayi.

*Jesus untsurj shuaran jintintiamiania nu*

*(Rúkas 6.17-19)*

<sup>23</sup> Ashí Kariréa nunkanam Jesus Israer-shuar iruntainiam etserki wémiayi. Yus ju nunkanam akupkatin chichaman etserkamiayi. Tura untsurj sunkurjaj jáinian ashí tsuáarmiayi.

<sup>24</sup> Ashí Siria nunkanam Jesus tsuákratman nekaawar ashí nánkamas sunkurjaj wáitin armia nuna Jesusan tsuarti tusa itiararmiayi. Ashí jaancha, najaimiancha, yajauch wakantrukuncha, wáuruncha, tampemaruncha Jesus tsuáarmiayi.

<sup>25</sup> Tura untsurj shuar Jesusan nemariarmiayi. Kariréa nunkanmayasha, Tekapurisnumiasha, Jerusarén péprunmayasha, Jutía nunkanmayasha, Jurtañ entsa amainiyasha Jesusan nemariarmiayi.

## 5

*Náinnium Jesus etserkamu*

<sup>1</sup> Jesus untsurj shuar káunkarun wáiniak náinnium waka nuj pujusmiayi. Tura ni unuiniamurjsha taar pujusarmiayi.

<sup>2</sup> Nuyá Jesus júnis unuiniamiayi.



*Warastin ainia nu**(Rúkas 6.20-23)*

<sup>3</sup>“Ame wakanim atsumamu nekamarum kakaram ajasrum warastarum. Tuma asarum Yus akupeamunam pachiinniuutrume.

<sup>4</sup>Kúntuts pujarum nu warastarum. Yus atsantamprattarme.

<sup>5</sup>Péejchach enentáimtumarmena nu warastarum. Yus ashí nunkan amastatrume.

<sup>6</sup>Eseer wekasataj tusa aya kitiamarum nu warastarum. Yus imiktampratarme.

<sup>7</sup>Waitnenkratniutiram warastarum. Yus waitnentramprattarme.

<sup>8</sup>Pénker enentáimniutiram warastarum. Yus wáinkiáttarme.

<sup>9</sup>Chicham iwarin árum nu warastarum. Yusa uchirj turamartatui.

<sup>10</sup>Pénker túrakrumin yajauch awajtamainiakui warastarum. Yus akupeamunam pachiinniuutrume.

<sup>11</sup>Wíi shuar asakrumin katsekramainiakui sha, itit awajtamainiakui sha, tura ashí tsanumprutmainiakui sha warastarum.

<sup>12</sup>Núnisañ yaunchu Yúsnan etserin armia nunasha túrawarmiyai. Túramtai shiir enentáimkiuram warastarum. Nayaimpiniam ti péñker akinkiáttarme’ tímiyai.

*Ju nunkanam átum tsáapninia áintsarum tura weeya áintsarum árum**(Márkus 9.50; Rúkas 14.34-35)*

<sup>13</sup>‘Átumka ju nunkanam wee ana áintsanketrume. Tura wééaiiat jeakchaitkiunka míchuiti. ¿Nusha itiur yuámiak atí? Antsu ántraiti. Tuma asamtai aa najatai tepet tusar ajapashtinkiait’ tímiyai.

<sup>14</sup>‘Átumka ju nunkanam shiripkia áintsanketrume. Náinniumka pepru úumkachminiaiti.

<sup>15</sup>Núnisañ shiripik ekeemakam kajunnum enkeatsme. Antsu yakí sukúatsmek ashí jeanam ana nu paant atí tusam.

<sup>16</sup>Núnisañ atumsha Yusjai péñker túramu paant atí. Tura ashí aents nuna iisar niisha Yus Apan shiir awajsartatui’ tímiyai.

*Yaunchu akupkamun pachis Jesus unuiniamiania nu*

<sup>17</sup>‘Muisais akupkamuncha tura yaunchu Yúsnan etserin etserkarmia nuna ántar awajsattawai” turutiirap. Antsu nuna Wikia umiktaj tusan táwitjai.

<sup>18</sup>Nekasan tájarme. Ashí túrunatniua nu amúatsajñ nu akupkamu ishichkisha yapajniáshatui. Nayaimpisha tura nunkasha tuke amúatsajñ nu akupkamusha amuukashatui.

<sup>19</sup>Nu asamtai shuar chikichik akupkamun, yúpichuch ana nunaksha, umirchakka tura chikich shuaran umirkashtinian unuinikka Yus nekas akupin paant ajatatna nuñ nú shuar uunt áhattawai. Antsu ashí shuar akupkamun umiana nu tura chikich shuaran umirkatniun unuiniana nusha Yus nekas akupin paant ajatatna nuñ, nu shuarka uunt átatui.

<sup>20</sup>Tuma asamtai Yus akupeamunam pachiinkiataj tákumka Pariséujai nankaamas tura akupkamu jintinniuujai nankaamas eseera wekasatniiuutrume’ tímiyai.

*Kajeamun pachis Jesus unuiniamiania nu**(Rúkas 12.57-59)*

<sup>21</sup>‘Yaunchu tiniu armia nu ántichukaitrum: “Mankartuawairap. Mankartana nuka asutniátniuiti” tiniu ármiyai.

<sup>22</sup> Tura Wis̄a tájarme: Shuar ni yach̄in aya kajerakka nusha asutniátniuiti. Ni yach̄in kátsekea nuka akupniunam junaktiniaiti. Tura ni yach̄in “netsé” tákuṅka jinium akupnakminiaiti.’

<sup>23</sup> ‘Tuma asamtai Yus susataj tusam wakerakum tura ame yatsum ámin itit enentáimturman enentáimpramka,

<sup>24</sup> suamu nuḡ ikuakum emka ame yatsum werim niijjaj̄ iwiarata. Turam waketkim Yus suam nu susata.’

<sup>25</sup> ‘Shuar úntnum júramkuṅkia jintian̄ wesam niijjaj̄ iwiarata úntnum ejetamtsaj̄n. Túrachakminkia úntnum surutmaktatui tura niisha suntarnum surutmaktatui tura sepunam enketmattawai.

<sup>26</sup> Tura nekas tajai, nuḡ enkemamka ashí rearchisha akikmachkumka jíinkis̄tatme’ tímiayi.

### *Tsanirmatniun pachis Jesus unuiniamiania nu*

<sup>27</sup> ‘Yaunchu tiniu armia nu ántichukaitrum: “Tsanirmawaip.”

<sup>28</sup> Tura Wis̄a tájarme: Shuar nuw̄an tsanirmataj tu iiska nuḡkia ni enentáin̄ tsanirmayi.’

<sup>29</sup> ‘Tuma asamtai ame j̄imi tunaanum yajauch awajtamkuṅkia ukuṅkiam yajá ajapata. Ashí ame ayashim jinium esaatsaj̄n̄ aya chikichik ayashmi muchitmar̄i emesratin péṅkeraiti.

<sup>30</sup> Ame ewejmesha untsurmetiat tunaanum ajunmakuiṅkia tsupikiam yajá ajapata. Ashí ame ayashim jinium esaatsaj̄n̄ aya chikichik ayashmi muchitmar̄i emesratin péṅkeraiti.’

### *Nuw̄a ajapatniun pachis Jesus unuiniamiania nu*

(*Mateu 19.9; Márkus 10.11-12; Rúkas 16.18*)

<sup>31</sup> ‘Núnisan̄ yaunchu tiniu ármiai: “Shuar ni nuar̄in̄ ajapatniun wakera nuka papí najana susati.”

<sup>32</sup> Tura Wis̄a tájarme: Shuar ni nuar̄in̄ tsanirmachun ájapeakka nuw̄an tsanirmamtikiaiti. Tura ajapamujaj̄ nuatnaiyakka nuka tsanirmaiti.’

### *Jesus aya nekasa nu titinian unuiniamiania nu*

<sup>33</sup> ‘Núnisan̄ yaunchu tiniu ármiai: “Yusa naar̄i pachisan turattajai” tákumka nekas takamtsuk umiktiniaitme.”

<sup>34-37</sup> Tura Wis̄a tájarme: Áyatik “Ee” tákumka tura “Atsá” tákumka wáitrusuk nuke titiá. Támena nu nekas umiktaj takum ame nú arant pachistiniaitkiumka nuka yajauchiiti, iwianchnumiati. Ti nekas tajai tusam nayaim pachischatniuitme. Nuka Uunt Yus pujutainti. Nun̄kasha pachischatniuiti Yus̄a tarimtaiṛi asamtai. Jerusareṅ péprusha pachischatniuiti Uunt Akupin pujutai nuḡ asamtai. Múukmesha pachischatniuitme. Chikichik intiashkesha pújusha mukusasha awajsachminiaitme. Áyatik nekasa nu páchitsuk titiá.’

### *Ikkiatniun pachis Jesus unuiniamiania nu*

(*Rúkas 6.29-30*)

<sup>38</sup> ‘Yaunchu tiniu armia nu ántichukaitrum: “Shuar máanikiar̄ j̄i apujtukka niisha apujtuktiaiti. Tura naj̄ akarkasha ni naj̄sha akarkatniuiti.”

<sup>39</sup> Tura Wis̄a tájarme: Yajauch shuar taritraitrap. Antsu ame yapimin ijutmamtai áatú yapimsha tsan̄katkata.

<sup>40</sup> Tura pushirmin jurutramkítiaj tákuisha sakurmesha susata.

<sup>41</sup> Tura káarkancha chikichik kirumitruk jurutkítia túramkui ámek̄a jimiará kirumitru ejeeta.

<sup>42</sup> Seatmana nu susata. Ikiatmakuisha páchitsuk ikiasta.’

*Nemasrj aneetniun Jesus unuiniamiania nu**(Rúkas 6.27-28, 32-36)*

<sup>43</sup> ‘Núnisaṅ tiniu armia nu ántichukaitrum: “Ame shuarum aneeta tura nemasrumka kajerkata.”

<sup>44</sup> Tura Wisha tájarme: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awajtamainiana nusha Yus áujtusarta.

<sup>45</sup> Atumsha nu túrakrum atumí Aparj nayaimpiniam pujana nu túrana áitkiasrumek túarme. lista, Yus yajauch shuarnumsha péñker shuarnumsha tsápin awajmatkiatsuk. Núnisaṅ yumincha yajauch shuar pujuiniamunmasha péñker shuar pujuiniamunmasha yútumtiktsuk.

<sup>46</sup> Aya atumin anenmainia nuke aneakmesha ¿yaki akirmakat? Yajauch shuarsha nuna túrin ániawai.

<sup>47</sup> Aya ame yatsumek shiir chichaakmeka ¿warí péñkerak túram? Yus-shuarchasha nuna túrin ániawai.

<sup>48</sup> Nu asamtai atumí Aparj Yus nayaimpiniam pujana nujaj métek ti péñker átiniaitrume.’

**6***Péñker túratniun Jesus unuiniamiania nu*

<sup>1</sup> ‘Ashí íimiainiaṅ aya shuar iirsarti tusarum Yusna nu takasairap. Tu takaakrumniṅkia Yus Apa nayaimpiniam pujana nu peṅké akirmakchat-tarme.

<sup>2</sup> Nu asamtai shuar atsuma nu yayiakmeka ashí shuar ujakairap. Anaṅkartin ainia nuka iruntainmasha tura pepru jintí wekasasha ashí íimiainiaṅ shiir túrajai tusar nuna túrin ániawai. Júnasha “péñker túrawai” tu enentáimturarti tiniu ásar Yus akiatsaṅ aya tu enentáimturmajaj akinkiaruiti, nekas tajai.

<sup>3</sup> Antsu átumka atsumainia nu yayiakmeka peṅké úṅkam túrata. Chikichk-isha nu yáinman nekaashti.

<sup>4</sup> Úṅkam túrakminkia ame Apa Yus uṅkman wainia nu, nuna akirmaktatui.’

*Yus áujsatniun Jesus unuiniamiania nu**(Rúkas 11.2-4)*

<sup>5</sup> ‘Atumsha Yus áujeakrumsha ántar chichamtin ainia núnis áujsaairap. Nu shuarka iruntainmasha tura pepru jintísha shuar iirsarti tusa wajakiar Yúsan áujin ániawai. Nekasan tájarme, Yus akiatsaṅ aya nu iismajaj akinkiaruiti.

<sup>6</sup> Tura ame Yus áujeakmeka ame kuárturmin wayam waiti epenim nuj amek ame Apa Yus áujsaata. Nuna ame Apa Yus uṅka túramu waitma asa akirmaktatui.’

<sup>7</sup> ‘Yus áujeakmesha ántaram esaram áujsaip. Yúsan nékainiatsna nuka “Esaram áujeakuinkia Yus anturtuktatui” tu enentáimainiawai.

<sup>8</sup> Niijjaj métek ajasairap. Átumka seatsrumniṅ Yus Apa átum atsumamun nékawai.

<sup>9</sup> Nu asamtai Yus áujkuraṅ júnis títiniaitrume:

‘Aparu Yus, nayaimpiniam pujamna nu, ii Aparjme. Ame náarmincha shuar ántar pachischarti.

<sup>10</sup> Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisaṅ ju nuṅkanmasha uminkiatí.

11 Aparu, ii yurumkarj ashí tsawant amasta.

12 Tura winia nemasrun tsan̄kurajna núnismek, Aparu, winia tunaaru tu-mashrjsha tsan̄kurturta.

13 Tunáa wakeruktin tsan̄katrukaip. Antsu ashí tunaanumiá uwemtikurru. Tuke ashí aents akupkamniatme. Núnisam Amesha tuke ti kakarmaitme. Tura ti shúiraitme. Tuma asakmin seajme. Nuke atí.'

14 'Amesha chíkich shuar yajauch awajtamka nu tsan̄kureakminkia Yus Apa nayaimpiniam pujana nu amincha tsan̄kurtamprattawai.

15 Tura chíkich tsan̄kureachkumniñkia Yus Apasha ame tunaarmincha tsan̄kurtamprashtatui.'

### *Jjarmatniun pachis Jesus unuiniamiania nu*

16 'Jjarmarum Yus áujkurmasha wake mesekrum susuntrairap. Anañkartin shuar chíkich shuar "jjarmaiti" tu enentáimtursarti tusa tuma áiniawai. Nekasan tájame, Yúska akiatsain̄ aya nujaj akikma áiniawai.

17 Antsu ámeká jjarmamsha péñker temashmaram péñker jaupmitia.

18 Shuar jjarmaiti tu enentáimturmasarain̄. Aya Yus Apak nekaattawai. Tura asa akirmaktatui.'

### *Kuítian pachis Jesus unuiniamiania nu*

*(Rúkas 12.33-34)*

19-20 'Ju nun̄kanmayá kuit ikiaun̄katniujaj nan̄kaamas nayaimpiniam kuit ikiaun̄kata. Juñkia kayaa yúchakait tura mash meseatsuk. Tura kasasha wayá kasamtsuk. Antsu nayaimpinman̄ka kayaaasha yuatsui tura mash meseatsui tura kasasha wayá kasamtsui.

21 Kuítrum ana nuj enentáimtustatme. Tuma asam nayaimpiniam iki-aun̄kata.'

### *Ayashj tsáapninri*

*(Rúkas 11.34-36)*

22 'Ame jímijjai tsáapin amiin wayamniaiti. Tuma asamtai ame jjiimi péñkeraitkiuñkia amiin tsáapin wayá tuke tsáapniiti.

23 Antsu ame jjiimi yajauchitkiuñkia tsáapin amiin wayachmin asamtai tuke kiritin átatui. Núnisan̄ yajauchia nu wakerakmeká péñkera nu ame enentáimiin wayachmin asamtai tuke kirit ajastatui. Nu kiritcha imiá yajauchiti.'

### *Yussha kuitsha máimtek enentáimtuschamniaiti*

*(Rúkas 16.13)*

24 'Shuar jimiará úntrin̄ umirkatniun tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisan̄ átumka Yussha kuitcha máimtek enentáimtustin̄ tujinkiattarme.'

### *Yus ni uchirín péñker wáinkiaiti*

*(Rúkas 12.22-31)*

25 'Tuma asamtai tájarme: Wariniak yuataj wariniak umartaj tura wariniak entsartaj tusarum nuke enentáimsairap. Yus iwiaaku átinian amasu asa yurumkancha amaschamniakait. Tura ju ayashniasha najana asa entsa-tain̄cha amaschamniakait.

26 Chínkisha enentáimpratarum. Yaki nanamainiak yurumkan arakmaini-atsui. Tura juuk yurumkan ikiuiniatsui. Tuma ain̄ Yus Apa nayaimpiniam pujana nú Yusak áyureatsuk. Atumsha chin̄kia nú nan̄kaamaschakaitrum.

27 Nu arantcha tí enentáimkiumsha ¿nujaj tsakartatmek?'

<sup>28</sup> ‘Nuikia ζurukamtai entsartincha timiá enentáimprum? Iistá, kukujssha takachuitiat tura najanchaitiat

<sup>29</sup> ti shírmach áiniawai. Yaunchu uunt akupin Sarumún ti shiir iwiarmam-niuitiat kukujsia tímianchayayi.

<sup>30</sup> Iis, nupa yamá tsakaawai tura kashin aents tsupikiar jinium epeenawai. Tuma ain Yus ti shiir áentseatsuk. Nuna tura asa atumniasha nú péñker waitmakchattawak. ζUrukamtai Yus nekas enentáimtatsrum?

<sup>31-32</sup> Ju nunkanam ana nu pachikiairap. Chíkich shuar, Yúsán nékainiatsna nu, warin yuattaj’ warin umartataj’ warin entsartataj’ nuna ti pachiiinawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin nékawai.

<sup>33</sup> Tuma asamtai Yusjái shiir wekasatin tura Yus akupkamu ana nu umik-tin emka enentáimsatarum. Túrakrumniñkia atsumamurmin Yus suramsat-tawai.

<sup>34</sup> Kashin átatna nujai itirchat enentáimsairap. Kashinkia nusháa itircha-trjiaí tsawarchattawak. Yamái tsawanta jujai máakchakit.’

## 7

### *Chíkich sumamtikiawairap*

*(Rúkas 6.37-38, 41-42)*

<sup>1</sup> ‘Chíkicha tunaarj ti enentáimtusairap. Núnisan Yus atumí tunaarj iirtam-sashtatui.

<sup>2</sup> Chíkich wárik sumamtikiatin enentáimkiumniñkia Yus núnisan sumamtikramattawai. Tura ame chíkicha túramurj nekapmarmena nú nekapkajain amincha nekapmarmattawai.

<sup>3</sup> Tuma asamtai ζitiurtsuk atumi jijn numi enketna auk ítskesha atumi yachí jijn tsuat enketusha iyarum?

<sup>4</sup> Ame jiiimjin numi tuke enketajsha ζitiurtsuk ame yatsumi jiiya tsuátan jurustajme tame?

<sup>5</sup> Ántar shuará, ame yáintaj tákumka emka ame jiiimjin numi enketna nu jusata. Nuyá paant iistatme yatsumi jijn tsuat enketna nu jurustin.’

<sup>6</sup> ‘Ti shiira nuka yawá súsashtiniaiti. Nuna nakitrar amincha esat-michartimpiash. Kuítrumsha kuchi súsashtiniaiti. Aya najatrachartatuak.’

### *Yus seakmin suramsattawai*

*(Rúkas 11.9-13; 6.31)*

<sup>7</sup> ‘Yus seakrumin suramsattawai. Eakrumka wainkiattarme. “Winiajai” tákurmin awaintiamattarme.

<sup>8</sup> Seana núnaka suíniawai. Eana nuka wáiniui. “Winiajai” tuinia núnaka awainiawai.’

<sup>9</sup> ‘Ame uchiram apatkun seatmakui ζkayaash súsaintiam?’

<sup>10</sup> Tura namakan seatmakui ζnapíash súsaintiam?’

<sup>11</sup> Nuikia átum yajauchitirmesha atumi uchirí péñker ana nu tuke súchakaitrum. Nuna nankaamas nuikia seakrumniñkia atumi Aparj nayaimpiniam pujana nu péñker ana nuna suramsashtatuak.’

<sup>12</sup> ‘Júnaka Muisaishsha Yúsán etserniusha akupenawai: “Chíkich ámin túrutatí tusa wakerakmeká amesha núnismek túratá.” Tu akupenawai.’

### *Wankaram jintiasha tura yupikiach jintiasha*

*(Rúkas 13.24)*

<sup>13-14</sup> ‘Wankaram jintia awai. Wayatniusha yúpichuchiiti. Nujsa untsurj wáiniawai. Tura nusha menkkatniunam jeawai. Túrasha chíkich jintia awai.

Nusha yupikiach asa itiurchataiti. Wayatniurisha yupikchiiti. Nuĵ ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktarum.'

*Nereĵai numi nekaatainti*

*(Rúkas 6.43-44)*

<sup>15</sup> 'Aneartarum. Wáitruiniak "Wi Yúsnan étserĵai" tuinia nu írunui. Pátatek murikiua áinis yúpichuch áiniawai tura ni enentáin nekas úunt-yawa áinis áiniawai. Pátatek shiir chichainiawai tura ni enentáin yajauch piakuiti.

<sup>16</sup> Atumsha túramujai nin nekaatniutrume. Naranmaya shuiya júukchamniati. ¿Tsachiksha kushiŋkiapen nerektatuak?

<sup>17</sup> Núnisan pénker numia nu tuke péŋkeran nereatsuk. Tura yajauch numia nu yajauchin nereatsuk.

<sup>18</sup> Péŋker numi yajauchin nereatsui. Núnisan yajauch numi péŋkeran nereatsui.

<sup>19</sup> Yajauch numi ajakar tsupirar jinium apeashtinkiaiti.

<sup>20</sup> Tuma asamtai wáittrin ainia nuka túramujai nekanattawai.'

*Ashikia Yus akupeana nuĵ jeachartatui*

*(Rúkas 13.25-27)*

<sup>21</sup> 'Aya winia Apar nayaimpiniam pujana nuna wakeramurĵin umirin ainia nuke Yus akupeamunam pachiinkiertatui. Chíkichka "Uuntá, Uuntá" turutainiyat nayaimpiniam jeachartatui.

<sup>22</sup> Amuukatin tsawant jeamtai untsurĵi turutiartatui "Uuntá, Uuntá, ame náaram pachisar ashí nunċanam etserkachmakajĵ. Ame náarmesha pachisar yajauch wakancha ĵiiki akupkamĵi. Tura ame náaram pachisar aentsti tujintiamu túramĵi" turutiartatui.

<sup>23</sup> Nuĵ chichainiakui "Werumtarum. Penċe nékachuitĵarme. Aya yajau-chitrume" titiatĵai.'

*Pénker ukurma tura yajauch ukurma*

*(Rúkas 6.47-49; Márkus 1.22)*

<sup>24</sup> 'Shuar winia chichamprun antuk umirkaŋka nu shuar ti péŋker enentáimniuiti. Niisha ĵu shuarĵai méteketete. Jeĵ jeamuk kayanam ukurmai.

<sup>25</sup> Tura yumi ti yutuk entsa nujanċruamai tura nase ti kakaram umpuimiai. Túmaiŋ pukukachmai ni ukurmari kayanam ukuamu asamtai.

<sup>26</sup> Tura shuar winia chichamprun antuk umirtukchaŋka ĵu shuara núnisan enentáimchaiti. Jeĵ jeamuk náikminiam ukurmai.

<sup>27</sup> Tura yumi yutuk entsa nujanċruamai tura nase ti kakaram umpuimiai. Túmakui jeĵ mash saanaki iniaamai" túmiayi Jesus.

<sup>28</sup> Jesus nuna tinia amukmatai ashí shuar ti enentáimprarmiayi.

<sup>29</sup> "Yusa kakarmarĵiĵai unuitiamtsujik. Israer-shuara jintinniurĵinkia núnis unuiniainiatsui" tiarmiayi.

## 8

*Jesus tunamarun tsuarmiania nu*

*(Márkus 1.40-45; Rúkas 5.12-16)*

<sup>1</sup> Jesus muraya támatai untsurĵi shuar Nin nemariarmiayi.

<sup>2</sup> Nuĵ shuar tunamaru Jesusan jearin tikishmatramiayi. Tura túmiayi "Uuntá, wakerakmeke tsuáramniaitme."

<sup>3</sup> Tutai Jesus uwejéjai antin̄ “Wakerajai. Péñker ajasta” tímiayi. Tutai tunamaru ni tunamarmari péñker ajasmiai.

<sup>4</sup> Tura Jesus tímiayi “Pai, penké etserkaip. Áyatik Israer-patri iniakmamsam Muisais timia nu susata ashí shuar nekaawarti tusam.”

*Jesus suntara uchirín tsuarmiania nu*

*(Rúkas 7.1-10)*

<sup>5</sup> Jesus Kapernáum péprunam wayamtai apachi suntara kapitíántri Nin tarimiayi.

<sup>6</sup> “Uuntá, tímiayi. Winia uchir tampemaru jeá tepes ti wait ajáa tepawai” tímiayi.

<sup>7</sup> Jesussha “Ayu, winin tsuartaiai” tímiayi.

<sup>8</sup> Tutai kapitíán tímiayi “Uuntá, Ame ti nankaamaku asam winia jearu wayachminiatme. Áyatik “Péñker ajásti” tákumin winia uchir péñker aja-trustatui.

<sup>9</sup> Iista, winiasha akuptuiniatsuk tura wisha sustaran akupenatsjak. Juna “Wetá” takui wéawai. Tura chikichnasha “Winitia” tutai winiawai. Tura takartinian “Ju túratá” tutai umíawai.”

<sup>10</sup> Kapitíán nuna tutai Jesus ti enentáimiuk Nin nemarainian tímiayi “Nekasan tájarme, Israer-shuar Yúsán tímiatrus enentáimtin atsawai.

<sup>11</sup> Maa, yajaya untsurí shuar Yus akupeana nu jeawar Apraámjaisha Isakjaisha Jakupjaisha iruntrar yurumáwartatui.

<sup>12</sup> Tura Israer-shuar Yúsnum jeamnia ániayat aa kiritniunam ajapnawartatui. Nu ti úutin tura ti wáitsatin átatui.”

<sup>13</sup> Nuyá Jesus kapitíánin chicharuk “Jeemjin waketkitia. Nekas enentáimtusú asakmin uchiram péñker ajatramsattawai” tímiayi. Túramtai ni uchirí nu chichamtaik péñker ajatsamiayi.

*Jesus Pitru tsatsarin tsuarmiania nu*

*(Márkus 1.29-31; Rúkas 4.38-39)*

<sup>14</sup> Jesus Pitru jeen we Pitru tsatsarin tsuemujai jaa tepan wáinkiamiayi.

<sup>15</sup> Tura ni uwejen antiñmatai tsuemun michatramiai. Tura nuwá nantakin ashí ajamsarmiayi.

*Jesus untsurí jáinian tsuarmiania nu*

*(Márkus 1.32-34; Rúkas 4.40-41)*

<sup>16</sup> Kashi ajasmatai yajauch wakantrukarun Jesusan itiararmiayi. Tura nu yajauch wakanin chikichik chichamjai chicharas jiki akupiararmiayi. Ashí jáiniancha tsuáramiai.

<sup>17</sup> Yúsán etserin Isayas “Ti pimpirmarincha ii sunkurincha jurutramkimi-aji” yaunchu timia nu uminkiatu tusa nu túrunamiayi.

*Jesus nemarsatin*

*(Rúkas 9.57-62)*

<sup>18</sup> Shuar untsurí Jesusan káutkarmatai “Entsa amain katiñtai” tímiayi.

<sup>19</sup> Nu Israer-shuara jintinniurí Jesusan tarí tímiayi “Uuntá, Ámin páchitsuk nemarsatniun wakerajme.”

<sup>20</sup> Tutai Jesus tímiayi “Kujanchmasha ni wáarin takaktsuk. Chinkisha pasunken takaktsuk. Tura Wi Yúsnumiáitiatan tepestiniur atsawai.”

<sup>21</sup> Nin nemarniusha tímiayi “Uunta, emka winia aparun iwiarsan ikiuuttajai.”

<sup>22</sup> Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

*Nasesha entsasha Jesusan umirkarmiania nu*  
(Márkus 4.35-41; Rúkas 8.22-25)

<sup>23</sup> Nuyá Jesus ni unuiniamurjijai uunt kanunam enkemámiayi.

<sup>24</sup> Nuĵi nase ti kakaram umpuimtai antumian ti tamparintin ajasmiai. Tura entsa kanunam yarána piákmiayi. Tuma anĵi Jesus kanunam kanar tepemiayi.

<sup>25</sup> Nuyá ni unuiniamurĵi kurashim Jesusan ishintiarar tiarmiayi “Uuntá, wayaji. Kakaram ajachkumnĵinkia jakattaji.”

<sup>26</sup> Jesus tímiayi “ĵUrukamtai timiá ashamarum, Yus enentáimtutskesha?” Nuyá wajaki nasencha entsanĵa chicharkamiayi. Tutai mash miaaku ajasmiai.

<sup>27</sup> Nuna ísar ni unuiniamurĵi ti enentáimsarmiayi. Tura tiarmiayi “Ĵusha ĵwarí áentsuit? Nasesha entsasha Nin umirainiatsuk” tiarmiayi.

*Jatara nunkanam Jesus yajauch wakantrukun tsuármiania nu*  
(Márkus 5.1-20; Rúkas 8.26-39)

<sup>28</sup> Nuyá Jesus entsá amaini katinĵi Jatara nunkanam jeamiayi. Nuĵi jimiará shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen ármiai. Tuma asamtai shuar nu jintianam nanĵaamachu ármiai.

<sup>29</sup> Niisha Jesusan wáinkiar kakantar tiarmiayi “ĵWarí pujuram iijĵai, Jesúsá, Yusa Uchirĵia. Tsawant jeatsainĵi in amukratkataĵi tusamek taum?” tiarmiayi.

<sup>30</sup> Nuĵi arant kuchi untsurí shushunmak yujaarmiayi.

<sup>31</sup> Yajauch wakanĵa Jesusan seainiak “Ĵiĵiki akupkartakmeĵa kuchĵiniam wayatĵin tsanĵkatkartukta” tiarmiayi.

<sup>32</sup> Tutai Jesus “Pai, wetarum’ tímiayi. Yajauch wakanĵa shuara enentáiyĵa ĵĵinkiar kuchĵiniam enĵkemáwarmiai. Túramtai kuchi wáurĵiar araĵ utsanamiai. Nuyá entsá inianĵkar jakerarmiayi.

<sup>33</sup> Kuchĵi wáinniusha nuna ashamkar péprunam tseĵe wéarmiayi. Nuĵi jeawar ashí túrunamun etserkarmiayi. Yajauch wakantrukun péĵker ajasmanĵa etserkarmiayi.

<sup>34</sup> Nuyá ashí nú peprunmayá shuar Jesusan inĵkiuntai tusar ashinkiarmai. Tura inĵkiunĵkar ni nunĵkeyá waketkiti tusar seawarmiayi.

## 9

*Jesus emearun tsuármiania nu*  
(Márkus 2.1-12; Rúkas 5.17-26)

<sup>1</sup> Nuyá Jesus kanunam enĵkemar antumianĵi amaini katinĵmiayi. Tura nuĵi ni péprurĵin Kapernáumnum jeamiayi.

<sup>2</sup> Nuĵi jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarĵmatai Jesus jaan tímiayi “Uchirú, kakaram ajasta. Ashí ame tunaarum tsanĵkuramuiĵi.”

<sup>3</sup> Takui Israer-shuara ĵintinniurĵi yajauch enentáimprar “Ĵuĵka Yúsan ti ya-jauch chicharui” tiarmiayi.

<sup>4</sup> Tu enentáimainian Jesus nekáa tiarmiayi “ĵUrukamtai imiá yajauch enentáimprum.

<sup>5</sup> Tua imiá yúpichuchit. Shuara tunaarĵin tsanĵkuratin yúpichuchikiaiĵi. Tura emearun “Nantakim wekasata” titin yúpichuchikiaiĵi?



<sup>6</sup> Wi Aents Ajasua núchakaitaj. Ju nunkanam Wi tunaan asakátratniuitjai. Wátsek, nu nekaatarum tusan juna iniakmastatjai.” Nuna tinia emearun “Wajaktia, tepetairam jukim jeemiin wetá” tímiayi.

<sup>7</sup> Tutai emearu tsuámar nantaki ni jeen wémiayi.

<sup>8</sup> Tura nuna ashí aents wáinkiar Yus kakarman shuáran susa asamtai ashamkar Yúsan shiir enentáimtusarmiayi.

*Jesus nemartusat tusa Mateun achíawai*

*(Márkus 2.13-17; Rúkas 5.27-32)*

<sup>9</sup> Nuyá Jesus wémiayi. Nuí wesa Mateun kuit júutainium pujan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

<sup>10</sup> Nú ukunmasha Mateu jeen yurumuk pujai yajauch armia nu Israer-shuar untsurí káunkar Jesusa unuiniamurijjai irunar yurumiarmiayi.

<sup>11</sup> Paríséusha nuna ísar Jesusa unuiniamurin aniasarmiayi “¿Urukamtia atumí Uuntrí kuitia achinjajisha tunaarinnuiujajisha irunar yuruma?”

<sup>12</sup> Tura Jesus nuna antuk tímiayi “Pénker ainia nuka tsuákratniun atsumainiatsui. Antsu jainia nu tsuákratniun atsumainiawai.

<sup>13</sup> Werum ju aarma unuimiutarum:

“Murik maam Winia surusum nujai “máakete” tátsujai. Antsu wait-nenkartutain wakerajai,” Yus-Papinium tu áarmaiti.

Wikia “pénkeraitjai” tuínian untsuktaj tusan táchaitjai. Antsu tunáa shuar ni enentáin yapajáwarat tusan táwitjai” tímiayi.

*Ijarmatniun Jesusan aniasarmiania nu*

*(Márkus 2.18-22; Rúkas 5.33-39)*

<sup>14</sup> Nuyá imiakratin Juanka unuiniamurí Jesusan tariar aniasarmiayi. “¿Urukamtai iikia tura Paríséusha ijarmají tura ame unuiniamurmeka ijarmainiatsu?” tiarmiayi.

<sup>15</sup> Jesus ayak tímiayi “Nuatma nampernum ipiaamu ainia nu ¿ajakra uutu wayamniakaít? Yamái-nuatu pujakui úutchamin áiniawai. Núnisan Wi pujakui ijarmashtin áiniawai. Tura tsawant jeattawai nuatua áintsan Wi junaktatjai. Antsu nuíka ijarmawartatui’ tímiayi.

<sup>16</sup> ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chiníkiá nuna nankaamas jaaktatui.

<sup>17</sup> Nijiamanch yamá nawar nuap najanamu arutnum yaraachminiaiti. Túramka kariak nuap najanamun ijakratniuiti, nijiamchisha ukaratniuiti, tura nuap najanamusha yajauch ajastiniaiti. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai pénker ártatui.”

*Jesus Jairu nawantríncha tura chúkich nuwáncha tsuármiania nu*

*(Márkus 5.21-43; Rúkas 8.40-56)*

<sup>18</sup> Jesus nuna taj Israer-shuara uuntrí Jesusan tari tikishmatar tímiayi “Winia nawantur jarutkayi, tura Ame winim ewejmijjai antinrukakminkia ataksha nantaktatui.”

<sup>19</sup> Tutai Jesus ni unuiniamurijjai wajakiar nijjai wearmiayi.

<sup>20</sup> Tura jintiá weenai nuwá tuse (12) uwitin numpá ájapeak wáitias pujú asa Jesusa ukuriní amainian ni pushirin antinmiayi.

<sup>21</sup> “Áyatik ni pushirin antinbaka pénker ajastatjai” tu enentaimpramiayi.

<sup>22</sup> Nuna nekáa Jesus ayantar nuwan tímiayi “Shiir enentáimprata, nawantru. Yus shiir enentáimtusú asam péñker ajasume.” Nu chichamtaik ni jáamurj péñker ajasmiayi.

<sup>23</sup> Nuyá Jesus uunta jéen jeamiayi. Tura nuj charaatum ajainiancha tura jakan iwíarsatai tusar péeman umpuiniancha wáiniak

<sup>24</sup> tímiayi “Aa jíinrtarum. Nuwáchikia jákachai antsu aya kanarai.” Penké jakan nékayat túratta nuna neka asa “aya kanarai” tímiayi. Takui aents Nin wishikrarmiayi.

<sup>25</sup> Tura nuna ashí jíir Jesus jéa wayá nuwáchin uwejnnum achik iniantkimiayi. Túram nantakmiayi.

<sup>26</sup> Nu túramu ashí nu nunñkanam etsernarmiayi.

### *Jesus kusurun jímiarán tsuármiania nu*

<sup>27</sup> Nuyá Jesus wéakui jímiará shuar jíi kusuru untsumki weriarmiayi. “Uuntá, ii Uuntrj Tawit ame weatrum asamtai in waitneñkarturta” tiarmiayi.

<sup>28</sup> Jesus jéa wayamtai jíi kusuru tariarmiayi.

Tura Jesus aniasar “¿Juna túramniaiti túrutrumek?” tímiayi.

Niisha “Ee, Uunta” tiarmiayi.

<sup>29</sup> Tuñiakui Jesus ni jíin antinkiar tímiayi “Átum nekas enentáimtarmena núnisan túrunati.”

<sup>30</sup> Nujai jíi péñker ajasarmiayi. Nuyá Jesus “Etserkairap. Shuar penké nekáwarain” tímiayi.

<sup>31</sup> Támaiaiti jíinkiar Jesus túramun ashí nu nunñkanam etserkarmiayi.

### *Jesus chichachun péñker awajsamiania nu*

<sup>32</sup> Nuyá wenaj shuar yajauch wakantruksu chichachun Jesusan itiararmiayi.

<sup>33</sup> Tura Jesus yajauch wakanin jíiki awemamtai nu chichachu chichakmiayi. Ashí nuna íisar ti enentáimprarmiayi. Tura tiarmiayi “Yáunchusha Israer nunñkanam jújai métek túramu penké atsuwiti.”

<sup>34</sup> Antsu Paríséuka yajauch enentáimtuiniak tiarmiayi “Nu shuar iwianchi uuntrj kakarmarjijai yajauch wakanin jíiki akupeawai.”

### *Jesus shuaran waitnentawai*

<sup>35</sup> Jesus ashí péprunam we ni iruntairin wayá “Yus akupeana nuj enkemátarum” tu etsermiayi. Tura ashí nánkamas sunkurjai jáiniancha tsuármiai.

<sup>36</sup> Shuaran íisar murik wáinchatia núnis pimpikiar tura kúntuts pujuinia asamtai waitnentrarmiayi.

<sup>37-38</sup> Nuyá ni unuiniamurin tímiayi “Ju aents Yus-Chicham ujaktiniaitji Yus-shuar ajarat tusar. Nu takat ti núkap awai tura takarin ishichik ániawai. Nu takatka júuktinia ántsankete. Júuktin tsawant jeamtai takau táasmatai takamtikin ujaktin átsuk takaun akupkat tusa. Atumsha núnisrumek Yus seatarum ni shuarin akupak áentsun júukarat tusarum.”

## 10

*Jesus tuse (12) unuiniamurin achikmiayi tuke nemarsatniun  
(Márkus 3.13-19; Rúkas 6.12-16)*

<sup>1</sup> Nuyá Jesus tuse (12) unuiniaturin achik Yusa kakarmarin súsarmiyai yajauch wakanin shuara enentáiyá jiiiki akupkatniun. Núnisan ashí sunkurjai jáinian tsuártinian susamiyai.

<sup>2</sup> Ju ániawai Jesus tuse (12) unuiniaturin achikiarmia nu: Emka Semun núnisan Pitru náartiniuyayi. Nuyá ni yachi Antres. Nuyá nuámtak yáchtintin Jakupusha Juansha, Sepetéu uchiri armia nu.

<sup>3</sup> Nuyá Jiripi, Parturumi, Tumas, Mateu. Mateusha kuítian achiniuyayi. Arpeu uchiri Jakupusha. Ripíu núnisan Tateu náartiniuyayi.

<sup>4</sup> Ásumpi Semunsha nuyá Jútas Iskariúti Jesusan ukunam surukmia nu. Nu tuse (12) achikma ármiai.

*Jesus ni unuiniaturin etserkarti tusa akupkarmiania nu  
(Márkus 6.7-13; Rúkas 9.1-6)*

<sup>5</sup> Nu tuse (12) unuiniaturin Jesus júnis chicharak akupkarmiyai. “Israer-shuarcha matsatmanum weerap. Samaria nunkanam péprunam weerap.

<sup>6</sup> Antsu Israer-shuar murikiua áinis Yusajya wákaru ainia nu weritiarum.

<sup>7</sup> “Tsawant ishichik ajasai Yus jú nunkanam akupin ajastin” tu etserki wetarum.

<sup>8</sup> Tunamarusha chikich sunkurjai jainia nusha tsuatarum. Jakasha iniantkitiarum. Yajauch wakancha shuara enentáiyá jiiiki awematarum. Nu túratin kuítchajai kakaram susamuitrume, tuma asamtai atumsha ashí ántarmek túratarum.’

<sup>9</sup> ‘Kurisha ashí kuitcha jukiirap.

<sup>10</sup> Uyuncha jukiirap. Sapatcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajampramsartin ániawai.’

<sup>11</sup> ‘Péprunam jearmesha pénger shuar wáinkiarum nu wayarum tuke nuin pujstarum.

<sup>12</sup> Nu jeanam wayamsha “Ju jea shiir atí” titiá.

<sup>13</sup> Nekas pénger shuaraitkiunka shiir ajasarti. Antsu nu shuar pénger itiarumachkiunka shiir ajascharti.

<sup>14</sup> Tura nánkamsan atumin awáintiamainiachkiunka anturtamainiachkiunka nuyá jiiinkitiarum. Nu shuar yajauch ásarmatai jiiinkirum atumí naweyá nunka japimiarum ikiuktiarum. Ni tunaari aents nekaawarat tusarum túratarum.

<sup>15</sup> Nu shuaran nekapsatin tsawant jeamtai Yus asutiáshtatuak. Sutum péprunmayá shuara nankaamas Kumura péprunmayá shuarnasha nankaamas Yus asutiáttawai nu shuaran’ tímiyai.

*Yajauch awajsatniun ujakmiania nu*

<sup>16</sup> ‘Aneartarum. Wisha murik yawanum akupkatniua áintsanak akupea-jrume. Tuma asamtai shiir nawamkartin áyatrum aneartarum.

<sup>17</sup> Yajauch shuarjai aneartarum. Akupniunam juramkiartatui. Israer-shuar iruntainiam asutiamawartatui.

<sup>18</sup> Wíi shuar asakrumin uuntnumsha tura nuyá akupniunmasha juramkiartatui. Núnisrum akupniuncha tura Israer-shuarchanacha winia chichamur ujaktatrume.

<sup>19</sup> Tura akupniunam surutmakakrumnisha wariniak títiyaj tu enentáimprairap. Nu uuntjai chichaakrumin Yus títinian jintinramattarme.

<sup>20</sup> Nuinkia átum enentáimmiajai chichaschattarme antsu atumí Apari Yusa Wakaní atumin chichamtikramsattarme.’

<sup>21</sup> 'Shuar ni yachincha máawarti tusa suruktatui. Apasha ni uchirín surukartatui. Uchisha ni aparín máawarti tusa surukartatui.

<sup>22</sup> Tura Wíi shuar asakrumin mash muíjramkartatui. Tura tuke katsuntea nu uwemprattawai.

<sup>23</sup> Chikichik péprunam yajauch awajtamainiakui chíkich péprunam pisartarum. Wi Aents Ajasuitjai. Tuma asan nekasan tájarme, átum Israer-shuar mashi ujatsrumniñ wantinkiattajai.'

<sup>24</sup> 'Unuiniamuka nin unuiniana nuna nankaamaschaiti. Takarniusha ni uuntri nankaamaschaiti.

<sup>25</sup> Unuiniamuka nin unuinia nujai métek ajaska maak. Takarniusha ni úuntrijjai métek ajaska maak. Wátsek, Winia atumí úuntriñ "Iwianchi uuntri" túrutainiakui atumniasha nuna nankaamas yajauch turamtatui.'

*Yúsak ashamkatniuiti*  
(Rúkas 12.2-9)

<sup>26</sup> Tuma asamtai aentska ashamkairap. Ashí uúkma nu paant nekanattawai.

<sup>27</sup> Ishishmasan kiritniunam ujaajrumna nu, tsawái kakantrarum etserkatarum.

<sup>28</sup> Aya ayáshin main ainia nu ashamkairap. Wakanin máachmin áiniawai. Antsu wakanniasha ayashniasha mai jiniüm emesramnia asamtai Yus ashamkatarum.'

<sup>29</sup> 'Jimiará chinki penké ishichik kuitjai surukmin áiniawai. Túmaitiat Yus tsankateachkuinkia nunká jaka iniainiatsui.

<sup>30</sup> Ame intiashmisha mash nekapmarmaiti.

<sup>31</sup> Nu asamtai jákatin ashamkairap. Yusjai átumka ti untsurí chinkijjai nankaamas péñkerchakaitrum.'

*Jesus natsantrashiniaiti*  
(Rúkas 12.8-9)

<sup>32</sup> 'Ashí shuar ashí íimiainiañ Winia natsantruiniatsna núnaka Winia Apar yakí nayaimpiniam pujana nuñ natsantrastatjai.

<sup>33</sup> Antsu shuar íimiainiañ Winia natsantra núnaka Wisha yakí nayaimpiniam winia Apar pujana nuñ natsantrattajai.'

*Jesusa chichamejai shuar akannartatui*  
(Rúkas 12.51-53; 14.26-27)

<sup>34</sup> 'Ashí shuar nawamnaikiar shiir pujusarat tusan ju nunkanam táchaitjai. Nuna túrat tusarum enentáimturairap. Antsu wi tamaajai shuar péñker ajasarmatai yajauch shuar nin nakittrattatui.

<sup>35</sup> Shuar ni aparín nakittrattawai. Nuwasha nukurín nakittrattawai. Natáisha tsatsarín nakittrattawai.

<sup>36</sup> Tuma asa shuar ni shuarjijai nemasrintin ártatui.'

<sup>37</sup> 'Shuar ni aparíncha nukuríncha Wijjai nankaamas aneakka Wíi shuar áchamniaiti. Núnisan ni uchiríncha nawantrincha nankaamas aneakka Wíi shuar áchamniaiti.

<sup>38</sup> Tura ashí wáitsatniun surimiatsuk ni krúsriñ yanaki jukí nemartachkuná Wíi shuar áchamniaiti.

<sup>39</sup> Aya jú nunkanam péñker pujustaj tana nu ni iwiaakmarin emesratattawai. Tura Winia anentu asa ju nunkanam péñker pujustianian páchiatsna nu tuke shiir pujustatui.'

*Akinkiatin*  
(*Márkus 9.41*)

<sup>40</sup> 'Atumin itiaarma nuka Winia itiaarui. Tura itiaarea nuka Winia akup-tukmia nunasha itiaawai.

<sup>41</sup> Yúsnan etserniuncha Yúsnumiá winiá asamtai itiaakka etserin akínkiáttana nujaj métek akínkiáttawai. Péñker shuárnasha péñker asamtai itiaakka péñker shuar akínkiáttana nujaj métek akínkiáttawai niisha.

<sup>42</sup> Uchincha Wíi shuar asamtai entsá michan shikirak súsan\_ka imiá nekas nusha akínkiáttawai." Tu tímiayi Jesus.

## 11

*Imiakratin Juan Jesusaj shuaran akupkamiania nu*  
(*Rúkas 7.18-35*)

<sup>1</sup> Tura tuse (12) unuiniamurin Jesus tinia akupkar Niisha nú nun\_ka péprunam we Yus-Chichaman jintiák etserkamiai.

<sup>2</sup> Tura Juan sepunam en\_kemas Kristu túramun antukmiayi. Antuk ni unuiniamurin jímiarán Jesusaj akupkamiai.

<sup>3</sup> Tura Jesusan aniasarmiayi "¿Nekas ame Kristu Yus akupkamu tátinia nukaitiam. Kame chikichak nákastataj?"

<sup>4</sup> Tutai Jesus tímiayi "Waketkirum ashí ántarmena nusha wáintrumna nusha Juan ujaktarum.

<sup>5</sup> Kusurusha wáinmainiawai. Shutuapsha wekainiawai. Tunamarusha péñker ajainiawai. Empekarusha ántuiniawai. Jákarusha nantainiawai. Tura kuítrinchanmasha uwempratin chicham ujakmaiti. Nu ujaktarum.

<sup>6</sup> Túrasha yawetsuk Winia tuke shiir enentáimturna nú shuar shiir átatui." Jesus nuna tutai waketkiarmiayi.

<sup>7</sup> Waketkiarmatai shuar káunkarun Jesus Juán\_kan pachis áujmatmiayi. "Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juan\_ka nú shuar-chaiti.

<sup>8</sup> Nuikia ¿warí werimiarum. Shuar péñker iwiarmampra ístai tusarmek wémarum? Warí, péñker iwiarmampraka uunta jeen pujuiniatsuk.

<sup>9</sup> Nuikia ¿warí werimiarum. Yúsnan etserniuk werimiarum? Maa, túrachmashiuram. Túrasha Juan\_ka yaunchu etserniu nan\_kaamas enentáimtustiniaiti.

<sup>10</sup> Yaunchu Yus-Papinium áarmaiti: "Winia akatramurun amiini emka akupeajai ame jintimin iwiarat tusa." Juan nu akatramuiti.

<sup>11</sup> Nekasan tájarme, shuar imiakratin Juan\_jai nan\_kaamas uunt atsuwiti. Tuma ain Yus akupeamunam pachiinia nu shuarnaka, nekasmianchancha, Juan\_jai nan\_kaamas shiir enentáimtustiniaiti. Tuma asamtai nu\_ji pachiinkiatin enentáimpratarum.'

<sup>12</sup> 'Kakaram shuarka imiakratin Juan támia nú tsawantnumiá Yus aku-peamunam ti pachiinkiatniun wakeruiniak kakarmajai pachiinkiatniun enentáimiainiawai.

<sup>13</sup> Juan pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi.

<sup>14</sup> Yaunchu Yúsnan etserin "Kristu táatsain\_ Eriás tátiniaiti" tímiayi. Tura nekaatin wakerakrumka Juan nu Eriásaiti.

<sup>15</sup> Antuktin jeakrumka nekaatarum.'

16 ‘Ju áentsnasha ¿warijjai métek nakumkataj? Uchijjai métek áiniawai. Ni aijjai iruntrar nakurustaj táyatan tuñiawai

17 “Námpera áinis nakurustaitsar peem umpuarji túrasha jantsemáchurme. Nuyá iwíarsatniua áinis nakurustaitsar íwiareakur kantamtai kantamáji túrasha átum úutcharme.”

18 Atumsha núnisaitrume. Kame Juan núkap yurumtsuk nijiamchinha úmutsuk wekaimiayi. Túmakui átumka “Yajauch wakantrukuiti” tímiarme.

19 Nuyá Wisha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wi túramujai Yus nekas nékamu nekanattawai.”

*Yajauch péprunmaya shuaran chicharkamiania nu*  
(Rúkas 10.13-15)

20 Nuyá tujintiamun túramiania nú peprunmaya shuaran pachis Jesus chicharkamiayi. Tuma ain nuyá shuar ni enentáin yapajjácharu asamtai juna chicharkamiayi.

21 “Wáinkiatá, Kurasín péprunmayatiram, Petsaitia péprunmayatirmesha. Nuñ aents tujintiamun ti túraitjai. Tíru péprunmasha Setun péprunmasha nu tujintiamu túramuitkiuinñkia yaunchu ni enentáin yapajjáwaraayí. Túrawar kúntuts pujutai pushín entsarar yunñkunim ajakiaraayí.

22 Tura Wisha tájarne, nekapsatin tsawant jeamtai Yus atumin tí asuttiamattarme. Tírunmaya shuaran nanñkaamas tura Setunnumiá shuaran nanñkaamas asuttiamattarme.’

23 “Tura atumsha Kapernáum péprunmayatirmesha, ashí nanñkaamas nanñkaamantu ajastin enentáimtumarme. Antsu ashí emestamprartatui. Atumijn aents tujintiamun ti túraitjai. Sutuma péprunam nu tujintiamu túramuitkiuinñkia nu pepru yamaisha tuke aayí.

24 Tura Wisha tájarne, nekapsatin tsawant jeamtai Yus Sutumanmaya shuar nanñkaamas atumin asuttiamattarme.”

*“Winin ayampratarum” tímiania nu*  
(Rúkas 10.21-22)

25 Nuyá Jesus tímiayi “Shiir enentáimtajme, Aparu, ashí nayaimpisha nunñkasha Úuntrinme. Tuma asam Ame túram nu ti unuimiaru enentáimtumainia nuyá úukuitme antsu uchichia áinis nanñkaamantu enentáimtumainiatsna nú shuar paant awajutsuitme.

26 Ame, Aparu, núnis wakera asam túraitme.’

27 ‘Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai.

28 Ashí pimpikniutirmesha itiurchat pujarmena nusha Winí winitiarum. Túrakrumniñkia ayamtikrattajrume.

29 Wi kajechu asan tura péejchach enentáimin asamtai Winí winirum unuimiarum. Winia chichamur ántakrum umiákrumniñka atumí wakaní ayamprattawai.

30 Atumin akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

## 12

*Jesusa unuiniamurj ayampratin tsawantaj trikiu neren pakaarmiania nu (Márkus 2.23-28; Rúkas 6.1-5)*

<sup>1</sup> Nuyá Jesus ayampratin tsawantaj ajanman ajapenin nankaamamiayi. Ni unuiniamurjsha tsukarar trikiu neren majusar yukí wekasarmiayi.

<sup>2</sup> Pariséu shuarsha nuna wáinkiar Jesusan aniasarmiayi “Iista, ame unuini-amuram ayampratin tsawantaj túratin surimkiamua nuna túruiniawai.”

<sup>3</sup> Tutai Jesus tímiayi “Yaunchu uunt akupin Tawitcha tura nemarniussha tsukamainiak túrawarmia nu ántichukaitrum.

<sup>4</sup> Yusa Uunt Jeen wayá Yus iniaktusma tantan yuámiayi. Nu tantasha aya Israer-patrik yúatin asantai Tawitniasha tura ni nemanin ana nunasha suritkiamuyayi. Túmain yúawarmiayi.

<sup>5</sup> Muisais akupkamunam aarma nu áujsachukaitrum. Israer-patrikia ayampratin tsawantaj takainiayatan nusha tunaachuiti.

<sup>6</sup> Nekas tájarne, yamá Yusa Jeen enentáimustinia nuna nankaamas Wíniaka Aents Ajasuitjiana nu, nekas enentáimtursatniuitrume.

<sup>7</sup> Yus-Papinium tawai:

“Murik maam Winia surusum nujaj “maakete” tátsujai. Antsu wait-nenkartutain wakerajai.”

Nu chicham nekas nékaitkiurmeka yamá túrarmena núnisrum tunáa túrachu ánrarum súmamtikiachaintrume.

<sup>8</sup> Wi Aents Ajasu asan ayampratin tsawantan Úunrintjaj.”

*Shuara uweje jakan Jesus tsuármiania nu (Márkus 3.1-6; Rúkas 6.6-11)*

<sup>9</sup> Jesus nuyá wé Israer-shuar iruntainiam wayamiayi.

<sup>10</sup> Nuj shuar ámiayi ni uweje jaka. Tura Jesusan ántar nekapsatai tusa wakeruinia ásar aniiniak “¿Ayampratin tsawantaj jaa shuar tsuarminkiait?” tiarmiayi.

<sup>11</sup> Tutai Jesus tímiayi “Atumsha atumí murikrj ayampratin tsawantaj waanam akaiki iniamtai jusatai tusarum wéchaintrupash.

<sup>12</sup> Antsu shuarka murikjaj nankaamaschakait. Tuma asantai ayampratin tsawantajsha péñker ana nu túramniaiti.”

<sup>13</sup> Tinia iniaís áishmankan uweje jakan tímiayi “Uwejem takuitia.” Tutai uweje takuj chikich uwejéjaj métek péñker ajasmiai.

<sup>14</sup> Nuna túramtai Pariséu shuarsha aa jíinkiar Jesus itiurak máawaintiaj<sup>i</sup> tusar chichaman najatiarmiayi.

*Isayas Jesusnan tímia nu uminkiamiayi*

<sup>15</sup> Jesus nin máatniun nekaama nuyá jíinkimiayi tura wéakui untsurj shuar nemariarmiayi. Untsurj jáiniancha tsuámiayi.

<sup>16</sup> Tsuar “etserkairap” tinia akupiarmiayi.

<sup>17</sup> Yaunchu Yúsnan etserin Isayas tímia nu uminkiat<sup>i</sup> tusa túrunamiayi. Niisha juna áarmiayi:

<sup>18</sup> “Júiti Wi achikmaj nu. Niisha Wi tájana nuna umin asantai ti aneakun Niijjaj waraajai. Winia Wakantru kakarmarin takamtsuk susat-tajai. Túramtai winia uwempratin chichamprun ashí Israercha nunkanmasha etserkattawai.

<sup>19</sup> Jiakchattawai tura kakaram chichaschattawai. Winia anturtukarat tusa péprunam weak untsukchartatui.

<sup>20</sup> Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisan shuar ji yama ikiapámu áinis kakarmachu ainia nuna ikiajniatsuk ikiakártatui. Tura ashí nupetak ti péñker kakaram akupin ajastatui.

<sup>21</sup> Tura Israer-shuarchasha Nin nekas enentáimtusartatui.”

*Jesusan “iwianchi uuntri kakarmarijiai túrawai” tiarmiania nu (Márkus 3.19-30; Rúkas 11.14-23; 12.10)*

<sup>22</sup> Nuyá Jesusan shuar yajauch wakantrukun itiararmiayi. Nu shuar jii kusurusha chichachusha ámiayi. Tura Jesus tsuármatai paant íimsamiayi tura chichakmiayi.

<sup>23</sup> Nuna wáinkiar shuar shiir enentáimprar tiarmiayi “¿Tawitia uchirí pampanku iniannamu uwentikkiartin tátinia nuáshit?”

<sup>24</sup> Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitántrin Pirsepún umirniuiti. Tuma asa nuna kakarmarijiai yajauch wakanin jiiiki akupeawai.”

<sup>25</sup> Jesus tu enentáimainian neka asa tímiayi “Nú nunkanmaya shuar nuamtak kajernaiyakuñkia nú nunka warí meserchattawak. Núnisan nuamtak shuar ní shuarjai mánainiakka amunaikchartatuak.

<sup>26</sup> Núnisan iwianch nuamtak jiiiki akupnainiakka máanaikiar wárik amuukashatuak.

<sup>27</sup> Kame Wi Pirsepú iwianchi kakarmarijiai iwianchin jiiiki akupeakuñkia atumí uchirísha ¿yana kakarmarijiaín jiiiki akupena? Ni túramurijiai átum awajirma nekamaratum.

<sup>28</sup> Wi Yusa Wakaní kakarmarijiai yajauch wakanin jiiiki akupea asamtai atumsha Yusa akupeamurí atumjín jeartarmena nu nekaatniutrume.”

<sup>29</sup> ‘Ista. Shuar kakaram shuara kuítrin kasarkatin wakerakka emka kakarman jinkiá aya túran ni jeen wayá kasarkamniaiti. Wi iwianchin jiiikmiajai uunt iwianch nupetkamua nu nekaamniaiti.’

<sup>30</sup> ‘Wijiai tsaniñ pujatsna nuka winia nemasruiti. Núnisan Winia yáintsuna nu aya itíurchat nájateawai.’

<sup>31</sup> ‘Tuma asamtai tájarme, Ashí shuar tunáa túruinia nusha yajauch chichainia nusha tsankuratin awai. Antsu Yusa Wakanin yajauch chicharin ainia nuka tsankurashiniaiti.

<sup>32</sup> Winiasha Aents Ajasuitjana nuna yajauch chichartuinia nú shuarsha tsankuramniaiti. Tura Yusa Wakanin yajauch áujmatainia nuka penké tsankurachminiaiti. Ju nunkanmasha tura ukunmasha tsankurnarchattawai’ tímiayi.

*Ni nerejai numi nekaamniaiti (Rúkas 6.43-45)*

<sup>33</sup> ‘Yutai numi péñkeran nereawai. Tseas numisha yajauchin nereawai. Ni nerejai numi nekaamniaiti. Núnskete atumjai.

<sup>34</sup> Tseas wenunniutirmesha, ¿atumsha itíurak imiá yajauchitirmesha péñker chichamsha chichastarum? Shuar ni enentáin enentáimna nuna chichaawiti.

<sup>35</sup> Péñker shuar péñker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti.

<sup>36</sup> Tura Wisha tájarme, nekapsatin tsawant jeamtai ashí enentáimtsuk chichakma nuna Yúsan paant ujakartatui.



<sup>37</sup> Iis, ame chichammijaj nekanattarme. Péñker chichakuitkiumka sumamashtatme. Tura péñker chichakchaitkiumka sumamattame.”

*Nu shuar yajauch ásar iniakmamun seawarmiania nu  
(Márkus 8.12; Rúkas 11.29-32)*

<sup>38</sup> Pariséu shuarsha Israer-shuara jintinniurisha Jesusan chicharuk “Uuntá, ame Yúsaiyajtjai tusam nayaimpinmayá kakarmajaj iniakmamu túrata, iisha wáinkiatái” tiarmiayi.

<sup>39</sup> Tutai Jesus tímiayi “Shuar yajauch tura Yúsan enentáimtachu ásar nayaimpinmayá iniakmamun seainiawai. Tuma asamtai, áyatik yaunchu Junas túrunamu iniakmastiniaiti.

<sup>40</sup> Junas menaintiu kashi menaintiu tsawantcha namaka ampujen enkemsamiayi. Núnisak Wi, Aents Ajasu asan, menaintiu kashi menaintiu tsawantcha nunká jakan tepestatjai.

<sup>41</sup> Júnás Níniwi péprunmayá shuaran Yus-Chichaman etserkamtai nu shuar ni tunaarín enentáimtusar ni enentáin yapajjáwarmiayi. Tura juí yamá Junasa nankaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmayá shuar juyá shuaran súmamtikiawartatui.’

<sup>42</sup> ‘Yaunchu nuwá yajayá shuaran úunt akupniurijayai. Nu nuwá Sarumún ti neka asamtai nin anturkataj tusa tarimiayi. Tura juí yamá Sarumúnjai nankaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtikiawartatui’ tímiayi.

*Yajauch wakan jiki akupkamuitiat wáketna nu  
(Rúkas 11.24-26)*

<sup>43</sup> ‘Shuara enentáiyá yajauch wakan jíinkin yumi penké yútatsna nuí wéawai. Tura nuí péñker pujustinian wáinkiach ataksha waketkitniun enentáimiui.

<sup>44</sup> “Wi jíinkimiyá nuí waketkittijai” tawai. Tura waketki shuara enentáin péñker iwiaramu tura ankantán wáiniak

<sup>45</sup> ni ajn siati (7) iwianchin níijijai nankaamas yajauchin itia shuara enentáin enkemáwartatui. Túrunamtai nu shuar nuiki núna nankaamas yajauch ajastatui. Núnisañ juyá shuar túrunawartatui” tímiayi Jesus.

*Jesusa yachí, Jesusa nukurí  
(Márkus 3.31-35; Rúkas 8.19-21)*

<sup>46</sup> Jesus nu shuarjaj tuke chichaak pujaj ni nukurisha ni yachisha tariarmiayi. Tura aa wajasar Níijijai chichastaj tiarmiayi.

<sup>47</sup> Túramtai Jesusan ujakar “Ame nukusha yatsumsha aa wajasar chichastaj turamainiawai” tiarmiayi.

<sup>48</sup> Chichaman ujakmia nuna Jesus tímiayi “¿Ya ainia winia nukursha winia yatsursha?”

<sup>49</sup> Nuyá ni unuiniamurín iniakmas tímiayi “Ju ániawai winia nukur tura winia yatsursha.

<sup>50</sup> Ashí shuar winia Apar nayaimpiniam pujana nu wakeramun umiiniana nu winia yatsur winia umar winia nukur ániawai” tímiayi.

## 13

*Untsurí métek-taku chichamjaj Jesus unuiniamiania nu*

*(1) Atsaamin atsaampramiayi  
(Márkus 4.1-9; Rúkas 8.4-8)*

1 Nu tsawantaj Jesus ni jeeya jlinkin antumianka kánmatkarin pujusmiayi.

2 Tura ti untsurj shuar káunkarmatai kanunam enkmear nuj pujusmiayi. Shuarsha antumianka kánmatkarin pujusarmiayi.

3 Túrunawarmatai untsurj métek-taku chichamjaj unuiniamiayi. “Atsaamin atsaamprataj tusa jlinkimiai, tímiayi.

4 Atsaamki wesa arakri jintia písunmasha iniaarmai. Tura chiniki tariar yuawarmai.

5 Chikichcha kaya írunmanum iniaarmai. Nunka ishichik asamtai wárik tsapainiarmai.

6 Tura nantu etsantramtai péñker kankáprúrcharu asa sukuam káararmai.

7 Chikichcha janí nupanam iniaarmai. Tura janí wárik tsakar nupetak ajakramai.

8 Chikichcha péñker nunkanam iniaarmai. Nusha péñker nerekar chikich siansha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai.

9 Kuishim ákuinkia antuktarum” tímiayi.

*“¿Urukamtai aya métek-taku chichamjaj jintiam?” aniasarmiania nu (Márkus 4.10-12; Rúkas 8.9-10)*

10 Nuyá ni unuiniamurjín Jesusan taruntar aniiniak “¿Urukamtai aya métek-taku chichamjaj ju shuar unuiniam?” tiarmiayi.

11 Tutaj Jesus tímiayi “Urukuk ju nunkanam Yus akupin ati, nuka yaunchu nekanachmiayi. Tura yamaikia Yus ashí nuna atumin paant iniakturmawai. Antsu chikich nuna nekaachmin áiniawai.

12 Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniaiti. Núnisan Yusna ti nekarum nú núkapka yúpichuch nekaattarme. Tura ishichik nékarum wárik kajinmatkittarme.

13 Tuma asamtai aya métek-taku chichamjaj unuiniajai. Nú shuarka íniayatan wáiniániatsui. Ántuiniayatan ántachua núnis nékainiatsui. Túmainiak Winia nekarainiatsui.

14 Nujaj yaunchu Yúsna etserin Isayas timia nu uminkiaiti. Juna tímiayi: “Ti ántayatrú anturkashtatrome. Wáiniatrúmsa nekaashtatrome.

15 Ju shuara enentáj kátsuram ásar péñkera nuna nakitiainiawai. Nu asamtai péñker ántuiniatsui, jishsha pusá áinis áiniawai. Túrachkunka paant nekaawarainti, tura nekas antukarainti, tura enentájijaj enentáimias Winia tsuarat tusa tarutiarainti.”

16 Tura átumka paant wainkia asarum péñker anta asarum shíraitrome.

17 Nekasan tájarme, untsurj Yúsna etserniusha tura péñker shuarsha átum yamá wáintrum nuna wáinkiatniun wakeruiniayatan wáinkicharmiayi. Tura átum yamá ántarme nuna antuktinian wakeruiniayatan antukcharmiayi’ tímiayi.

*Jesus atsaampramu chichaman paant jintintiamiania nu (Márkus 4.13-20; Rúkas 8.11-15)*

18 Ayu, antuktarum. Atsaampramu chichaman paant jintintiatjarne.

19 Árak jintia písunam iniaarma nuka shuar Yus-Chichaman ántayatan ni enentáin ikiiniatsna núiti. Tura íwianch nu Yus-Chicham ni enentáin atsaampramu áinis antukman kajinmatkiawai.

20 Árak kaya írunmanum iniaarma nuka shuar Yus-Chichaman antuk waras umirainia núiti.

<sup>21</sup> Tura núkap kaṅkaprurcharu ásar katsuiniatsui. Antsu itiuřchatan iṅkiuiniak tura Yus-Chichaman wakeruinia ásarmatai chíkich yajauch áujmatam wárik iniaisar ikuiniawai.

<sup>22</sup> Árak jaṅki nupanam iniaarma nuka shuar Yus-Chichaman antuk emka umirniua núiti. Tura ju nunḅanam írúnna nuna tuke páchiniak ni kuítríncha ti enentáimtuinia ásarmatai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin takasma atsawai.

<sup>23</sup> Tura árak péṅker nunḅanam iniaarma nuka shuar Yus-Chichaman antuk péṅker umirainia núiti. Tura péṅker nerenawai. Chíkich siaṅ (100) nerekarma núnis chikichcha sesenta (60) nerekarma núnis chikichcha trainta (30) nerekarma núnis ániawai” tímiayi Jesus.

### *(2) Yajauch nupá tríkiumam atsaamkamu*

<sup>24</sup> Jesus ataksha ju métek-taku chichaman áujmatsamiayi. “Shuar Yus aku-peamunam pachiinkiertin júnisaiti. Shuar péṅker arakan, tríkium ni nunḅen araamai.

<sup>25</sup> Tura ashí kanararmatai nemasrı kashi taa trikiu arakmanum yajauch nupān aratak ikuikmiai.

<sup>26</sup> Trikiu tsapakar nereakui nuyá yajauch nupásha nusháa nereku asa ti paant ajasmai.

<sup>27</sup> Nuna íisar takainia nu ni úuntrin werí tiarmai “Uunta, ¿péṅker arak araachmakam. Itiura júsha yajauch nupásha tsapakuit?”

<sup>28</sup> “Tutai nérentin timiai “Winia nemasur arakuiti.”

“Taku ni takarniurj tiarmai “¿Yajauch nupān uwerat tusam wakeramek?”

<sup>29</sup> “Tutai timiai “Atsá, uwerairap. Yajauch nupá uweaj tukamarum trikiu uweniirum.

<sup>30</sup> Iniaisatarum. Antsu métek tsakakti. Júuktin tsawant jeamtaí winia takartinian emka yajauch nupān uwer irumar jinkiwarat tusan akupkartatjai. Tura áesawartatui. Tura trikiu nerēn júukar péṅker ikúusarat tusan akupkartatjai” timiai” tímiayi Jesus.

### *(3) Mustasa jinḅiáí*

*(Márkus 4.30-32; Rúkas 13.18-19)*

<sup>31</sup> Jesus ataksha métek-taku chichaman áujmatsamiayi. “Shuar Yus akupeamunam pachiinkiertin mustasa jinḅiáiya áintsanḅete. Shuar péṅker nunḅen araamai.

<sup>32</sup> Mustasa jinḅiáiikia imiá uchichiitiat tsapáí tsakaakka ashí numichijiai nanḅkaamas uunt ajawai. Ti uunt asamtaí chíṅki ni kanawen pasunmainiawai” tímiayi Jesus.

### *(4) Karin enketatin*

*(Rúkas 13.20-21)*

<sup>33</sup> Núnisāṅ chíkich métek-taku chichaman áujmatsamiayi. “Shuar Yus akupeamunam pachiinkiertin karinia áintsanḅete. Nuwá nijiamchíniam karinia enḅkea mashi páchimiawai. Tura nu mash karimtikiawai” tímiayi.

### *Jesus aya métek-taku chichamjain jintintiamiania nu*

*(Márkus 4.33-34)*

<sup>34-35</sup> Ashí nuna Jesus métek-taku chichamjái áujmatsamiayi. Yaunchu Yúsnan etserin timia nu uminkiatu tusa túramiayi. Etserin júna áarmiayi:

“Métek-taku chichamjái áujmattiatjai. Yámankamtaiknumiá nékashtain etserkat-tajai” tu áarmiayi.

Nu asamtai aya métek-taku chichamjain áujmatmiayi Jesus.

*Jesus yajauch nupa trikiunam atsamkamun paant awajsamiania nu*

<sup>36</sup> Nuyá shuaran ikiukin Jesus jeá támiayi. Túramtai ni unuiniamurj tariar “Yajauch nupa áujmatmena nu paant awajсата” tiarmiayi.

<sup>37</sup> Tutai Jesus tímiayi “Wi Aents Ajasuitjai. Wi péñker arakan atsaamkaitjai.

<sup>38</sup> Ashí nunka aja áintsaiti. Péñker jinkiái Yus-shuaran Yus akupea nuna nakumeawai. Yajauch nupa iwianchna ainia nuna nakumeawai.

<sup>39</sup> Tura íwianch ii nemasrj asa yajauch nupa arakuiti. Tura nunka amúamunam Yusa suntarj arakan júuktinia áintsan shuaran yaruaktatui.

<sup>40</sup> Yajauch nupa irur jinium áesatniua áanis nunka amúamunam túrunattawai.

<sup>41-42</sup> Nuñ Wi Aents Ajasu asan winia suntarun akupkattajai. Tura ashí tunaan túruinia nunasha tura chikichan tunaanum útsuinia nunasha mash irur jinium apeawartatui. Nuñsha ti úutin ti wáitsatniusha átatui.

<sup>43</sup> Antsu péñker túruinia nuka ti shiir wincha ajarar ni Aparj akupeana nuñ etsa núnis tsáapnin ajasartatui. Wats, kuishim átsuk. Antukta.’

*(5) Kuit wánkiamu*

<sup>44</sup> ‘Shuar Yus akupeamunam pachiinkiatin kuit nunka uukma áintsankete. Shuar nu kúitian wáiniak nuñ ataksha uukmai. Tura ti waras waketki nu kuit niiniu atí tusa ashí ni takakman suruk nu nunkan sumakmai.’

*(6) Kaya shiirmach ti kuitia nu*

<sup>45</sup> ‘Shuar Yus akupeamunam pachiinkiatin júnisaiti. Shuar kayachin ti shiirman eak wekaana áintsankete.

<sup>46</sup> Tura kayan ashí nankaamas kuit jeean wáiniak waketki ashí takakna nuna suruk nu kayan niiniu atí tusa súmawai.’

*(7) Neka*

<sup>47</sup> ‘Shuar Yus akupeamunam pachiinkiatin júnisaiti. Shuar nekajai namakan achía áintsankete. Nekan nayaantsanam ajuntak niisháa namakaim achíawai.

<sup>48</sup> Tura nekanam nemarmatai kukar jiki, nuñ péñker namaknasha chankinnium chumpiniawai. Tura yajauch namaknaka ajapenawai.

<sup>49</sup> Núnisanj átatui nunka amúamunam. Yusa suntarj taar Yus-shuaran tura íwianch shuaran akantrattawai.

<sup>50</sup> Tura íwianch shuarnaka uunt jinium apeattawai. Nuñsha ti úutin ti wáitsatin átatui.” Nuna ashí ni unuiniamurjjai áujmatsamiayi Jesus.

*Yamáí nekamujajisha tura yaunchu nekamujajisha Yus-shuaran yáintiniaiti*

<sup>51</sup> Jesus nuna tinia amuk “¿Jú mash antukurmek?’ tímiayi.

Tutai ni unuiniamurj “Ee, Uunta, ashí antukji” tiarmiayi.

<sup>52</sup> Tuiniakui Jesus tímiayi “Shuar ashí Yúsnan péñker unuimiaruka aents kútriniua áintsankete. Ni ikiutairiyá yamarmancha yaunchu sumakmancha jusamniaiti. Núnisanj nu shuar yamáí nékamujajisha tura yaunchu nékamujajisha Yus-shuaran yáintiniaiti.”

*Jesus Nasarétnum waketkimiania nu*

*(Márkus 6.1-6; Rúkas 4.16-30)*

<sup>53</sup> Jesus nu métek-taku chichaman áujmatas amuk nuyá wémiayi.

<sup>54</sup> Tura ni péprurjñ Nasarétnum jeá Israer-shuar iruntainiam wayá unuiniamiayi. Tura nuyá shuar antukar tí enentaimprarmiyai. Tura “¿Júsha tui imiá unuimiaruít, tiarmiayi. Itiurak aents tujintiamun túramniait’

<sup>55</sup> Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semun, Jútas ániatsuk.

<sup>56</sup> Tura ni umaísha iijiai írutra pujuiniatsuk. ¿Nuikia itiura mash neka?” tiarmiayi.

<sup>57</sup> Túrawar Jesusan itirchat enentáimturarmiayi.

Túramtai Jesus chicharuk “Yúsnan etserniun ashí shuar péñker anturaini-awai, antsu aya nuna nunkeyan̄ka ni shuarin̄kia nin anturainiatsui” tímiayi.

<sup>58</sup> Tura nú shuar Jesusan enentáimtuiniachu asamtai aentsti tujintiamun aya ishichik túramiayi.

## 14

### *Imiakratin Juan jakamu*

*(Márkus 6.14-29; Rúkas 9.7-9)*

<sup>1</sup> Kariréa nunkanam Erutis akupniuyayi. Tura Jesus túramuncha antukmi-ayi.

<sup>2</sup> Tura ni írutramur̄in tímiayi “Nuka imiakratin Juan jakamunmaȳa nantaki túrawai auka. Tuma asa aents tujintiamun túrawai” tímiayi. Kame Erutis Juan̄kan maa asa tímiayi.

<sup>3-4</sup> Akupin Erutis ni yachí Jiripi nuw̄en Jirutíasan akintrukmatai Juan̄ Erutisan “Ame yatsumi nuw̄é akintrukchatniuitme” tímiayi. Tutai Erutis Juan̄kan achik jirujai jin̄kia sepunam en̄keatarum tusa akupkamiayi.

<sup>5</sup> Niisha Juan̄kan máataj tukamá aentsun ashamiarmiayi. Ashí aents “Juan̄ Yúsnan etserniúiti” enentáimtuiniakui ashammiai.

<sup>6</sup> Tura akupin Erutis akiiniamu tsawan̄tr̄i jeamtai nú námpertin Jirutíasa nawan̄tr̄i ashí ipiaamu pujuiniamunam jantsemamiayi. Túramtai Erutis shiir enentáimtak

<sup>7</sup> “Ame ashí wakeram nu seattia, tímiayi. Nekasan amastatjai, Yussha iirui” tímiayi.

<sup>8</sup> Tutai nu nuw̄ach emka ni nukur̄i akatramu asa Erutisan chicharuk “Imi-akratin Juan̄ka muuké tsupikiam amamkunam en̄keram surústá” tímiayi.

<sup>9</sup> Tutai Erutis wake mesekmiayi. Túrasha “nekas Yus iirui” tiniu asa tura ni amikr̄isha antukaru asamtai umikmiayi.

<sup>10</sup> Ni suntarin̄ sepunmaȳan Juan̄ka muuken̄ tsupik itiarti tusa akupkami-ayi.

<sup>11</sup> Tura amamkunam itiar nuw̄achin súsarmiayi. Tura niisha ni nukur̄i susamiayi.

<sup>12</sup> Nuyá Juan̄ka írutramur̄i tariar ayashí jukiar iwiarsarmiayi. Túrawar Jesusan ujauwearmiayi.

### *Jesus sen̄ku mir (5000) áishmankan ayuramiania nu*

*(Márkus 6.30-44; Rúkas 9.10-17; Juan̄ 6.1-14)*

<sup>13</sup> Jesus nuna antuk Niñki ni unuiniamur̄ijjain̄ kanunam en̄kemar arant aents atsamunam wémiayi. Túrasha nuna aents nekaawar kukarak weri-armiayi Jesusan.

<sup>14</sup> Kanunmaȳa j̄iniay tukamá untsur̄i áentsun wáinkiamiayi. Tura wáiniak waitnentrarmiayi. Tura jáiniancha tsuárarmiayi.

<sup>15</sup> Kíakui ni unuiniamur̄i Nin tariar tiarmiayi “Kíawai, Uunta. Tura shuar t̄jiȳuch pujaaka atsawai. Jū aents akupkarta. Péprunam wear sumak yuuwearti” tiarmiayi.

<sup>16</sup> Tutai Jesus tímiayi “¿Urukamtaik wearat? Antsu atumek ayuratarum.”

17 Tutai tiarmiayi “Iikia takaktsuji. Aya seṅku (5) tantachik jimiarchik namakchijiaṅ takakji.”

18 Tuṅiakui Jesus “Wats, nu itartitarum” tímiayi.

19 Tinia aents chírichriniam pujusarti tusa akupkamiayi. Nuyá seṅku (5) tantancha jímiar namaknasha achik nayaimpiniam íimias Yúsan yu-miṅsamiayi. Tura puur ni unuiniamurṅin aents ayuratarum tusa súsarimiayi.

20 Ashí yurumáwar jémarimiayi. Tura nuyásha puunaruka tuse (12) chanṅkin tiarmiayi.

21 Nuṅ yurumáwarmia nusha nuwasha uchisha nekapmatsuk seṅku mir (5000) aya áishmaṅ árimiayi.

### *Jesus entsá pátatek wekasamiania nu*

*(Márkus 6.45-52; Juan 6.16-21)*

22 Nuyá Jesus ni unuiniamurṅin kanunam enṅemprarum amain émaa ajatarum tusa akupkarmiayi. Niisha áentsun akupkarmiayi.

23 Akupkarsha naint waka Yúsan áujumiayi. Káshisha nuṅ Niṅki tuke puju-miayi.

24 Tura antumiaṅ tí waṅkaram asamtai kanu ajapén ajasmatai nase tukumma entsa tamparukmiayi.

25 Tsawaana aṅ níi tuke wenaṅ Jesus entsá pátatek wekas pujuiniamunam jeamiayi.

26 Tura ni unuiniamurṅi entsá pátatek wekaan wáinkiar ti sapijmiakarmiayi. Tura ashamainiak “wakanchashit” tiarmiayi.

27 Tuṅiakui Jesus tiarmiayi “Kakaram ajastarum. Wiitjai. Asham-prukairap.”

28 Takui Pítiur chicharuk tímiayi “Uunta, Ámetkumka nuṅ wekasa jeatin untsurkata.”

29 Takui Jesus tímiayi “Wats, winitia.”

Tutai Pítiur kanunmayá akaikin Jesus wajana nuṅ jeataj tusa entsá pátatek wekasamiayi.

30 Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu untsummiayi.

31 Nu chichamtaik Jesus uwejnum achik júak “Maa, Yus imiá ishichik enentáimtuschamek” tímiayi.

32 Tura kanunam enṅemáwarmatai nasesha meṅkakamiayi.

33 Túramtai kanunam enṅemarmia nusha Jesusan tikishmatar chicharuk “Nekas ame Yusa Uchirínme” tiarmiayi.

### *Jesus Jinisarítiumiṅ shuaran tsuármiania nu*

*(Márkus 6.53-56)*

34 Tura amainṅ katiṅkiar Jinisarít nunṅkanam jearmiayi.

35 Tura nuyá aents Jesusan nekaawar nu nunṅkanam ashí ujanairarmiayi. Túrawar jaancha ni pujamunam itariarmiayi.

36 Ni pushirínkisha antiṅtai tusar seawarmiayi.

## 15

### *Shuáran yajauch awajeana nuna Jesus jintintiamiania nu*

*(Márkus 7.1-23)*

1 Nuyá Jerusaréṅ péprumayá Pariséusha yaunchu akupkamu jintinni-urisha Jesusan tariar aniasarmiayi

2 “¿Urukamtai ame unuiniamuram ii uuntri yaunchu jintintrarmia nuna uminiatsu? Iis, ikijmiatskesha yurumáiniawai” tiarmiayi.

3 Tuíniakui Jesus aniasarmiayi “¿Urukamtai atumsha Yus akupkamu umirt-suk aya aents akupkamu umiirum?”

4 Iis, Yus tíchamkia:

“Ame apa, nukusha shiir enentáimtustarum.” Tura “Shuarsha ni aparíncha nukuríncha katsekka nu shuar jakati” tíchamkia.

5-6 Antsu átumka tárume “Shuar ashí niiniu írúnna nuna mash “Yúsnaiti” takui nuikia nujai ni aparíncha nukuríncha yáínchamniaiti, tárume. Nin yáíntinian nakitiak ayatik “Ashí winia áiniana nu Yusna asamtai yáínchamniaitjame” títiniaiti” tárume. Núnisrum tákuram Yus akupkamu iniaisarum aya aents akupkamu umiirume, tímiayi.

7 Antra chichamtiniaitrum. Yúsnan etserin Isayas yaunchu nekas atumin áartampramiayi juna:

8 “Ju aents ni wenejai shiir awajtuiniawai, tura ni enentái jeachat pujuini-awai.

9 Tura tukeneasan shiir awajtuiniawai. Aentsu chichamen jintintiainiayat “Yusa chichamente” tuiniawai.” Tu áarmiayi” tímiayi Jesus.

10 Tinia shuaran untsuk tiarmiayi “Ju antukrum péñker nekaatarum.

11 Aents yúana nuka shuáran yajauch awajsashtatui. Antsu wenunmayá jiinia nuka shuáran yajauch awajeawai” tímiayi.

12 Nuyá ni unuiniamuri Jesusan tariar “Maa, Pariséu ame chichammin antukar ti itirchat enentáimprarai” tiarmiayi.

13-14 Tuíniakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiainiawai. Mai kusuru ásar mai wáñnam akaiki ini-aawartatui. Wats, ajanam nupá áintsan ainiawai. Tura ashí winia Apar nayaimpiniam pujana nu araachmaka takamtsuk uwé ajapamu átatui” tímiayi Jesus.

15 Takui Pítur Jesusan tímiayi “Nu métek-taku chicham paant awajsata.”

16 Tutai Jesus tímiayi “¿Atumsha nekaachurmek.

17 Enentáimprachurmek? Ashí wenunam wayaana nu wakenam wéatsuk. Tura nuyá iniankastiniaiti.

18 Antsu wenunmayá jiinia nu enentáinmayá jiiniu asa áentsun yajauch awajeawai.

19 Enentáinmayá ashí yajauch enentáimsatin jiiniainiawai. Mankartuatniusha, chikicha nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha

20 ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

*Nuwa Israer-shuarcha Jesusan enentáimtusmiania nu  
(Márku 7.24-30)*

21 Jesus nuyá jiinki Tiru péprunmasha Sitiun péprunmasha wémiayi.

22 Tura nu nunkanmayá nuwa Jesusan tarí tímiayi “Uunta, uunt akupin Tawit ame weatrum asamtai winia waitnenturta. Nawantur yajauch wakantruku asa ti wáitrutawai” tímiayi.

23 Tura Jesus áikchamiayi. Tura ni unuiniamuri tariar “Awemata, tiarmi-ayi. Tuke untsunki apapétmaji” tiarmiayi.

24 Nuyá Jesus tímiayi “Aya Israer-shuarnum menkakarú áinia nuna eaktinian Yus akuptukuiti.”

<sup>25</sup> Túrasha nuwá tikishmatar tímiayi “Uunta, waitnentrurta.”

<sup>26</sup> Tutai Jesus tímiayi “¿Uchí apatkurí jurukir yawá susamniakait?” tímiayi.

<sup>27</sup> Tutai nuwá tímiayi “Nekas, Uunta, tame. Tura yawásha ni aentsri yurumainiakui nuñká iniaarun yuñiatsuk.”

<sup>28</sup> Takui Jesus tímiayi “Maku, nekas Winia enentáimtursaitme. Ame wak-eram núnisan atí” tímiayi. Tura nu chichamaik ni nawantri péñker ajasmiai.

### *Jesus untsurí jáinian tsuararmiania nu*

<sup>29</sup> Jesus nuyá jiinki Kariréa antumianka káanmatkarin waketkimiai. Tura naint waka nuí pujusmiayi.

<sup>30</sup> Nuí untsurí aents Nin tariat shutuapnasha kusuruncha chichachuncha tsupirkamuncha chíkich jáiniancha itiararmiayi. Túrawar nawenam aeprusarmiayi. Túram tsuararmiayi.

<sup>31</sup> Nuna ísar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, ti shiir enentáimprarmiayi. Yus ni áentsrin Israeran yáinmatai shiir yuminsarmiayi.

### *Jesus kuaru mir (4000) áishmankan ayuramiania nu*

*(Márkus 8.1-10)*

<sup>32</sup> Nuyá Jesus ni unuiniamurin untsukar tiarmiayi “Ju aentsun waitnentaiajai. Warí, menaintiu tsawant Wijíai yurumtsuk yujainiatsuk. Ayurtsuk ni jeen akupkachminiaitjai. Jintia pimpiki wáitsartatui.”

<sup>33</sup> Ni unuiniamurí tiarmiayi “Túrasha, Uunta, ¿shuar atsaasha tuyan yurumak imia sumaktai ju aents ayurawartincha?”

<sup>34</sup> Jesus aniasarmiayi “¿Urutma tanta takakrum?”

Tutai niisha “Siati (7) tanta nuyá ishichik namak takakji” tiarmiayi.

<sup>35</sup> Nuyá aents nuñká pujusarti tusa akupkamiayi.

<sup>36</sup> Tura siati tantan achik namaknasha achik nuyá Yúsán yuminsamiayi. Tura puur aents ayuratarum tusa ni unuiniamurin susamiayi.

<sup>37</sup> Ashí yurumáwar jémararmiayi. Tura puunaru siati chan kin tiarmiayi.

<sup>38</sup> Tura nuí yurumáwaruka nuwásha uchisha nekapmatsuk aya áishmankak kuaru mir (4000) áirmiayi.

<sup>39</sup> Nuyá Jesus áentsun akupak kanunam enkemar Maktara nuñkanam wémiayi.

## 16

### *Pariséusha Satuséusha iniakmamurin Jesusan seawarmiania nu*

*(Márkus 8.11-13; Ríkás 12.54-56)*

<sup>1</sup> Pariséusha tura Satuséusha Jesusan nekapsatai túsar tariarmiayi. Túrawar “Ame Yúsaiyáitkiunka kakarmarmijiai nayaimpinnmaya iniakmasta, iisha wáinkiatái,” tiarmiayi.

<sup>2</sup> Tutai Jesus tímiayi “Átumka “Kapaaku péetar kintiamkui kashin esatrurta-tui” tñiuitrume.

<sup>3</sup> Túrasha “Te ajas kapaaku péetar tsawaaku yumi yajauch átatui” tñiuitrume. Tura nekasaiti. Maa, átumka nayaim ísrum ju nuñkanam túrunattana nu nékarme. Antsu Yus yamá jü nuñkanam tura nuka nékatsrume. Ántrairume.

<sup>4</sup> Aents yajauch ásar tura Yusan enentáimtachu ásar kakarmajai iniakmamun wakeruiniawai. Túrasha áyatik Junas túrunamia nuke iniakmastiainiati” tímiayi. Tinia ikiuak wémiayi.



*Pariséusha Satuséusha jintintiainia nu aneartiniaiti  
(Márkus 8.14-21)*

<sup>5</sup> Tura entsá amaini katiñkiar ni unuiniamurĭ tantan júkitniun kajinmatkarmiayi.

<sup>6</sup> Nuyá Jesus tímiayi “Wáinkiatarum, Pariséusha Satuséusha wakaprutai takakainia nújajsha aneartarum.”

<sup>7</sup> Tutai ni unuiniamurĭ tiarmiayi “Ii tanta itiachakrin tátsuk.”

<sup>8</sup> Jesus nuna antuk tímiayi “¿Urukamtai tanta itiachji tunaiyarum. Yusa kakarmari kajinmatkintrumek.

<sup>9</sup> Senku tantajai túramiaj nu kajinmatkintrumek. Senku mir (5000) áishmankan ayuramtai untsurĭ chanĭkin tiármia nu enentáimtsurmek.

<sup>10</sup> Tura siati tantajai kuaru mir (4000) áishmankan ayuramtai nuna ishichik chanĭkin tiármia nu kajinmatkintrumek.

<sup>11</sup> Itiurak imiá nékatsrum? Wi Pariséu wakaprutairĭsha Satuséu wakaprutairĭsha aneartarum tákun penké tantan tátsujai” tímiayi.

<sup>12</sup> Nuna Jesus takui ni unuiniamurĭsha nekaawarmiayi. Penké tantaa wakaprutairĭn tíchamiayi antsu Pariséusha Satuséusha unuiniatairĭn tímiayi.

*Pítiur Jesusan Yus anaikiamun paant ujakmiania nu  
(Márkus 8.27-30; Rúkas 9.18-21)*

<sup>13</sup> Tura Sesaria-jiripiunam jeawar Jesus ni unuiniamurĭn aniasarmiayi “Aents Ajasuitĭjana júna ¿yaiti turutainiawa Winia?”

<sup>14</sup> Niisha ayak tiarmiayi “Chíkich, imiakratin Juánkaiti turamainiawai. Chíkichka, Eriasaiti turamainiawai. Chíkichcha Jeremíasaiti, chíkichcha chíkich aents Yúsnan etserniuiti turamainiawai” tiarmiayi.

<sup>15</sup> Tutai nincha aniiniak “¿Atumsha yaiti túrutrum?” tímiayi.

<sup>16</sup> Semuñ Pítrusha “Ámetme Kristu, Yus Anaikiamu. Nekas iwiaaku Yusa Uchirĭnme” tímiayi.

<sup>17</sup> Tutai Jesus tímiayi “Shiiraitme Junasa uchirĭ Semuñka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame.

<sup>18</sup> Tura Wisha tájame, ame Pítruitme, kayach tútaim. Nu kayanam jea jeamtinia áintsan Yús-shuaran ekenin tsakatmartatjai. Túramtai jákatniusha tura Yusa nemasrĭsha nu jeamman pukukchattawai.

<sup>19</sup> Yus akupeamu yawincha amastatjai. Ju nunĭkanam jinĭkiatniusha atiatniusha amasmaiti. Tuma asamtai ame ju nunĭkanam suritiam nu nayaimpinmasha suritniaktatui. Tura ju nunĭkanam tsanĭkateam nu nayaimpinmasha tsanĭkatnaktatui” tímiayi.

<sup>20</sup> Nuna tinia Jesus ni unuiniamurĭn Krĭstuitiaj nu etserkairap tinia akupkarmiayi.

*Jesus Nin máatniun etsertumakmiania nu  
(Márkus 8.37-9.1; Rúkas 9.22-27)*

<sup>21</sup> Nuyá Jesus júna unuiniatan nanĭkammiayi. “Wi Jerusarénum wétiniatjai. Nuĭ Israer-shuara úntrĭsha, Israer-patri úntrĭsha, Israer-shuara jintinniurĭsha ti wáitkiarsartatui. Nuyá mantuawartatui túrasha menaintiú tsawantai nantaktatjai.”

<sup>22</sup> Takui Pítiur arantach júki chicharuk tímiayi “Uunta, nuka penké áchatniuiti. Áminkia túrutmacharminiaiti.”

<sup>23</sup> Jesus ayanmatar Pítrun tímiayi “Werumta, Satanása. Yajauch awajtame. Ámeka Yus wakeramu enentáimtsume. Antsu jú nunkanam enentáimainia áinis enentáimme.”

<sup>24</sup> Nuyá Jesus ashí ni unuiniamurín tímiayi “Shuar Winia nemartustaj tusa wakerakka ni wakeramurín iniais ni krusí yanaki Winia nemartusti.

<sup>25</sup> Shuar áyatik péñker pujustaj tákuñka nu shuar uwemtsuk jakattawai. Antsu jákatniitkuisha péñker pujustian enentáimtsuna nú shuar nekas iwiaakman wainkiattawai.

<sup>26</sup> Wats, shuar ashí jú nunkanam írrunna nuna sumakka tura nujai ni wakaní emeseak çitiurak péñker pujustin? Shuara wakaní emesramu çashí jú nunkanam írrunna nujai iwiamniakait?

<sup>27</sup> Wi Aents Ajasu asan, winia Aparu kakarmaríjjai tura ni suntaríjjai tana ashí shuáran ni takasmajai métek akiktatjai.

<sup>28</sup> Paant tájarne, shuar juí wajainia ju játsuk Wi akupin ajasmatai wáitkiartatui” tímiayi.

## 17

### *Jesus nushá iira ajasmiania nu (Márkus 9.2-13; Rúkas 9.28-36)*

<sup>1</sup> Nuyá sais (6) tsawant nankaamasar Pítruncha, Jakupuncha, tura ni yachi Juannasha níniak júkiar Jesus náinnium yakí wakamiayi.

<sup>2</sup> Nui Jesus nusháa iira ajattsarmiai. Ni yapisha etsaya áinis wincha ajasmiai. Ni pushirísha ti puju jii sumir ajasmiai.

<sup>3</sup> Nuísha Muisaisnasha Eríasnasha Jesusjai chichainian wáinkiarmai.

<sup>4</sup> Nuyá Pítiur Jesusan tímiayi “Uunta, ti shiir pujaji juí. Wakerakminkia menaint áakmaktai, Áminiu chikichik tura chíkich Muisaisnasha, tura chikichcha Eríasna.”

<sup>5</sup> Tura Pítiur tu auju wajaí yurañkim ti puju amuamiai. Tura nu yurañminmaya chichaman antukarmiai. “Juka winia aneamu Uchiruiti, tímiayi. Nin ti shiir enentáimtajai. Nii péñker anturkatarum” tímiayi. Tu chichasmiai Yus.

<sup>6</sup> Nuna ni unuiniamurí antukar ti ashamkar pákea ajakiarmiai.

<sup>7</sup> Túrunawarmatai Jesus táriar antiñ “Ashamkairap, nantaktiarum” tiarmiayi.

<sup>8</sup> Tura pañkainiar íimíaj tukamá aya Jesusan wáinkiarmai.

<sup>9</sup> Nuyá náinniumiá akainiak Jesus tiarmiayi “Átum ísurmena nu penké etserkairap. Wi Aents Ajasu asan jakamunmaya nantaatsain etserkairap’ tímiayi.

<sup>10</sup> Nuyá ni unuiniamurí Jesusan aniiniak “¿Urukamtaí in jintintramin “Kristu táatsain Erías emka tátiniaiti” tuinia?” tiarmiayi.

<sup>11</sup> Tuíniakui Jesus áikmíayi “Nekas Erías tátiniaiti. Tura nii mash iwiarat-tawai.

<sup>12</sup> Kame nekas Erías táwiti tura nin nekaacharmai. Antsu aents wakeriarmia nuna túrawar yajauch awajarmiai. Núnisan Winiasha, Aents Ajasu ain, wáitkiarsartatui.”

<sup>13</sup> Nuna takui ni unuiniamurí imiakratin Juáñkan áujmatui, tu enentáimprarmiai.

### *Jesus iwianchín jiki akupkiamiania nu (Márkus 9.14-29; Rúkas 9.37-43)*

<sup>14</sup> Ataksha aents matsatmanum jeawarmatai shuar Jesusan tarí tikishma-tramiayi.

<sup>15</sup> Tura tímiayi “Uuntá, winia uchir waitnentrutrata. Wainchi tukum ti wáitniuiti. Jiniumsha patamniuiti. Entsasha iniainaiti.

<sup>16</sup> Ame unuiniamurmíncha itiarjai túrasha tujinkiarai.”

<sup>17</sup> Takui Jesus ashí tímiayi “Maa, Yus penké enentáimtichuitrume. Imiá úmichuitrume. ¿Wi atumin katsuntu ajatniukaitjarum? Wats, uchi itiarti-tiarum’ tímiayi.

<sup>18</sup> Itiarim Jesus yajauch wakanin jiiiki akupkamiayi uchi ayashínia. Túramtai nu chichamaik péñker ajasmiai.

<sup>19</sup> Nuyá urum ni unuiniamurj Jesusjai niniki pujusar áujmatainiak “¿Urukam-tai yajauch wakan jiiiktin iikia tujinkiamaj?” tiarmiayi.

<sup>20</sup> Túniakui Jesus tiarmiayi “Yus nekas enentáimtachu asarum tujinkiar-me. Túmaitiat nekasaiti mustasa jiníkiái timiá uchichitiat ti uunt tsakaatsuk. Núnisan Yus ishichkisha enentáimtakrumka nu naint ékemkata tutai nu naint túrunattawai. Penké tujinkiashtatrume Yus nekas enentáimtakrumka.

<sup>21</sup> Kame nu yajauch wakan jiiiki akupkatniuka ijiarmam Yus áujsatniuiti.”

### *Ataksha Jesus ni játniun ujakmiania nu*

*(Márkus 9.30-32; Rúkas 9.43-45)*

<sup>22</sup> Jesus ni unuiniamurjiiái Kariréa nunkanam wekas juna ujakarmiai. “Wi Aents Ajasu asan, aentsnum surunkattajai tura mantamnattajai.

<sup>23</sup> Túrutawarmatai menaintiú tsawantaj nantaktiatjai.” Tura ni unuinia-murj nuna antukar ti kúntuts enentáimprarmiayi.

### *Jesus ankantaitiat akiktinia nuna akikmakmiania nu*

<sup>24</sup> Jesus ni unuiniamurjiiái Kapernáum péprunam jeawarmiai. Tura kuítian achin Pítrun tariar aniasarmiai “¿Atumi uuntri Israer-patrin akik-tinia nuna akínkiait?”

<sup>25</sup> Tutai Pítiur “Ee” tímiayi.

Tura Pítiur jeá wayá chichaatsain Jesus emka tímiayi “Chúkich nunkanmaya akupin ¿yana kuítrijiaín takainia. Ni shuáriniunkek atantainia. Antsu yajaya shuárnan atantainiatsuk. Nekaschak, Semunká?”

<sup>26</sup> Tutai Pítiur “Nekas yajaya shuárnan atantainiawai” tímiayi.

Jesus tímiayi “Nuikia ni shuari ankant áiniawai. Iisha núnisrik nu akiktin ankantaitji.

<sup>27</sup> Túrasha itirchat enentáimprarin tusar akiktai. Ame tsau jukim entsá wetá. Túram emka namak japikim iwiankam nuj kuit wáinkiatame. Nu jukim Winiasha áminiusha akikmakta.”

## 18

### *“¿Ya imiá nankaamantuit?” tunaiyarmiania nu*

*(Márkus 9.33-37; Rúkas 9.46-48)*

<sup>1</sup> Nu tsawantaj ni unuiniamurj tariar Jesusan aniasarmiai “Yus akupea-munam pachiinia nu ¿ya imiá nankaamantu áminiait?”

<sup>2</sup> Nuna túniakui Jesus uchin untsuk ajapen awajtusar

<sup>3</sup> tímiayi “Tí nekasán tájarme, atumí enentáimtaij papajarum uchía áinis ajachkurmeka Yus akupeamunam pachiinkiachminiaitrumé.

<sup>4</sup> Nu asamtai ju uchía áinis péejchach enentáimtumana nuka Yus akupeana nuj nekas nankaamantu ajasminiaiti.

5 Nú arantcha Winia anentuk uchin itiaana nú shuar Winiasha itiaareawai' tímiayi.

*Tsuumainti yajauch túrumtikiatin*

*(Márkus 9.42-48; Rúkas 17.1-2)*

6 'Shuar jú uchin Winia umirtana nuna tunaanum ajuarmataiñkia nuna túratsaiñ niisha kuntujén kayajai jínkiar nayaantsanam ajapen kunanam ajunmaitkiunka maak ainti, tímiayi.

7 Jú nunkanam tunáa iniaatai' irunuk tuke itiuarchataiti. Antsu shuar chikichan tunaanum ajuarka ti itiuarchatan inkiuntatui' tímiayi.

8 'Nu asamtai ame uwejem tura nawem tunaanum ajunmatniuitkiuñkia tsupikiam ajapata. Kame muntuch pujustin tura ukunam nayaimpiniam wétin péñkeraiti. Antsu kajinkiashtin jinium takamtsuk jeatniuka imiá yajauchiiti.

9 Núnisan ame jiiimi tunaanum ajunmatniuitkiuñkia ukuinkiam ajapata. Kame chikichik jiiijai pujusam nayaimpiniam wétin péñkeraiti. Antsu jinium mai jiiintuik wétin imiá yajauchiiti' tímiayi.

*Murik menkaaka áujmatsamu*

*(Rúkas 15.3-7)*

10 'Uchi ainia nu nakitirairap. Yusa suntariñ nin wáinkiatniua nu winia Aparujé tjiuch pujuiniawai.

11 Kame wi Aents Ajasu asan, menkaakarun eaktajtsan táwitjai.'

12 'Enentáimpratarum. Shuar siañ (100) murikiun takakuitiat chikichik menkakamtai untsurí menkakacharun náinnium matsaaka, menkakan eashatuak.

13 Wáinkiasha untsurí menkakacharua nujai nankaamas waraschattawak.

14 Núnisan atumi Aparí nayaimpiniam pujana nu, nu uchi chikichkisha menkakacharti tawai' tímiayi.

*Yus-shuarti tsankurnairatin*

*(Rúkas 17.3)*

15 'Chikich Yus-shuar ámin yajauch túrutmakuñkia nii werim áusata. Tura ámechik werim ame yatsumjai chichasta. Anturtamkuñkia ame yátsum yáinkiume.

16 Tura anturtamchakuñkia nuyá chikichik shuar jimiará shuarsha jukim ataksha weritia. Túram ataksha áujnaisatarum, niisha paant nekaawarat tusam.

17 Túrasa yatsum tuke ántachkuñkia Yus-shuar iruntainiam iwiainiakta. Túrasa yatsum tuke ántachkuñkia Yus-shuarcha núnisan enentáimtusta nu shuar.'

18 'Nekasan tájarme, jú nunkanam suritiam nu nayaimpinmasha suritniaktatui. Tura jú nunkanam tsankateam nu nayaimpinmasha tsankatnaktatui.'

19 'Núnisnak tájarme, jú nunkanam pujusrum jimiará Yus-shuartiram métek enentáimprarum winia Aparí nayaimpiniam pujana nu seakrunniñkia wakermená nuna suramsattarme.

20 Jimiar menaintiusha Yus-shuar Winia enentáimturuk iruntrarmatai Wisha nu jiiijai pujajai' tímiayi Jesus.

21 Takui Pítiur werí Jesusan aniasmiayi "Uuntá, winia yatsur yajauch awajtakui çurutma tsankuratniuitaij. Siátikik tsankuratniuitaij?"

22 Jesus aiyak "Siátik tátsujme, antsu iniañnatsuk tsankuratniuitme" tímiayi.

*Takmau tsankurachun pachis áujmatsamiania nu*

23 Tuma asa Jesus Yus akupeemunam pachiinkiaru tsan̄kurnairartiniaiti tusa ju métek-taku chichaman áujmatuk tímiayi, “Uunt akupin takar̄in tumashin akirkarat tusa untsukarmai.

24 Yama nán̄kamuk tí nukap tumashmakua nuna untsukmai. Akikmakhamnia tí tumashmakuyi.

25 Tura nu takakmau kuitr̄j atsakui uunt akupin “Yajasma áitkiasrum nuar̄tiuk uchirtiuk ashí waririntiuk surukturum, timiai. Nu kuitjaj̄ akirkati” timiai.

26 Tutai nu takakmau uunt akupniun tikishmatar seak timiai “Uunta, waitneasam nákarsatá. Auka, mash akiktatjame.”

27 Uunt akupin waitnentar mash tsan̄kur an̄kant akupkamai.

28 Tura nú chichamaik nú takakmau jiinki ni āin in̄kiun̄mai. Nú āisha nin ishichik tumashīiyi. Tura tsékēnki suwenam achik chicharuk timiai “Wari akirkata tumashit̄mena nu.”

29 Tura ni āj nin tikishmatar timiai “Waitneasam nákarsatá. Auka, mash akiktatjame” timiai.

30 Túrasha nakitramai. Antsu tsan̄kurtsuk sepunam en̄keamai ashí akirkati tusa.

31 Chíkich takakmau nuna wáinkiar ti kúntuts enentáimtuiniak uunt akupniun ashí etsertukarmai.

32 Nuna antuk uunt akupin untsuk itiā timiai “Yajauchiītme. ¿Winia “waitnentrurta” túrutkumin tsan̄kurachmakjam?”

33 Amesha nú̄nismek ame āim tsan̄kuratēniuitme” timiai.

34 Tinia uunt akupin kajekmai. Tura ashí tumashin akikmatsuk asutniati tusa suntarnum surukmai.”

35 Jesus nuna áujmatas amúak tímiayi “Núnisan̄ winia Apar nayaimpiniam pujana nu atumin túrutmattarme atumi yach̄j nekas enentáij̄ij̄i tsan̄kureachkurminkia.”

## 19

### *Jesus nuw̄a ajapatniun áujmatsamiania nu*

(Márkus 10.1-12; Rúkas 16.18)

1 Jesus nuna tinia ikiuak Kariréa nun̄kanmayá wémiayi. Tura Jurtān entsa amain Jutía nun̄kanam jeamiayi.

2 Untsur̄j aents nemariarmiayi tura jáiniancha pé̄nker awajsamiayi.

3 Nūj Pariséu Jesusan nekapsataj tusar aniasarmiayi “¿Shuar ni nuw̄en itiurchat akui ajapamniakait?”

4 Tutai Jesus tímiayi “¿Átumka Yus-Papí áujsachukaitrum? Yámankamtaik Yuska shuáran áishmānkan nuw̄ancha najanamiayi tawai.

5 Tuma asamtai áishmān ni apar̄in ni nukur̄in ikiuki ni nuwējaj̄ tsan̄iñ chikichik ayash̄tinia áinis ajasartatui, tu áarmaiti, tímiayi.

6 Tuma asa jímiarcha antsu chikichik ayash̄ áiniawai. Tuma asamtai shuar Yus apatkamia nuna, aents akankashtiniaiti’ tímiayi.

7 Takui tiarmiayi “Nuikia ¿urukamtai papí áarar nuw̄a ajapatniun Muisais tsan̄katkamia?”

8 Tutai Jesus tiarmiayi “Timiá ántichu asakrumin nuw̄a ajapatniun tsan̄katkamiayi. Túrasha ém̄kaka nú̄nischauyayi.

9 Wí tájarne, shuar ni nuw̄en chíkichaj̄i pujuschan ajapeakka tura chikichan nuat̄kunka tsanirmayi. Chíkich áishmānsha nuw̄a ajapamun nuat̄kunka nusha tsanirmayi” tímiayi.

10 Takui ni unuiniamurj tiarmiayi “Nuikia áishman ni nuwé penké ik-iukchamniaitkiuñkia nuátkachminiaiti.”

11 Jesus tiarmiayi “Nu chichamnaka mash antukchamin ániawai. Antsu Yus nuna umiktin susamua nuke antukmin ániawai.

12 Chíkich chíkich nuatkachmin ániawai. Chíkich nuátkachmin akiiniawaru ániawai. Chíkichcha aentsjaj nuátkachmin najanaru ániawai. Chíkichcha nuátainiatsui Yus akupeamu takatan takastinian. Juna antuktinian jeáka antukti.”

*Jesus uchin shiir awajsamiania nu*

*(Márkus 10.13-16; Rúkas 18.15-17)*

13 Nuyá Jesusan uchin itiararmiayi. Nin antin Yúsan áujtusarat tusar wakeriarmiayi. Túruiniakui ni unuiniamurj chicharkarmiayi.

14 Túruiniakui Jesus tímiayi “Uchi Winí winitin tsanatkatarum. Suritki-airap. Kame ju uchia áintsan péejchach ánian nunak Yus akupkamniaiti.”

15 Tinia uchin miniakas nuyá wémiayi.

*Kuítrintin Jesusjaj chichasmiania nu*

*(Márkus 10.17-31; Rúkas 18.18-30)*

16 Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?’ tímiayi.

17 Tutai Jesus nin enentáimtikrataj tusa tímiayi “¿Urukamtai péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

18 Tutai shuar “¿Tuna nekas umirkatniuitaj?’ tímiayi.

Takui Jesus tímiayi “Mankartuawaip, tsanirmawaip, kasámkáip, chíkich shuar tsanumpruraip,

19 ame apa nukusha umírkatá, ame shuárum ame ayashim aneamna nútiksamek aneeta.”

20 Tutai natsa tímiayi “Núnaka úchichik mash umiki tsakaruitjai. Nuyasha ¿warí táatrusa?” tímiayi.

21 Takui Jesus tímiayi “Nekas péñker átaj tákumka, weme ame kuítrum kuítrincha ainia nu sústá. Tura nayaimpiniam kuítrintin ajastatme. Nuyá Winia nemártústá” tímiayi Jesus.

22 Tura natsa nuna antuk kúntuts wémiayi ti kuítrintin asa.

23 Nuyá Jesus ni unuiniamurj tiarmiayi “Nekasan tájarme, kuítrintin Yus akupeamunam pachiinkiatin ti itiuurchataiti.

24 Ataksha tájarme, kamiriuka kawái nankaamas uunt asa auja jin wayachminiaiti. Núnisan kuítrintin Yus akupeamunam pachiinkiatin ti itiuurchataiti.”

25 Ni unuiniamurj nuna antukar antúu ajarmiayi. Túrawar aniniainiarmi-ayi “¿Nuikia yaki uwempramniait?”

26 Tuñiakui Jesus ashí ísar tímiayi “Aents uwempratniun nekas tujintiaini-awai antsu Yuska ashí tujintiatsui.”

27 Nuyá Pítiur tímiayi “Uuntá, iikia ashí ikiukchajik Ámin nemarsatai tusar. ¿Warin wáinkiattaj iisha?”

28 Jesus tímiayi “Nekasan tájame, ukunmanka ju nunka yamaram ajastatui. Aents Ajasu asan, Wisha nuj, uunt akupin ajastatjai tura atumsha winia nemartusutirmeka Wijjai métek akupin ajastatrume ashí Israer-shuar akup- katin.

<sup>29</sup> Tura shuar ni jeencha, yachincha, umaincha, aparincha, nukurincha, nuarincha, uchirincha, tura nunkencha Winia anentu asa ikiukin wekaakka, nu shuar nii ikiukmia nunisan yamaisha ti untsurj wainkiattawai tura ukunmasha tuke shiir pujustatui Yusjai.

<sup>30</sup> Untsurj yamai penkerj ainiana nu ukunam ukunmaani pujusartatui, tura yapajj'awar yamai ukunmay' ainiana nu ukunam emka pujusartatui' timiayi Jesus.

## 20

### *Jesus takarniun pachis áujmatsamiania nu*

<sup>1</sup> 'Yus akupeamunam pachiinkiatin júnisaiti. Nunka nérentin ni araa-murj'n júuktaj tusa káshik iniartaj tusa júnkimiyai.

<sup>2</sup> Chikichik tenariu kuit jean tsawant takamtsuk akiktajrume tusa chichas ni araamun júuktinian akupkarmiyai.

<sup>3</sup> Nantu takuntajsha ataksha jiinki shuar yujan wáiniak

<sup>4</sup> timiai "Atumsha winia arakur júuktin yáintkiatarum. Shiir akiktajrume." Tutai wearmai.

<sup>5</sup> Ataksha tutupin aj nuyá áan'kúsha jiinki, núnisaj tinia akupkarmai.

<sup>6</sup> Ataksha nantu patamsaj júnkimiyai. Tura shuaran yujan wáiniak "¿Urukam-tai takamtsakesha áani pujarum?" timiai.'

<sup>7</sup> "Warí, iincha iniatmainiatsji" tiarmai.'

"Tu'niakui timiai "Atumsha winia nunkaruj takautarum. Péñker akikta-rume."

<sup>8</sup> 'Kirit ajátekiáj takatrj'n wáinnium timiai "Takatan takasaru untsukam akikiarta. Kíaraj nan'kamawaru emka akikiarta. Túram káshik nan'kamawarujaj amuktá'" timiai.

<sup>9</sup> Takui nantu patamsa aj nan'kamawaru wayawarmatai chikichik tenariu kuit jean ashí akikiarmai.

<sup>10</sup> Mash umintramtai nuyá emka nan'kamawaru wayawar "nuna nan'kaamas achikchatj'ash" tu enentáimsarmai. Tura chikichik tenariu kuit jean achikiarmai.

<sup>11</sup> Achikiar nérenniun itiurchat enentáimturarmai.

<sup>12</sup> Tura tiarmai "Iikia ashí tsawant nantujaj wáitsachjik. Ju shuarsha nantu patamsa aj nan'kamawaruka penké ishichik takasaraí. Túrasha iijjaj métek akikiarume" tiarmai.

<sup>13</sup> Tutai nérentin chikichkiniak iniakmas timiai "Umpá, penké kasartsu-jme. Káshik chikichik tenariu kuit jeá chichasar iijjaj iwiarachjik, timiai.

<sup>14</sup> Pai, ame ku'trum achikiume. Nantu patamsaj takasuncha amijjaj métek akiktinian wakerajaj.

<sup>15</sup> Warí, winia ku'trujaj wi wakeramun túrachminkaitaj. Antsu wi tsan'ka asamtai ¿yajauch enentáimturmek?" timiai.'

<sup>16</sup> 'Núnisaiti Yus-shuarum. Émkaru áinia nu uku ártatui. Tura ukuyá ainiana nu, emka ártatui. Untsurj' ipiaamu ániawai tura ishichik achikma ániawai." Tu áujmatsamiayi Jesus.

### *Jesus ataksha ni jákatniurj'n etserkamiania nu* (Márkus 10.32-34; Rúkas 18.31-34)

<sup>17</sup> Jesus Jerusarénum jintiá wesa ni unuiniamurj'n akan'kin tiarmiyai

18 “Iistarum, Jerusarénum wéaji. Nujsa Israer-patri úuntriñ tura ni jintinniurincha Winia surutkartatui. Nujsa, wi Aents Ajasu aijn, “mantamati” túrutiatatui.

19 Tura apachniun surutkartatui. Nuñ katsekrukar, awattiar krúsnum máawarti tusar túrutawartatui. Túrasha jakayatan menaintiú tsawantaj nanaktiatjai” tímiayi.

*Jakupu tura Juangka nukurí Jesusan seamiayi  
(Márkus 10.35-45)*

20 Nuyá Jakupusha Juansha, mai Sepetéu uchirí, nukuríjjai tariat Jesusan tikishmatrarmiayi. Tura nukurí Jesusan waitnentrurat tusa seamiayi.

21 “¿Warí wakeram?” tímiayi Jesus.

Tutai nuwá tímiayi “Ame uunt akupin ajastatmena nuñ winia uchir chikichik untsuurnumaani chikichcha menaanmaani akupkarti tusam apusarta.”

22 Takui Jesus tiarmiayi “Atum seatrumna nu nékatsrume. ¿Wi wáitsattajna nujai métek túramniakaitrum? Wi wáitsatniun yapá umartinia áinis umartiniatjai. Núnisan wáitsatniujai imiaitniua áintsan imiantiniatjai. ¿Nú piniñnumiá umarminkiaitrum. Núnisan imianminkiaitrum?”

Tutai “Páchitskea” tiarmiayi.

23 Tuñiakui Jesus tímiayi “Ayu. Winia piniñkruyá umartatrum. Wi imiantiatjana nujai imiantiatrum. Antsu Wijíai tsaninkia pujustinniaka Wikia íschatniutjai, antsu winia Apar iwiarturu áinia nuna nuñ apujusattawai” tímiayi.

24 Chikich tias (10) unuiniamurí nuna antukar nu jímiar kakerkarmiayi.

25 Túmainiakui Jesus untsukar tiarmiayi “Ju nékarme, apachniunmka kapitán ajasar ni shuarín nérenniua áinis ti akupenawai. Ni úuntriñsha waantu enentáimsar “wítjai akupniun” tu enentáimtikiainiawai.

26 Antsu atumjainkia núnis áchatniuiti. Nankaamaku ajastaj tákunka chikicha yaintri áiniati.

27 Ame kapitántrum ajastaj tákunka ashí shuara yaintri ajástí.

28 Wisha Aents Ajasuitiatan, Winia yáintkiarat tusan táchaitjai antsu shuáran yáintaj tusan táwitjai. Untsurí shuaran tunáa tumashrin akikmatkataj tusan jákatniutjai. Nuna tarimjai” tímiayi Jesus.

*Jímiar jii kusurun Jesus tsuármiania nu  
(Márkus 10.46-52; Rúkas 18.35-43)*

29 Jirikiú péprunmayá wénakui untsurí aents Nin nemariarmiayi.

30 Nuñ jintiá yantam jímiar jii kusuru pujuarmiayi. Jesus wéawai taman antukar kakantar untsukarmiayi. “Uuntá, uunt akupin Tawitia Uchirínchukaitiam. Waitnentrurta” tiarmiayi.

31 Tuñiakui “Takamatsatarum” tiarmiayi.

Tútaisha nú nankaamas untsukarmiayi. “Uuntá, Tawitia Uchiriá, waitnentrurta” tiarmiayi.

32 Tuñiakui Jesus wajas jii kusurun untsukar aniasarmiayi “¿Warí itiuurukat tusarum wakerutarum?”

33 “Uuntá, iimtiaj tusar wakeraji” tiarmiayi.

34 Tuñiakui Jesus nin waitnentrar ni jiiñ antiñkiarmiayi. Nu chichamaik ímiar niisha Jesusan nemariarmiayi.



## 21

*Jesus Jerusarénnum wayamiania nu  
(Márkus 11.1-11; Rúkas 19.28-40; Juan 12.12-19)*

<sup>1</sup> Jerusarénnum nuntumsar Petpajái péprunam jeawarmiayi. Nusha Uriwü náinnium ayamchiiyayi. Nuǐ jeawar Jesus ni unuiniamurǐn jímiarán akupeak tímiayi

<sup>2</sup> “Tǐjuch péprunam wérum umpuuru umpuuruchijǐi jǐnkiamu wáinkiatarme. Nu atiarum itartitiarum.

<sup>3</sup> Tura aents “Urukamtai áitkiarum” túramkurminkia “Uunt wakerawai, tura wárik awaǐnkittiwai” titiarum” tímiayi.

<sup>4</sup> Tura nusha yaunchu Yúsnan etserin aarmia nu umínkiatǐ tusa tímiayi. Jǐnis áarmiayi:

<sup>5</sup> “Ashí Israer-shuarnum ju etserkatarum:

“Iistarum, atumi Akupniurǐ, péjchach ajas umpuuruchiniam ekeemak winitramprume. Péjchach asa káarak áintstai umpuuru uchirǐn ekeemak winitrámtarume,” titiarum.” Tu áarmaiti.

<sup>6</sup> Tutai nu jímiar unuiniamurǐ wear Jesus timia núnisan túrawarmiayi.

<sup>7</sup> Umpuuruchin nukurtiuk itiarimiayi. Tura ni pushirǐn áitkiaram Jesus entsamkamiayi.

<sup>8</sup> Shuar untsurǐ ásar ni wéamunam pushirǐn áitkiarmiayi. Chikichcha nuká jurukar ni wéamunam áeprurarmiayi.

<sup>9</sup> Shuar untsurǐ eem wearmia nusha tura uku winiarmia nusha kakantar unsumiarmiayi. “Juna weatǐ uunt akupin Tawit asamtai nankaamakuiti. Yusa náarǐn winiana ju ii Uuntrǐnti. Shiir atǐ. Nayaimpinmasha Yus shiir awajsatai.” Tu unsumiarmiayi.

<sup>10</sup> Jesus Jerusarénnum wayamtai ashí shuar ti enentáimainiak “ǐJusha yait?” tiarmiayi.

<sup>11</sup> Chikichcha “Yúsnan etserin Jesusaiti, tiarmiayi. Nasarét pepru Kariréa nunkanmayaiti” tiarmiayi.

*Yusa Uunt Jeen suruktinian Jesus surinkiamiania nu  
(Márkus 11.15-19; Rúkas 19.45-48; Juan 2.13-22)*

<sup>12</sup> Nuyá Jesus Yusa Uunt Jeen wayá kuítian súruiniak tura súmainiak pujan akúprámiayi. Kuítian yapajǐnia misarǐncha ayanturmiayi tura yampítsa súruinia kutaǐkrǐncha núnisan ayanturmiayi.

<sup>13</sup> Nuyá tímiayi “Yus-Papinium áarchamukait, “Yusa Jeenka Yus aujtai jéaiti.” Antsu átumka kasa matsamtajya nútikiarme” tímiayi.

<sup>14</sup> Nuǐ Yusa Jeen jǐi kusurarusha shutuapsha Jesusan tariarmiayi. Túramtai tsuáarmiayi.

<sup>15</sup> Tura Israer-shuar pátrisha tura Israer-shuara jintinniurǐsha aents tujintiamun Jesus túrakui íisar kajerkarmiayi. Nu arantcha uchi Yusa Jeen “Juna weatǐ uunt akupin Tawit asamtai nankaamakuiti” unsumainiakui Jesusan ti kajerkarmiayi.

<sup>16</sup> Tura tiarmiayi “ǐJu uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papǐ juna tana júka áujсахukaitrum. Jǐnis tawai,

“Uchisha kuírchisha Yusa náarǐn imiá shiir awajtusarat tusa Yus tsañkatkaiti.” Tu áarmaiti.

<sup>17</sup> Nuna tinia ikiuiniak Jerusarénumiã jiinki Petania péprunam we nuí kanarmiayi.

*Jesus iikiu numin yumiñkramiayi*  
(Márkus 11.12-14, 20-26)

<sup>18</sup> Kashin tsawaar Jerusarénum waketas Jesus tsukaarmiayi.

<sup>19</sup> Iikiu numi jintiã yantam wajan wáiniak akaktajtsa werimiayi. Tura werí aya núminiak wáinkiamiayi. Túra numin tímiayi “Atakka nerekchattame.” Takui nu chichamaik káarmiayi.

<sup>20</sup> Nuna wáiniak ni unuiniamurí ti enentáimprar aniasarmiayi “¿Urukaku imiã wárik jaka?”

<sup>21</sup> Tuíniakui Jesus tiarmiayi “Nekasan tájarme, Yus nekas enentáimtakrumka, “nekaspash túrat” táchakrum iikiun túrajna nusha túramniaitrum. Tura nu arantcha nu naint “Ékemtam nayaantsanam iniañta” tutai túrunattawai.

<sup>22</sup> Ashí Yus áujeakum seamna nu, Yus nekas enentáimtakum seakmeke, wáinkiáttame” tímiayi.

*Yusa kakarmaríjaj Jesus takasmiania nu*  
(Márkus 11.27-33; Rúkas 20.1-8)

<sup>23</sup> Yusa Uunt Jeen Jesus wayá unuiniamiayi. Turaj Israer-patri uuntri tura Israer-shuara úuntrisha Jesusan tariar aniasarmiayi “¿Yana chichamejaj ju túram. Ya ju túratniuncha akuptamkait?” tiarmiayi.

<sup>24</sup> Tutai Jesus tiarmiayi “Wisha aniañtaj tusan wakerajrume. Ju áirkakrumniñkia Wissha yana chichamejaj túraj nuna ujaktatjarme.

<sup>25</sup> Wats, ¿ya imiakratin Juanñkan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurniñkia “¿urukamtai enentáimtichuitrum?” túramtatji.

<sup>26</sup> Kame “shuar akupkaiti” tákurnisha ashí aents mantamattaji. Warí, ashí niisha Juan Yúsnan etserniuyi tuíniatsuk” tiarmiayi.

<sup>27</sup> Nuyá Jesusan “Nékatsji” tiarmiayi.

Tutai Jessussha aíñniak “Wátsek, Wissha núnisnak akuptukua nuna ujakchat-tajrume” tímiayi.

*Jimiará uchi tiarmia nuna áujmatsamiania nu*

<sup>28</sup> Jesus unuiniak tiarmiayi “Enentáimpratarum. Shuar uchin jímiaran takakuuyi. Nuna chikichkin chicharuk timiã “Uchirú, arakur júuktin yamá wetá.”

<sup>29</sup> Tutai uchi “Atsá, nakitiajai” timiã. Tayat urum enentáimiar takaumai.’

<sup>30</sup> Nuyá aparí chikichnasha werí núnisñ timiã.’

‘Tutai uchi “Apawa, páchitsuk wetajaj” timiã, túrasha wéchamai.’

<sup>31</sup> ‘¿Túa ni aparí wakeramun umirkama?” tímiayi Jesus.

Tutai “Emkaa nu” tiarmiayi.

Tuíniakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachíintsrumniñ nii emka Yus akupeamunam pachíinkartatui.

<sup>32</sup> Iis, imiakratin Juan péñker wekasatniun etserkamiayi, túrasha an-tukchamarne. Antsu yajauch shuar ainia nu tura tsanirma ainia nu umirkarmiayi. Nusha wáinkiaiatrum atumi tunaari enentáimturcharme’ tímiayi.

*Yajauch takaun áujmatsamiania nu**(Márkus 12.1-12; Rúkas 20.9-19)*

<sup>33</sup> Ju chikich áujmatmasha antuktarum. Nunká nérentin uwa ajan ajammai. Tura wenuimiai. Uwa neketaincha najanamai. Kumpin jeancha najanamai. Tura mash péñker iwiar shuar wáitrukarti tusa apujkimiai. Tura niñkia yaja nunkanam wemai.

<sup>34</sup> Tura júuktin tsawant jeamtai juuk nakak akúptúrkartí tusa chikich takarniurí akupkamai.

<sup>35</sup> Tura nuí pujuinia nu, akupkamun achikiar chikichnaka katsumkar, chikichnasha máawar, chikichnasha kayajai tukurar máawarmai.

<sup>36</sup> Túrawarmatai nérentin takarniun nuna nankaamas akupramai. Ataksha nuí pujuarmia nu núnisan túrawarmai.

<sup>37</sup> Amúamunam ni uchirín akupeak “Winia uchir asamtai umirkachartimpiash” timiai.

<sup>38</sup> Túrasha nu takau nérenniu uchirín wáinkiar “Nuna aparí jakamtai júna mashi júkishtatuak, tiarmai. Maatai, túrar ii nérentin ajastai” tiarmai.

<sup>39</sup> Tiar achikiar arant júkiar nuí máawarmai.”

<sup>40</sup> Tinia Jesus aniasarmiayi “Nunká nérenniurí taa nu takaun ¿itiurkatin?” tímiayi.

<sup>41</sup> Tutai tiarmiayi “Nu shuar ti yajauch ásarmatai waitnentsuk máawartatui. Tura nu ajan chikich takaun neren akanak nin susamnia nuna apujsattawai” tiarmiayi.

<sup>42</sup> Tuíniakui Jesus tímiayi “Átumka Yus-Papikia ¿penkek áujchaitrum? Júnis áarmaiti:

“Jea jeamin utsan̄karmia nú kaya ashí kayajai nankaamas apujsamuiti. Núnaka ii Uuntrí Yus túraití. Iisha íisar ti enentáimtají.” Tu áarmaiti.

<sup>43</sup> Tuma asamtai tájarne, Yusna írunna nu wáinkiatárum tusa suramsamuitiat atumíya júna chikich aents súnastatui. Niisha awantukiartatui.

<sup>44</sup> Tura shuar nu kayan tukumainia nuka kupintrartatui. Tura nu kaya shuarnum iniarka tsai tsai awajsattawai auka” tímiayi Jesus.

<sup>45</sup> Israer-patri uuntrísha Paríséusha Jesus áujmatman antukar “in túramji” tusar achiktaj tiarmiayi.

<sup>46</sup> Tura ashí aents “Jesus Yúsnan étserui” tuinia ásarmatai nin ashamkarmiayi.

**22***Métek-taku chichamjai nuatnaiyamun Jesus áujmatsamiania nu*

<sup>1</sup> Jesus ataksha áujmatuk júna tímiayi:

<sup>2</sup> “Yus akupeamunam pachiinkiertin júnis enentáimpramniaiti. Uunt akupin ni uchirí nuáteakui nampermamai.

<sup>3</sup> Túrak ni takarniurín ipiaamautarum tusa akupkarmai. Tura ipiaamusha nakitrarmai.

<sup>4</sup> Ataksha chikich takarniuncha ipiaamakrum ju titiarum tusa akupkarmai. “Mash yurumkan iwiarajai, tawai, titiarum, timiai. “Waakasha máatarum tusan akupkarjai, tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai.

<sup>5</sup> Támaitiat nú ipiaamusha nakitrarmai. Chikichich ni nunken wemai. Chikichcha kuítian suruktinian wemai.

<sup>6</sup> Chikichcha ipiaakratniun achikiar yajauch awajsarmai, tura chikichnaka máawarmai.

7 Túramtai uunt akupin ti kajek, ni suntari mash máatarum túrarum ni jee mash ekeemáktárum tusa akupkarmai.

8 Nuyá ataksha ni takarniurín akupkamai. “Nuatnaikiatin jisat mash iwiamuuiti, timiai. Tura nu ipiaamu winichmin armai.

9 Tuma asamtai pepru jintí werum ashí shuar náŋkamas wáintrum nu ipiaatarum” timiai.

10 Takui takarniurí jínkiar pepru jintín wajainian, yajauch shuarnasha péŋker shuarnasha, ashí ipiaawarmai. Túramtai jea piákmai.’

11 ‘Nuyá uunt akupin ipiaamun ísartaj tusa wayamai. Nuí shuaran péŋker iwiamamprachun wáinkiamai.

12 Tura timiai “Umpá, ¿urukamtai nuatnaiyamunam entsatai pushí entsatsuk wayam?” Tutai nu áishman tákamtak pujusmiayi.

13 Nuyá uunt akupin yurumka ajaaman timiai “Achikrum nawenmasha uwejnnumsha jínkiarum aa jínkum kiritniunam ajapatarum. Nuísha ti útin ti wáitsatin átatui” timiai.

14 Kame untsurí ipiaamu áiniawai antsu ishichik achikma áiniawai.”

### *Unt akupin Sésar akiktinia nu*

*(Márkus 12.13-17; Rúkas 20.20-26)*

15 Nuyá Paríséu chichaman najatawar uyumtikiatái tusar tiarmiayi.

16 Túrawar ni shuaríncha tura akupin Erutisa nemarniurísha Jesusan akuptukarmiayi. Kame akupin Erutis uunt akupin Sésara kuitrí wáinin asamtai nu apachniasha akupkarmiayi. Niisha jeariar Jesusan tiarmiayi “Uuntá, amesha nekas chicham chichaame. Nu nékaji. Chíkich shuar tuinia nu ántutsuk nekasam Yus-Chicham jintíame. Shuar shiir enentáimturarat tusam jintíatsme, tiarmiayi.

17 Tuma asamtai ju nekaatai tusar wakeraji. ¿Uunt akupin Sésar akikminkiait?” tiarmiayi.

18 Jesus ni yajauch enentáijíai aníam nekáa tiarmiayi “Aya shiir chicham-tiniaitrumé. ¿Urukamtai uyumatkiarkatin wakerutarum? tímiayi.

19 Wats, Sésar akiktinia nú kuit ititartitarum.” Takui chikichik kuítian itiararmiayi.

20 Nuna iis Jesus aniasarmiayi “¿Juí yana yapimpiait tura yana naari áarmait?”

21 Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi.

22 Tura nuna antukar ti enentáimprarmiayi. Tura ikiuiniak wearmiayi.

### *Jesusan jakamunmaya nantaktinian aniasarmiania nu*

*(Márkus 12.18-27; Rúkas 20.27-40)*

23 Nu tsawantájk Satuséusha Jesusan tariarmiayi. Satuséuka jakamunmaya nantakchatniuiti tuíniawai. Nuna tiniu ásar juna Jesusají áujmatsarmiayi.

24 “Uuntá, Muisais juna áartampramiayi, “áishman uchin yajutmatsuk jakam-tainkia ni yachí nu nuwan nuatak ni yachin yajútmátrati,” tu áarmiayi, tiarmiayi.

25 Ayu, íi shuarnum siati (7) yáchintin ármiai. Iwiajiri nuatak uchin yajutmatsuk jakamiayi. Tura wajen ni yachin ikiurkimiayi.

26 Tura niisha nuatak uchin yajutmatsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi.

27 Nuyá nuwasha jakamiayi.

28 Jakamunmaya nantakiar ζyaki nekas ni aishrj ati? Ashí nin nuatkacharmakia” tiarmiayi.

29 Tuíniakui Jesus tímiayi “Yus-Chichamsha nékachkuram tura Yusa kakarmarjsha nékachkuram nantaktin atsawai tákuram ti awajiarne.

30 Nekaatarum. Jakamunmaya nantakiaruka nuatkachartatui. Antsu Yusa suntarj nayaimpiniam pujuinia núnisar nuartichu pujusartatui.

31 Túrasha jakamunmaya nantakiaratna nu nekaatajtsa wakerakrumka ju enentáimsatarum. Muisais aarma nu áujsachukaitrum. Júnisan áarmiayi:

32 “Wiitjai Apraáma Yúsrinjai, Isaka Yúsrinjai, Jakupu Yúsrinjai.” Tu áarmiayi. Watsek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruitiat Yusjaj iwiaaku pujuiniak nantakmin áiniawai” tímiayi.

33 Ashí aents nuna antukar nu jintintiam ti enentáimprarmiayi.

*Yus akupkamu imiá enentáimtustinia nu*

*(Márkus 12.28-34)*

34 Satuséu Jesusan aiktinian tujinkiar matai Pariséu nuna antukar iruntrararmiayi.

35 Tura chikichik Pariséu jintintin asa Jesusan uyumtikiataj tusa aniasmiayi

36 “Uuntá, ζtúa Yus akupkamu imiá nankaamas enentáimtustiniat?”

37 Tutai Jesus tímiayi “Júiti: “Ame Yúsrum ashí enentáimjaj aneeta. Ashí ame wakanmijajsha tura tuke enentáimtusam aneeta.” Tu áarmaiti, tímiayi.

38 Núiti emka ashí akupkamu nankaamas enentáimtustinia nu.

39 Chikichcha jujaj métek-taku awai. Nusha tawai: “Ame írutramuram ame ayashim aneamna nútiksamék aneeta.”

40 Nu jímiar akupkamu umirkam ashí Muisais akupkamia nusha tura ashí Yúsnan etserin unuiniarmia nusha umirkattame” tímiayi.

*Kristu Tawit weeaitiat Yusa Uchirinti*

*(Márkus 12.35-37; Rúkas 20.41-44)*

41 Tura Pariséu tuke irunar pujuiniakui

42 Jesussha aniasarmiayi “Kristu tutai ζya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

43 Tuíniakui Jesus tiarmiayi “Nuikia ζurukamtaí Tawit, Yusa Wakaní “titia” tutai, Kústun “winia Úuntur” tímia? Iis, Tawit juna tímiayi:

44 “Uunt Yus winia Úuntrun juna tímiayi: “Akupin pujutainium, winia untsuruinj, pujusam nácarsata. Ashí ame nemasrumin nupetkan Ámin umirtamkarti tusan amastajaj” tímiayi Yus.” Tu tímiayi Tawit.

45 Watsek, Tawit Kústun “winia Úuntur” tajsha ζitiurak ni pampanmarj áti?” tímiayi Jesus.

46 Nuna takui penkesha áikcharmiaiyi. Túrawar atakka uyumantikiatai tusar aniascharmiaiyi Jesusan.

## 23

*Jesus Pariséuncha Israer-shuara jintiniurincha “yajauchitrume” timiania nu*

*(Márkus 12.38-40; Rúkas 11.37-54; 20.45-47)*

1 Jesus ni unuiniamurjntcha tura ashí shuárnasha tiarmiayi

<sup>2</sup> “Israer-shuara jintinniur<sub>1</sub>isha tura Pariséusha Muisais akupkamun paant ujatmainiawai.

<sup>3</sup> Tuma asantai tuinia nu umirkatarum. Túrasha ni túruinia nu jumamkirap. Nu shuar shiir chichainiyat nusháa túrin áiniawai.

<sup>4</sup> Ti itiu<sub>1</sub>rchat ana nuna akupeenak ti emeram entsaktinia áintsan áentsun apujtuiniawai. Túrasha chikichik uwe<sub>1</sub>jé<sub>1</sub>ja<sub>1</sub>isha ishichkisha takuitniun nakitiainiawai.

<sup>5</sup> Aya shuar írsarti tusar ashí túruiniawai. Ashí shuar pé<sub>1</sub>nker enentáimturarti tusar Yus-Papin nijai<sub>1</sub>ncha tura kuntur<sub>1</sub>ncha ti wan<sub>1</sub>karam awajsar anujak yujainiawai. Tura nu arantcha pushir<sub>1</sub>í sasariarman ashí shuar<sub>1</sub>ja<sub>1</sub> nan<sub>1</sub>kaamas esaram awajas wekainiawai.

<sup>6</sup> Nampernumsha pé<sub>1</sub>nker iwiamunam pujustinian wakeruiniawai. Iruntainmasha nan<sub>1</sub>kaamantu ajasa pujustinian wakeruiniawai.

<sup>7</sup> Jintí<sub>1</sub>á wekainiaksha ashí aents áujtuiniak “Jintí<sub>1</sub>nkiartiniá” turutiarti tusa wakeruiniawai’ tímiayi.

<sup>8</sup> ‘Túrasha á<sub>1</sub>tumka ashí shuar “Jintí<sub>1</sub>nkiartiniá” turutiarti tusa enentáimsashtiniatrumé. Á<sub>1</sub>tumka nuámtak yáchintrume. Á<sub>1</sub>tumka chikichik jintí<sub>1</sub>nkiartín ní naar<sub>1</sub>í Kristu takakrume. Nu asantai “Jintí<sub>1</sub>nkiartiniá” túramcharmin áiniawai.

<sup>9</sup> Ju nun<sub>1</sub>kanmasha shuar “Aparú” tiirap. Chikichik nayaimpiniam pujana nu atumí Aparí<sub>1</sub>nti.

<sup>10</sup> Atumi uun<sub>1</sub>tr<sub>1</sub>í aya Krístuk asantai “Uun<sub>1</sub>trú” túramcharmin áiniawai.

<sup>11</sup> Antsu á<sub>1</sub>tum írutkamunmayá uunta nuka pee<sub>1</sub>jchach á<sub>1</sub>tiniaiti.

<sup>12</sup> Shuar nan<sub>1</sub>kaamantu ajastaj táku<sub>1</sub>n<sub>1</sub>kia Yus nin pee<sub>1</sub>jchach awajsattawai. Antsu pee<sub>1</sub>jchach ana nuna Yus nin nan<sub>1</sub>kaamaku awajsattawai’ tímiayi.

<sup>13</sup> ‘Maa wáinkiatárum jintinniutirmesha, Pariséutirmesha. Án<sub>1</sub>tr<sub>1</sub>um shiir chicham<sub>1</sub>tiniaitrumé. Yus akupeamunam wayá<sub>1</sub>tin waiti epenniu<sub>1</sub>itrumé. Atumsha wayá<sub>1</sub>t<sub>1</sub>suk chikichcha wayá<sub>1</sub>taj tuinia nusha suritniui<sub>1</sub>trume.’

<sup>14</sup> ‘Maa wáinkiatárum jintinniutirmesha, Pariséutirmesha. Án<sub>1</sub>tr<sub>1</sub>um shiir chicham<sub>1</sub>tiniaitrumé. Wajé<sub>1</sub> jee atankiirum aents enentáimturará<sub>1</sub>n<sub>1</sub> tusarum ti esaram Yus áuj<sub>1</sub>tiniaitrumé. Túrin asarum á<sub>1</sub>tum ti asutniát<sub>1</sub>niui<sub>1</sub>trume.’

<sup>15</sup> ‘Maa wáinkiatárum jintinniutirmesha, Pariséutirmesha. Án<sub>1</sub>tr<sub>1</sub>um shiir chicham<sub>1</sub>tiniaitrumé. Nun<sub>1</sub>kanmasha nayaantsanmasha yajá wekainiu<sub>1</sub>itrumé chikichik shuar wini nemartusat tusarum. Tura atumi nemar<sub>1</sub>í ajasmatai atum<sub>1</sub>ja<sub>1</sub> nan<sub>1</sub>kaamas tunáa sumamannia awajearme.’

<sup>16</sup> ‘Wáinkiatárum á<sub>1</sub>tumka. Jintí<sub>1</sub>nkiartiniaitrumé nékachu asarum kusurua á<sub>1</sub>niui<sub>1</sub>trume. Ju jintí<sub>1</sub>arme: “Shuar nekasan tajai tusa Yusa Jee<sub>1</sub>n páchiakka ní tana nuna umitsuk ikiuk<sub>1</sub>miniaiti. Antsu nekasan tajai tusa Yusa Jee<sub>1</sub>n kuri ana nuna páchiakka ti nekas umiktí<sub>1</sub>niaiti” tíniui<sub>1</sub>trume.

<sup>17</sup> Nétsetrumé. Yús<sub>1</sub>ja<sub>1</sub>n<sub>1</sub>kia ashí kuri á<sub>1</sub>n<sub>1</sub>trachukait. Antsu Yusa Jee<sub>1</sub>n ír<sub>1</sub>unna nuka aya nuin<sub>1</sub> ikiusma asa Yusna ajasu<sub>1</sub>iti. Tuma asantai kurij<sub>1</sub>ja<sub>1</sub> nan<sub>1</sub>kaamas Yusa Jee<sub>1</sub> enentáimtustiniaiti. Enentáimcha asarum kusurua á<sub>1</sub>inin wá<sub>1</sub>aku<sub>1</sub>itrumé.

<sup>18</sup> Nu arantcha tíniui<sub>1</sub>trume: “Shuar nekasan tajai tusa naman<sub>1</sub>-maar-Yus-sút<sub>1</sub>an páchiakka ní tana nuna umitsuk ikiuk<sub>1</sub>miniaiti. Antsu Yús-sutainiam naman<sub>1</sub> patasman páchiakka ti nekas umiktí<sub>1</sub>niaiti” tíniui<sub>1</sub>trume.

<sup>19</sup> Nétsetrumé. Pen<sub>1</sub>ké naman<sub>1</sub> Yus<sub>1</sub>ja<sub>1</sub> á<sub>1</sub>n<sub>1</sub>trachukait. Aya Yús-sutainiam patasma asa nu naman<sub>1</sub> enentáimtuschatniukait. Enentáimcha asarum kusurua á<sub>1</sub>inin wá<sub>1</sub>aku<sub>1</sub>itrumé.

20 Enentáimpratarum. Shuar nekasan tajai tusa Yús-sutain páchiakka aya sútainiak páchiatsui antsu sutaincha tura nuĵ patasmancha máí-metek páchiawai.

21 Núnisanĵ shuar Yusa Jeen páchiakka aya nunak páchiatsui antsu Yus nu jeanam puĵú asamtai nunasha páchiawai.

22 Núnisanĵ shuar nayaimpin páchiakka Yus pujutainchsetrume. Penĵé namanĵ Yusĵai ánrachukait. Aya Yúa tura Yus nuĵ pujana nunasha páchiawai.'

23 'Maa wáinkiatarum jintinniutirmesha, Pariséutirmesha. Ánrarum shiir chichamtiniaitrum. Kumintsu nukesha, anisa nukesha, menta nukesha tias (10) akantram chikichik akan kamu Yus súwitrume. Nuka péñkeraiti, ikiukchatniuiti. Túramaitiat nekas péñker túratniua nu túrutsuk ikiuwitrume. Yus nekas enentáimtustincha, waitnentáimturincha tura tuke péñker túratniusha enentáimtsuk ikiuwitrume.

24 Átumka jintinkiertiniatiatrum nékachu asarum kusuru ániuitrume. Kutanam yajasmach enĵetu wáinkiumeka júwitrume. Túrayatrum kamiriu wáinkiumeka kawai nanĵkaamas úunt aiñ takamtsuk kúĵawitrume.'

25 'Maa wáinkiatarum jintinniutirmesha, Pariséutirmesha. Ánrarum shiir chichamtiniaitrum. Átumka tsapasha pininsha initiaaniĵ niĵiatsuk aya pátatek niĵiawitrume. Núnisrum pátatek shiir awajmamniuitrume tura enentáiminkia kasamkatniusha tura chíkichna wakeruktincha nuĵai piákuitrume.

26 Kusuru ániuitrume, Pariséutirmeá. Antsu emka initiaaniĵ tsapasha pininsha niĵiaktarum. Túrakrumniñkia pátatesha mai péñker átatui. Núnisrum atumsha atumi enentáin ana nu shiir awajсарum pátatesha shiir átatrume.'

27 'Maa wáinkiatarum jintinniutirmesha, Pariséutirmesha. Ánrarum shiir chichamtiniaitrum. Iwiarsamu puĵujai yakarar shiir awajsamua ániuitrume. Aanĵ shiir ániawai. Tura initkia jaká ukunchĵijai piákuiti.

28 Núnisaitrume atumsha. Chíkich shuar íismaka ti shiira ániuitrume. Túrasha atumi enentáinkia ashí mujĵmiai piákuiti.'

29 'Maa wáinkiatarum jintinniutirmesha, Pariséutirmesha. Ánrarum shiir chichamtiniaitrum. Yaunchu Yúsnan etserin iwiarsamunam átumka shiir enentáimtakrum jeĵ jeamkaitrume. Tura péñker shuar yaunchu jákarusha shiir enentáimturtaĵ tusarum ni iwiarsamu shiir awajearme.

30 Túrakrum ĵu tniuitrume: "Íikia yaunchu ii weĵtrijjaiĵ pujaitkiurkia Yúsnan etserin máatin yáimkiachaĵai."

31 Nuĵai ti paant chichaarme atumsha. "Íi weĵtri Yúsnan etserniun máawar tunáa túrin ármiaiĵ" tárume. Tura "Yáimkiachaĵai" táyatrum, atumsha métek túrin asarum "Niĵijai méteketĵi" tárume.

32 Wats, atumi weĵtriĵ nanĵkamawarmia nu átum amuktatrume' tímiayi Jesus.

33 'Napia ániuitrume. Shuar aya yajauch awajniuitrume. Túmatirmesha Yus tunáa shuaran ĵinium akupkartatna nuyá ĵitiurak uwempratarum?

34 Untsurĵ shuaran akuptuktatĵarme. Yúsnan etserniuncha, ti nekancha, jintinkiertinniaasha akuptuktatĵarme. Tura atumsha chíkich máattarme, chíkichcha krúsnam ajinruarum máattarme, chikichcha iruntai jeanam asu-tícharme, tura chikichcha ashí nunĵanam ánrattarme.

35 Nu tura asarum péñker shuara numpé puarma nuĵai átum sumamatarme. Yámankamtaik Apir ti penĵker shuáraitiat máamuyayi. Tura ukunam

Perekiasa uchirí Sakarías atumi uuntri Yusa Jee ámanum naman-maar-Yús-sutai ajapén aténkamunam máawarmiayi. Wats, Apir máamunmayá Sakarías máamunam ashí péñker shuar ti untsurí máamujai sumamattarme.

<sup>36</sup> Nekasan tájarme, yamáí pujuinia nú shuar ashí nujai sumamawartatui' tímiayi Jesus.

*Jerusarénumiá shuaran Jesus aneak úutmania nu  
(Rúkas 13.34-35)*

<sup>37</sup> Jerusarénumiáitirmeá, Yúsnan etserin máiniaitrome. Yus akatar akup-turmakmasha kayajai tukuram máiniaitrome. Túrin árumniñ waitnentarume. Atash ni uchirín weana áitkiasnak weartinian wakerimjarme, tura nakitramarme.

<sup>38</sup> Iistarum. Ame pépruram ajapamuiti.

<sup>39</sup> Tura “Yusa náarjin winiana nu, shiir atí” títiatrumna nu tsawant jeatsain penké wáitkiashtatrome. Nuna tájarme” tímiayi Jesus.

## 24

*Yusa Uunt Jee saanaktinian Jesus ujakmania nu  
(Márkus 13.1-2; Rúkas 21.5-6)*

<sup>1</sup> Jesus Yusa Uunt Jeeñiá jiinki weai ni unuiniamurí nin tariar Jeeñ iniaktusar áujmatsarmiayi.

<sup>2</sup> Tura Jesus tiarmiayi “Nu mash yamáí wáintrume. Tura nekasan tájarme ukunmañka mash saanaktiatui. Chikichík kayaksha ekentramurí atsut-tawai” tímiayi.

*Amúamu tsawant nekaatin  
(Márkus 13.3-23; Rúkas 21.7-24; 12.22-24)*

<sup>3</sup> Nuyá Uriwiu náinnium wear nínki nuí pujusar ni unuiniamurí Jesusan aniasarmiayi “¿Nusha urutaik túrunat'. Tura ame tátincha tura nunka amuukatin tsawant jeakuisha warijjaiñ nekaattaj? Nu ujatkata” tiarmiayi.

<sup>4</sup> Tuíniakui Jesus tímiayi “Aneartarum, anankramawairap.

<sup>5</sup> Untsurí shuar winia náarun pachisar “wi Krístuitjai” tiar untsurí shuaran anankawartatui.

<sup>6</sup> Ti untsurí meset chicham antuktatrome túrasha sapijmiakairap. Núnisan átiniaiti nunka amúatsain.

<sup>7</sup> Apachcha chíkich nunkanmayá apachjai máaniawartatui. Tura ti tsukasha átatui. Sunkursha ti pampartatui. Uusha ti uurkartatui. Nuka untsurí nunkanam ashí túrunawartatui.

<sup>8</sup> Nujai ti wáitsatin aya yama nankamui' tímiayi.

<sup>9</sup> Nuyá atumniasha yajauch awajsarti tusa surutmakartatui. Tura manta-mawartatui. Tura winia naar pachia asakrumin ashí shuar mujramkartatui.

<sup>10</sup> Nu tsawantaj untsurí shuar Yúsan iniaisartatui. Túrawar nuamtak mujniainiak surunairartatui.

<sup>11</sup> Untsurí shuar wáitruiniak “wi Yúsnan etserniuitjai” tiartatui. Túrawar untsurí shuaran nusháa enentáimtikrartatui.

<sup>12</sup> Tura tunáa ti ákui nuamtak anenaichartatui.

<sup>13</sup> Tura shuar ashí nuna tuke katsuntra nu uwemprattawai.

<sup>14</sup> Ashí aents nekaawarat tusa Yus-Chicham ashí nunkanam etsernaktatui. Túramtai amuukatin tsawant jeattawai” tímiayi.



15 Shuar juna áujea nu enentáimprati. Kame Jesus tímiayi “Yúsnan etserin Taniar muijmiamtik tuke emesratin ana nuna yaunchu aar etserkamiayi. Nuka Yusa Jeen wantinkiamtai

16 ashí shuar Jutía nuñkanam írúnna nu, muranan pisararti.

17-18 Ti wárik pisartin asamtai shuar jea yaki pujaksha tura shuar ajanam wekaakusha jea waketki warirj jukitiaj tichati. Antsu nuyañ wárik pisarti.

19 Nu tsawantaj nuwa ajamtincha tura kuírchin takaku ainia nusha ti wáitsartatui.

20 Ayampratin tsawantajsha tura michá nántutincha nu pisartin tsawant áchati tusarum Yus seatarum.

21 Maa, nu tsawantaj ti wáitsatin átatui. Ti yaunchusha núnisañ wáitsatin atsuuyayi. Ukunmasha atsuttawai.

22 Nu wáitsatin ti esarmaitkiuinikia chikichkísha uwemprachainti. Tura Yus nu wáitsatniun wárik amumtikiattawai. Shuar Niiniu ajasarat tusa achikma ainia nu uwemprarat tusa wárik amumtikiattawai' tímiayi.

23 “Tura atumin “Júiti Kristu,” tuíniakuisha tura “Nuñ pujawai” tuíniakuisha anturkairap.

24 Untsurí shuar Krístuitjai tusar wantinkiertatui. Untsurísha “Yúsnan etserniuitjai” tiartatui. Tura shuáran anañkataj tusar aents tujintiamun iniakmasartatui. Tura ti kakarman túruiniak Yús-shuarnasha anañkamin ániakuinikia anañkawarainti.

25 Túrunatsañ nuna emka ujaajrume.

26 Tuma asamtai “Iis, Kristu nuñ aents atsamunam pujawai” túramainiakuisha nuñ wéerap. “Juñ úumak pujawai” tuíniakuisha anturkairap.

27 Núnisañ úumkan táchattajai. Peem péetuk ti wárik ashí nuñkanam wáinkiachminkiait. Núnisnak wi Aents Ajasuka winiakun paant wantinkiat-tajai.

28 Wats, jaka tepaana nuñ chuan káutkachartatuak' tímiayi.

### *Kristu tátintri*

*(Márkus 13.24-37; Rúkas 21.25-33; 17.26-30, 34-36)*

29 “Ti wáitsatin nankaasmatai ti wárik tsawáj nantu kajinkiat-tawai. Tura kashí nantusha etsantrashtatui. Yaasha ashí muchitrattawai. Nayaimpiniam kakaram ainia nusha peantrartatui.

30 Nuñkia Wi Aents Ajasuka, tátiniur paant átatui. Tura ashí nuñkanmaya aents Wi winiaí wáitkiar asuttiamattajj tusar úutiartatui. Wisha ti kakaram tura Yusa wincharjijaj yurañminiam winiaí wáitkiartatui.

31 Yusa suntarjñ kachu kakaram umpuarterum tinia akupkamtai nu suntar ashí nuñkanmaya ashí Yús-shuaran, Yus achikma ásarmatai, irurartatui' tímiayi.

32 “Ikiu numirj nakumea nu nekaatarum. Ni nuken eteakui “esat nantu jeatemayi” tátsurmek.

33 Núnisañ ashí ju wáinkiumeka “amuukatin tsawant nekas jeatemayi” tíniatrum.

34 Nekasan tájarme, yamá aents pujuinia nu amúatsañ ashí túrunattawai.

35 Nuñkasha nayaimpisha amuukartatui antsu winia chichamur amuukashatui' tímiayi.

36 “Tura nu túrunatin tsawant nekanachminiaiti. Yusa suntarjsha nékainiatsui. Wisha Yusa Uchiríntiatnak nékatsjai. Antsu aya winia Aparuk nékawai' tímiayi.

<sup>37</sup> ‘Wi tátiniur jeamtai yaunchu Nuai pujumia nú tsawantin túrunamia núnisan átatui.

<sup>38</sup> Nu tsawantin, tuke amaartsain, aya júnisan aa asamtai yurumuk umarar pujuarmiayi. Nuatnainiarmiayi. Ní nawantríncha nuatmamtkiarmiayi. Tura tumá pujuiniaí Nuai uunt kanunam enkemamtai

<sup>39</sup> nu aents tuke nékainiatsain ama amaarak mash amuukarmiayi. Núnisan átatui Wi tátin jeamtai.

<sup>40</sup> Nu tswantaik jimiara shuar ajanam pujuttawai. Chikichik junaktiatui tura chíkichkia ikiunkittiawai.

<sup>41</sup> Núnisan jimiara nuwá shana nekeak pujuttawai. Chikichik junaktiatui chikichcha ikiunkittiawai’ tímiayi.

<sup>42</sup> ‘Nu asamtai atumsha iwiarnarum pujustarum. Nekaachminiaiti uruk áintsuk taritjarum.

<sup>43-44</sup> Tuma asamtai aneara pujustarum. Wi nekaachmanum tátin júnisan enentáimpramniaiti. Shuar ju kashi kasa tátinian nekaanka kánutsuk kasa táawai tusa iwiarnar nákasainti. Núnisrum aneara pujutarum.’

*Pénker takamtikniuncha yajauch takamtikniuncha Jesus áujmatsamiania nu (Rúkas 12.41-48)*

<sup>45</sup> ‘Shuar pénger uminian tura pénger enentáimniun áujmatsattajai. Nuna uuntri yajá irauweak “Yurumátin jeamtai winia takartin ayuratarum” tíchanpiash.

<sup>46</sup> Nu takamtikniuncha ni uuntri taa takatrin tímiatrusan túran tariñkia shiir enentáimtusainti.

<sup>47</sup> Nekasan tájame, umin asamtai ni uuntri ashí ni waririn wáitrukát tusa takatan susattawai.

<sup>48-49</sup> Antsu úuntur wau táchattawai tusa takamtikin ni uuntri yáintrin yajauch awajeak tura takatsuk aya yurumátiniun tura nampektinian wararkunka nu takamtikin yajauchiiti.

<sup>50</sup> Turai ni uuntri aya aneachma taa nu takamtikniun, yajauch asamtai,

<sup>51</sup> ti kakaram asutiattawai. Yajauch shuar pujuinia nuí akupkattawai. Nuísha ti wáitiak ti úuttiatui’ tímiayi Jesus.

## 25

*Jesus tias (10) nuwan áujmatsamiania nu*

<sup>1</sup> ‘Yus akupeamunam pachiinkiatin júnis átatui. Nuatnaikiatin jisat akui tias nuwá natsa kantiran akaawar nuátkattana nu áishmankan inkiun jeá itiatatui tusar wearmai.

<sup>2</sup> Senku nuwá enentáimcha armai. Tura chíkich senku nuwá enentáimin armai.

<sup>3</sup> Enentáimcha arma nú nuwá aya akaamunak juñiak amuukamtai yaraatniun asutin júkicharmai.

<sup>4</sup> Antsu chíkich senku núwaka akaamuncha juñiak tura ataksha amuukamtai yaraatniun asutin júkiarmai.

<sup>5</sup> Tura jíinkiar matai nuatkatini áishman wari taachkui karí pujakui kanarar-mai.

<sup>6</sup> Nuyá kashi ajapén shuar unsumuk “Pai nuatkatini winiawai. Werirum inkiuntarum” timiaí.

<sup>7</sup> Tu unsumun antukar nantakiar kantiran akaatai tusar pujursarmai.

8 Nuyá seṅku nuwá enentáimcha arma nu, chíkich nuwá enentáimniun tiar-mai “Incha atumi asutirí ishichik ajamprusaitia. Ii kantirísha kajiniawai.”

9 “Tutai chíkich seṅku nuwá tiarmai “Atsá, warí íncha jeartamchattaji. Tura atumnia penké jeashtatui. Nekaska surutainium werum sumaka utumtarum” tiarmai.’

10 “Tura nuyá seṅku nuwá enentáimcha arma nu, asutian sumak utitiai tusar wéaraj ukunam nuatkatín áishman tamai. Túramtai enentáimin nuwá arma nuka nuatnaikiatín námpernam nuatkatniujaj wayawarmai. Túramtai wáitin epeniarmai.

11 Tura epeniaraj enentáimcha nu táarmai. Tura tiarmai “Úuntá, waiti uratritia.”

12 “Tu unsumainiakui nu uunt kakerak chichak “Cha, ¿yátsukaitrum? Penké nékatsjarne” tiarmai.”

13 Jesus nuna áujmatas umik tímiayi “Aents Ajasuitjai tura tátin tsawantrusha tura uruk ain tátaj nusha nékatsrume. Tuma asarum tuke iwiarnarum pujustarum’ tímiayi.

#### *Kuit susamun áujmatsamiania nu*

14 ‘Núnisan Wí tátin júnisaiti. Shuar chíkich nunḡkanam wéak<sub>u</sub> ni takarniurḡn untsakar ni kuítrḡn akanak súsarmai.

15 Chikichkiniak seṅku mir (5.000) kuítian susamai. Chikichnasha jimiará mir (2.000) kuítian susamai. Tura chikichnasha chikichik mir (1.000) kuítian susamai. Nii takastin jearma nujaj métek súsarmai. Tura ikiuak yajá wemai.

16 Takarḡn seṅku mir kuítian achikmia nujaj takakmas ataksha seṅku mir kuítian patakmai.

17 Chikichcha núnisan jimiará míran achikmia nujaj takakmas ataksha jimiará míran patakmai.

18 Tura chíkich shuar ni uuntrḡ kuítrḡn chikichik míran achikmia nuna wáḡ taur úḡkmai.’

19 ‘Nuyá ukunam nu shuara uuntrḡ támai. Tura kuítian súkiarma nujaj ititurkarmakit tusa untsukarmai.

20 Emka seṅku mir kuítian achikmia nu tamai. Nuyá ni úuntrḡn chíkich seṅku mir patakman suak timiai “Uuntá, seṅku mir kuit surusmame. Pai, atak seṅku míran patasmajai.”

21 ‘Takui ni uuntrḡ timiai “Ti péṅker takakmauwitme. Nekas uminaitme. Ishichkijiaisha ti péṅker takakma asakmin ti núkap yamaikia amastatjai. Winí wayam wijaj<sub>i</sub> ti shiir warasta” timiai.’

22 ‘Nuyá chíkich shuar jimiará míran achikmia nu tarí timiai “Uuntá, jimiará mir surusmame. Pai, ataksha jimiará míran patasmajai.”

23 ‘Takui ni uuntrḡ timiai “Ti péṅker takakmauwitme. Nekas uminaitme. Ishichkijiaisha ti péṅker takakma asakmin ti núkap yamaikia amastatjai. Winí wayam wijaj<sub>i</sub> ti shiir warasta” timiai.’

24 ‘Nuyá chíkich shuar chikichik míran achikmia nu tarí timiai “Uuntá, ti kajen asakmin tura araachiatam tura atsaamprachiatam júurtukturum tiniu asakmin

25 sapijmiakun ame kuítrumniaka nunká táutran úḡkmajai. Pai, juíti ame surukmiam nu” timiai.’

26 ‘Takui ni uuntrḡ timiai “Ámeka yajauchiitme. Aya nákiitme. Wi araachiatan tura atsaamprachiatan júurtukturum tiniuitme túrutsumek.

27 Tu enentáimkiumka ¿urukamtai kuit-iruntainiam ikiirtuschamam? Nuikia wi táakun patasan achikiáajai” timiai.

<sup>28</sup> Nuna tinia nuĵ wajainian tiarmai “Ju shuar chikichik mir kuit atankirum tias mir kuĵtian takaka nu susatarum.

<sup>29</sup> Kame nukap takakna nu shuar ataksha patatnastatui tura ampiniartau. Antsu ishichik takakna nusha ishichik takakuiat jurunkittiwai.

<sup>30</sup> Ju umichu shuarsha aa kiritniunam ajapatarum. Nuĵ ti waiĵtiak ti uĵtĵtiatui” timiai”. Tu aĵmatsamiayi Jesus.

### *Akantratin aĵatna nu*

<sup>31</sup> Jesus aĵmatuk tĵmiayi ‘Aents Ajasuitĵiana nu ashĵ akupin ajasan Yusa suntari eĵkekma winittĵajai. Tura Uunt Akupin asan shiir pujutairuĵ pujusĵtĵajai.

<sup>32</sup> Turaĵtai ashĵ nunĵkanmaya aents Winia irunturartatui. Turaĵnawarmatai akantrartatĵajai. Murĵkiu wainin kachurtinian tura kachurtichuĵai akanea nĵtisanak shuaran akantrattĵajai.

<sup>33</sup> Tura kachurtichunka, pĵnĵkera nuna, untsuuruĵni awajsartatĵajai. Tura kachurtinniaka, yajauchia nuna, menaruĵni awajsartatĵajai.

<sup>34</sup> Turaĵn nekas Uunt Akupin asan untsuuruĵni wajainian tĵtĵiatĵajai “Atumni-aka winia Apar shiir awajĵtamsaitrume. Wi akupeajna nuĵ winĵtiarum. Yus nunĵkan najanamia tĵmianaik atum nuĵ warastinian tsanĵkatramkamiarme.

<sup>35</sup> Kame Wi tsukamaĵ wekaĵ ayurtuamiarme. Kitiama wekaĵsha umartin surusmiarme. Wait aĵa wekaĵsha itiaararum ajamprusmiarme.

<sup>36</sup> Pushir atsajsha atumka surusmiarme. Jaa tepaĵsha ĵiraimiarme. Sepunam enĵketajsha tarum ĵiraimiarme” tĵtĵiatĵajai.

<sup>37</sup> Tutai untsuuruĵni wajainia turuĵtiartatui “Uuntá, ĵurutia tsukamaĵ wekaamnisha ayuramajĵ. Urutia iisha kitiama wekaa wainĵiarsha umartincha amasmajĵ.

<sup>38</sup> Tura urutia wait aĵa wekaamnisha tura pushiram mamurmataisha iisha amasmajĵ.

<sup>39</sup> Urutia iisha jaa tepamin tura sepunam enĵketmin wainĵiarsha winitir ĵimĵajĵ?” turuĵtiartatui.

<sup>40</sup> Turutainiakui Wi Uunt Akupin asan tiartatĵajai “Nekasan tajarĵme, ashĵ ju wĵi shuar pĵeĵchachisha waitnentramarum nu Winia anentakum turaĵitrume” tiartatĵajai’ tĵmiayi.

<sup>41</sup> ‘Wi Uunt Akupin asan menaruĵni wajainian tiartatĵajai “Atumsha yajĵ wetarum. Yajauchĵĵaj yumiĵkramuitrume. Yus uunt iwianchi ni suntariĵĵajĵai tute kajinkiasĵtin ĵinium apeatniau nuĵ wĵetatrume atumsha.

<sup>42</sup> Atumka Wi tsukamaj ayurtuachmarme. Kitiamaĵsha umartin suruschamarme.

<sup>43</sup> Wait aĵa wekaĵsha ikĵatrachmarme. Pushirun imiampraĵsha entsartin suruschamarme. Jaa tepaĵsha tura sepunam enĵketajsha ĵiraichmarme” tiartatĵajai.

<sup>44</sup> Tutai niisha turuĵtiartatui “ĵUrutia, Uuntá, tsukamakmesha, kitiamakmesha, wait ajakniĵsha, pushiram imiampramsha, ĵaakmesha, tura sepunam wait aĵa pujamnisha iisha winitir yaĵnĵhamajĵ?” turuĵtiartatui.’

<sup>45</sup> ‘Wi Uunt Akupin asan tiartatĵajai “Nekasan tajarĵme, Ashĵ Wĵi shuar, pĵeĵchachisha waitnentrachmarum nuĵ Winiasha turaĵachuĵitrume” tiartatĵajai.

<sup>46</sup> Nu shuarka tute waiĵatsniunam weartatui. Tura Yus achikma ainia nusha tute iwĵaaku Yusĵajĵai pujuĵtinnium weartatui” tĵmiayi Jesus.

## 26

*Jesus achiktin chichaman jurusarmiania nu  
(Márkus 14.1-2; Rúkas 22.1-2; Juan 11.45-53)*

<sup>1</sup> Jesus ashí nuna tinia umik ni unuiniamurj̄n tiarmiayi

<sup>2</sup> “Atumsha nékarme, Paskua jisat jeatin jimiarchik tsawant ajasai. Nūj̄ Wi Aents Ajasu asamtai krúsnum máawarti tusar surutkartatui” tímiayi.

<sup>3</sup> Nuyá Israer-patri uuntrīsha Israer-shuara jintinniur̄isha Israer-shuara úuntrīsha Kaipiasa jēen áarin iruntrarmiayi. Kaipiassha Israer-patri uuntrīyayi.

<sup>4</sup> Nūj̄ anan̄katin chichamjaī Jesus achikiar maatai tusar chichaman jurusarmiayi.

<sup>5</sup> Tura tiarmiayi “Jístatin túrachminiaiti aents téetet ajarain̄ tusar.”

*Nuwá Jesusan kun̄kuinian ukatramiania nu  
(Márkus 14.3-9; Juan 12.1-8)*

<sup>6</sup> Jesus Petania péprunam pujus tunamaru Semun̄ka jēen pujumiayi.

<sup>7</sup> Nūj̄ pujaj̄ nuwá ti kuit jeá kun̄kuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kun̄kuinian ukatramiai.

<sup>8</sup> Túramtai ni unuiniamurj̄ nuna ísar kajerkar tiarmiayi “¿Urukamtai au kun̄kuin imiá kuítniasha áantrasha wasurea?”

<sup>9</sup> Antsu ti kuitj̄ai suruk shuar kuíttrincha ainia nuna yáit̄skesha” tiarmiayi.

<sup>10</sup> Jesus tuinian anturak tiarmiayi “¿Urukamtai jū nuwá yajauch enentáimtarum? Túrutana jū ti péñkeran túrayi.

<sup>11</sup> Kuíttrincha tuke atumj̄aj̄ pujushtatuak. Antsu Wikia atumj̄aj̄ tuke pujushtatjai.

<sup>12</sup> Jū nuwá kun̄kuinj̄aj̄ ukatruraj̄ jūka, Wi iwiarnastin asamtai áitkiarayi.

<sup>13</sup> Nekasan tájarme, ashí nun̄kanam uwemprat̄in chicham etsernakui tuke jū nuwá pachinias etsernaktatui. Túramtai ni túramurj̄ kajinmankishtatui” tímiayi.

*Jútas Jesusan surukmiania nu  
(Márkus 14.10-11; Rúkas 22.3-6)*

<sup>14</sup> Nuyá Jesus tuse (12) unuiniamunmayá chikichik ni naarj̄ Jútas Iskariúti Jesusan suruktaj tusa Israer-patri uuntrīin wémiayi.

<sup>15</sup> Tura jeari tímiayi “Jesusan achikia amakuí ¿urutmá akirkaintrum?” Takui trainta (30) kuítian akikiarmiayi.

<sup>16</sup> Nu akikiam Jútas itiurak Jesusan súsaraintiaj tu enentáimias wekaimiai.

*Kristu jakamu enentaimtustin námper  
(Márkus 14.12-25; Rúkas 22.7-23; Juan 13.21-30; 1 Kurintiunam 11.23-26)*

<sup>17</sup> Wakapruachu tantan yurumáinia nú námper yama nan̄kamkui Jesusa unuiniamurj̄ tariar aniasarmiayi “¿Tūj̄ paskua námper iwiaarakrin yurumáttam?” tiarmiayi.

<sup>18</sup> Tuíniakui Jesus tímiayi “Péprunam wetarum. Nūj̄ chikichík shuara jēen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurj̄aj̄ ame jēem̄iin yurumátjai” tawai” titiarum” tímiayi.

<sup>19</sup> Tutai ni unuiniamurj̄ wear Jesus timia nuna umikiar paskua nampertin yurumátniun iwiararmiayi.

<sup>20</sup> Tura kashi ajasáꞑ Jesus ni tuse (12) unuiniamurijꞑꞑꞑ misanam yurumuk pujumiayi.

<sup>21</sup> Nuj yurumáiniaꞑ Jesus tiarmiayi “Nekasan tájarme, átum pujarmena juyá chikichik Winia surutkattawai.”

<sup>22</sup> Nuna takui ti kúntuts enentáimprar mai aní awajiarmiayi “Uuntá, ¿wiáshitiaꞑ?”

<sup>23</sup> Mai tu awajenam Jesus tiarmiayi “Wi nú piniꞑnumaꞑ jimiartukan yuajna ju Winia surutkattawai.

<sup>24</sup> Wi Aents Ajasu asan Yus Chicham tana nujꞑ métek túrunattajai. Túrusha shuar Winia surutkattana nuka ti asutniátin asa akiinmainchu ajakuiti” tímiayi.

<sup>25</sup> Nuyá Jútas suruktaj tana nu Nin tímiayi “Uuntá nuikia ¿wiáshitiaꞑ?”

Takui Jesus tímiayi “Ee, nekas ámetme.”

<sup>26</sup> Tura yurumuk pujuiniaꞑ Jesus yurumkan achik Yúsan yumiꞑsamiayi. Tura puur ni unuiniamurꞑꞑ suiniak tímiayi “Ju yuatarum. Juꞑa winia ayashruiti.”

<sup>27</sup> Nuyá piniꝼkian achik Yúsan yumiꝼsamiayi. Tura suiniak tiarmiayi “Jusha ashí umartarum.

<sup>28</sup> Juꝼa winia numparuiti. Tura winia numpar puármatai, yamaram chicham nekas uminkiattawai tawai. Tura puármatai untsurꝼ shuara tu-naarꝼn tsanꝼkurattawai.

<sup>29</sup> Tura ataksha átum Yus akupea nuꝼ jeatsrumniꝼn ju uwa yumirꝼn umarchattajai. Tura tsawant jeamꝼtai atumꝼꝼai Yus akupeana nuꝼ yamarman umartatꝼjai” tímiayi Jesus.

*Pítiur natsantratniua nuna Jesus ujakmiayi*

*(Márkus 14.26-31; Rúkas 22.31-34; Juan 13.36-38)*

<sup>30</sup> Yús-kantan kantamáwar umikiar Uriwiu náinnium wearmiayi.

<sup>31</sup> Nuj Jesus tímiayi “Ju kashi átum Winia ashí natsantrurtatrome. Kame Yus-Papiniꝼm áarmaiti “Murikiu wáinnium mantuattajai túram murik pisarar-tatui.” Tu áarmaiti.

<sup>32</sup> Tura nantakin Kariréa nunꝼkanam Wi émkattajai átum wéatsrumin.”

<sup>33</sup> Takui Pítiur tímiayi “Chíkich natsantramainakuisha wikia túrashtatjai.”

<sup>34</sup> Tutai Jesus tímiayi “Nekasan tájame, ju kashi atash shiniatsꝼꝼin menaintiꝼ natsantrurtatme.”

<sup>35</sup> Pítiur tímiayi “Maa, Ámijꝼꝼai métek mántuiniakuisha penꝼkesha natsantrash-tatjame.” Ashí ni unuiniamurꝼꝼ núnisaꝼn tiarmiayi.

*Jesus Jitsemani ajanam Yúsan áujsamiania nu*

*(Márkus 14.32-42; Rúkas 22.39-46)*

<sup>36</sup> Nuyá Jesus ni unuiniamurijꝼꝼai Jitsemani náartin ajanam jeá tímiayi “Juꝼi pujusrum náarsatarum. Aranta aꝼ wena Yúsan áujsatꝼjai.”

<sup>37</sup> Tinia Pítruncha tura mai Sepetéu uchirꝼ jukí wémiayi. Nuꝼsha ti kúntuts enentáimiuk wake mesekmiayi.

<sup>38</sup> Nuyá Jesus tímiayi “Ti kúntuts jakamnia enentáimjai. Atumsha juꝼi pujus-rum Wijꝼꝼai métek iwíáa pujutarum.”

<sup>39</sup> Tinia Jesus arantach ne nuꝼ tikishmar tsuntsuma Yúsan áujeak tímiayi “Winia Aparú, Wi túrunatniua nu nusháa iwiamniaitkiuꝼnꝼka ju wáitsatniua nu tsanꝼkatrukaip. Tura Wi wakeraj núniska áchatu antsu Ame wakeram núnis atí” áujuk tímiayi.

40 Nuyá ni menaintiu unuiniamurj̄ pujuiniamunam waketki kanúu pujuinian jeariar Pítrun tímiayi “Átumka chikichik úraksha Wijjaj̄ iwiáa pujutin ¿tujinkiamek?

41 Iwiáa pujusrum Yus áuj̄satarum. Tunáa nupettamkairap. Enentáimin ti wakeriniaitrume túrasha ayáshim pimpiruiti.”

42 Tinia ataksha we Yúsán áujeak tímiayi “Winia Aparú, Wi imiá nekasan wáitsatniuitkiuin̄kia nūj̄kia Ame wakeramna nu ati.” Tu áuj̄samiayi.

43 Nuyá ataksha taa ni menaintiu unuiniamurj̄ tarimiayi. Tura karj̄ ti nupeteam ataksha kanúu pujuarmiayi.

44 Túmainiakui nin ikiukin ataksha áuj̄mia núnisan̄ Yúsán áuj̄sataj tusa waketkimiayi.

45 Áuj̄as umik ni unuiniamurj̄ pujamunman̄ wémiayi. Tura tiarmiayi “Antsu yamaikia kanarum ayampratarum. Ura jeayi. Wi Aents Ajasu ain̄, tunaarintin shuarnum surunkat̄in jeayi.

46 Wari nantaktiarum. Wéartai. Súrutna nu winiawai” tímiayi.

### *Jesusan achikiarmiania nu*

*(Márkus 14.43-50; Rúkas 22.47-53; Juan̄ 18.2-11)*

47 Jesus tu chichaj̄ Jútas támiayi. Nusha ni unuiniamurj̄yayi. Nuj̄aj̄isha untsurj̄ shuar puniaj̄aj̄isha tura numij̄ij̄aj̄isha winiarmiayi. Nu shuaran Israer-patri uuntrīsha Israer-shuara úuntrīsha akupka ármiai.

48 Jútas, Jesusan sura, tuke Jesusaj̄ jeatsuk nu shuaran tiarmiayi “Wi miniakkan mukunattaj̄na núiti. Nu achiktarum.”

49 Nu asamtai Jesusan tarj̄ “Winiajai Uuntá” tinia mukunamiayi.

50 Takui Jesus tímiayi “Amikrú, ¿warí winitiam?” Nuyá achikiar Jesusan júkiarmiayi.

51 Nūj̄ chikichik Jesusa tsaníakmarj̄ ni puniar̄in ukuiniak shuara kuish̄in tsupirkamiayi. Nu shuarsha Israer-patri uuntrī takarniurj̄yayi.

52 Túramtai Jesus tímiayi “Puniarum en̄keata. Ashí puniaj̄aj̄ máanainia nusha puniaj̄aj̄ mantamnashatuak.

53 Wi wakeraknaka winia Aparun timiá untsurj̄ suntar̄in seakui páchitsuk akupturkainti. ¿Nu nékatsmek?

54 Tura nuna túramtaīnkia Yus-Chichamnum tana nu uminkiachainti” tímiayi.

55 Nuna tinia Jesus nu shuaran tiarmiayi “Átum kasá achiktaj̄ tawa nútiksarum puniaj̄aj̄isha numij̄ij̄aj̄isha tarutniurme. Kame ashí tsawantaj̄ Yusa J̄een atumj̄aj̄ pujusan Yus-Chichaman etsermiajai. Nūj̄isha achirkachmarme.

56 Antsu yamaikia yaunchu Yúsán etserin áararmia nu umínkiat̄i tusarum jútikrarme.” Tu tímiayi Jesus.

Nuyá ni unuiniamurj̄ Jesusan Níniak ikiuiniak pisararmiayi.

### *Israer-patri uuntrīin Jesusan júkiarmiania nu*

*(Márkus 14.63-65; Rúkas 22.54-55, 63-71; Juan̄ 18.12-14, 19-24)*

57 Shuar Jesusan achikiarmia nusha Kaipiasaj̄ júkiarmiayi. Nusha Israer-patri uuntrīyayi. Nūj̄sha Israer-shuara jintinniur̄isha Israer-shuara uuntrī armia nusha irunar matsarmiami.

58 Tura Pítiur árantak Jesusan nemarkin uuntrī j̄een aari jeamiayi. Tura suntarj̄aj̄ tsan̄in̄ pujusmiayi Jesusan itiurkart̄in tusa.

59 Tura Israer-patri úuntrijsa Israer-shuara úuntrijsa tura ashí naamka uunt armia nusha Jesusan wait-chichamjají súmamtikiatai tusar áujmatiarmiayi.

60 Untsurí shuar ántar tsanumpruiniakuisha máatin chichaman nekaracharmiayi. Nuyá jimiará shuar tsanumpruiniak

61 tiarmiayi “Ju áishman chichaak “Yusa Uunt Jeen yumpuwaran ataksha menaintiú tsawantin jeamminiaitjai,” tu chichamai” tiarmiayi.

62 Nuyá Israer-patri uuntri wajaki Jesusan tímiayi “¿Áimtsumek. Tura-mainia nusha anturmammek?”

63 Túrasha Jesus tuke áimchamiayi. Túmakui Israer-patri uuntri chicharuk “Nekas iwiaaku Yusa náaríjn tájame nekasa nu táchakminkia Yus írmastatui. ¿Ame Krístukaitiam. Yusa Uchirínkaitiam? Paant etsérkatá” tímiayi.

64 Tutai Jesus tímiayi “Ee, ame támena núitjai. Tura ataksha atumin tájarme, wi Aents Ajasu asan ti kakaram Yusa untsuuriní pujají wáitkiáttarme. Tura yuranminiam winiajsa wáitkiáttarme” tímiayi.

65 Nuyá Patri uuntri nuna antuk ti kajek ni pushirí jaak tímiayi “Ju áishman ni chichamejají Yúsan nekasa yajauch chicharniuiti. Nuyásha ¿warí atsumaj? Atumsha Yúsan yajauch chicharu antukcharumek.

66 ¿Waritia enentáimprum?”

Tutai “Sumamayi. Mantamnati” tiarmiayi.

67 Tiar usukiawarmiayi yapiniam. Tura awattiararmiayi.

Chikichcha yapiniam awatí wishikiainiak tiarmiayi

68 “Ame Krístuchukaitiam. ¿Ya awattama? Ítsuk nekaata.” Tu chichariarmiayi.

### *Pítur Jesusan natsantramiania nu*

*(Márkus 14.66-72; Rúkas 22.56-62; Juan 18.15-18, 25-27)*

69 Nu túmain Pítur aa pujají nuwá chikichik jeari tímiayi “Amesha ju Kariréanmayá Jesus tutaíjjají wekaichamkam.”

70 Tutai Pítur ashí ántuiniamunam tímiayi “Nékatsjai. ¿Warittsuk chichaam?”

71 Nuna tinia jíinkitaj tusa wéají chíkich shuar wáiniak nuí pujuinian tiarmiayi “Au áishmansha Nasarétnumiá Jesusjají wekainiuiti.”

72 Tutai Pítur ataksha tímiayi “Nekasan tájarme, ju áishmankan penké nékatsjai.”

73 Árusan nuí pujuarmia nu Pítrun tariar tiarmiayi “Nekas amesha aujají wekaimiane. Warí, chichammijají páantaiti.”

74 Tutai Pítur “nekas Yus íruí” taku tímiayi “Nu áishmankan penké nékatsjai.” Nuna taj atash shiniukmiayi.

75 Túramtai Pítur Jesus nuik tímia nuna enentáimpramiayi. “Atash shiniatsajín menaintiú natsantrurtatme” tímiayi Jesus. Pítur nuna enentáimiar jíinki we ti úutmiayi.

## 27

### *Piratují Jesusan júkiarmiania nu*

*(Márkus 15.1; Rúkas 23.1-2; Juan 18.28-32)*

1 Kashin tsawarmatai Israer-patri uuntrijsa Israer-shuara úuntrijsa Jesus maatai tiarmiayi.

2 Tiar Jesusan jíinkiarwar apachi uuntrin Punsiu Piratují júkiarmiayi.

*Jútas máamamiania nu*



3 Jútas Jesusan suruk tura máatai tuínian antuk enentáimiar trainta kuítian Israer-patri uuntriŋcha Israer-shuara úuntriŋcha awantukiarmiayi.

4 Tura tímiayi “Nu áishman tunaarinchān máatarum tusan surukan wi sumamajai.”

Takui tiarmiayi “Nusha íjijaisha warí urukatiŋ. Nuka amek íschatniukaitiam.”

5 Tinia Jútas nuí Yusa Uunt Jee kuítian utsaŋ ikiuak nuyá we kajempramiayi.

6 Nuyá Israer-patri uuntri nu kuítian júkar tiarmiayi “Ju kuit shuar sumakma asamtai Yusa kuítrijjai irurchamniaiti.”

7 Tura nuamtak áujmatsar “nunka sumaktai” tiar Nuwe Najantai nunkan sumakarmiayi yajaya shuar nuí iwarsatniun.

8 Shuar sumakma kuitjai sumakma asamtai yamaisha Numpá Nunka tuke tuíniawai.

9-10 Nujai yaunchu Yúsnan etserin Jeremías timia nu uminkiamiayi: “Uunt Yus turutnia núnisaŋ túrawarmiayi. Israer-shuar trainta kuítian seawarmatai nuna akantrar nujai Nuwe Najantai nunkan sumakarmiayi.” Tu áarmiayi.

*Piratu Jesusan aniasmiania nu*  
(Márkus 15.2-5; Rúkas 23.3-5; Juan 18.33-38)

11 Jesusan apachi úuntriŋ eneniarmatai nii aniasmiayi “¿Nekasmek Israer-shuara uunt akupniuríntiam?”

Tutai Jesus “Ame támena núitjai” tímiayi.

12 Nuyá Israer-patri úuntriŋcha Israer-shuara úuntriŋcha súmantikia Jesus pachischamiayi.

13 Nuyá Piratu tímiayi “Ashí yajauch chichartamainia nu ¿anturmamek?”

14 Tútaisha Jesus penké áimkiachmiayi. Túmakui akupin ti enentáimiar títinian nekaachmiayi.

*Piratu Jesusan “mantamnati” tímiania nu*  
(Márkus 15.6-20; Rúkas 23.13-25; Juan 18.39-19.16)

15 Jísat tsawantin apachi uuntri Israer-shuar shiir enentáimprarat tusa sepunam enketun shuar wakeramun jiiiki ankant akupniuyayi.

16 Nuí sepunam tunáa shuar Parapás náartin pujumiayi. Ashí shuar nékarmiayi.

17 Tuma asamtai Piratu Israer-shuar iruntrarun aniasmiayi “¿Yana ankant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi.

18 Kame Israer-shuar ántar kajerainiak ni itarmian nekaamiayi.

19 Tura Piratu nuna inintrak pujai ni nuarí chichaman akuptukmiayi. “Ju péŋker áishman súmantikiatniujai pachiiinkiaip. Mesekranam nii áitkiatniun nekaan wáitsan tsawarjai” tímiayi.

20 Túraŋcha Israer-patri úuntriŋcha Israer-shuara úuntriŋcha “Parapás ankant wetí, tura Jesus mantamnati” titiarum tusar shuáran akatrarmiayi.

21 Apachi akupniuri ataksha aniasarmiayi “Ju jimiará áentsun ¿yana ankant akupkat tusarum wakerarum?”

Tutai “Parapás” tiarmiayi.

22 Tutai aniasarmiayi “Jesusnasha. Yusa Anaikiamuri Kristu tuinia nunasha, ¿itiúrkáttaja?”

Tutai ashí “Krúsnum máatá” tiarmiayi.

<sup>23</sup> Tuñiakui Piratu tiarmiayi “¿Warí yajauchinia túrait?”

Tutai kakantar untsümük “Krúsnum máatá” tiarmiayi.

<sup>24</sup> Tura Piratu Jesus uwemtikrachminiaitkiui antsu ashí shuar charaatum ajainiakui entsa uturtitiarum tusa seamiayi. Tura ashí íimiainiain̄ ikijmiak tímiayi “Ju péñker áishman̄ máatniunam wikia pachiintsujai. Antsu atumek ístarum.”

<sup>25</sup> Tutai ashí shuar tiarmiayi “Iik ii shuarijijai ju áishman̄ máatin íistaji.”

<sup>26</sup> Nuyá Piratu Parapásan an̄kant akupkamiayi. Tura Jesus asutiárum krúsnum máatárum tusa akupkamiayi.

<sup>27</sup> Nuyá akupin pujutai jeñam akupniu suntari Jesusan júkiar ashí sun-taraim irunturarmiayi.

<sup>28</sup> Tura pushir̄í áitkiar akupin entsatain kapaaku pushin áentsrarmiayi.

<sup>29</sup> Múuknúmsha tawaspan jan̄ki najanamun etsemtekiarmiayi. Tura karisun akupniu numir̄ia áaniun untsuur̄in̄i ataksarmiayi. Túrawar wishiki-ainiak tikishmatrar tiarmiayi “Israer-shuara uunt akupniur̄inme.”

<sup>30</sup> Tiar usukiarmiayi. Tura karisun jurukiar múuknum awatiarmiayi.

<sup>31</sup> Tura núkap wishikrar kapaaku pushin áitkiar ni pushir̄in̄ áentsrarmiayi. Nuyá krúsnum maatai tusar júkiarmiayi.

*Jesusan krúsnum máawarmiania nu*

*(Márkus 15.21-32; Rúkas 23.26-43; Juan̄ 19.17-27)*

<sup>32</sup> Jesusan júki wésar Serini nun̄kanmayá shuaran, ni naari Semun̄, Jesusa krúsriñ jurukit tusar achikiarmiayi.

<sup>33</sup> Nuyá Kúrkutanam ejeniarmiayi. Kúrkutaka, shuar chichamjain̄kia, muuka ukunch tútainti.

<sup>34</sup> Nuñ Jesusan umutai yapájai pachimpra najanamun áartaj tusar súsararmiayi. Tura Jesus apas iis umarchamiayi.

<sup>35</sup> Krúsnum ajinrurar suntar yáki Jesusa pushir̄in̄ jukit tusar nakurusar awakmakua nuna súsararmiayi. Nújain̄kia yaunchu Yúsnan etserin áarmia nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsararmiayi.” Tu áarmiayi.

<sup>36</sup> Nuyá wáinkiatái tusar pujursarmiayi.

<sup>37</sup> Tura urukantai máamuit ashí aents nekaawarti tusa áarman muuknu-maani anujtukarmiayi. *JUITI JESUS, ISRAERA UUNT AKUPNIURI*  
Tu áarmauyayi.

<sup>38</sup> Núnisan̄ Niijjai métek jimiará kasa chikichkin untsurnuman̄i tura chikichnasha menaanman̄i krúsnum máawarmiai.

<sup>39</sup> Shuar nuñ nan̄kaamainiak muuke peñar wishikiainiak

<sup>40</sup> tiarmiayi “Ame Yusa Uunt Jee sáakim menaintiú tsawantin jeamtatjai tíchakaitiam. Nekas Yusa Uchir̄inkiumka krúsnumiá akaikim uwemprata” tiarmiayi.

<sup>41</sup> Núnisan̄ Israer-patri úntr̄isha, Israer-shuara jintinniur̄isha, Pariséusha, Israer-shuara úntr̄isha, Jesusan wishikiainiak nuamtak tiarmiayi

<sup>42</sup> “Chikichnaka uwemtikraiti tura Nín̄kikia uwemtsui. Israera Uunt Akup-niur̄intkiunka krúsnumiá akaikimtai nekas enentáimtustatjai.

<sup>43</sup> “Yúsna nekas enentáimtiniaitjai” tawai. Wátsek, Yus nekas Nin aneakka uwemtikrati. “Wi Yusa Uchir̄intjai” turamchamkaj” tiarmiayi.

<sup>44</sup> Kasá shuarsha Niijjai ajintruamu armia nusha Nin wishikrarmiayi.

*Jesusa jakamuri**(Márkus 15.33-41; Rúkas 23.44-49; Juan 19.28-30)*

<sup>45</sup> Nuyá tutupin ai tee ajasmiaiyi. Túrunayat ataksha añku tsáapin ajasmiaiyi.

<sup>46</sup> Nuni ai Jesus kakantar untsumkamaiyi. “Eri, Eri, rama sapaktani’ timiaiyi. Nusha shuar chichamjainkia “Yusrú, Yusrú, ¿urukamta ajapa iki-urkiniam?” tawai.

<sup>47</sup> Shuar nui wajarmia nusha nuna enentáimtsuk antukar tiarmiaiyi “Yaunchu Yúsnan etserniun Eríasan untsuawai.”

<sup>48</sup> Tura chikichik tsékenki we uruchin itiamiaiyi. Tura churuinian ajamper sapapjai ijiú mukunati tusa susamiaiyi.

<sup>49</sup> Tura chikichcha wíshikeak tiarmiaiyi “Iniáisatá, Erías tarí uwemtikratpi-ash.”

<sup>50</sup> Jesus ataksha kakantar untsamak nuyá jakamaiyi.

<sup>51</sup> Nu chichamaik Yusa Uunt Jee tarach ajamu yakiiniya achik nunkaani tseu jaanakmiaiyi. Nunkasha úrkamaiyi. Kayasha jakukarmiaiyi.

<sup>52</sup> Núnisan iwíarsamusha uraniarmatai untsurí Yus-shuar jákarusha nantakiarmiaiyi.

<sup>53</sup> Nusha emka Jesus nantakmiatai niisha nantakiar iwíarsamun ikiukiar Yusa péprurin Jerusarénum wayawarmatai untsurí shuar wáinkiaromiaiyi.

<sup>54</sup> Nuyá suntar Jesusan wáinkiaromia nusha tura ni kapitántrisha nunka úrkamta nuyá chikichcha ashammai ajasmatai ti sapijmiakarmiaiyi. Tura tiarmiaiyi “Ju áishman nekas Yusa Uchirinti.”

<sup>55</sup> Nuísha nuwá Jesusan nemariarmia nu, arant wajasar, ii wajaarmiaiyi. Nusha Kariréanmaya pataatukiar Jesusan yainki ejeniarmiaiyi.

<sup>56</sup> Nujai Máktaranmaya Marisha, Sepetéu nuwésha, tura chikich Marisha ármiaiyi. Chikich Marikia Jakupuncha tura Jusenchá nukuriyayi.

*Jesus iwíarsamu**(Márkus 15.42-47; Rúkas 23.50-56; Juan 19.38-42)*

<sup>57</sup> Kiarai shuar ti kuítrintin Arimatéu péprunmaya ni naarí Jusé támiaiyi. Nusha Jesusan enentáimtinuiyayi.

<sup>58</sup> Nii Piratui we Jesusa ayáshin seamiaiyi. Nin súsarat tusa Piratu akupkamaiyi.

<sup>59</sup> Túram Jusé Jesusa ayáshin krusnumia jusa ti péñker tarachjai penuarmi-ayiyi.

<sup>60</sup> Tura kaya waa táurmanum yamaram amia nui iwíarsamiaiyi. Ni iwíarsatin táumtikramunam Jusé iwíarsamiaiyi. Iwíaras kaya uuntjai etektuk ikiuak wémiayiyi.

<sup>61</sup> Nuísha Máktaranmaya Marísha tura chikich Marísha iwíarsamunam naka ii pujuarmiayiyi.

*Jesus iwíarsamun suntar wáinkiaromia nu*

<sup>62</sup> Nú kiarain ayampratin tsawantna mash iwíarnakui Israer-patri úuntrisha Paríséusha Piratui wearomiaiyi.

<sup>63</sup> Tura tiarmiaiyi “Uuntá, nu wáitrin áishman iwíaaaku pujus “Menaintiú tsawant jakan nantaktiatjai” tniuyi.

<sup>64</sup> Nu asamta iwíarsamunam menaintiú tsawant suntar wáinkiarat tusa akuptukta. Ni unuiniamurj kashi tariar tura ni ayáshin kasamkar “Pai, nantakni” shuáran tiarain. Jujainkia nuna nankaamas shuáran anankawarainti” tiarmiaiyi.

65 Tutai Piratu tiarmiayi “Nuj suntar takakrume. Werum iwiarsamu urakchamnia péñker wáinkiatárum.”

66 Tutai wear iwiarsamun urankashti tusar etektukma inkiñmanum serajaj yakarar ni áarmarín anujtukarmiayi. Tura suntarnasha awajtukiarmiayi.

## 28

### *Jesusa nantakmiari*

(*Márkus 16.1-8; Rúkas 24.1-12; Juan 20.1-10*)

1 Ayampratin tsawant nankaasmatai tumiñtin yama tsawaana ai Máktaranmaya Marisha chíkich Marijjaj iwiarsamu iyutai tusar wearmiayi.

2 Tumaj Yusa suntari nayaimpinmaya iwiarsamun tari kaya atutkamun urak nuj pujusmiayi. Túmakui nunka ti úurkamiayi.

3 Yusa suntarisha peemia tímiatrus wínchayuyai. Pushirisha ti puju áuyayi.

4 Tura iwiarsamun wáiniarmia nú suntarsha nuna wáinkiar ashamainiak ti kurañkarmiayi. Jaká áinis ajasarmiayi.

5 Nuyá nayaimpinmaya suntar nuwan tímiayi “Ashamkairap. Jesus krúsnum máawarmia nu eatsrumek.

6 Juñkia pujatsui. Nii timia núnisañ nantakniuiti. Pai, áepsarma nu ítiarum.

7 Wárik wérum ni unuiniamurj “Jesus jakamunmaya nantakni tura wari Kariréanam wétatui. Nuj werirum wáinkiáttarme” titiarum. Wats, nunak tájai” tímiayi.

8 Tutai nu nuwá iwiarsamunmaya wárik jíinkiar ashamainiyat ti warasar tseke waketkiarmiayi ni unuiniamurjñ ujaktai tusar.

9 Tumaj Jesus wantintiuarmiayi. Tura “pujarmek” takui Jesusan tariar tikishmatrar nawencha miniakrusar shiir awajsarmiayi.

10 Túram Jesus tiarmiayi “Ashamprukairap. Werum winia yatsur ujatrukatarum. Kariréanam weartí. Nuj wear wáitkiartatui. Tu ujaktarum” tímiayi.

### *Suntar etserkarmiania nu*

11 Nuwá wéarmatai iwiarsamu wáinin suntarsha péprunam wéar Israer-patri úuntrjñ ashí túrunamun ujakarmiayi.

12 Niisha nuna antukar Israer-shuara úuntrijjaj áujmatsatai tusar wearmiayi. Áujmatsar suntaran ti kuít akikiar

13 tiarmiayi “Atumsha etserkuram “Kashi kanararin ni unuiniamurj taar Jesusa ayashin kasamkarmai” titiarum.

14 Tura akupin átum kanarman nekamtaisha niijjaj ii iwiarattaji atumin yajauch awajtamsajñ tusar” tiarmiayi.

15 Nuyá suntarsha kuítian achikiar tiarmia nuna tímiatrusañ titiái tusar wéarmiayi. Tura tuke yamaisha Israer-shuar tu túrunaiti tuñiawai.

### *Jesus ni unuiniamurjñ akatar akupkarmiania nu*

(*Márkus 16.14-18; Rúkas 24.36-49; Juan 20.19-23*)

16 Nuyá ni auntse (11) unuiniamurjñ Kariréanam wéarmiayi. Tura Jesus timia nú nainnium jewar

17 nuj Jesusan wáinkiar tikishmatrarmiayi. Kame chíkichka Jesusashit tuñniyat Nin wáinkiar tikishmatrarmiayi.

18 Nuyá Jesus tíjiuch tantá tímiayi “Ashí nayaimpinmasha nunka akupkatniun kakarman surusuiti.

<sup>19</sup> Tuma asamtai ashí nunkanam werum ashí shuar jintintiarum Wíi shuar awajsatarum. Túrarum Yus Apa náarijiai, Yus Uchi náarijiai, tura Yus Wakani náarijiai imiaitarum.

<sup>20</sup> Ashí atumin Wi akatramajrum nu nútiksarmek umiktin unuiniartarum. Tura ju nekaatarum: Tuke tsawantai ikiutsuk atumjai pujuttajai” tímiayi Jesus.

## Yúsan Shiir Chichamen

### MÁRKUS

### aarmia nu

#### *Imiakratin Juanka etserkamuri*

*(Mateu 3.1-12; Rúkas 3.1-9, 15-17; Juan 1.19-28)*

1 Jui Jesukristunu shiir chicham nan̄kameawai. Jesukristu Yusa Uchirinti.  
 2 Yuska imiakratin Juan̄kan pachis ni etserniur̄in Isayasan ti yaunchu ni Papir̄īn̄ juna áamtikramiayi:  
 “Iisiana, ame wéamur̄in̄ em̄ka wetí tusan winia akatramurun akupeajai.  
 Niisha ame jintimin̄ iwiarattawai.

3 Niisha aents atsamunam untsukum̄ juna títiatui: “Uunta jintī iwiartur-  
 tarum; naka awajsatarum.”  
 Nuke áarmaiti.

4 Wats, aents atsamunam imiakratin Juan̄ imiaittsa pujus étseruk, ““tu-  
 naarun Yus asakaturat” tusarum, enentáim yapajjár̄um imiantiarum”  
 tímiayi.

5 Anturkatai tusar ashí Jutía nun̄kanmaya shuar tura Jerusarén peprun-  
 maya shuarsha N̄īn̄ tariarmiayi. Taar, ni tunaar̄in̄ ujakarmatai, Juan̄ Jurtan̄  
 entsanam imiainiarmiayi.

6 Juansha kamiri u r̄e najantramun entsauyayi. Emenmamkesha nu-  
 apeyayi. Tura chinij̄aī yutai-títikriatsnasha yuuyayi.

7 Niisha áentsun ujaak tímiayi “W̄ij̄īankia nan̄kaamas ana nu winia ukuruj̄  
 winittiwai. Niisha nekas ii Uun̄tr̄ī asamtai, wikia tsunsumpruan ni sapatrī  
 jin̄kiamur̄inkisha atitrachminiaitjai.

8 Wikia entsaj̄in̄ aya ayashmin̄ imiaajrume, antsu N̄in̄kia imiantinia áanis  
 Yusa Wakan̄ī atum̄ī enentáin̄ enketramprattarme” tímiayi.

#### *Juan̄ Jesusan imiaimiania nu*

*(Mateu 3.13-17; Rúkas 3.21-22)*

9 Juan̄ áentsun imiak pujurainiāī, Jesuska Nasarét pepru Kariréa  
 nun̄kanam ana nuyá j̄īn̄ki Juan̄kan tarimiayi. Tura Juan̄ Jurtan̄ entsanam  
 Jesusan imiaimiai.

10 Nuin̄, Jesus entsayā j̄īniuk, nayaimpin uranniun wáinkiamiayi. Tura  
 Yusa Wakan̄in̄ yámpitsa n̄nin̄ najanar N̄īn̄ taarun wáinkiamiayi.

11 Tura nayaimpinmayā chichaamun̄ juna antukmiayi, “Ámeke winia  
 aneamu Uchiruitme. Ámin shiir enentáimtajme.”

#### *Unt iwianch Jesusan anan̄kataj̄ tímiania nu*

*(Mateu 4.1-11; Rúkas 4.1-13)*

12 Nuyá wárik̄ Yusa Wakan̄ī Jesusan atsamunam jukimiayi.

13 Tura nūī, yajasma yujamunam, kuarenta tsawant pujumiayi. Nūī pujaj̄  
 unt iwianch Satanás naartin̄ Jesusan nekapsataj̄ tusa pujurmiayi. Túramtai  
 Jesusan wáinkiat̄aī tusar nayaimpinmayā suntar tariarmiayi.

#### *Kariréa nun̄kanam ni katr̄in̄ Jesus nan̄kammiania nu*

*(Mateu 4.12-17; Rúkas 4.14-15)*

14 Ukunam, Juan̄kan sepunam enkeawarmatai, Jesuska Kariréa  
 nun̄kanam Yusa akupeamur̄in̄ pachis shiir chichaman etserki tímiayi.

15 “Tsawant jeayi. Shuarnum Yusa akupeamurj jeatemai. Tuma asamtai, yaunchu enentáimsamuram yapajjárúm, Uwempratin Chicham umirkatarum” tu etserkamiayi.

*Jesus namakan achinian ni unuiniamurj ajasat tusa kuaru achikmiania nu*

(Mateu 4.18-22; Rúkas 5.1-11)

16 Jesus Kariréa antumianka kánmatkarinj wekas, namakan achinian Semunasha ni yachj Antresnasha nekan ajuntuk pujuinian wáinkiamiayi.

17 Wáiniak “Nemartustarum, tímiayi. Namak achiarmena nútiksanak áentsun-eāu Yusna arti tusan awajsatjarme” tímiayi.

18 Tura nuyanka ni nekarinj ajapa ikiuniak Jesusan nemarsarmiai.

19 Nuyasha Jesus ishichik arantach wesa, Sepetéu uchirín Jakupun ni yachin Juánasha kanunam ni nekarinj apáa pujuinian wáinkiarmai.

20 Wáiniak, nemartusta tusa untukarmiayi. Tutai ni aparíncha, ni aparj takarniuríncha kanunam ikiuniak Jesusan nemarsarmiai.

*Jesus iwianchin áishmannumia jiki akupkamiania nu*

(Rúkas 4.31-37)

21 Nuyá Kapernáum péprunam jeawarmiayi. Nuj Israer-shuara ayampratin tsawantrj jeakui Jesus Israer-shuar iruntainiam wayá Yus-Chichaman unuiniamiayi.

22 Tura ni jintinniurj jintintiarmia nuna iniankas uunt chichamjai Jesus jintiakui ni chichamen anturkar ti enentáimprarmiayi.

23 Nujsha nu iruntainiam áishman iwianchruku ámiayi. Niisha untsukum

24 “¿Warí itiuurtamkattsamea incha taum, Nasarétnumia Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

25 Tutai, Jesus kakantar chicharuk “Takamátsatá. Ni enentáiyá jinkitia, tájame” tímiayi.

26 Tutai iwianch áishman kan ukurak ajakniñkiar untsamak kakaar aa jinkimiayi.

27 Nuna wáinkiar, ashamkar nuámtak aniniaisarmiayi. “¿Ausha warinkit. Yamaram chicham warí chichamait? Ju Jesuska timiá kakaram asa ímia iwianchin akupeatsuk. Iisiana umirainiatsuk” tiarmiayi.

28 Tura ti wárik nu túrunamu ashí Kariréa nunkanam antunkarmiayi.

*Jesus Semunka tsatsarin tsuármiania nu*

(Mateu 8.14-15; Rúkas 4.38-39)

29 Nuyá Israer-shuara iruntai jeeniá jinki Jesuska Jakupujai Juanjaisha we, Semun ni yachj Antresjai pujuarmia nuj jeawarmiayi.

30 Semunka tsatsarij tsuer peaknum jaa tepemiayi. Núnaka wárik Jesusan ujakarmiayi.

31 Nuñkia Jesus werí uwejnium achik iniantkimiayi. Tura nu chichamaik michatramiai. Michatar, péñker ajas, Jesusnasha ni nemarniuríncha ayu-rwarmiai.

*Untsurj jaan Jesus péñker awajsarmiania nu*

(Mateu 8.16-17; Rúkas 4.40-41)

32 Nu tsawantaj kjaraj, ashí jánian, iwianchrukuncha Jesusan itiararmi-ayi.

33 Tura ashí nú péprunmayá shuar taar wáitiniam Jesusan káutkarmiayi.

<sup>34</sup> Untsurí shuáran chíkich sunkuraim jáinian Jesus tsuararmiayi. Tura iwianchruku armia nuna enentáiyān iwianchín jírkiarmiayi. Jesuska iwianch nékamu asa, winia náarun ántar pachisarajīn tusa suritkiarmiayi.

*Kariréa nunkanam Jesus Yus-Chichaman etserkamiania nu*  
(Rúkas 4.42-44)

<sup>35</sup> Nuyá kashin káshik tsawaátsain Jesus nantaki Yúsan áujsataj tusa jiinki atsamunam wémiayi.

<sup>36</sup> Tura Semun ni amikrijjai Jesus wemaanum wéarmiayi.

<sup>37</sup> Nin wáinkiar “Ashi shuar Ámin eátmainiawai” tiarmiayi.

<sup>38</sup> Tutaí Jesus chichaak “Chíkich péprunmasha arantach wetai. Nuj Yusa chichame etserkatai; nuna túrattsan táwitjai” tímiayi.

<sup>39</sup> Nuna tí ashí Kariréa nunkanam Israer-shuar iruntai jeanam etseras wekaimiayi; tura núnisan iwianchniasha jiiki akupkini wekaimiayi.

*Tunamaru shuaran Jesus tsuármiania nu*  
(Mateu 8.1-4; Rúkas 5.12-16)

<sup>40</sup> Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmeka tsuaratin tujintratsme.”

<sup>41</sup> Jesus nin waitnentak uwejejai antiñmiayi. Antiñ “Wakerajme. Péñker ajasta” tímiayi.

<sup>42</sup> Nu chichamaik, Jesus chichakmatai, ni sunkurí menkakamiayi. Tura péñker ajasmiayi.

<sup>43</sup> Túrunamtai Jesus kakantar chicharuk

<sup>44</sup> akupeak “Wáinkiatá, nánkamsam etseraip, tímiayi. Antsu weme, Israer-patirmin iniakmamsata. Túram ashí aents ame péñker ajasmarumin nekaawarat tusam, Muisais aar akupkamiania nu umikiam súsatin ana nu susata” tímiayi.

<sup>45</sup> Tura etserkaip támaitiat, jiinki ni túrunamurīn mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu áá atsamunam pujumiayi. Tura ashí nunkanmaya Jesusan tariarmiayi.

## 2

*Jesus emearun péñker awajsamiania nu*  
(Mateu 9.1-8; Rúkas 5.17-26)

<sup>1</sup> Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi.

<sup>2</sup> Tuma asamtai shuar wárik ti untsurí káutkarmiayi. Ti untsurí asamtai, jea piakmiayi; wáitínmasha ankantchauyayi. Jesuska Yus-Chichaman nu aentsun ujaak pujurmiayi.

<sup>3</sup> Nuñkia ni amikrīn emearun kuaru shuar tampumpuawar júkiar Jesusan itiararmiayi.

<sup>4</sup> Tura jeawar, untsurí shuar írunu ásamtai jeá wayatniun tujinkiarimiayi. Tuma ásar, yakininī wakar jea urakar, áañkawar, tampunam ni amikrīn Jesus pujamunam awaintuawar itiararmiayi.

<sup>5</sup> Tura niisha Jesus nekas tsuártatui tu enentáimmiarīn Jesus nekáa emearun chicharuk, “Uchirú, ame tunaarumka tsañkuramuiti” tímiayi.

<sup>6</sup> Israer-shuara jintinniurīsha nuna antúu pujuarmiayi. Tura ni enentáijjai enentáimsar,



<sup>7</sup> “¿Yúsha urukamtai emearun tu chichara? Yúsan imiá yajauch chicharui. Warí, yaki tunaan asakarminiait; aya Yúsak tunaan asakarchamniakait” tu enentáimsarmiayi.

<sup>8</sup> Jesuska ni enentáimmiarín nekarawar “¿Urukamtia átum tu enentáimprum? tímiayi.

<sup>9</sup> Emearu, tunaarum tsan̄kuramuiti títinjaj, emearu, wajakim tampuram entsakim wekasata títinjaj ¿tuá imiá yúpichuchit?

<sup>10</sup> Wats wi, Aents Ajasu asan Yusa kakarmarjijaj shuara tunaarj tsan̄kuramniaitjiana nuna paant iwiaintiuktajrume” tímiayi. Nuna tinia emearun chicharuk

<sup>11</sup> “Wajaktia, tájame; túram tampuram jukim jéemiin wetá” tímiayi.

<sup>12</sup> Nu chichamaik emearu wajaki, tampurjín jukí, ashí íimiainiajn jínkimiai.

Nuna túrunamtai ashí ashamkarmiayi. Tura “jútikiamu penké wáinchaitji” tiar Yusa náarjín uunt awajsarmiayi.

### *Jesus Riwin untsukmiania nu*

*(Mateu 9.9-13; Rúkas 5.27-32)*

<sup>13</sup> Nuyá ukunam Jesus antumian̄num waketkimiai. Tura ashí shuar káunkarmatai jintintiawarmiayi.

<sup>14</sup> Tura jintintiarwar amuk, akupin akitiai jēanam nan̄kaamak, Arpeu uchirjín Riwin pujan wáinkiamiai. Wáiniak “Nemartusta” tímiayi. Tutai Riwi wajaki Jesusan nemarsamiayi.

<sup>15</sup> Chíkich tsawant, Riwisha Jesusan ni jēen itiaamiayi. Tura untsurj kuítian-juu shuarsha, yajauch shuarsha Jesusjaj ni unuiniamurjijajsha ashí nuim misanam pujuarmiayi.

<sup>16</sup> Tura kuítian-juu shuarsha yajauch shuarsha Jesusjaj irunar yurumáinian wáinkiar, Pariséu jintinniurjsha Israer-shuara jintinniurjsha Jesusa unuiniamurjín aniasarmiayi. “¿Urukamtai ame úntrum Jesus, kuítian-juu shuarjaj tura yajauch shuarjajsha yuruma?” tiarmiayi.

<sup>17</sup> Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

### *Yurumtsuk Yus áujsatniun Jesusan aniasarmiania nu*

*(Mateu 9.14-17; Rúkas 5.33-39)*

<sup>18</sup> Juanka unuiniamurjsha Pariséu unuiniamurjsha yurumtsuk Yúsan áujjarmiayi. Túmakui chíkich shuar Jesusan tariar chicharainiak, “Juanka unuiniamurjsha, Pariséu unuiniamurjsha yurumtsuk Yúsan áujjainiatsuk; ¿ame unuiniamurmeka urukamtai yurumtsuk áujjainiatsu?” tiarmiayi.

<sup>19</sup> Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakuí ni amikrj warainiak ijiarmachartin ainiaawai. Núnisañ winia unuiniamur, Wi pujakuí, warainiak yurumtsuk pujuschartin áiniawai.

<sup>20</sup> Tura tsawant jeattawai, Winia jurukiartin. Nuñkia winia unuiniamur ijiarmawartatui” tímiayi Jesus.

<sup>21</sup> Tura nuyá juna tímiayi ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chinikiá nuna nan̄kaamas jáaktatui.

<sup>22</sup> Nijiamanch yamáí nawar nuap najanamu arutnum yaraachminiaiti. Túramka wakaprua kariák nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiayi.

*Trikiu neren yuawarmiania nu*

*(Mateu 12.1-8; Rúkas 6.1-5)*

<sup>23</sup> Chíkich ayampratin tsawantaj̄ Jesus ajanman̄ ajapén nan̄kaarmiaiyi. Tura ni unuiniamur̄j̄ trikiu neren majukiar wear̄miayi.

<sup>24</sup> Nuna wáinkiar Pariséu Jesusan chichariniak “¿Warí, urukamtai ame unuiniamuram ayampratin tsawant takastin surimkiamu ajsha takainia?” tiarmiayi.

<sup>25</sup> Tutai Jesus tímiayi “Íi uuntrī Tawitia túramur̄j̄ Yús-Papinium áujsachukaitrum. Niisha ni nemarniur̄j̄sha tsukamainiak, ni yurumkari atsakui, túrawarmia nu áujsachukaitrum.

<sup>26</sup> Apiatár Yusnan pujurniu uuntrī pujāj̄ Uunt Tawit Yusa Jeēn waȳamiayi. Tura Tawitkia, patri nan̄kaamas uunt asa, pátrichuitiat, iniaktusma tantan, aya patri yútainiak, yuamiayi; tura ni nemarniur̄j̄ncha ajamsamiayi. Nu áujsachukaitrum, tímiayi.

<sup>27</sup> Ayampratin tsawantaj̄ túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi.

<sup>28</sup> Wisha, Aents Ajasu asan imia ayampratin tsawantan Nerenniur̄j̄ntjai” tímiayi.

### 3

*Uweje jakan Jesus tsuármiania nu*

*(Mateu 12.9-14; Rúkas 6.6-11)*

<sup>1</sup> Ataksha chíkich tsawantaj̄ Israer-shuar iruntainiam Jesus waȳamiayi. Nūj̄ shuar ámiayi, ni uwejē jaka.

<sup>2</sup> Tura tunáan túrayi titiai tusar wakeruiniak “ayampratin tsawantaj̄ tsuártimpiash” tusar, Pariséu shuarsha Jesusan ii pujuriarmiayi.

<sup>3</sup> Nuin̄kia Jesus uwejē jaka shuaran chicharuk “Ajapén wajasta” tímiayi.

<sup>4</sup> Nuin̄kia mamikmaun chicharuk “¿Ayampratin tsawantaj̄ pé̄nker túratin yajauch túratniuj̄aj̄ tuá imiá pé̄nkerait?” tímiayi.

Nuna takui niisha pachischarmiayi.

<sup>5</sup> Tura Jesus kajek nin íiyarmiayi; tura ni enentáin̄ kátsuram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmasmatai ni uwejē jaruku ataksha pé̄nker ajatsamiayi.

<sup>6</sup> Nuyá Pariséu shuar jíinkiar, Jesus maami tusar Erutis shuarj̄aj̄ áujmatsarmiayi.

*Untsur̄j̄ shuar Jesusan káutkarmiania nu*

<sup>7</sup> Nuyá Jesus ni unuiniamur̄j̄j̄j̄ antumian̄num wémiayi. Kariréa nun̄kanmaȳa untsur̄j̄ shuarsha Jesusan nemariarmiayi.

<sup>8</sup> Untsur̄j̄ nun̄kanmaȳasha káunkarmiayi. Jutía nun̄kanmaȳasha, Jerusarén pé̄prunmaȳasha, Itiumiá nun̄kanmaȳasha, Jurtan̄ entsa amainiásha, Tiru tura Setun̄ pepru pujuinia nú nun̄kanmaȳasha, untsur̄j̄ shuar ni túramur̄j̄n nekaawar, Jesusan káutkarmiayi.

<sup>9</sup> Untsurí káunkar chanuntawarajin tusa Jesus ni unuiniamurjin kanuram inianáastarum tusa seamiayi.

<sup>10</sup> Kame untsurí shuaran Jesus nuik tsuaru asamtai, jaa shuar nuí káunkarmiania nu Jesusan antintaj tusar shitianainiakui nuna seamiayi.

<sup>11</sup> Tura iwianchrukusha Jesusan wáinkiar tikishmatrarmiayi. Untsumainiak “Ame nekas Yusa Uchirínme” tiarmiayi.

<sup>12</sup> Tura nuna etserkairap tusa Jesuska kakantramiayi.

### *Jesus tuse shuaran anaikiarmiania nu*

*(Mateu 10.1-4; Rúkas 6.12-16)*

<sup>13</sup> Nuyá Jesus náinnium wakamiayi. Tura anaikiatniun wakerimia nú shuaran untsukmiayi. Tura niisha Jesusan weriarmiayi.

<sup>14</sup> Tura Niijjai wekasar Yus-Chichaman unuiniartinian tuse shuáran anaikiarmiayi.

<sup>15</sup> Tura sunkur tsuártinian, iwianchcha jiki akupkatniun ni kakarmarin súsarmiayi nú shuaran.

<sup>16</sup> Ju shuáran anaikiamu ármiayi: Semun, Jesus chikich naarin Pítiur apuj-tusmiania nu;

<sup>17</sup> Sepetéu uchiri Jakupu, ni patai Juánsha; ipiamtajai métek kakaram ásarmatai nuna mai “Puanérjis” naari susamiayi. Nusha shuar chichamjainkia “ipiamta nuke” tawai.

<sup>18</sup> Nuyá Antressha, Jiripi, Parturumi, Mateu, Tumas, Arpeu uchiri Jakupu, Tateu, ásump Semun,

<sup>19</sup> Jútas Iskariúti. Jesusan ukunam surukmia nú Jútasauyayi. Anaik amuk-matai jeá waketrarmiayi.

### *Yusa Wakanin yajauch chicharna nu*

*(Mateu 12.22-32; Rúkas 11.14-23; 12.10)*

<sup>20</sup> Waketkiarmatai, ti untsurí shuar taarmatai takatri ti akui, yurumátniun jeacharmiayi.

<sup>21</sup> Jesusa shuarisha nuna nekaawar Jesus ti itirchat pujus wáurtsuash tu enentáimsar jukitai tusar nu jeanam jeariarmiayi.

<sup>22</sup> Nuyá Israer-shuara jintinniuri Jerusarénumia táarmiania nu, Jesusan áujmatainiak “Pirsepú enkea asa iwianchrukuiti. Tuma asa uunt iwianchi kakarmarjjai iwianchin jiki akupeawai” tiarmiayi.

<sup>23</sup> Tutai Jesus winitiarum tusa nin untsukmiayi. Tura enentáimtikrataj tusa juna tímiayi: “¿Iwianch Satanáskesha itiu ajapmamatin?”

<sup>24</sup> Chikichik nú nunkanmaya shuar nuámtak kajernaiyakuinkia, nu nunka wari meserchattawak.

<sup>25</sup> Nuámtak shuar ni shuarjjai kajernaiyakuinkia nu shuarsha amun-  
naichartatuak.

<sup>26</sup> Núnisan ¿Satanáskesha ni suntarjjai máaniakka itiu rak tuke pujusarat? Amunaikiartatui.

<sup>27</sup> Nánkamas shuar kakaram shuara jeen wayá, nérenniun jinikiatsuk ni kuítrin kasarkachminiaiiti. Antsu nérenniun jinikiá ni kuítrin kasarkamniaiiti.

<sup>28</sup> Nekas tájarme, shuar tunáa ashí túruiniana nuka tsankuramniaiiti. Wini-  
asha winia Aparnasha yajauch áujmatsha tsankuramniaiiti.

<sup>29</sup> Antsu Yusa Wakanin yajauch áujmatna nuka tsankurachminiaiiti; antsu nu shuar niniki tuke sumamattawai.”

<sup>30</sup> “Jesuska iwianchrukuiti” tuíniakui Jesus nuní tímiayi.

*Jesusa yachi Jesusa nukurí**(Mateu 12.46-50; Rúkas 5.19-21)*

<sup>31</sup> Nuyá ni yachi ni nukuríjiai taar aa wajasar, Jesusan untsukat tusa akupkarmiayi.

<sup>32</sup> Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

<sup>33</sup> Tutai Jesus chichaak “Ya ainia winia nukursha yatsursha” tímiayi.

<sup>34</sup> Nin téntakar pujuarmia nuna iis “Júiti winia nukurka, yatsurka, tímiayi.

<sup>35</sup> Shuar Yusa wakeramurin uminiana nu winia yatsuruiti, winia umaruiti, winia nukuruiti” tímiayi.

**4***Atsaamin atsaampramiania nu**(Mateu 13.1-9; Rúkas 8.4-8)*

<sup>1</sup> Nuyá jiinki antumianka yantamen Jesus ataksha unuiniartinian juarkimiayi. Tura untsurj shuar iruntrarmatai, kanunam enkempramiayi. Shuarsha antumianka káanmatkarin pujuarmiayi.

<sup>2</sup> Jesuska métek-taku chichamjai ti jintintiarmiayi. Jintintiuk juna tímiayi:

<sup>3</sup> “Antuktarum. Atsaamin atsaamprataj tusa jíinkimiai.

<sup>4</sup> Atsaamkui ni arakri jintiá iniararmai. Chínki yakiya káutkar yuawarmai.

<sup>5</sup> Chikichcha kaya írunmanum iniararmai, nunka ishichik ámanum. Tura nunka ishichik asamtai wárik tsapainiarmai.

<sup>6</sup> Tura etsa etsantar sukuám kancape atsa asamtai káararmai.

<sup>7</sup> Chikichcha janjí nupanam iniararmai. Janjisha tsapainiar kanjar ajakrarmai; túram nerekcharmai.

<sup>8</sup> Chikichcha pénger nunkanam iniararmai. Tura tsapainiar nerekarmai, chikich trainta, chikich sesenta, chikich sian nerekarmai.

<sup>9</sup> Kuíshim ákuinkia antuktarum” tímiayi.

*(Mateu 13.10-17; Rúkas 8.9-10)*

<sup>10</sup> Untsurj wearmatai, ishichik Nijjai juakarmiania nu, ni tuse unuinia-murijjai aniasarmiayi “¿Ame jintintiamna nusha warimpiait?” tiarmiayi.

<sup>11</sup> Tutai Jesus chichaak “Yuska ni akupeamurin atumin paant nekamtikramattsá wakerutmarme. Antsu chikich shuarka aya métek-taku chichamjai jintintiáwartatui.

<sup>12</sup> Íniayatan wáinkiacharat tusa, antukarsha nekaacharat tusa, umirtsuk ni tunaari tsankurnacharat tusa túrattawai’ tímiayi.

*(Mateu 13.18-23; Rúkas 8.11-15)*

<sup>13</sup> Tura tímiayi ‘Wi jintintiajrumna nú métek-taku chicham nekaachurmek. Nu nékachkurmeka ¿itiurak chikich métek-taku chichamsha nekaatarum?’

<sup>14</sup> Atsaamniua nuka Yus-Chichaman étserna nuna nakumui.

<sup>15</sup> Jínkiái jintiá iniaarua nuna chikich shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentáin atsaampramun jurawai.

<sup>16</sup> Chikich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai.

<sup>17</sup> Tura ni kancape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chikich itiurchatan wáinkiar Yúsaiya kanainiawai.

<sup>18</sup> Chíkich ántuiniamuka jaṅkí nupanam atsaampramua núniskete. Nu shuar Yus-Chichaman ántuiniawai.

<sup>19</sup> Ántuiniayat ju nuṅkanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kaṅkar emeṅkatuí. Tuma asamtai nerektinían tujintiainiawai.

<sup>20</sup> Tura chíkich ántuiniamusha péṅker núnkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chíkich shuar trainta, chíkich shuar sesenta chíkich shuar siansha nerenawai.'

*Uṅkma ana nu paant nekanattawai*

*(Rúkas 8.16-18)*

<sup>21</sup> Nuyá Jesus juṅa tímiayi '¿Shuar shiripkin ekeemak itia pitiaknum enkeattawak. Peaknum wakenam ikiustatuak? Atsá. Antsu misanam ekentsashtinkiait.

<sup>22</sup> Núnisan ashí uṅkma ana nu ukunam paant nekanattawai. Tura núnisan yamá ishishmasa chichasmasha ukunam paant nekanattawai.

<sup>23</sup> Kuíshim ákuinṅkia antuktarum.'

<sup>24</sup> Tura nuyá tímiayi 'Ántarmena nu esetrarum enentáimsarum antuktarum. Urutá péṅkerak enentáimsatarum, núnisan Yuska ámin nekaatniun suramsattarme, tura nú núkap patatramsattarme.

<sup>25</sup> Tuma asamtai shuar núkap takakna nu patatnastatui. Antsu chíkich shuar ishichik takakuk jurunkittiaiwei.'

*Yusa akupeamuri júnisaiti*

<sup>26</sup> Nuyá Jesus chichaak juṅa tímiayi 'Yusa akupeamuri júnisaiti. Shuar jinṅkaián atsaampratniua núniskete.

<sup>27</sup> Jinṅkiáin atsaamar, untsurí kanar, tsawar, uruksanpi tusa nákwai. Tura itiura tsapainia núnaka nékatsui.

<sup>28</sup> Kame jinṅkiái nuṅkanam init aku niṅki tsapaatsuk; emka nukareawai, nuyá tuyureawai tura nujamar katsuṅawai.

<sup>29</sup> Túruna káakmatai júuktin tsawant jeayi tusar juúniawai.'

*(Mateu 13.31-32; Rúkas 13.18-19)*

<sup>30</sup> Ataksha Jesus tímiayi '¿Yusa akupeamuri warijiaínk' nakumkataj. War-ijiaínk' métek-takuit?

<sup>31</sup> Mustasa jinṅkiái araamua nujai métek-takuiti. Nu jinṅkiaisha ashí nankaamas ishitiupchichiti.

<sup>32</sup> Tura araam tsapái ashí nankaamas uunt ajawai; tura tsenkeakmarisha kámpuram asamtai nuṅ mikintranam chinṅkisha shiir ayamainiawai.'

*(Mateu 13.34-35)*

<sup>33</sup> Núnisan Jesus untsurí métek-taku chichamjai Yus-Chichaman ujaamiayi. Nii nekaatniun jearmia nunak ujaamiayi.

<sup>34</sup> Chíkich shuaran aya métek-taku chichamjai ujaamiayi; antsu ni unuiniamurijjai Niṅki pujus ashí paant jintinrarmiai.

*Nasencha, entsanacha Jesus imijíánmia nu*

*(Mateu 8.23-27; Rúkas 8.22-25)*

<sup>35</sup> Nu tsawantaj etsa akaikimtai Jesus ni unuiniamurin chicharainiak "Entsa amain katiṅtai" tímiayi.

36 Tutai kanunam enkemprarmiayi. Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanunmayasha atampriarmiayi.

37 Tura nasesha ti nasenkatasa nankammiayi; chíchimi kanunam yarána piáktasa ajamiayi.

38 Jesuska kanú senkarin atamprus kanú tepemiayi. Tura, ni unuiniamurj Jesusan ishintiak chicharuk “Uunta ii wayajnia júka pachitmatmek” tiarmiayi.

39 Tutai Jesus nantaki nasen kakantramiayi. Entsanha chicharuk “Takamatsata. Miaku ajasta” tímiayi. Tutai nasesha menkakamiayi, entsasha miaaku ajasmiai.

40 Túrunamtai Jesus ni unuiniamurj chicharainiak “¿Urukamtai ashamarum? Itiura Yus nekas enentáimatsrum” tímiayi.

41 Tura imiá ashamainiak “¿Maa júsha yait? Nasesha entsasha nin umirainiatsuk” tunaiyarmiayi.

## 5

### *Jataranmayan iwianchrukun Jesus tsuármiania nu (Mateu 8.28-34; Rúkas 8.26-39)*

1 Nuyá antumian amaini Jatara nunkanam jeawarmiayi.

2 Jesus kanunmaya jinkimtai áishman iwianchruku, shuar jakáa iwiarainiumiá wárik taa Jesusan inkiunmiayi.

3 Nu shuar iwiarainium tuke pujuyayi. Tura jirujainkia nin jinkiaatniun tujinkiarimiayi.

4 Jirujai nawenmasha, uwejnusha tuke jinikiau áirmiayi. Túramaitiat jinkiaarman tsuriar tepet-tepet awajmiayi. Tura ti kakaram asamtai nin nupetkachminiuyayi.

5 Tuke tsawajsha káshisha, iwiarainiumsha murasha kayajai ijiumak untsumuu wekainiuyayi.

6 Tura yajayan wáiniak Jesusan tseke tarimiayi; tura tikishmatramiayi.

7-8 Túrunamtai Jesus chicharuk “Iwianchiá, ni enentáiya jinkitia, tájame” tímiayi.

Takui íwianch kakantar chichaak “¿Winiasha urukamtai tarutnium, Uunt Nankaamaku Yusa Uchirj Jesúsá? Yus iirmanum wáitkiarsaip, tájame” tímiayi.

9 Takui Jesus tímiayi “¿Ame náarmesha yait?”

Tutai niisha ayak “Untsurj ásar wikia Untsurj-suntar tu anaikiamuitjai” tímiayi.

10 Nuna ti amik, nu nunkanmaya akuptukain tusa Jesusan ti seamiayi.

11 Nuisha nainnium nuntumas untsurj kuchi shushunmak matsamarmiayi.

12 Tuma asamtai, kuchiniam enkemátin tsankatrukta tusar Jesusan seawarmiayi.

13 Tuiniakui Jesus “ayu” tímiayi. Takui íwianch áishman kainiá jinkiar kuchiniam enkemáwarmiayi. Kuchisha ti untsurj, jimiará mir (2.000) áchiawash. Ashí mash nánatanam iniaawar antumiannum iniankarmiayi. Nuisha entsá kjar jakerarmiayi.

14 Túrunamtai kuchin wáinin pisarar péprunmasha shuarnumsha nuna etserarmiayi. Tuma asamtai iyutai tusar ashintiukarmiayi.

15 Túrawar Jesusaj jeawarmiayi. Jeawar áishman yaunchu iwianchrुकun yamaikia pé<sup>n</sup>ker ajasun pushirin entsar pujan wáinkiararmiayi. Wáinkiar ashankarmiayi.

16 Tura waketkiar kuchi túrunamuncha iwianchrुकu pé<sup>n</sup>ker ajasmancha mash etserkarmiayi.

17 Tuna asantai ni nun<sup>ke</sup>ya jiinki wetá tusa seawarmiayi. Jesus kanunam en<sup>k</sup>emamtai áishman nuik iwianchrुकu amia nu Jesusan chicharuk

18 “Wi Ámijijai tuke tsanin<sup>k</sup>ian wekasatjai” tímiayi.

19 Tura nú<sup>n</sup>aka Jesus suritkiarmiayi. “Antsu ame jeem<sup>i</sup>in, áminiurm<sup>i</sup>in weme, ashí Uunt Yus túrutma nu tura waitnentrampra nusha ujakarta” tímiayi.

20 Tutai áishman<sup>s</sup>ha wémiayi. Tura antsu Tekapuris nun<sup>k</sup>anam Jesus nin pé<sup>n</sup>ker awajsamia nuna ashí shuaran ujakmiayi. Nu nun<sup>k</sup>anmayá shuarka nuna antukar ti enentáimprarmiayi.

*Jimiará jaan Jesus tsuármiania nu*

*(Mateu 9.18-26; Rúkas 8.40-56)*

21 Ataksha Jesus kanujai katin<sup>m</sup>matai, aents untsur<sup>i</sup> Nin irunturarmiayi. Jesuska antumian<sup>k</sup>a káanmatkar<sup>i</sup> wajamiayi.

22 Tura Israer-shuar iruntai jea náampruku, ni naar<sup>i</sup> Jairu, támiayi. Taa, Jesusan wáiniak, piniakum tepersamiayi.

23 Piniakumar ti seak, “Winia nawantur jarutui. Winitia, túram pé<sup>n</sup>ker ajasat tusam uwejmij<sup>i</sup>jai antin<sup>t</sup>rukta. Nuin<sup>k</sup>ia jarutkashtatui” tímiayi.

24 Tu tímiatai Jesus niij<sup>i</sup>jai wémiayi. Tura untsur<sup>i</sup> shuar wena ásar Nin chánuarmiayi.

25 Nu<sup>i</sup> pachitkia nuwá ti jaa wémiayi. Niisha tuse uwí numpan ajapeak wáitias pujuyayi.

26 Ti untsur<sup>i</sup> tsuakratin nincha iisu armiayi. Tura iyamsha ti wáitias pujuyayi. Tura ni kuítr<sup>i</sup>ncha ashí ajapaitai tsuámarchauyayi; antsu tsuamsha nu arant ajauyayi.

27 Nu nuwásha, Jesus túramun antuku asa, ni ukuurin<sup>i</sup> amaini<sup>n</sup> ni pushir<sup>i</sup>n antin<sup>m</sup>miayi.

28 “Wi aya ni pushir<sup>i</sup>n antin<sup>n</sup>aka pé<sup>n</sup>kerapi ajasaintjia” tu enentáimiar túramiayi.

29 Tura Jesusa pushir<sup>i</sup>n antin<sup>n</sup> nú chichamaik numpa ájapman men<sup>k</sup>akamiayi. Pé<sup>n</sup>ker ajasman ayash<sup>i</sup>n nekapramiayi.

30 Tura nuin<sup>n</sup> Jesuska, ni kakarmar<sup>i</sup>jijai tsuarman nekapmampramiayi. Tura nuna nekáa, ayantar chichaak “¿Yaki winia pushirun antin<sup>t</sup>rukta?” tímiayi.

31 Tutai ni unuinamur<sup>i</sup> tiarmiayi, “Untsur<sup>i</sup> Ámin antinmainiasha ¿urukam-tai “yaki winia antin<sup>k</sup>ia” tame?”

32 Tura Jesus, yaki túruta tusa ashí ímpramiayi.

33 Nuin<sup>k</sup>ia nuwásha, ni ayashin túruna nuna nekáa, ti ashamak kuraimiayi. Tura Jesusan jear<sup>i</sup> tikishmatramiayi. Tura ni túrunamur<sup>i</sup>n ashí paant ujakmi-ayi.

34 Takui Jesus nin chicharuk “Nawantru, Winia nekas enentáimtursa asak-min, pé<sup>n</sup>ker awajtamsaitme. Shiir wetá, tura tuke pé<sup>n</sup>ker pujusta” tímiayi.

35 Tura Jesus nuna tuke chichas pujai, iruntai jea untr<sup>i</sup> jeenia<sup>n</sup> tariarmiayi. Tariar chicharainiak “Ame nawantrum jakayi. ¿Urukamtai Unuikiartin tuke itit awajsatam?” tiarmiayi.

<sup>36</sup> Tura Jesuska, nii tiarmia nuna ántayat, núnaka pachitsuk, iruntai jea uuntriñ chicharuk “Ashamkaip; áyatik nekas enentáimtursata’ tímiayi.

<sup>37</sup> Tura Nijjajai wétinian aya Pítruncha, Jakupuncha ni yachi Juanjai tsan̄katkarmiayi.

<sup>38</sup> Iruntai jea uuntri jeen jeawar, áentsun charaatum ajainian, úutainian untsumuk ajainiancha Jesus wáinkiamiayi.

<sup>39</sup> Tura nuwach penké jakan nékayat, wayá nin chicharuk “¿Urukamtai timiá úutrum, tura wa wa ajarum? Nuwach jákachai, antsu kanarai” tímiayi.

<sup>40</sup> Nuna takui wishikrarmiayi. Tura Jesus ashí jjiir akupkarmiayi. Áyatik nuwachí aparín, nukuríncha tura Nijjajai táaruncha nuwachí tepamurín jukimiayi.

<sup>41</sup> Tura wayawar Jesuska nuwachí uwejen achik tímiayi “Taritia kumi.” Nusha shuar chichamjainkia “nawantrú nantáktiá” tawai.

<sup>42</sup> Nuwach tuse uwi takakuya nu, nú chichamaik nantaki wekasamiayi. Túramtai nuj pujuarmiania nu ti enentáimprarmiayi.

<sup>43</sup> Jesuska chichaak “Atumsha penké etserkairap’ tímiayi. Tura “nuwach ayuratarum” tímiayi.

## 6

### *Jesus Nasarétnum pujusma*

*(Mateo 13.53-58; Rúkas 4.16-30)*

<sup>1</sup> Jesus nuyá jiin̄ki ni nun̄ken waketkimiayi. Ni unuiniamur̄isha nemariarmiayi.

<sup>2</sup> Nuisha ayampratin tsawant jeamtai Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tuñ unuimariuit. Ni nekaatniur̄incha yaki susait. Tura aentsti tujintiajnina nuna Niisha itiurak tura?”

<sup>3</sup> Jusha karpintíruchukait; Marí uchir̄inchukait. Ni yachisha Jakupusha, Jusha, Jútassha, Semun̄sha nékatsjik. Tura ni umaisha juí iijjajai pujuiniatsuk” tiarmiayi. Túrawar Nin nekas enentáimtustinian tujinkiarimiayi.

<sup>4</sup> Túrasha Jesus nin chicharuk “Yúsnan etserniun chíkich nun̄kanmayaan̄ka shiir anturainiawai. Antsu ní nun̄keyan̄ka, ní shuarsha anturainiatsui” tímiayi.

<sup>5</sup> Tura nuisha, ni nun̄kenkikia aentsti tujintiamun túratniun tujinkiamiayi. Antsu jaancha aya ishichik ni uwejejai antiñ tsuármiayi.

<sup>6</sup> Tura nekas enentáimtacham “¿urukamtai nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuiniakní wekaimiayi.

*Yus-Chicham etserkatarum tusa Jesus ni unuiniamur̄in akupkarmiania nu*  
*(Mateo 10.5-15; Rúkas 9.1-6)*

<sup>7</sup> Tuse unuiniamur̄in untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmar̄in súsarmiayi.

<sup>8</sup> Tura chicharuk “Jintiá yurumátniusha jukiirap, uyuntrum̄incha kuitcha en̄kearum jukiirap. Antsu aya áanik mashtun̄ jukiirum wetarum.

<sup>9</sup> Sapat uwekatarum, tura entsartincha jímiar jukiirap, tímiayi.

<sup>10</sup> Tura jea wayarmena nuñ̄n̄n̄ pujustarum; pujá-pujakuarum nuyá chíkich péprunmasha wetarum.



11 Tura nánkamas aents atumin awaintiamainiachkuisha, anturtamainiachkuisha, nuyá jíinkirum, nu shuar yajauch ániawai tusarum, atumí nawe nunka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutuma péprunmaya shuarjai tura Kumura péprunmaya shuarjai nankaamas nin asutiattawai” tímiayi Jesus.

12 Nuyá Jesusa unuiniamurí jíinkiar enentái yapajjar Yúsai enentáimtumartinian etserkarmiayi.

13 Tura iwianchruku enentáiyá iwianchin jíirki akupkarmiayi, tura asuit-ijjai yakarar untsurí jáinian tsuararmiayi.

### *Juanka jakamurí*

*(Mateu 14.1-12; Rúkas 9.7-9)*

14 Jesusa náarín tura ní túramurín ashí aents áujmatin ásarmatai, uunt akupin Erutis nuna antukmariayi. Erutiska “Imiakratin Juan jakamunmaya nantakní. Tuma asa ti kakaram takaawai” tímiayi.

15 Tura chíkich shuar “Eríasaiti” tiarmiayi. Chikichcha “Yúsnan etserniuiti, yaunchu etserniuya núkete” tiarmiayi.

16 Erutis nuna antuk “Nekas Juánkaiti. Ni muuken tsupiktinian akupkamaiaj nu, jakamunmaya nantakniuiti” tímiayi.

17-19 Kame Uunt akupin Erutis, ni yachí Jiripi nuarín nuatkamiayi. Nu nuwá naarí Jirutíasaiti. Juansha uunt akupniun Erutisan chicharuk “Yatsumi nuarí akintrukchatniuitme” tímiayi. Tutai nuwá Jirutías Juánkan ti kajerkamiayi. Tura Juánkan máataj tusa wakerimiayi. Túrasha uunt akupin Erutis nuna surimkiamiayi. Antsu Juan achikrum sepunam enkeatarum tusa akupkamaiaj.

20 Juansha tuke enentáijjai Yusa jintín wekainiuyayi. Erutis, ni esetar enentáimniun neka asa Juánkan ashamak Jirutías wakeramurín túrawain tusa suritkiamiayi. Kame Erutis Juan étserman nékachuiat antuktinian wakerimiayi.

21 Jirutías, itiurak máawaj tu pujai, uunt akupin Erutis, ni akiini-amu tsawantrí jeamtai, ni suntaríncha, Kariréa nunkanmaya úuntríncha, kuírintin armia nunasha untsukar, namperan najanamiayi.

22 Nuisha Jirutías nawantrí wayá jantsemámtai Erutis tura niijjai nampernum matsamarmia nusha shiir enentáimsarmiayi. Túramtai uunt akupin nuwáchin chicharuk “Ame wakeram nu seattia. Wi amastatjai.

23 Nekas tájame, ashí ame seatmena núnaka amastatjai. Wats, seatkumnínkia takakjana nuna jímiapetek nakakan, amastatjai” tímiayi.

24 Tutai nuwách jíinki ni nukurín Jirutíasan chicharuk “¿Wariniak seattaj?” tímiayi.

Tutai “Imiakratin Juanka muuke seata” tímiayi.

25 Nu chichamaik nuwách wari wayá Erutisan chicharuk “Yamaikia uunt amamkunam Juanka muuken wakerajai” tímiayi.

26 Nuna takui uunt akupin ti kuntuts enentáimpramiayi. Tura nii tiniu asa ni amikrí matsatania nu antukaru ásarmatai surimkiatniun tujinkiamiayi.

27 Tuma asa uunt akupin Juanka muuke itiat tusa ni suntarín wárikmas akupkamaiaj.

28 Túramtai suntar wari we, sepunam Juanka muuken tsupikmiayi. Tsupik, amamkunam itia, nuwách susamiayi. Túram achik ni nukurín susamiayi.

29 Juan maamun antukar ni unuiniamurí ni ayashín iwarsatai tusar júkirmiayi.

*Señku mir áishmañkan Jesus ayuramiania nu  
(Mateu 14.13-21; Rúkas 9.10-17; Juan 6.1-14)*

<sup>30</sup> Tura Jesusa unuiniamurj Nii akupkarma nu, ataksha waketki káunak irunturarmiyai. Ashí nii túrawarmia nuna, unuiniararmia nunasha ujakarmiyai.

<sup>31</sup> Tura untsurj shuar táiniakui, niisha ankant ajastinniasha yurumátniuncha tujinkiarmiyai. Tuma asamtai Jesus chichaak “Iijjai wemí aents atsuiniamunam; nuj ishichik ayamprarmi” tímiyai.

<sup>32</sup> Nuyá Jesus ni unuiniamurjjijai kanunam enkemprar, aents atsuiniamunam jeatai tusar jiiinkiarmiyai.

<sup>33</sup> Túrasha shuar ni wéenan wáinkiarmiyai. Tura “Jesusaiti” tiarmiyai. Tuma ásar ashí péprunmaya untsurj shuar tseke ashintiukar, ni jeatniunam náakarmiyai.

<sup>34</sup> Jesus kanunmaya jiiinki ti untsurj aents iruntrar matsatun wáinkiamiyai. Murik péñker wáinchatajya núnisañ matsatu ásarmatai Jesus nin wáitnentrarmiyai. Tura núkap unuiniararmiyai.

<sup>35</sup> Nuyá kjiakui ni unuiniamurj Jesusan tariar chicharainiak “Atsamunam pujatsjik; tura yamá kjiatsuk.

<sup>36</sup> Shuar wari akupkarta. Tíjjiuch péprunmasha, shuarnumsha wearti, ni yurumkarj sumarmakarati” tiarmiyai.

<sup>37</sup> Tutai Jesus chichaak “Atumek ayuratarum” tímiyai.

Tutai “Iisha ju shuar ayuratai tusar, ¿jimiara siañ kuitjai yurumak sumaktai tusar wétinkiaitiaj?” tiarmiyai.

<sup>38</sup> Tura Jesus ni unuiniamurj chicharainiak “Tanta takakrum nu iistarum ¿urutmak aa?” tímiyai.

Tutai nekapmarar chichainiak “Tántaka séñkuchikiiti, tura namaksha jímíarchikiiti” tiarmiyai.

<sup>39</sup> Tutai Jesus tímiyai “Ju shuar chírichriniam pujusarti tusar akupkatarum.”

<sup>40</sup> Ankant ankant siañ siañsha, señkuenta señkuenta iruntrar matsarmiyai.

<sup>41</sup> Jesuska señku tantancha, jímíar namaknasha jusa, yakí nayaimpinmaanj ímias Yúsan yumisamiyai. Tura yurumkan puurmiyai. Puur ni unuiniamurj súsarmiyai. Namaknasha puur súsarmiyai, ashí shuáran ajamsarat tusa.

<sup>42</sup> Ashí yurumáwar ejemaramatai,

<sup>43</sup> puunaruncha, namak ampírmáncha achikiar, tuse chañkinian áimkiar júkiarmiyai.

<sup>44</sup> Nu yurumkan ti untsurj yurumáwarmiyai. Aya áishmañkak señku mir (5.000) ármiyai.

*Jesus entsá pátatek wekasamiania nu  
(Mateu 14.22-27; Juan 6.16-21)*

<sup>45</sup> Nuyá Jesus ni unuiniamurj chicharainiak “Kanunam enkemprarum, katiñkum amain émaa ajatarum, Petsaitia péprunam. Wisha ju shuaran ájusar ikiuktiatjai” tímiyai.

<sup>46</sup> Shuáran áujas ikiuki Yusjai chichastaj tusa náinnium wémiyai.

<sup>47</sup> Tura kirit ajasmanum kánuka antumiañnum ajapén nanammiyai. Jesuska niñki juakmiyai.

48 Jesusa unuiniamurisha wia-wiantainiakua ti pimpikiarmiayi, nase tukumma ásar. Nuna Jesus wáiniak tsawartin ishichik ajasmatai entsá páatek wekas nin jeariarmiayi. Tura nan̄kaamaktiasa wea núnisan wémiayi.

49 Jesus entsá wekaan ni unuiniamurj wáinkiar, wakanchashit, tu enentáimprarmiayi. Túrawar ti unsumkarmiayi.

50 Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wíitjai Jesus; ashamprukairap” tímiayi.

51-52 Nuñkia entsaya kanunam waka en̄kempramiayi. Túramtai nasesha majaanmiayi. Ni unuiniamurinkia enentái kiritia áintsan áarmatai Jesus yurumkan núkap awajsamia nuna paant nekaatniun tuke tujinkarmiayi. Tuma ásar yamá túrunamu itiurak aankia tusar ti enentáimprar sapijmiakarmiayi.

*Jinisarítnumiá shuáran Jesus tsuármiania nu*  
(Mateu 14.34-36)

53 Nuyañka katñkiar, Jinisarít núñkanam jeawarmiayi. Jeawar kanun ajuñiarmiayi.

54 Kanunmaya jñintrarmatai, nu nuñkanmaya shuar Jesusan nekaawarmiayi.

55 Tura “Jesus pujawai” táman antukar, ashí jeañmaya jaan ni peakrintiuk Jesus pujamunam itiaarmiayi.

56 Tura Jesus wekaak wémia nuñsha, péprunmasha, shuar matsatmanumsha, ishichik matsatkamunmasha jaan itiarar jintiá áeprusarmiayi. Túmainiak Jesusan pushirmin antintaj tusar seawarmiayi. Tura ashí antñkiarmia nuka péñker ajasarmiayi.

## 7

*Jesus Pariséun áujmatsarmiania nu*  
(Mateu 15.1-20)

1 Pariséusha, Israer-shuara jintinniurisha Jerusarénumiá Jesusan tariarmiayi.

2 Tura Jesusa unuiniamurjñ ikijmiatsuk yurumun wáinkiar “Israer-shuara túrutairñ túruiniatsui” tiarmiayi.

3 (Kame Pariséusha, tura ashí Israer-shuarsha, ni uuntrj jintintiamurjñ umikiar ti núkap ikijmiarar yurumin ármiai.)

4 Péprunmaya tari “ikijmiatsuk yurumáshtiniaiti” tiniu ármiai. Tura ti untsurj ni uuntrj túrutairj núnisan ármiai. “Tsapancha, ichiñnasha, jiruncha, peaknasha nijjakartiniaiti” tiniu ármiai.)

5 Tuma asamtai Pariséusha, Israer-shuara jintinniurisha Jesusan chicharainiak “¿Urukamtai ame unuiniamuram ii uuntrj jintinramniuitiaj nuna túruiniatsui. Urukamtai ikijmiatskesha yurumáinia?” tiarmiayi.

6 Tutai Jesus tímiayi “Ántar chichamtiniaitrume. Isayas yaunchu nekas atumin ártampramiayi juna:

Ju aents ni wenejai Winia “ti péñkeraiti” turutainiawai, tímiayi Yus, tura ni enentáinkia jeachat pujuiniawai.

7 Tura tukeneas Winia shiir awajuiniawai. Aentsu chichame jintiainiyat, “Yus-Chichamaiti” tuñniawai.”

Tu áarmaiti.

8 Tura átum Yusa chichame iniaisarum, aentsu jintintiamurj umirkarum, ichinasha, tsapancha nijaktin, tura chikich túrutaisha áintsarmek untsurj túrarme.

9 Túrákrum Yus-Chichamka tsukintiaani ikiusurme atumí uuntrj chichame umirkatai tusarum.

10 Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiayi:

Shuarsha ni aparín, nukuríncha yajauch chichareakka, nu shuar jákatniuiti.

11-12 Túrasha átumka Pariséutirmeka, antsu ju tárume: “Shuar ni aparín ni nukurín chicharuk “Wi yáintinian takakjana nu Kurpanaiti” takuñkia, atumsha péñkeraiti, aparíncha nukuríncha yáinchatí” tarume. (Kurpan tana nuka, Yus susamu, tawai.)

13 Nekaatarum, Pariséutiram. “Íi yaunchu uuntrj chichame tuke umiki wétiniaitji” tákurum, Yus-Chicham penké ántar chichama núnin awajearme. Núnisrumek chikichcha untsurj túrarme.” Tu timiayi Jesus.

14 Nuyá ataksha Jesus ashí shuáran untsukar “Mash anturtukturum, ashí nekaatarum, tímiayi.

15 Aaya ayashnium wayaana nu, shuáran yajauch awajsachminiaiti; tura antsu ni enentáiniá jiniá nu, yajauch awajsattawai.

16 Shuar nuna ántakka enentáimprati” tímiayi.

17 Nuyá áentsun ikuiak, jea wayamtai, ni unuiniamurj aniasarmiayi “¿Nu métek-taku chicham warintia?” tiarmiayi.

18 Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiaiti.

19 Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniaiti, tímiayi.

20 Nuyá tímiayi “Shuara enentáiniá jiniá nu, yajauch awajsamniaiti.

21 Shuara enentáiniá, initiá, yajauch enentáimsatniusha, tsanirnatniusha, natsa tsanirnatniusha, shuar máatniusha,

22 kasamkatniusha, chikichna wakeruktincha, péñkercha túratniusha, anañkatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka initiá wininiatsuk.

23 Ashí nu tunáa ainia nu, shuara enentáiniá jiniu asa, shuáran yajauch awajainiawai” tímiayi.

### *Serupinísianmayá nuwá Jesusan nekas enentáimtusmiania nu*

*(Mateu 15.21-28)*

24 Tiru pepu, Setún péprusha Serupinísia nunkanam ámiayi. Nuka Israer-shuara nunkenchauyayi. Nu nunkanam Jesus wémiayi. Tura jeá, jeá wayáa pujusmiayi. Tura nuj pujamun nu nunkanmayá shuar nekarawarain tusa nakitmiayi; túrasha uumkatniun tujinkiamiayi.

25 Wárik nu nunkanmayá nuwá Jesus pujan nekaamiayi. Nu núwaka nawantrj iwianchrukuyayi. Tuma asa Jesusan tarí ni nawen piniakum tepersamiayi.

26 Nu nuwá Israer-shuarcha, Serupinísianmayáuyayi. Túmaitiat, nawantru enentáiyá iwianchin jiiirturkitia tusa Jesusan seamiayi.

27 Tutai Jesus nuwan chicharuk “Uchi emka ejemarartí. Uchi apatkuri atankir yawach súatin péñkerchaiti” tímiayi.

<sup>28</sup> Tutai nuwá ayak “Nekas, Uunta, tame. Tura yawachisha misanam wak-enam pujuinia nu, uchi apatkun yurumuk juyumak kákeamun yuúniatsuk” tímiayi.

<sup>29</sup> Tutai Jesus tímiayi “Pénker tame. Tuma asam, shiir wetá; ame nawantrumj enentáiyá iwianch jíinkiyi” tímiayi.

<sup>30</sup> Takui niisha wémiayi. Tura ni jeen jeá, ni nawantrjn íwianch jíinkimtai pénger ajas peaknum tepan wáinkiamiayi.

### *Jesus empekun tsuármiania nu*

<sup>31</sup> Jesus Tirunmaya jíinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi.

<sup>32</sup> Nuí chichachu ámiayi, kuishjn empeku. Nu shuáran Jesusan itiarar, ni uwejejai antiñkiat tusar seawarmiyai.

<sup>33</sup> Shuar matsatmanumiá Jesus nin akanki jukí kuishjn tsara uwejejai tsutsukruamiayi. Tura usukia, nu shuara iniajn antintkiamiayi.

<sup>34</sup> Tura nayaimpinmaani ímias súkaska mayati “Epata” tímiayi. Nuka, shuar chichamnumka “chinkiatí” tawai.

<sup>35</sup> Nu chichamaik ni kuishjisha chinikiamiayi, iniajsha séermiyai. Tura paant chichasmiyai.

<sup>36</sup> Tura Jesus chicharainiak “Penké etserkairap” tímiayi. Jesuska surí-suritiamaitiat, nu nankaamas etserarmiyai.

<sup>37</sup> Tura ti enentáimprarmiyai. Enentáimprar, “Ju Jesus aya péngeran túrawai. Empekuncha ántumtkniati, tura chichachun chichamtikniati” tiarmiyai.

## 8

### *Kuattru mir shuáran Jesus ayuramiania nu (Mateu 15.32-39)*

<sup>1</sup> Nu tsawantáí shuar timiá untsurj iruntrarmiyai. Yurumkarj atsakui Jesus ni unuiniamurjn untsukar juna tímiayi:

<sup>2</sup> “Ju shuáran waitnentajai. Menaintiú tsawant Wijjaj pujuinia ásarmatai ni yurumkarj amuukachaik.

<sup>3</sup> Tura ni jeen ayurtsuk akupeamka, tsukarjn jintiá pimpikiartatui, yajaya káunkaru ásar” tímiayi.

<sup>4</sup> Tutai ni unuiniamurj chichainiak “Túrasha juí atsamunam, ju aents ejemaratat tusar çtuyá yurumkak wáinkiatjaj?” tiarmiyai.

<sup>5</sup> Tutai Jesus nin aniasmiyai “¿Urutmá tanta aa?”

Tutai “siati awai” tiarmiyai.

<sup>6</sup> Nuñkia ashí áentsun “nunká pujustarum” tiarmiyai. Tura tantan achik, Yúsan yumiñsamiayi. Tura puuk, áentsun ajamsatarum tusa ni unuiniamurjn susamiayi.

<sup>7</sup> Tura uchich namaksha ishichik aan achik, Yúsan yumiñkias, ni unuiniamurjn chicharuk “Jusha shuar ajamsatarum” tímiayi.

<sup>8</sup> Turam ashí yurumáwar ejemarmiyai. Ampirma púunaruncha siati chanñinnium áimkiarmiyai.

<sup>9</sup> Kuattru mir (4.000) shuar yurumáwarmiyai. Yurumáwar amikiarmatai, Jesus nin áujas akupkarmiyai.

<sup>10</sup> Tura ni unuiniamurjjaj kanunam enkemprar Tarmanúta nunkanam wearmiayi.

*Pariséu Jesusan iniakmasta tiarmiania nu*

*(Mateu 16.1-4; Rúkas 12.54-56)*

11 Pariséu Jesusjaj áujmatsatai tusar tariarmiayi. Nekapsatai tusar wakeru-  
iniak Nin chicharuk “Nayaimpinmaya kakaram iniakmasta” tiarmiayi.

12 Tuñiakui Jesus kúntuts enentáimias, súkaska mayati “¿Urukantai, yamaiya  
aentstíram, nayaimpinmaya kakarman iniakmasat tusarum wakerarum?  
Nuka penké sunaschattarme, paant tájarne” tímiayi.

13 Nuyá nin ikiukiar ataksha kanunam enkemar amain katinmiayi.

*Pariséu túramurijaj aneartarum, tímiayi Jesus*

*(Mateu 16.5-12)*

14 Tura ni unuiniamurj yurumak jukitai tukamá kajinmatkiarmiayi. Ka-  
nunmanka aya chikichik tantanak takaku ármiayi.

15 Jesussha ni unuiniamurj enentáimtikui tímiayi “Wáinkiatarum;  
Pariséusha Erutissha wakaputañ takakainia nújajsha aneartarum” tímiayi.

16 Tutai ni unuiniamurjsha tunaiarmiayi “Tanta kajinmatkin asakrin  
nuna túramtsujash” tiarmiayi.

17 Tura Jesus nuna nekáa chichaak “¿Urukantai aya yurumkak  
enentáimtarum? Tuke nékatsrumek. Penké enentáimtsurmek. Atumí enentá  
tuke kiritkaiit? tímiayi.

18 Jimi ajsha itiura wáintsurmea. Kuíshim ajsha itiura ántatsrum. Ashí  
kajinmatkinrumek.

19 Nekaatarum, nuik, senku tantan púuran senku mir áishmankan ayurach-  
makaj. ¿Tura ampirma urutmá chañkinnium chumpiamarum?” tímiayi.

Niisha tiarmiayi “Tuse chañkinnium chumpiamj.”

20 Ataksha Jesus tímiayi “Tura siati tantajaj kuatru mir shuaran ayuramtai,  
¿ampirmasha urutmá chañkinnium chumpiamarum?”

Niisha “siati” tiarmiayi.

21 Tuma asamtai Jesus tímiayi “¿Itiura imiá nékatsrum?”

*Jesus kusurun ímtiksamiania nu*

22 Nuyá Petsaitia péprunam jeawarmiayi. Jeawarmatai, áishman jji kusurun  
Jesusan itiararmiayi. Túrawar antinta tusar seawarmiayi.

23 Tuma asamtai Jesus uwejnum achik péprunam aani enkeki juki jjin  
usukjjaj kuérmiayi. Tura uwejjaj antin “¿ímmek?” tímiayi.

24 Tutai kusuru ími tímiayi “Aentsun iyajaj, túrasha paantcha. Numi  
wekainian áaniun iyajaj” tímiayi.

25 Nuyá ataksha Jesus ni uwejjaj kusuru jjin antinmiayi. Tura kusurusha  
úmamkes iis, péñker ajas, ashí paant ímpramiayi.

26 Jesus chichaak “Jeemjin weakum péprunam wayawaip tura shuar  
ujakaip” tímiayi.

*Pítur Jesusan “Yusa Anaikiamurinme” tímiania nu*

*(Mateu 16.13-20; Rúkas 9.18-21)*

27 Jesus ni unuiniamurjjaj uunt pepru Sesaria-jiripiunam jeatsuk,  
tíjuch uchich péprunam irasarmiayi. Jintía wésar Jesus ni unuiniamurj  
chicharainiak, “¿Yaiti turutainiawa Winia?” tímiayi.

28 Tutai niisha áimkiarmiayi “Chíkich chichainiak, imiakratin Juankaiti,  
turamainiawai. Chíkichcha, Eríasaiti, tura chíkichkha, yaunchu Yúsnan etserin  
nantakniua núiti, turamainiawai” tiarmiayi.

29 Tutai Jesus tímiayi “Atumsha, ¿waritume. Yáitij?” tímiayi.

Tutai Pítiur tímiayi “Ámeke Krístuitme; Yúsaiya akupkamuitme.”

<sup>30</sup> Tutai Jesus chichaak “Peṅké etserkairap” tímiayi.

*Jesus ni jákatniurḡn ujakmiania nu  
(Mateu 16.21-28; Rúkas 9.22-27)*

<sup>31</sup> Unuiniak: “Wi Aents Ajasuitjiana ju ti wáitsatniuitjai. Israer-shuarti ii uuntriḡsha, Patri úuntriḡsha, ii jintinniurḡsha Winia nakitrurar mantuawarta-tui. Túrasha menaintiu tsawant naṅkaasmatai nantaktiniaitjai” tímiayi.

<sup>32</sup> Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

<sup>33</sup> Tutai Jesus ayantmatar, ni unuiniamurḡn iis, Pítrun kakantar chicharuk “Satanása, werumta. Ámeke Yusna ana nu enentáimtsame, antsu aya áentsnak enentáimtame” tímiayi.

<sup>34</sup> Nuna tuasua amik tura nuḡ matsamarmia nunasha, ni unuiniamurḡncha untsuk tímiayi, “Shuar Winia nekas nemartustasa wakerakka ni wakeramurḡnka iniaisati; tura ni krusḡ yanakḡ nemartustí.

<sup>35</sup> Kame shuar ju nuṅkanam aya niṅki anenmamkuṅka nu shuar ni iwiaakmarḡn emeṅkaktatui. Antsu Winia anentu asa tura winia chichamprun anea asa, shuar aya peṅker pujustinniak enentáimtsuna nu, nekas iwiaakman wáinkiatwawai.

<sup>36</sup> Nekaata, shuar ashí ju nuṅkanam írunga nuna sumaksha túrasha ni wakanḡ jinium wéakuisha, ḡitiurak peṅker pujusaint?

<sup>37</sup> Shuarka wakanḡn uwemtikrataj tusa wakerak ḡurutmak akikmakaint?

<sup>38</sup> Antuktaram. Yamaiya aents Yúsan nakitiar ajapawaru yajauch ainia nu ímiainiamunam shuar Winia natsantrakuṅkia tura winia chichampruncha natsantakuṅkia, wi, Aents Ajasuitjiana ju, winia Aparu kakarmarḡjḡjḡ tura nayaimpinmaya peṅker suntarjḡ atak taakun, nú shuaran natsantrattajai Wisha.’ Tu tímiayi Jesus.

## 9

<sup>1</sup> Ataksha Jesus nin chicharuk, ‘Nekas tájarme, shuar játsuk Yus ni kakarmarḡjḡjḡ aentsu enentáḡn akupkattana nú tsawantan wáinkiatatna nu juḡ iijḡjḡ pujuiniawai’ tímiayi.

*Jesus nusháa iira ajasmiania nu  
(Mateu 17.1-13; Rúkas 9.28-36)*

<sup>2</sup> Nuyá sais tsawant naṅkaasmatai, Jesus Pítruncha, Jakupuncha, Juáṅnasha uunt náinnium júkiarmiayi. Nuḡsha Jesus nushá iira ajasmiai.

<sup>3</sup> Ni pushirḡsha ti puju jútsumur ajattsarmiai. Nujḡ métek puju awajsatin ju nuṅkanam atsawai.

<sup>4</sup> Túruna nuḡ Erías, Muisaisjḡ wantinkiar Jesusjḡ chichainian wáinkiarmai.

<sup>5</sup> Nuyasha Pítiur Jesusan chicharuk “Uuntá, ii juḡ pujustin ti peṅkeraiti. Menaintiú áakmaktai, Áminiu chikichik, Muisaisna chikichik, Eríasnasha chikichik” tímiayi.

<sup>6</sup> Jesusa unuiniamurḡ sapijmainiak, Pítiur wariniak titi nekaachmai.

<sup>7</sup> Tura yuraṅkim tara mikintiu awajsamai. Yuraṅminmaya chichaak “Júiti winia aneamu Uchir. Nii anturkatarum” tímiayi.

8 Nuyanka ni unuiniamuri ayantmar iiyaj tukamar aya Jesusnak wáinkiarמיayi. Chíkichkia atsuarmiayi.

9 Nuyá náinniumiá akainiak Jesus nin chicharuk “Wáinkiarumna nu et-serkairap. Wi, Aents Ajasuitjiana ju jakamunmayá nantaatsain nu et-serkairap” tímiayi.

10 Tutai ni tímian ímiatrusan úukarmiayi. Tura “jakamunmayá nantaatsain tana nu, ¿wariniak ta?” nuamtak tunainiarmiayi.

11 Tura Jesusan aniasarmiayi “¿Urukamtai Israerti ii jintinniurisha, Eriás emka tátiniaiti, tuinia?” tiarmiayi.

12 Tutai Jesus tímiayi “Nekas Eriás ashí iwiarattsa emka tátiniaiti. ¿Tura Aents Ajasunun Yus-Papinium warintuua?

“Ti wáitsattawai; Nin nakitrartatui.” Tu áarmaiti.

13 Wi tájarme, Eriás nekas táwiti. Támatái, shuar ashí ni wakeriarmia nuna nin túrawarmiayi. Yusa Papirijn Eriasa túrunatniuri aarma amia tímiatrusan túrawarmiayi” tímiayi Jesus.

### *Jesus iwianchin jiki akupkamiania nu*

*(Mateu 17.14-21; Rúkas 9.37-43)*

14 Tura ni unuiniamuri matsatmanum atak wáketuk, ti untsuri aents káutkar Israer-shuara jintinniurisha níjjai tunai pujuinian wáinkiamiayi.

15 Tura aencha, Jesusan wáinkiar warainiak, tsékeñki weriar, áujarmiayi.

16 Túrunawarmatai, Jesus chicharainiak, “Warí tunaiyarum?” tímiayi.

17 Tutai chikichik ayak “Uuntá, winia uchirun Ámin itiarjame. Iwianchruku asa chichachuiti.

18 Túmakui iwianch enkemtakun paat ajar áepeawai; túram uchisha saun kaput apak najn kátetete awajeawai. Túram kakaakcha ame unuiniamurmin seamjai, jírútkti tusan, túrasha tujinrutkarai” tímiayi.

19 Tutai Jesus tímiayi “Yúsan enentáimtichutirmea urutmá tsawantak pujustaj atumjai. Urutmá katsuntrataj! Uchi itiatarum” tímiayi.

20 Takuí uchin Jesusan itiararmiayi. Tura iwianch uchin enkemta Jesusan wáiniak uchin ajakramiayi. Uchisha chichiptur nunká iniaan péper-péper ajakin wenunam saun apakmiayi.

21 Túrunamtaí Jesus ni aparjn aniasmiayi “¿Urutá yaunchu áinkiait?”

Tutai ni aparj tímiayi “Úchichik áinkiaiti.

22 Tuma asa tuke jutikiú pujurniuiti; jiniumsha apeawai, entsá maataj tusa ajuaawai. Yaintrukminiaitkiunka waitneasam yaintrukta” tímiayi.

23 Tutai Jesus chicharuk “¿Urukamtai, yaintrukminiaitkiunka, tame? Nekaata, shuar Winia nekas enentáimturna nu ashí túramniaiti” tímiayi.

24 Tutai uchi aparj kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

25 Tura shuar untsuri káunainian Jesus wáiniak kakantuk “Empeku chichachu awajin iwianchi jíinkitia, tájame. Jíinkim ataksha wayawaipia” tímiayi.

26 Tura iwianch jíiniuk untsamak uchin we-werkasa ajakar chichichiptu áepkimiayi. Túram uchi jaka ímianis tepemiayi. Túrunamtaí untsuri shuar “jakayi” tiarmiayi.

27 Támanak Jesus uwejen achik awajkimiai, tura uchi nantaki wajakmiayi.

28 Tura Jesus jeá wayamtaí, níñki pujusar, ni unuiniamuri aniasar “¿Urukamtai iisha jíiktin tujinkiamaj?” tiarmiayi.

29 Tutai Jesus tímiayi “Ju iwianchkia ijarmar Yus áujkur jíinkiniaiti” tímiayi.



*Jesus ataksha ni jákatniurin ujakmiania nu**(Mateu 17.22-23; Rúkas 9.43-45)*

<sup>30</sup> Nuyá jínkiar Kariréa nunkanmaani nankaamakarmiayi. Ni unuiniamurin unuinia asa nu nankaamamun nekaawarain tusa Jesus nakitmiayi.

<sup>31</sup> Unuiniaak juna tímiayi: “Wi Aents Ajasuitiaj juna mantamnatí tusar achirkar surutkartatui. Tura máamuitiatnak, iwiarsamunmayan menaintiú tsawantaj nantaktiatjai” tímiayi.

<sup>32</sup> Tura nu chichaman nekaacharmiayi. Nékainiachiat, anintrustinian arantukarmiayi.

*“¿Yaki imiá nankaamantuit?”**(Mateu 18.1-5; Rúkas 9.46-48)*

<sup>33</sup> Nuyá Kapernáum péprunam jeawarmiayi. Tura Jesus jeá pujus ni unuiniamurin aniniak, “¿Atumsha jintiá winisrum warí áujmatmiarum?” tímiayi.

<sup>34</sup> Tura natsarar pachischarmiayi. Kame jintiá wésar “iijjai ¿yaki imiá nankaamantu ajasat?” tunainiarmiayi.

<sup>35</sup> Ni unuiniamurj pachischarmatai, Jesus pujus ashí tuse unuiniamurj irur chichaak “Shuar nekas nankaamantu ajastajtsa wakerakka, pee-  
jchachia nuke enentáimtumar shuara yáintrí atí” tímiayi.

<sup>36</sup> Tura uchin itiáa miniakas chichaak:

<sup>37</sup> “Shuar uchin winia naaruj shiir awajeakka Winia shiir awajtai. Tura Winia akuptukua nunasha shiir awajeawai” tímiayi.

*“Shuar in nakitramachkunka in páchitkiawai”**(Rúkas 9.49-50; Mateu 10.42)*

<sup>38</sup> Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura iijjai írutkachu asamtai nu túratin suritki-  
amji” tímiayi.

<sup>39</sup> Tutai Jesus tímiayi “Antsu suritkiarap. Shuar winia náarun pachis tujinkiamun túrakka, nu shuar wari tsanumprutatniun tujinkiattawai.

<sup>40</sup> Shuar in nakitramachkunka, in páchitkiawai, tímiayi.

<sup>41</sup> Winia nemarka asakrumin shuar yumiichinkesha ajampramkuka ántar túratsui; akikma átatui’ tímiayi.

*(Mateu 18.6-9; Rúkas 17.1-2)*

<sup>42</sup> Tura shuar ju uchin Winia umirtuinia nuna yajauchin túrumtikiamtáinkia, ti asutniattawai. Tuma asamtai uchin yajauchin túrumtiktsain kuntujen kayajai jínkiar nayaantsanam ajunmaka maak ainti.

<sup>43</sup> Ame uwejmek yajauchin túrumtikramamniaitkuinkia tsupikta. Mai uwe-  
jtuk wáitsatniunam jeatniujainkia chikichík uwejjai ju nunkanam pujusar  
tuke iwiaaku pujustinnium jeatin ti shiiraiti. Warí, wáitsatniunmanka ji  
kajinkiashtin awai,

<sup>44</sup> jákaru akarisha jáiniatsui tura jisha tuke kapaawai.

<sup>45</sup> Nawemsha yajauchin túrumtikramamniaitkuinkia nusha tsupikta. Mai  
nawentuk wáitsatniunam jeatniujainkia chikichík nawejai ju nunkanam pu-  
jusar tuke iwiaaku pujustinnium jeatin ti shiiraiti. Wáitsatniunmanka ji  
kajinkiashtin awai,

<sup>46</sup> jákaru akarisha jáiniatsui tura jisha tuke kapaawai.

<sup>47</sup> Jimisha yajauchin túrumtikramamniaitkuinkia ukuinkiata. Mai jiiintiuk  
wáitsatniunam jeatniujainkia chikichík jijijai ju nunkanam pujusar Yus aku-  
peana nu jiatin ti shiiraiti;

48 wáitsatniunman̄ka jákaru akar̄sha jáiniatsui tura jisha tuke kapaḡawai.

49 Naman̄ Yus susamu weaktina áintsan̄ aentstirmesha jij̄j̄ai nekapnastarume.

50 Weesha ti pen̄keraitiat michumarka, ζitiurak jea-jeat átink'? Wats, wee jeakua áintsarmek atumek shiir enentáimtunaistarum" tímiayi Jesus.

## 10

### *Nuwḡ ajapatniun Jesus áujmatsamiania nu*

*(Mateu 19.1-12; Rúkas 16.18)*

1 Jesus Kapernáumnumiḡ jiinki, Jutiá nunkanam nan̄kaamaki, Jurtaḡ entsa amain̄ jeamiayi. Nuḡ pujaḡ, aents ataksha Nin irunturarmiyai. Iruntrarmatai tuke túrin̄ asa ataksha unuiniamiayi.

2 Tura Pariséu Jesusan nekapsatai tusar wakeruiniak, Nin chicharainiak "ζÁishman̄ ni nuar̄i ajapatin̄ tsan̄kamkamukait?" tiarmiayi.

3 Tutai Jesus tímiayi "ζMuisais wariniak timia?"

4 Tutai "Pap̄j̄iḡ in̄ ajapatniun tsan̄katramkamiaji" tiarmiayi.

5 Tutai Jesus tímiayi "Atum̄i enent̄ai kátsuram asamtai nu chichaman̄ atumin̄ tsan̄katramkamiarme.

6 Tura Yus yámankamtaik ashí najanamia nuḡ, áishman̄nasha nuwḡncha najanamiyai.

7 Tuma asamtai áishman̄ ni apar̄in̄cha nukur̄in̄cha kanaki ikiuki, ni nuar̄ij̄ai tsan̄intiniaiti.

8 War̄i, áishman̄ nuar̄ij̄iḡ j̄imiaraitiat chikichik ajasartatui. Tuma asamtai yamá j̄imiarhaiti, antsu chikichik ajasuiti.

9 Tuma asa, Yus atsan̄kiania nuna, aents akankashtiniaiti" tímiayi.

10 Tura urum̄ jeá wayḡwar, Jesusa unuiniamur̄i nu chichaman̄ ataksha aniasarmiyai.

11 Tuiniakui Jesus tímiayi "Shuar ni nuar̄in̄ ajapa ikiuak chikichan̄ nuátkan̄ka, emka nuar̄in̄ yajauch awajas, ikiuak, tsanirmayi.

12 Nuwḡsha ni áishrī ajapa ikiuak, chikichj̄ai niiniurtukka, niisha tsanirmayi" tímiayi.

### *Jesus uchin̄ shiir awajsamiania nu*

*(Mateu 19.13-15; Rúkas 18.15-17)*

13 Ant̄in̄kiarat tusar uchin̄ Jesusan̄ itiararmiyai. Túruiniakui Jesusa unuiniamur̄i "it̄iairap" tiarmiayi.

14 Tura Jesus nuna wáiniak, kajek̄ juna tímiayi "Uchi Winí winitin̄ tsan̄katruktarum. Suritkiairap. Iis, shuar̄ jū uchia núnisan̄ peejchach enentáimtumainia nu Yusa akupeamur̄in̄ pachiinkiamniaiti.

15 Nun̄i asamtai tájarne, uchi umiana núnisan̄ Yusa akupkamur̄in̄ shuar̄ umíachkuḡka nuna pachiinkiachminiaiti.

16 Nuyá uchin̄ miniakas, "Yus yáinmakarti" tímiayi.

### *Kútrintin̄ Jesusan̄ áujsamiania nu*

*(Mateu 19.16-30; Rúkas 18.18-30)*

17 Ukunam, Jesus nuyá weaḡ, shuar̄ tseke Nin tarimiayi. Tar̄i tikishmatar chicharuk "ζUunt̄a, Amesha ti pen̄keraitme. Tuma asam, turuttia, ζwarinia túrakna tuke iwiaaku átataj?" tímiayi.

18 Tutai Jesus tímiayi, "ζUrukamtai Winia, pen̄keraitme, túrutam? Shuarka chikichkisha pen̄kerka atsawai. Aya Yúsak pen̄keraiti.

19 Yus akupkamu nékatsmek. Ju áiniawai: tsanirmawairap, maṅkartuawairap, kasamkairap, chíkich shuar tsanumprurairap, anaṅkartuawairap, apasha nukusha umirkatarum. Nu áiniawai” tímiayi.

20 Tutai kuítrintin chichaak “Uunta, núnaka úchichik mash umiki tsakaruit-jai” tímiayi.

21 Tutai Jesus iis waitnenmai tímiayi “Chíkichik táasume. Weme ashí áiniu ana nu surukta. Túram nu kuit kuítríncha susarta. Túrakum nayaimpiniam kuítrum ikiaunṅattme. Túram winitia, krus yanaktinia áintsamek itiuurcha-trum aṅ nemartusta” tímiayi.

22 Tura kuítrintin nu chichaman antuk, wake mesek, kúntuts enentáimiar wémiayi, ti kuítrintin asa.

23 Nii wématai, Jesus ashí ni téntakmarin iis, ni unuiniamurin chicharuk, “Kuítrintin ainia nu Yusa akupeamurin pachiinkiatin ti itiuurchaiti” tímiayi.

24 Takui ni unuiniamurj nuna antukar niisháa enentáimprarmiyai. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurin pachiinkiatin penké itiuurchataiti.

25 Uunt kamiri uja jin wayatin ana nú nanṅkaamas, kuítrintin Yusa akupeamurin pachiinkiatin itiuurchataiti” tímiayi.

26 Nuna antukar nú arant niisháa enentáimprarmiyai. “¿Nuiṅkia yaki uwem-pramniait?” tunaiyarmiyai.

27 Tura Jesus nin iisar chichainiak “Aents niṅki túrachminiaiti, antsu Yus túramniaiti. Yuska ashí túramniaiti” tímiayi.

28 Nuyá Pítiur Nin chicharuk “Iis, iikia ashí ikiukir némartujuk” tímiayi.

29 Tutai Jesussha tímiayi, “Nekas tájarme, shuar Winia nemartak Yus-Chichamnasha ipiampartasa wakerak ni jeencha, yachincha, umajincha, aparincha, nukurincha, nuarincha, uchirincha, nunṅencha uyumatsuk ikiaṅka,

30 nu shuar ju nunṅanam sian patatnas jeencha, yachincha, umajincha, nukurincha, uchirincha, nunṅencha, ju nunṅanam wáitiatatui. Tura ukunam, nunṅa amuukamtai, nu shuarsha jáchatainiam tuke penker pujustatui.

31 Tura untsurj shuar yamá penkerj ainia nu, ukunam ukunmaanj pujusartatui, tura líksanj untsurj shuar yamá ukunmayá ainia nu, ukunam eem pujusartatui” tímiayi Jesus.

### *Jesus ni jákatniurj ataksha ujakmiania nu*

*(Mateu 20.17-19; Rúkas 18.31-34)*

32 Nuyá arak Jerusarénum wéanak, jintiak wearmiyai. Jesuska émak wémiayi. Ni unuiniamurjsha niisháa enentáimprarmiyai. Ashamainiyatan Jesusan nemarsarmiyai. Túmainiaj atak ni nekas unuiniamurin akankiar, ni túrunatniurj ujakmiayi.

33 Ujaak tímiayi “Antuktarum, arak Jerusarénum wéaji. Nui Winia, Aents Ajasuitjiana juna, Patrj uuntrincha, jintinniumasha surutkartatui. Niisha apachnium mantamnatu tusar surutkartatui.

34 Nusha Winia wishikrurar, katsumprukar, usukruawar mantuawarta-tui. Túramaitiatnak menaintiú tsawantaj nantaktiatjai” tímiayi.

### *Jakupu Juanjai seawarmiania nu*

*(Mateu 20.20-28)*

35 Sepetéu uchirj Jakupusha Juansha Jesusan taruntarmiyai. Taruntar “Uuntá, ii seattajnia nu túrak tusar wakeraji” tiarmiyai.

36 Tutai Jesus tímiayi “¿Warí itiuurtukat tusam wakerutam?”

37 Tutai “Ame nupetmaktin tsawantrum jeamtai, iisha Ámijíai pujustaisar wakeraji, wi untsuurumini, winia yatsursha menaarmini. Nu tsankatrukta” tíarmiayi.

38 Tura Jesus tímiayi “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

39 Niisha tiarmiayi, “Túramniaitji, páchitskea.”

Tuñiakui Jesus tímiayi “Wats, Wi umartatjana nu umartatrume, tura Wi imiantiatjana núnisrumek imiantiatrume.

40 Túrasha winia untsuuruini, menaruinsha átum pujustinian Wikia súsashtiniaitjarne, antsu Yus wakerana nu nuin apujsattawai” tímiayi.

41 Tura chíkich tias unuiniamurí nuna anturkar Jakupuncha, Juágnasha ti kajerarmiayi.

42 Tura Jesus ni unuiniamurin irur tímiayi “Ju nékarme; Yus-shuarchanum akupniuitjai tuinia nu, waantu enentáimtumas, ni shuarin ti akupeawai; tura uunt ainia nusha ashí shuar ti takamtikiainiawai.

43 Antsu atumjai núnisañ atsumniuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastiniaitrum.

44 Shuar atumí penkerí ajastajtsa wakerakka, takarniua nuke ajas, umir-tamkatí.

45 Wisha, Aents Ajasuitjiana ju, shuar takartusarat tusan táchamjai, antsu ashí shuaran yáintaj tusan táwitjai. Wisha jarukan shuaran uwentikratajtsan táwitjai” tímiayi.

*Jesus Partimiásan tsuármiania nu  
(Mateu 20.29-34; Rúkas 18.35-43)*

46 Jesus ni unuiniamurijíai, tura chíkich untsurí aentsjai Jirikiú péprunam jeawarmiayi. Nuyá Jirikiúnmayasha jínkjar weenaj, Timiasa uchirí Partimiás, kusuru amia nu, jintiá yantam kuítian seamu pujumiayi.

47 Niisha, Nasarénumia Jesusaiti táman antuk, untsumuk “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnentrurta” tímiayi.

48 Tura untsurí nuí matsamarmia nu nin chicharainiak “Takamatsata” tiarmiayi.

Niisha nú nankaamas untsummiayi “Tawit weeá Jesusá, winia waitnentrurta.”

49 Nuna antuk Jesus wajatas, chichaak “Untsuktarum” tímiayi.

Takui shuar kusurun untsuuniak “Kakaram ajasta. Wajaktia; untsur-mawai” tiarmiayi.

50 Tuuniakui niisha esekmatairin ajapa ikiuak wajaki Jesusan tseke tarimiyai.

51 Tura Jesus nin chicharuk “¿Winia itiuurtukat tusamea wakerutam?” tímiayi.

Tutai kusuru chicharuk “Uunta, ímtiasan wakerajai” tímiayi.

52 Tutai Jesus chichaak “Shiir wetá. Winia nekas enentáimtura asam péñker ajasume” tímiayi. Tura nu chichamaik ímpramiayi. Tura Jesusan nemarki wémiayi.

## 11

*Jesus Jerusarénnu wayamiania nu*  
(Mateu 21.1-11; Rúkas 19.28-40; Juan 12.12-19)

<sup>1</sup> Wésar Jerusarénnu tura Petpajái péprusha Petania péprusha Uriwiu naint ínkiuasmak ámanum jeawar, Jesus jimiará unuiniamurin ujuikimiayi.

<sup>2</sup> Ujuiak timiayi “Aatuniní pépruchiniam werum nuin umpuuru uchich jin\_kiamu wáinkiatarme. Nu umpuuruka tuke entsamprukchamuiti. Nu atiarum utitiarum.

<sup>3</sup> Tura “¿Urukamtia áitkiarum?” turamainiakuissha, “ii Uuntri wakerawai” titiarum” timiayi.

<sup>4</sup> Tutai wearmiayi. Tura umpuurun wáitiniam aani jin\_kiamun, jintiá yantannum wajan wáinkiar atiawarmiayi.

<sup>5</sup> Nui pujuarmia nu “¿Warí áitkiarum. Urukamtai umpuuru atiarum?” tiarmiayi.

<sup>6</sup> Takui, niisha Jesus timia nu ujakam suritkiacharmiayi.

<sup>7</sup> Tura umpuurun Jesusan itiarar pushirin umpuurunam awantkarmiayi. Túram Jesus entsamkamiayi.

<sup>8</sup> Tura untsurí shuarsha pushirin jintianam ayapar áinkiarimiayi. Chíkichcha jintiá yantannumiān nukan juuk jintianam áintrarmiayi.

<sup>9</sup> Eem wearmia nusha, uku winiarmia nusha warainiak “Jusanna” untsumkarmiayi. “Yusa náarín winiana nu imiá pé\_keraiti.

<sup>10</sup> Ii uuntri Tawitia akupeamuri tátatna nu imiá penker atí. Ii Yusri naari shiir ati.” Tu untsumki wearmiayi.

<sup>11</sup> Tura Jesus Jerusarénnu jeamiayi. Jeá, Yusa Uunt Jeen wayamiayi. Tura ashí iyyasua amik, kintiampraj tusa ni tuse unuiniamurijjai tíjuch Petania péprunam wearmiayi.

*Jesus iikiu numin yuminkramiania nu*  
(Mateu 21.18-19)

<sup>12</sup> Kashin tsawar, Petanianmaya jintia wesa, Jesus tsukammiayi.

<sup>13</sup> Tura arant wajan iikiu numirin núkenniun wániak, nereatsuash tusa iyumiayi. Tura nereshtairin asamtai neren penké wáinkiachmiayi.

<sup>14</sup> Nuyá iikiu numin yuminkkeak: “Ame nerem penké yunaashti” tímiayi. Ni unuiniamurisha nuna táman antukarmiayi.

*Yusa Uunt Jeen suruktinian Jesus suritkiamiania nu*  
(Mateu 21.12-17; Rúkas 19.45-48; Juan 2.13-22)

<sup>15</sup> Nuyá atak Jerusarénnu jeawarmiayi. Nui Jesus Yusa Uunt Jeen wayá suruktai tusar pujuarmia nuna jiki akupkatasa nan\_kammiayi. Kuítian yapajin armia nuna misarin tura yampitsan súrin armia nuna kutan\_krincha ayanturmiayi.

<sup>16</sup> Tura káarak entsaki Yusa Uunt Jeen nan\_kamaktinian suritkiarmiayi.

<sup>17</sup> Nuyá “Yus áujasatai tusar ashí shuar Yusa jeen wayamnia átatui” tú aarchamukait Yusa Papirjin. Antsu átumka Yusa jeé kasa matsamtaiya nútikiarme” tímiayi.

<sup>18</sup> Aents nui matsamarmia nu Jesusa chichamen antukar ti enentáimprarmiayi. Tuma asamtai Israer-patri úntrisha, Israer-shuara jintinniurisha, nuna nekaawar, Jesusan ashamainiak mantamnati tusar chichaman jurusarmiayi.

<sup>19</sup> Nuyá kiakui Jesus Jerusarénnumiā jin\_kimiayi.

*Iikiu numin káarun wáinkiarmania nu  
(Mateu 21.20-22)*

<sup>20</sup> Kashin káshik nan̄kaamainiak iikiu numin kan̄kaptuk jaka wajan wáinkiarmaiya.

<sup>21</sup> Tura Pítiur enentáimias Jesusan tímiayi “Uunta, iista, iikiu Ame yu-min̄kramam nu kan̄kaptuk káarchaik.”

<sup>22</sup> Tutai Jesus tímiayi “Yus nekas enentáimtustarum.

<sup>23</sup> Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar, ju náintian “jiinki nayaantsanam iniánti” tákuin̄kia, páchitsuk inian̄tatui, tímiayi.

<sup>24</sup> Tuma asamtai tájarme, ashí Yus áujukram searmena nuna suramsat-tarme. “Wi seajna nuna yamá takakjai” tu enentáimkiurmeka, wáinkíattarme.

<sup>25</sup> Tura Yus áujukram pujarmena nu, kajernaiyamuram ákuin̄kia tsan̄kurnáiratarum. Atumí Aparí nayaimpiniam pujana nu atumí tunaar̄in tsan̄kurturti tusarum túratarum.

<sup>26</sup> Atumsha tsan̄kurnáiyachkurminkia, núnisan̄ atumí Aparí nayaimpiniam pujana nu atumí tunaar̄in tsan̄kurtámprashtratume” tímiayi Jesus.

*Yusa kakarmarjijai Jesus takasmiania nu  
(Mateu 21.23-27; Rúkas 20.1-8)*

<sup>27</sup> Ataksha Jerusarénum waketkiarmaiya. Jesus Yusa Uunt Jeen wekai, Israer-patr̄i úuntrīsha, Israer-shuara jintinniur̄isha, Israer-shuara iruntai-jēe úuntrīsha Nin káutkarmiaiya.

<sup>28</sup> Káutkar Jesusan tiarmaiya “¿Yana kakarmarjijai ju túram. Ame túramna nuna ya tsan̄katrama?” tiarmaiya.

<sup>29</sup> Tuiniakui Jesus tímiayi, “Chikichkiniak aniastatjarme. Áirkatarum. Túrakrumn̄inkia Wisha winia takastinian tsan̄katrukmiã nuna ujaktatjarme.

<sup>30</sup> Wats, turutiarum, ¿ya Juan̄ imiaitniun tsan̄katkama? ¿Shuar tsan̄katkamka? ¿Yus tsan̄katkamka? Áirkatarum” tímiayi.

<sup>31</sup> Tura niisha enentáimprar “Yus akupkaiti” tákurninkia, “¿urukamtia umirkachuram?” turamchattajik.

<sup>32</sup> Antsu “shuar tsan̄katkaiti” tákurkia, ashí shuar ashamaji” tunainiarmaiya. Ashí aents Juan̄ nekas Yúsnan etserniuiti, tu enentáimainiakui ashammi-armiaiya.

<sup>33</sup> Nuyá Jesusan tiarmaiya “Iikia nékatsji.”

Tutai Jesus tímiayi “Wisha núnisnak yana kakarmarjijai takaaj nuna ujakchattajrume.”

## 12

*Yajauch takau armia nu  
(Mateu 21.33-46; Rúkas 20.9-19)*

<sup>1</sup> Jesus ju métek-taku chichaman unuiniamaia: “Shuar uwa ajan ajam wenuimiai. Nuyá uwa nekeetain najanamai. Tura kumpin jēan najanamai. Najana takartusti tusa shuáran ikiuak niñkia jeachat wémai.

<sup>2</sup> Neretai tsawant jeamtai, ni takarniur̄in júukman akankat tusa akupka-mai.

<sup>3</sup> Tura ajanam takau arma nu, nu takarniun achik, katsumkar, áyatik awain̄kiarmai.

<sup>4</sup> Ataksha chíkich takarniun akupkamai, tura nunasha kayajai tukurar, múuknum katsumkar, katsekar awain̄kiarmai.

5 Tuma aín ataksha chíkichan akupkamai, tura nunasha máawarmai. Ti untsurín akupramai. Chikichnasha katsumkarmai, chikichan máawarmai.

6 Tura níijjaj chikichik tuke ámiayi, nuka ni aneamu uchirí. Nu uchincha ukunam akupkamai. Akupeak “Winia uchirnaka shiir awajarsartatui” tímiai.

7 Tura ni uchirí winian wáinkiar, takau shuar nuámtak chichainiak “Juka ajá nérenniu uchirínti. Wátsek, maatai; túramka ájaka iiniu átatui” tiarmai.

8 Túsar achikiar máawarmai. Ayashincha ajanmaya ajapawarmai” tímiayi.

9 Tura nuyá aniasmiayi, “¿Wats, warí enentáimsarum; ajá nérenniuri itiurkat-tawa? Jeashtanmayá taa, ajá takainia nú shuaran amuktatui. Ni ajaríncha chikichan ikiastatui.

10 Ju, Yus-Papinium aarma ana nu áujtsachukaitrum:

Kaya péñkernak, jeammin “yajauchiiti” tusar ajapawarmia nu ashí kayajaj nankaamas péñker apujsamuiti.

11 Nusha Yus túramuiti. Iisha íisar ti enentáimtaji. Nuke áarmaiti” tímiayi.

12 Tura nú metek-taku chichamjaj nin áujmatma asa achiktai tusar chichaman jurusarmiayi. Túmainiyat shuáran ashamainiak Jesusan ikiiniak wearmiayi.

*Uunt akupin súsatin tura Yus súsatin  
(Mateu 22.15-22; Rúkas 20.20-26)*

13 Tura wear, imiaamtikiar yajá chichakmatai nújaj yajauch títai tusar Pariséu shuarnasha, Erutisa nesarín shuarnasha akatar Jesusan akup-tukarmiayi.

14 Túram Nin jeariar chicharainiak: “Uuntá, aents nakitiainiajn tuke nekas chicham páchitsuk chichaame, nu nékaji. Aents pátatek iiyatsme, antsu nekas Yusa jintí unuiniame. ¿Waritia enentáimiam, ii kuitrj uunt Sesar súsatin péñkerkait. Susattajik. Suritkiattajik? Nu nekaatai tusar wakeraji” tiarmiayi.

15 Tura Jesus ni yajauch enentáimmarín nekara “¿Urukamtai Winia yajauch titi tusarum wakerutarum? Kuit itiatarum, Wi ístaj” tímiayi.

16 Tutai kuítian itiararmiayi.

Jesus nuna iis tímiayi, “¿Jujsha yana yapí tura yana naarí áarmait?” tímiayi.

Tutai “Uunt Sésarna” tiarmiayi.

17 Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamurín antukar ti enentáimprarmiayi.

*Aents nantaktinian Satuséu anintrusarmiania nu  
(Mateu 22.23-33; Rúkas 20.27-40)*

18 Nuísha Satuséu aents, jakamunmaya nantaktin penké atsawai tiniu armia nu, Jesusan tariarmiayi. Taar Jesusan chicharainiak:

19 “Uuntá, Muisais juna áatrampramijai:

“Áishman ni nuarj júreatsain jakamtainkia, yachin yajutmatratsa, ni yachj nu wajen nuátkatniuiti.”

20 Wats, siati yachi ármiai. Iwaiirj nuwan nuatak yajutmatsuk jakamiayi.

21 Ni yachj wajen akinkiamiayi. Nusha núnisañ yajutmatsuk jakamiayi. Nuna yachjsha núnisañ tura nuna yachjsha núnisañ túramiai.

22 Tura ashí siati patainman, patainman nu nuwan nuátkarmiayi. Yajut-matsuk, yajutmatsuk jíiniawarmiayi. Tura ukunam nuwasha jakamiayi.

23 Nuin̄kia nantaktin tsawantaj, nantakiarmatai, ¿yana nuar̄in̄ ati? Ashí siati nuátkacharmaka” tiarmiayi.

24 Tutai Jesus tímiayi “Jakamunmaya nantaktin atsawai” tátsurmek. Yusa chichame tura Yusa kakarmarī nékachu asarum awajiarne, tímiayi.

25 Tímiatarum, aents jakamunmaya nantakiarmatai, nuatnaikiatin atsutawai, antsu nayaimpinmaya suntara núnisarañ pujusartatui.

26 Tura jakamunmaya nantaktiniapitia tusarum nu nekaatin nekas wak-erakrumka Muisais aarmia nu enentáimtustarum. Yuska numichinmaya Muisaisan chicharuk “Wikia Apraáma Isaaka tura Jakupu Yúsriñtjai” Yus tímiayi.

27 Yaunchu jákaru ain, Yus nuna taku, ayashnium jakayat iwiaaku pujuinia nuna Yusr̄in̄tjai, tawai. Nekas jaka ainia nuna Yusr̄inchuiti. Nantaktin atsawai tau asarum awajirurme” tímiayi Jesus.

*Yus akupkamu imiá péñker ainia nu  
(Mateu 22.34-40)*

28 Jesussha Satuséusha áujmatnainian Israer-shuara jintinniur̄i taa anturkamiayi. Anturak, Jesus ti peñker áimkiui, niisha Jesusan juna aniasmiayi: “¿Yus akupkamu tuá imiá péñkerait?” tímiayi.

29 Tutai Jesus tímiayi “Júiti Yus akupkamu imiá péñker: Antukta Israer shuará. Ii Yusr̄i úuntaiti, tura Niñki nekas Yúsaiti.

30 Tuma asamtai, tuke enentáimjaj̄i ti enentáimsam Uunt Yus aneeta. Túram ame iwiaakmarmesha, kakarmarmesha Yus íktusta. Núiti nekas péñker akupkamu, tímiayi.

31 Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chikich nu nan̄kaamas péñker akupkamu atsawai’ tímiayi.

32 Tutai jintintin tímiayi “Ee, péñkeraiti, Uunta. Nékasmeke tame. Chikichík Yus awai, chikichkia atsawai.

33 Tura tuke enentáijij̄i ti enentáimsar, ii kakarmarīsha Yus íktusar Nin aneakrikia, ii ayash̄i aneajnia núnik ii írutramur̄isha aneatniuitji. Nusha ashí Yus sutai ana nujaj̄i nan̄kaamas péñkeraiti’ tímiayi.

34 Nuna tiniu asamtai Jesus ni péñker áimkian nekáa “Ameja Yus akupea-munam pachiinkiatin ishichik táasume” tímiayi. Tura nuyá chikich shuar Jesusan aniastinian arantukarmiayi.

*Kristu tutai ¿yana uchir̄impait?  
(Mateu 22.41-46; Rúkas 20.41-44)*

35 Jesus Yusa Uunt J̄eñ unuiniak pujumiayi. Tura chichaak “¿Urukamtai ii jintinniur̄i “Yus anaikiamu Krístun Tawitia shuari” tuinia?”

36 Tawit, antsu, Yusa Wakaní aarta tutai, Yus-Papinium juna áarmiayi: Uunt winia Úunrun tímiayi “Ame nemasrumin nupetkatin amuats̄in̄ winia untsuuruin̄in̄i pujusta”.

37 Kame Tawitkia, Krístun áujmatuk, “winia Uuntru” taisha, ¿itiura ní shuar̄isha átin̄k’?” tímiayi Jesus. Tuma asamtai untsur̄i shuar nūi mat-samarmia nu ti shiir antukarmiayi.

*“Israer-shuarañ jintintin ainia nújaj̄i aneartarum” Jesus tímiania nu  
(Mateu 23.1-36; Rúkas 11.37-54; 20.45-47)*



<sup>38</sup> Jesus unuuniak tímiayi, “Israer-shuara jintinniurí ainia nujai aneartarum. Niisha waantu enentáimtumasar, esaram pushin entsarar wekasatjatsar wakeruiniawai. Péprunmasha shuar shiir áujtusarat tusa wakeruiniawai.

<sup>39</sup> Israer-shuar iruntainiam penkerí pujutainium pujustinian wakeruiniawai. Nampernumsha penkerí pujutainium pujustinniasha wakeruiniawai.

<sup>40</sup> Tura waje jeencha atantainiawai. Túrawar aents nekaracharat tusar ti esaram chichamjai Yúsán áujainiawai. Nincha chikichjai nankaamas Yus asutiawartatui” tímiayi.

### *Waje kuítrín susamiania nu*

*(Rúkas 21.1-4)*

<sup>41</sup> Jesus Yusa Uunt Jeen kuit enketainiam naka pujus áents kuítrín chumpian wáinkiamiayi. Untsurí kuítrintin núkap enkeawarmiai.

<sup>42</sup> Nuyá waje kuítrincha taa jimiará uchich kuítian, reara áantsan, enkeamiayi.

<sup>43</sup> Jesuska unuuniamurín untsuk “Nekas tájarme, ju waje kuítrinchoitiat, ashí enkeena nú nankaamas núkap enkeayi.

<sup>44</sup> Iis, kuítrinniusha nii ampirma nuna enkeenawai, tura antsu ju nuwá kuítrinchoitiat, ampirmatsuk ni yurumatniurín takurmakman ashí enkeayi” tímiayi.

## 13

### *Yusa Uunt Jeen yumpuntratniun Jesus ujakmiania nu*

*(Mateu 24.1-2; Rúkas 21.5-6)*

<sup>1</sup> Yusa Uunt Jeeniá Jesus jiinkimtai, unuuniamurí Nin tímiayi “Iisia, Uunta, kayasha ti shiir áiniawai. Jeasha imiá úuntchakait.”

<sup>2</sup> Tutai Jesus tímiayi “Ju imiá uunt jea wáinmek. Kaya ekentramu au ashí mash yumpuntrartatui” tímiayi.

### *Amuukatin tsawantin uruku átatna nu*

*(Mateu 24.3-28; Rúkas 21.7-24; 17.22-24)*

<sup>3</sup> Nuyá Uriwiu náinnium wakar, Yusa Uunt Jee naka pujusar, Pítrusha, Jakupusha, Juansha, Antressha, nínkimias Jesusan aniiniak

<sup>4</sup> “Uuntá, tímiam nu, jurutiá túrunatta. Nu túrunatin jeakuisha itiura nekaat-tajia? Paant ujatmakta” tiarmiayi.

<sup>5</sup> Tutai Jesus tímiayi “Aneartarum, anañkramawairap.

<sup>6</sup> Nekaatarum, untsurí winia naarun pachisar winiartatui. Chíkich chíkich “Wiítjai Kristu” taku, untsurín anañkawartatui.

<sup>7</sup> Tura meset chicham ántakrumka, yajaya meset chicham ántakrumsha sapijmiakairap. Nekas túrunashtinkiait. Nujáisha amuukatin tsawantka tuke jeatsui, tímiayi.

<sup>8</sup> Shuar chíkich shuarjai mesetan najanawartatui; apachcha chíkich apachjai núnisanan mesetan najanawartatui. Untsurí nunkanam úurkattawai. Tsukasha ártatui, charaatum ajamusha núnisan átatui. Tura nujai itiurchatka aya yama nankamui.’

<sup>9</sup> Túmaitkui atumsha aneartarum. Akupin iruntainiumsha surutmakar-tatume, tura íi shuar iruntainmasha katsumpramkartatume. Wíi shuar asakrumin, kapitíánnium, akupniunmasha juramkittiarne. Nuí jearum, Winia chichastatume.

10 Nu túruntsain ashí áentsnum Yús-Chicham etsernaktiniaiti.

11 Atumin surutmaktasar juramainiakusha, warintiajak tusarum ti enentáimsairap. Chichastin jeamtai, Yusa Wakaní jintinramattarmena nu titiarum. Iis, atumí enentáijjai tíchattarme, antsu Yusa Wakaní jintintiam títiatrume.

12 Nu tsawantin shuarsha ni yachin mantamnati tusa suruktatui. Apasha ni uchirin suruktatui. Uchisha aparincha nukurincha kajerak, jakati tusa suruktatui. Núnisañ untsurí shuar túrawartatui.

13 Nuñkia Wíi shuar asakrumin ashí nakitramprartatui. Tura shuar yawetsuk katsuñrañka uwemprattawai” tímiayi.

14 Nuyá Jesus tímiayi “Shuar juna áujeana nu nekaati. Yúsnan etserin, ni naarí Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkiuñmesha, ashí Jutía nuñkanam pujarmena nu, náinnium pisartarum.

15 Jeñ yakiñi pujana nu akaiki wariri achiktajtsa, jeen wayashti.

16 Ajanam pujana nusha ni pushirin jukitajtsa waketkishti.

17 Tura ajamtin áiniana nusha, kuírchin umuntsainia nusha, nu tsawantin tímiá itirchatan wáinkiertatui.

18 Tuma asamtai átum pisaarmena nuñ yumitin achati tusarum Yús seatarum.

19 Nu tsawantinkia ti wáitsatin átatui. Yama nanñkamtaik Yús nuñkan najanama nuñsha, yamaisha ukunmasha tímiu wáitsatin penké atsuttawai.

20 Tura Uunt Yús wáitsatin tsawantan ishichik awajsattajai tíchaitkuñkia, uwempratin penké atsuinti. Tura ni shuarin anaikiamia nuna yáintajtsa wakerak, nu tsawantan ishichik awajsattawai.

21 Nu tsawantai “júiti Kristu” túramkuñkia anturkairap.

22 Kame “Kístuitjai” ántar tuinia nu, tura “Yúsnan etserniuitjai” ántar tuinia nusha wantinkiertatui. Wantinkiar Yús anaikiamu shuáñmasha anañkakai tusar wakeruiniak, ni kakarmarin iniakmainiak aentsti tujintiamun túratatui.

23 Tura átum aneartarum. Aetak, túruntsain ujakchajrumek’ tímiayi Jesus.

### *Aents Ajasu tutai táintri*

*(Mateu 24.29-35, 42-44; Rúkas 21.25-36)*

24 Jesus tuke unuiniak juna tímiayi: ‘Tura nu wáitsatin nanñkaasmatai, etsaasha nantusha etsantrashtatui.

25 Yaasha nayaimpinmaya kakekartatui, tura nayaimpiniam kakaram ainia nu muchitratatui.

26 Nuyasha ashí aents Winia wáitkiartatui. Wi, Aents Ajasuitjiana ju, ti kakaran, ti wincha ajasan, yurañminiam winiái wáitkiartatui.

27 Nuñ nayaimpinmaya suntarun akupkattajai, Wíi shuaran ashí nuñkanmayan irurarat tusan. Arakaaniya, nuñkaanija, ashí nuñka náñkatkamunmayan Wíi shuaran irurartatui.’

28 ‘Iikiu numi nakumea nu nekaatarum. Ni chinñkimprí punñak nuke jeakuí, “ju nuñkanam esat jeatemai” tátsurmek.

29 Núnisurmek Wi tájarmena nu wáinkiuñmeka, ni tatintri jeatemai tu nekaatarme.

30 Nekas tájarme, yamaí aents pujuinia nu kajin amuiniatsain, ashí Wi tájana nu túrunatniuiti.

31 Nayaimpisha nuñkasha amuukatniuiti. Tura winia chichampruka amuukashtiniaiti.

32 Tura tsawantcha nekanachminiaiti. Nayaimpinmaya suntarsha nékainiatsui; Wisha Yusa Uchiríntiatan nékatsjai. Aya winia Aparuk nékawai.

33 Atumsha anearum enentáimprarum Yus aujsa pujustarum, tsawant nékachu asarum.'

34 "Tura Wikia ju shuarjai méteketjai. Ju shuarsha jeachat weak, ni jeen ikiuawai. Ikiuak ni shuarin wáitrukarti tusa apujas ikiuak ashí shuaran takatrín súawai. Tura wáitin wáinniun, "ameja péñker wáinkiaata" tímiai.

35 Wikia nu jea nérenniua núnisnak, urutai tátataj nékachu asarum anearum pujustarum. Kíraimpiash, tura ajapkeash, atash shiniukaimpiash, káshikiash tátataj.

36 Nérentin aya aneachmak taa, kanúu tepai wáitkiaji tusarum aneartarum.

37 Wi atumin tájana nu, ashí shuáran tajai, anearum pujustarum" tímiayi Jesus.

## 14

### *Jesusan chichaman jurusarmiania nu*

(Mateu 26.1-5; Rúkas 22.1-2; Juan 11.45-53)

1 Jímiarchiki tsawant ajasmiaiyi paskua tutai námper jeatin. Paskua námpertincha wakapruachu tantan yuatin námpernasha métek najanin ármiaiyi. Israer-patri uuntriṣha, Israer-shuara jintinniurṣha Jesusan anañkar achikiar maatai tusar wakeriarmiaiyi.

2 Túrasha "Jista tsawantin túrachmi, aents charaatum ajarain tusar" tiarmiayi.

### *Nuwa kunḡuinian Jesusan ukatramiania nu*

(Mateu 26.6-13; Juan 12.1-8)

3 Jessusha Petania péprunam tunamaru Semunḡa jeen misanam pujan, nuwa tarimiayi. Nartu kunḡuinian arapástru tutai kaya najanamunam piakun itiamiayi. Nu kunḡuin ti kuitiaiti. Mutí chuchuké kupik Jesusa muuken kunḡuinian ukatramiaiyi.

4 Tura nuḡ pujuarmia nu, kajerar tunaiyarmiaiyi "¿Urukamtai ju kunḡuinian ántar wasurea?"

5 Junasha súrakka, menaintiú siaḡ kuítnium surukminiuyi. Nu kuitcha kuítrinchan súsaḡka maak" tiarmiayi. Tusa nuwan kajerarmiaiyi.

6 Tusa Jesus chicharainiak "Iniaisatarum. ¿Urukamtai au kajerarum? Winia shiir túrutayi, tímiayi.

7 Kuítrincha atumjai tuke íruntsuk. Wakerakrumka tuke péñker awajsatniuitrume. Antsu Wikia atumjai tuke pujushtatjai.

8 Ju nuwa ashí nii túramnia núnaka umikiai. Wi jákatin jeatsain, iwarsatin kunḡuinian shiir ukatrarai.

9 Nekas tájarne, ashí nuñkanam Yus-Chicham etsernaktatna nuḡ, ju nuwa túramurṣha etsernaktatui, nin kajinmatkiarain tusa" tímiayi.

### *Jútas Jesusan suruktaj timiania nu*

(Mateu 26.14-16; Rúkas 22.3-6)

10 Nuyá Jútas Iskariúti, Jesusa unuiniamuríntiat, Israer-patri uuntrin werimiayi, Jesusan suruktaj tusa.

11 Niisha nuna antukar, warasar "Kuit amastatji" tiarmiayi. Jútassha Jesusan itiurak yúpichuch tsanḡamkattaj tusa enentáimias wekaimiaiyi.

*Jesúsjaí iruntrar yurumáwarmia nu*

*(Mateu 26.17-29; Rúkas 22.7-23; Juan 13.21-30; 1 Kurintiunam 11.23-26)*

12 Wakapruachu tantan yuatin jisat nan̄kama tsawant tsawarmatai, paskua nám̄perten yúatin murik máatin jeamtai, Jesusa unuiniamurj̄ ini-asarmiayi “Paskuatin murikiu yúatin iwiaratai tusar ζtūj wétataj̄i. Tūj yuru-mattam?” tiarmiayi.

13 Tutai Niisha jimiara unuiniamurj̄n akatar akupeak “Péprunam wetarum. Nūj áishman̄ yum̄in jukí wéa wáinkiatarme. Nū áishman̄ nemarsatarum.

14 Wayana nūj jeá nérenniur̄i títiarum “Uunt túramui, ζwisha, unuiniamurj̄ai tūj yurumáttaj̄?”

15 Nū nérentin, yakí písunam uunt tesamunam ashí iwiaramun iniaktur-mastatrum. Nūj jisat ii najanatin iwiaratarum” tímiayi.

16 Ni unuiniamurj̄ wear, péprunam jeawar, Jesus timia núnisan̄ wáinkiarimiayi. Tuma ásar paskua nám̄peran iwiararmiayi.

17 Nuyá kíakui Jesus ni tuse unuiniamurj̄j̄iaí wayawarmiayi.

18 Niisha misanam pekaamak, yurumáiniak pujasar, Jesus tímiayi. “Nekas tájarme, chikichík shuar Wijj̄iaí yurumna nu, surutkattawai.”

19 Nuj̄aí kúntuts enentáimprarmiayi. Chíkich chíkich Jesusan aniasar “wíashitiaj̄” tiarmiayi.

20 Jesus tímiayi “Jū misanam tuse irunar yurumprum nu, chikichik su-rukattawai. Wijj̄iaí pinin̄num yurumkan ayak yuana núiti.

21 Nekas Wí, Aents Ajasuitjiana ju, jákatniunam wéajai, áarturma áintsanak. Tura áishman̄ súrutna nu ti wáitsattawai. Niisha akiinmainchu ajakuíti” tímiayi.

22 Yurumainiak Jesus Yúsan yuminkias, yurumkan achik, puuk, chicharainiak “Achiktarum, jūsha winia ayashruiti” tímiayi.

23 Pinin̄nasha achik, Yúsan yuminkias, ni unuiniamurj̄n súsarmiayi. Ashí umararmiayi.

24 Umararmatai Jesus tímiayi “Júiti winia numpar, untsurj̄n yáintajtsa puártinia nu. Nuj̄aí Yamaram Chichaman Yus najanaiti.

25 Nekas tájarme, uwa yumirj̄ ataksha jūi umarchattajai. Tura tsawant jeamtai, ukunmasha, Yus akupeana nūj yamarman umartatjai” tímiayi.

*Pítuur natsantratniua nuna Jesus ujakmania nu*

*(Mateu 26.30-35; Rúkas 22.31-34; Juan 13.36-38)*

26 Yus-kantan kantámawar, jíinkiar, Uriwiu náinnium wearmiayi.

27 Nuin̄kia Jesus nin tiarmiayi “Jū kashi átum natsantrurtatrum. “Murikiu wáinnin̄m máattajai, túramtai murik tsakin̄makartatui” tu aarchamukait.

28 Tura ukunam Wí nantakin atumin Kariréanam émtuktiajrum” tímiayi.

29 Tutai Pítuur chicharuk “Ámin ashí natsantramainiakuisha, wikia nat-santrashtatjame” tiarmiayi.

30 Tutai Jesus tímiayi “Nekas tájame, jū kashi atash jimiaara shiniatsaj̄n, natsantrurtatme. “Núnaka nékatsjai” menaintiú turuttiatme” tímiayi.

31 Tutai Pítuur kakaram chichaak “Ámijj̄iaí métek máantuiniakuisha, núnaka pen̄ké tíchattajai” tímiayi. Ashí ni unuiniamurj̄ núnisan̄ tiarmiayi.

*Jesus Jitsemani ajanam Yúsan áujsamiania nu*

*(Mateu 26.36-46; Rúkas 22.39-46)*

32 Nuyá Jitsemani ajanam wearmiayi. Jeawar Jesus ni unuiniamurj̄n tímiayi “Jūi pujustarum, Yúsan áujsatasa pujaí”.

33 Pítrun, Jakupuncha, Juán nasha jukimiayi. Tura Jesuska ti kuntuts enentáimiar wake mesek nekapsatasa nan kammiai.

34 Tura nin chicharuk “Wi ti kuntuts enentáimjai, tura jakamnia nekapeajai. Juí iimia pujutarum” tímiayi.

35 Jesussha ishichik arantach we, nun ká piniakumar tepes Yúsán aujmiayi. “Ju wáitsatin átatna nu, túrutatniuitkuin kía iniaitusta” tu seamiai.

36 Tuke áujuk tímiayi “Apawá, ashí tujinchaitme. Pininnumiá ashí umartinia áantsan ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.”

37 Tura ni unuiniamurin tarin, kanúu tepenan wáinkiamiayi. Pítrun tímiayi “¿Semun ka kánamek. Kanutsuk ishichkisha iimia pujustin tujinkiammek?”

38 Anearum Yus áujsatarum, tunaanum iniaarajj tusarum. Atumí wakanjin kakarmaitrume, antsu atumí ayashjin kakarmachuitrume” tímiayi.

39 Ataksha we, nuik Yúsán áujsama núnisán áujsamiayi.

40 Ataksha waketruki, ni unuiniamurin kanúu tepenan tarimiayi. Karj ti pujá asamtai, Jesusan áujsatniun tujinkiarimiayi.

41 Jesus ataksha we, tarí tímiayi “Kanárum ayampratarum. Máakete. Jeayi. Wi, Aents Ajasuitjiana ju, tunáa shuarnum surukmaitjai.

42 Nantáktiárum, wemí. Iis, Winia súrutna nu nuntumsai” tímiayi Jesus.

### *Jesusan achikiarmiania nu*

*(Mateu 26.47-56; Rúkas 22.47-53; Juan 18.2-11)*

43 Jesus nuna chicháa pujá unuiniamurj Jútas tarimiayi. Niijjai untsurj aents puniá takaku, tura numincha takaku káutarmiayi. Israer-patri uuntri, Israer-shuara jintinniurj, tura Israer-shuara úuntri akupkarma asa káutkarmiayi.

44 Káuntsain Jútas chicharainiak, “Wi mukunattaj áujkin núiti Jesus. Achirum, pé nker emetarum jukitiarum” tímiayi.

45 Tura Jesusan tarí, mukunuk áujas “Uuntá, Uuntá” tímiayi.

46 Túramtai aencha Jesusan achikiar emetawarmiayi.

47 Túruiniakui nuj wajatusha puniarj úkuitsan, patri uuntri takarniurj awati ni kuishin tsupirkamiayi.

48 Túram Jesus áentsun tímiayi “Kasakaitiaj. Puniajai numijjai, kasá nútiksarmek achirkatai tusarum tarutniurme.

49 Ashí tsawant atumjai Yusa Uunt Jeen wayan unuiniakun pujuchmakaj. Túmaj nuj achirkachmarme. Tura Yus timia nu uminkiat tusa ju túrunayi.”

50 Nuin kía ni unuiniamurj Niniak ikiuiniak pisararmiayi.

### *Natsa pisarmiania nu*

51 Tura áishman nátsaach aya tarachin penumas Jesusan atamprimiayi. Tura natsaach suntar achikiam

52 tarachrin ajapa ikiuak misú tsékenkimiayi.

### *Patri uuntriin Jesusan júkiarmiania nu*

*(Mateu 26.57-68; Rúkas 22.54-55, 63-71; Juan 18.12-14, 19-24)*

53 Patri uuntriin Jesusan ejeniarmiayi. Nuji Patri uuntriisha, Israer-shuara jintinniurisha, Israer-shuara uuntriisha irunturarmiayi.

54 Tura Pítiur íikian nemarki Patri jeen aach jeá, Patri suntarijjai jinia anamuk pujumiayi.

<sup>55</sup> Patri uuntri ashí naamka uunt armia nujaj iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjaj mantamnati, tiarmiayi. Túrasha wáinkiacharmiayi.

<sup>56</sup> Túrasha untsurj shuar Jesusan tsanumpruiniayatan yapajjá yapajjá chichainia ásarmatai wáinkiacharmiayi.

<sup>57</sup> Nuyá chíkich wajakiar wáitruiniak juna tiarmiayi

<sup>58</sup> “Yusa Uunt Jeen, aents jeamarmia nuna yumpunťiatjai. Túran menaintiú tsawantaj, chikichan, aents jeamchamun jeamtatjai” tau antukmajj tiarmiayi.

<sup>59</sup> Tura tuke yapajjáwar tiarmiayi.

<sup>60</sup> Nujsa Patri uuntri ajapén wajakí Jesusan chicharuk “¿Áimsatin penké tujintiamek. Warinia turamainia?” tímiayi.

<sup>61</sup> Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaikiamurinkaitiam. Ii Yusrj Uunt tajinia nuna Uchirinkaitiam?”

<sup>62</sup> Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuurinj pujaj wáitkiattarme. Tura nayaimpinmaya yurañniam winiaj wáitkiattarme” tímiayi.

<sup>63</sup> Tutai Patri uuntri kajek, ni pushirjñ jaak tímiayi “¿Chíkich títincha warí atsumajj?”

<sup>64</sup> Nii tana nujaj Yúsán kátsekeamu antukurme. ¿Warintia enentáimprum?” tímiayi.

Takuí “jakamniati” ashí tiarmiayi.

<sup>65</sup> Chíkich chíkich Jesusan usukiawarmiayi. Jiin epetkar awatiar “¿Ya áitkiarma? etserkata” tiarmiayi. Patri suntarjsa yapiniam awatiarmiayi.

### *Pítur Jesusan natsantramiania nu*

*(Mateu 26.69-75; Rúkas 22.56-62; Juan 18.15-18, 25-29)*

<sup>66</sup> Núnaka túruiniaj Pítru nunká, jea aani pujan, nuwā Patri uuntri takarniurjya nu tarimiayi.

<sup>67</sup> Niisha Pitrun jinia anamu pujan wáinkiamiayi. Wáiniak, “Amesha Nasaretnumia Jesusaj wekaichukaitiam” tímiayi.

<sup>68</sup> Tutai Pítur chicharuk, “Nékatsjai. Ame támēna nuna nékatsjai” tímiayi. Tura aā wáitaiiniam jiinkimiayi. Tumai atash shiniukmiayi.

<sup>69</sup> Nu núwasha Pitrun ataksha wáiniak, shuáran nuj pujuinian tímiayi “Júiti ni shuari.”

<sup>70</sup> Tura ataksha “atsá” tímiayi.

Ishichik árusañ, shuar nuj pujuarmia nu ataksha Pitrun chicharuk “Nekas ni shuarinme. Kariréanmaya shuárchakaitiam. Auyā shuara nuní chichaame” tiarmiayi.

<sup>71</sup> Tutai Pítrusha kakantar chichaak, “Ju áishmanaka átum tárumna núnaka nékatsjai. Wáitrukuñkia Yus írsati” tímiayi.

<sup>72</sup> Nuyā ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsain, ame, núnaka nékatsjai, menaintiú turuttiatme” tíchamka. Pítru nuna enentáimias tí útmiayi.

## 15

### *Jesusan Piratú ejeniarmiania nu*

*(Mateu 27.1-2, 11-14; Rúkas 23.1-5; Juan 18.28-38)*

<sup>1</sup> Tura kashin káshik Patri uuntri, Israer-shuara úuntrijjai, Israer-shuara jintinniurjijai, ashí naamka armia nujai irunturar, chichaman jurusarmiyai. Túrawar Jesusan jiníamun apach kapitíán Piratuin ejeniarmiyai.

<sup>2</sup> Ejeniar matai Piratu aniasmiyai “¿Amesha Israer-shuara Uuntrinkáitiam?” Tutai Jesussha “Amek tame” tímiyai.

<sup>3</sup> Nuyá Patri uuntri ti tsanumprurarmiyai.

<sup>4</sup> Ataksha Piratu aniasmiyai “¿Áimsatin penké tujintiamék? Ti untsurí etserturmainiatsuk.”

<sup>5</sup> Tura Jesus nunasha áikchamiyai. Túmakui Piratu ti enentáimpramiyai.

*Jesusan, mantamnati, tíarmiania nu  
(Mateu 27.15-31; Rúkas 23.13-25; Juan 18.38-19.16)*

<sup>6-7</sup> Shuar ámiyai, ni naari Parapás. Niisha ni shuarjijai meset ámanum, shuuran maa asamtai sepunam enkeamuyayi. Tura námper tsawantai Piratu sepunmayá chikichik shuarnak jiiiki akupniuyayi, aents seawarmia nuna.

<sup>8</sup> Nuisha untsurí shuar Piratun káutkar tiarmiiai “Ame ju námpertin tuke túramna nu túratá.

<sup>9-10</sup> Patri uuntri Jesusan kajeraru ásar surukarmiyai. Piratusha, nuna nekáa chicharainiak “Israer-shuartiram ¿atumí akupniurin jiiiki akupkatta-jak? ¿Nu wakerarmék?” tímiyai.

<sup>11</sup> Tutai Patri uuntri áentsun chichainiak ““Antsu Parapás jiiikim akúpkatá” titiarum” tiarmiiai.

<sup>12</sup> Tutai Parapásan seawarmatai Piratu ataksha chicharainiak “Jesusnasha, átum ii akupniurj tarumna nuna, ¿itiurkattaja?” tímiyai.

<sup>13</sup> Ataksha ni kakantar tiarmiiai “Krúsnum mantamnati.”

<sup>14</sup> Piratusha nin tiarmiiai “¿Warí tunaana túriniait?” tímiyai.

Takui niisha nú nankaamas kakantar tíarmiiai “Krúsnum mantamnati.”

<sup>15</sup> Tuma asamtai, aents shiir enentáimprarti tusa, Piratu tunáa shuuran, Parapásan jiiiki akupkamiyai. Tura Jesusnasha katsumkarum krusnum ajinrurtarum tusa suntaran tsankatkamiyai.

<sup>16</sup> Tiniu asamtai suntar Jesusan jukiar, kapitíani jeen awayawarmiyai. Nu jea naari Piritiúriiuiti. Túrawar untsurí suntaran untsukarmiyai.

<sup>17</sup> Ashí káunkar, pushin kapaanniun Jesusan áentsrarmiyai. Tawasap janiki najanamun etsenkrumtikiarmiiai.

<sup>18</sup> Nuisha Jesusan áusjar “Shíraitme, Jesúsá, Israer-shuara akupniuriya” wishikiainiak tiarmiiai.

<sup>19</sup> Muuknumsha sapaipai awatiarmiiai; nuyá usukiawarmiyai, túrawar ántar tikishmatrarmiyai.

<sup>20</sup> Tura Jesusan wishikrar amukar, kapaantin pushin áitkiar, ni pushirin áentsrarmiyai. Túrawar krúsnum ajinrurtaí tusar jiiikiarmiiai.

*Jesusa jakamuri  
(Mateu 27.32-44; Rúkas 23.26-43; Juan 19.17-27)*

<sup>21</sup> Semun Serini núnkanmayá shuáruyayi. Arijantruncha, Rupuncha aparíyayi. Semunkan takatnumia winian suntar emetawarmiyai, Jesusa krusrin yanaki jukiti tusar.

<sup>22</sup> Jesusnasha Kúrkuta náinnium júkiarmiiai. Kúrkuta, shuar chichamjainkia, muuka ukunch naint, tutainti.

<sup>23</sup> Jeawarmatai, karía, mira kunkuinjai pachimprar áartaj tusa susarmiyai Jesusan. Túrasha umarchamiyai.

24-25 Nantu yakí jatemsantai krúsnum ayapar ajintrurar ikiusarmiaiyi. Túrawar suntar yakí jukit tusar nakurutaijajai nakurusar Jesusa pushirijn yaruakarmiaiyi.

26 Urukamtai máamuit, ashí aents nuna nekaawarat tusa, ni krúsrjn ju aarmauyayi: *ISRAER SHUARA AKUPNIURI*

27 Nu náinnium jimiará kasa shuaran Niijjai máawarmiaiyi. Chikichik Jesusa untsuurijn krúsnum, chikichik ni menaarijn krúsnum máawarmiaiyi.

28 Yus-Papinium aarma ana nujai uminkiauyayi. Nui “tunáa shuarjai nekapmarmauyayi” tu áarmaiti.

29 Shuar nankaamainiak, muuke pearar, Jesusan katsekainiak tiarmiaiyi “Íisia, amesha, “Yusa Uunt Jeen yumpuntiatjai, tura menaintiú tsawantai ataksha jeamkattajai” tíchakaitiam, tiarmiaiyi.

30 Amek krúsnumiá akaikim uwemprata.”

31 Núnisan Patri uuntrisha, Israer-shuara jintinniurisha Jesusan wishikrar chicharnaisarmiaiyi “Chikichan uwemtikraitiat, Niñki uwempratniun tujin-tiawai.

32 Yusa anaikiamuri Krístuashit, ii akupniuriniashit, tiarmiaiyi. Wats, yamá krúsnumiá akáikiti, iisha nu íisar Yus-shuar ajastai” wishikiainiak ántar nuna tiarmiaiyi. Jesusjai krúsnum ajintruamusha Nin wishikiarmiaiyi.

*(Mateu 27.45-56; Rúkas 23.44-49; Juan 19.28-30)*

33 Tutupin jeamtai ti kiritin ajasmiaiyi ashí nunkanam. Tura, nantu nunkaach ajasmatai ataksha tsaapnirmiaiyi.

34 Nuñ Jesu kakantar untsumuk tímiayi “Iruí, Iruí, rama sapaktani.” Nuka shuar chichamjainkia, “Yusrú, Yusrú, ¿urukamtai ajapa ikiurkiniam?” tawai.

35 Shuar nuñ pujuarmia nu, nu chichaman nékachu ásar, nuna antukar “Eriasan untsúawai” tiarmiaiyi.

36 Chikichik shuar churuinian uruchjai ajamper, sapapjai ijiú mukunati tusa susamiaiyi. Tura tímiayi “Wajastarum, Eriás Nin jukitiaj tusa winishtimpiash. listai” tímiayi.

37 Nuñkia Jesu kakaram untsamak jakamiaiyi.

38 Túramtai Yusa Uunt Jeen ejamu niñki jaanakmiaiyi, yakíya nunká.

39 Suntara kapitíántrisha Jesusan ayamtus wajamia nu, Jesu kakaram untsamak jaamun iis tímiayi “Nuka ti nekas Yusa Uchiriyayi.”

40 Nuwasha arant ii pujuarmiaiyi. Nu nuwajai Máktara péprunmaya Marí, chikich Marisha, Sarumáisha pujuarmiaiyi. Chikich Marisha uchich Jakupuncha Jusencha nukuriyayi.

41 Nu núwaka, Kariréa nunkanam Jesu wekaimia nuñ, Nin nemarsar yáintaitsar wekasarmiaiyi. Untsurí chikich nuwasha Jesusjai Jerusarénum wear, nu nuwajai arant ii pujuarmiaiyi.

*Jesusan iwiarsarmiania nu*

*(Mateu 27.57-61; Rúkas 23.50-56; Juan 19.38-42)*

42 Kiatemamtai, ayampratín tsawant jeatsain, námper iwiaratin tsawant asamtai,

43 Arimiatíanmaya Jusé arantutsuk, kakaram ajas, Piratuí jeá Jesusa ayashin seatajsa utuamiaiyi. Nu Jusencha ashí irunin ainia nu anturin ármiaiyi. Niisha Yus ju nunkanam akupin ajasat tusa nákasamiaiyi.

44 Tura Jesusa ayashin seam, Piratusha “wárik jaka” tímiayi. Tuma asa suntara kapitíántrin untsurak “¿Nekas jakayik?” tímiayi.



<sup>45</sup> Tutai kapitián “Ee” takui, Jesusa ayashin Jusen tsankatkamiayi.

<sup>46</sup> Jusesha puju tarachin penkeran sumarak, Jesusa ayashin itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan átutmiayi.

<sup>47</sup> Tura Máktaranmayá Marí, Jusé nukurí Marijjai ni ikiumun ii wajarmiayi.

## 16

### *Jesus nantakmiania nu*

*(Mateu 28.1-10; Rúkas 24.1-12; Juan 20.1-10)*

<sup>1</sup> Tura ayampratin tsawant nankaamasmatai, Máktaranmayá Marisha, Jakupu nukurí Marisha, Sarumáisha, kunkuinian Jesusa ayashin kuertai tusar sumakarmiayi.

<sup>2</sup> Tura kashin Tumintin, ti káshik, nantu yáma jiiniai, iwiarsamunam jeariarmiayi.

<sup>3</sup> Wésar chichainiak “Iwiarsamu wáitiri kayancha zyaki akanketramkattaj?” tiarmiayi.

<sup>4</sup> Jear uunt kaya akankekman wáinkiararmiayi.

<sup>5</sup> Iwiarsamunam wayawar, natsan esaram puju pushin entsar, untsuurnumaani pujan wáinkiar ti ashamkarmiayi.

<sup>6</sup> Túmainiakui natsa tímiayi “Ashamkairap. Nasarénumiá Jesus krúsnun jakama nu éarme. Iniantkimiuiti. Juí pujatsui. Wátsek, ju ikiusmanum íistarum.

<sup>7</sup> Túrarum werum Pítrusha, chíkich unuiniamurisha ju ujaktarum. Kariréanam atumin émkiji. Turammarumna núnisan túruna wáinkiatarme” tímiayi.

<sup>8</sup> Niisha ti ashamainiak purushniarar iwiarsamunmayá tseke wearmiayi. Ti ashamainia ásar, chikichkinkesha ujakcharmiai.

### *Máktaranmayá Marin Jesus wantintíukmiania nu*

*(Juan 20.11-18)*

<sup>9</sup> Émkaka Tumintin ti káshik Jesus nantaki, Máktaranmayá Marin wantintíukmiayi. Nu María enentáiyá siati iwianchin Jesus yaunchu ajapruyayi.

<sup>10-11</sup> Marisha Jesusa nemari kúntuts uutu matsatainian weri, “Jesus iwiaakui, imia wi wainkijai” tímiayi. Támaitiat anturkacharmiayi.

### *Jesus jimiará shuaran wantintíukmiania nu*

*(Rúkas 24.13-35)*

<sup>12</sup> Tura urum jimiaara shuar Jerusarénumiá tsanin weenan, Jesus nusháa iira ajas tarimiayi.

<sup>13</sup> Niisha Jesusan wáinkiar waketkiar, unuiniamurin ujakarmiayi, tura ni chichamencha anturkacharmiayi.

### *Jesus ni unuiniamurin akupkarmiania nu*

*(Mateu 28.16-20; Rúkas 24.36-49; Juan 20.19-23)*

<sup>14</sup> Nuyasha Jesusa auntse unuiniamurin misanam pekaamkar pujuinian Jesus tarimiayi. “¿Atumí enentái urukamtai kátsuram ainia, urukamtai Winia nekas enentáimtursachuram?” tímiayi. Ni nantakmiarin wáinkiaru chichamen anturkacharu ásarumatai kakantramiai.

<sup>15</sup> Nuyá chichaak “Ashí nunkanam wetarum. Túrarum ashí shuarum Yusa shiir chichame etserkatarum.

<sup>16</sup> Shuar anturak imiani uwemprartatui. Shuar antukcharka, tuke sumamawartatui.

<sup>17</sup> Shuar winia náarun pachis, Yúsan nekas enentáimtakka, juna túrawartatui, Yusa kakarmarín iniakmastaj tusa: iwianchin jiiiki akupkartatui; chikich chichamjaj chichasarukamtai Winia nekas enentáimturtatui;

<sup>18</sup> napincha achiksha, tseasnasha úmaksha, jaa ajaschartatui. Jaa shuwaran ni uwejejaj antin, nu shuwaran pénger awajsartatui.” Tu tímiayi.

*Jesus nayaimpiniam wakamiania nu*

*(Rúkas 24.50-53)*

<sup>19</sup> Jesus chichas amukmatai, Yus nayaimpiniam jukimiayi. Túruna Yusa untsuurinj pujusmiayi.

<sup>20</sup> Ni unuiniamurjsha jíinkiar, ashí nunkanam Yus-Chichaman etserkarmiayi. Tura Uunt Yus nin yáingmiayi. Tura etserainiakui, ashí aents ni kakarmarín nekaawarat tusa, aentsti tujintiamun túratniun susamiayi. Nuke atí.

## Yúsán Shiir Chichamēn

### RÚKAS aarmia nu

<sup>1</sup> Nekas iiní Jesus túramia nuna “ímiatrusan áartajai” untsurí aents tiarmiayi.

<sup>2</sup> Yámankamtaikniumian ísarmia nú shuar, tura Yus-Chichaman etserkatniun yáinkarmia nusha in unuítiamprarmia nútiksaran áartinian wakeriarmiayi.

<sup>3</sup> Wisha núnisnak esetsaran enentáimsan, yámankamtaikniumiā nuna nekaamjai. Tuma asan túrunamia nuna ímiatrusnak amincha áatratajtsan wakerimjiame, winia úntur Tiupiru.

<sup>4</sup> Jintinramawarma nú nankaamas nekaata tusan wakerakun áatjame.

#### *Imiakratin Juanka akiiniatniurin ujakmania nu*

<sup>5</sup> Jutía nunkanam uunt akupin Erutis akupkamia nú tsawantin Israer-shuar Yúsnan pujurin ámiayi, ní naarí Sakarías. Niisha Aptías weeauyayi. Ni nuwēsha Irisapít Arun weeauyayi. Irisapítia úuntrisha Israer-shuar Yúsnan pujurin ármiai.

<sup>6</sup> Yúsjaisha Sakaríassha Irisapítcha mái-metek péñker ármiai. Yus akupkamia nunasha umirin ármiai. Tuma asamtai péñkesha chíkich nin yajauch chicharkatin atsuarmiayi.

<sup>7</sup> Yusjái péñker wekainiyat Irisapít júrechuyayi. Túrasha mai úuntach ármiai.

<sup>8-9</sup> Israer-shuar Yúsnan pujurin chíkich weeanmaya nuyá chíkich weenam, ankant ankant Yusa jēen takáu ármiai. Chíkich tsawant, Sakarías weeá takastin amia nu, Sakaríaska kunkuinian ekeemaktaj tusa init wayatniuyayi.

<sup>10</sup> Init kunkuinian ekeemaj untsurí aents aani matsamsar Yúsán áujtak pujuarmiayi.

<sup>11</sup> Sakarías init pujaj kunkuin ekeematainiam untsuurnumaanī aya aneachma nayaimpinmaya suntar wajamiayi.

<sup>12</sup> Nuna wajan wáiniak Sakaríaska purushnairmiayi.

<sup>13</sup> Túrasha nayaimpinmaya suntar chicharuk tímiayi “Sapijmiakaip Sakarías. Nekaata. Ame seamna nuna Yus anturtamkayi. Tura ame nuwem Irisapít uchin takustatui. Nii akiiniamtai, “Juan” anaikiata.

<sup>14-15</sup> Ame uchiram akiiniattana nuka Yusjaisha nankaamantu átatui. Tuma asamtai akiiniamtai, amesha shiir enentáimsam warastatme. Tura chíkich aents untsurí warasartatui. Ame uchirmesha karía ainia nuna umarchat-tawai. Tura áetak akiinchanak Yusa Wakaní pimiutkattawai, tímiayi.

<sup>16</sup> Tura ni shuarin Israer-shuar ániana nuna, ii Uuntrí Yusjái ataksha nawamtikiartatui.

<sup>17</sup> Uunt Yúsajya akatramu átatui. Yaunchu Yúsnan etserin Eriás kakaram etserkamia núnisan niisha etserkattawai. Nujai shuaran ni uchiríjiai nawamtikiartatui. Tura umichu áinia nuna eseer enentáimtikartatui. Ni Uuntrí taakui ní enentái iwiaranu arti tusa etserkattawai” tímiayi nayaimpinmaya suntar.

<sup>18</sup> Nuna takui Sakarías nayaimpinmaya suntaran tímiayi “¿Nunasha war-íjiai paant nekaataj? Wisha nuarjai mái-metek ti úuntchichukaitiaj” tímiayi.

19 Tutai nayaimpinmaya suntar tímiayi “Wikia Kapriiraitjai, Yusa suntarintjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi.

20 Túrasha wi tájamna nu “nekasaiti” tu enentáimprachume. Tura asam uchiram akiintsain muut ajastatme. Chichastin penké tujinkiattame. Tura wi tajana nu, tsawant jeamtai túrunattawai.”

21 Nuna tumaj Yusa jeen aani pujusar, Sakaríasan nákas pujuarmiayi. “¿Urukamtaik inít we imiá menkaka?” tu enentáimprarmiayi.

22 Nuyá Sakarías jiinkimtai, áuj Sartaj tukamá tujinkiarmiayi. Sakaríaska, muut ajasu asa, aya úwijmiasan chichamiayi. Túmakui, Sakarías inít pujus Yúsaj wáimiakun nekaawarmiayi.

23 Yusa jeen takastin tsawantri amuukamtai Sakaríaska ni jeen waketkimiayi.

24 Nuyá ukunam ni nuarj Irisapít ajaprukmiayi. Tura senku nantutin aya jean pujusmiayi.

25 Jeá pujus, “Aents wishikruiniakui natsantan jurutkitiaj tusa uchi takustinian Yus tsankatrukai” tu enentáimpramiayi Irisapít.

### *Jesusa akiiniatniurin nayaimpinmaya suntar etserkamiania nu*

26 Nu senku nantu nankaasmatai Yus ni suntarin Kapriiran Nasaré péprunam akupkamiayi. Nu pepru Kariréa nunkanam pujawai.

27 Nasarénumiá nuwan, naarj Marí, iyutí tusa akuptukmiayi. Nu núwaka áishmanjai pujuchuyayi. Niisha Jusejai nuatnaikitsa anajmanair pujumiayi. Jiuseka uunt Tawit weeawayi.

28 Wats, nayaimpinmaya suntar Marí pujamunam wayá tímiayi “Yus penker enentáimturma asamtai, ámin winitjiame, Mariya. Yuska ámin nemartamuk ashí nuwá nankaamas penker awajtamui” tímiayi.

29 Tura Marisha nayaimpinmaya suntaran wániak, chichaamun nékatsuk “Urukamtaik tu chicháa” tu enentáimpramiayi.

30 Nuyá nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai.

31 Antukta. Amesha ajapruktatme. Túram Uchi takustatme. Nusha “Jesus” anaikiata.

32-33 Niisha uunt átatui. Nincha “Uunt Nankaamaku Yusa Uchirí” tiartatui. Tura Uunt Yuska yaunchu Tawitian uunt akupniurj awajsamia núnisan ame Uchirmin ame shuárumin Israer tutain Uunt akupin awajsattawai. Ni akupeamurjsha Yus susamu asa penké amuukashtiniaiti” tímiayi.

34 Nayaimpinmaya suntar nuna tutai Marí tímiayi “Nusha winia áishur atsajsha, ¿itiurak túrunataj?”

35 Tutai nayaimpinmaya suntar Marín tímiayi “Yusa Wakanj tarutramtatui. Tura yuranmia núnisan Uunt Yusa kakarmarj ijirmattawai. Nu tuma asamtai Uchi akiiniattana nu Yúsaiya asamtai, “Yusa Uchirinti” tiartatui, tímiayi.

36 Tura Irisapít ame kaná kaimia nusha núnisan weamtanam ajapruka. Iis, “júrechuiti” tiarmia nu, yamaikia sais nantu pujawai ajamtin.

37 Yúsajainkia itiurchatka penké atsawai” tímiayi.

38 Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmaya suntarka wémiayi.

### *Irisapítian Marí iyumiania nu*

39-40 Nu tsawant Marí wárikmas muranam Jutía nuñkanam ni kaná kajñ Irisapítian iyutaj tusa wémiayi. Sakaríasaj jeá, ni jeen wayá, Irisapítian áuj samiayi.

41 Marí áujeamun antukmatai Irisapítia ampújén uchirj muchitkiamiayi. Tumaj Yusa Wakanj ni enentáin pimiutkamiayi.

42 Nuñkia kankantar chichaak Marin tímiayi “Yus amincha ti shiir awajtam-saiti. Tura Uchiram akiiniattana nusha Yus shiir awajsamuiti.

43 Kajrua, ame winia Uuntru nukurj áminin, Yus winia ti waitnentra asa, áuj sata tusa ámin akuptamkachaik, tímiayi.

44 Warí, wisha ame áuj tamna nuna ántakui ampujruj uchi waras mu-chitrukayí.

45 Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

46 Nuna tinia iniaisamtaí Marí juna tímiayi:  
“Wikia tuke enentairjaj “Yus timiá úntaiti” tajai.

47 Tura Uunt Yuska winia Uwentikruru asamtaí ti waraajai.

48-49 Wisha péejchach aín ni wakeramurjñ umiktajtsan wakerakui winia enentáimturayi. Tuma asamtaí ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtaí ashí aents “Marincha Yus shiir awajsaiti” turutiartatui. Núnaka yamáñ nan kamamunak tuke turutú ajartatui.

50 Tura Nin umirkatniun wakerana nunasha Yus tuke waitnentrartatui.

51 Ti itirchatan páchitsuk túraití Nii. “Nan kaamantuitjaj” tu enentáimtumainia nuna nupetkaiti.

52 Ashí akupin ainia nuna awakkaruiti. Tura íksañ péejchach ainia nuna uunt awajsaruiti.

53 Penker ana nuna kiti mainiakui Yus péñkeran súsaruiti. Tura antsu “ashí takakjai” tuinia nuna aya júnik awajsaruiti.

54 Israer-shuar Niiniu ájinia núnaka waitnentratniun kajinmattsuk yáin mákui tji.

55 Yaunchu ii Uuntrj Apráaman tura ní shuarnasha “túrattajaj” timia nuna ímiatrusañ tuke túraití.” Nuní tímiayi Marí.

56 Marikia Irisapítjaj menaintiú nantu pujus ni jeen waketkimiayi.

### *Imiakratin Juanka akiiniamurj*

57 Nuyasha ni jurertin tsawantrj jeamtaí Irisapítcha uchin áishman kan takusmiayi.

58 Tura ni shuarisha, ni írutramurisha “Irisapítian Yus ti shiir yáin miayi” tuíniak, nin iyuwearmiayi. Tura máí-metek warasarmiyai.

59 Israer-shuar túrutaj júnisaiti: uchi akiiniamurj uchu tsawant jeamtaí, shunichirj nuapen tsupiktin awai, sirkunsisiún tutai. Yus nuna tú tiniu asamtaí tuke túrin ármiayi. Wats, Irisapítia uchirj akiiniamurjñ uchu tsawant jeamtaí tsupirkataí tusar ni jeen jearmiayi. Nuñkia ni aparj naarj Sakarías anaikiataitsar wakerialmiayi.

60 Tura ni nukurj tímiayi “Atsá. Antsu ni naarj Juan átatui.”

61 Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi.

62 Nuñkia uchi aparjñ “¿Warí anaikiatajtsam wakeram?” tusar aya úwejejajñ iniasarmiyai.

<sup>63</sup> Tutai uchi aparísha “Nakash surusta; áartaj tusan wakerajai” tusa aya úwejejaín iniakmamiayi. Takui nakash susam, ni naari Juánkaiti, tu áarmiayi. Nuna wáinkiar “Ayawa urukakuñ ta” tu enentáimprarmiayi.

<sup>64</sup> Nú chichamaik Sakarías chichatsuk pujamun chichakmiayi. Tura nuin Yusa náarincha shiir awajsamiayi.

<sup>65</sup> Nuinikia ni írutramurísha ashamkarmiayi; tura ashí Jutía nuñka murá amia nuí nu túrunamun ujakam ashí nekaawarmiayi.

<sup>66</sup> Nu túrunamun antukar ti enentáimsarmiayi. Tura “ju uchin Yus nekas pujurtsuk. Tuma asamtai uunt ajas ¿urukuk ati?” tu enentáimprarmiayi.

### *Sakarías Yus jintintiam túmiania nu*

<sup>67</sup> Uchi aparí Sakarías, Yusa Wakaní pimiutkam tura Yus jintintiam, júna tímiayi:

<sup>68</sup> “Israer-shuárti ii Yusrí naari shiir awajsatniuitji. Ii Yúsri sha tarutmaitji. Tura uwentikrampraitji.

<sup>69</sup> Yaunchu ii uuntri Tawit Yusa wakeramuríjiaj uunt akupin áchamkia. Tura ni ukuriñ ti kakaram Úwentikkiartinian suramsaitji.

<sup>70-72</sup> Yuska ii nemasriya tura in nakitramainiajnía nuyá uwentikrampratniun enentáimsamia nuna, yaunchu ni etserniurín péñker armia nuna ujakmiayi. “Winia ti péñker chichamprun tájana nuna yapajítsuk umirkan tuke wáitnentratajrume” yaunchu ii úuntriñ túmiania nunasha ni etserniurín ujakarmiayi. Yaunchu nu ujakma yamá iisha wainji.

<sup>73-75</sup> Nu ujakman Yuska yámankamtaik imiá yaunchu ii uuntri Apráman tíchamkia. Apráman ujakmia nu júiti: “Wi wakeraj nútiksaran, Winia umirtukar péñker wekainia nuna ni nemasriya uwentikrattajai. Sapijmiatsuk winia tuke takartusarat tusan túrattajai” Yus tímiayi Apráman. Iisha ni shuari asakrin, nuna taku incha túramaji.

<sup>76</sup> Tura amincha, uchiru, “Uunt Yusna etserniuiti” turamartatui. Amesha ni tátintri iwiarataj tusam Úuntaj émkim wétatme.

<sup>77</sup> Ni shuari, ni tunaari tsankurnar uwemprarat tusam túrattame.

<sup>78-79</sup> Yuska ashí shuaran anea asa, incha wáitnentramak ni pujamunmaya ni tsáapnintriñ suramsaitji. Ni enentáin kiritniunam wekainia nuna, mesertiniunum jeatemá ásarmatai, ni tsáapnintri jeat' tusa túraiti. Tura ashí incha ii enentáin imiatkinchanum wekasarmí tusa túraiti.” Nuní tímiayi Sakarías.

<sup>80</sup> Uchisha tsakarmiayi. Tura Yúsán nekaki-nekaki wémiayi. Israer shuar-num etserkatin tsawantri jeatsainkia atsamunam pujuyayi.

## 2

### *Jesusa akiiniamuri* (Mateu 1.18-25)

<sup>1</sup> Wats, Juan akiiniamia nú uwitin uunt akupin Akustu ashí nuñkanam áentsun nekapmarartí tu chichakmiayi.

<sup>2</sup> Nu nekapmartinian yaunchu túrushtain yamá túriarmiayi. Siria nuñkanam Seriniu akupin pujá túrawarmiayi.

<sup>3</sup> Ni naari áartaj tusa ashí shuar ni nuñkeniñ wétin áarmiayi.

<sup>4</sup> Tuma asamtai Jusé Nasaré péprunmaya Kariréa nuñkanam amia nuyá jiinki Pirin péprunam Jutía nuñkanam amia nuí wémiayi. Juseka Tawit weenam akiinia asa, ni nekas nuñkenka Pirin kauyayi.

<sup>5</sup> Nu asamtai, ni náarín áartaj tusa Jusé wémiayi Marijijai. Marisha Jusé núweyayi. Tura tsanincharuyayi. Túmaitiat Marisha Yusa Wakaní kakar-marijijai ajamtiniuyayi.

<sup>6</sup> Tura nuí Pirinnum pujuiniaí Marí takustintri jeamiayi.

<sup>7</sup> Nuí iwiairín uchin áishmankan takusmiayi. Tura uchi penutaijjai penuar, waaka yurumtainiam áepsamiayi. Írar kanutainiam pujustin ankant atsá asamtai túrawarmiayi.

*Murikiun wáinniun nayaimpinmaya suntar Yus akatar akuptukmia nu*

<sup>8</sup> Tura Pirinnum tíjiuch murikiun wáinin kashi murikrín wáiniuk pujuarmi-ayi.

<sup>9</sup> Túmainiaí nayaimpinmaya suntar murikiun wáinin matsatainian wantin-tiukmiayi. Tura Yúsnumiá tsáapnin ni matsatainiamunam etsantramiayi. Túrunamtaí murikiun wáinniuka ti ashankarmiayi.

<sup>10</sup> Túrasha nayaimpinmaya suntar tímiayi “Ashamprukairap. Ashí áentsnum ti warastin atí tusan ti penker chichaman itiarjarme.

<sup>11</sup> Júiti: yamáí tsawantai uunt Tawitia péprurín Pirinnum yaunchu Yus anakiamu KRISTU tutai, uwentikramprataj tusa akiinturmarme. Nu Uchisha ashí áentsun akupniuiti, tímiayi.

<sup>12</sup> Tura jujai nekaattarme: uchi penutaijjai penuarna waaka yurum-tainiam tepá wáinkiatarme. Nu wáinkiarum nekas júiti, tu nekaattarme.”

<sup>13</sup> Nu chichamaik nayaimpinmaya suntar ti untsurí, nayaimpinmaya káunkarmiayi. Túrawar Yusa naarín shiir awajainiak júna tiarmiayi:

<sup>14</sup> “Nayaimpinmasha Yus nankaamantuiti tu enentáimtusarti. Tura ju nunkanmasha Yusjai nawamnaikiaru ainia nu imiatkinchanum pujusarti.” Tu tiarmiayi.

<sup>15</sup> Tura Yusa suntari nayaimpiniam waketkiarmataí murikiun wáinin tiarmiayi “Wats, Pirinnum wárik wetái. Nu túrunamu Yus turamajnia nu iyumi” tiarmiayi.

<sup>16</sup> Nuna tiar wárik wearmiayi. Tura Marincha Jusencha wáinkiarmiayi. Tura uchincha waaka yurumtainiam tepan wáinkiarmiayi.

<sup>17</sup> Wear nuna wáinkiar, nayaimpinmaya suntar uchi túrunamurín timia nuna etserkarmiayi.

<sup>18</sup> Tura murikiun wáinin tiarmia nuna antukaruka ti enentáimtusarmiayi.

<sup>19</sup> Túrasha Marikia ashí túrunamia nuna ni enentáijjainkia enentáimtu puju-miayi.

<sup>20</sup> Tura murikiun wáinniuka antukarmia nuna enentáimtusar, tura ísarmia nunasha enentáimtusar “Nayaimpinmaya suntar ujatmakmajnia tímiatrusan túrunayi” tiarmiayi. Tuma ásar Yusa náarín shiir awajsar kantampruawar waketkiarmiayi.

*Uchin Jesusan Yusa Uunt Jëen itiarmania nu*

<sup>21</sup> Tura uchi akiiniamu uchu tsawant jeamtaí, ni túrutairín túrin ásar, ni shu-nichirí nuapen tsupirkarmiayi. Túrawar Marí ajapratsain nayaimpinmaya suntar tímia nútiksai “Jesus” anaikiarmiayi.

<sup>22</sup> Tura Muisais akiiniatniunam akupkama núnisan, tsawantri jeamtaí, Yusa Uunt Jëen Jerusarénnum uchin Yus iiktustai tusar júkiarmiayi.

<sup>23</sup> Kame Yus-Papiniun ju aarma awai:

“Ashí uchi iwiairi áishman akiinkiuñka Yusna átatui.”

<sup>24</sup> Tuma asamtaí, Marí Yusa Uunt Jëen wáitsuk pujamu wayatniuri jeam-tai, uchin Yus iistí tusa Yusa Uunt Jëen Jerusarénnum pujana nuí itiarmiayi.

Tura yampitsan jímiaran súsarimiayi. Muisáis akupkamun umiiniak nuna túrawarmiayi.

25 Nu túmai Semeún naartin áishman Jerusarénum pujumiayi. Semeúnsha Yusa Wakaní pujurma asa péñker áishmankauyayi. Yúsan nekas enentáimtiniuyayi. Yusa anaikiamuríjjai Israer-shuar ankant ajastin jeati tusa nákauyayi.

26 “Winia anaikiamur KRISTU tutai wáintsuk jákashtatme” uunt Yusa Wakaní tu jintintiamiayi.

27 Nú Semeún Yusa Wakani “wetá” tutai, Yusa Uunt Jeen wémiayi. Tura nú tsawantai Muisáis tímia núnisan umirkatai tusar Marisha Jusesha uchin Jesusan Yusa Uunt Jeen itiararmiayi.

28 Itiararmatai Semeún uchin jusa miniakas Yúsan áujuk juna tímiayi:

29 “Yamaikia, Uunta, Amiin wi jeatin ankant atí. Turutmiamna nu ímiatrusmek umikiume.

30-31 Ju Uchi ashí aents uwentikrartá tusam susamna nuna yamáí imia winia jíirujai wáinkiajai.

32 Israer-shuarcha ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájinia nuna ashí aents shiir enentáimtikrartí tusam ju Uchi akuptukmaitji. Nuna wáinkian shiir enentáimsan jákatniuitjai.”

33 Tura Semeún Uchiniun tu chicharkui Jusesha Jesusa nukurísha ti enentáimprarmiayi.

34 Semeúnsha chichaak “Yus shiir enentáimturmasartí” nin tímiayi. Nuyasha Marin chicharuk tímiayi “Nekaata. Ju Uchin Israer-shuartisha untsurí naki-trar iniarartatji. Tura chíkich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarin ti paant iniakmastatui. Tuma ain untsurí Aun yajauk chichariartatui.

35 Nujai shuar ní enentáin warinia enentáimia nu, paant átatui. Maaj, ashí nu túmakui, íjumua núnismek ame enentáimin ti wáitsattame, Mariya.” Tu chichasmiayi Semeún.

36 Nuwasha Ana naartin nuí Yusa Uunt Jeen pujumiayi. Niisha Yúsnan etserniuyayi. Ni aparísha Panuíruyayi tura Aser shuarauyayi nu nuwa. Niisha ti úuntchiyayi. Niisha yama nuatnaikiamujai siati uwi ni áishrijjai tsanin pujusarmiayi.

37 Tura wajemamiayi. Tura uchenta kuaru uwi takakuyayi. Tura ninikia Yusa Uunt Jeeniá jíintsuk káshisha tsawajsha tuke Yúsan áujniuyayi. Tura yurumtsuk Yúsan áujniuyayi.

38 Semeún tuasua amikmatai Anasha taa, Uchin wáiniak Yúsan yu-miñsamiayi. Tura Jerusarénum Yus uwentikrampratai tusa nákarmia nuna ájukunka uchin áujmat wémiayi.

### *Nasarénum waketkiarmania nu*

39 Nuyá Yus tímia nuna ashí túrawar amikiar Kariréa nunkanam, kame nii pujumia nú peprunam Nasarénum Jusesha Marisha Uchisha waketkiarmi-ayi.

40 Uchi Jesus tsakaki, kakaram ajaki tura nú nankaamas nekaki wémiayi. Tura Yus Nin ti shiir awajsamiayi.

*Jesus Yusa Uunt Jeen túrunamuri*



41 Jusesha, Jesusa nukurísha tuke uwitin paskua námper jeakui Jerusarénum weu ármiai.

42 Ni túrutairí túruiniak, Jerusarénum weak Jesusan tuse uwí jeamtai júkiarmiayi.

43 Námper amuukamtai ni nukurísha Jusesha nékachmanum Jesuska Jerusarénum juákmiayi.

44 Marisha Jusesha “wíi shuarjái winiawai” tusa, núnaka eątsuk chikichík tsawant wekasarmiayi. Nuyá wáinkiataj tukamá, ni shuariin tura ni nékamunam eąkarsha,

45 wáinkiacharmiai. Nuinkia Jerusarénum ataksha waketrukiarmiayi, eąktai tusar.

46 Tura menaintiú tsawant eąkar Yusa Uunt Jeen Yus akupkamun jintinian anturak anintrú pujan wáinkiarmai.

47 Tura nuj ashí Jesusan anturkarmiania nu, niisha ti nékakui tura áimtanash ti péńker áimkiui, ti enentáimturarmiayi.

48 Ni aparísha nukurísha tumáa pujan wáinkiar, ti enentáimprarmiayi. Tura ni nukurí chichaak tímiayi “Uchiru, ąasha urukamtai iturchat enentáimtikrurmam? Ame apasha wisha urukayik tusar ti eąkjame” tímiayi.

49 Tutai Jesus tímiayi “¿Urukamtai eątrum? Winia Aparnan túratniuitjana nuka nékatsrumek” tímiayi.

50 Tura timia núnaka penké nekaacharmiayi.

51 Nuyá Jesus niijjai Nasarénum waketikimiayi. Ninkia tuke umiriarmiayi. Ashí nu túrunamun Marikia tuke enentáimtu pujumiayi.

52 Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

### 3

#### *Imiakratin Juanka etserkamuri*

*(Mateu 3.1-12; Márkus 1.1-8; Juan 1.19-28)*

1 Tipiri uunt akupin pujamu kinse uwí jeamtai, Jutía nuńkanam Punseu Piratu akupin pujumiayi. Tura Kariréa nuńkanam Erutis akupin pujumiayi. Itiurea nuńkanmasha Trakuniti nuńkanmasha ni yachí Jiripi akupin pujumiayi. Tura Apirinia nuńkanam Risania akupin pujumiayi.

2 Tura nu uwitin Anassha Kaipiássha Israer-patri uuntri pujuarmiayi. Nu uwitin Sakaríasa uchirí Juan atsamunam pujan Yúsaiya chíchaman antukmiayi.

3 Nuyá Jurtan entsanam supichik matsamarma nuna Juan wekaatusar juna tímiayi “Winia tunaarun Yus tsankurturat tusarum, enentai yapajiarum imiantiarum.” Tu ujakmiayi.

4 Nu ujakman Isayas yaunchu juna áarmiayi:

Atsamunam wekaana nu untsunmun ántuiniawai. Nii untsunuk juna tawai:  
Atumí enentáj Uunta jinti iwiarturtarum; naka awajsatarum.

5 Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pujutrin ainia nusha métekrak paka awajsamu arti.

6 Túrunamtai ashí nuńkanmayá aents Yúsaiya uwempratin aan nekaawartatui.

7 Untsuri aents imiatit tusar tariarmia nuna Juan chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa ¿ya ujatmakuram? tímiayi.

8 “Iikia Apraám weeaitji, tuma asakrin Yus shiir enentáimturmají” tu enentáimtumasaírap. Antsu enentáim yapajíámuitkiuinkia péñker wekaamurmijíají paant iniakmastarum. Warí, Yus wakerakka, ju kayan Apraáma shuarín páchitsuk najankainti, tímiayi.

9 Aneartarum. Numi ajaktinian kampuwárin jacha atuttsamuiti. Numi péñker nereatsna nuka ajakar jinium apeamu ártatui” tímiayi.

10 Tutai aentska enentáimprar “¿Nuiñkia itiurkatjik?” tiarmiayi.

11 Tutai Juan tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

12 Uunt akupniu kuítrin juu armia nú shuar imiantiaj tusar Juáñkan weriar aniasarmiayi. “Uunta, ¿iisha warí itiurkatjik?” tiarmiayi.

13 Tutai Juan tímiayi “Kuit uunt akupin tana nu iniañkasrum achikiairap.”

14 Suntarsha aniasarmiayi “Uunta, ¿iisha warí itiurkatjik?”

Juañsha tímiayi “Ame kakarmarmijíají chikichna jurukip. Tura nin tsanumpruraip. Tura uunt akupin akirmana nújain warasta” tímiayi.

15 “Ju Juan Yusa anaikiamurinchuashit” tu enentáimsar paant nekaataitsar nákarimiayi.

16 Tumaj Juan tímiayi “Wikia aya ayashmin entsanam imiajrume. Tura wijíají nankaamas ana nu tátatui. Ni sapatrí jinñkiamurinkisha atitrachminiaitjají. Niisha taa, imiantinia áanis tura jiíya áanis Yusa Wakanín enketramprattarme.

17 Shuar aruusan awajtia núnisan, nusha yajauch ana nuna ajapa aya péñkernak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

18 Juan nu arant shiir chichaman áentsun ti núkap ujakarmiayi.

19 Tura nuyasha akupin Erutisan chicharkamiayi. Ni yachí Jiripi nuarín jirutíasan kasarak nuatkuí tura chíkich yajauchincha túrakui chicharkamiayi.

20 Tura Erutis núnaka ántutsuk chíkich yajauchin túramiayi. Juáñkan achik sepunam enkeamiayi.

### *Jesusa imianmiari*

*(Mateu 3.13-17; Márkus 1.9-11)*

21 Nu túruntsain, Juañsha ashí nú nuñkanmaya áentsun imiak pujurainaj Jesússha imianmiayi. Niisha Yúsan áujuk pujají nayaimpisha uranmiayi.

22 Tura Yusa Wakaní yámpits najanar paant tarurmiayi. Tura Yus nayaimpinmaya chicharuk “Ame winia aneamur Uchiruitme; Ámin ti wararjame” tímiayi.

### *Jesukrístu shuari*

*(Mateu 1.1-17)*

23 Jesus trainta (30) uwí takaku asa ni takatrin nanñkamamiayi. “Jusé uchirínti” tiniu armiayi. Jusésha Iría uchiríyayi.

24 Irísha Matata uchiríyayi; Matat Riwí uchiríyayi; Riwí Mirkía uchiríyayi; Mirki Jana uchiríyayi. Jana Jusé uchiríyayi;

25 Jusé Matatíasa uchiríyayi; Matatías Amusa uchiríyayi; Amus Najuma uchiríyayi; Najum Esrí uchiríyayi; Esri Nakaia uchiríyayi;

26 Nakai Maata uchiríyayi; Maat Matatíasa uchiríyayi; Matatías Semái uchiríyayi; Semái Jusé uchiríyayi; Jusé Jutáa uchiríyayi;

27 Jutá Juana uchiríyayi; Juana Resa uchiríyayi; Resa Surupapira uchiríyayi; Surupapir Saratiira uchiríyayi; Saratiir Nerí uchiríyayi;

28 Neri Mirkí uchiríyayi; Mirki Atí uchiríyayi; Atí Kusama uchiríyayi; Kusam Irmutama uchiríyayi; Irmutam Ira uchiríyayi;

29 Ir Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi;

30 Matat Riwi uchiríyayi; Riwi Semeúnka uchiríyayi; Semeún Jutáa uchiríyayi; Jutá Jusé uchiríyayi; Jusé Junan̄ka uchiríyayi; Junan̄ Iriakímia uchiríyayi;

31 Iriakím Mirea uchiríyayi; Mirea Mainián̄ka uchiríyayi; Mainián̄ Matata uchiríyayi; Matata Natan̄ka uchiríyayi;

32 Natan̄ Tawitia uchiríyayi; Tawit Isái uchiríyayi; Isái Upitia uchiríyayi; Upit Puusa uchiríyayi; Puus Saramún̄ka uchiríyayi; Saramún̄ Naasun̄ka uchiríyayi;

33 Naasun̄ Aminiatapa uchiríyayi; Aminiatap Arama uchiríyayi; Aram Esruma uchiríyayi; Esum Paresa uchiríyayi; Páres Jutáa uchiríyayi;

34 Jutá Jakupa uchiríyayi; Jakup Isaka uchiríyayi; Isak Apráama uchiríyayi; Apráam Tarea uchiríyayi; Taré Nakura uchiríyayi;

35 Nakur Seruka uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi;

36 Sara Kainián̄ka uchiríyayi; Kainián̄ Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi;

37 Ramik Matusarín̄kia uchiríyayi; Matusarín̄ Enuka uchiríyayi; Enuk Jari-tia uchiríyayi; Jarit Maararíira uchiríyayi; Maararíir Kainian̄ka uchiríyayi;

38 Kainian̄ Enusa uchiríyayi; Enus Seta uchiríyayi; Set Atan̄ka uchiríyayi; tura Atan̄ Yus najanamuyayi.

## 4

### *Jesusa nekapsamuri*

(*Mateu 4.1-11; Márkus 1.12-13*)

<sup>1</sup> Jesusa enentáin Yusa Wakaní pimiutkamiayi. Jessusha Jurtan̄ entsan-maya waketkimtai Yusa Wakaní aents atsamunam jukimiayi.

<sup>2</sup> Tura nujsha kuarenta tsawant pujusmiayi. Tura íwianch Nin tunaanum ajaraintiajtai tusa pujurmiayi. Nu kuarenta tsawantin Jesus yurumsuk pujá asa ti tsukammiai.

<sup>3</sup> Nuín̄kia íwianch chicharuk “Amesha nekas Yusa Uchiríntkiumka ju kaya apatuk najanata” tímiayi.

<sup>4</sup> Tutai Jesus tímiayi “Yus-Papí tawai: “Aya apatukujain̄ shuar iwiaaku pujuschamniaiti. Antsu ashí Yus-Chicham tana nujai nekas iwiaaku pujusminiaiti,” tawai” tímiayi.

<sup>5</sup> Tura nuyá íwianch naint yakí wájakmanum jukí, ashí nun̄ka ainia nuna ju chichamaik iniaktusmiayi.

<sup>6-7</sup> Tura chicharuk tímiayi “Ashí ju nun̄ka wáinmena nu wíniaiti. Tura wi wakerajna nú shuaran súsatnuijtai. Tuma asamtai tikishmatrurakminkia ju nun̄kanam ashí akupkatniun susattajme. Tura nuí ni warirí ainia nusha áminiu átatui” tímiayi.

<sup>8</sup> Tutai Jesus tímiayi “Yus-Papí tawai:

“Aya Niñki Yus ame Úntrum tikishmatram enentáimtustiniaitme.”  
Tau asamtai, werumta, iwianchi” tímiayi.

<sup>9</sup> Ataksha íwianch Jesusan Jerusaréñ péprunam jukimiayi. Tura Yusa Uunt Jee yakiini iwiak tímiayi:

<sup>10</sup> “Yus-Papí tatsuk:

“Yuska ni suntarín wáinkiatá tusa akupturmaktatui.

<sup>11</sup> Kayanam ajintrañ tusa wenkurmaktatui.”

Tuma asamtai nekas Yusa Uchirinkiumka juyá akaikim iniaata” tímiayi.

<sup>12</sup> Tutai Jesus ámiuk tímiayi “Yus-Papí junasha tawai:

Yus ame Úntrum nekapsataj tiip.”

<sup>13</sup> Tuma asamtai íwianch penké tujintiak ishichik tsawant Jesusan ini-aisamiayi.

*Kariréa nunkanam Jesus ni takatrín nankamamiania nu*

*(Mateu 4.12-17; Márkus 1.14-15)*

<sup>14</sup> Jesus ni enentáin Yusa Wakaní kakarmari pimiutkamu ajas Kariréa nunkanam waketikimiayi. Nu nunkanam nankaamantu túramurín áujmatiarimiayi.

<sup>15</sup> Nu nunkanam ashí péprunam Israer-shuar iruntai jea armia nuñ un-uniarmiayi. Tura anturkarmia nuka ni náarin shiir awajsarmiayi.

*Jesus Nasarénum pujumiania nu*

*(Mateu 13.53-58; Márkus 6.1-6)*

<sup>16</sup> Ni tsakarmariñ Nasarénum Jesus wémiayi. Tura Israer-shuar ayam-pratin tsawantin iruntai jeanam wayamiayi, tuke turin asa. Tura wayá Yus-Papin áusataj tusa wajakmiayi.

<sup>17</sup> Nuñkia Yúsnan etserin Isayasa áarmarin súsarmiayi. Nuna urak, nuñ juna áarman wáinkiamiayi:

<sup>18</sup> Yusa Wakaní winí pujurtawai. Shuar warainiachun shiir chichaman ujaktinian anaitukuiti. Kúntuts enentáimiar wake mesek pujuinian tsuártinian akuptukuiti. Tura jii kusuruncha ímtiktinian, tura yajauch awajsamu ainia nuna péñker awajsatniuncha,

<sup>19</sup> tura Uunt Yus, shuáran yaiñtin tsawantri jeán etserkatniuncha akuptukuiti.

<sup>20</sup> Nu áarman augsua amik papin nukukmiayi. Tura iruntai jeanam yáimin pujan susa iniais Niñkia etserkataj tusa pujusmiayi. Tura ashí shuar pu-juarmia nu émamkes ñ pujuarmiayi.

<sup>21</sup> Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

<sup>22</sup> Jesusan ashí péñker áujmatiarimiayi. Tura Jesus ti shiir chichaakui ti enentáimprar “Juka Jusé uchirinchukaiñ” tiarmiayi.

<sup>23</sup> Tu enentáimainiakui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek jujisha túrata tusarum nu turuttiatrume.

<sup>24</sup> Túrusha nekas tájarne, Yúsnan etserniun ni nunkenkikia nii tana nuna anturainiatsui.

<sup>25</sup> Nuyasha tájarme, Irías pujumia nú tsawantin, menaintiú uwí nan̄kaamas yumi yutukcha asamtai ashí Israer núnkanam ti tsuka amia nūj ti untsurí waje irunmiayi.

<sup>26</sup> Tuma aiñ nu wajen yainti tusa Yus Iríasan akuptukchamiayi. Antsu chíkich nun̄kanmaya wajen Sarepta péprunam pujumia nuna yainti tusa akuptukmiayi. Sarepta pepru Sitiún péprunam tjiyuch pujawai.

<sup>27</sup> Núnisan̄ ii nun̄ksha Iriséu pujumia nu tsawantin ti untsurí tunamaru iruniarmiayi. Tura núnaka tsuárcharmiayi. Antsu chíkich nun̄ka, Sírianmaya Naaman̄kan tsuármiayi” tímiayi Jesus.

<sup>28</sup> Israer-shuarsha iruntai jeen pujuarmia nu, nuna antukar ti kajerkarmiayi.

<sup>29</sup> Tura wajakar Jesusan jjiiki péprunmaya akupkarmiayi. Tura pepru amia nūj naint yakí nan̄katkamunam, nuyá akaki ajuatai tusar júkiarmiayi.

<sup>30</sup> Túrasha Jesuska irunar matsatainiamunman̄ etempraktak jiinki wémiayi.

### *Iwianchrukun Jesus tsuármiania nu*

*(Márkus 1.21-28)*

<sup>31</sup> Nuyá Jesus Kariréa nun̄kanam Kapernáum pepru amia nūj wémiayi. Tura Israer-shuara ayampratin tsawantriin tuke etserki wémiayi.

<sup>32</sup> Yusa kakarmariñ takaku asa nūjai etserkamiayi. Tuma asamtai “Yusa kakarmariñjai unuñiamtsujik” tiar ti enentáimprarmiayi.

<sup>33</sup> Chíkich sawantai áishman̄ iwianchruku Israer-shuar iruntai jeenam pujumia nu untsumuk tímiayi,

<sup>34</sup> “Inikiartusta. Iikia Áminkia pachistin nakitiaji. ¿Warí, incha amukratkataj tusam táchamek? Wikia nékajme. Ámeke ti pen̄ker Tunaarincha núitme” tímiayi.

<sup>35</sup> Tutai Jesus iwianchin kakantar chicharuk “Takamatsata. Ju áishman̄ ikiuktia” tímiayi.

Tutai nu chichamaik íwianch áishman̄numiã jiinki weak nun̄ká ajuant ikiukmiayi. Túrasha nekas yajauch awajtsuk ikiukmiayi.

<sup>36</sup> Ashí pujuarmiania nu ti enentáimiar mai tunai ajarmiayi. “¿Jusha warí chichamait? Ju áishman̄ Yusa kakarmariñjai iwianchin jjiiki awematsuk” tiarmiayi.

<sup>37</sup> Tura ashí nú nun̄kanam Jesusa túramurñ áujmatiarmiayi.

### *Semuñ Pitru tsatsarñ Jesus tsuármiania nu*

*(Mateu 8.14-15; Márkus 1.29-31)*

<sup>38</sup> Jesussha Israer-shuara iruntai jeeniã jiinki Semun̄ka jeen wémiayi. Semun̄ka tsatsarī tsuer ti jáamiayi. Ti jaakuí Jesusan “tsuárturtá” tiarmiayi.

<sup>39</sup> Jesussha jaa tepan tsunsumprua tsuemun “michatrata” tímiayi. Tutai nú chichamaik nuwasha michatramiayi. Nú chichamaik nantaki nincha ayurawarmiayi.

### *Untsurí jaan Jesus tsuármiania nu*

*(Mateu 8.16-17; Márkus 1.32-34)*

<sup>40</sup> Etsa akaikin aī ni shuarī nan̄kamas sunkurjai jaarmia nuna Jesusan ikiaatkarmiayi. Jesussha jáinian chíkichkiniak chíkichkiniak uwejejai antin̄kiar tsuárarmiayi.

<sup>41</sup> Ti untsurí iwianchruku armia nunasha iwianchrñ jjiirkiarmiayi. Jiinkiar íwianchkia untsumainiak “Ámeke Yusa Uchirñme” Jesusan tiarmiayi.

Tura niisha “Jesuska Yusa anaikiamurinti” tu nékainiakui Jesus kakantar chicharak itiatmamtikiarmiayi.

*Kariréa nunkanam Jesus etserkamaiania nu*

*(Márkus 1.35-39)*

<sup>42</sup> Kashin káshik tsawaak Jesus péprunmaya jiinki atsamunam Niñki wémiayi. Tura shuarsha eákiar ni pujamunam jeariarmiayi. Tura iijjai tuke pujusat tusar emetataitsar wakeriarmiayi.

<sup>43</sup> Túmain Jesus tímiayi “Yus ii enentáin akupkatajtsa wakera nú shiir chichaman chíkich péprunam matsatainia nunasha ujaktiniaitjai. Nu túrata tusa akupkamuitjai” tímiayi.

<sup>44</sup> Tuma asamtai Kariréa nunkanam Israer-shuar iruntai jeanam Jesus tuke etserki wémiayi.

## 5

*Namakan ti untsurín achikiarmiania nu*

*(Mateu 4.18-22; Márkus 1.16-20)*

<sup>1</sup> Chíkich tsawantai Jesus Jínisarít antumianka tutainium káanmatkari pujai ti untsurí shuar, Yusa chichamen antuktai tusar wakeruiniak Jesusai káunkarmiayi. Antuktai tusar wakeruiniak kaé ajattsarmiayi.

<sup>2</sup> Tura jimiará kanun antumiankan káanmatkariin tepan wáinkarmiayi. Ni nérenniurinkia jíinkiar ni nekarín nijia pujuinia asamtai kánuka ankant armiai.

<sup>3</sup> Tuma asamtai Jesus Semunka kanurín enkempramiayi. Tura Semunkan chicharuk “Ishichik ajapén juruktía” tímiayi. Nuñkia kanunam enkemas áentsun káanmatkanam pujuinian unuiniamiayi.

<sup>4</sup> Unuiniasia amik Semunkan chicharuk “Kanu kunanam jukim neka aj ajunkatarum” tímiayi.

<sup>5</sup> Tutai Semun tímiayi “Túrasha, Uuntá, káshisha tukeaju-junkuar tsawarji. Túrasha penké achikchaji. Kame áankisha Ame támajai ajunkatjai” tímiayi.

<sup>6</sup> Tura ajunkar namakan ti untsurín achikiarmiayi. Túram nekasha jaanaki wémiayi.

<sup>7</sup> Tuma asamtai ni írutkamurín chíkich kanunam pujuinian uwejéjai “winitia, yáintkiamniuram” tusar untsukarmiayi. Niisha táarmiayi. Túrawar jimiará kanunam métej awajsarmiayi. Tura kanusha init wayastatuk ajamiayi.

<sup>8</sup> Nuna túramtai Semun Pítiru Jesusan tikishmatar tímiayi “Uuntá, wikia ti tunaitjai. ¿Wíjiaisha itiuurak pujustam?”

<sup>9</sup> Semunsha ni írutkamuríjiai namakan timiá untsurín wáinkiar ashankarmiayi. Tuma asa Semunsha nuní tímiayi.

<sup>10</sup> Tura Sepetéu uchirí Jakupusha Juansha Semunjai pujuarmia nusha ashankarmiayi. Tura Jesus Semunkan tímiayi “Ashamkaip. Yamaikia namaka-achinia áintsamek aents-égu ajastatme.”

<sup>11</sup> Nuyasha kanurín kukar júkiar, ashí takakmaríncha ikiukiar Jesusan nemarki wearmiayi.

*Tunamaru áishmankan Jesus tsuármiania nu*

*(Mateu 8.1-4; Márkus 1.40-45)*

<sup>12</sup> Ukunam Jesus chíkich péprunam pujai tunamaru áishman taa Jesusan wáiniak tikishmatar nunká shushuma pankái Jesusan tímiayi “Uuntá, wakerutakmeka páchitsuk tsuáramniatme.”

13 Nuna tutai Jesus antin tíaiaiyi “Wakerajai. Tsuaajme.” Tura nú chichamaik tunamarusha péñker ajasmiaiyi.

14 Túrasha Jesus chicharuk “Ámeke nu etserkaip, tíaiaiyi. Antsu Israer-shuar Patrij werim ame péñker ajasmanum Muisáis akupkamia núnismek susata. Nujai ashí shuar ame péñker ajasmarmín nekaawartatui” tíaiaiyi.

15 Tura Jesusa túramuri ti etsernamaiyi. Túmakui untsurí aents anturkataj tusar káutkarmiaiyi. Tura ni sunkurincha tsuámartaj tusar káutiarmiaiyi.

16 Núnisar Jesuska aents atsuiniamunam we ni Aparin áujmiaiyi.

### *Emearun Jesus tsuármiania nu*

*(Mateu 9.1-8; Márkus 2.1-12)*

17 Chíkich tsawantaj Jesus ununiak pujaj Pariséu aents tura Israer-shuara jintinniurjsha Kariréa péprunmayasha, Jutía péprunmayasha tura Jerusarénnumiasha káunkarmia nu antúu pujuarmiaiyi. Jaa tsuártinian Yusa kakarmarin takakuyayi Jesus.

18 Nuinkia emearun tampumprua kuaru shuar itiararmiaiyi. Jesus pujamunam inít awayattsar wakeriarmiaiyi.

19 Tura shuar ti untsurí piaku asamtai wayamnia atsumiaiyi. Túmaitkui yakiniñ wear jean urakar; aents kaé ajas matsatmanum Jesus pujamunam emearun tampunam nená itiararmiaiyi.

20 Nin itiarmania nu, Jesus Yusa kakarmarin takakui, tú enentáimtamun Jesus nekáa emearun tíaiaiyi “Ame tunaarum tsankuramuitme.”

21 Nuinkia Israer-shuara jintinniurjsha, Pariséusha ni enentáin enentáimsar “¿Jusha yait Yúsa náarin yajauch awajtin? Warí, aya Yúsak tunaan tsankurachminkiait” tu enentáimsarmiaiyi.

22 Tura Jesus ni enentáimsamurin nekáa tíaiaiyi “¿Urukantai tú enentáimprarum átum?”

23 Nuinkia ¿warí imiá yúpichuchit, tsuártiniak, ni tunaari tsankuratniuk?

24 Wats, Aents Ajasu tutai Wisha tunaan tsankuratniun Yusa kakarmarin takakjai. Jujaj nekaatarum tusan wats itiarchat tárugna nuna túrattajai.” Nuyá emearun chicharuk tíaiaiyi “Amesha wajakim, tampuram achikiam ame jeemijn wetá.”

25 Nú chichamaik emearu niisha íimiainiamunmanj tampurin achik wajaki ni jeen Yúsan wararki wémiaiyi.

26 Túmakui ashí shuar ti enentáimprar Yusa náarin shiir awajsarmiaiyi. Tura ashamainiak “aentsti tujinkiamu yamá wáinkiaji” tiarmiaiyi.

### *Riwin Jesus untsukmiania nu*

*(Mateu 9.9-13; Márkus 2.13-17)*

27 Ukunam Jesus wekas akupniu kuítrin-juu, naari Riwi, ni chíkich naari Mateu, akupin akitiai jeanam pujan wáinkiamiaiyi. Wáiniak “nemartusta” tíaiaiyi.

28 Tutai Riwi wajaki takakmarinkia ikuak Jesusan nemarsamiaiyi.

29 Nuyá ukunam Riwi namperan Jesusan najatamiaiyi. Tura untsurí akupniu kuítrin-juu tura chíkich shuarsha káunkar misanam pujuarmiaiyi.

30 Tura Pariséusha Israer-shuara jintinniurjsha Jesusan tsanumpruniak Jesusa ununiarmurin tiarmiaiyi “¿Maaj, urukantai atumsha akupniu kuítrin-juu ainia nújajisha tura chíkich yajauch shuarjajisha iruntrarum yurumprum?”

<sup>31</sup> Tutai Jesus áimkiamiyi “Shuar jaachu péñker ainiana nu çtsuákratniun atsumainiawak? Antsu jaa ainia nu tsuákratniun atsumainiawai.

<sup>32</sup> “Wikia péñkeraitjai” tuinia nuna untsuktajtsan táchaitjai. Antsu yajauch shuar ni enentáin yapajjá Winia ajasat tusan untsuajai” tímiayi.

*Yurumtsuk Yus áujtsatniun Jesusan aniasarmiania nu*

*(Mateu 9.14-17; Márkus 2.18-22)*

<sup>33</sup> Nuyá Jesusan aníak tiarmiayi “Juanka unuiniamurisha, Pariséu unuiniamurisha yurumtsuk Yúsan áujainiatsuk. Tura ame unuiniamurmeka çurukamtai ijiarma Yúsan áujainiatsu?” tiarmiayi.

<sup>34</sup> Tutai Jesus tímiayi “Nuatma nampernum, çipiaamu ainia nu ijiarmamniakait, yamá- nuatu pujai?”

<sup>35</sup> Atsá. Wats Wisha ukunam junaktiatjai; nuñkia ijiarmatin átatu” tímiayi.

<sup>36</sup> Tura junasha nujai métek-taku unuiniamiayi: “Çyamaram pushí tsupikiar nujai arut pushiniam anujtukminkiait? Nu túramka yamaram pushí yajauch ajasaintiui; túrasha shiir anujkamu arut pushijiai mai metek yamaram wáinkiachminiati.

<sup>37</sup> Núnisan nijiamanch yamá nawamu nuap najanam arutnum yaraachminiati. Túramka nijiamanch kariak ijiakratniuiti; túmak nijiamchisha nuap najanamusha mai metek menkainiawai.

<sup>38</sup> Tuma asamtai nijiamanch yamá nawamu yamaram nuap najanamunam yaraatniuiti. Nu túramka mai metek péñker átiniaiti.

<sup>39</sup> Yaunchu nawamu úmana nuka yamarman nakitrattui. “Yaunchu nawamu imiá penkeraiti” tiártatu” tímiayi Jesus.

## 6

*Ayampratin tsawantaj trikiu neren achikiarmiania nu*

*(Mateu 12.1-8; Márkus 2.23-28)*

<sup>1</sup> Ayampratin tsawantaj Jesussha unuiniamurijjai araamunam wekasar, unuiniamurisha trikiu neren majurkutak wekainiarmiayi; tura tishisar neren yuawarmiayi.

<sup>2</sup> Nuna túruiniakui Pariséu tiarmiayi “Maaj, atumsha ayampratin tsawantaj takaschatniua nu, çurukamtai takaarum?”

<sup>3</sup> Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaiitrum.

<sup>4</sup> Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátriri yúatin ármiai. Tuma ain Tawitcha yajauchin túrutsuk achikmiayi, tímiayi.

<sup>5</sup> Wisha Aents Ajasuitkiun ayampratin tsawantan Nérenniurintjai” tímiayi Jesus.

*Shuara uweje jakaan Jesus tsuármiania nu*

*(Mateu 12.9-14; Márkus 3.1-6)*

<sup>6</sup> Chíkich ayampratin tsawantaj Israer-shuar iruntai jeenam Jesus wayá unuinartasa nankamamiayi. Nuñ shuar uweje untsuurja nu jakaa pujumiayi.

<sup>7</sup> Tura Israer-shuara jintinniurisha, Pariséusha Jesusan “yajauch túrayi” titiai tusar wakeruiniak, “ju ayampratin tsawantaj nu shuaran tsuartimpiash” tusar ii pujuarmiayi.

<sup>8</sup> Túrasha Jesuska ni enentáimmarin nekariarmiayi. Túmayat uweje jakaan chicharuk “Juí ajapén wajasta” tímiayi. Tutai áishman ajapén wajasmiai.



9 Nuñkia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratniujaj̄i ζtuá péñkerait? ζUwentikratin, máatniujaj̄isha tuá péñkerait?” tímiayi.

10 Nuyá téntakarmia nuna iis áishmañkan tímiayi “Uwejem takuitia.” Áishmañsha uwején takuimtai nú chichamaik péñker ajasmiaiyi.

11 Tura chíkichkia ti kajerkarmiaiyi. Túrawar “Jesus warí iturkamniakit” tusar aniniaisarmiaiyi.

### *Tuse unuiniamun Jesus anaikiamiania nu*

*(Mateu 10.1-4; Márkus 3.13-19)*

12 Nuyá Jesus Yúsan áujsataj tusa náinnium wakamiayi. Tura nu kashi Yúsan au-aujkua tsawarmiaiyi.

13 Tsawarmatai unuiniamur̄in ikiankar tuse anaikiamiaiyi. “Winia akatramuruitrume” tímiayi.

14 Ju ármiaiyi: Emka, Semuñ chíkich naarj̄ Pítiur apujtusmia nu; tura nuyá ni yachj̄ Antres, Jakupusha, Juañsha, Jiripisha, Parturumísha,

15 Mateusha, Tumassha, Arpeu uchirj̄ Jakupusha, Ásump Semuñsha,

16 Jakupu yachj̄ Jútassha, tura Jútas Iskariúti Jesusan ukunam surukmia nu. Nu tuse achikma ármiaiyi.

### *Untsurj̄ shuaran Jesus yáin̄kiarmiania nu*

*(Mateu 4.23-25)*

17 Niijjaj̄i Jesus náinniumiã pakanam taawarmiaiyi. Nuñ pujusarmiaiyi. Nuñsha untsurj̄ unuiniamur̄isha, tura Jutía nun̄kanmaya, tura Jerusarénnumiã tura nayaantsanam ayamach Tiru, tura Setuñ péprunmaya ti untsurj̄ aents antuktaitisar pujuarmiaiyi. Jesus tsuarati tusar káunkarmiaiyi.

18 Iwianchrukusha tsuámararmiaiyi.

19 Jesus tsuártinian tujinkiachu asamtai ashi shuar antiñtaj tusar wakermiaiyi.

### *Náinnium Jesus etserkamu*

*(Mateu 5.1-12)*

20 Ni unuiniamur̄in Jesus iis juña tímiayi: ““Yusan atsumajai” tárumna nu, Yus akupeamunam páchitkiaitrume; tuma asamtai warasminiaitrume.’

21 ‘Yamá tsukamarmena nu ukunam ejemartatrume. Tuma asamtai warasminiaitrume. Yamái útrumna nu, ukunmañka wishirtatrume. Tuma asamtai warasminiaitrume.’

22 ‘Atumin nakitramprarmatai, ajapramawarmataisha, tura Winia Aents Ajasu tutaiya nú shuar ajasuiti tusar tsanumprutmak katsekkramkarmataisha warasminiaitrume.’

23 ‘Túramtai nayainpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntrj̄ yaunchu Yúsnan etserniun nútiksarañ yajauch awajsacharmakia.’

24 ‘Tura kuítrinniutiram atumsha atumí waratairj̄ aya yamaik waintrume. Ukunmañka waraschattarme.’

25 ‘Atsumatsjai, tu enentáimprumna nu, ukunmañka atsumattarme. Nuñkia waraschattarme. Yamái wishíarmena nu, ukunmañka wáitiakrum úttiatrume. Nuñkia waraschattarme.’

26 ‘Ashí aents atumin shiir awajtamkurmin aneartarum. Nuñ waraschatniuitrume. Warí nuna uuntrj̄ ántar-yusnan etser̄in armia nuna nútiksarañ yaunchu shiir awajsarmiaiyi.’

*Ii nemasri aneatniun Jesus unuiniamiayi*

(Mateu 5.38-48; 7.12)

27 'Winia anturtarmena nuna juna tájarme: Ame nemasrum aneata, nakitramainia nusha shiir awajsata;

28 yajauch chichartamainia nusha shiir enentáimtusarta; katsekramainia nusha Yus áujtusarta.

29 Ame yapimin ijiutmamtai áatú yapirujsha ijiuti tusam iniaktusta; ame pushirmin jurutramkitiaj tuñiaikuisha sákurmencha jukiti tusam iniaisata.

30 Seatmana nu susata, tura áminiun jurutramainiakuisha ataksha awanturkitia tiip.

31 Chíkich winia túrutati tusam wakeramna nútiksamek chikichcha túrata.'

32 'Iista, aya atumin anenmainia nuke anekmesha, ¿nusha warí péñkera túrarum? Yajauch shuarsha nuna túrin áiniawai.

33 Tura atumniasha péñker awajtamainia nuke péñker awajkurmesha ¿nusha warí péñkera túrarum? Yajauch shuarsha nuna túrin áiniawai.

34 Awanturkimniaiti tu enentáimtarum nuke íkiakrumsha ¿nusha warí péñkera túrarum? Yajauch shuar nuamtak yajauch shuarjaj awanturkimniaiti tu enentáimsar ikianainiawai.

35 Tura atumsha nemasrum aneatniuitrume, tura péñker túratniuitrume, tura awanturkittiawai tu enentáimtsuk ikiastiniaitrume. Túrakrumniñkia Uunt Yus péñker akirmaktatrume; tura ni uchiríntjai tu iniakmastatrume. Yuska, "yumınsajme" ticha nunasha tura yajauch shuarnasha shiir awajawai.

36 Ii Aparı waitnentrarniua nútiksarmek atumsha waitnentratarum.'

*Chikicha túramurı ti enentáimtusairap*

(Mateu 7.1-5)

37 'Chikicha túramurı ti enentáimtusairap. Núnisanı Yuska atumı tunaarın iirtamsashtatui. Chikicha tunaarın "nuke asutniatniuiti" tiirap. Núnisanı Yus atumin sumantikramashtatrume. Tsanıkurnairatarum. Núnisanı Yus tsanıkurtamprattawai.

38 Chikichcha susata. Núnisanı Yus atumin suramsattarme. Niisha péñker nekapma, tura núkap ati tusa teeka awajas tura patas núkap enkea emetsaj amastatui. Atum chíkich túrarmena nútiksarı atumniasha túrutmattarme."

39 Tura nuyasha juna métek-taku chichaman ujakarmiayi: "Jii kususurusha ¿itiurak chíkich kusuruncha jukimniait. Mai metek wañnam iniaashtatuak?"

40 Unuiniamua nu unuiniana nuna nanıkaamas áchatniuiti. Túrusha niisha ti unuimiatar unuiniana nujaj métek nekaamniaiti.'

41 '¿itiurtsuk atumi jiiin numi enketna auk íitskesha atumı yachı jiiin tsuat enketusha iiyarum?'

42 Ame jiiimiiin numi tuke enketaisha ¿itiurtsuk ame yatsumi jiiıya tsuátan jurustajme tame? ¡Ántraitrume! Emka ame jiiimiiin numi enketna nu jusata. Nuñkia paant wáinkiatame yatsumi jiiin tsuat enketna nu jurustin.'

*Nerejai numi nekaatainti*

(Mateu 7.17-20; 12.34-35)

43 Péñker numi yajauchin nereatsui; tura yajauch numi péñkeran nereatsui.

44 Numisha ni neren nékanui. Tsachiknumiıasha kushinıkiap júukchamniaiti. Tura naranmayaj shuinia júukchamniaiti.

<sup>45</sup> Núnisan pénker shuar ni enentái pénker asamtai péñkeran chichaawai; tura yajauch shuar, enentái yajauch asamtai yajauchin chichaawai. Páantchakait. Enentáin pimiutkamu ana nuyan ni wenejaj chichaawai.'

*Jimiará jea ukurtin*  
(Mateu 7.24-27)

<sup>46</sup> 'Wi tájana nu túrachiatrumsha çurukamtai Winia, Uunta, túrutrum?

<sup>47</sup> Shuar winia chichamprun ántuinia nu jea jeammajai méteketete. Winia anturtuk umiana nu jujaj méteketete:

<sup>48</sup> Shuar jean jeamuk emka init taur kayanam ukurmai. Tura yumi ti yutuk, entsa nujan̄krua tukummaītiat pukukachmai kayanam ukuamu asa.

<sup>49</sup> Antsu Winia anturtukiati umiatsna nuka jujaj méteketete; Shuar jean jeamuk aya naikminiam jeammai. Tura entsa nujan̄krua tukumpram nu jeaka pukukamai. Tura mash sáantramai." Tu unuiniamiyai Jesus.

## 7

*Suntara yáin̄rin̄ Jesus tsuármiania nu*  
(Mateu 8.5-13)

<sup>1</sup> Jesus áentsun unuiniasua amik Kapernáum péprunam wémiayi.

<sup>2</sup> Nūj Rúmanmayā suntara kapitíán̄rī pujumiayi. Nu kapitíán̄ī takarniur̄i, ti aneamur̄i, jakamnia jaamiayi.

<sup>3</sup> Tura Jesusan pachis áujmatainian antuk, ame shuarum Jesusan itiatiti tura winia takarniun tsuárturti tusa Israer-shuara úun̄rin̄ akupkumiayi.

<sup>4</sup> Niisha Jesusan weriar, umirtukat tusa ti seainiak tiarmiayi "Ju kapitíán̄ī nekas yáin̄tin̄ péñkeraiti.

<sup>5</sup> Niisha yajayā apachitiat in shiir enentáimturmají. Tura iruntai jean jeamtinnisha niñki chicharkaiti, tura yayawai."

<sup>6</sup> Nuyá Jesus niijjai wémiayi. Tura ni jeen jeastatuk jatemsamtaí kapitíán̄cha ni amikrin̄ akatar jū titiarum tusa Jesusan akuptukarmiayi. Niisha Jesusan chicharuk juna tiarmiayi "Uuntá, ántram wayataj tu enentáimsaip. Ame ti nan̄kaamaku asam winia jearūj wayachminiaitme.

<sup>7</sup> Tuma asakmin imia wiki Amijn̄ī jeatniun arantukjame. Ayatik "pénker ajasti" tákumin winia takarniusha péñker ajatrustatui.

<sup>8</sup> Wi nékajai. Winia úuntur winia akuptuuniawai. Tura wisha suntaran akupenajai. Nunasha wi "wetá" takui wéawai. Tura chikichnasha "winitia" tutaí winiawai. Tura winia takartinian "jū túratá" tutaí umiawai." Tu tímiayi.

<sup>9</sup> Jesus nuna antuk ti enentáimias ni nemarainian tímiayi "Nekas tájarne Israer-shuar Yúsan tímiatrus enentáimtinian wáin̄chaitjai."

<sup>10</sup> Tura kapitian̄ī akatramur̄i jeá waketkiar, takarniur̄i péñker ajasun wáinkiarumiayi.

*Wajé uchir̄in̄ Jesus iniantkimiania nu*

<sup>11</sup> Nuyá ukunam chíkich pepu Naín tutainium ni unuiniamur̄ijjai tura chíkich untsur̄i aentsjaī Jesus wémiayi.

<sup>12</sup> Tura péprunam nuntumas jakaan iwiarsatai tusar jūnian wáinkiamiayi. Jakáa nukur̄i wájeyayi, tura uchir̄ī jakamia núchikiiyayi. Tura ti untsur̄ī nu pepunmayā nin nemarsarmiayi.

<sup>13</sup> Jesus nu wajen wáiniak tura waitnentar "úutip" tímiayi.

14 Nuñkia Jesus jakaa enkerman tarunt antiñmiayi; nuna juñniasha wajasarmiayi. Nuñkia Jesus jakaan chicharuk “Umpa nantaktia, tájame” tímiayi.

15 Tutai niisha nantaki pujus chichaamiayi. Tura Jesus ni nukurin “Jujú uchiram” tímiayi.

16 Tura matsamiarmia nu, nuna wáinkiar ashankarmiayi. Tura Yusa náarin shiir awajsarmiayi. Tura chichainiak, “Yúsnan etserniuchukait Niisha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniu ájinia nuna yáinmaktai tusa Yus tarutramji” tiarmiayi.

17 Tura ashí Jutía nuñkanmayasha tura ni írutkamu nuñka ármia nuyasha Jesus túramia nuna nekaawarmiayi.

*Imiakratin Juan sepunam pujak ni amikrin akatar Jesusan akuptukarmiana nu*

*(Mateu 11.2-19)*

18 Juan ni írutkamurí ujakam Jesus túramun nekaamiayi. Nekáa ni írutkamurín jímiaran untsukmiayi.

19 Tura Jesusaj akupkarmiayi. “Atumsha Jesus aniaстарum. ¿Amesha nekas Kristu Yus akupkamu tátinia núkaitiam. Kame chikichak nákastataj? titiarum. Nu nekáa ikiiutarum’ tímiayi.

20 Tutai niisha Jesusan werí jeariar tiarmiayi “Incha imiakratin Juan akatar akuptamkaji. ¿Amesha nekas tátinia núkaitiam. Chikichak nákastataj? Nu nekaatai tusar wakeraji” tiarmiayi.

21 Wats, nii jeawarmia nuí Jesus untsurí jaan tsuártasa pujurmiayi. Iwianchrukuncha iwianchrin jíirki akupkatasa pujurmiayi. Tura kusuruncha ímtikmiayi.

22 Tuma asa Jesus akatramun júna tímiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinch anumsha uwempratin chicham ujakmaiti. Juan nu ujaktarum.

23 Yawetsuk Winia tuke shiir enentáimturna nú shuar shiir átatui” tímiayi Jesus.

24 Waketkiarmatai Jesus Juáñkan pachis áujmatman antuk shuar matsamarmia nuí júna tímiayi: “Shuar atsamunmasha ¿warí werimiarum. Pintiu nase umpúam atú we júni we ajana nu iistai tusarmek wémarum? Juan núnishaiti.

25 Nuikia ¿warí werimiarum. Shuar péñker iwiamampra ístai tusarmek wémarum? Warí, péñker iwiamampraka uunt akupniu jéen pujuiniatsuk.

26 Nuñkia ¿warí werimiarum. Yúsnan etserniuk werimiarum? Maa, nú nankaamas wáinkiar me.

27 Yaunchu Yus-Chichamnum jú áarmaiti:

“Winia akatramurun amíni emka akupeajai ame jintimin iwiarat tusan.” Juan nu akatramuíti.

28 Nekasan tájarme, Yúsnan etserin imiakratin Juanjají nankaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juanjají nankaamas átatui” tímiayi.

29 Penké shuarsha, kuítian-juusha, Juan imiaimiujají imianiarmia nu, Jesus timian antukar Yusa náarin shiir awajsarmiayi.

<sup>30</sup> Túrasha Pariséusha Israer-shuara jintinniurjsha Yus yáingtaj támaidiat Juan imiaamujaj imiancha ásar nakitrarmiyai.

<sup>31</sup> Nuñkia Uunt Jesus tímiyai “Yamaiya áentstiram, warijjaiñ métek árum nuna paant títiatjarme.

<sup>32</sup> Uchijjai métek árum. Ni aijjai iruntrar nakurustaj tukamá tuñiawai “Námpera áinis nakurustaitsar peem umpuarji, túrasha jantsemáchure. Nuyá iwiarsatniua áinis nakurustaitsar iwiareakur kantamtai kantamáaji, túrasha átum úutcharme.” Tu tuñiawai.

<sup>33</sup> Atumsha núnisaitrume. Kame Juan núkap yurumtsuk úmutsuk wekaimiyai. Túmakuí átumka “iwianchrukuítí” tímiarme.

<sup>34</sup> Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuaran tura kuitian-juu amikrintí” túrutrume.

<sup>35</sup> Wats, nekas neka ainia nu, Yusa nekatairjin iniakmainiawai.” Tu tímiyai.

### *Pariséu Semun náartin Jesusan ni jeen ipiaamiania nu*

<sup>36</sup> “Winí yurumáitia” tusa Pariséu Jesusan ipiaamiyai. Tutai Jesus ni jeen werí misanam pujusmiyai.

<sup>37</sup> Nuñkia nu péprunmaya yajauch nuwa, Jesus Pariséu jeen yurumátsa weyi táman antuk, kayá mutinium kunkuín asuiti áimkiamun takukí jearmi-ayi.

<sup>38</sup> Tura úutki Jesusa nawen pujuras neajkjijai nijjarmiyai. Tura intiashjjai japirmiyai; nuyá nawenam mukuta kunkuínian ni nawen ukatramiyai.

<sup>39</sup> Pariséu Jesusan ipiaamia nu, nuna wáiniak juna enentáimsamiyai: “Ju nekas Yúsnan etserniuitkiunka, ju yajauch nuwa ántiana nuna nekaawainti. Warí, niisha netse nuwachukait” tu enentáimsamiyai.

<sup>40</sup> Nuñkia Jesus Pariséun chicharuk tímiyai “Semunká, ámin titiaj tusan wakerajai.”

Tutai Pariséu chichaak “Turuttia, Uuntá” tímiyai.

<sup>41</sup> Tutai Jesus tímiyai “Kuitian ikiamniun jimiará áishman tumashmakarmi-ayi. Chíkich kiniantus (500) tura chíkichka aya senkuentak tumashmakmiyai.

<sup>42</sup> Akiktin tsawant jeamtai máí-metek takakcha ármiyai. Tuma asamtai kuitian ikiamin ni tumashrin máí-metek asakátrarmiyai. Wats, turuttia çtú áishmanka ikiamniun nekas aneamia?” tímiyai.

<sup>43</sup> Tutai Semun tímiyai “Enta, núkap tumashrin tsankuramia nu.”

<sup>44</sup> Tutai Jesus tímiyai “Nekas tame.” Nuñkia nu nuwan iis Semunkan tímiyai “Ju nuwa wáintsumek. Ame jeemiin wayamtai winia nawer niijartin entsa suruschamame; antsu ju nuwaka nawerun neajkjijai niijarturai, tura intiashjjai japirturai.

<sup>45</sup> Mukutam áujtuschamame; antsu niñkia nawerun tuke mukutui.

<sup>46</sup> Winia muukarujsa asuiti ikiurtuschamame; antsu niñkia naweruñ kunkuín asuitin ukatrurai.

<sup>47</sup> Nu tuma asamtai tájame, niisha Winia ti anentu asamtai ni tunaarij untsurí ana nu tsankuramuiti. Tura tunaar ishichik awai tau tsankuramu ana nuka ishichik anenkratniuiti.” Tu tímiyai Jesus.

<sup>48</sup> Nuñkia nuwan tímiyai “Ame tunaarum tsankuramuitme.”

<sup>49</sup> Tura chíkich ipiaamu Jesusjai misanam pujuarmiania nu “çJusha ya asan tunaancha tsankurea?” nuamtak tunainiarmiyai.

<sup>50</sup> Tura Jesus nuwan chicharuk ““Uwemtikartiniaiti” tu enentáimturu asam uwempraitme. Shiir wetá” tímiyai.

## 8

*Nuwá Jesusan yáinkiarmania nu*

<sup>1</sup> Nuyá untsurí péprunam Jesus wekaráktak Yus akupeana nuna shiir chichaman etserkini wekaimiayi. Tura ni unuiniamurí tuse ármia nu nemsarmiai.

<sup>2</sup> Yaunchu untsurí nuwá jaa armia nuna tura iwianchruku armia nunasha Jesus tsuármiai. Nu nuwásha Nin nemsarmiai. Nusha ju ármiai: Maktaranmaya Marí, siati íwianch jírkiuiyáña nusha

<sup>3</sup> tura uunt akupin Erutisa takarniurí Chusa nuwé Juancha, tura Susancha; tura chíkich untsurí ni takakmarín súsar Jesusan yáinkiarmai.

*Atsaamin atsaampramun Jesus unuiniamania nu*

*(Mateu 13.1-9; Márkus 4.1-9)*

<sup>4</sup> Untsurí péprunmaya Jesusan iistai tusar jíinkiarmai. Tura untsurí káunkarmatai ju métek-taku chichaman Jesus unuiniamiai:

<sup>5</sup> “Atsaamin atsaamprataj tusa jíinkiami. Atsaamki wesa jinkiái jintiá iniaarmiai. Túrunamtai weenak najakarmiai. Nuyá chiníki tariar yuawarmiayi.

<sup>6</sup> Chíkich jinkiái kaya írunmanum iniaarmiai. Nu jinkiái tsapainiar, wárik nantu sukuam káarmiai.

<sup>7</sup> Chíkich jinkiái janíiniam iniaarmiai. Tura janíkisha jinkiáisha máimetek tsapainiar, janíki kaníkar ajakramiai.

<sup>8</sup> Tura chíkich jinkiáisha péñker nuníkanam iniaarmiai. Tura tsapainiar, péñker nerekar chíkichkia sianísha (100) nerekarmai.” Tuasua amik kakanítar chichaak Jesus tímiayi “Kuishim ákuinkia antuktarum.”

*(Mateu 13.10-17; Márkus 4.10-12)*

<sup>9</sup> Nuyá ni unuiniamurí Jesusan anak tiarmiayi “Ju métek-taku chicham tamena nu ¿warintkumea tame?”

<sup>10</sup> Tutai Jesus tímiayi “Atumnia Yus ni akuptairín nekaachma ana nuna nekamtikramprume. Tura chikichnaka, wáiniainiyat kusurua núnin ártí tusan, tura ántuiniyat nekaacharat tusan aya métek-taku chichamjái jintintiatjái,” tímiayi.

*Atsaampramu chichaman Jesus paant jintintiamania nu*

*(Mateu 13.18-23; Márkus 4.13-20)*

<sup>11</sup> “Wats, ju nekaatarum, tímiayi. Jinkiáisha Yusa chichamen nakumui.

<sup>12</sup> Jintiá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa íwianch wárik taa nu chichaman ni enentáiyán júawai.

<sup>13</sup> Kayanam iniaaru tana nuka shuar antuk waras umiana nuna nakumui. Tura nú shuar kaníkapé atsá asamtai, ishichik tsawantinín umikiar itiuichatan wáinkiar wárik kanainiawai.

<sup>14</sup> Janíiniam iniaaru tana nuka tuke enentáijjai umiatsna nuna nakumui. Nu shuarsha ántuiniawai, túrasha ni wakeramuríjjai wekainiawai. Ju nuníkanman ana nuna ti páchiniaakui, tura kuítian ti wakeruiniakui, warastiníniak enentáimtuiniakui, Yus-Chicham ni enentáin takaatsui. Nujái kaníkarma ásar nerektinian tújintiniawai.

<sup>15</sup> Tura jinkiái péñker nuníkanam iniaaru tana nuka shuar antuk umiinia nuna nakumui. Niisha antukarmia nuna péñker enentáimtusar, yawetsuk umirkar ti péñker nerenawai.’

*Ashí iwíainiakma átatui*  
(Márkus 4.21-25)

<sup>16</sup> “¿Shiripkin ekeemak nukuktinkiait? Peaknum waaptak ikiuschatniuiti. Antsu jeanam wáiniana nu paant wáinkiarat tusa yakí ekentsatniuiti.

<sup>17</sup> Núnisan ashí nekaachma ana nu paant átatui. Tura úukma ana nu nekanattawai. Tura iwíainiakma átatui.

<sup>18</sup> Tuma asamtai anearum pénger antuktarum. Shuar takakna nu patat-samnia átatui. Túrasha takaktsuna nu, takakjai tu enentáimtumana nuka jurunkittiawai.” Tu timiayi.

*Jesusa nukurí, Jesusa yachi*  
(Mateu 12.46-50; Márkus 3.31-35)

<sup>19</sup> Jesus pujamunam nukurí ni yachísha tariarmiayi.

<sup>20</sup> Turamtai Jesusan tiarmiayi “Ame nukusha yatsumsha aa wajasar untsurmainiawai.”

<sup>21</sup> Tutai Jesus tímiayi “Ee, nukuruiti, yatsuruiti, tura Yus tana nuna antuk umíana nusha winia nukuruiti, winia yatsuruiti.”

*Nasesha entsasha Jesusan umirkarmiania nu*  
(Mateu 8.23-27; Márkus 4.35-41)

<sup>22</sup> Chíkich tsawantai Jesus ni unuiniamuríjiai kanunam enkemprar “Antu-mian amaini wetai” tímiayi.

<sup>23</sup> Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun init awayastatuk awajmiayi.

<sup>24</sup> Túram nuñkia Jesusan ishintiainiak “Uuntá, iisha entsá wayaaji” tiarmi-ayi. Nuñkia Jesus nantaki nasencha entsan cha chicharkamiayi. Nú chichamaik nasesha menkakamiayi, tura entsasha miaaku ajasmiayi.

<sup>25</sup> Nuyá ni unuiniamurín chicharuk “¿Urukamtai Winia enentáimtursachuram?” tímiayi.

Tura niisha ashamainiak, ti enentáimprar “¿Ausha warí áishmankait? Nasesha entsasha Nii chicharkam umirainiatsuk” tiarmiayi.

*Jatara nuñkanam Jesus iwianchrukun tsuármiania nu*  
(Mateu 8.28-34; Márkus 5.1-20)

<sup>26</sup> Kariréa nuñka amaini Jatara nuñkanam jeawarmiayi.

<sup>27</sup> Kanunmaya Jesus jinkimtai nu péprunmaya áishman Nin taruntamiayi. Nu áishmansha yaunchu iwianchrukuyayi. Misú wekas, jeá pujutsuk aents iwiansamunam pujuyayi.

<sup>28-29</sup> Íwianchkia nu aishman kan ti kakaram nupet wémiayi. Tura emetatai tusar uwejencha nawencha jirujai jinkia wearmiayi. Túrasha tujinkiar-miayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wáiniak tikishmatar kakantar chicharuk “¿Urukamtai winiisha tarutnium, Uunt Nankaamaku Yusa Uchirí Jesusa? Winia wáitkiarsaip tusan seajme” tímiayi. Íwianch niin pujurun Jesus jiki akupeam tu tímiayi.

<sup>30</sup> Jesus nu áishman kan anias “¿yáitiam?” tímiayi.

Tútai nii chichaak “Wikia Untsuríntjai” tímiayi. Untsurí íwianch niin pu-jurma asa nuna tímiayi.

<sup>31</sup> “In uunt wáanam ii jinkimij nuin akuptukam amutkaip” íwianch sea-warmiayi Jesusan.

<sup>32</sup> Nuĵ ishichik arantach náinnium untsurĵ kuchi shushunmak yujaarmiayi. Tura íwianch chichainiak, “Antsu kuchiniam wayatın tsankatrukta” tiarmiayi.

Tutai Jesuska “Ayu, wetarum” tímiayi.

<sup>33</sup> Nuna takui íwianch áishmannumiā ĵĩinkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar Jakekarmiayi.

<sup>34</sup> Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi.

<sup>35</sup> Etserkarmatai, iyutai tusar untsurĵ shuar wearmiayi. Tura Jesus pujaunam jeawar, íwianch ĵĩintiukiarmia nú áishmanĵan pėnker ajas pushı entsar Jesusa nawen pujan wáinkiararmiayi. Tura ashamkarmiayi.

<sup>36</sup> Iwianchruku áishmanĵ tsuárman wáinkiarmania nu yama taan ujakarmiayi.

<sup>37</sup> Tura ti ashamainiak Jatara nunĵanmaya aents ashı Jesusan “Wetá” tiarmiayi. Tutai Jesus kanunam enĵemar wémiayi.

<sup>38</sup> Íwianch ĵĩintiukiarmia nú áishmanĵ Jesusan, wisha ame wéamunam winitiaĵ tusa seamiai. Tutai Jesus nuna surıtiak,

<sup>39</sup> “Antsu ame jeĵemĵin weme Yus ámin túrutma nu ashı etserkata” tímiayi. Tutai áishmanĵ we Jesus nin túramia nuna ashı nu péprunam etserkamiayi.

*Jairu nawantrıncha tura chıkich nuwanĵha Jesus tsuármania nu  
(Mateu 9.18-26; Márkus 5.21-43)*

<sup>40</sup> Tura Jesus katiĵki Kariréanam tatı tusar nákas pujuarmiayi. Tuma ásar Nii waketki katiĵki támatai nu aencha warasar áujsarmiayi.

<sup>41</sup> Tumaj Israer-shuara iruntai jeá uuntriĵairu naartin támiayi. Nii taa, Jesusa nawen tikishmatar “Winia jearuĵ waitneasam winıtrıtiá” tímiayi.

<sup>42</sup> Ni nawantriĵ chikichik amia nu, tuse uwi takaku, jakatasa pujakuı nuna tímiayi.

Jesus “ayu” tinia weakui ti untsurĵ aents nemariarmiayi. Tura untsurĵ shuar kaĵ ajas weena ásar chanuawarmiayi.

<sup>43</sup> Nuĵ nuwa páchitkia wémiayi. Niisha tuse uwi numpa ajapeak wáitias pujuyayi. Tsuákratniua nuĵısha ni kuıtrın ashı ajapaitiat tsuámarchauyayi.

<sup>44</sup> Jesusa úkuriıniĵ winiá weantuk ni pushırĵ náĵkatramurın antiĵmiayi. Nuna tura nú chichamaik numpé ájapeamuncha pėnker ajasmiai.

<sup>45</sup> Nuıĵkia Jesus chichaak “ĵYa Winia antintkia?” tímiayi.

Tura “pėnkesha antiĵhajme” tuıniakuı Pıtiur ni tsaniakmarĵıııai Jesusan chicharuk “Uuntá, ti untsurĵ antiĵmasha, tura ti untsurĵ chanunmainiasha ĵitiura “ya Winia antintkia” tame?” tíarmiayi.

<sup>46</sup> Tútaisha Jesus tímiayi “Nekas Winia antintkiayi. Winia kakarmarĵai tsuárjına nuna nékajai” tímiayi.

<sup>47</sup> Nuyá nu nuwasha, nekarayapi tusa kuraĵki taa Jesusa nawen tikishmatramiai. Tura ashı aents ántuiniamunam urukaku antiĵkia tura itıura wárik pėnker ajasmia nuna ujakmiayi.

<sup>48</sup> Nuıĵkia Jesus nuwan tímiayi “Nawanrı, shiır wetá. Winia nekas enentáımtursa asam pėnker ajasume.”

<sup>49</sup> Jesus tuke chichas pujaı uunt Jairu jeá, ti untsurĵ antiĵmasha, turenıa taa, Jáırun tímiayi “Ame nawantrum jakayi. Unuikiartin tuke itit awajıpia” tímiayi.



50 Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatui” tímiayi.

51 Jeá jeawar Jesussha Nijjají untsurí wayatniun surimkiamiayi. Antsu aya Pitrun, Jakupun, Juáñnasha tura nuwächí aparín nukuríncha wayatniun tsankatkamiayi.

52 Ashí útainiak atakka wáinkiashtatjapi tu útiarmiayi. Túmainiakui Jesus péñké jakaan nékayat tímiayi “Úutirpa. Nuwächkia jákachai, antsu kanarai” tímiayi.

53 Jakaancha urukaku ta tusar wishikrarmiayi.

54 Nuyá Jesus nuwächí uwején achik, kákantar chicharuk “Nawantru nantaktia” tímiayi.

55 Túram niisha jakayat atak iwiaaku ajasmiai. Tura nú chichamaik nantakmiayi; túrunamtai Jesus “ayuratarum” tímiayi.

56 Nuwächí aparí nukurísha ti enentáimprarmiayi. Tura Jesus “Ju túramu péñké etserkairap” tímiayi.

## 9

### *Jesus ni unuiniamurín etserkati tusa akupkarmiania nu (Mateu 10.5-15; Márkus 6.7-13)*

1 Ni tuse unuiniamurín ikiaanak ni chichamejají iwianchrukun enentáiyán iwianchin jírki akupkatniun tura sunkurjají jaa tsuártinnisha ni kakarmarín súsarimiayi.

2 “Yus akupin ajastin ujaktarum, tura jaa tsuártarum” tinia akupkarmiayi Jesus.

3 Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha péñké jukiirap. Aya chikichík pushí jukitiarum.

4 Nánkamas jeanam jearum wayarmeka nuin pujustarum. Nuin pujurumek chíkich péprunam wéakrum jíinkitiarum, tímiayi.

5 Tura atumin awáintiamatniun nakitiana nú péprunmaya jíinkirum nawemiya nuñka akakekrum ikiuktiarum. Awáintiamachma paant ati tusarum nu túratarum” tímiayi.

6 Nuyá jíinkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

### *Erutis “Jesusan ístaj” tímiania nu (Mateu 14.1-12; Márkus 6.14-29)*

7-8 Uunt akupin Erutis Jesus túramun antukmiayi. Nu túramun chíkich shuarka “Juan jakamunmaya nantaki túrawai” tu wearmiayi. Chíkichkia, “yaunchu Yúsnan etserin Erías wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asamtai Erutis péñké nekaachmiayi.

9 Tura tímiayi “Wiki, Juanka muuke tsupirkatarum, tíchamkaj. Tuma ajsa, ¿ju shuar, ni túramurí ashí shuar chichainia nusha yátsukait?” Tu enentáimiuk “íistaj” tímiayi.

### *Senku mir áishmankan Jesus ayuramiania nu (Mateu 14.13-21; Márkus 6.30-44; Juan 6.1-14)*

10 Atak Jesusa akatramurí waketki taar ni túramurín Jesusan ujakarmiayi. Nuñkia aents atsamunam Petsaitia péprunam tíjiuch weak nuí júkiarmiayi.

11 Tura penké shuar nuna nekaawar nemariarmiayi. Túram Jesus nin shiir áuj samiayi. Tura Yusa akuptairi pachis unuiniarmiayi. Tura jaa armia nuna tsuáramiayi.

12 Tura kíkui, tuse unuiniamu Jesusan wériar tiarmiayi “Uuntá, shuar akupkachminiashit. Tíjiuch péprunmasha, shúarnumkesha wear ni yuramániurin sumarmakarti, tura kanartintrin wáinkarti. Jui pujajnia jujnkia penké atsawai” tiarmiayi.

13 Tutai Jesus tímiayi “Atumsha ayuratarum.”

Tutai chichainiak “Iisha aya senku tanta tura namaksha jímiarchik takakji. Ju shuar ayuratin sumaktai tusar wétiniaitji” tiarmiayi.

14 Áishmansha ti untsurj senku mir (5000) jeeá ámiayi. Tura Jesus ni unuiniamurin chicharainak “senkuenta senkuenta kanaarum ankant ankant pujustarum,” titiarum” tímiayi.

15 Túrawarmatai ashí pujusarmiayi.

16 Nuyá senku tantan tura jimiará namaknasha Jesus achik, yakiini ímias Yúsán yuminsamiayi. Nuyá ajamsarat tusa ni unuiniamurin súsararmiayi.

17 Ashí yurumáwar ejemarmarmiayi. Tura ampirman tuse chan kinnium áimkiarmiayi.

### *Jesus Yusa anaikiamurinti ujakma amia nu*

*(Mateu 16.13-19; Márkus 8.27-29)*

18 Jesus ni unuiniamurijjai áentsnumia kanaki pujuarmiayi. Jesus Yúsán ajsua umik ni unuiniamurin tiarmiayi “Zyáiti turutainia Winia?”

19 Niisha áimkiarmiayi, “Chíkich “Imiakratin Juánkaiti” turamainiawai; chikichcha “Iriásaiti” tura chíkichkia “yaunchu Yúsán etserin nantakniua núiti” turamainiawai” tiarmiayi.

20 Tutai “Tura atumsha zyáiti túrutrum?” tiarmiayi.

Takai Pítiur chichaak “Ámeke Yusa Anaikiamurj, Kristu tutai, núitme” tímiayi.

21 Tutai Jesus “Penké etserkairap” tímiayi.

### *Ni jákatniurin Jesus ujakmania nu*

*(Mateu 16.20-28; Márkus 8.30-9.1)*

22 Nuyá Jesus tímiayi “Wi Aents Ajasuitjiana ju ti waitsatniuitjai. Wí shuara uuntri, tura ni Pátriri úuntri sha tura ni jintinniurisha nakitrurar maantuáwartatui. Túrasha iwiartusarmatai menaintiu tsawant jeamtai nantaktiatjai.”

23 Nuyá ashí áentsun chicharuk juna tímiayi “Shuar Winia nekas nemartustajtsa wakerakka ni wakeramurinkia iniaisati. Tuke tsawant ni krusri yanaki nemartusti.

24 Kame shuar ju nunkanam aya pénger pujustaj tákunka nu shuar uwemt-suk jakattawai. Antsu Winia anentu asa pénger pujustinniak enentáimtsuna nú shuarka nekas iwiaakman wáinkiatawai.

25 Íimiata, shuar ashí ju nunkanam ana nuna súmakui tura jinium wétin ákuisha zitiurak pénger pujusat?

26 Wi Aents Ajasuitjiana ju Winiasha tura winia chichampruncha shuar natsantraitkuinkia, winia wincharujai, winia Aparu wincharijjai tura nayaimpinmaya pénger suntara wincharijjai atak táakun shuar natsantruria nuna natsantrattajai Wí.

27 Tura shuar Yusa akuptairin wáintsuk jákachartatna nu ju pujui niawai. Nuna nekas tájarme” tímiayi.

*Jesus nusháa iira ajasmiania nu*

*(Mateu 17.1-8; Márkus 9.2-8)*

<sup>28</sup> Nuna tuasua amik nuyá chíkich semanatin Yúsán áujساتج tusa Jesus náinnium wakamiayi. Pítur, Jakupu, Juanjaj nemariarmiayi.

<sup>29</sup> Jesus auju pujus nusháa iira ajattsarmiayi. Ni pushirjsha ti puju jítsumir ajasmiai.

<sup>30</sup> Nuñkia jimiará áishman Niijjaj chicháa wajarmiayi. Nuka Muisáis Eríasaj áirmiayi.

<sup>31</sup> Núncha wincha jítsumir téntakarmiayi. Tura Jesus wáitias Jerusarénum jákatniurin amia nuna áujmatarmiayi.

<sup>32</sup> Pítur ni tsaniakmarjjaj kari ti pujainiajn iwiáa pujuarmiayi. Tuma ásar Jesusan tura jimiará áishmanjaj jítsumir ajas wajainian wáinkarmiayi.

<sup>33</sup> Tura nu áishman Jesusan ikiuki weenaj Pítur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusha, Muisaisnasha, Eríasnasha áakmaktai” tímiayi. Tura Pítrusha enentáimtsuk nuna tímiayi.

<sup>34</sup> Nuna chicháa pujaj yuranjim tarí kaput amuwarmiayi. Tura yuranjim amuam ti ashankarmiayi.

<sup>35</sup> Nuñkia yuranminmaya ju chichaamun antukarmiayi: “Juka winia aneamu Uchiruiti. Nii anturkatarum.”

<sup>36</sup> Chichaamun antasua amikiar Jesus nñki wajan wáinkarmiayi. Nuñkia takamtak pujuarmiayi. Tura wáinkarmia nuna penké etserkacharmiayi.

*Uchi iwianchrukun Jesus tsuármiania nu*

*(Mateu 17.14-21; Márkus 9.14-29)*

<sup>37</sup> Kashin tsawantaj, náinniumiá táarmatai, ti untsurí shuar Jesus inkiuntai tusar wearmai.

<sup>38</sup> Nu shuarnumiá chikichik áishman Jesusan untsuak tímiayi “Uuntá, waitneasam uchir iirtústá. Uchirsha júchikiiti.

<sup>39</sup> Íwianch achik núpeteam niisha nánkamas untsumui. Tura chichichiptu ajas wenunmasha saun kaput apaawai. Íwianch nin tuke yajauch awajas ankant awajsatniun nakitiawai.

<sup>40</sup> Túmakui ame unuiniamurmin iwianchin júirtukit tusan seamjai. Túrasha tujinkiarmai” tímiayi.

<sup>41</sup> Tutai Jesus tímiayi “Yus enentáimtichutirmin, tutupnik wekaichatirmin çurutmá tsawanttsuk atumjaj pujustaj. Urutmá katsuntratjatsuk? Uchiram jui itiatá” tímiayi.

<sup>42</sup> Tura uchi winiaj íwianch nunká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin penker awajas ni aparin awantuki susamiayi.

<sup>43</sup> Tura ashí pujuarmia nu ti enentáimprar “Yuska imiá úuntchakait” tiarmiayi.

*Jesus ni jákatniurin ataksha ujakmiania nu*

*(Mateu 17.22-23; Márkus 9.30-32)*

Jesus túramun ti enentáimtu pujuiniaj Jesus ni unuiniamurin tímiayi

<sup>44</sup> “Wi tájarmena ju penker antukturum. Winia Aents Ajasu tútain surutkar-tatui.”

<sup>45</sup> Tura Nii timia nuna unuiniamurj nekaacharmiayi. Nekaawarain tusa paantcha awajsamuyayi. Tura warinkit tusa anintrustinnisha arantukarmiayi.

“¿Yaki imiá nan̄kaamantuit?”

(Mateu 18.1-5; Márkus 9.33-37)

46 Nuyá ni unuiniamurí, yaki imiá nan̄kaamaku ati tusa, nuamtak mai tunai ajarmiyai.

47 Tura ni enentáimsamurín Jesus nekaamiyai. Tuma asa uchin achik ni pujamunam itiamiyai.

48 Itiá tímiyai “Winia anentuk ju uchin shiir awajeana nuka Winiasa shiir awajtawai. Tura Winia shiir awajtana nuka Winia akuptana nunasha shiir awajeawai. Kame átum nan̄kaamantuchu tárumna nu ti nekas nan̄kaamantuiti’ tímiyai.

(Márkus 9.38-40)

49 Nuyá Juan tímiyai “Uuntá, shuar ame náarmin pachis iwianchin jiki akupea nu wáinkiamji. Tura in páchitkiachu asamtai nuka suritkiamji.”

50 Tutai Jesus tímiyai “Antsu suritkiairap. Shuar in nakitramachkuṅka in páchitkiawai.”

*Jesus Jakupun Juán̄nasha chicharkarmiania nu*

51 Jesus, nayaimpiniam waketkitniurí jeatemantai, enentáimmia imiatrusañ Jerusaréñnum we-wémiyai.

52 Wesa, kanartinian wáinkiarat tusa akatar émtikiarmiiai. Tura niisha Samaria péprunam jeawarmiyai.

53 Tura Samarianmayá aentska, Jerusaréñnum wéenan nekaawaru ásar itiatniun nakitrarmiiai.

54 Jesusa unuiniamurí Jakupusha Juansha nuna nekaawar, Jesusan tiarmiiai “¿Uuntá, Erías yaunchu túramia núnisrik iisha túrat tusam wakeramek. Nayaimpinmayá ji tara Samarianmayá aentsun amukarti, títiatjik?”

55 Tutai Jesus nin ísar kakantar chicharuk tímiyai “Atumsha atumi enentáji urukukit nuka nekamatsrume.

56 Wi Aents Ajasu áentsun emesratsan táchaitjai. Antsu uwentikratajtsan táwitjai” tímiyai. Nuyá chíkich péprunam wearmiyai.

*Jesus nemarsatin*

(Mateu 8.19-22)

57 Jintiá weenaj, chíkich áishman Jesusan chicharuk “Uuntá, tuí wétatam nuísha nemarsatjame” tímiyai.

58 Tutai Jesus tímiyai “Kujanchmasha ni wáarín takaktsuk. Chiñkisha pasun̄ken takaktsuk. Tura Wi Yusa Uchiríntiatan tepesan ayampratniur atsawai.”

59 Chíkich áishman̄kan Jesus “Nemartusta” tímiyai.

Tutai nii chichaak “Antsu, Uuntá, winia apar jakamtai, iwiarsa ikiuakun nemarsatjame. Nu tsan̄kátrúktá” tímiyai.

60 Tutai Jesus tímiyai “Jakaa ainia nu ni shuarín iwiarsatniunka enentáimtusarti. Tura ámeke weme Yus-shuar átin urukukit nu etserkata” tímiyai.

61 Nuyá chíkich tímiyai “Uuntá, nemarsataj tusan wakerajme. Túrasha wí shuaran emka áujsan ikiuweartaj tsan̄kátrúktá” tímiyai.

62 Tutai Jesus tímiyai “Shuar arayata ukunmaan̄j apajas iimna nu, Yus akupeana nuj takaschamniaiti.”

## 10

*Ni unuiniamurin setenta armia nuna Jesus etserkatarum tusa akupkarmi-  
ania nu*

<sup>1</sup> Nuyá ukunam chíkich unuiniamurin setenta anaikiarmiayi Jesus. Tura jímíar jímíaran apatak émkitiarum tusa ashí péprunam ashí nunkanam ni wétin amia nuí akupkamiayi.

<sup>2</sup> Akupeak tímiayi “Nekas tájarme, Yus-Chicham étserkum, júuktinia núnisan, aents Yus-shuar awajsatin ti awai. Tura zyaki júukat, aya ishichik takaini-asha? Tuma asamtai ni takarniurj akupkat tusarum Nerentin seatarum.

<sup>3</sup> Wetarum. Átumka murikiua núninaitrume. Uunt yawá yujamua núninnium tsuumai ámunam akupeajrume.

<sup>4</sup> Yurumkasha, kuitcha, sapatcha júkiirap; shuarjají jintiá áujmamsatai tusarum wajasairap.

<sup>5</sup> Jeá wayákrum emka ju titiarum: “Ju jeānam pujuinia nuna Yus shiir awajsarti.”

<sup>6</sup> Nérentin “Ee, nuna wakerajai” tákuinkia túrunattawai. Tura “Atsá, wakeratsjai” tákuinkia, “nuinkia túrunashti” titiarum.

<sup>7</sup> Jeá wayattarmena nú jeānman pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeānam nuí werum nuí werum ajairap.

<sup>8</sup> Awāintiamawartatna nú peprunam jearmeka ajampramsartatna nu yuatarum.

<sup>9</sup> Jaa ainia nu tsuártarum. Túrarum “Yus ju nunkanam akupin ajastin ishichik ajatemsai” nu peprunmaya shuar titiarum.

<sup>10</sup> Íksarmek itiaarmachartatna nú peprunam jearum, jintiá wajasrum ju titiarum,

<sup>11</sup> “Yusna nakitra asakrumin, atumi pépruriniā nunka ii nawen peema japirar akakekji. Túrusha ju paant nekaatarum: Yus ju nunkanam akupkatin ishichik ajatemsai.”

<sup>12</sup> Yusa nekapsatin tsawantri jeamtai nu peprunmaya shuaran ti asutiáttawai. Yaunchu Sutumanmaya shuaran asutiámia nujaj nankaamas asutiáttawai. Núnaka paant tájarme tímiayi.

*(Mateu 11.20-24)*

<sup>13</sup> Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumi pépruriin aents tujintiamun ti túraitjai. Warí, yaunchu Tíru péprunmasha, Setun péprunmasha nu tujintiamu túramuitkuinkia yaunchu ni enentáin yapajjáwaraāyi. Túrawar kúntuts pujutai pushin entsarar yun̄kunim ajakiaaraāyi.

<sup>14</sup> Tura atumsha aents tujintiamu túramu wáiniatrum yapajjachu asakrumin Tirunmaya tura Setunnumiā aentsjai nankaamas asutniáttarme.

<sup>15</sup> Tura atumsha Kapernáunnumiātirmesha, “ti nankaamantu ajarar nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

<sup>16</sup> Tura Jesus ni unuiniamurin junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakitrakka Winia akuptukua nunasha nakitiawai.” Tú áujas Jesus nin akupkarmiayi.

*Setenta unuiniamu waketki táarmiania nu*

17 Ukunam nu setenta unuiniamu warasar waketki táarmiayi. Tura chichainiak “Uuntá, ame náarmj̄in íwianch j̄iiki akupeam umirtamkamj̄i” tiarmiayi.

18 Tutai Jesus tímiayi “Ee, Wisha nayaimpinmaya peem peetna núnisan, uunt iwianch Satanásan akaiki iniaan wáinkiamjai.

19 Atumniaka winia kakarmarun susamjarme, napi najarmasha titin najarmasha yajauch awajtamsairum tusan; tura ii nemasr̄i kakarmar̄i nu-petkatniuncha susamjarme.

20 Túrasha íwianch umirtamkui nu enentáimsam warasairap. Antsu atum̄i naar̄i nayaimpiniam aarma aa asamtai warastarum” tímiayi Jesus.

### *Jesus warasmiai*

*(Mateu 11.25-27; 13.16-17)*

21 Nuin̄kia ni enentáin Yusa Wakan̄i waramtiksam Jesus juna tímiayi: “Aparú, ashí nayaimpij̄i núnka Úntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nan̄kaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú” tímiayi.

22 “Winia Apar ashí surusuiti. Wisha ni Uchir̄i asamtai Winia nékarui. Tura chikich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

23-24 Nuyá ni unuiniamur̄in iis tímiayi “Wi tájarme, untsur̄i Yúsnan et-serniusha tura uunt akupniusha átum yamá wáintrum nuna wáinkiatniun wakeruiniayatan wáinkicharmiai. Tura átum yamá ántarme nuna antuk-tinian wakeruiniayatan antukcharmiai. Tura Yus achirmaku asakrumin, wáintrumna nu ti péñkeraiti” tímiayi.

### *Samarianmaya áishman̄ katsumkamun yain̄mia nuna Jesus unuiniamiania nu*

25 Nuyá akupkamun jintinkiertin Jesus warintiak chichakat tusa wajatki werimiayi. Werí iniimiayi “Uuntá, wi tuke iwiaaku átaj takun ¿warinia túratniuitaj?” tímiayi.

26 Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiayi.

27 Akupkamun jintinkiertin ayak tímiayi “Juna tawai: Ti enentáimsam, tuke enentáimj̄i Uunt Yus aneeta. Ame kakarmaram, iwiaakmarmesha Yus íktusta. Tura ame ayashim aneamna núnismek ame írutramurmesha aneeta. Núchakait” tímiayi.

28 Tutai Jesus tímiayi “Péñker áimsame. Nu túrakmeke tuke iwiaaku átatme.”

29 Tutai akupkamun jintinkiertin ni anintramun kíshtumaktajtsa wakerak “Winia írutramursha ¿ya ainia?” tímiayi.

30 Takui Jesus tímiayi “Jerusarénnumiá jintia Jirikiú péprunam jean̄ nu jintianam áishman̄ wean, kasa áishman̄ tariar ni warir̄in, pushir̄incha kasarkarmiai. Tura katsumkar mayáí ashirak ajuantar ikiukiarmiayi.

31 Tura Israer-shuar Patri ukunman̄ winis nu áishman̄kan wáiniak aya íkian̄ iis ikiukmiayi.

32 Nuyá ukunam Patri yáintr̄isha nu jintianam wesa, nu áishman̄kan wáiniak, áyatik iis ikiuak wémiayi.

<sup>33</sup> Tura nuyá Samaria nunkanmaya áishmansha nu jintianman wesa, nu áishmankan wáiniak ní shuárinchunak wáitnéntramiayi.

<sup>34</sup> Nuyá nu áishmankan weantuk ní numpamnamurín asuitijíai tura wíniujai tsuar jaanchíjái penuarmiayi. Tura ní kawairíin ekenak jukimiayi. Tura írar kanutainiam jukí ejé nu áishmankan péñker wáinkiamiayi.

<sup>35</sup> Tura kashin tsawarmatai Samarianmaya áishman weak jiniará kuítian jusa jeá nérenniurín susamiayi. Susa tímiayi “Ju áishman péñker wáitrukta. Tura wi amaaína ju táasmataisha wi wáketskun akiktajme” tímiayi.

<sup>36</sup> Ayu, ámijíaiasha, nu menaintiu áiniana nu, ¿tuá imiá nekas katsumkamun waitnentramia?” tímiayi Jesus.

<sup>37</sup> Takui akupkamun jintinkiertin chichaak “Entá, katsumkamun wáitnentramia núa” tímiayi.

Tutai Jesus tímiayi “Amesha weme núnismek túrata.”

### *Marta ni kajíai Marí jeen Jesus pujusmiania nu*

<sup>38</sup> Nuyá Jesus jintiá wesa chíkich péprunam jeamiayi. Nu péprunmaya nuwá naari Marta ni jeen itiaamiayi.

<sup>39</sup> Marta kaj ámiayi ni naari Marí. Marisha unuiniamun anturkataj tusa Jesusa nawen pujursamiayi.

<sup>40</sup> Tura Mártaka ni takatrín ti enentáimtak Jesusan weantuk tímiayi “Uuntá Jesusá, ¿winia kajr takatan winiak íktursainia nuka enentáimtsunek? Winia yáintá turuttia” tímiayi.

<sup>41</sup> Tutai Jesus tímiayi “Maaj Martá, untsurí túratin ana nu ti enentáimsam itit awajtamui.

<sup>42</sup> Tura aya chikichik nekas túratniuiti. Marikia nekas péñker ana nuna achikiai. Nusha penké jurunkishtatui” tímiayi.

## 11

### *Jesus Yus áujsatniun unuiniamiania nu (Mateu 6.9-15; 7.7-11)*

<sup>1</sup> Chíkich tsawantaj Jesus Yúsan áujsataj tusa atsamunam pujumiayi. Áujtua amikmatai ni unuiniamurí chikichik Nin tímiayi “Uuntá, imiakratin Juan ní unuiniamurín unuiniamia núnismek Yus áujsatin unuitiurta.”

<sup>2</sup> Tutai Jesus tímiayi “Yus áujkuram ju titiarum:

Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunkanmasha uminkiatí.

<sup>3</sup> Aparú, ii yurumkarj ashí tsawant amasta.

<sup>4</sup> Tura winia nemasrun tsankurajna núnismek, Aparú, winia tunaaru tumashrisha tsankururta. Tunáa wakeruktin tsankatrukaip. Antsu ashí tunaanumia uwemtikururta.”

<sup>5-6</sup> Nuyá Jesus juna tímiayi. “Wats, ju titiái. Kashi ajapén amikrum werishtameash. Tura “Winia amikiur yajaya winia jearu yama tayi. Tura ajamsatniun penké takaktsujai. Tuma asamtai amikru, menaintiu apatuk ajamprustá” tíchatameash.

<sup>7</sup> Tura nii inít pujusan chichaak “Wari, wáitisha epenmiaiti, tura winia uchirsha wijíai ashí tepeñawai. Itiur nantakniak amastaj. Itit awajtipia” turamchanpiash.

<sup>8</sup> Wats, paant tájarme, niisha amikrum asa, nantaki ikiatmastinian nakiti-ayat, itit awajitn tusa nantaki ashí wakeramna nuna suramsattawai.

<sup>9</sup> Tuma asamtai tájarme: Yus seatarum; túrakumin suramsattarme. Eakrumka wáinkiatarme. “Winiajai” tákurmin awaintiamattarme.

<sup>10</sup> Seana núnaka suániatsuk. Eana nuka wáintsuk. “Winiajai” tuinia núnaka awániatsuk.’

<sup>11</sup> ‘Wats, átum uchirtintiram, ame uchiram apatkun seatmakui ¿kayaash súsaintiam? Namakan seatmakui ¿napíash súsaintiam?

<sup>12</sup> Nujintian seatmakuisha ¿titiñkiash súsaintiam?

<sup>13</sup> Warí, átum imiá yajauchitirmesha atumí uchirj péñker ana nu tuke súchakaitrum. Atumí Aparj nayaimpiniam pujana nu, seakrumninkia nú nankaamas ni Wakanjn suramsattawai.” Tu unuiniamiyi.

### *Jesusan “iwianchi kakarmarjijaj túrawai” tiarmiayi*

*(Mateu 12.22-30; Márkus 3.19-27)*

<sup>14</sup> Shuar iwianchruku asa chichachu ámiayi. Nuna enentáyan nu iwianchin Jesus jiki akupkamiayi. Íwianch jinkimtai chichachu chichasmiai. Túramtai shuar nuj pujuarmia nu ti enentáimprarmiai.

<sup>15</sup> Tura chíkich tiarmiayi “Juka iwianchi kapitiántri Satanásan, ni chíkich naari Pirsepún umirniuiti. Tuma asa nuna kakarmarjijaj iwianchin jiki akupeawai.”

<sup>16</sup> Tura chíkichkia, nekas Yúsnumia taawashit tusar “Nayaimpinmaya kakaram ana nu iniakmasam aents tujintiam túra” Jesusan tiarmiayi.

<sup>17</sup> Tura Jesus tu enentáimiainian neka asa tímiayi “Núu nunkanmayan shuar nuamtak kajernaiyakuñkia nú nunka wárik meserchattawak; nuamtak shuarsha ni shuarjijaj kajernaiyaksha amunaikchartatuak.

<sup>18</sup> Winiaka “Pirsepú iwianchi kakarmarjijaj iwianchin jiki akupeawai” túruttsurmek. Tuma asamtai tájarme, uunt iwianch Satanás naartin, ni sun-tarjijaj kajernaiyaksha ¿itiur tuke kakaram átink’?

<sup>19</sup> Tura Wi Pirsepú kakarmarjijaj iwianchin jiki akupeakuñkia, atumi shuarisha ¿yana kakarmarjijaj iwianchin jiki akupena? Niisha “iwianchi kakarmarjijaj túrichuitji” tuiniajsha ¿itiura Winiasha, “iwianchi kakarmarjijaj túraiti” turutminiaitrum?

<sup>20</sup> Wikia Yusa kakarmarjijaj iwianchin jikin akupeajai. Nu nekaarum Yus atumi enentáin akupin ajasuana nu nékarme.’

<sup>21</sup> ‘Kakaram áishman kúishtumaktajtsa iwiarnar wajas jeen wáinkui, ni warirj inít ana nusha tímiatrusan ániawai.

<sup>22</sup> Antsu niijjaj nankaamas kakaram ana nu winiakka nupetkashtatuak. Tura kúishtumaktinian iwiar takakman jurawai. Tura kasamkámun ni amikrjn súawai. Kakaram áishman iwianchin nakumeawai. Tura nujaj nankaamas kakaram áishman Winia nakumprawai.

<sup>23</sup> Iista. Winia nemartatsna nu winia nemasruiti. Núnisan Winia yáintsuna nuka aya itiurchat nájateawai.’

### *Iwianch jiki akupkamuiat wáketna nuna ujakmania nu*

*(Mateu 12.43-45)*

<sup>24</sup> Nuyá Jesus juna tímiayi: ‘Shuara enentáiya íwianch jinkin ayamprataj tusa yumi penké yútatsna nuj wéawai. Tura ayampratniun wáincha asa ataksha waketkitniun enentáimui. “Wi jinkimij nujn waketkitjai” tawai.

<sup>25</sup> Tura waketki péñker iwiamun tura ankant aan wáiniui.



<sup>26</sup> Nuna wáiniak, ni ain siati iwianchin niijjai nankaamas yajaunchin itiá enkemáwartatui. Túrunamtai nu shuar nuiki nuna nankaamas yajauch ajastatui.” Tu tímiayi Jesus.

*Nekas warastin*

<sup>27</sup> Shuar iruniarmia nuĵ Jesus nuna chichaa pujai, nuwa untsujuk “Ame nukun Yus ti yáinkiai. Ni ampujén ame pujuschamkam. Ámin amuntstamachmakam” tímiayi.

<sup>28</sup> Tutai Jesus tímiayi “Antsu ni chichamen antukar umirainia nuna, nukurjai nankaamas Yus ti yáinkiaru ániawai, tajai” tímiayi.

*(Mateu 12.38-42; Márkus 8.12)*

<sup>29</sup> Shuar untsuri Niin káunkarmatai Jesus tímiayi “Yamaiya shuarka yajauch ániawai. Yajauch ásar, chichartuiniak “Nekas Yúsnunumiaitkiumka aents tujintiamua nu túram Yusa kakarmarĵ iniakmasta” turutainiawai. Túrasha áyatik yaunchu Junas túrunamujai iniakmasmia nujain nekaatin ániawai.

<sup>30</sup> Kame Junas túrunamujai Níniwi péprunmaya shuaran yaunchu Yus ni kakarmarĵ iniakmasmia núnisan yamaisha Aents Ajasu tutainjiana nu Wi túrunamujai Yuska ni kakarmarĵ iniakturmastatume.

<sup>31</sup> Yaunchu Sarumún uunt akupin pujai Sepa núnkanmaya nuwa akupin Sarumunka chichamen nekaataĵ tusa ti jeashtanmaya támiayi. Tura yamaikia Sarumunjai nankaamas pujai átumka anturtatume. Tuma asamtai Wi tájarme, Yus ashí shuaran nekapsattana nu tsawant jeamtai nu nuwa, akupniun pénker anturka asamtai, Yus ímianum pénker átatui. Antsu atumsha Winia anturtukcha asakrumin Yus ímianum yajauch átatume.

<sup>32</sup> Tura Yúsnan etserin Junas Níniwi péprunmaya shuarnum Yus Chichaman etserkamtai nu shuar ni tunaarĵ enentámtusar enentáin yapajáwarmiayi. Tura juĵ yamáĵ Junasĵai nankaamas etserin pujajai. ĵTuma asamtai nekapsatin tsawant jeamtai Níniwinmaya shuar yamaiya shuar árumna nuna sumantikramattarme!

*Ayashi tsáapniri*

*(Mateu 5.15; 6.22-23)*

<sup>33</sup> ‘ĵShirikip ekeemakar úuktinkiai? Pitiaknumsha enkeashtiniaiti. Antsu shuar jeá wayana nu paant ímsat tusar yakí ekensatniuiti.

<sup>34</sup> Ame ĵimijiai wáinkiam nuĵai wekasatin nekaattame. Tuma asamtai ame ĵimijiai pénker ana nu wáinkiumka pénker wekasattame; antsu ame ĵimijiai yajauch ana nu wáinkiumka, kiritniunam wekasatniua núnisan yajauchiniam wekasattame.

<sup>35</sup> Anearta. Enentáimin tsáapin ana nu kiritin ajaschati tusam anearam wekasata.

<sup>36</sup> Ame ayashmĵin kirit ajatsuk aya tsáapniniaitkiuinĵia, shirikip paant awajea núnisan ashí paant wáinkiattame” tímiayi.

*Pariséuncha, Israer-shuara jintinniurisha “yajauchiitume” tímiayi Jesus*

*(Mateu 23.1-36; Márkus 12.38-40; Rúkas 20.45-47)*

<sup>37</sup> Jesus chichasua amikmatai Pariséu shuar, winia jearuĵ yurumáitia tusa untsukmiayi. Tutai Jesus wayá misanam pujusmiayi.

<sup>38</sup> Tura Israer-shuar ikijjmartin ana nuna túrtsuk aya pujakuĵ Pariséusha nuna wáiniak “maa ĵurukamtia tura?” tu enentáimsamiayi.

<sup>39</sup> Tura Uunt Jesus tímiayi “Pariséutirmeka atumí yurumtaiĵi aya páatek nijiaktin ti wakeriniaitume. Atumsha nu yurumtaiĵi méteketume. Páatek

pénker túrarme. Tura atumí enentáinkia kasamkatniusha tura yajauchia nusha piakuiti.

<sup>40</sup> ¡Enentáimcha! Warí, ashí pátatek wáiniaj<sup>1</sup> nuna Yus najanachmakia; tura init paantcha ana nunasha Yúsak najanachmakia.

<sup>41-42</sup> Aneartarum, Pariséutirmesha. Aya nuka méntasha, anissha tura aya apatkusha Yus súsatín ti enentáimprume. Nukasha tsuriasrum apatkusha tias ana nuyá chikichik achikrum, Yúsnaíti tátsurmek. Tura antsu nu túratín iniaitsuk pénker wekasatniusha, Yus anenmarmena nusha pénker enentáimsatniuitrume. Wats init, enentáimin ana nútiksarmek jusam susarta. Nuñkia ashí chamir átatui.’

<sup>43</sup> ‘Tura aneartarum Pariséutirmesha. Yus áujtai jeanam penkeri pujutainium pujustin wakerarme. Tura jintiá aents íimianiamunam ti shiir áujtusarat tusarum wakerarme.’

<sup>44</sup> ‘Jintinniutirmesha, Pariséutirmesha máí-metek aneartarum. ¡Antar shiir chichamtinia! Iwiarsamu paantcha núniniaitrume. Shuar nu nankaamaksha nájamiat nékatsui. Núnisañ shuar atumí chichame antukar yajauchia nuna nekartamsurme.’

<sup>45</sup> Nuikia Israer-shuara jintinniuri chikichik Jesusan chicharuk tímiayi “Uuntá, nu tákum incha yajauch chichareame.”

<sup>46</sup> Tutai Jesus tímiayi “Atumsha jintinniutiram aneartarum. Atumí akupkamurijjaj káarak ti kijin entsakchamnia súarme. Tura átumka yáintaj tusarum atumí uwejejaisha penké ántiatsrume.’

<sup>47</sup> ‘Aneartarum tájarne. Yaunchu atumí uuntri Yúsnan étserniun máawarmia nuna iwiarsamuri átum jeamniuitrume nu etserin ti pénker ásar matai kajinmatkishtin.

<sup>48</sup> Nu túrakrum atumí uuntri túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrum niijjaj méteketrume. Warí, Yúsnan etserniuiwiarsamuriñ jeamkuram atumek sumamarme.’

<sup>49</sup> ‘Atumí túramuriñ nekáa Yus júna yaunchu tímiayi: “Winia etserturniun tura winia akatramurnasha niñ akuptukartajai. Túramtai chikichnaka máawartatui, tura chikichnaka pataatukartatui.”

<sup>50</sup> Tuma asamtai ashí ni etserniuriñ maamu ainia nuna, yamaiya áentstirmin Yus sumamtikramattarme. Nuñka najanamunmaya júki

<sup>51</sup> yamáí ímiajaj maamu ainia nuna, kame Apir maamunmaya júki yamáí Sakarías maamua tímiajaj anintrustatui. Naman maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asamtai tájarne, ni etserniuriñ maantamnwarmia nuna yamáí matsatrumna nútirmin aninmasartatui.’

<sup>52</sup> ‘Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsrume. Tura nekaataj tana nusha suritiarme” tímiayi.

<sup>53-54</sup> Jesus nuna takui Pariséusha, jintinniusha ti kakerkarmiayi. Tura nii tana nujaj “yajauch túrame” titiai tusar wakeruiniak untsurí anintriarmiayi.

## 12

<sup>1</sup> Nu tumaj shuar ti untsurí káunkarmiayi. Ti kaunka ásar nawen mai-najatnai ajarmiayi. Tura Jesus ni unuiniamuriñ tútan juarkimiayi. “Pariséu ántar chichamtin ániawai. Nuka wakaprutaiya núnisaiti. Wakaprutaiikia nijjamanch yumirniun yama enkeam páantchaiti. Tura ukunam nekaamni-aiti.

<sup>2</sup> Núnisañ ashí paantcha ana nu iwiainiakma átatui. Uukma ana nusha nekaamu átatui.

<sup>3</sup> Nu tuma asamtai, kiritniunam tímiarmena nusha tsawái tsáapin ajasmanum antunkattawai. Tura jea inít pujusrum ishishmasrum tímiarmena nusha áa ti paant etsernaktatui.'

*Yusak ashamkatniuiti  
(Mateu 10.28-31)*

<sup>4</sup> 'Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui.

<sup>5</sup> Tura ya nekas ashamkatniuitrum, nuna paant jintintiattajrume. Ame ayashmí maa, nuyá ámin jinium akuptamkatniun tujintiatsna nu ashamkatarum. Ee, Yus ashamkatarum, tájarme.'

<sup>6</sup> 'Jimiará chĩki ishitiúpchich ishichik kuitjai surukchatniukait. Túrasha Yusha nu chĩkin penké kajinmatkishtatui.

<sup>7</sup> Wats, ashamkairap. Untsurí chĩkijjai nankaamas Yuska atumin enentáimturmarne. Warí, ame intiashmin mash Yus nekapmaruiti.'

*(Mateu 10.32-33; 12.32; 10.19-20)*

<sup>8</sup> 'Ashí shuar ashí íimiainiamunam Winia Aents Ajasu tutain, Winia natsantruiniatsna núnaka, Wisha Yusa suntarí íimiainiamunam natsantrashtatjai;

<sup>9</sup> antsu shuar íimiainiamunam Winia natsantrana núnaka Wisha Yusa suntarí íimiainiamunam natsantrattajai.'

<sup>10</sup> 'Winia, Aents Ajasu tutain, shuar yajauch chichartakuĩkia nusha tsankuramniaiti, tura Yusa Wakanĩncha yajauch chicharkuĩkia nuka penké tsankurachminiaiti.'

<sup>11</sup> 'Wats, Israer-shuar iruntai jeanmasha, tura Israer-shuar kapitánniumsha, uuntrumsha juramainiakui, aninmainiakuishawarintajak tusam ti enentáimsáip.

<sup>12</sup> Ame áimkiatin jeamtai, Yusa Wakaní ame títiatmena nuna jintinramatawai," tu timiayi.

*Kuítiak enentáimtuschatniuitji*

<sup>13</sup> Chĩkich áishman Jesusan tímiayi "Uuntá, ii aparí ikiurtamkimiaj nuna yatsur winiasha nakak surustí, titia" tímiayi.

<sup>14</sup> Tutai Jesus tímiayi "Áishmanka, atumin nu túratin anaikiamukaitiaj."

<sup>15</sup> Nuyá tímiayi "Pénker enentáimsatarum. Nii takakna nújain shuar iwiaaku, áchatniuiti. Tuma asamtai kuítrintin ajastin aya nuke enentáimsaip."

<sup>16</sup> Nuyá juna méték-taku chichaman unuiniak tímiayi:

"Kuítrintin áishman ni ajaríyan arakan ti nukap juukmai.

<sup>17</sup> Tura "¿Ti nukap asamtai tuin ikiustaj. Itiurkatjak?" tu enentáimsamiai.

<sup>18</sup> Wats, wi nékajai. Winia ikiutái-jearun ashiran nú nankaamas úntan najanatjai. Tura nuj ashí ikiustajai.

<sup>19</sup> Nuiñkia untsurí uwitin shiir pujustinian ikiusman takustatjai. Tuma asamtai, ayampran, yurumán, umaran shiir pujustatjai' timiai.'

<sup>20</sup> 'Tura Yus nin chicharuk timiai "Netse. Yamái kashi jakattame. Nuiñkia imiá nukap ikiusumna nusha ¿yana átata?" timiai' tímiayi.

<sup>21</sup> Nuyá Jesus tímiayi "Shuar niniki kuítrin ikiauntumna nu, núnisaiti. Túrasha Yusjai íismaka kuítrinchaíti."

*Yus ni uchirín pénker wáinkiaiti  
(Mateu 6.25-34)*

<sup>22</sup> Nuyá ni unuiniamurj̄n Jesus juna tímiayi: “Warí yuarik pujustaj̄i tura warin̄ entsartaj̄i tusarum nuke ti enentáimsairap.

<sup>23</sup> Yus iwiaaku átinian amasu asa yurumkancha amastatui. Tura ju ayashniasha najana asa entsataincha amastatui.

<sup>24</sup> Chínkisha enentáimsatarum. Niisha arakmainiatsui. Juuk yurumkan ikiuiniatsui. Tuma aijn̄ Yuska ni yurumátniur̄in tuke súawai. Atumsha chin̄kia nú nan̄kaamaschakaítrum.

<sup>25</sup> Tura ya shuarak, ti enentáimtana nuj̄aj̄i nú naya ajasminiait.

<sup>26</sup> Kame yúpichuch ana nusha túrachminiaiatitrumsha, ¿urukamtai ch̄kích aina nusha ti enentáimtarum?”

<sup>27</sup> ‘Ístá, kukujsa takaachitiat tura nájanchitiat ti sh̄írmach áiniawai. Yaunchu akupin Sarumún̄ ti shiir iwiarmamniuitiat kukujsa tímianchayayi.

<sup>28</sup> Íis, nupa yamá tsakaawai tura kashin aents tsupikiar jinium apeánáwai. Tuma aijn̄ Yus ti shiir awajeatsuk. Nuna tura asa atumniasha nú péñker wáitmachattawak. ¿Urukamtai Yus nekas enentáimtatsrum?”

<sup>29-30</sup> Ju nun̄kanam ana nu ti pachiiirap. Ch̄kích shuar, Yúsan nékainiatsna nu, warin̄ yuataj̄i, warin̄ umartaj̄i nuna ti pachiiiniawai. Tura atumsha tu enentáimsairap. Urukátjak, tiirap. Ame Apa nayaimpiniam pujana nu, ashí atsumarmena nuna nékawai.

<sup>31</sup> Antsu emka Yusna nu enentáimtustarum. Túrakrumniñkia atsumamna nuna Yus suramsattawai.’

### *Kuítian pachis Jesus unuiniamiania nu (Mateu 6.19-21)*

<sup>32</sup> ‘Winia murikritiram ashamkairap. Untsuríchuitrume. Túrasha atumí Apari ni akuptair̄ijn̄ pachitmaktsa ti wakerutmarme.

<sup>33-34</sup> Kuítrum tuj̄ aa, nuj̄ tuke enentáimtittiarne. Tume asantai takakrumna nu surukrum atsumainia nu susatarum. Nuka en̄ketai arut ajatsna nuj̄ en̄keatniua núnskete. Túrakrum nayaimpinmaya kuit amuatsna nu íkiawearne. Nujsa kasa nu kuitian kasamkataj̄ tusa wayachminiaiti, tura kayaasha nu kuitian yúatniun tujintiawai.’

### *Aneerar wekasatniuitji*

<sup>35-36</sup> ‘Ju enentáimsatarum. Ni uuntrī nuatnaikiatin námpernumiá taa, “uraitia” takui, takarn̄jur̄i jinia ekeemakar wárik urattiai tusar nakáa pujuiniawai. Atumsha núnisrumek Wi atum̄j̄ Uuntrī támatái, shiir itiaatai tusarum anearum wekasatarum.

<sup>37</sup> Ni uuntrī taak iwíáa pujuinian wáinkiarai nuka shiir pujuiniawai. Nu úntak iwiar, “misanam pujustarum” ni takarn̄jur̄in títiatui tura yurumkan sústartui.

<sup>38</sup> Kashi ajapén̄ taaksha tura tsawaana aj̄ taaksha ni takarn̄jur̄in iwíáa pujuinian wáinkiuñka, nu takar̄in shiir pujuiniawai.

<sup>39</sup> Tura jusha nekaatarum. Jeenn̄iua nu, kasa tátinian nékaitkiuñka, iwíáa pujusaayi. Kasa wayá kasamkatniun suritkiaayi.

<sup>40</sup> Atumsha núnisrumek, anearum pujustarum. Wi Aents Ajasu tutai aya aneachmanum tátatjai” tímiayi.

### *Pénker takarin yajauch takarniuj̄aj̄i (Mateu 24.45-51)*

<sup>41</sup> Nuyá Pítiur aniasmiayi “¿Aya ínkik unuiniartaj̄ tusam nu métek-taku chicham támek. Kame ashí nekaawarat tusamek tame?” tímiayi.

42 Tutai Jesus tímiayi “Atumsha péñker takatan wáinnua núnisketrume. Takatan wáinin ni uuntri takatrin takainia nuna, yurumátin jeamtai, ayurkamna núiti ni úntrin shiir umirna nu, tura péñker enentáimtana nu.

43 Ni uuntri taa, takatrin tímiatrusan túran wáinkiuñkia nu wáinnusha shiir enentáimsamniaiti.

44 Umirin asamtai, ni uuntri ashí ni waririn wáitrukat tusa apujsattawai. Nuna paant tájarne.

45 Tura nu takatan wáinnusha “úuntur wau táchattawai” tu enentáimias, ni uuntri takarniurin yajauch awajeakuñkia tura niniki ti yurumá, ti umar nampeakuñkia,

46 nuñkia ni uuntri ni nákachmanum aya aneachma taa ti asutiáttawai. Umichu pujuinia nuñ akupkattawai.’

47 “Takarín ni uuntri wakera nuna nékayat, iwiartsuk umitsuk pujakka ti awatramu átatui.

48 Túrasha takarín nékachu asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisan nankaamas seawartatui.’

*Jesusjai shuar akannartatui*  
(Mateu 10.34-36)

49 ‘Jijjai nekapsatniua nútiksanak nunkanam jinia ikiapartaj tusan tamajai. Tura túrunat tusan ti wakerajai.

50 Imiantinia núnisan itirchat ukatrúktatui. Nusha wárik amuukat tusan ti wakerajai.

51 “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai.

52 Yamái jukimiutak chikichik shuarnum senku ainia nu akannakartatui; menaintiu shuar ni shuarin jímieran nakitrartatui. Jímiarsha ni shuarin menaintiun nakitrartatui.

53 Apasha ni uchirin nakitrattawai. Núnisan uchisha ni aparin nakitrattawai. Nukusha ni nawantrin nakitrattawai, nawantrisha nukurin nakitrattawai. Tsatsarisha ni najatin nakitrattawai; najatisha tsatsarin nakitrattawai.”

*(Mateu 16.1-4; Márkus 8.11-13)*

54 Jesus áentsun chicharuk junasha tímiayi “Atumsha nantu akaatainmaani kjarmatai “yutuktatui” tátsurmek. Nusha nekas tárume.

55 Tura anaaraniã nase násenkamtai “séejik átatui” tárume. Tura nekas tárume.

56 Yuranminmasha nunkanmasha túruna nu nékarme. Túmaitiaturumsha ju tsawantaj túrunattana nusha çitiura nékatsrum? ¡Maaj, ántrairume!”

*Nemasrumjaisha nawamnaikiata*  
(Mateu 5.25-26)

57 “Túrasha péñker ana nusha çurukamtai atumek enentáimsarum wáintsuram?

58 Irutramuram úuntnum júramkuñkia jintia wésamek “nuamtak iwiarar-tai” titiã. Túrachkumnñkia akupniunam juramkittiame. Tura niisha suntar-num akuptamkattame. Tura niisha sepunam enketmattawai.

59 Tura nekas tajai, nuñ enkemamka ashí rearchisha akikmachkumka jínkishtatme” tímiayi.

## 13

*Ii enentáí yapajíátniuitji*

1 Nu tsawantin chícham ujaktai tusar Jesusan tariarmiayi. Kariréa nunkanam Israer-shuar ni waakarín máawar Yus susatai tusar pujuiniaj, Piratu nin maa, nuna numpen waaka numpejai pachimpramun ujakarmiayi.

2 Tura Jesus tímiayi “¿Warí enentáimsarum? Kariréanmaya áishman tárumna nu, chíkích Kariréanmaya áishmanjai nankaamas yajauch ásar túrunawarai ¿tu enentáimprumek?”

3 Atsá; atumí enentáí yapajíáchkurmeka núnisrumek atumsha jakattarme. Nuna paant tájarme, tímiayi.

4 Tura tiasiúchu áishman yakí jea Seruí kupiniak iniaak nekenkarmiania nu, ¿warí enentáimtarum? Chíkích Jerusarénumia shuarjai nankaamas tunáa ásar túrunawarai ¿tu enentáimprumek?”

5 Atsá, tájarme. Atumí enentáí yapajíáchkurmeka núnisrumek atumsha jakattarme.”

*Iikiu numi nereatsna nu*

6 Junasha Jesus métek-taku chichaman tímiauyi. Júiti:

Shuar ni ajarín iikiu numin araamun takakuyi. Nerekchiash tusa iyumai. Túrasha nere atsumai.

7 Nuinikia ni ajarín wáinniuin timiai “Antukta, menaintiú uwitin juna nere átai tusan waketrú pujajai; túrasha penké wáinkiachjai. Ajakta. ¿Urukamtai ánttrash wajastata?”

8 Tutai ajá wáinin timiai “Atsá, uuntá; ju uwitin wajastí. Wajamurín takarsatjai tura penker nunkan matsatkatjai.

9 Nujai nerekchampiash. Tura tuke nereachkuinikia nuinikia ajakta” timiai”, tímiayi.

*Nuwān punuá kaarun Jesus tsuármiania nu*

10 Ayampratin tsawantaj Israer-shuar iruntai jeanam Jesus unuiniak pujumiayi.

11 Nujsa nuwā pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiaramiayi. Túramu asa pańkái nakuenkataj tukamá penké tujinmiayi.

12 Jesus nuna wáiniak, chicharuk “Nawantrú, ame jaamurmiya ankant ajasume” tímiayi.

13 Nuna tinia ni uwejejai antiñmiayi. Tura nú chichamaik nuwasha pańkái nakuenkamiayi. Tura Yusa náarín uunt awajsamiayi.

14 Tura Jesus ayampratin tsawantaj tsuaru asamtai, iruntai jea uuntri kajek iruntrarmia nuna tímiayi “Sais tsawantin takaschatniukait; ayampratin tsawantaj tsuámartaj tusarum táchatniuitrume. Sais tsawant ana nuj tátiniaitrume.”

15 Tura Jesus tímiayi, “¡Ántar chichamtinia! ¿atumí waakarisha atumí umpururisha yumi aartai tusarum ayampratin tsawantin atárum júatsrumek?”

16 Tura ju nuwasha, atumí shuarí Apraám shuarnumia akiiniaiti. Nii tiasiúchu uwi Satanás yajauch awajsamujai jinkiamuyayi. Nincha ayampratin tsawant ain yajauch awajsamunmaya atíachminkiait” tímiayi.

17 Jesus nuna takui ni nemasrisha natsaararmiayi. Tura penké shuar ni penker túramurín wáinkiar warasarmiayi.

*Mustasa jinkíái**(Mateu 13.31-32; Márkus 4.30-32)*<sup>18</sup> Nuyá Jesus tímiayi “¿Yusa akupeamurí warijjain métek-takuit?<sup>19</sup> Mustasa jinkíáijjai métek-takuiti. Mustasa jinkíaincha shuar ni ajarijn aramiayi. Tsapái, tsakaak, uunt numi ajasmíayi. Ti uunt asamtai chiníki ni kanawen pasunmarmiayi.”*(Mateu 13.33)*<sup>20</sup> Tura junasha tímiayi: “¿Yusa akupeamurí warijjain métek-takuit?<sup>21</sup> Tanta wakaprutaia métek-takuiti. Arinia núkap ana nuí nuwá wakaprutain ishichik enkeámiayi. Túram ashí wakapruamiayi.” Tu tímiayi.*Yupikiach waiti**(Mateu 7.13-14, 21-23)*<sup>22</sup> Jesus Jerusarénum jeattsá weak untsurí peprunam wayá unuiniarkutak wémiayi.<sup>23</sup> Weaj chíkich shuar aniasmiayi “Uuntá, ¿uwemainia nu ishichkíai?”<sup>24</sup> Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujinkíartatui, tájarme.<sup>25</sup> Jeá nérenniurí wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” títiatrum. Túrasha “Nékatsjarme. ¿Tuyantskaitrum?” turamtatrum.<sup>26</sup> Nuyá átum títiatrum “Túrasha, uuntá, iisha ámijjai yurumámji, ámijjai umarmaji. Tura ii pépruríncha unuiniamame.”<sup>27</sup> Túrasha nii títiatui “Tuyantskaitrum, nékatsjarme, tátsujrumek. Yajauch túrintirmeka winiyaníka kanaktiarum.”<sup>28</sup> ‘Nuyá Apraámsha, Isaksha, Jakupsha tura ashí Yúsnan etserin Yus akupeana nuí wayawaru wáinkiarum tura aa ajapam pujusrum ti úutkuram naim tásarara ajattarme.<sup>29</sup> Tura Yus akupeana nuí, nantu tatainmaaniyasha nantu akaatainmaaniyasha, arakiyasha, nunkaaniyasha taar, imia Israer-shuarchaitiat yurumátai tusar pujusartatui. Tura atumsha, “Apraám shuáraitjai” táyatrum, wayashtatrum.<sup>30</sup> Nujísha yamáí ukunmaani ainia nusha emka ártatui; tura yamáí emka ainia nusha nuísha ukunmaaní ártatui.”*Jerusarénumaani Jesus wémiayi**(Mateu 23.37-39)*<sup>31</sup> Nu tsawantaj Pariséu aents Jesusan tariar tiarmiayi “Erutis mantamattsa wakerutmawai. Tuma asamtai juyánka wetá.”<sup>32</sup> Tutai Jesus tímiayi “Werum nu kujancham ju titiarum: “Ístá. Yamaisha ishichik tsawant iwianchin jíikin akupkartajai; túran jaancha tsuáartajai. Tura ukunam amuktajai.”<sup>33</sup> Tura Jerusarénumaaní ishichik tsawant tuke wétiniaitjai. Yúsnan etserin aya Jerusarénumaaní jákatniui!’<sup>34</sup> ‘Jerusarénumiáitiram, Yúsnan etserin máiniaitrum; tura Yus akatar akupturmakmania nusha kayajai tukurum máiniaitrum! Tuma aín atash ni shiamprín etektana núnisnak Wisha weaktasan wakerimjarme, túrasha nakitramarme.<sup>35</sup> Iistarum. Atumniasha Yus ajapramaitrum. Tura “Yusa náarín winiana nu, shiir atí” títiatrumna nú tsawant jeatsain penké wáitkiashtatrum. Nuna tájarme” tímiayi Jesus.

## 14

*Áishman̄ eaak-jaan Jesus tsuármiania nu*

1 Ayampratin tsawantaj̄ Pariséu uuntrī jeen̄ Jesus yurumáttsa wémiayi. Tura chíkich Pariséu wariniak túrat tusar̄ iī pujuarmiayi.

2 Nuj̄ áishman̄ eaak-jaa Jesus pujamunam naka pujumiayi.

3 Jintinniuncha Pariséuncha Jesus aniasmiayi “¿Warí tárum? ¿Ayampratin tsawantaj̄ jaa tsuárminkiait. Tsuárchamniakait?” tímiayi.

4 Tura niisha áimtsuk pujuarmiayi. Nuñkia jaan antiñ tsuármiai. Tura “shiir wetá” tímiayi.

5 Nuyá Pariséun chicharuk, “Atumí umpuurarisha, waakarisha waa táurmanum akaiki iniamtai, ayampratin tsawant ain̄ nu chichamaik júatsrumek” tímiayi.

6 Takui áimkiatniun penké tujinkiarmiayi.

*Nuátnaikiatin nampernum ipiaamu ármia nu*

7 Ipiaamusha penkerj̄ pujutainium pujustaitsar ti wakeruiniakui, Jesus nuna wániak juna jintintramiayi:

8 “Nuátnaikiatin nampernum penkerj̄ pujutainium pujusaip. Nuj̄ pujakminkia, chíkich ámijiaj̄ nankaamas penkérj̄ táchatpiash.’

9 Tura ipiatmania nu chichartamuk “Chíkich iiktusta” turamchatpiash. Nuñkia chíkich nánkatkamu pujutainium wéakum natsartatme.

10 Antsu ipiatmakmin, nánkatkamu pujutainium pujustá. Nuñkia ipiatmamnia nu chichartamuk “Amikru, ámeka juj̄ penkerj̄ pujutainium pujustá” turamtatui. Nujaj̄ chíkich ipiaamu ainia nu, “nekas penkerinti” turamartatui.

11 Iimiata, “penkerintjai” tu enentáimtuma nuka péejchach awajnastatui. Tura ímianchach enentáimtúmana nuka waantu ajastiniaiti.”

12 Nuyá Nin ipiaamua nuna chicharuk tímiayi “Amesha yurumáití tusam untsuktajtsam wakerakmeke, ame amikrumsha, yatsumsha, ame shuarumsha, írutramuram kuítrintin ainia nusha ipiaawaip. Nii ipiaamka, ataksha íksañ ámin ipiatmashtatuak. Nujaj̄ akikma átatme.

13 Antsu yurumáití tusam untsuktajtsam wakerakmeke, kuítrincha, wekaicha, shutuapsha, kusurusha ipiaawarta.

14 Niisha akirmaktinian tujintiainiawai. Péñker shuar nantakiartatna nuj̄ akinkiatatme. Nu tuma asantai warastatme” tímiayi.

*Unt namperan Jesus nekapmá chichasmiania nu*

15 Nu misanam pujuarmia nuyá, chikichik Jesus chichaamun antuk, Jesusan tímiayi “Yus akupeamunam pachiiniak, yurumkun̄ka ti shiir ainti.”

16 Nuna takui Jesus juna jintintiamiayi: “Áishman̄ namperan nájanut, untsurj̄ shuaran taartí tusa akatar akupkamai.

17 Yurumátin jeamtai “Winitiarum, yurumátin jeayi” tu tiarta tusa ni takarniurin̄ akupkamai.

18 Tura winichminiaitji tusar ashí ujakarmai. Chíkich timiai “Nuñkan yamá sumarmakjai. Iyutaj tusa wéakun winishtatjai. Tsañkurturti” timiai.

19 Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsañkurturti” timiai.

20 Tura chíkich chichaak “Yamá nuatnaikiajai. Tuma asan winishtatjai” timiai.



21 Takarin waketki ni úuntriñ ashí nuna ujakmai. Nuna antuk niisha ka-  
jekmiayi. Tura ni takarniurin timiai “Ju péprunam péñker jintianmasha tura  
uchich jintiachinmasha weme, kuítríncha tura wekaichasha, shutuapsha,  
kusurusha itiaarta.”

22 Nuyá ukunam ni takarniurí taa chicharuk “Uuntá, ame turutmiamna  
nútkisanak túramjai; túrasha tuke ankant awai” timiai.’

23 ‘Tutai ni uuntri chichaak “Jintianam weme, chíkich jintiachiniam weme,  
wáinmena nu ashí awayawarta. Winia jearuj piakat tusan wakerajai.

24 Emka ipiaawarmajnia nuka penké chikichkíksha winiñkia  
yurumáchartatui, tajarme’ tímiayi.”

### *Kristu nemarsatin yúpitchuchichuiti*

25 Untsurí aents Jesusjái irunki wearmiayi. Niisha nuna apajas iis juna  
tímiayi:

26 “Shuar ni aparíncha, ni nukuríncha, nuaríncha uchiríncha, yachíncha,  
umajíncha Wijíjái nankaamas enentáimtakka, tura shiir pujustinian wakerak  
Winí winitniun nakitiakka winia unuiniampur ajaschamniaiti.

27 Ni wakeramurín ajakeak ni krusrj yanakí nemartatsna nu winia unuini-  
ampur ajaschamniaiti.’

28 ‘Jea yakí jeamtaj tusam wakerakmeka, kuítian urutmak ajapawaintiaj  
tusam tura urutmajaink’i amukaintiaj tusam emka enentáimsashtatmek.

29 Túrutsuk aya ukura iniaisam amuktin tujinkiakmiñkia, nuna wáiniainia  
nu, wishikiainiak juna tiartatui:

30 “Íiskua. Nu shuar jeamtinian nankamamiayi. Túrasha amuktinian  
tujinkiamiayi.”’

31 ‘Tura uunt kapitían chíkich kapitíanjái mesetan najanatin áchatpiash.  
Emka, niisha pujus, tias mir (10.000) suntarjai painti mir (20.000) suntar  
winiana nuna nupetkaintjash tusa enentáimsashtatuak.

32 Tujintiakka, chíkich kapitían jeachat pujaanak, nawamnaikiatai tusa  
akatar akupkashtatuak.

33 Wats, “Kristu unuiniampurí ajastinjái, wi takakjana juna warí winia  
itiurtawa” tu enentáimsatniuitrume. Túrachkurmeka winia unuiniampur ajastin  
tujinkiarne.’

### *Wee michumarka yajauchiiti*

*(Mateu 5.13; Márkus 9.50)*

34 ‘Weeka jeaku péñkeraiti. Tura michumarka çitiurak atak péñker ati?

35 Wee michumarka araatmatniunmasha yayaatsui. Tura tsuatnum ik-  
usmasha ántrai. Aya ajapatniukete. Kuishim ákuñkia antuktatum” tímiayi.

## 15

### *Jesus murik menkakamu chichaman unuiniamiania nu*

*(Mateu 18.10-14)*

1 Akupniu kuítrín-juu tura yajauch shuarsha Jesusan anturkatai tusar tarú  
wearmiayi.

2 Tuma asamtai Pariséusha, Israer-shuara jintinniurisha Jesusan  
ájumataniak “Jusha tunáa shuaran itiaawai tura niijjai yurumáiniawai”  
tiarmiayi.

3 Nuna tuiniakui Jesus ju métek-taku chichaman jintintiawarmiayi:

4 “Shuar sian̄ (100) murikiun takuschampiash. Nu siánnunm̄iá chikichik men̄kakamtai nuwintia nuwinkia ni matsatmar̄in̄ ikiuak, men̄kaka nuna ti eakchattawak. Wáintsuk iniaisashatui.

5 Tura wáiniak yakainium awan̄kek waras jeen wáketui.

6 Tura jeen jeá ni amikr̄in̄, írutramur̄incha ikiaan̄ak “Wij̄iāi warastarum. Murikiur men̄kaka nuna wáinkiājai” tawai.

7 Wats, nuwintia nuiwi pen̄ker shuar akui nayaimpiniam warastin awai. Tura antsu chikichik yajauch shuar ni enentá̄in̄ yapaj̄iam̄tain̄kia, nú nan̄kaamas warastin átatui, tájarme’ tímiayi.

*Kuit emen̄kakman Jesus unuiniamiania nu*

8 ‘Nuyá ch̄ikich enentá̄imsatai. Nuwá tias kuítian takakna nuna chikichik men̄kakamtai, wáinkiat̄aj tusa jinia ekeemak, jeen japimiak émamkes eakchattawak.

9 Tura wáiniak ni amikr̄in̄, írutramur̄incha ikiaan̄ak, “Wij̄iāi warastarum. Kuit men̄kakamia nuna wáinkiājai” tawai.

10 Núnisan̄ yajauch shuar ni enentá̄in̄ yapaj̄iam̄tai, Yusa suntar̄i matsatmanum ti warastin awai” tímiayi.

*Uchi ni apar̄in̄ waketitniun Jesus unuiniamiania nu*

11 Nuyá Jesus jun̄a unuiniamiayi:

“Áishman̄ jimiarā uchin takakuyi.

12 Tura páatka uchi ni apar̄in̄ timiai “Apawá, surustiniaitmena nu yamá̄i surusta.”

‘Tutai ni apar̄i ni kuít̄in̄ jímiapetek nakak mai uchin susamai.

13 Ishichik tsawant nan̄kaamas̄aj páatka uchi ni warir̄in̄ irur jukí jeachat ch̄ikich núnkanam wémai. Nuisha nán̄kamas yajauchin túrak kuít̄in̄ ash̄i ajapamai.

14 Ni kuitr̄i ash̄i amuuka āin̄ nu nun̄kanam ti tsuka ámai. Niisha núnisan̄ tsukar̄in̄ wáitsamai.

15 Túm̄ak takatan eak̄tajtsa nu nun̄kanmayá apach̄iin̄ werimiai. Nu áishman̄sha kuchir̄in̄ wáitrukta tusa akupkamai.

16 Uchi ti tsukamak kuchi ukatramun niisha yuá̄tajtsa ti wakerimiai. Túrasha pen̄ké súcharmai.

17 Tumáa pujus nuin̄kia enentá̄impramai. “Winia apar̄ūi takau shuar pen̄keran ti yurumá̄iniawai. Tura wikiā jūi tsukarūi wáit̄iājai.

18 Wats, apar̄ūi waketit̄jai. Tura aparun chicharkun “Apawá Yús̄jāisha ám̄ijāisha tunaan túrajai, titiājai.

19 Ame uchiram áchamniat̄jai yamaikia. Ame takarniurmea áantsanak átaj tusan wakerajai” titiājai” tu enentá̄imsamai.

20 Tura wajaki ni apar̄in̄ waketikimiai’ tímiayi.

‘Tura ni apar̄isha jeachat winian wáiniak waitnentr̄amai. Apar̄i tséken̄ki in̄kiun̄ miniakak mukuná̄mai.

21 Nuin̄kia uchr̄isha timiai “Apawá, Yús̄jāisha ám̄ijāisha tuná̄an túrajai. Ame uchiram áchamniat̄jai.”

22 ‘Túrasha ni apar̄in̄kia ni takarniur̄in̄ chicharuk “Ti pen̄ker push̄i itiarum ánts̄ratarum, timiai. Tura uwejn̄um aweetaisha aweemtikiatarum. Tura sapat̄cha aweemtikiatarum.

23 Túrarum waaka nueram ana nu maatarum. Námper ná̄jankur shiir enentá̄imsar yurumá̄mi.

24 Warí, ju winia uchir jakaapitia tu enentáimsamjai. Túrasha iwiaakui. Menkákama nuna wáinkiajai.” Nuinkia ti warasarmai’ tímiayi.

25 ‘Tumaj iwíají úchikia takatnum pujumai. Tura wáketuk, jeá nuntumas jantsemáiniak túntuiyamun antukmai.

26 Nuinkia yaintri matsatun chikichiniak untsuk “¿Warimpait?” timiai.’

27 ‘Tura nii chichaak “Ame yátsum tayi. Túramtai ame apa waaka nueram maatai tawai, ame yatsum péñker tau asamtai” timiai.’

28 ‘Tura iwíají uchi kajek wayatniun nakitramai.’

‘Tuma asamtai ni aparí jiintiuki “wayata” timiai.’

29 ‘Tura uchisha aparín chicharuk “Wisha ámin umirkun untsurí uwitin ame takatrumin túraitjai. Nu nékame. Túrasha winia amikrujají námper najanatin chiipiuksha penké surichuitme.

30 Tura ju ame uchiram nuwajají yajauchin túrak ame kuítrumin wasurkánia nu támatai, waaka nueram máachumek” timiai.’

31 ‘Takui aparí chicharuk “Uchirú, ámeke wijíají tuke pujame. Tura wi takajana nusha ashí áminuiti.

32 Tura ame yatsum jákaiiti tu enentáimsamij nu iwiaakuiti. Menkaka nu yamaikia wáinkiaji. Tuma asamtai námper najanar waraschatniukaitiaj” timiai” tímiayi.

## 16

### *Takatan wáinin*

1 Ju métek-taku chichamnasha Jesus ni unuiniamu7 ‘Tura nii chichaak “Ame yátsrín unuiniamiayi.

“Kuítrintin áishmanka takatrín wáinniurí ámai. Tura nérenniun ujainiak “Ame wáinniuram ame kuítrumin nánkamas ajapeawai” tiarmai.’

2 ‘Nuna antuk ni wáinniurín untsuk “¿Warinia júsha turamainia? timiai. Yamaikia winia wáinnur áchattame. Tuma asamtai winia kuítrujají ititurkamea nu iniaktursata” timiai.’

3 ‘Tutai takatan wáinin enentáimsamai. “Maaj, wisha iturkatjak, timiai. Nunka táurtinniaasha jeatsjai. “Kuit surusta” títinniaasha natsamajai.

4 Winia takatur atsakui yurumkan ajamprusarat tusan túratajna nuna nekajai” tu enentáimsamai.

5 Nuyá nérenniun tumashmaku armia nuna ankant ankant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

6 ‘Niisha ámiuk “Asuitin siañ taru tumashiitjai” timiai.’

‘Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya senkuentachik aarta” timiai.’

7 ‘Nuyá chíkich tumashmaku támatai “¿Amesha urutmá tumashiitiam?” timiai.’

‘Tutai nii chichaak “Shana siañ taru tumashiitjai” timiai.’

‘Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

8 ‘Nuyá takata wáinniu uuntri nuna nekáa “Nii yajauch túriniaitai imiá enentáimniuiti” timiai’ tímiayi.

Nuyá Jesus tímiayi ‘Yus-shuarjai nankaamas Yus-shuaracha ajjíají ni túratniuriniak takainiak imiá enentáimkia ániawai.’

9 ‘Ju nunkanam anankatin átsuk. Tura kuitsha aya ju nunkanmayankete. Tuma asamtai atumsha kuitrumjai “shuaran yaintaj” tu enentáimsatarum. Kuitjai yaintin amuukamtai atumsha amuicha jeñam ipiaamu átaj tusarum túrtatarum.”

10 ‘Shuar ishichik takakna nujai péñker túrakka, núkap takakna nujajsha péñker túrtawai. Tura ishichik takakna nujai péñker túrachkuñka, núkap takakna nujajsha péñker túrashtatui.

11 Tuma asamtai ju nunkanmaya anankartin kuitjai péñker túrachkurmeka, tuke átin ana nujai takastincha çitiur takastarumek?

12 Takakme nuna Yus ikiatmasuiti. Nujai péñker túrachkurminkia, atumnia átinia nuna çitiurak suramsati?\*

13 ‘Takarniuri jimiara úuntrintin ajastinian tujintiawai. Warí, chikichnaka aneak chikichnaka nakitrashita túrtawai. Turya señkuentachik aarta” timi-aituak. Chikichan umiruk chikichnaka umirkashtatui. Yussha kuitcha máimetek enentáimtuschemniaitrumé” tímiayi Jesus.

14 Pariséusha kuítian anen armia nu, ashí ni táman antukar Jesusan wshikrarmiyai.

15 Túmakui Jesus nin tímiayi “Atumsha aents íimmianum péñker awajmam-prume. Túrasha atumí enentáincha Yus péñker nékawai. Kame winia “nankamantuiti” turutit tusa wakera nuna Yuska nakitiawai.’

### *Yaunchu etserkamu, yamá etserkamu*

16 ‘Juan étsertsain Muisáis aar akupkama nunasha tura Yúsnan etserin unuiniarmia nunasha antuktin ármiyai. Tura yamaisha tímianiaj ti shiir chicham awai. Yus akupeana nuj urukukit nuka paant etserkamuiti. Tura ashí shuar nuj pachiinkiataj tusar ni kakarmarjijain ti takainiawai.’

17 ‘Túrasha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nunekasha amukhatniujai nankamas itiu-  
chataiti.’\*

18 ‘Áishman nuarin ajapa chikichan nuátkunka tsanirmawai. Tura nuwa ajapamu niiniurtakka nusha núnisan tsanirmawai.’

### *Kuítrintin áishman Rásarujai*

19 ‘Áishman kuítrintin ámai. Niisha imiá shiir pushin ti kuit ainia nujai iwiarmamniuyi. Tura tuke tsawant yurumak ti kuit amia nujai namperan najanniuyi.

20 Tura kuítrincha ámai ni naarj Rásaru. Niisha kuchapruku tunamaruyi. Tuke tsawant kuítrinniu wáitirijn pujuyi.

21 Ti tsukamak kuítrinniu misarinia kakekan yuattsá wakerimiai. Tura yawasha ni kuchaprín nukatiarmai.

22 Kuítrincha jakamai. Jakamtai jaka shiir pujutainium, Apraám pujumia nuj nayaimpinmaya suntar júkiarmai. Kuítrinniusha jakamai. Jakamtai iwiarsarmai.

23 Jaka pujutainium wáitias pujus, pankái íimias, Rásarun Apraámjai pujuinian wáinkiamai.

24 Wáiniak untsumuk “Apawá Apraamá wáitnentrurta, timiai. Rásaruka tsara uwejejai entsan uchupir winia iniairun imichturat akupturkata. Wisha juj jinium pujusan ti waitiajai” timiai.’

\* 16:17 Mateu 19.1 ya señkuentachik aarta” timiai-12; Márkus 10.1-12

25 ‘Tutai Apraám timiai “Uchirú enentáimpratá. Ame nunká iwiaaku pujusam ti shiir pujumame. Antsu Rásaruka nuĵi ti yajauch pujumai. Tura niisha yamaikia juĵi áyamui tura ámeke wáitiame.

26 Tura nú arant nánata ti uunt awai. Tuma asantai juyá aĵi wétinian wakeruiniayat tujintiainiawai. Tura aĵya juĵi tátinian wakeruinia nusha tujintiainiawai.”’

27 ‘Nuñkia kuítrintin timiai “Nuñkia apawá Apraamá, juña seajme. Winia aparu jeĵen Rasaru akupturkata.

28 Nuĵisha winia yatsur seŋku matsatainiawai. Niisha ju wáitsatniunam tácharat tusa uĵákartí, tájame” timiai.’

29 ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.”’

30 ‘Tutai kuítrintin áimkiamai “Túrasha apawa Apraamá, antsu jakamunmaya nantaki, shuar we uĵakam enentáin yapajáwarainti.”’

31 ‘Tura Apraám timiai “Muisáis áarman tura Yúsnan etserin áarman anturainiachkuñka jaka nantaki we uĵakmasha antukchartatui” timiai.” Tu áujmatsamiayi Jesus.

## 17

*Yajauch túrumtikiatin ti tsúumainti  
(Mateu 18.6-7, 21-22; Márkus 9.42)*

1 Jesus ni unuiniamuriñ juña tímiayi, “Aentsun yajauchin túrumtikiattana nu tuke átatui. Tura shuar ni aĵin tunaan wakerumtikna nu anearti.

2 Ju shuar uchich ainia nuna yajauchinium túrumtikna nuna Yus imiá asutiáttawai. Tuma asantai nuna túratsaĵin uunt kayajai kuntujnum jinĵiá nayaantsanam ajunkam maak ainti.

3 Túrasha atumek íimiastarum. Ame yatsum ámin tunáa túrutmamtainĵia chicharkata; tura niisha “tsaŋkurturta” túramkuñĵia tsaŋkurata.

4 Chikichík tsawantinin siati túrutmamtai, tura “tsaŋkurturta, atakka túrashtajai,” siati túramkuñĵia, tuke tsaŋkurata.”

*Yus nekas enentáimtakriĵia tujinkiashtatĵi*

5 Jesusa unuiniamuriñ Nin chicharuk “Yus enentáimtajnia nú nañkaamas enentáimtustin yáinmaktá” tiarmiayi.

6 Tutai Jesus tímiayi “Mustasa jinĵiá ti ishitiúpchich ana núnisañ ishichkisha Yus enentáimtaikiummeka, sikiumuru numi wajana nu, “Wajamurmĵiyañka ukuiniakam nayaantsanam wajasta” tákurmin nú numi umirtamkainti.’

*Yusa takatĵi takasar “ti peñker túraitĵi” tíchatniuitĵi*

7 ‘Atumí takarniuriñ arakmasua amik, waakancha iis támatai, ĵnú chichamaik amesha, “Winitíá, yurumáitiá” tíntmek?’

8 Atsá. Antsu, “yurumak iwiarturata. Wĵi yurumátin tura umartincha surusminiam iwiarnarta. Nuyá ame yurumátá.” Nu tíchaintmek.

9 Nii túrátin ana nunak túratsuk. Tuma asantai yumĵinsashtatme.

10 Atumsha núnisrumek Yus túramna nu ashĵi umikiam “ti peñker túraitĵi” tíchatniuitme. Antsu “aya ii túratniuriñ ana nuke tura asar iĵkia ántraitĵi” títiniaitme.” Tu tímiayi Jesus.

*Tias áishmañkan tunamarun Jesus tsuárarmiania nu*

11 Jesus Jerusaréñnum wesa Kariréa nunĵa ikiuki Samaria nunĵkanam nañkaamakmiayi.

12 Tura péprunam jeamtai, tias áishmaṅ ripra sunkurjaj tunamaru armia nu, arant wajasarmiayi.

13 Tura untsumainiak “Uunt Jesusa, waitnenturta” tiarmiayi.

14 Jesus nin wainiak, “Pátrij werirum iniaktumastarum” tímiayi.

Tura wésar péṅker ajasarmiayi.

15 Nuyá chikichik ni tsuamarman nekáa kakantar chichaki Yusa náarin uunt awajki waketki Jesusan tarimiayi.

16 Yuminsataj tusa Jesusan tikishmatar piniakumar tepesmiayi. Nu áishmaṅka Samarianmayaṅuyayi.

17 Nuna wainiak Jesus tímiayi “Tsuámaru tiáschakait. ¿Chíkich nuiwisha tui pujuinia?

18 ¿Ju yajaya áishmaṅ níṅkik Yusa naari uunt awajsataj tusa waketki tai?”

19 Nuyá áishmaṅkan tímiayi, “Winia nekas enentáimtura asam péṅker ajasume. Wajakim shiir weta” tímiayi Jesus.

*¿Yusa akupeamuri urutaik ati?*

*(Mateu 24.23-28, 36-41)*

20 Pariséu aents Jesusan aniak “¿Yusa akupeamuri urutaik ati?” tiarmiayi.

Tutai Jesus tímiayi, “Yusa akupeamuri paant wáinkiachminiaiiti. “Yamaí nanḱamnai” tichamniaiiti.

21 “Juí awai, nuísha awai” tichamniaiiti. Warí, Yusa akupeamurinkia atumiin pujawai” tímiayi.

22 Nuyá ni unuiniamurin chicharuk juna tímiayi: “Tsawant jeattawai atumsha Winia Aents Ajasu tutain “aya chikichik tsawantkesha Nii wáinkiarkea mak” turuttiatrume. Túrasha tujinkiattarme.

23 Aents Ajasu tutai “juí pujawai, nuísha pujawai” tuíniakui weriirap. Tana nu nemariirap.

24 Wi, Aents Ajasuitjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisan wi taamu paant átatui.

25 Tura nu túruntsajin yamaí pujuinia nu Winia nakitruiniakui ti wáitsatniuitjai.

26 Winia atak tátiniur jeamtai, yaunchu Nuái pujumia nú tsawantin túrunamia núnisan túrunattawai.

27 Yurumáwarmiayi, umararmiayi, nuatnaikiarmiayi, ni nawantri nuatnakat tusa surukarmiayi. Tumáa pujuiniaí Nuái uunt kanunam enḱemprantai, amarak nu aentsnasha mash amúukarmiayi.

28 Tura Sutuma péprunmasha Rauta írutramurisha núnisanṅ Yusa asutiátniuri enentáimtusuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajamarmiayi, jeancha jeammarmiayi.

29 Tura Raut Sutuma péprunmaya jiinkimtai asupri tutai kaya keek yútana áintsanṅ nayaimpinmaya kakeetuk nu áentsun mash máawarmiayi.

30 Núnisanṅ winia atak tátiniur jeamtai enentáimtusuk pujusartatui.’

31 ‘Nu tsawant jeamtai jea yakiinṅ pujana nú shuar ni warirṅ achiktaj tusa akaikishti. Jeá wayashti. Tura kampunniunam wekaana nú shuar ni jeen waketkishti.

32 Rauta nuarṅ túrunamu enentáimpratarum.

33 Aya ju nunḱanmayanṅ enentáimias “iwiaaku átaj” tana nu ni iwiaakmarṅ emenḱáktatui. Tura ju nunḱanam ni iwiaakmarṅ emenḱana nu nekas iwiaakma ana nuna wáinkiatṅawai.

34 Paant tájarme. Nú káshitin jimiará áishmaṅ nuu peaknumaṅ kanúu tepeartatui. Chikichik junaktiatui, chíkichkia ikiunkittiwai.

35 Jimiárá nuwá mái-metek nekée pujuartatui. Chikichik junaktiatui, chíkichkia ikiunkittiwai.

36 Jimiárá áishmaṅ kampuniunam wekainiartatui. Chikichik junaktiatui, chíkichkia ikiunkittiwai.” Tu tímiayi.

37 Nuna antukar “Uunta ¿tuj túrunatta?” tiarmiayi.

Tutai ni chichaak “Jaka tepana nuṅ chuan káutkartatui.”

## 18

### *Shuar yawetsuk Yúsan tuke áujsatniuiti*

1 Shuar yawetsuk Yúsan tuke áujsatniua nuna unuiniartaj tusa Jesus ju métek-taku chichaman tímiayi:

2 “Chíkich péprunam shuaran akupin amai. Nú áishmaṅ Yúsnasha ashama-chauyi; shuárnasha péñker enentáimtichuyi.

3 Tura nú péprunam waje amai. Niisha shuáran akupniun chicharuk “Áishmaṅ winia yajauch awajtusmania nu írtusta” tusa tuke waketrú pujuyi.

4 Yámankamtaikkia nin anturkatniun nakitmiiai. Tura ukunam enentáimias “Wisha Yúsan ashamachiatnak shuárnasha péñker enentáimtichuitiatnak ju waje tana nuna túrattajai.

5 Warí niisha tuke taa itit awajtatsuk. Tuma asamtai nin kajerkaṅ tusan wárik túrattajai” timiai” tímiayi.

6 Nuyá uunt Jesus tímiayi “Shuaran akupin yajauchiitiat nuna timiai.

7 Tura Yus ti péñker asa, ni achikmarin tsawaṅsha, káshisha untsuamka nú nankaamas anturkashtatuak. ¿Yáitsuk menkakatuak?

8 Atsá, wárik yáinkiatatui, tájarme. Tura Wi Aents Ajasuitjiana ju atak támatai, ¿shuaran tuke Winia nekas enentáimturainia nuna wáinkiatjash?” tímiayi Jesus.

### *Pariséusha, kuítian-juuncha Yúsan áujsarmia nu*

9 “Péñkeraitjai” tu enentáimtumainiak chikichnaka yajauch enentáimtiarmia nuna Jesus nekapmá chichasmiayi. Juna tímiayi:

10 “Jimiárá áishmaṅ Yusa Uunt Jeen Yus áujsatatui tusar wearmai. Chíkichkia Pariséuuyi, chíkichkia kuítian-juuyi.

11 Pariséusha wajakí Yúsan áujuk júnis tímiayi: “Yusrú, chíkich áishmaṅ kasa, yajauch, tsanirmau ainia nujai métekcha asan yumisajme. Tura ju kuítian-juu wajana jújajisha métekchaitjai.

12 Warí, Ame akupkamna nuna iniaṅkasan wisha chikichik semanatinin jimiárá tsawant ijiarman áujeajai; tura wi achiajna nuna tiásnumiá chikichiniak Yúsnaiti tusan akankan súajai.” Tu tímiayi.

13 “Tura kuítian-juusha arant wajas, nayaimpinmaanṅ pankái ímsatniunkesha natsaamak, tsuntsuma, ni netsepen awatí “Yusá, ti tunaitjai. Waitnénrurtá” timiai.”

14 “Wats tájarme, nu kuítian-juu shuar Yus ímmianum ni enentái péñker awajnas ni jeen waketkimiai. Tura Pariséuka tamia núnisaṅ waketkimiai. Nekaatarum. Shuar nankaamantu enentáimtumana nuka péjchach awajnas-tatui. Tura antsu péjchach enentáimtumana nu, nankaamantu awajnas-tatui” tímiayi Jesus.

*Uchisha Jesusna áminiaiti**(Mateu 19.13-15; Márkus 10.13-16)*

15 Jesus antiñkiarat tusar uchin itiararmiayi. Tura Jesusa unuiniaturmujsha nuna wáinkiar suritkiarmiayi.

16 Tura Jesus nin unsukar tímiayi “Uchi Winí winitin tsan̄kamkatarum, surimkiairap. Enentáimsatarum. Uchichia áintsan̄ enentáimtumana nú shuárak Yus ni enentáin akupin ajasminiaiti.

17 Uchi ni úuntrin̄ umira núnisan̄ shuar Yúsán umíachkunka Yus ni enentáin akupin ajaschamniaiti.” Tu tímiayi Jesus.

*Kuítrintin áishman Jesusjai áujmatsamiania nu**(Mateu 19.16-30; Márkus 10.17-31)*

18 Shuara uuntrī Jesusan tarí áujsamiaiyi. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

19 Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti.

20 Tura Yus akupkamu ana nu péñker nékame. Tsanirmawairap, mankar-tuawairap, kasamkairap, tsanumprurairap, ame apasha, nukusha shiir enentáimtustarum. Nusha nékame” tímiayi.

21 Tutai áishman̄ tímiayi “Uuntá, úchichik mash umiki tsakaruitjai.”

22 Jesus nuna antuk “Chikichik taatramsai, tímiayi. Ame takakmena nu ashí surukam kuítrinchá ainia nu susarta. Nuñkia nayaimpiniam kuítrum átatai. Túram nemartustaj tusam winitia.”

23 Tura nuna antuk, nu áishman̄ ti kuítrintin asa ti kuntuts enentáimpramiayi.

24 Tura kúntuts enentáimprantai Jesus nuna nekáa “Kuítrintin ainia nu Yus akupeamunam pachiinkiatin ti iturchataiti, tímiayi.

25 Kamiriuka, uunt ana nu, auja jjiin wayatin̄ itiurchataiti. Tura shuar kuítrin̄ ti enentáimtana nu Yus akupeamunam pachiinkiatin nú nan̄kaamas iturchataiti.” Tu tímiayi.

26 Tura nuna antukarmia nu tiarmiayi “¿Nuñkia yaki uwempramniait?”

27 Tutai Jesus tímiayi “Aents tujintiania nuna Yuska páchitsuk túramniaiti.”

28 Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

29-30 Tutai Jesus tímiayi “Shuar Yus akupeana nuna túratay tusa ni jēen ikiuakka tura núnisan̄ ni aparíncha, nukuríncha, yachínkisha, nuwenkesha, uchirínkisha ikiuakka ju nuñkanmasha núkap wáinkiatatai nu shuar. Tura tuke iwiaaku pujustinniasha wáinkiatatai.”

*Ataksha ni jákatniur̄in̄ Jesus ujakmiania nu**(Mateu 20.17-19; Márkus 10.32-34)*

31 Jesus ni tuse nuuiniaturmuj̄in̄ akanki ikiaan̄ak juna tímiayi:

“Jerusarén̄num jeatemaji. Jūjisha Jerusarén̄num Winia, Aents Ajasu tutain, túrunatniurun Yúsanan etserin̄ yaunchu áatrurarmia nu uminkiatatai.

32 Apachnium surutkartatai. Túrawar wishikrurar, katsekrukar usukru-awartatai.

33 Awatiar mantuáwartatai. Túramaitatnak menaintiú tsawantaj̄ nantakti-atjai” tímiayi.

34 Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.



*Jirikiúnmaya áishman̄kan Jesus ímtikmiania nu**(Mateu 20.29-34; Márkus 10.46-52)*

<sup>35</sup> Jesus Jirikiú péprunam nuntumsaj, nuí áishman̄ jii kusuru, kuítian susurat tusa jintiá pujumiayi.

<sup>36</sup> Untsurí aents nan̄kaamainian antuk “¿warinkit?” tímiayi.

<sup>37</sup> Tutai, “Nasarétnumiá Jesus nan̄kaamawai” tiarmiayi.

<sup>38</sup> Kusurusha nuna antuk untsumuk “Jesusá, Uunt Kapitián Tawit weeachukaitiam. Tátiniuya núchakaitiam. Winiaja waitnentrurta” tímiayi.

<sup>39</sup> Eemak wearmiania nu chicharainiak “takamatsata” tiarmiayi.

Tutaisha nú arant untsumuk “Tawit weeachukaitiam; winiaja waitnentrurta” tímiayi.

<sup>40</sup> Nuinkia Jesus wajas “itiatarum” tímiayi. Tura nii támatai,

<sup>41</sup> “¿Wari itiuurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

<sup>42</sup> Tutai Jesus chichaak “ímtia. Winia nekas enentáimtursa asam péñker ajasume” tímiayi.

<sup>43</sup> Nu chichamaik kusuru ímmiayi. Tura Yusa naari uunt awajki Jesusan nemarmiayi. Tura ashí aents nuna wáinkiarimia nusha Yusa náarin uunt awajsarmiayi.

**19***Sakíu Jesusjai*

<sup>1</sup> Nuyá Jirikiú péprunam wayá nuí wekaikini ajamiayi.

<sup>2</sup> Nuí kuítrintin áishman̄ ni naari Sakíu pujumiayi. Nu Sakíu kuítian-juu úuntriayai.

<sup>3</sup> Aents ti káunkámtai, Sakíu ti sútarach asa, Jesusan íistaj tukamá tujinkiamiayi.

<sup>4</sup> Tuma asa Jesus nuke nan̄kaamaktin asamtai, eemki tsékin̄ki sikiumuru numi wajamunam wakamiayi íistaj tusa.

<sup>5</sup> Jesus nuí nan̄kaamak pan̄káí íimias chicharuk “Sakíu wárik akáikitiá. Ame jeem̄jin yamá kanartiniaitjai” tímiayi.

<sup>6</sup> Tutai Sakíusha wárik akaiki, shiir enentáimias Jesusan itiaamiayi.

<sup>7</sup> Ashí aents nuna wáinkiar “Maaj, Jesus tunáa áishman̄ka jeen pujawai” tusa mai tunaim ajarmiayi.

<sup>8</sup> Nuyá Sakíu wajaki Jesusan chicharuk “Íistá Uuntá, wi takakjana juna jímiapetek nakakan kuítrincha ainia nuna susartatjai. Tura wáitruan chichan kasarkaitkiuncha menaintiu patatsan awain̄kittiajai” tímiayi.

<sup>9</sup> Tutai Jesus tímiayi “Ju áishman̄ Aprááma shuárintiat yamá niisha níiniujai uwempra asa nekas Aprááma shuari ajasuiti.

<sup>10</sup> Wisha Aents Ajasu asan men̄kakarú ainia nuna eakan uwemtikrartaj tusan táwitjai.” Tu tímiayi.

*Kuítian nekápmá chichasmiayi*

<sup>11</sup> Nu aents Jesusan anturkarmia nu “Jerusaréñnum jeawakrin Nii, Yus anaiwiamu asa, wárik akupin ajastatui” tu enentáimsarmiayi. Tuma asamtai wésar Jerusaréñnum nuntumsarai, nuna enentáimsarain̄ tusa Jesus juna métek-takun chichasmiayi:

<sup>12</sup> “Áishman̄ pen̄keri amai. Nu áishman̄sha jeachat chíkich núñkanam kapi-tián náamkan tátaj tusa wemai.

13 Tura wétsuk ni takarniur<sub>in</sub> tias armia nuna untukarmai. Tura an<sub>kant</sub> kuit kurij<sub>ai</sub> nan<sub>ka</sub>amas pé<sub>nk</sub>er armia nuna su<sub>ni</sub>ak “Ju kuit<sub>ai</sub> wi táats<sub>ai</sub>n takakmá ajatarum” timiai.’

14 Tura ni nun<sub>k</sub>éni<sub>a</sub> shuarka nakitiarmai. Túmainiak “nu áishma<sub>n</sub> ii kapi<sub>t</sub>ián<sub>ri</sub> ajas<sub>ai</sub>n tusar nakitia<sub>ji</sub>” nu titiá tusar áishma<sub>n</sub>kan akatrar akuptukarmai.’

15 Tuma a<sub>in</sub> kapitián náamak ni nun<sub>k</sub>én waketki tamai. Taa “winia ku<sub>it</sub>ru<sub>ai</sub> warí túrarum” titi<sub>ai</sub> tusa ni takarniur<sub>in</sub> kuitia súsar<sub>m</sub>ia nuna untukarmai.’

16 ‘Ni takarniur<sub>i</sub> emka chikichik taa “ame ku<sub>it</sub>rum<sub>ai</sub> takakmasan tias patasan achikmajai” timiai.’

17 Tutai kapitián chichaak “Pé<sub>nk</sub>er túrame. Ishichik susamjamna nú<sub>ai</sub>n<sub>k</sub>i wi tímiajna tímiatrusmek túrame. Tuma asakmin tias pé<sub>pr</sub>un akupin awajsattajme” timiai.’

18 ‘Chíkich taa “Ístá Uuntá, ame ku<sub>it</sub>rum<sub>ai</sub> takakmasan se<sub>n</sub>ku patasan achikjai” timiai.’

19 ‘Nunasha chicharuk “Amincha se<sub>n</sub>ku pé<sub>pr</sub>un akupin awajsattajme” timiai.’

20 Nuyá chíkich taa “Uuntá, ame ku<sub>it</sub>rumin panii<sub>ai</sub> ijian ikiusmajai.

21 Amesha kakaram chichau asakmin, ikiuschiatam achin asakmin tura arakmachiatam juu asakmin ashamkamjame” timiai.’

22 Tutai kapitián timiai “Maaj, amesha ti yajachu<sub>it</sub>me. Ame támena nuke makurmawai. Wi kakaram chichau a<sub>is</sub>ha, ikiuschiatam achin a<sub>is</sub>ha tura araknasha arakmachiatan juu a<sub>is</sub>ha,

23 nu<sub>i</sub>n<sub>k</sub>ia ζurukamtia kuit-ikiutainiam ikiuschamam? Nu<sub>i</sub>n<sub>k</sub>ia wi atak táakun patasan achikia<sub>ai</sub>jna” timiai.

24 Tura nu<sub>i</sub> wajarmia nuna chicharuk “Ku<sub>it</sub>ian takakmar<sub>i</sub> juruktiarum; túrarum tias takakna nú shuar susatarum” timiai.’

25 Tura niisha chichainiak “túrasha Uuntá, tias takakja” tiarmai.’

26 Tutai kapitián chichaak “Takakna nu<sub>ai</sub> takaaku<sub>i</sub>n<sub>k</sub>ia patatnastatui tájarme. Tura takakna nu<sub>ai</sub> takaachku<sub>i</sub>n<sub>k</sub>ia ishichik takakku<sub>i</sub>sha jurunkit-tiawai.

27 Tura winia nemasur kapitián ajas<sub>ai</sub>n tusar nakitrurarmia nu itatarum. Tura wisha ímiai<sub>n</sub> máatárum” timiai.” Tu tímiayi Jesus.

### *Jerusarénum Jesus wayamiayi*

(Mateu 21.1-11; Márkus 11.1-11; Juan 12.12-19)

28 Nuna tuasua amik Jesus Jerusarénumaan<sub>i</sub> wémiayi.

29 Petpajá pepru tura Petania péprusha Uriwiu náinnium tíjiuchi<sub>yi</sub>; nu<sub>i</sub> jeastatuk ajatemas ni unuiniamur<sub>i</sub>n jímiar<sub>an</sub> chicharuk,

30 “Tíjiuch péprunam wetarum. Túrarum nu<sub>i</sub> umpuuruch ekemtukchamu j<sub>i</sub>n<sub>k</sub>iamu waja wáinkiatarme. Nu atiarum itiatarum.

31 Tura “ζurukamtai atiarum?” turamainiakuisha, “ii uun<sub>tr</sub>i wakerawai” títiarum” tímiayi.

32 Tutai unuiniamur<sub>i</sub> wear, Jesus timia ímiatrusa<sub>n</sub> wáinkiar<sub>m</sub>iayi

33 Tura umpuuruchin atíakui nérentin chichainiak “ζUrukamtai umpuuruchsha atiarum?” tiarmiayi.

34 Tutai unuiniamusha “Ii uun<sub>tr</sub>i wakerawai” tiarmiayi.

35 Tura umpuuruchin Jesusan itiar<sub>m</sub>iayi. Túrawar ni pushir<sub>i</sub>n umpuuruchiniam awantkar Jesusan ekenkarmiai.

36 Tura Jesus wétinnium ni pushir<sub>i</sub>n jintianam ayaparar áintrarmiai.

<sup>37</sup> Tura Uriwiu naint awaṅkénamunam tjiyich ajasarmatai untsurj aents Jesusan nemariarmia nu warainiak kakantar untsumainiak aents tujintia-mun untsurj túran wáinkiaru ásar Yusa náarj̄n uunt awajsarmiayi.

<sup>38</sup> “Yusa náarj̄n winiana ju ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarj̄n uunt awajsarti” tiarmiayi.

<sup>39</sup> Tura Pariséu aents nuj páchitra pujuarmia nu Jesusan chicharainiak “Uuntá, nemartamainia nu “takamatsata” tiarta” tiarmiayi.

<sup>40</sup> Tutai Jesus tímiayi “Nuñkia ju takamatsarmatañkia, kayasha untsumkarainti. Nuna paant tájarme” tímiayi.

<sup>41</sup> Jerusaréñnum tjiyich ajatemas péprun wáiniak útuk júnis tímiayi:

<sup>42</sup> “Jerusaréñnumiá shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nañkaamasai.

<sup>43</sup> Kame ti itiurchat tsawant jeartamtatume. Atumí nemasrj̄ nuñkajaj̄ aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatume.

<sup>44</sup> Túrutma nuñká ajuñmartatume. Tura atumj̄n pujuinia nuna máawartatui. Tura ashí emesarmatai ishichkisha kaya irumpramusha penké atsuttawai. Wi Yusa anaikiamurj̄n tarijrumna nu nekaachu asakrumin túrutmattarme.” Tu tímiayi.

*Yusa Uunt Jeen suruktinian Jesus surimkiamiania nu  
(Mateu 21.12-17; Márkus 11.15-19; Juan 2.13-22)*

<sup>45</sup> Nuyá Jesus Yusa Uunt Jeen wayá suruktasa pujuarmia nuna sumaktasa pujuarmia nunasha j̄iki awemarmiayi.

<sup>46</sup> Túrak juna tímiayi:

“Yús-Papinium yaunchu aarma awai: “Winia jearka Yus áusjatin jeaj̄iti” tu áarmaiti. Túrasha átumka kasáa matsamtaiya nútikiarme” tímiayi.

<sup>47</sup> Tuke tsawantin Yusa Uunt Jeen Jesus uwempratin chichaman unuiniak pujaj̄ Israer-patri úntrisha, Israer-shuara jintinniurj̄sha, Israer-shuara úntrisha, tura pepru úntrisha, itiur máamniakit tusa ti enentáimsarmiayi.

<sup>48</sup> Túrasha ashí aents émamkes anturainiakui máatniun tujinkiarimiayi.

## 20

*Yusa kakarmarij̄j̄i Jesus takasmiania nu  
(Mateu 21.23-27; Márkus 11.27-33)*

<sup>1</sup> Yusa Uunt Jeen Jesus uwempratin chichaman unuiniak pujaj̄ Israer-patri úntrisha, Israer-shuara jintinniurj̄sha, Israer-shuara úntrisha táarmiayi.

<sup>2</sup> Taar Jesusan chicharainiak “¿Yana chichamejaj̄ ju túram? ¿Ya ju túratniuncha akuptamkait?” tiarmiayi.

<sup>3</sup> Tutai Jesus tímiayi “Wisha aniaštajrum tusan wakerajrume.

<sup>4</sup> ¿Ya Juán̄nasha imiakrattia tusa akupkamaia? ¿Yusak? ¿Aentsuk? Turut-tiarum” tímiayi.

<sup>5</sup> Tútaisha niisha nuamtak warintiajik mai tunai ajarmiayi. ““Yus akup-kaiti” tákurniñkia, “¿urukamtai enentáimtuscharum?” turamatj̄i.

<sup>6</sup> Túrasha “aents akupkaiti” tákurnisha ashí aents kayajaj̄ tukumar mantamattaji. Warí “Juan Yúsnan etserniuiti” tuñiatsuk” tiarmiayi.

<sup>7</sup> Nuñkia Jesusan áiniak “Iisha nékatsji, Juan imiakratinniasha yátsuk akup-kamaia” tiarmiayi.

<sup>8</sup> Tutai Jesus tímiayi “Wisha núnisnak winia akuptukua nuna tíchattajrume” tímiayi.

*Pénker-takachu armia nu  
(Mateu 21.33-44; Márkus 12.1-11)*

<sup>9</sup> Nuyá Jesus jü métek-taku chichamjaj aentsun jintintiamiayi:

“Áishmaj ni ajarjin uwa araa amuk, shuaran takartusti tusa ikiukmiai. Tura nin<sup>9</sup>kia wau táchataj tusa jeachat wémai.

<sup>10</sup> Tura júuktin tsawant jeamtai juukman akanak jurumkit tusa takarniur<sup>in</sup> takau shuari<sup>in</sup> akuptukmai. Tura takarniur<sup>in</sup>cha katsumkar áyatik awain<sup>9</sup>kiarmai.

<sup>11</sup> Nuyá nérentin chíkich takarniur<sup>in</sup> akupkamai; tura nunasha núnisan katsekar, awatiar, sútsuk akupkarmai.

<sup>12</sup> Nuyá ataksha chíkichan akupkamai. Tura nunasha takau shuar katsumkar akupkarmai.’

<sup>13</sup> ‘Nuyá ukunam ajá nérenniur<sup>i</sup> “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.’

<sup>14</sup> “Túrasha takau shuar nuna wáinkiar, nuamtak chichainiak “Júka ajá nérenniur<sup>i</sup> ajastatui. Maatai. Nuikia aja iiniu átatui” tiarmiai.

<sup>15</sup> Nuna tuíniak ajanmaya jiki máawarmai.’

Nuyá Jesus aniasmiayi ‘Wats ¿warí enentáimsarum, ajá nérenniur<sup>i</sup> itiurkat-tawa?

<sup>16</sup> Niisha taa, nu takau shuáran máawartatui. Tura núnkanka chíkichan susattawai” tímiayi.

Nuna anturkar “Yus núnaka tsan<sup>9</sup>katkashti” tiarmiayi.

<sup>17</sup> Tura Jesus nin émamkes ísar tímiayi “¿Nuikia Yus-Papinium áarma nu warintuia? Jü áarmaiti:

Kayan pé<sup>9</sup>knernak jea jeamin “yajauchiiti” tusar ajapawarmia nu ashí kayajaj nan<sup>9</sup>kaamas pé<sup>9</sup>ker apujsamuiti.

<sup>18</sup> Nu kayan tukumainia nuka kupintrattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

*Pariséu achiktai tusar wakeriarmiania nu  
(Mateu 21.45-46; 22.15-22; Márkus 12.12-17)*

<sup>19</sup> Israer-patri uuntr<sup>i</sup> tura Israer-shuara jintinniur<sup>i</sup>sha “nu métek-taku chichamjaj in túramji” tu nekaawar nuik<sup>i</sup> Jesusan achikiar emetatai tusar wakeriarmiayi. Tura untsur<sup>i</sup> shuar Jesusan wakeruiniakui, ashamainiak túracharmiayi.

<sup>20</sup> Tura Kapitiánnium suruktai tusar wakeruiniak mamikmau shuaran Jesusan akuptukarmiayi. Nu shuar pé<sup>9</sup>nger shuara núnisan<sup>9</sup> jeariar, Jesus nékatsuk yajauch chíchakat tusar, anistaj tusar wearmiayi. Ni chíchak-mar<sup>9</sup>ijaj uuntnum suruktai tusar túrawarmiayi.

<sup>21</sup> Tu enentáimsar tíarmiayi “Uuntá, ame tuke nekas chícham chíchaame, nu nékaji. Aents pátatek íyatsme, antsu nekas Yusa jint<sup>i</sup> jintintiane.

<sup>22</sup> Wats turuttia, ¿Rúmanmaya uunt akupin ii kuitr<sup>i</sup> akiktin pé<sup>9</sup>nerkait? ¿Akiktinkiait? ¿Suritkiatniukait? Nu nekaatai tusar wakeraji” tiarmiayi.

<sup>23</sup> Tura Jesuska ni yajauch enentáimsamur<sup>in</sup> nekáa chícharainiak,

<sup>24</sup> “Kuit itiatarum. ¿Yana yapi tura yana naar<sup>i</sup> júi áarmait?” tímiayi.

Tutai nii tiarmiayi “uunt akupniunu.”

<sup>25</sup> Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

<sup>26</sup> Aents ántamunam ni chichakmarjijai achiktinian penké tujinkiarmai. Antsu aya ímprarmiayi tura takamtak pujusarmiayi.

*Satusésha achiktai tusar wakeriarmiania nu  
(Mateu 22.23-33; Márkus 12.18-27)*

<sup>27</sup> Nuyá Satuséu “jakamunmaya penké nantakchamniaiti” tuinia nu, Jesu- san aniaitai tusar tariarmiayi.

<sup>28</sup> Aniiniak tiarmiayi “Uuntá, Muisáis juna áartampramijai: “Áishman ni nuarí júreatsain jakamtainkia ni yachí nu wajen nuátkatí, yachin yajutma- tratsa.” Tu áarmaiti, tiarmiayi.

<sup>29</sup> Wats, siati yachi áрмаi, tiarmiayi. Iwiairi nuwan nuatak yajutmatsuk jakamai.

<sup>30</sup> Ni yachí wajen akintiak, nuátak, niisha yajutmatsuk jakamai.

<sup>31</sup> Nuna yachísha núnisan nu wajen nuátkamai; tura núnisan ashí siati nuna pataink' nuátkarmai. Yajutmatsuk yajutmatsuk kajinkiarmai.

<sup>32</sup> Tura ukunam nuwasha jakamai.

<sup>33</sup> Nantaktin tsawantai, nantakiarmatai, ¿yana nuarín ati? Ashí siati nuátkacharmaka” tiarmiayi.

<sup>34</sup> Tutai Jesus tímiayi “Ju nunkanman nuatnaikiatin awai.

<sup>35</sup> Tura nantakiar atak iwiaaku ámin ainia nuka nuatnaikiachartatui.

<sup>36</sup> Warí, jákashin áiniatsuk. Nayaimpinmaya suntara áintsan ajasartatui. Tura nantakiaru ásar Yusa uchirí ajasartatui.

<sup>37</sup> Tura jákaru nantakiartin ainia nuna imia Muisáis jintíamiayi. Warí, numichiniam ji wajái keamunan Yus níijai chichaamun, Yus-Papinium Muisaiska áarmiayi. Nú áarmanum Uunt Yús Apráama, Isaka tura Jakupu Yúsrinti, tímiayi. Nú áishman yaunchu jákaru ain “ni Yúsrinti” tímiayi. Nuna taku nantaktin awai tu jintíamiayi.

<sup>38</sup> Kame jaka menkakatniunam pujuinia nuna Yúsrinchuiti. Tuma asamtai jakáa Yúsrinti tichamniaiti. Antsu iwiaaku ainia nuna Yúsrinti. Ashi Niiniun iwiaarkainiawai” tímiayi.

<sup>39</sup> Nuna antukar Israer-shuara jintinniuri “pénker tame, Uuntá” tiarmiayi.

<sup>40</sup> Tura nuyánka aniastinian arantukarmiayi.

*¿Kristu tutai yana uchirímpiait?*

*(Mateu 22.41-46; Márkus 12.35-37)*

<sup>41</sup> Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárum?

<sup>42</sup> Warí, Sarmu papinium Tawit níñki juna tátsuk:

“Uunt winia Úntrun “Akupin pujutainium Winia untsuuruiní pujustá, tímiayi.

<sup>43</sup> Ame nemasrumin núpeteatsain nui pujustá” tímiayi.” Tú áarmaiti.

<sup>44</sup> Kame Tawitkia, Krístun chicharuk, “winia Úuntur” tajsha, ¿itiurak Kristu tutai Tawitia pampanmarí átiñk’?” Tú tímiayi Jesus.

*Israer-shuaran jintintin ainia nuyá aneartarum*

*(Mateu 23.1-36; Márkus 12.38-40; Rúkas 11.37-54)*

<sup>45</sup> Ashí aents Nin anturkatasa pujuiniaí ni unuiniamurin Jesus juna tímiayi:

<sup>46</sup> “Israer-shuaran jintintin ainia nuyá aneartarum. Niisha esaram pushin entsarar wekasataisar wakeruiniawai. Tura jintiá ti shiir áujtusarat tusar wakeruiniawai; tura iruntai jeanam penkerí pujutainium pujustinian

wakeruiniawai. Tura nampernumsha uunt pujutainium pujustaj tusa wakeruiniawai.

<sup>47</sup> Túrasha wájé jeencha atantainiawai. Túrawar aents nekaracharat tusar ti esaram chichamjái Yúsan áujainiawai. Nincha chíkichjái nankaamas Yus asutiáwartatui.”

## 21

### *Waje ni kuítrín susamia nu*

*(Márkus 12.41-44)*

1 Yusa Uunt Jeen kuítrintin kuit enketainiam kuítian enkeenan Jesus wáinkiamiyai.

<sup>2</sup> Tura waje kuítríncha jimiará uchich kuítian, reara áaniun, enkean wáinkiamiyai.

<sup>3</sup> Wáiniak tímiyai “Nekas tájarme, ju waje kuítrinchaitiat, ashí enkeena nú nankaamas núkap enkeayi.

<sup>4</sup> Warí, chikichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

### *Yusa Uunt Jeen saanaktiniam Jesus ujakmiania nu*

*(Mateu 24.1-2; Márkus 13.1-2)*

<sup>5</sup> Yusa Uunt Jeen kaya shíirmach armia nuna tura chíkich shíirmach susamu armia nunasha chíkich shuar áujmatuk pujuarmiayi. Nuyá Jesus tímiyai:

<sup>6</sup> “Átum yamáí shiir wáintrumna nu ashí emesnartatui. Kaya ekentramusha mash yumpuuntrartatui” tímiyai.

### *Amuukatin tsawantin uruku átata nu nekaatin*

*(Mateu 24.3-28; Márkus 13.3-23)*

<sup>7</sup> Nuyá Jesusan chicharainiak “Uuntá, nusha ¿urutaik túrunati? ¿Kame ju túrunatin jeatemamtaisha warijjaijn nekaattaj?” tiarmiayi.

<sup>8</sup> Tutai Jesus tímiyai “Aneartarum; anannawairap. Nekaatarum. Winia náarun pachisar, “wi Krístuitjai” tau ti untsurí jíntrartatui. “Nunka amuukatin jeayi” tu etserkartatui. Tuíniakui anturkarum nemariirap.

<sup>9</sup> Tura meset chichamsha, kapitián mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.’

<sup>10</sup> Nuyá tuke chicharuk tímiyai ‘Shuar chíkich nunkanmaya shuarjai mesetnum ti nekas maaniawartatui.

<sup>11</sup> Ti uurkattawai; untsurí nunkanam tsukasha, sunkursha ti átatui. Nayaimpinmasha ti ashammai nánkamas túrunattawai. Nujái Yus ni kakararin iniakmastatui.’

<sup>12</sup> ‘Tura ju túruntsaijn atumin pataaturmakar achirmakartatui. Iruntai jeanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui.

<sup>13</sup> Nuinkia atumin túrutmakrumin wi túramu etserkatin arutmattarme.

<sup>14-15</sup> Tura atumi nemasrj nakitramainiak “wáitaiiti” útínian tujinkiarat tusan, winia nekatairjai chichastinian amastatjarme. Tuma asamtai “Jurakuisha warinia tiniak kíishtumaktaj tusan áetak enentáimsashtajai” titiarum.’

<sup>16</sup> ‘Tura imia atumi aparisha surutmakartatui. Atumi yachisha, atumi shuarisha amikrumsha núnisaran surutmakartatui. Tura máamunka máawartatui.

17 Tura Winia ajasaru asakrumin ashí aents nakitramprartatui.

18 Tura penké ishichkisha yajauch awajtamsachartatui.

19 Katsuntrarmeka iwiaaku átin wáinkiatarme.'

20 'Jū pepru Jerusaréñka aā tanishriñ suntar téntakar matsatu wáinkurmeka, emesratin jeá nekaattarme.

21 Nuikia jui Jutía nuñkanam pujuinia nu, náinnium pisartin ániawai; tura jui Jerusaréñnum pujuinia nusha juyañka jiinki wétin ainiawai. Tura ajanam pujuinia nusha, péprunam waketskishtin ániawai.

22 Nu tsawantincha Yus asutiámun wáinkiertatui. Yús-Papinium nu túrunatin yaunchu aarma nu uminkiatwawai nu tsawantin.

23 Nuñkanam ti wáitsatin átatui. Tura jū aents ti asutniawartatui. Tuma asamtaí nuwá ajamtin ainia nusha, tura uchi kuírchin takakainia nusha imiá iturchatan wáinkiertatui.

24 Tura juyá aents mesetnum jákartatui. Tura chikichnaka ashí nuñkanam misaawar júkiartatui; tura yajaya apach, Yúsnan enentáimtuiniatsna nu, jui Jerusaréñnum wayawar najakartatui. Nu túratniunka Yus tsañkatkana nuñ túrawartatui.'

### *Aents Ajasu tutai tátintri*

*(Mateu 24.29-35, 42-44; Márkus 13.24-37)*

25 'Nuñkia etsanmasha, nantunmasha, yáanmasha Yuska ni kakarmarñ iniakmak nusháa túrattawai. Nuñkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui.

26 Tura túrunatin ana nuna enentáimsar mayáí ashinkiertatui. Warí, nayaimpiniam kakaram ainia nusha peantrartatui.

27 Nuyá Winia, Aents Ajasu tutain, yurañminiam ti shiir ajasan winiaí wáitkiartatui.

28 Nu túrunatin náñkamkui uwempratin jeatemayi tusarum kakaarum shiir enentáimsatarum.'

29 Tura jū chichamnasha nekapmamiayi. 'Ikiu numi tura náñkamas numisha enentáimsatarum.

30 Jū nuñkanam ni nuké yama puñkakmatai "esat jeatemayi" tátsurmek.

31 Núnisañ Wi tájana nu wáinkurmeka, Wi jū nuñkanam akupin ajastin jeatema nu nekaatarum.'

32 'Tura aents yamaí pujuinia nu jáatsaíñ nusha ashí túrunattawai. Núnaka paant tájarme.

33 Nayaimpisha nuñkasha amuukartatui. Tura winia chichampruka amuukachminiaiti.

34-35 Nu tsawant aya aneachma jeattawai. Ashí aents jū nuñkanam pujuinia nu, nuna enentáimtsuk pujuiniaí jeattawai. Tuma asamtaí atumsha anearum wekasatarum. Yajauchiniam emetnarum, aya yurumátniuk, aya umartiniak enentáimtusum, jū nuñkanam ana nu ti wakerakrumnínkia péñker enentáimsatin tujínkiattarme. Nu atsutí tusarum tura nu tsawant aya áwaktamkaij tusarum péñker wekasatarum.

36 Anearum wekasatarum. Túrunattana nuñ katsuntrataj tusarum Yus aujsa pujustarum. Túrarum Aents Ajasu tutai íimmianum péñker átaj tusarum túrarum."

37 Tuke tsawant tsawajsha Yusa Uunt Jeen Jesus unuiniamiayi. Tura káshikia Uriwiu náinnium we-wémiayi.

<sup>38</sup> Tura tuke tsawant Yusa Uunt Jeēn Jesus chichaamun anturkatai tusar káshik tariarmiayi.

## 22

*Jesus achiktin chichaman jurusarmiania nu*

*(Mateu 26.1-5, 14-16; Márkus 14.1-2, 10-11; Juan̄ 11.45-53)*

<sup>1</sup> Wakaprutai en̄ketaachma tanta yuatin námper, paskua tutai, jeatemamiayi.

<sup>2</sup> Israer-shuara Pátrir̄isha Israer-shuara jintinniur̄isha áentsun ashamainia ásar, itiuarak máawaintiaj̄i tusar ti enentáimsarmiayi.

<sup>3</sup> Nuin̄kia Iskariúti Jútasan enentáin̄ iwianch wáintiarmiayi. Nú Jútaska Jesusa unuiniamur̄ijn̄ páchitkiauyayi.

<sup>4</sup> Israer-patri úntr̄in̄ tura Yuša Uunt Jeē kapitián̄ pujuarmia nuna werimiyai. Tura Jesusan tu surukminiaiti tusa niij̄iāi chichasarmiayi.

<sup>5</sup> Niisha nuna antukar warasar “kuit amastatji” Jútasan tiarmiayi.

<sup>6</sup> Niisha “ayu” tinia, aents nékachmanum suruktaj̄ tu enentáimsamiayi.

*Kristu jakamu enentáimtustin námper*

*(Mateu 26.17-29; Márkus 14.12-25; Juan̄ 13.21-30; 1 Kurintiunam 11.23-26)*

<sup>7</sup> Wats, wakaprutai en̄ketaachma tanta yúatin námper jeamiayi. Paskua tutainium murikchin máatin ármiai.

<sup>8</sup> Tura Jesus Pitruncha, Juán̄nasha akupeak “Paskua tutai námper iwiaratarum” tímiayi.

<sup>9</sup> Tutai niisha chichainiak “¿Tuī iwiarat tusamea wakeram?” tiarmiayi.

<sup>10</sup> Tutai Jesus juna tímiayi “Péprunam wetarum. Jearum áishman̄ yumin takaku wekáa wáinkiattarme. Nú áishman̄ nemarsatarum. Tura jeá wayāakui,

<sup>11</sup> nú jeā nérenniur̄i chichareakrum “Uunt chichartamuk unuiniamur̄jai paskua yurumátin̄ ¿tuj̄ aa? turamui” titiarum, tímiayi.

<sup>12</sup> Tákurmin nu nérentin yakí písunam uunt kuártun ashí iwiamaram iniakturmastatrum. Nūj̄ ii yurumátin̄ iwiaratarum” tímiayi.

<sup>13</sup> Tutai niisha wear Jesus tímiania tímiatrusān̄ wáinkiararmiayi. Tura paskua namperan nūj̄ iwiararmiayi.

<sup>14</sup> Yurumátin̄ jeamtai ni unuiniamur̄ij̄iāi Jesus misanam pujusarmiayi.

<sup>15</sup> Pujusarmatai, Jesus chichaak “Wisha játsuk atumjaī jū paskua najanatniun̄ ti wakerimjai,

<sup>16</sup> atakka jū nun̄kanam atumjaī najanashtin̄ asan. Tura antsu Yus akupeana nūj̄ jear atak najanattaji” tímiayi.

<sup>17</sup> Nuyá piniñkian̄ achik, Yúsan yumiñkias, ni unuiniamur̄in̄ tímiayi “Jū piniñ achikrum sunaisatarum.

<sup>18</sup> Atakka jū nun̄kanam uwa yumir̄in̄ atumjaī umarchattajai, tajarme. Tura antsu Yus akupin̄ ajastin̄ jeamtai atak iij̄iāi umartatji” tímiayi.

<sup>19</sup> Nuyasha yurumkan achik, Yúsan yumiñkias puuk susarmiayi. Tura chicharainiak “Juka winia ayashruti. Winia ayashur atum péñker pujustinium surunkattana núiti. Winia enentáimtursarum yuatarum” tímiayi.

<sup>20</sup> Tura yurumsua amikiarmatai piniñkian̄ achik, “Jū piniñ winia numparun̄ nakumea asa uwempratin̄ yamaram chicham najanamun̄ nakumeawai. Winia numpar atumnian̄ puartamprattawai’ tímiayi.

<sup>21</sup> Túrasha winia surutkattana nū Wij̄iāi métek jū misanam pujawai.



22 Kame Wi, Aents Ajasuitjiana ju, Yus iwiamua nútiksanak jakattajai. Túrasha Winia surutkana nu nekaatí. Ti asutniattawai” tímiayi.

23 Nuna antukar “Wíashitíaj, yákit” tunaim ajarmiayi.

### *Nan̄kaamantu ana nu*

24 “¿Iijíaj yaki imiá nan̄kaamantu aint?” tunaim ajarmiayi.

25 Tura Jesus tímiayi “Ju nun̄kanam akupin ainia nu, waantu enentáimtumasar akupenawai. Tura akupenakuí “pénker túrin áiniawai” tuíniawai.

26 Tura atumjainkia nuka atsutí. Antsu nan̄kaamantu ana nu, uchichia núnik ajastiniaiti; akupeana nusha takarniua núnik ajastiniaiti.

27 Enentáimsatarum. Misanam pujus yurumna nu, yurumkan ajamana nujai çtuá imiá nekas nan̄kaamantuit? ¿Yurumna nu nekas nan̄kaamantuchukait? Tura Wisha atumin yurumkan ajamna núnisnak pujajai.’

28 “Winia itiurchatrun wáinmíaj nuj atumsha Wijíaj tuke pujumarme.

29 Tuma asakrumin akupin ajastinian winia Apar surusu asamtai Wisha nútiksanak akupkatniun súajrume. Wi akupkatjana nuj atumsha Wijíaj yurumáttarme, tura Wijíaj umartatrume, tájarme.

30 Tura akupin pujutainium pujusrum, Israer-shuar tuse írutkamu akupkattarme tajai.” Tu tímiayi.

### *Pítur “atsá nékatsjai” títinian Jesus ujakmiania nu (Mateu 26.31-35; Márkus 14.27-31; Juan 13.36-38)*

31 Nuyá Uunt Jesus tímiayi, “Nekaatá, Semun̄ká. Trikiu neré tsatsamátniua áintsan̄ Satanás atumi enentáin páchim enentáimtikrampratay tusa seayi.

32 Tuma aín Yus enentáimustinian kajinmatkiin tusan Wisha Yúsan seamjai. Tura Yúsnun waketkim ame yatsum ikiakárarta” tímiayi.

33 Tutai Semun̄ tímiayi “Uuntá, sepunam enketmainiakuisha wisha nersatajme. Tura mantamainiakuisha métek jakatjai” tímiayi.

34 Tutai Jesus tímiayi “Pitrú, nekas tájame, yamaik atash shiniatsajin̄ ame menaintiú natsantrurtatme” tímiayi.

### *Itiurchat winiawai*

35 Nuyá Jesus tímiayi “Wisha yurumkajainchu, kuitjainchu, sapatjainchu akupkamjarmena nuj çtáatramsamkarum?”

Niisha “Atsá pen̄ké táatramsachmaji” tiarmiayi.

36 Tutai Nii tímiayi “Antsu yamaikia yurumkan takakkuŋka takustí, kuitniasha núnisan̄; tura puniancha takakchakka ni pushirin̄ suruk punian sumakti.

37 Nekaatarum. Yus-Papinium yaunchu aarma ana nu wi túrunamujai uminkiatawai. Juíti aarma:

Yajauç shuarnum pachikiarmiayi.

Wari, Yus-Papinium ashí Winia aarma ana nu uminkiatniuiti.”

38 Tutai ni unuiniamurj tiarmiayi “Uuntá, juí jimiará puniá awai.”

Tutai Niisha “Asati” tímiayi.

### *Jitsemani ajanam Jesus Yúsan áujsamiania nu (Mateu 26.36-46; Márkus 14.32-42)*

39 Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamurjsha nemariarmiayi.

40 **Ai** jeá nin chicharuk “Itiurchat winiakui iniarajj tusarum Yus áujsatarum” tímiayi.

41 Tuasua amik arantach, kaya nankimiam jeana núnik Jesus wémiayi. Tura Yúsan áujsataj tusa tikishmarmiayi.

42 Tikishmar juna tímiayi “Apawá, pininnum yapá umartinia ántsaj Wi wáitsattajna nu wakerakmeke jurutkitia. Tura Wi wakerajna nucha antsu Ame wakeramna nu ati, tajai” tímiayi.

43 Nuyá, ikiakártaj tusa Yusa suntarij nayaimpinmaya tarimiayi.

44 Tura Jesus imiá wáitias pujak nú kakaram Yúsan áujsamiayi. Tura ni searmarisha numpá ántsaj nunká kitiawarmiayi.

45 Yúsan aujsua amik wajakí ni unuiniamurj werimiayi. Tura kúntuts enentáimmiarijjai ti pimpiki kanúu tepenan tarimiayi.

46 Nuñkia chicharainiak “¿Urukamtai kanúu teparum? Itiurchat winiakui iniarajj tusarum nantakrum Yus áujsatarum’ tímiayi.

### *Jesusan achikiarmiania nu*

*(Mateu 26.47-56; Márkus 14.43-50; Juan 18.2-11)*

47 Jesus tuke chichaa pujaj, untsurj shuar táarmiayi. Tura nuní eemka Jesusa unuiniamurj Jútas naartin winimiayi. Tura Jesusan mukunatajtsa tarunmiayi.

48 Támatai Jesus chicharuk “Jútasá, ¿Aents Ajasu tutai mukunamek surutkat-tam?” tímiayi.

49 Jesusajj pujuarmia nu, túmamun wáinkiar “¿Uunt puniajaj íjuartatjik?” tiarmiayi.

50 Tura chikichik Patri uuntrj takarniurj kuishj untsuurj tsupirkamiayi.

51 Tura Jesus tímiayi “Iniaisatarum.” Nuna tinia ni kuishj antj tsuármiayi.

52 Nuyá Israer-patri úntrin, Yus-jea úntrincha, tura pepru úntrincha, Nin achiktaj tusa tariarmia nuna chicharuk “¿Wisha kasakaítaj. Urukamtai puniajajsha numijajsha tarutniuram?”

53 Nuik Yusa Uunt Jeen tuke tsawant atumjaj pujumaj nuj achirkach-marme. Túrasha átum kiritniumia kakarmajaj nupetkatin yamá tsawantin tsankatkamuitrume” tímiayi Jesus.

### *Pítur “Jesuskaka nékatsjai” tímiania nu*

*(Mateu 26.57-58, 69-75; Márkus 14.53-54, 66-72; Juan 18.12-18, 25-27)*

54 Nuñkia Jesusan achikiar emetawar Israer-patri uuntrj jeen júkiarmiayi. Tura Pítrusha íkiañ nemarki wémiayi.

55 Tura aach jinia ikiapármiai. Túrawar anamuk pujuarmiayi. Pítrusha nijjaj pujusmiayi.

56 Tura nuwa, Patri takarniurj amia nu, Pítur jinia anamuk pujan wániak “Ju áishmansha Nijjaj pujumiayi” tímiayi.

57 Tutai Pítur chichaak “Nuwá, Nin nékatsjai” tímiayi.

58 Tura árusañ chikich nin wániak “Amesha Niin páchitkaiatme” tímiayi.

Tutai Pítur tímiayi “Atsá. Wikia áñkia páchitkiatsjai” tímiayi.

59 Chikichik ura nankaamasmatai chikich apach chichaak “Nekas ju áishmansha Nijjaj pujumiayi. Warí, niisha Kariréanmayanachakait” tímiayi.

60 Tutai Pítur chichaak “Ame támena núnaka nékatsjai” tímiayi. Nú chichamaik Pítur chicháa pujajñk’ atash shiniukmiayi.

61 Tura nuñkia Uunt Jesus Pítrun apajas íismiayi. Túra “atash shiniatsajñ ame menaintiu natsantruratme” Uunt Jesus timia nuna enentáimprimayi.

<sup>62</sup> Nuyá Pítur jiinki ti úutmiayi.

*Jesuan wishikrarmiayi*  
(*Mateu 26.67-68; Márkus 14.65*)

<sup>63</sup> Áishman Jesuan wáiniarmiania nu ti wishikiainiak awattiarimiayi.

<sup>64</sup> Jiin epetkar yapiniam awattiar chicharainiak “Nekamata, ya awatama” tiarmiayi.

<sup>65</sup> Tura katsekainiak ti untsurí chikichnasha nan̄kamas tiarmiayi.

*Uunt Iruntainiam Jesuan ejeniarmiania nu*  
(*Mateu 26.59-66; Márkus 14.55-64; Juan 18.19-24*)

<sup>66</sup> Tsawarmatai, Israer-shuara úuntriṣha, Israer-patri úuntriṣha, Israer-shuara jintúnniurṣha iruntrar ni iruntairṣin ejeniarmiayi. Nuṣ chicharainiak

<sup>67</sup> “Paant titiá. ¿Yus anaikiamu Kristu tutaia núkaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme.

<sup>68</sup> Tura Wi aníamsha áirkashtatrome, túrasha akuptukchattarme.

<sup>69</sup> Tura wárik Wisha Aents Ajasuitjiana nu, ashí nan̄kaamaku ajasan, Yusa untsuurṣinṣi pujustatjai” tímiayi.

<sup>70</sup> Tutai niisha tiarmiayi “¿Nuiṣkia amesha Yusa Uchirṣinkaitiam?”

Tutai Jesus tímiayi “Ee, Wítjai, átum Winia túrutrum núnisnak.”

<sup>71</sup> Tutai niisha tiarmiayi “Wari, ¿iisha chíkich ujatkat tusar atsumajik? Imia niṣki chichaamu antukchajik” tiarmiayi.

## 23

*Piratuṣ Jesuan júkiarmiania nu*  
(*Mateu 27.1-2, 11-14; Márkus 15.1-5; Juan 18.28-38*)

<sup>1</sup> Nuyá ashí Uunt iruntrarmia nu wajatkiar Rúmanmaya akupin Piratuṣ Jesuan júkiarmiayi.

<sup>2</sup> Nuṣ jeawar, Piratun chicharainiak “Ju áishman íi shuaran awajimtikiar enentáimtikiaiania nu nekaamji. Rúmanmaya uunt akupin Sé saran kuit akiktinian suritramaji. Tura nu arant Niṣki, akupin Kristu tutaintjai, tawai” tiarmiayi.

<sup>3</sup> Tutai Piratu Jesuan chicharuk “¿Ame Israer-shuara akupniurṣinkáitiam?” tímiayi.

Tutai Jesus tímiayi “Ee, núitjai, ame támena núnisnak.”

<sup>4</sup> Nuyá Israer-patri úuntrincha tura aents nuṣ iruntrarmia nunasha Piratu chicharainiak “Ju áishman tunaan túran pen̄ké wáinkiachuitjai, tajai” tímiayi.

<sup>5</sup> Tú rasha niisha nú kakantar chicharainiak “Antsu nekas ashí Jutía nun̄kanmaya aentsun ni unuiniana nujai akajenawai. Kariréa nun̄kanmaya nan̄kaamas ímiajajsha tayi” tímiayi.

<sup>6</sup> Piratusha nuna antuk “Nu áishman ¿Kariréanmayan̄káit?” tímiayi.

<sup>7</sup> “Ee” tuiniakui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusarénnum ishichik tsawant pujusmiayi.

<sup>8</sup> Erutiska Jesuan ístaj tusa ti wakerimiayi. Jesusa túramurṣin áujmatman ti antukmiayi. Tuma asa, “Wi ímiaj aents tujintiamun túrashtimpiash” tusa Jesuan wáiniak warasmiayi.

<sup>9</sup> Jesuan ti nukap aniasmiayi; túramsha pen̄ké áimkiachmiayi.

10 Nujsha Israer-patri úuntrišha, tura Israer-shuara jintinniurjsha ya-jauchiiti tusar charaatum awajjarmiayi.

11 Tura Erutissha ni suntarjijai Jesusan yajauch enentáimtuiniak Nin wishikiainiak ti penker pushin, akupniú entsatairiya ánniun, áentsrarmiayi. Nujašha Erutis ataksha Piratuin akupkamiayi.

12 Túram nu tsawant Piratu Erutisjai nawamnaikiarmiayi. Kame yaunchuka nemasnaikiau áirmiayi.

*Jesusan “mantamnati” tiarmiania nu*

*(Mateu 27.15-26; Márkus 15.6-15; Juan 18.39-19.16)*

13 Nuyá Israer-patri úuntrin aentsu úuntrijjai tura penké aentsjai Piratu ikiaanank tímiayi

14 “Ju áishmañ aentsu awajimtikuii tusarum itiartintrume. Túrasha átum ímprumñin anintrusan yajauch átum tárugna nuna penké nekarachjai.

15 Erutissha núnisañ yajauchin nekaachai. Warí, jui awaiñkichmaka. Nuikia páantchakait jú áishmañ jakamnia tunaanka túrichuiti” tímiayi.

16-17 Túraitiat tuke túrutai asamtai, jisat jeakui sepunmaya chikichik áishmañkan Piratu ankant akupkatin ámiayi. Tuma asamtai, nii chichaak “juna asutián awematjai” tímiayi.

18 Tura aencha iruntrar ti unsumainiak “Atsá; jucha. Ju nakitijai. Antsu Parapás akupkata” tiarmiayi.

19 Nu Parapássha akupniun nakitiak mesetan najana asa tura mañkartin asa sepunam enkeamuyayi.

20 Piratuka Jesusan akupkattsa wakerak ataksha aentsun áujsarmiayi.

21 Túrasha nú arant unsumainiak “Atsá. Krúsnum mantamnati” tiarmiayi.

22 Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachias tusan, aniasan penké nekarachjai. Asutián akupkatjai” tímiayi.

23 Tura niisha kakaram unsumainiak “Jesus mantamnati” tiarmiayi. Kame aencha tura Patri úuntrišha ti unsumaina ásarmatai ni wakeramurj tsañkatnakarmiayi.

24 Nii wakeriarmia nuna Piratu “túratjai” tímiayi.

25 Tuma asa Parapásan, mesetan najanin tura mañkartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

*Jesusan krúsnum ajintrurarmiania nu*

*(Mateu 27.32-44; Márkus 15.21-32; Juan 19.17-27)*

26 Jesusan jukitiasa pujuiniaj Serini nuñkanmaya Semun ni pépruriya Jerusarénum yama jeamiayi. Nin achikiar, Jesusa krusri ayantkar “ni ukuri wetá” tiarmiayi.

27 Untsurí aents Jesusan nemariarmiayi. Tura untsurí nuwašha ti kuntuts enentáimiaiñiak úutkai tura wa-wa ajakiar wearmiayi.

28 Túmainiakui Jesus nin iis, “Jerusarénumiá nuwaštiram Winia enentáimtursarum úuttiirap. Antsu atumñiak tura atumi uchiri enentáimtusurum úuttiarum.

29 Warí, ti iturchat tsawant jeawartatui. Tuma asamtai “Uchirtichu ainia nu, ajaprukhana nu tura amuntsachu ainia nu, chíkich aentsjai nankaamas penker pujuiniawai” tiartatui.

30 Nu tsawantaj aents chicharainiak “Náint in nekentmak yuturmaartai” tiartatui.

31 Warí, numi sameka áinis yajauch aya nánkamna aínsha ju ititurchat átsuk. Tura numi kukaru ainkiamtai ititurak nú yajauch túrunachat." Tu tímiayi Jesus.

32 Tura Jesusjái krúsnum maatai tusar jímiar yajauch áishmankan júkiarmiayi.

33 Karawír nain tutainium jewar Jesusan krúsnum ajintrurarmiayi. Tura Jesusa untsuurínj chikichík yajauch áishmankan tura ni menaarínj chíkich yajauch áishmankan núnisan krúsnum ajintrurarmiayi.

34 Tura Jesus krúsnum ajintraku pujuram, chichaak "Apawá, tsanukurarta. Nii áitkainia nuna nékainiatsui" tímiayi.

Tura suntar pujuarmiania nu, yaki Jesusa pushirj jukit tusar naku-rusarmiayi.

35 Péprunmayá aents ii wajatiarmiayi. Tura uunt armia nusha Nin wishiki-ainiak "Chikichnaka uwemtikniuiti. Wats, yamáí nekas Yusa anaikiamurj Kristu tútainkiunka imia Niñki uwémprati" tiarmiayi.

36 Suntarsha Nin wishikrarmiayi. Tariat churuñian aartai tusar awa-jiarmiayi.

37 Tura chicharainiak "Amesha nekas Israer-shuara uunt akupniurinkiumka amek uwemprata" tiarmiayi.

38 Tura muuknumaani, Kriaku chichamjái, Rúmanmayá apach chichamjaisha tura Israer chichamjaisha ju árar anujkamu ámiayi: *JÚITI ISRAER-SHUARA UUNT AKUPIN*

39 Chikichík yajauch áishman nuj ajintruamu amia nu kátsekeak chicharuk "Amesha nekas Yusa anaikiamurjntkiumka amek uwemprata tura incha uwemtikramprata" tímiayi.

40 Tura chíkich ni tsaniakmarin kakantar chicharuk "¿Amesha Niijjái métek asutniátasa pujayatam, Yus ashamsmek? tímiayi.

41 Iikia yajauch asar wáitsatniuitji; ii tunaari akikmakur wáitijai. Antsu ju áishmanka yajauchin túrichuiti" tímiayi.

42 Nuyá Jesusan chicharuk "Amesha akupin ajasam winiasha enentáimtursata" tímiayi.

43 Tutai Jesus chicharuk "Nekas tájame, jakar shiir pujutainium yamáí tsawant Wijjái pujustatme" tímiayi.

### *Jesusa jakamuri*

*(Mateu 27.45-56; Márkus 15.33-41; Juan 19.28-30)*

44 Tutupin aj ashí nunkanam ti kirit ajasmiayi. Tura menaintiú ura nankaamasu ain, nantu nunkaach ajassha tuke kirit ámiayi.

45 Tsawái nantusha mushatmarmiayi. Tura Jerusarénnum Yusa Uunt Jeecha tarach ajamu aa jímiapetek nakaakamiayi.

46 Nuyá Jesus untsukum "Apawá, winia wakantrun Amiin ikiuajai" tímiayi. Nuna tinia jakamiayi.

47 Suntara kapitiántri nu túrunamun wáiniak, Yusa náarin shiir awajeak "Jusha imiá nekas péñker áishmankuyi" tímiayi.

48 Tura untsurj aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi.

49 Tura Jesusa amikrjsha tura nuwá Kariréanmayá Nin nemariarmia nusha íkian wajasar ii wajarmiayi.

*Jesusan iwiarsarmiania nu**(Mateu 27.57-61; Márkus 15.42-47; Juan 19.38-42)*

<sup>50</sup> Naka enentáimin pênker áishman ámiayi ni naari Jusé. Arimatéa pepu Jutía nunkanam ana nuyayayi. Israer-shuara Uunt Iruntairin páchitkiauayayi.

<sup>51</sup> Yus ju nunkanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi.

<sup>52</sup> Tuma asamtai Piratui we Jesusa ayashin seamiayi.

<sup>53</sup> Piratu “ayu” takui, Jesusa ayashin krúsnumia jusa tarachjai penuar kaya táurmanum iwiarsamiayi. Nu táurmanum chikich iwiarsachmauyayi.

<sup>54</sup> Iwiaratin tsawantai, ayampratin tsawant tsawastatuk ajasmatai túrunamiayi.

<sup>55</sup> Tura nuwa Kariréanmaya jukiniutak Jesusan nemarsarmia nusha iwiarsamunam weriar, Jesusa ayashit ituur ikiusmait nuna iisarmiai.

<sup>56</sup> Iisar ikiuak ni jeen waketkiarmiayi. Tura Jesusa ayashit jejeenin tusar kunkuinian iwiararmiayi. Tura ayampratin tsawantai, Israer-shuar akupkamun umikiar ayamprarmiayi.

**24***Jesus nantakmiania nu**(Mateu 28.1-10; Márkus 16.1-8; Juan 20.1-10)*

<sup>1</sup> Tumintin káshik kunkuinian iwiamun júkiar nu nuwa Jesus iwiarsamunam weriarmiayi. Tura chikich nuwasha atampriarmiayi.

<sup>2</sup> Tura iwiarsamu kaya atutkamu urani aan wáinkiararmiayi.

<sup>3</sup> Tura wayawar uunt Jesusa ayashin wáinkiacharmiayi.

<sup>4</sup> Wáinkiachu ásar ashankarmiayi. Tura “itiurkatjik” tiarmiayi. Tumaj jimirá áishman kan pushin wincharpatniun entsaru nin ayamach wajainian wáinkiararmiayi.

<sup>5</sup> Nuna wáinkiar ti sapijmiainiak tsuntsumawarmiayi. Túmakui nu áishman chicharainiak “¿Iwiaakusha urukamtaí jaka anumsha earam? tiarmiayi.

<sup>6</sup> Jui pujatsui. Antsu nantakni. Nékatrumek. Niisha Kariréanam tuke pujus

<sup>7</sup> “Wi, Aents Ajasuitjiana nu, yajauch aentsnum surunkattajai. Túran krúsnum mantamnattajai. Tura menaintiú tsawantai nantaktiatjai” turamchamkarum” tímiayi.

<sup>8</sup> Nuna takui Jesus timian enentáimprarmiayi.

<sup>9</sup> Tura iwiarsamunmaya waketki taar, Jesusa unuiniamurin auntse armia nuna tura chikichnasha ashí nu túrunamun ujakarmiayi.

<sup>10</sup> Jesusa unuiniamurin ujakarmia nu ju áiniawai: Maktaranmaya Marí, Juánasha, Jakupu nukurí Marisha, tura chikich nuwajai.

<sup>11</sup> Tura Jesusa unuiniamurisha nuwa tuíniakuisha nekasaiti tu enentáimtsuk “wáuruk tuíniawai” tiarmiayi.

<sup>12</sup> Túrasha Pítrusha jünki Jesus iwiarsamunam tsékenki werimiayi. Jeá, init iis, aya tárachik tepenan wáinkiamiayi. Tura túrunamia nuna ti enentáimiar ni jeen waketkimiayi.

*Emaús wetai jintianmaani túrunamia nu**(Márkus 16.12-13)*

<sup>13</sup> Nu tsawantai Jesusa nemarniuri jímjar Emaús péprunam wéarmiayi. Emaúska Jerusarénumia auntse kirumitru jeá pujawai.

14 Túrunamia nuna chichaki wearmiayi.

15 “Itiurkit” tu aujmatki weenaj imia Jesus taa nuj páchiniak niijjai wearmiayi.

16 Tura wáinkiaraiat nekaashtin asamtai yait nekaacharmiyai.

17 We-wénakua Jesus chicharainiak “Jintiasha ¿warí áujmatkirum wéarum? ¿Urukamtai kúntuts enentáimprum?” tímiayi.

18 Chikichik, Kreupas náartin chicharuk “Jerusarénum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

19 Tutai Jesus tímiayi “¿Warí urukait?”

Tutai tiarmiayi “Entá, Nasarénumia Jesusa túrunamuri taji. Niisha Yúsnan etserin asa Yusa kakarmarjijai chichasmiayi tura nuna kakarmarjijai takasmiayi. Núnaka ashí aents nékainiawai.

20 Tura ii Pátriri uuntri tura ii pépruri uuntri “tunáa jakamnia túrayi” tusar “krúsnum mantamnati” tiarmiayi.

21 Tura ii Israer-aentstin uwentikrampratin tu enentáimsamji. Tura ni maamusha menaintiú tsawant nankaamasai.

22-23 Túrasha ii nuwá ni iwíarsamunam yamaí káshik weriar ni ayáshin wáinkiacharmai. Tura “Yusa suntari wáinkiaji tura “Jesus iwiaakuiti” túramji” tiarmai. Nuna tu ujatmakakrin ti enentáimpraji.

24 Nuyá íi shuar iwíarsamun weriar, nuwá tiarmia tímiatrusan wáinkiarimiayi. Tura Jesusnaka wáinkiacharmai.” Tu ujakarmai Jesusan.

25 Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtsarume.

26 ¿Yusa anaikiamuri, Kristu tutai, shiir awajnantsuk ti wáitsashtinkiait?” tímiayi.

27 Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurin áararmia nuna jintintiatasa nankamamiayi.

28 Ayu, nii wearmia nú peprunam jeawarmiayi. Tura Jesuska nuj nankaamaki wétaj tau ajamiayi.

29 Tura niisha chicharainiak “Weep. Iijjai pujustá. Warí, nantu akaikiyi, kirit ajatemsai” tiarmiayi.

Tutai Jesus niijjai pujustaj tusa wayamiayi.

30 Tura niijjai irunar misanam pujus, yurumkan achik, Yúsán yuminkias nincha puuk súsarmiayi.

31 Nu chichamaik, ni jji urannia núnikiarmatai Jesusan nekaawarmiayi. Tura Niisha nú chichamaik menkakamiayi.

32 Tura nu shuarsha mai tunai ajainiak “Jintia winis Niisha Yus-Papin jintinramuk nekas ii enentáin shiir enentáimtikramprachmakaj” tiarmiayi.

33 Nuyá, Emaúsnumia wárik jíinkiar Jerusarénum wakеткиarmiayi. Nuj Jesusa unuiniamurin auntse armia nuna tura chikich shuar Jesusan nemariarmia nunasha iruntrar pujuinian wáinkiarimiayi.

34 Auntse armia nusha tiarmiayi “Uunt Jesus nekas nantakni. Semun Nin wáinkiaiti.”

35 Tutai niisha jintiá túrunamun ujakarmiayi. “Jesus yurumkan ajaamakui nuj nekaamji” tiarmiayi.

*Ni unuiniamurin Jesus wantintuqmiania nu  
(Mateu 28.16-20; Márkus 16.14-18; Juan 20.19-23)*

36 Nuna áujmatuk pujuiniaj Jesus aya aneachma ajapén wajas “Shiir enentáimsatarum” tímiayi.

<sup>37</sup> Nuna antukar, ti sapijmiakar, wakanchashit, enentáimsarmiayi.

<sup>38</sup> Tura Jesus chicharainiak “¿Urukamtai sapijmiakrum wakanchashit, tu enentáimsarum?

<sup>39</sup> Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

<sup>40</sup> Nuna tinia ni uwejéncha nawencha iniaktusarmiayi.

<sup>41</sup> Warainiyat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi.

<sup>42</sup> Takuí, namaknasha, míshkincha súsarmiayi.

<sup>43</sup> Tura Jesus nuna achik niisha ímiainiamunman yuamiayi.

<sup>44</sup> Tura nin tiarmiayi “Winia túrutawarma nuna, Wi atumjai nuik pujusan tímiajrum. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

<sup>45</sup> Nuyá Yus-Papinium aarman jintintiawarmiayi.

<sup>46</sup> Jintintiuk juna tímiayi: “Yusa anaikiamurí Kristu tutai jaka menaintiú tsawantai jakamunmayá nantaktinia nu yáunchuk áarmauyayi. Tura Wi nú Krístuchukaitaj.

<sup>47</sup> Winia náarun pachisar, Jerusarénumiá nan̄kama ashí nun̄kanam nu chicham etsernaktinia nu áarmauyayi. Shuar ni tunaarí tsan̄kurnarat tusar enentáin yapajíatniuiti. Tura tu etserkatniua nusha yaunchu áarmauyayi.

<sup>48</sup> Tura wi túrunamu neka asarum etserkatniuitrume, tímiayi.

<sup>49</sup> Tura winia Apar, winia Wakantrun susartatjai, turammarumna nuna akuptuktatjarne. Tura nayaimpinmayá táatsain̄ jui Jerusaréñ péprunam pujústárum. Taa ni kakarmarín suramsattarme.” Tu tímiayi.

### *Jesus nayaimpiniam wakamiania nu*

*(Márkus 16.19-20)*

<sup>50</sup> Nuyá Jesus Jerusaréñ péprunmayá júkiar Petania péprunam ejeniarmiayi. Tura nuí ni uweje takuí, “Yus yáinmakarti” tímiayi.

<sup>51</sup> Nuna tu pujus, nijya kanakmiayi. Tura nayaimpiniam junakmiayi.

<sup>52</sup> Ni unuiniamurísha Nin imiá shiir enentáimtusarmiayi. Tura nuyá ti warasar Jerusaréñnum waketkiarmiayi.

<sup>53</sup> Tura Yusa Uunt Jeen pujusar Yusa náarin shiir awajú pujuarmiayi. Áukete.



## Yúsán Shiir Chichamēn JUAN aarmia nu

### *Chícham aents ajasmania nu*

<sup>1</sup> Ashí nan̄kamamia nú yaunchu Yusa Uchirí tuke pujuyayi. Niisha Yúsán ti paant awajeakui, Chícham tíminiaiti. Chichamsha Yúsajai pujuyayi. Chichamsha Yúsauyayi.

<sup>2</sup> Yáman̄kamtaik Niisha pujuyayi Yúsajai.

<sup>3</sup> Ashí najanamu ainia nu Niijjajai najanamuiti. Nii najanachmaka pen̄ké atsawai.

<sup>4</sup> Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniati.

<sup>5</sup> Nu tsáapnin kiritniunam tsáapniawai. Tura kiritniusha tsáapninian ikiajni-aktinian tujinkiaiti.

<sup>6</sup> Áishman̄ ámiayi, Yus akupkamu, ni naarj Juan̄.

<sup>7</sup> Niisha tsáapnin chichaman etserkatajtsa támiayi. Nuna étserek ashí umirkarat tusa támiayi.

<sup>8</sup> Juan̄sha nu tsáapninchauyayi. Áyatik akupkamuyayi tsáapnin chichaman etserkat tusa.

<sup>9</sup> Nu tsáapninkia nekas tsaapniniaiti. Ju nun̄kanam taa ashí shuaran enentáin tsáapniartiniaiti.

<sup>10</sup> Chichamsha taramiayi ju nun̄kanam. Tura nun̄kasha ni najanamu ain̄, nun̄kaya aents Nin nekaacharmiayi.

<sup>11</sup> Támiayi ni nun̄kén tura ni shuarsha ni enentáin itiaacharmiayi.

<sup>12</sup> Tuma ain̄ chikich shuar Nin enentáimtuiniak ni enentáin itiaawarua nuna Yusa uchirí ajastinian Yus tsan̄katkamiayi.

<sup>13</sup> Niisha Yusa uchirí ajasar ataksha númpentin ayashímkiacharmai. Áentsnúmiā akiiniachu áiniawai niisha. Áishman̄ wakeramujajisha akiiniacharmai. Antsu Yúsnumiā akiiniawaru ásar Yusa uchirí áiniawai.

<sup>14</sup> Nú Chichamsha ayashtin ajas iijjajai núkap tsawant pujumiayi. Yusa anen̄kratairijjajai piakuyi. Aya nekasa nunak chichaamiayi. Núnisan̄ ni pen̄kerin̄, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji.

<sup>15</sup> Juan̄sha Nin neka asa, étserek tímiayi “Júiti wi tímiaj nu: “Winia ukuruin̄i winittiana nu wíjjain̄kia émkaiti. Maa, wi atsaisha tuke pujuyayi” tiniujai.” Tu etserkamiayi.

<sup>16</sup> Chichamsha ti anen̄kartin asa ashí pen̄ker ana nuna iniaitsuk súramji.

<sup>17</sup> Yusa akupeamurin̄ Muisais yaunchu jintintraiti, antsu aneatniuncha tura ashí nekasa ana nunasha Jesukristu jintintraiti.

<sup>18</sup> Chikichkisha Yúsán pen̄ké wáinkiachuiti. Tura ni Uchirí chikichkia nu tuke Niijjajai tsaniaku asa Yúsán paant awajturmasuitji.

### *Imiakratin Juan̄ Jesukristun̄ etserkamiania nu*

*(Mateu 3.11-12; Márkus 1.7-8; Rúkas 3.15-17)*

<sup>19</sup> Jerusarén̄numiā Israer-shuar ni Pátririn̄cha Riwi-shuarjai Juan̄kajai akupkarmiayi yákit tusar.

<sup>20</sup> Inintruiniakui paant ujakmiayi. “Wikia Krístuchuitjai” tímiayi.

<sup>21</sup> Takui ataksha aniasarmiayi “¿Nuikia yáitiam. Yúsnan etserin yaunchu amia nú Eriaskaitiam?” tiarmiayi.

Juaṅsha “Atsá, núchaitjai” tímiayi.

Nuyá ataksha aniasarmiayi “Nuikia ¿Yúsnan etserin tátinia núkáitiam?” tiarmiayi.

Niisha “Atsá” tímiayi.

<sup>22</sup> Takui “¿Nu arantcha yáitiam. In akuptamkajnia nusha warí títiataj. Warintia enentáimiam?” tiarmiayi.

<sup>23</sup> Juaṅsha tímiayi “Yúsnan etserin Isayas yaunchu timia núitjai. Niisha áarmiayi “Aents atsamu nunkanam shuar untsumui “Ti uuntrí jintí naka awajsatarum,” tu untsumui.” Núnaka Isayas áaruiti. Tura wikia untsumna nú shuaraitjai” tímiayi.

<sup>24</sup> Juaṅjai chichainiakka Pariséu akupkarma áarmiayi.

<sup>25</sup> Niisha tiarmiayi “Nuikia Krístuchuitmesha, Eriashaitmesha, Yúsnan etserin tátinia núchaitmesha ¿urukantai imiakratam?” tiarmiayi.

<sup>26</sup> Juaṅsha tímiayi “Wikia entsajain imiakratjai. Tura átum írutramunam shuar átum nékatsrumna nu wajaawai.

<sup>27</sup> Niisha winia ukuruñj winiyat wíjjañkia ti nankaamantuiti. Nii ti péñker asamtai wisha ni sapatrj jinñkiamurñcha atitrachminiaitjai” tímiayi.

<sup>28</sup> Nuka Petapara peprunam túrunamiayi. Petaparasha Juaṅ imiakratmia nuñ Jurtañ entsa amain amai.

### *Jesus Yusa Murikrinti*

<sup>29</sup> Nuyá kashin Juaṅ Jesusan winian wáiniak tímiayi “Iistarum. Núiti Yusa Murikrj ashí aentsu tunaarñ júana nu.

<sup>30</sup> Núiti wi timiaj nu, “Winia ukuruñ winiana nu wíjjañkia nankaamantuiti. Tura wi atsajisha tuke pujuyayi” tímiajai.

<sup>31</sup> Wisha Nin nekaachmajai. Tura ashí Israer-shuar Nin nekaawarat tusan imiakñ tamajai” tímiayi.

<sup>32</sup> Nuyá tímiayi “Yusa Wakanin yámpitsa núnin nayaimpinmayan táarun wáinkiamjai. Tura ekemsamai.

<sup>33</sup> Nu túruntñ tuke Nin nekaachmajai. Tura Yuska winia imiakrat-tinian akuptak turutmiai “Chikichik shuarnum Yusa Wakaní tara ekemsa wáinkiam, nujai nekaattame. Yusa Péñker Wakaníjjañ imiakratniua núiti” túrutmiayi. Tura nujai Nin nekaamjai.

<sup>34</sup> Yamaikia wainkia asan ti paant nékajai tí nekas Yusa Uchirñti” tímiayi Juaṅ.

### *Jesusa unuiniamurj emka armia nu*

<sup>35</sup> Kashincha ataksha Juaṅ nuñ wajasmiayi ni unuiniamurj jímiarjai.

<sup>36</sup> Jesussha nuñ nankaamakui Juaṅ tímiayi “Iistarum, Yusa Murikrj áuwiti.”

<sup>37</sup> Juaṅka unuiniamurj nuna antukar mai Jesusan pataatukarmiayi.

<sup>38</sup> Jesussha úkumur ímias nu jímiarar wininian wáinkiamiai.

Tura tímiayi “¿Ya eṅrum?”

Niisha “Uuntá, ¿tuj pujam?” tiarmiayi.

<sup>39</sup> Jesussha tímiayi “Wats, iitarum.”

Niisha wear ni pujutairñ wáinkiarimiayi. Tura áaṅkú ajasmatai nu tsawan-taj nuñ kintiamprarmiayi.

<sup>40</sup> Juan̄ka chichamēn antukar Jesusan pataatukaruka jímiar ármiai. Chikichik Antresauyayi. Niisha Semun̄ Pitru yach̄ijiyayi.

<sup>41</sup> Antressha wárik ni yach̄i Semun̄kan ęaktajtsa wémiayi. Tura wáiniak “Misías wáinkiaji” tímiayi. Misíaska ni chichamēn “Kristu” tawai. Kristuka Israer-shuaran yańkiarat tusa Yus anaikiamuiti.

<sup>42</sup> Nuyá Antres ni yach̄i Semun̄kan Jesus pujamunam jukimiayi. Jesussha wáiniak tímiayi “Ámetme Semun̄, Junasa uchir̄i. Túrasha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

### *Jesus Jiripijai tura Natanaérjai chichasmania nu*

<sup>43</sup> Kashincha Jesus Kariréa nun̄kanam wétajtsa pujumiayi. Tura Jiripin wáiniak “Nemartusta” tímiayi.

<sup>44</sup> Jiripisha Petsaitia péprunmaȳayuyayi. Antressha Pítrusha nu péprunmaȳayuyayi.

<sup>45</sup> Nuyá Jiripi Natanaéran ęakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchir̄i. Nasaréť péprunmaȳaiti.”

<sup>46</sup> Natanaérsha tímiayi “¿Nasarétnumia péńker shuar áminkiait?”

Jiripisha “Winim ítiá” tímiayi.

<sup>47</sup> Jesussha Natanaéran tíjiuch winian wáiniak tímiayi “Ju shuar iistarum. Ti péńker Israer-shuaraiti. Penké anańkartichuiti.”

<sup>48</sup> Natanaérsha tímiayi “¿Itiur nékaram?”

Jesussha tímiayi “Jiripi tuke untsurmatsaj̄in wáinkiajme iku numir̄in ęamkam wajamin.”

<sup>49</sup> Natanaér nuikia tímiayi, “Uunta, nekas Yusa Uchir̄inme. Israer-shuar akupniuitme” tímiayi.

<sup>50</sup> Tura Jesus tímiayi “¿Aya wi “Iku numir̄in ęamkam wajamin wáinkiajme” takui Winia enentáimturamek? Antsu nuna nan̄kaamas nekaachmin ana nusha wáinkiaítame” tímiayi.

<sup>51</sup> Nuyasha Jesus tímiayi “Wi nekas tájarme, Aents Ajasu asan atumsha nayaim uranmianum Yusa suntar̄i Winin tara waka ajainia wáinkiaítarme.” Tu tímiayi.

## 2

### *Nuatnaikiatin jisat Kaná péprunam ámania nu*

<sup>1</sup> Menaintiu tsawant nan̄kaasmatai nuatnaikiatin jisat Kaná péprunam ámiayi. Kaná péprusha Kariréa nun̄kanmayuyayi. Jesusa nukur̄isha nu pujumiayi.

<sup>2</sup> Jesussha ni unuiniamur̄isha nu nuatnaiyamunam ipiaamu ármiai.

<sup>3</sup> Umutai amuukamtai Jesusa nukur̄i tímiayi “Umutai amuukai. Penké takainiatsui.”

<sup>4</sup> Tura Jesus tímiayi “Nukuá, ¿urukamtai Winia túrutam? Iniáitiústá. Winia kakarmar iniakmastin jeaatsui.”

<sup>5</sup> Nuyá umutain wáinmainia nuna ni nukur̄i tímiayi “Ashí ni tana nu umiktárum.”

<sup>6</sup> Nūi kayajai najanamu yumi-yaraatai sais (6) ámiayi. Nu yaraatainmaȳa Israer-shuar ni ewejencha ni nawencha nijiamau ármiai Yus shiir

enentáimtursatí tusar. Chíkich chíkich yaraatainíum uchenta (80) rítrusha, siañ (100) rítrusha yumi wayamniauyayi.

7 Nuyá Jesus umutain wáinmaun “Ju yaraatai áimpratarum” tímiayi. Takui mete áimprarmiyai.

8 Áimprarmatai Jesus tímiayi “Pai, ishichik shikikrum námper chicharu suutarum.” Tutai nútiksañ túrawarmiyai.

9 Jista chicharusha nu umutai ajasun nekáprámiayi. Yaraatainmaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwatun untuk

10 tímiayi “Jístanmanka péñker umutain emka suíniatsuk. Tura jémararmatañkia tímianchan suiniatsuk. Túrusha ámeke péñker umutai ikiusam yamá jíkchamek” tímiayi.

11 Jesus túramu Kanam Kariréa nunkanam túrunamiayi. Nújainkia Jesus emka ni kakarmarjñ paant iniaktusmiayi. Nuna ísar ni unuiniamurjsha Nin enentáimtusarmiyai.

12 Nuyá Kapernáum péprunam wémiayi. Ni nukurjsha ni yachjsha ni unuiniamurjsha nemariarmiyai. Nujsa untsurj tsawant pujusarmiyai.

*Yusa Uunt Jeen suruktinian Jesus surinkiamiania nu  
(Mateu 21.12-13; Márkus 11.15-18; Rúkas 19.45-46)*

13 Israer-shuara namperj, paskua tutai, ishichik ajasmatai Jesus Jerusaréñnum wémiayi.

14 Nuñ jeá Yusa Uunt Jeen súruinian wáinkíamiayi. Turuncha murikni-asha yampitsnasha súrin ármiayi. Chikichcha ni misarjñ pujusar kuítian yapajñiancha wáinkíamiayi.

15 Nuna wáiniak yaranen chapikmar asutkiartutain najana nujaí ashí waakartiuk murikrintiuk aa jíjrmíayi. Kuítian yapajñiu misarjñcha ayantar ni kuítrin nunká utsañkarmiyai.

16 Yampitsan súrinniasha tímiayi “Nuka juyá jíjtiarum. Winia Aparu Jeen surutai jea najanawairap” tímiayi.

17 Nuna ísar ni unuiniamurj yaunchu Yus-Papinium áarman enentáimprarmiyai. Ju áarmaiti: “Ame Jeem shiir atí tusan ti wakerukuitjai.”

18 Nuikia Israer-shuara untrj Jesusan aniasarmiyai “Juna túramniaitjai tusam ¿warí kakarmak iniakmastatam?”

19 Jesussha tímiayi “Ju Jea sáakiakrumin menaintiú tsawantaj iniantaittia-jai Wikia.”

20 Israer-shuarsha tiarmiayi “Kuarentisáis (46) uwitin juna jeamtinian pujusarmiyai. Amesha menaintiú tsawantaj jeamtámeash.”

21 Kame Jesus “Jea” chichayat ni ayashjñ tímiayi.

22 Tuma asamtai Jesus ukunam jakamunmaya nantakmiatai ni unuiniamurj ni timian enentáimprar ni chíchamencha tura yaunchu Yus-Papinium áarmancha “Nekasaiti” tu enentáimtusarmiyai.

*Jesus ashí shuara enentáin nékawai*

23 Paskua námper tin ti untsurj Jerusaréñnum pujuarmia nu, Jesus aents tujintiamun túramtai, nuna wáinkiar Nin nekas enentáimtusarmiyai.

24 Tuma aiñ Jesus ashí neka asa ninkia enentáimtuscharmíayi.

25 Niñki ashí shuara enentáin neka asa chíkich ujatkat tusa atsumchamiayi.

## 3

*Jesus Nikiutémujai*

<sup>1</sup> Shuar ámiayi ní naarj Nikiutému. Niisha Pariséu asa nii tuinia áintsan Yúsnan takauyayi. Niisha Israer-shuara uuntriyayi.

<sup>2</sup> Niisha kashi Jesusaj irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiyanchuítikiumka aentsti tujintiamu túramna nu tujinkiaintme’ tímiayi.

<sup>3</sup> Jesussha tímiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

<sup>4</sup> Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurj ampujén enkempramniakait atak akiiniatniuna?”

<sup>5</sup> Ataksha Jesus tímiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachiinkiashtatui.

<sup>6</sup> Ayashniumiá akiinia nuka ayashchakait. Núnisan Wakanniumiá akiinia nuka wakanchakait.

<sup>7</sup> Wi “atak yamaram akiiniatniuiti” takui itiurchat enentáimpraip.

<sup>8</sup> Nase enentáimpratá. Nase nápkamsan umpúawai. Amesha ántame tura tuyan winiá túrasha tuñ weti nékatsme. Núniskete ashí Wakanniumiá akiinia nu.”

<sup>9</sup> Tuma asamtai Nikiutémusha atak anias “¿Jusha itiurak áminiait?” tímiayi.

<sup>10</sup> Jesus áikmiayi “Ame Israer-shuara jintinniurintiatmesha ¿itiura nékatsmea?”

<sup>11</sup> Ti nekasán tájame. Nekas nékakur chichaaaji. Ísmajnia nusha ujaaji. Tuma ain ii chichame ántatsrume.

<sup>12</sup> Aya ju nunkanmaya túramu ujaam ántachkurmeka ¿itiurak nayaimpinmaya túramusha antuktaram?”

<sup>13</sup> Shuar chikichkisha nayaimpiniam waka atsawai. Aya Wiki, nayaimpinmaya taran Aents Ajasu asan, túraitjai. Tura Wikia nayaimpinmayaitjai.

<sup>14</sup> Tura Winiasha, Aents Ajasu ain, mantuawartatui. Iis, yaunchu Israer-shuar atsamunam wekainiak napijjai ti jáiniakui tuke tsuamarti tusa Muisais napin jirú najana yakí numiniam awajaimiayi. Núnisnak Wisha awajnitniuitjai.

<sup>15</sup> Nújainkia ashí Winia enentáimturna nuka jinium wétsuk Yusaj tuke iwiaaku pujustatui.”

*Yuska ashí shuaran ti aneawai*

<sup>16</sup> Yuska ashí shuaran ti anea asa, ni Uchirín chikichik ana nuna shuáran uwemtikrarat tusa tsanatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiaji.

<sup>17</sup> Yus áentsun kajerak jinium surukat tusa ni Uchirín akupkachmiayi. Antsu uwemtikrarat tusa akupkamiayi.

<sup>18</sup> Yusa Uchirín enentáimtana nuka jinium penké surunkashtiniaiti. Tura Nin enentáimtsana nuka, Yusa Uchirín chikichik ana nuna enentáimtachu asa, páchitsuk jinium surukmaiti.

<sup>19</sup> Yusa Uchirí tsáapninia áintsan ii tunaari paant awajturmajai. Nu tsáapnisha ju nunkanam táraiti. Shuar tunáa ti tura ásar tsáapninian nakitrar kiritniun wakeriarmai. Nuna tura ásar jinium surunkaruíti.

<sup>20</sup> Ashí tunaan túruinia nuka tsáapninian muíjainiawai. Túrawar yupitiainiawai ni tunáa túramu paant ajasaj tusa.

<sup>21</sup> Antsu ashí nekas túratniun umiinia nuka tsáapninian weantainiawai. Yus ni enentáí pujuram tsáapninium takainiawai. Nuka ti paantaiti.

*Imiakratin Juan ataksha Jesusnan chichasmiania nu*

<sup>22</sup> Nuyá Jessusha ni unuiniamurijjiaisha Jutiá nunkanam wear nuí pujusar imiakratiarmiayi.

<sup>23</sup> Juansha Enun nunkanam, Sarim tíjiuchia nuí, imiakratuk pujumiayi entsa nuí núkap aa asamtai. Tura aents táarmatai imiainiarmiayi.

<sup>24</sup> Nusha Juánkan sepunam enkenatsain túrunamiayi.

<sup>25</sup> Tura Juanka unuiniamurí Israer-shuarjai jianaiktinian nankamawarmiayi. “¿Ya imiakratma imiá péñkerait?” tusar áujmatiarmiayi.

<sup>26</sup> Juánkaj inintrustai tusar wéarmiayi. “Uunta, ame nuik Jurtañ entsa amain pujakom shuar nuí pujá “núiti Yusa Murikri” tíchamkum. Yamaikia imiakratui tura ashí shuar Nin nemarainiawai” tiarmiayi.

<sup>27</sup> Tutai Juan tímiayi “Ashí kakarmaka aya Yúsaiyañchakait.

<sup>28</sup> Wisha paant tímiajai “Wikia Krístuchuitjai antsu ni jintin iwiarat tusan emka akupkamuitjai.” Nusha antukmarme.

<sup>29</sup> Kame shuar nuwañ nuatna nuna áishrinti. Nuatnaiyak áishman nuwejai áujnainiakui, ni amikrisha nuna antuk ti waraatsuk. Wisha núnisnak aents Jesusaj wénakui ti waraajai.

<sup>30</sup> Niisha tuke nankaamaku uunt ajastiniaiti antsu wikia tuke tímiancha ajastiniaitjai.” Juan tu chichasmiayi.

*Nayaimpinmayá tara nu*

<sup>31</sup> Nayaimpinmayá tara nuka ashí nankaamakuiti. Nunkeyá nuka, nunkeyá asa jú nunkanmayanak áujmatui. Nayaimpinmayá tara nuka ashí nankaamakuiti

<sup>32</sup> tura nuí antukmancha ísmancha áujmatui. Túrashá ni chichamen ántuiniatsui.

<sup>33</sup> Antsu ni chichamen ántana nuka “Yusa chichame imiá nekasaiti” tawai.

<sup>34</sup> Yus akupkamuka Yusa chichamen étserui. Yuska ni Wakanin ementut-suk susa asamtai tu étserui.

<sup>35</sup> Yus Apa ni Uchirín anea asa ashí ana nuna iistí tusa ataksaiti.

<sup>36</sup> Shuar Yusa Uchirín enentáimta nuka yamaram iwiaakmanum akiinia asa tuke Yusaj shiir pujustiniaiti. Antsu Yusa Uchirín enentáimtatsna nuka nu iwiaakmanum akiiniachuiti antsu Yus tuke nin kajerkaiti.

## 4

*Jesus Samaria nunkanmayá nuwajaj chichasmiania nu*

<sup>1</sup> “Jesus untsurí shuaran ni nemarkin awajeawai; kame Juanjai nankaamas untsurí imiaawai” taman Pariseu shuar antukarmiayi.

<sup>2</sup> Nekaska Jesus imiakratchamiayi, antsu ni unuiniamurí túrawarmiayi.

<sup>3</sup> Pariséu nu chichaman antukarman Jessusha nekáa Jutiá nunkanmayá jiiñki Kariréa nunkanam waketikimiayi.

<sup>4</sup> Wáketuk Samaria nunkanmaanñ nankaamaktiniuyayi.

<sup>5</sup> Samaria nunkanam wéak Sekar péprunam jeamiayi. Nu pepru jeastatuk Jakupa nunke ámiayi. Jakupsha nu nunkan ni uchirín Jusén tí yaunchu susamiayi.

6 Nuḡsha yumirmat ámiayi. Jakup taurma asamtai “Jakupa yumirmatrġ” tiarmiayi. Tutupin jeamtai Jesussha pimpiki winis yumirmat ayamach pujusmiayi.

7 Nuġ pujaj Samarianmaja nuwa yumí shikiktajtsa támiayi. Tura Jesus “Entsa surusta” tímiayi.

8 Jesusa unuiniamurġsha yurumkan péprunam sumaktajtsa wéaru asamtai aya Jesusak pujumiayi.

9 Samarianmaja nuwa Jesusan tímiayi “¿Itiura Israer-shuaraitatmesha Samarianmaja nuwa aġsha entsa seatam?” Kame Israer-shuar Samarianmaja shuarjainkia penké chichachu ásar nuna tímiayi.

10 Jesussha tímiayi “Yus súamu nékameka tura entsa surusta tájam nusha nékameka ame antsu seattġnme tura Wikia iwiaaku entsan amasaintjai.”

11 Nuwasha tímiayi “Uunta, entsasha ti initiaiti tura shikiktincha takaktsume. ¿Tuyaġ iwiaaku entsasha surustam?”

12 Ii uuntri Jakup ju yumirmatan taur ju yanak niisha ni uchrġsha ni waakarġsha umararmiayi. Nuyá ikiurtankimiaji. ¿Amesha Jakupjai nankaamas kakarmaitiam?”

13 Jesussha tímiayi “Ashí shuar ju entsan umarka ataksha kitiamtiatui.

14 Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunia áintsan tuke pajamtiatui nujai tuke iwaaku pujustí tusa.

15 Tutai nuwa tímiayi “Uuntá, winiasha nu entsa surusta. Wisha kitiamcha átaj. Tura ju entsancha shikiktinian táchataj” tímiayi.

16 Nuyasha Jesus tímiayi “Áishrum untsukam utitia, turam juġ tatá.”

17 Nuwasha “Wina áishur atsawai” tímiayi.

Tutai Jesus tímiayi “Maa, nekas tame. Áishrum atsawai.

18 Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

19 Nuna antuk nuwasha tímiayi “Uunta, ame Yúsnan etserniuchukaitiam.

20 Ii únuntriinka tuke Samarianam pujuarmia nu juġ nainnium Yúsan tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

21 Jesus tímiayi “Nuwá, enentáimsata. Tsawant jeattawai átum juġ náinniumsha tátsuk tura Jerusarénumsha wétsuk Yus Apa tikishmatratin.

22 Átum tikishmatrum nuka nékatrume. Iikia tikishmatrajnia nu nékaji. Israer-shuarnumia Uwemtikkiartin winiakui nékaji.

23 Tsawant winittiana nu yamá jeayi. Ashí shuar Yus Apan nekas tikishmatainiikka tuke wakanjai tuke enentáijiaisha awajitsuk tikishmatrartatui. Núnisan tikishmatrurat tusa wakerawai Yus Apa.

24 Yuska Wakaniiti tura ashí Nin tikishmatainia nuka tuke wakanġġai tura tuke enentáijiai awajitsuk tikishmatratin áiniawai.”

25 Nuwasha tímiayi “Anaikiamua nu tátiniaiti. Nusha Krístuiti. Niisha taa ashí jintinramattaji.”

26 Jesus tímiayi “Wiitjai. Ámin chichaaġmena nú Kristuitjai.”

27 Nuġ ni unuiniamurġ táarmiayi tura nuwajai chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajai chichaam?” títinian arantukarmiayi.

28 Nuyanka nuwa ni yumirġni ikiuki péprunam we ashí áentsun tímiayi

29 “Winiirum ítiarum, shuar ashí wi túramun túruta nu. ¿Juka Krístuittiya?”

30 Tutai péprunmaya jíinkiar Jesus pujamunam wearmiayi.

31 Jeainiatsaïn ni unuiniamurj seak tiarmiayi “Uunta, yurumáta.”

32 Tura Jesus tímiayi “Wi yúatniunka takakjai átum nékachman.”

33 Ni uniuiniamurjsha nuámtak anniasarmiayi “¿Chíkich shuar yurumak itiarim tátsuash?” tiarmiayi.

34 Tura Jesus tímiayi “Winia akuptukua nuna wakeramurj túrakun tura ni takarjñ takaakun Wíjiaïnkia yurumátñuia áintsan ikiakáatui.

35 Átumka “Tuke kuatru nantu árak júuktin taasai” tátsurmek. Túrasha Wi tájarme, shuar wininia nu iistarum. Yus-Chicham ni enentáin araamuiti. Tura júuktin tsawant jeayi.

36 Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisan arakan araana nusha júana nusha mai metek warasartatui.

37 Tiniu armia nuka nekasaiti: “Chikichik araawai chíkichcha júawai.”

38 Iis, chíkich araakmamu júuktinian akupkaitjarme. Átum araachiatrumek chíkich takasmanum atumsha pachiintiukuitrume” tímiayi.

39 Tura núwaka péprunam jeá “Ashí wi túramun ujatkeyi” takui untsurj shuar Jesusan ti shiir enentáimtusarmiayi. Niisha Samarianmaya shuar ármiai.

40 Nu asamtai ashí Jesusai taar niijjai pujusát tusa seawarmiayi. Tutai Jesus jimiará tsawant nuj pujusmiayi.

41 Nú shuar untsurj ni chichamen antukar Jesusan ti shiir enentáimturarmiayi.

42 Nuyá nuwan tiarmiayi “Yamaikia aya ame chichammijjain Jesus enentáimtatsji antsu imia iisha ni chichamen anturkaji. Tura nékaji nekas Krístuiti, ashí shuaran Uwentikin.”

### *Jesus akupniu takarniurj uchirjñ tsuármiania nu*

43 Jimiará tsawant nankaamasmatai Jesus Samaria nunkanmaya jiinki Kariréa nunkanam wémiayi.

44 Kariréasha Jesusa nunke asamtai, aïnsha Jesus timia áintsan ámiayi: “Yúsnan etserniun ashí shuar péñker anturainiawai antsu nuna nunkeyanaka nin anturainiatsui.”

45 Tuma aïn Kariréa nunkanam jeamtai auya shuarsha Jerusarénum paskua námpernum wearu ásar tura ashí ni túramun nuj wainkia ásar ti shiir awajsarmiayi.

46 Nuyá Jesus Kaná péprunam atak támiayi. Nu péprunmasha nuik Jesus yumin umutai awajsamiayi. Jesussha nuj pujai yajá péprunam Kapernáumnum akupniu takarjñ ámiayi. Ni uchirjñsha jaa tepemiayi.

47 Niisha Jesus Jutíanmaya Kariréa nunkanam taman antuk Jesusai wémiayi. Tura ni uchirjñ jákatin tepakui ni jeen we ni uchirjñ tsuarat tusa Jesusan seamiai.

48 Jesussha tímiayi “Aya aents túrachminian túrakui ísrum aya nújain Winia enentáimtarme.”

49 Tura takarjñ tímiayi “Uunta, winia uchir jáatsaïn wari winitia.”

50 Nuínkia Jesus tímiayi “Jeemjñ waketkitia. Yamaikia ame uchiram péñker ajasai.” Tutai nú aishman Jesus táman antuk wémiayi.

51 Ni jeen jeátémamtai ni takarniurj inkiun tiarmiayi “Yamaikia uchiram péñker ajasai.”

52 Apasha inintrusmiayi nantu urukaim péñker ajasma.



Niisha tiarmiayi “Yau, nantu pukuntamtaí, tsuemun michatramai” tiarmiayi.

Nuna antuk uchí aparísha enentáimsamai.

<sup>53</sup> Nantu pukunta aí Jesus “Ame uchiram pénger ajasai” timia nuni aín michatraití. Tuma asamtaí niisha ashí ni shuarísha Jesusan nekas enentáimturarmiayi.

<sup>54</sup> Jesus nu túramujáí ni kakarmarín jimiará iniakmasmiayi. Nunasha Jutíanmaya jíinki Kariréa nunkanam jeá túramiayi.

## 5

### *Petesta amia nuí tampemarun Jesus tsuármiania nu*

<sup>1</sup> Nu nankaasmataí, Israer-shuar namperan najanainiakui Jesus ataksha Jerusarénum waketkimiayi.

<sup>2</sup> Jerusaréni yama wayamunam murik wayatin waiti tíjiuch amia nuí entsa pajamtaí jeammauyayi. Nu pajamtain Petesta tiarmiayi. Nuna wáitirísha senku (5) ármiai.

<sup>3</sup> Nuí untsurí jáiniak nunkanam tepearmiayi. Kusurusha shutuapsha tampemakusha tepesar entsa miartukat tusa nákasarmiayi.

<sup>4</sup> Kame ni tátaj taku Yusa suntarí táuyayi entsan umuchkiatssa. Nuyanka emka shuar entsá wayá nu ni jáamuriyá tsuármiai.

<sup>5</sup> Áishman traintiúchu (38) uwi jaa tepá nuí ámiayi.

<sup>6</sup> Jesussha nu shuaran nuí tepan wáinkíamiayi. Tura untsurí uwitin jaa tepan nekáa aniasmiayi “¿Shiir ajastiniak wakeram?”

<sup>7</sup> Tutai jaasha tímiayi “Uunta, entsa muchitkiui ¿winia yaki enkétát? Kame wi enkemátaj tai chikich emka enkemáiniawai.”

<sup>8</sup> Nuyá Jesus tímiayi “Nantaktia. Ame peakrum jukim wetá.”

<sup>9</sup> Nu chichamtaik áishman shiir ajasmiai. Tura ni peakrín jukí wémiayi. Nusha ayampratin tsawantaj túrunamiayi.

<sup>10</sup> Tuma asamtaí Israer-shuar shiir ajasun tiarmiayi “Yamáí ayampratin tsawantaiti. Peakrum júkishtiniatme” tiarmiayi.

<sup>11</sup> Áishmansha tímiayi “Winia tsuara nu “Peakrum jukim wetá” turutni” tímiayi.

<sup>12</sup> Nuínkia aniasarmiayi “¿Ya “Peakrum jukim wetá” túramam?” tiarmiayi.

<sup>13</sup> Tura áishmansha Nin tsuárun nékachmiayi. Untsurí shuar nuí aa asamtaí tura Jesus weu asamtaí nin nekaachmiayi.

<sup>14</sup> Atak Jesus Yusa Uunt Jeen áishman kan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasáim” tímiayi.

<sup>15</sup> Nuínkia áishman Jesus nin tsuárman nekáa Israer-shuaran ujakmiayi.

<sup>16</sup> Tuma asamtaí ayampratin tsawantaj túramtaí Israer-shuar Jesusan maatai tusar áintrarmiayi.

<sup>17</sup> Tura Jesus tímiayi “Wina Apar tuke yamaisha takawiti. Núnisnak Wisha takajai.”

<sup>18</sup> Tutai Israer-shuar nuna nankaamas maatai tusa wakeriarmiayi. Ayampratin tsawantaj takaakui kajerarmiayi. Tura nu arantcha “Yus winia Aparuiti” takui Yusjáí métek enentáimtumawai tusar nu arant kajerarmiayi.

### *Yusa Uchirí túramnia nu*

19 Nuyá Jesus tímiayi “Ti nekas tájarne, Yusa Uchirínkia ni enentájjain takaatsui. Antsu aya winia Apar takaana nuna ísan métek takaajai. Ashí winia Apar túramun Wisha ni Uchirí asan métek takaajai.

20 Ni Uchirí asamtai winia Apar anentui tura ashí tura nuna iniakturui. Tura nuna nankaamas tujinkiamnian iniaktursattawai Wisha túratniun. Tura nuna túrakui ashamkattarme.

21 Winia Apar jakamunmayan iwiaaku ajasat tusa Ni wakerana nuna iniantesuk. Núnisnak, ni Uchirí asan, Wi wakeraj nuna iwiaaku awájsámmiaitjai.

22 Winia Aparka súmamtiksui antsu shuar súmamtikiatniun ni Uchirín súsaiti.

23 Tuma asamtai ashí shuar Yus Apan shiir awajainia áintsan ni Uchiríncha métek shiir awajatsin áiniawai. Yus Apa ni Uchirín akupka asamtai, Uchin shiir awajeatsna nuka Yus Apancha shiir awajeatsui’ tímiayi.

24 Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarin tuke amuukashtinian takakui. Nu shuarsha ayashí iwiaakuitiat jákauyi antsu yamá nekas iwiaakuiti. Tuma asa sumamshatui.

25 Ti nekasaiti. Tsawant winittiana nu jeayi. Nu tsawant jaka ainia nu Wi untsumman antukar umirkarka iwiaaku ajasartatui.

26 Iis, winia Apar iwiaaku awajatsniun takakui. Tura Winiasha, ni Uchirí asamtai, iwiaaku awajatsniun surusuiti.

27 Nu arantcha wi Aents Ajasu asamtai, shuaran súmamtikiatniun surusuiti.

28 “Ju chicham itiruchataiti” enentáimprairap. Atak tsawantaj wi untsumman ashí jákaru ainia nu antukartatui.

29 Tura ashí iwíarsamunmayá jínkiartatui. Péñker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

*“Jesus nekas Yúsajyáiti” tu áujmatainia nu*

30 Imia Wiki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asamtai, awajitsuk súmamtikjai.

31 Aya Wiki “Yúsajyáitjai” tákunka winia chichamur ántar ainti.

32 Chikichcha awai. Niisha “Yúsajyáiti” túrutui. Ni chichamesha imia nekasaiti.

33 Atumsha Juankej wi túramu inintrusmarme tura nii timia nu nekasaiti.

34 Tuma ain aents táman atsumatsjai. Antsu Juanke chichame enentáimkiuram uwempratarum tusan tájarne.

35 Juansha jiya núnis keemai. Atumsha ishichik tsawantin nú tsáapninnium warastin enentáimpramarme.

36 Tura Winia “Yúsajyáiti” túrutna nu, Juanjai nankaamas péñkeran takakjai. Wi takasma núiti. Winia Apar takastinian surusma nuna takaakun nujaj páantaiti Yus Apa akupkamuitjai.

37 Winia Aparsha, akuptuku asa, ayamprutui. Túrusha átumka ni chichamesha antukchaitrume tura wáintiash wáinkiachuitrume.

38 Yus Apa akuptukuiti. Tuma asamtai Winia enentáimturchakrum winia Aparu chichamesha atumi enentáin wayachuiti.

39 Átumka Yus-Chicham yaunchu aarma nuj iwiaaku átinian wáinkiataj tusarum ti unuimiaruitrume. Nu chichamsha Winian áujmatui.

40 Tuma ain nekas iwiaaku átaj tusarum Winí tátin nakitiarme” tímiayi.

41 “Shuar Winia “shíiraiti” túrutainiakuisha nuna páchiatsjai.

42 Maa, Wi nékajrume. Átumka Yus aneatsrume.

43 Winia Apar akuptukmatai táwitjai túrasha nakitrarme. Antsu chíkichka ní enentájjaiñ jeartamkuñkia nuka átum wakerarme.

44 Átumka nuámtak “Shiir enentáimtursatí” tu enentáimtunaiyarme. Tura Yus enentáimturma nuka páchiatsrume. Nújaiñkia ¿itiurak Yus enentáimtustam?

45 “Ii tunaarín Yusai etserturmaktatji” turutiirap. “Muisais akupkamun umirkan uwemprattajai” tátsurmek. Antsu Muisais aarma nujai atumí tunaari etsernaktatui.

46 Iis, Muisais Winia áatrurmiayi. Atumsha ni timia enentáimtakrumka Winiasha enentáimturainrume.

47 Tura ni aarma enentáimtachkurmeka ¿itiurak wi tama enentáimtustarum?” tímiayi Jesus.

## 6

*Jesus senku mir (5.000) áishmanñkan ayurawarmiania nu (Mateu 14.13-21; Márkus 6.30-44; Rúkas 9.10-17)*

1 Nu nankaamasmatai Jesus Kariréa antumiañnum amain katiñmiayi. Nu antumiañsha Tipirias antumiañ tuiniawai. Jimiará náartiniaiti.

2 Untsurí shuar Jesus ti jáinian timiá wárik tsuan wáinkiaru ásar Nin nemari-armiayi.

3-4 Israer-shuara paskuanamperi ishichik ajasmatai Jesussha ni unuiniamuríñ náinnium waka nuñ pujusmiayi.

5 Jesussha untsurí aents wininian wáiniak Jiripin tímiayi “Timiá untsurí shuar ayuratniusha ¿tuyañ yurumak sumaktaj?” tímiayi.

6 Kame Jesuska Nii túrattana nuna neka asa Jiripi warittin tusa tímiayi.

7 Jiripisha nuyá tímiayi “Timiá nukap kuitjai tanta sumakmesha ashí ishichik susamsha jeachaintjia” tímiayi.

8 Nuyá chíkich unuiniamurí Antres, Pitru yachi, tímiayi

9 “Uchi juñ senku (5) tantan jimiará namakjai takakui. Ausha timiá untsurínmasha jeatpiash” tímiayi.

10 Nuyañka ““Ashí pujustarum” titiarum” tímiayi Jesus.

Áishmanñsha nuwasha uchisha irunmiayi. Tura chírichri núkap aa asamtai nuñsha senku mir (5.000) áishmanñ pujusarmiyai.

11 Jesussha nu tantan achik Yúsan yumíñkias ni unuiniamurín susamiayi. Niisha ashí nuñ pujuinian súsarimiayi. Namaknasha núnisañ ashí ni wakeri-armiania nuna súsarimiayi.

12 Jémararmataisha Jesus ni unuiniamurín tímiayi “Ampirma júukrum chanñkinnium chumpiatarum. Wasúrnákaiñ.”

13 Niisha senku (5) tantanmayá ampirman júukar tuse (12) chanñkinnium áimkiarmiayi.

14 Nu shuarsha Jesus túramun ísar tiarmiayi “Ju nekas Yúsnan etserin tátinia núchakait.”

15 Shuar Jesusan uunt akupin awajsataj tutai Jesus nekáa Niñki náinnium wémiayi.

*Jesus entsá pátakek nanamas wekasamiania nu (Mateu 14.22-27; Márkus 6.45-52)*

<sup>16</sup> Kíakui Jesusa unuiniamurí antumiannum wearmiayi.

<sup>17</sup> Káshisha Jesus tuke táchamtai uunt kanunam enkemáwar Kapernáum péprunam wéenak jíinkiarimiayi.

<sup>18</sup> Tura nase ti umpúakui chíchimi ti wajaimiayi.

<sup>19</sup> Ajapén ajasar Jesus entsá pátatek nanamas tíjiuch winian wáinkiar ashankarmiayi.

<sup>20</sup> Tura Jesus “Wíitjai. Ashamprukairap” tímiayi.

<sup>21</sup> Nújainkia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

### *Shuar Jesusan eak wekainiawai*

<sup>22</sup> Kashincha chíkich shuar amain ayuramunam kanararu nekaawarmai. Jesusa unuiniamurí Jesusjainchu chikichik kanu amia nujai wéarun nekaawarmai.

<sup>23</sup> Nují chichak matsatai Tipirias péprunmaya chíkich kanu táarmiayi. Yau Jesus Yúsan yumiñkias tantan ayuramunam tíjiuch táarmatai

<sup>24</sup> Nu shuar, Jesussha ni unuiniamurísha nuí atsuiniakui, nu kanunam enkemáwar Kapernáum péprunam Jesusan eáktajtsa wearmiayi.

### *Jesus apatkua áintsankete*

<sup>25</sup> Entsa amain Jesusan wáinkiar aniasarmiayi “Uunta, ¿urutía juísha támam?”

<sup>26</sup> Jesussha tímiayi “Ti nekas tájarme. Aents tujintiamu nekáa asarum éatsume. Antsu tanta yuarum jémaru asarum éatrume.

<sup>27</sup> Juyá yurumak amuukatin asamtai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuáran Yáinkiariniiai” túrutui” tímiayi.

<sup>28</sup> Tutai inintrusarmiayi “¿Warí túratniuitiaj? Yus wakerana nu umiktin?”

<sup>29</sup> Jesussha tímiayi “Yus akupta asa Winia enentáimtursarat tusa wakerawai.”

<sup>30</sup> Tutai aniasarmiayi “¿Aentsti tujintiamuka warí túratam ii íisar Ámin nekas enentáimtustin? Chíkichcha túratá.

<sup>31</sup> Yaunchu ii uuntri aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

<sup>32</sup> Jesussha tímiayi “Wi tájana nu nekasaiti. Muisais atumí úuntriñ nayaimpinmaya yurumkan súsachmiayi. Antsu winia Apar yamáí nekas apatkun nayaimpinmaya súramui.

<sup>33</sup> Iis, Yusajya apatkunka, nayaimpinmaya tára nu súramui tura nekas apatuk asa ashí shuaran nekas iwiaakman súawai.”

<sup>34</sup> Tutai “Uunta, nu apatuk tuke amasta” tiarmiayi.

<sup>35</sup> Tura Jesussha tímiayi “Wíitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiarchattawai.

<sup>36</sup> Túrasha wí túramu wáinkiuirmesha winia chichamur enentáimtatsrume.

<sup>37</sup> Ashí shuaran winia Apar tsankatrukarmiania nu, Wíí shuar ajasartatui. Winin winiana núnaka penké nakitrashtatjai.

<sup>38</sup> Wi wakeraj nuna túratniun táchaitjai antsu Winia akuptukmia nuna umirkatniun táwitjai.

39 Winia Apar akuptukuiti tura juna wakerawai. Ashí winia tsankatrukman emenkátsuk amuukatin tsawantaj iniantkiarat tusa wakerawai.

40 Yus Apa wakerana nu júiti. Ashí shuar Winia “Yusa Uchirinti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittijai” tímiayi Jesus.

41 Tura Jesus “Wiitjai, nayaimpinmaya apatuk akupkamu” takui Israer-shuar Jesusan áujmatiarimiayi.

42 Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya taraitjai” ta?” tiarmiayi.

43 Jesussha tímiayi “Tu áujmatrukairap.

44 Shuáran winia Apar akúpturkachuitkiuñkia penké weanturkachainti. Tura Winia akupturna nuna amuukatin tsawantaj iniántkittijai.

45 Yúsnan etserniu áarmarin tawai “Ashí Yus jintintiamu ártatui”. Núnisan ashí Yusa chichamen antukar unuimiatainiakka Winí táiniawai” tímiayi.

46 ‘Aya Wiki Yúsajya tau asan Yúsan wáinkiaitjai. Chíkichka penké wáinkiachuiti.

47 Ti nekas tájarme. Winia enentáimturna nú shuarka yamaram iwiaakman amuukashтинian takakui.

48 Wikia iwiaakman súana nú apatkuitjai.

49 Iis, atumí uuntri aents atsamunam maná yurumkan yúawariatcha ashí jákarmiayi.

50 Antsu Wi tájana nú apatkun shuar yúakka jákachartatui.

51 Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

52 Nuyá nuámtak áujmattsar tiarmiayi “¿Itiurak ni ayashinkesha ayurtamat-taj?” tiarmiayi.

53 Jesussha tímiayi “Ti nekas tájarme, Wi Aents Ajasu asamtai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume.

54 Winia ayashrun yúana nuka tura winia numparun úmakka yamaram iwiaakman amuukashтинian takakui. Tura nu shuaran amuukatin tsawantaj iniántkittijai.

55 Winia ayashruka nekas yurumkaiti tura winia numparsha nekas umu-tainti.

56 Winia ayashruncha yúaka tura winia numparnasha úmaka Wijijai tsanin pujawai tura Wisha nu shuarjai tsaninkian pujajai.

57 Yus Apa, Winia akuptukuka, nu iwiaakma nérenniuiti. Tuma asamtai ni iwiaakmarjin iwiaaku pujajai. Núnisan Winia yurakka winia iwiaakmaruj iwiaaku pujustatui.

58 Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus.

59 Núnaka Jesus Israer-shuar iruntainiam unuiniarmiayi.

### *Iwiaaku chicham*

60 Nu chichaman antukar Jesusa unuiniamuri chicharainiak “Nii tana nu ti itiurchat asamtai ¿yaki antukminiait?” tiarmiayi.

61 Jesussha ni áujmatman nekáa tímiayi “Átum “ju chicham iturchataiti” tárume.

62 Wátsek, Wi nayaimpiniam pujumiaj nuĵ waketkimtaisha çurukawain-trumek?

63 Warí, aya wakanik iwiaakman súwaiti. Ayashkia penké áantraiťi nekas iwiaaku awajsatniun. Wi tájana nuĵaj imiá nekas wakankia iwiaaku awajsamniaiti” tímiayi Jesus.

64 Tura Jesus Nin enentáimtachun tura Nin suruktatna nunasha yaunchu neka asa ni unuiniamurĵn tímiayi “Atumĵncha winia chichamprun enentáimtachu tuke awai.

65 Nu asamtaĵ tímiajrume “Shuáran winia Apar akupturkachmaitkiuinĵkia penké weanturkachainti” tímiajai” tímiayi Jesus.

66 Nuyasha ni nemarniurĵ untsurĵ armia nu Jesusan ikiukiar atakka Niiĵjajĵi wekasacharmiayi.

67 Nuyá Jesus ni tuse (12) unuiniamurĵn chicharainiak “çAtumsha wétin wakerarmek?” tímiayi.

68 Semuĵ Pĵtrusha áĵkmiayi “Uunta, çyáiniĵ wetaj? Ame chichammijjainĵ nekas iwiaaku áminiati.

69 Ame Kristu asam nekas iwiaaku Yusa Uchirĵnme. Nuka enentáimtusar ti paant nékaji” tímiayi.

70 Jesussha tímiayi “Ashí tuse (12) árumna nu achikiuitjarme nekas Wí shuar ajastin. Tuma aiĵ atumĵn chikichik iwianchiiti” tímiayi.

71 Nuna taku Jútas Iskariúťin, Semuĵka uchirĵn, enentáimtus tímiayi. Jútassha ni unuiniamurĵntiat Jesusan ukunam surukmiayi.

## 7

### *Jesusa yachĵsha Nin enentáimtuscharmiayi*

1 Nu nanĵkaamasmataĵi Jesus Kariréa nunĵkanam wekaimiayi. Jutía nunĵkanam wéchamiayi Israer-shuara uuntrĵ nuĵ máataĵ tutai.

2 Tura Israer-shuar aak aakmataĵi namperĵ jeatemamtaĵi

3 Jesusa yachĵ wishikiainiak tiarmiayi “çUrukamtaĵ juĵisha pujam? Jutía nunĵkanam wetá, aĵsha ame unuiniamuram túram nuna ísarat.

4 Ashí shuar nekaawarat tákumka úĵkam túrawaip. Ti tujintiamu túriniaitkiumka ashí shuar íimmianum túratá” tiarmiayi.

5 Ni yachĵsha ishichkisha Nin enentáimtachu ásar tiarmiayi.

6 Tura Jesus tímiayi “Winia tsawantur nampernum wétin jeatsui. Atumĵjainĵkia náĵkamas tsawant wétin péĵkeraiti.

7 Ju nunĵkanmayá aents atumniaĵka kajertamatsrume. Antsu ni tunaarĵn etsertin asamtaĵi Wíniaka kajertuiniawai.

8 Átumka nampernum wetarum. Wikia tsawantur jeachkui wéatsjai.”

9 Juĵna tinia Jesuska Kariréa nunĵkanam juákmiayi.

### *Aak aakmataĵi nampernum Jesus timia nu*

10 Ni yachĵ wearmataĵi Jesussha nampernum wémiayi. Tura nekarawarainĵ tusa úĵmak wémiayi.

11 Israer-shuara úuntrĵsha námpet irunturmanum eakar “Nu aishmanĵsha çtuin puĵá?” tiarmiayi.

12 Ashí shuarsha Nin áujmatiararmiayi. Chíkich “péĵkeraiti” tiarmiayi. Tura chikichcha “Péĵkerchaiti. Aya ananĵkartawai” tiarmiayi.

13 Tura Israer-shuara úuntrĵn ashamainiak uĵk áujmatiararmiayi.

14 Nampersha ajapén ajasmatai Jesus Yusa Uunt Jeen wayá shuáran unuini-amiayi.

15 Israer-shuara úuntrjsha nuna ísar ti enentáimsar chichaak “Jusha unimiátrachiatcha ¿itiurak imiá neka?” tiarmiayi.

16 Jesussha tímiayi “Wi unuiniajna nu winia chichampruchuiti antsu Winia akuptukua Nūnan unuiniajai.

17 Yusa wakerana nuna shuar nekas umiktinian wakerakka winia chichamprun nekaattawai. Nekas Yúsnaikuiñkia, nuna nekaattawai. Aya wi enentáimmiajaiñ chichaakuisha, nuna nekaattawai.

18 Ni enentáimmiajai chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai.

19 Muisais Yusa akupkamurñ atumí uuntrñ amaschamka. Tuma aiñ nu umitsuk mantuatin wakerutarme” tímiayi Jesus.

20 Nu shuarsha tiarmiayi “Wáurtsmek. ¿Ya mantamataj tusa wakera?”

21 Jesussha tímiayi “Ayampratin tsawantaj chikichkí túramtai ti enentáimtsurmek.

22 Muisais ashí tsupirnaktinian akupkachmiayi. Antsu ni uuntrñkia nuna akupka áiniawai. Tuma aiñ átumka Muisais akupkamu umiktaí tusarum ayampratin tsawantajsha uchi áishman tsúpirnaitrume.

23 Wátsek, Muisais akupkamu uminkiatí tusarum ayampratin tsawantajsha uchi áishman tsúpirkurmekaka ¿urukamtai Wi ayampratin tsawantaj áishmanka ayashí takamtsuk tsuármatai kajetarum?

24 Shuar túrana nu ísam wárik sūmantikiawaip. Antsu inintrúsam paant nekaam, nekasa nu enentáimtusta” tímiayi Jesus.

### *Jesus Yúsnumiá akupkamuiti*

25 Nuyá Jerusaréñnumiá shuar tiarmiayi “Maatai tuinia núchakait.

26 Tura nuñ ashí ántamunam étserui tura suntar páchiniatsui. ¿li uuntrjsha “Nekas Krístuiti” tu enentáimtuiniawash?

27 Antsu nekas Kristu taa tuyañ winiá nekanashtatui tura ju pujamuka ashí nékaji” tiarmiayi.

28 Jesus nuna antuk, Yusa Uunt Jeen wájá kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáirjai táchaitjai antsu winia Apar akuptukuiti. Niisha ti nekas akupniusha átumka nékatsrume.

29 Antsu Winia akuptukuitkiui aiyá tau asan Wikia nékaji” tímiayi.

30 Nuyá sepunam enkeataj táyat achikcharmiayi ni tsawantrj jeachu asamtai.

31 Tura untsurj shuar Nin enentáimtsusar “Kristu ta ¿nuna nankaamas aentsti tujintiamun túratpiash?” tiarmiayi.

### *“Eátkáttarme tura wáitkiashtatume” tímiayi Jesus*

32 Pariséusha Israer-patri úuntrjsha Jesusnan timian antukar suntaran akupkararmiayi Jesusan achikiar sepunam enkeawarai tusar.

33 Nuyá Jesussha tímiayi “Aya ishichik tsawant atumjai pujostatjai. Nuyá ataksha Winia akuptuku pujana nuñ waketkittiajai.

34 Átumka eátkáttarme tura Wi wéajna nuñ wéchamniaitkiuram wáitkiashtatume.”

<sup>35</sup> Israer-shuarsha nuamtak aniniaisarmiayi “¿Jusha tuj wéakuin iisha wáinkiashtataj<sup>1</sup>. Israer-shuar apachnium pujuinia nu<sup>2</sup> we apachin unuiniar-tatuak.

<sup>36</sup> Nii timia nu ititurkit. “Átumka eátkáttarme tura Wi wéajna nu<sup>2</sup> wéchamniaitkiuram wáitkiashtatrumé” tana nu ititurkit?” tiarmiayi.

### *Yamaram iwiaakman súana nú entsa*

<sup>37</sup> Jista amúamunam ti shiir najanawarmia nu tsawantaj<sup>1</sup> Jesus wajaki kakaram chichaak tímiayi “Shuar ni enentáin<sup>2</sup> kitiamakka Winin taa umar kitiakén imkráti.

<sup>38</sup> Winia enentáimturna nuka ni enentáiyá<sup>2</sup> entsa wa áintsan<sup>2</sup> yamaram iwiaakman súana nú entsa jiinkittiwai.”

<sup>39</sup> Nuna taku Jesus “Ashí Yúsan enentáimtusarun Yusa Shiir Wakaní<sup>2</sup> súsatniuiti” tímiayi. Tura núnisan<sup>2</sup> Yus-Papiniumsha áarmaiti. Antsu Jesus tuke nayaimpiniam wéatsain<sup>2</sup> Yusa Wakaní<sup>2</sup> shuar súsachmauyayi.

### *Shuarsha niisháa niisháa enentáimprarmiania nu*

<sup>40</sup> Chíkich shuarsha nuna antukar “Ju nekas Yúsnan etserin tátinia núiti” tiarmiayi.

<sup>41</sup> Chíkichcha “Juka nekas Krístuiti” tiarmiayi. Tura chíkichkia Jesus Kariréanmayáiti tu enentáimiainiak tiarmiayi “Warí, ¿Kariréa nun<sup>2</sup>kanmaya<sup>2</sup> Kristu áminkiait?

<sup>42</sup> Yus-Papinium paant tawai “Krístuka yaunchu uunt akupin Tawit weanmaya<sup>2</sup> akiiniatniuiti, tawai. Tura Tawitia pépruriyá<sup>2</sup> Piri<sup>2</sup>numiá<sup>2</sup> átiniaiti” tawai” tiarmiayi.

<sup>43</sup> Tuma asamtai shuar niisháa niisháa enentáimprar kanakiarmiayi.

<sup>44</sup> Chíkich aiyá<sup>2</sup> nuka “sepunam en<sup>2</sup>keatai” tiarmiayi túrasha túracharmiyai.

### *Israer-shuara uuntri Jesusan enentáimtuscharmiania nu*

<sup>45</sup> Suntarsha wakеткиarmiayi. Tura Pariséusha Israer-patri uuntri<sup>2</sup>sha “¿Urukamtai itiachuram?” tiarmiayi.

<sup>46</sup> Suntarsha tiarmiayi “Chíkichkisha ju áishman<sup>2</sup> chichaa áanis chichaschaiti” tiarmiayi.

<sup>47</sup> Nuyá Pariséu tiarmiayi “Atumsha ana<sup>2</sup>narume.

<sup>48</sup> Pariséutisha uuntcha nuna enentáimtuiniawash.

<sup>49</sup> Penké shuarka yaunchu akupkamun nékachua nuka yajauchiniam yu-min<sup>2</sup>kramu áiniawai” tiarmiayi.

<sup>50</sup> Nikiutémusha, kashi Jesusan tarimia nu, Pariséuítai tímiayi

<sup>51</sup> “Ii shuartikia, shuar ni túramun etserkamu ántutsuk súmamtikiachminiaiti” tímiayi.

<sup>52</sup> Nuñkia niisha tiarmiayi “Wats, amesha Kariréanmayan<sup>2</sup>chuashitiam. Yus-Chicham áujsam nekaattame. Kariréanmaya<sup>2</sup> Yúsnan etserin penké táiniatsui” tiarmiayi.

### *Nuwá wáinmakman Jesusan itiararmiania nu*

<sup>53</sup> Nuyá ashí ni je<sup>2</sup>en wakеткиarmiayi.

## 8

<sup>1</sup> Tura Jesuska Uriwiu náinnium wémiayi.

<sup>2</sup> Tura kashin tsawar Yusa Uunt Je<sup>2</sup>en atak támatai ashí shuar Nin káutkarmiayi. Túrawarmatai Jesus pujus unuiniarmiayi.



<sup>3</sup> Nuyá Israer-shuara jintinniurjsha Pariséusha nuwān wáinmakman Jesusan itiararmiayi. Tura ashí iruntramunam ajapén awajsarmiayi.

<sup>4</sup> Tura Jesusan tiarmiayi “Uunta, jū nuwā tsanirma puǵá achĩnkiayi.

<sup>5</sup> Muisais akupkamunmasha nuna túraka “kayajǵi tukurar máatniuiti” tawai. ¿Amesha warĩntmea?” tiarmiayi.

<sup>6</sup> Aya mamikmar nekapsatai tusar tiarmiayi. Nin sumamtikiatniun wakeri-armiayi.

Nuyá Jesus tsuntsumá ni uwejéǵaj nunká áarmiayi.

<sup>7</sup> Tura tuke iníam wajaki tímiayi “Ayu, atumǵiǵa tunáa túrichu ákuǵka kayan achik nin emka tukuti” tímiayi.

<sup>8</sup> Tura nuna tǵi, ataksha tsuntsumá nunká áimiayi.

<sup>9</sup> Tura ni chichamen antukar ni enentáin sumamawar úuntnumiǵa júki chikichik chikichik jĩnki wéarmiayi.

Ashí wéarmatai Jesus Nĩnki nuwájǵaj juákmiayi.

<sup>10</sup> Jesussha wajaki aya nuwānak wáiniak tímiayi “¿Ámin súmamtikramainia nusha tuĩn pujuinia. Chikichkisha áwak?” tímiayi.

<sup>11</sup> Niisha “Atsá, Uunta. Chikichkisha atsawai” tímiayi.

Nuyá Jesus tímiayi. “Ayu. Wisha súmamtikiatsjame. Yamaikia weme atakka tunáa túrawaip” tímiayi.

### *Jesus tsáapnia áintsanǵete*

<sup>12</sup> Ataksha Jesus Yusa Uunt Jeen iruntrarun tímiayi “Jū nunkanam Wi tsáapnia áintsan shuara enentáin tsáapniǵaj. Ashí Wijǵaj tsanĩn wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujǵaj wekasattawai.”

<sup>13</sup> Pariséu nuikia tiarmiayi “Ame pēnkerum tau asam támena nu áantrai.”

<sup>14</sup> Jesus tímiayi “Tuyá winiǵaj tura tuĩ weaj nu nékatsrume, tura Wikia nékajai. Tuma asan winia pēnkerun táyatnak tájana nu pēnkeraiti.

<sup>15</sup> Jū nunkanmayǵa aents enentáimmiǵaj enentáimtakrum ti súmamtikrume. Tura Wikia chikichkinkesha súmamtiktusujai.

<sup>16</sup> Tura súmamtikkiunka awajitsuk túrajai. Iis, Wiki shuar túramun pēnkerashit tusan enentáimtsujai antsu winia Apar Winia akuptukua nusha Wijǵaj métek shuar túramun nékawai.

<sup>17</sup> Atumí akupkamurĩin áarmaiti: “Jimiará shuar mai nú chichamnak tákuĩnka nu chicham nekasaiti.”

<sup>18</sup> Wátsek Wisha winia Aparsha mai métek taji. Winia Aparsha akup-tukuiti” tímiayi.

<sup>19</sup> Tutai “¿Ame apasha tuĩ puǵá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.”

<sup>20</sup> Nuna Yusa Uunt Jeen Yusa kuĩtrĩn suinia nuĩ tímiayi. Tuma aiñ sepunam enkeatniun achikcharmiayi ni tsawantrĩ jeachu asamtai.

### *“Wi wéajna nuĩ wéchamniaitrume” tímiayi Jesus*

<sup>21</sup> Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaarjǵiǵaj jakattarme.”

<sup>22</sup> Israer-shuarsha tiarmiayi “Wi wéamunam wéchamniaitrume” tutai, nuĩnka máamatpiash” tiarmiayi.

<sup>23</sup> Nuĩnka Jesus tímiayi “Átumka nunkayǵaitrume antsu Wikia nayaimpin-mayǵitjai. Jū nunkayǵaitrume tura Wikia juǵanchuitjai.

24 Tuma asamtai tájarme “Atumi tunaarjijai jakattarme.” Nekas Wi tájana núitjai. Tura nu enentáimtachkurmeka atumi tunaarjijai jakattarme” tímiayi.

25 Niisha aniasarmiayi “¿Amesha yáitiam?”

Jesusha tímiayi “Yaunchu tájarme.

26 Nu arantcha atumin súmamtikiatjarum tusan ti tímínaitjai. Winia Apar akuptukua nuka tuke nekas nuna tawai. Tura aya ni taman antukan ashí shuaran nunak tajai” tímiayi.

27 Tuma ain ni Aparin áujmatman penké nekaacharmiayi.

28 Tuma asamtai tímiayi “Aents Ajasuitjiana ju, numiniam ajinruarum yakí takuriakrumin nújainkia nekarattarme. Wi tájana núitjai tura winia enentáirjain takatsuk aya winia Apar unuiturmanak tájai.

29 Winia akuptukua nuka tuke Wíjiajn pujawai. Winia Apar wakeramun tuke shiir túrakui ikiurkichuiti” tímiayi.

30 Tutai untsurí shuar Nin nekas enentáimtusarmiayi.

### *Yus-shuarsha tura tunaanum emetamusha*

31 Israer-shuaran Nin shiir enentáimtusarmia nuna Jesus tímiayi “Wi tájarmena nu yawetsuk túrakrumka nekas winia unuiniamur átarume.

32 Nújajsha timiá nekas ana nu nekaattarme tura nekas ankant ajastatrume” tímiayi.

33 Niisha tiarmiayi “Iisha Apraám weeitji. Chikicha takarniur átai tusar penké emetachmaitji. ¿Urukamtai “Ankant ajastatrume” tame?” tiarmiayi.

34 Jesus tímiayi “Timiá nekasaiti, ashí shuar tunaan túruinia nuka nu tunaajai emetamuiti. Tuma asa takarniua núnisan ajasuiti.

35 Takarniusha ajapnamnia asamtai Yus atumin ajapramamniaitrume. Tura Akupniu Uchirinkia ni Aparijjai tuke pujawai.

36 Tuma asamtai Akupniu Uchirí ankant awajtamsamtainkia imiá nekas ankant pujustatrume.

37 Átum Apraám weeittrume nékajai. Túmaitiatrum winia chichamur ántachu asarum mantuataj tárume.

38 Winia Apar iniaktursamun áujmatjai. Átumka atumí uuntri timia túrarme” tímiayi.

39 Tutai niisha tiarmiayi “Iikia Israer-shuar asakrin ii úntrinikia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeka níya núnis túrawaintrume.

40 Nekas ana nuna Yus iniaktursamtai nuna ujakjarme, tuma ain mantuataj tarume. Apraámka nuní túrachmiayi.

41 Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumiá akiiniachuitji. Ii uuntri Yúskete. Niisha ii Aparinti.”

42 Tura Jesus tímiayi “Yus nekas atumi Aparintkiuinikia Winiasha anentíntrume Yúnumiá tau asamtai. Wisha winia enentáimmiarjai jui táchaitjai antsu Yus akuptukuiti.

43 ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume.

44 Atumí aparinkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana

nunasha nakitiawai tuke wáitrin asa. Wáitraksha níiniunak chichaawai. Iis, waitia uuntrj asa tuke wáitriniaiti.

<sup>45</sup> Tura Wikia nekas takui átum enentáimturtsurme.

<sup>46</sup> ¿Yaki chikichkí tunaajají súmamtikruammiait? Nuikia Wi nekas nuna tau aisha ¿urukamtai enentáimturtsuram?

<sup>47</sup> Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

### *Apraám akiintsajin Jesus pujumiayi*

<sup>48</sup> Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch ániawai nusha. Nu arantcha iwianchrukuitme amesha” nekas taji” tiarmiayi.

<sup>49</sup> Jesussha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauuch chichartarme.

<sup>50</sup> Wikia “shiir enentáimturati” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun penkerashit tusa nekaattawai.

<sup>51</sup> Ti nekasaiti. Wi tájana nuna enentáimta nú shuarka penké jákashtiniaiti” tímiayi.

<sup>52</sup> Nuinkia Israer-shuar tiarmiayi “Pai, yamaikia ti paant iwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka penké jákashtiniaiti” tátsumek tiarmiayi.

<sup>53</sup> ¿Nuinkia ii uuntrj Apraám nankaamaskaitiam. Niisha tura Yúsnan etserniusha jákacharuk áinia. Itiurak imiá nankaamantu enentáimtumam?” tiarmiayi.

<sup>54</sup> Jesussha tímiayi “Wiki shiir enentáimtumaknaka penké áantrai. Antsu Winia shiir enentáimturna nu winia Aparuiti. Nusha átumka “winia Yúsruiiti” tárumna núiti.

<sup>55</sup> Nusha táyatrum Nin nékatsrume. Wikia Nin nékajai. “Nin nékatsjai” tákunka atumjají métek wáitrin áintjai. Tura Nin neka asan Nii tana nuna tuke túriniaitjai.

<sup>56</sup> Apraámka, atumí uuntrj, imiá yaunchu jákaitiat Wi ju nunkanam tátinian wararas nákasmiayi. Tura wáitiak tí shiir warartusmiayi” tímiayi.

<sup>57</sup> Nuyá Israer-shuar Jesusan tiarmiayi “Warí, senkuenta (50) uwí takakt-sume túmaitiatam Apraáman wáinkiamjai tame.”

<sup>58</sup> Jesussha tímiayi “Ti nekas tájarme, Apraámka pujatsajin Wikia pujajai” tímiayi Jesus.

<sup>59</sup> Nuna takui kayan achikiar “Jesusan tukutai” tiarmiayi. Tura Jesus úumak ni matsatmanum ajapénin weak Yusa Uunt Jejenia jinki wémiayi.

## 9

### *Kusuru akiinian Jesus tsuármiania nu*

<sup>1</sup> Jesus ni unuiniamurjijai wesa áishmankan kusuru akiinian wáinkiamiayi.

<sup>2</sup> Ni unuiniamurjisha aniasarmiayi “Uunta, jusha ¿urukamtai kusuru akiiniawit. Yana tunaarjijajin kusuru akiiniait. Niiniujajimpiash, apariniujajimpiash túrunawit?” tiarmiayi.

<sup>3</sup> Jesus tímiayi “Ni tunaarjijajinchusha ni apariniujajinchusha túrunaiti. Antsu Yus ni ayashin túratniua nu paant atí tusa túrunaiti.

<sup>4</sup> Tsawajikia takastiniaiti. Yamaikia Winia akuptukua nuna takatrin túratniuitjai. Kashi ajasmatai takastin atsuttawai.

<sup>5</sup> Jú nunkanam pujakun shuara enentáin tsáapnimitkratnuijtai” tímiayi.

<sup>6</sup> Nuna chichas nunká usukmi nun<sup>u</sup>kajai pachimiar kusuru j<sup>u</sup>in yakarmiayi.

<sup>7</sup> Nuyá chichaak “Siruí pajamtai entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamar p<sup>u</sup>enker ímiar támiayi.

<sup>8</sup> Nuyá ni írutkamurjsha nuik wáinin ármia nusha tiarmiayi “Juka pujus tuke kúitian seamniuya núchakait.”

<sup>9</sup> Chíkich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura ni<sup>u</sup>ki “Ee, wíitjai” tímiayi.

<sup>10</sup> Tutai aniiniak “¿Itiurak yamaikia ímiam?” tiarmiayi.

<sup>11</sup> Niisha tímiayi “Áishman Jesusa nu tsakusan j<sup>u</sup>irun yakartur “Siruí pajamtai entsanam nijiamauta” turutmiai. Takui wena nijiamaran paant iimpramjai” tímiayi.

<sup>12</sup> Tutai “Nu áishman<sup>u</sup>sha tui<sup>u</sup>n pujá” tiarmiayi.

Niisha “Cha, nékatsjai” tímiayi.

*Pariséu kusuru tsuárman inintrusarmiania nu*

<sup>13</sup> Nuyá kusuru tsuárman Pariséunam júkiarmiayi.

<sup>14</sup> Kame Jesus kusurun tsuarmia nu<sup>u</sup> ayampratin tsawantauyayi.

<sup>15</sup> Tuma asamtai Pariséusha ítiurak ímniun tusan aniasarmiayi.

Niisha tímiayi “J<sup>u</sup>iruin tsakusan yakaarámtai, nijiamaran paant iimjiai.”

<sup>16</sup> Nuyá chíkich Pariséu shuarnumiá nuamtak tunaiyar “J<sup>u</sup>na tsuáruka Yúsaiyanchuiti. Kame ayampratin tsawantai túraití” tiarmiayi.

Tura chikichcha “Tunáa shuaraitkiu<sup>u</sup>in<sup>u</sup>kia j<sup>u</sup>nisan<sup>u</sup> túratniun tujinkia<sup>u</sup>yai” tiarmiayi. Nujai akannaikiarmiayi.

<sup>17</sup> Tsuármancha ataksha aniasarmiayi “Ámin tsuármarua nu ¿warí enentáimtam?” tiarmiayi.

Tutai “Wikia “Yúsnan etserniuiti” tajai” tímiayi.

<sup>18</sup> Tura Israer-shuar nekas kusuruitiat yamá ímiui tu enentáimtuscharmiayi Pariseu. Tuma ásar ni aparíncha untsukar

<sup>19</sup> inintrusarmiayi “¿Ame uchiram kusuru akiinia tárumna nukait. Itiurak yamaikia iimia?” tiarmiayi.

<sup>20</sup> Ni aparísha tiarmiayi “Ii uchirín<sup>u</sup>kia kusuru akiiniama nu nékaji.

<sup>21</sup> Tura iisha nékatsji itiurak yamaikia iimia. ¿Yátsuk p<sup>u</sup>enker tsuáruit? Niisha úuntchakait, nii anistarum. Ni<sup>u</sup>ki ujatmakarti” tiarmiayi.

<sup>22</sup> Sapijmiak tiarmiayi. Israer-shuara úuntri<sup>u</sup>nkia “Jesus Yus akupkamu asa nekas Krístuiti” tuinia núnaka Israer-shuara íruntainmayá j<sup>u</sup>iki akupnakti tiniu ásarmatai tsuarma aparí ashamkarmiayi.

<sup>23</sup> Nu asamtai ni aparí “Niisha úuntchakait, nii anistarum” tiarmiayi.

<sup>24</sup> Nuin<sup>u</sup>kia Israer-shuara uuntri<sup>u</sup> kusuru tsuárman ataksha untsuk tiarmiayi “Yus ímmianum nekasa nu titiá, j<sup>u</sup> áishman<sup>u</sup>kka tunaarinniuiti nékaji” tiarmiayi.

<sup>25</sup> Tutai tímiayi “Kame tunaarinchashit. Nékatsjai. Antsu junak nékajai. Yaunchu kusuruitiatan yamaikia ím<sup>u</sup>jiai.”

<sup>26</sup> Ataksha aniiniak “¿Itiurtámkama. Itiur ímtikrammia?” tiarmiayi.

<sup>27</sup> Niisha tímiayi “Yaunchu tájar<sup>u</sup>me tura anturtatsrume. ¿Urukamtai ataksha titi tusa wakerarum. Niiniu ajastin enentáimprurmek?” tímiayi.

<sup>28</sup> Nuiñkia katsekkar “Ámeke ní shuarinme. Tura iikia Muisaisa shuarintji, tiarmiayi.

<sup>29</sup> Yus Muisaisan akupkaiti iikia nékaji antsu nu áishman nékatsji. ¿Tuyantskait?” tiarmiayi.

<sup>30</sup> Áishman tsuarma tímiayi “¿Ausha itiurtsuk áminiait? Winia ímtikurma nu átumka nékatsrume tuyankit.

<sup>31</sup> Paant nékaji tunaarinnun Yus anturtsui. Tikishmatar ni wakeramun túruinia nunak anturui.

<sup>32</sup> Yáunchusha kusuru akiinian tsuáruka tuke atsuwaiti.

<sup>33</sup> Ju áishman Yúsaiyanchuitkiunka penké túrachaayi” tímiayi.

<sup>34</sup> Nuiñkia tiarmiayi “Ámeke tunaarintin akiiniaiatmesha ¿in jintintin átaj tamek?” Nuna tiar jiki awemarmiayi.

### *Wakanjin kusurua nu*

<sup>35</sup> Kusuru tsuarman jiki awemarma nuna Jesus nekaamiayi. Tura wáiniak “Yusa Uchirja nu enentáimtamek” tímiayi.

<sup>36</sup> Tsuarma tímiayi “Uunta, turuttia wisha nekaan enentáimtustaj.”

<sup>37</sup> Jesussha tímiayi “Wainme. Wiitjai ámijiai chichaaajna nu.”

<sup>38</sup> Tutai, tikishmatar “Uunta, enentáimtajme” Jesusan tímiayi.

<sup>39</sup> Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru ain iimtikinian tura ananmamuk “Yusnan nekaan paant iimjai” tana nuna ukusturtinian táwitjai” tímiayi.

<sup>40</sup> Tutai Pariséu shuar nui pujuarmia nu nuna antukar “¿Nuiñkia iikia kusurukaitaj?” tiarmiayi.

<sup>41</sup> Jesussha tímiayi “Átum kusurutkiurmeka atumí tunaari wáinchakrum sumamachu áintrume. Tura “paant iimjai” tau asarum sumamaitrume” tímiayi.

## 10

### *Iikia murikiua áintsar aji*

<sup>1</sup> Jesus tímiayi “Wi tájana nu ti nekasaiti. Shuar murikiun takakna nu ni murikrin wenuimiunam kashi ikiuawai. Tura murik wenuimiunam pujuiniakuí yajauch shuar murikiun kasamkatniun wakerakka wáitiniam wayachmin asa tanishnum waruk yajá wayawainti.

<sup>2</sup> Antsu murikiu wáinniuka wáitiniam wayawai.

<sup>3</sup> Waiti wáinniuka nekas murikiun wáinniun wáitin uratui. Muriksha ni wáinniuri chichamen nékainiawai. Niisha ashí ni murikrin chikichik chikichik náarjin anaitius untsúawai. Tura tsawakia ni murikrin jiki ayurtainiam yarumui.

<sup>4</sup> Tura ashí ni murikrin jir émtuki wéawai. Muriksha ni chichamen ántuniak untsuam nemarainiawai.

<sup>5</sup> Chikich shuárnaka nékachu ásar nemarainiatsui. Antsu ni chichamen nékainiachu ásar pisainiawai.”

<sup>6</sup> Nu métek-taku chichamnaka Jesus áujmatsamiayi tura shuar antukar nekaacharmiayi.

### *Pénker wáinniuka Jesusaiti*

<sup>7</sup> Nuyá Jesus tímiayi “Ti nekasan tájarme. Wenuimiu wáitiri murik wainia nuka Wiitjai. Shuarsha murikiu áintsar Winí wayamin ániawai.

<sup>8</sup> Wi táatsa<sub>in</sub> ashí táaruka kasa ániak winia shuarun kasamkatai tusa wake-riarmiayi. Tura winia murikiur Wíi shuar ániak nu shuaran anturkacharmiayi.

<sup>9</sup> Wikia wáititjai. Ashí Winin waya<sub>a</sub>ka uwemprattawai. Tura murikiua áintsan wenuimiummayá jiinki pé<sub>n</sub>ker yurumáttawai tura atak wayá ayamprattawai' tímiayi.

<sup>10</sup> 'Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai.

<sup>11</sup> Wikia pé<sub>n</sub>ker wáinniuitjai. Pé<sub>n</sub>ker wáinniuka ni murikr<sub>n</sub> uwentikrartaj tusa jakattawai.

<sup>12</sup> Antsu aya kuitjai takauka ni murikr<sub>n</sub>chu ániakui tura nekas wáinniuchu asa pé<sub>n</sub>ker wáintsui. Kame uunt yawá winiakui murikiun ikiuki pisaawai. Uunt yawásha murikiun achik tsakin<sub>n</sub>mawai.

<sup>13</sup> Nu shuarsha akikiam takáa asa murikiun enentáim<sub>t</sub>sui. Nu asamtai aya pisaawai' tímiayi.

<sup>14-15</sup> 'Wikia pé<sub>n</sub>ker wáinniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwentikrataj tusan jakattajai.

<sup>16</sup> Chíkich muriknasha takakjai. Nusha ju wenuimiummayan<sub>n</sub>chu áiniawai. Nunasha itiattajai. Nu muriksha Winia umirtukar ashí métek matsamsar chikichik wenuimiummayá ajasartatui tura chikichik wáinin átatui' tímiayi.

<sup>17</sup> 'Winia murikrun uwentikrataj tusan jakattajai turan atak nantaktiatjai. Nu asamtai winia Apar anentui.

<sup>18</sup> Wi wakerakun jakattajai. Wi wakerachku<sub>n</sub>kia chíkichkia mantuachminiaiti. Jákatniuncha tura nantaktinniasha winia Apar surusuiti" tímiayi Jesus.

<sup>19</sup> Israer-shuarsha nuna antukar niisháa enentáim<sub>p</sub>rar kanakiarmiayi.

<sup>20</sup> Untsurí tiarmiayi "¿Urukam<sub>t</sub>ai ántarum wáuruk tausha. Yajauch wakanin takatsuk?"

<sup>21</sup> Tura chikichcha tiarmiayi "¿Yajauch wakantrinniusha núnisan<sub>n</sub> chichasminkiait. Yajauch wakantrinniusha kusurun ímtikramniashit?" tiarmiayi.

### *Israer-shuarka Jesusan nakitiarmiania nu*

<sup>22</sup> Micha nantutin Israer-shuar Jerusaré<sub>n</sub>num namperan najanainiawai. Nu nampernumsha Yusa Uunt Jee atak jeamman enentáim<sub>t</sub>uiniawai.

<sup>23</sup> Jesussha Yusa Uunt Jee áchiniam wekasamiayi Sarum<sub>n</sub>ka wáitirija nu<sub>j</sub>.

<sup>24</sup> Israer-shuarsha Nin téntakar tiarmiayi "¿Ame nekas Krístukaitiam? Ju chichamaik etserkata. ¿Urukamtia nekas paant tátsum?" tiarmiayi.

<sup>25</sup> Tutai Jesus tímiayi "Yaunchu tiniu a<sub>n</sub> enentáim<sub>t</sub>urachmarme. Winia Apar akupkamun takaajna nu ti paant awajtawai.

<sup>26</sup> Tura átumka winia murikruchu asarum enentáim<sub>t</sub>urtsurme.

<sup>27</sup> Wisha winia murikrun untsuam anturtuiniak nemartuiniawai. Wisha wínianak mash nékajai.

<sup>28</sup> Tura yamaram iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai ¿yaki jurutkit?

<sup>29</sup> Winia Apar murikiun surusuiti. Niisha ashí nan<sub>n</sub>kaamas kakaram asamtai ¿yaki uwejéyan atankit?

<sup>30</sup> Wisha winia Aparjai iisha aya chikichkiitji" tímiayi Jesus.

<sup>31</sup> Tutai Israer-shuarsha atak kayan achikiar tukutaj tiarmiayi.

32 Jesussha tímiayi “Winia Aparu kakarmarijiai ti untsurj péñkera nuna takasuitjai. ¿Tújajimpia mantuattarum?”

33 Israer-shuarsha Nin tiarmiayi “Péñker túra asakmin máataj tátsuji antsu Yus yajauch chicharkumin túrattaji. Ámeká shuáraitiatam Yusa nuke enentáimtumame” tiarmiayi.

34 Nuyá Jesussha tímiayi “Atumí akupeamurjin Yus timia nu áarmaiti: “Átum yúsaitrume” tawai.

35 Kame Yus-Papinium aarma nu tuke nekaschakait. Tuma asamtai ni chichamen antukarun Yuska “yúsaitrume” takui nuikia ti nekaschakait.

36 Niisha yúsaitkiuinjia nuikia Yus Apa anaikia ju nunkanam akupkamu asan ti nekas Yúschakaitiai. Nujajinjia wi “Yusa Uchirintjai” takui ¿itiurak “Yusan yajauch chicharu” túrutrum?

37 Winia Apar túramu túrachkuinjia enentáimtursairap.

38 Tura nekas túrakuinjia enentáimtursatarum. Tura Winia nakitrakrumsha nuikia wi túramu enentáimtustarum. Nujajinjia winia Apar Winin pujamu ashí nekaattarme. Núnisnak Wisha Njin pujajai. Iisha chikichkiiitji.”

39 Tutai ataksha sepunam enkeatai tiarmiayi. Túrasha Jesus uwempramiayi.

40 Nuyá Jesus Jurtan entsa amain wé yaunchu Juan imiakrattainium pujusmiayi.

41 Ti untsurj shuar iyuwar tiarmiayi “Nekas Juanka aentsti tujintiamun túrachiat ashí Jesusnan tímia nu nekasaiti” tu tiarmiayi.

42 Nujisha untsurj Jesusan enentáimtusarmiayi.

## 11

### *Rásaru jakamu*

1 Petania péprunam áishman, ni naari Rásaru, jaa pujumiayi. Nu péprunam Marí ni kajijai Mártajai pujumiayi.

2 Niisha Rásaru umai árimiayi. Nu Marisha ukunmanjka kunkuinian sumak Jesusan kuer ni intiashújjai japirmiayi.

3 Tura Rásaru jaaku ni umaj Jesusan chichaman akuptuiniak tiarmiayi “Uunta, ame amikrum jaawai.”

4 Jesussha nuna antuk tímiayi “Tuke jakataj tusa jaatsui. Antsu Yusa kakarmarisha tura ni Uchirj kakarmarisha jú sunkur tsuármanum paant atí tusa jaawai.”

5 Jesus Mártancha ni kajincha tura ni umaj Rásaruncha nekas aneemiayi.

6 Túmaitiat Rásaru jaawai taman antukiat ni pujamunam jimiará tsawant pujusmiayi.

7 Nuyá ni unuiniamurjin “Ataksha Jutía nunkanam wetái” tímiayi.

8 Tura ni unuiniamurjsha tiarmiayi “Uunta, nuiksha Israer-shuar kayajai tukurmar mantamatai ticharmaka. ¿Nuj ataksha wétai támek?”

9 Jesussha ju métek-taku chichaman tímiayi “Tsawajikia páantchakait. Tsawaj wekaana nu paant asamtai tukumkashtatui.

10 Tura kashi wekaana nusha kirit asamtai tukumkátawai. Núnisan Wíi tuke pujakun winia takatron takastiniaitjai. Túraknasha itiurchatan wáinkiashtatjai.”

11 Nuyásha Jesus atak tímiayi “Ii amikrj Rásaru kanarai. Wi ishintiartatjai.”

12 Tutai ni unuiniamurj tiarmiayi “Uunta, aya kanarka nuinjia péñker ajastatui.”

13 Jesuska Rásaru jakamu nékayat “kanarai” tímiayi. Tura ni unuiniamurj Rásaru kajinmakua áintsan kanarai enentáimprarmiayi.

14 Jesus nuikia ti paant tímiayi “Rásaru yamaikia jakayi.

15 Tura nuj pujuscha asan kúntuts pujatsjai. Jean túrattajna nu íisrum ti nekas enentáimtursattarme. Nuna nekaan shiir enentáimjai. Wátsek, iyutai.”

16 Nuyá Jimiampramu Tumas chíkich unuiniamurj nuj armia nuna “Ísha weri Niijjai métek jakatai” tímiayi.

*Iwiaaku átinniasha jaka nantaktinniasha Jesus nérenniuiti*

17 Nuj taa, Rásaru kuartru tsawant ikusman wáinkiamiayi.

18 Petania pépruka Jerusarénumiā menaintiú kirumitru áinis tíjiuchiiti.

19 Tuma asamtai untsurj Israer-shuar Mártaasha Marísha, ni umaj jakamtai uutkui atsankrataj tusa weriarmiayi.

20 Mártaasha Jesus tíjiuch ajasun nekáa inkiuntajtsa wémiayi. Antsu Marikia jeá pujumiayi.

21 Tura Marta Jesusan inkiun tímiayi “Uunta, Ame pujakminkia winia umar jákachaayi.

22 Tura tuke nékajai ashí Yus seamna nuna súrarmi.”

23 Jesussha tímiayi “Ame umaimisha nantaktiatui.”

24 Mártaasha tímiayi “Nekas, ashí amuamunam jákaru nantaktin tsawantaj nantaktiatui. Nuna nékajai.”

25 Nuyá Jesus tímiayi “Iwiaaku átinia nérentin asan Wikia iniantkartinaiitjai. Winia enentáimturna nuka jakasha nantaktiatui.

26 Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtamek?”

27 Niisha “Ee, Uunta, ame Yusa Uchirínme. Krístuitme, uwentikkiartin jú nunkanam tátinia nu” tímiayi.

*Jesus Rásaru iwiansamunam taa útmiania nu*

28 Mártaasha nuna tí, ni kaj Marin untsuk úukan tímiayi “Uunt juí taa untsurmawai.”

29 Marisha nuna antuk wárik wajaki Jesusa iyuttsa wémiayi.

30 Jesussha péprunam jeatsuk Marta inkiunmanum pujumiayi.

31 Marí wari wajaki wématai Israer-shuar nu jeanam atsankrattsa pujuiniasha nuna íisar weriarmiayi. Iwiansamunam úuttiasa wéatsush tusa weriarmiayi.

32 Marisha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

33 Jesussha Maríncha tura niijjai úutuncha wáiniak wáitnentaimta asa ti kúntuts pujusmiayi.

34 Tura “Tuj iwiansamarum” tímiayi.

Niisha “Uunta, iitia” tiarmiayi.

35 Jesussha útmiai.

36 Israer-shuarsha “Ti aneatsuk” tiarmiayi.

37 Tura chíkich “Kusuru tsuáruchukait. Nii pujakuisha Rásaru jákaampiash” tiarmiayi.

*Rásaru iniantkimiu*

38 Jesussha ti kuntuts enentáimiar iwiansamunam weankámiayi. Náinnium asa paka taurma áuyayi. Tura kaya atutkamuyayi.

39 Tura Jesus “Kaya jurustarum” tímiayi.



Rásaru umaj Marta tímiayi “Uunta, kuaru tsawant jákaiti. Mejeatsuk’ tímiayi.

40 Tura Jesus tímiayi “Yus enentáimtakmeke Yusa kakarmari wáinkiatame tíchamkajam.”

41 Nuikia kayariñ uratiarmatai Jesus nayaimpin iis tímiayi “Aparu, Winia anturtakmin yumiñsajme.

42 Winiasha tuke anturtame tura ju shuaran péñker enentáimtikrataj tusan tajai. Ame akuptukuitmena nuna nekarmawarti.”

43 Nuna tinia kakaram untsuak “Rásaru jíinkitia” tímiayi.

44 Nujaiñkia penuarmartiuk jíinkimiayi. Yapinmasha jaanchjiai ijia-muyayi. Tura Jesus “Atirtarum. Wéti” tímiayi.

*Jesusan achiktin chichaman jurusarmiania nu  
(Mateu 26.1-5; Márkus 14.1-2; Rúkas 22.1-2)*

45 Untsurí Israer-shuar Marin nemariaru Jesus túramun íisar enentáimtusarmiayi.

46 Tura chikichkia Pariséunam wear Jesus túramun ujakarmiayi.

47 Nuna antukar Pariséusha Israer-patri úuntriñsha ashí naamka uunt armia nujai iruntrar tiarmiayi “¿Wari iturkamniait? Nu shuarka aentsti tujintia-mun ti túratsuk.

48 Aya júnik iniaiyakrinkia ashí shuar Nin enentáimtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emesartatui.”

49 Nu uwitin Kaipias Israer-patri uuntriñyayi. Niisha tímiayi “Átumka nékatsrume.

50 ¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” tímiayi.

51 Kaipiaska aya ni enentáimmiyajaiñ tíchamiayi. Antsu nu uwitin Israer-patri uuntri asamtai Yus nuna enentáimtikramiayi. Nújaiñkia Israer-shuar Jesus jaruktinian ujakmiayi.

52 Tura aya Israer-shuarnakcha antsu niijiañsha ashí nunkanam Yus-shuar ajasarun irurtajtsa jákatniuyi.

53 Tuma asamtai nu tsawantiniñ Israer-shuara uuntri Jesus máatai tusar áujmatsarmiayi.

54 Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jíinki atsamu nunkanam Eprain pepu tijiuch wémiayi. Tura nuj pujusmiayi ni unuiniamurjijai.

55 Israer-shuara namperi paskua ishichik jatemsamtai untsurí shuar yajá péprunmaya Jerusaréñnum káunkarmiayi. Kame paskua jeatsaiñ Muisais timia núnisañ ni ayashísha enentáisha iwiarnarat tusa wakeriarmiayi.

56 Jesusnasha eak yujarmiayi. Tura Yusa Uunt Jeen pujusar nuamtak aniniaisar “¿Wari enentáimiam. Jístanam tatimpiash?” tiarmiayi.

57 Pariséusha Israer-patri uuntriñsha akupainiak “Jesus pujá nekaamka ujakkata” tiarmiayi. Jesusan sepunam enkeatai tusar tiarmiayi.

## 12

*Mari Jesusan kunkuinian kuérmania nu  
(Mateu 26.6-13; Márkus 14.3-9)*

<sup>1</sup> Paskua jísat jeatin sais tsawant ajasmatai Jesus Petania péprunam wémiayi. Jesus jakamunmaya iniantkímia nú Rásaru nuin pujumiayi.

<sup>2</sup> Jesus jeamtaí ayurawarmiayi. Rásarusha níijjají yurumámiayi. Mártasha yurumkan iwiasmakmiayi.

<sup>3</sup> Tura Marikia kuñkuinian ti kuitjají ritru ajapén sumak itiamiayi. Tura Jesusa nawen kuer ní intiashíjjají japirmiayi. Jeasha nu kuñkuinjají ti shiir kuñkunmiayi.

<sup>4</sup> Jútas Iskariúti, Semunka uchirí, nuí pujumiayi. Niisha Jesusa unuiniamurjintiat ukunam Jesusan surukmiayi máawarat tusa. Niisha tímiayi

<sup>5</sup> “¿Urukamtaí nu kuñkuinian ti kuitjají surukchama kuítrincham súsatniun?”

<sup>6</sup> Kame kuítrincham enentáimtak tíchamiayi. Antsu unuiniamu kuítrin waínkaí asa yúpíchuch kasamkamniuyayi. Tuma asa nuna tímiayi.

<sup>7</sup> Tura Jesus tímiayi “Iniaisata. Wí iwíarnakui kuératniun sumak ikiurtusuíti.

<sup>8</sup> Kuitrincha tuke atumjají íruntsuk. Antsu Wikia atumjají tuke pujuschattajai” tímiayi.

### *Rásaruncha máataj tiarmiania nu*

<sup>9</sup> Israer-shuarsha Jesus Petania péprunam pujan antukar Jesus ístaitсар weriarmiayi. Rásaruncha Jesus jakamunmaya iniantkímia nusha iyutai tusar wearmiayi.

<sup>10</sup> Túramtaí Israer-patri uuntriní kía chichaman jurusarmiayi Rásaru maatai tusar.

<sup>11</sup> Untsurí Israer-shuar Rásaru iniantkímia nekaawar Israer-patrin ikiukiar Jesusan enentáimtusarmiayi. Túrawarmataí Rásaruncha máatniun wakerukarmiayi.

### *Jesus Jerusarénum shiir wayamiania nu*

*(Mateu 21.1-11; Márkus 11.1-11; Rúkas 19.28-40)*

<sup>12</sup> Paskua namperan pachíintiuktajtsa ti untsurí shuar Jerusarénum wearmiayi. Kashin tsawar Jesus nú peprunam tátiniam nekaawarmiayi.

<sup>13</sup> Niisha tintiuki nuké áinis nukan júurar Jesusan inkiuntai tusar jíinkiarimiayi. Túrawar untsumainiak “Shiir tati, tiarmiayi. Yusa kakarmarjijají winiana nu tí péñkeraiti. Israer-shuara uuntri asa shiir atí” tu untsumiarmiayi.

<sup>14</sup> Jesussha umpuurun wáiniak entsamkamai. Núnisañ áarmaiti Yus-Chichamnum:

<sup>15</sup> “Seuñ péprunmaya shuara, ashamkairap. Atumí Akupniuri umpuurunam entsamak winiawai.”

<sup>16</sup> Nu chichamaik Jesusa unuiniamuri nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusa aarma núnisañ túrunamiayi.

<sup>17</sup> Jesus Rásarun iwíarsamunmaya iniantkímia wáinkiarua nú shuar nuna áujmatiarmiayi.

<sup>18</sup> Tuma asamtaí shuar Jesus nu tujintiamun túramtaí nekaawar Jesusan inkiunktaj tusar jíinkiarimiayi.

<sup>19</sup> Tura Paríséusha nuamtak tiarmiayi “Íis, péñké tujinkiaji. Maa iista, ashí shuar Nin nemarainiatsuk.”

### *Kriaku apach Jesusjají chichastinian wakeriarmiania nu*

<sup>20</sup> Paskua nampernum Yus shiir awajsatniun Jerusarénum weriaruka untsurí nunkanmaya shuar árimiayi. Kriaku apachcha árimiayi.

21 Niisha Jiripin weantukarmiayi. Kame nu Jiripi Petsaitia péprunmayayuyai. Petsaitia péprusha Kariréa nunkanam awai. Nincha Kriaku apach seainiak “Uunta, Jesusjaj chichastaitsar wakeraji” tiarmiayi.

22 Jiripisha Antresan weri ujakmiayi. Nuyá niijjai métek tsaninikar Jesu-san weriar ujakarmiayi.

23 Jesussha tímiayi “Wi Aents Ajasuitjiana ju tsawantur jeayi. Túramtai shiir awájnástajai.

24 Wi tájana nu ti nekasaiti. Jinkiaia ántsanketjai. Araachmaka ninki pujatsuk. Antsu araamka tsapain jinkiaichiri kaushmariat nerek ti untsurí ajatsuk. Núnisnak Wi jakamtai ti untsurí shuar yamaram iwiaakman takusartatui.

25 Shuarsha jinkiaia nuke aya ju nunkanam pénger pujustinian enentáimkiunka ántar pujak nekas iwiaakmarin emenkaktatui. Tura ju nunkanam pénger pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui.

26 Shuar winia átaj takunka nemartusti. Túranka Wi pujajna nuí Wíi shuar tuke átatui. Núnisaj Wíi shuar winia takatrun takáa nuna winia Aparsha shiir enentáimtustatui’ tímiayi.

### *Jesus ni jákatniun étserei*

27 Yamaikia enentáiruí ti itiurchat pujajai. ¿Warittiajak. “Aparu, ju túrunatniunmayá uwentikrurta” titiajash? Antsu ju túrunatniun táwitjai.

28 Aparu, wi túramujai ashí shuar ame náarmin shiir enentáimturarti” tímiayi Jesus.

Tutai nayaimpinmayá chichaman antukarmiayi. “Winia náarun shiir awajsaitjai tura ataksha shiir awajsattajai” tímiayi.

29 Shuarsha nui pujuinia “ipiamtachuashit” tiarmiayi. Tura chikichcha “Nayaimpinmayá suntar Nin chichasai” tiarmiayi.

30 Jesussha tímiayi “Wi antuktinian chichaschayi antsu átum nekaatarum tusa chichasai.

31 Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai.

32 Tura numiniam awajnaintai ashí nunkanmayanaka shuar enentáimturartatui” tímiayi.

33 Juna taku krúsum jákatniun ujakmiayi.

34 Shuarsha awajirar tiarmiayi “Yaunchu Yus akupkamu papiniumiá áujsar nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awajnaitniuiti” tame? Aents Ajasuka Krístuchukait, Yus anaikiamu. Núchaitkiuinikia Aents Ajasuka yait?” tiarmiayi.

35 Nuinkia Jesus tímiayi “Wi tsáapninia ántsanketjai. Tsáapnisha atumín aya ishichik tsawantin tsáapniartatui. Tsáapin ana juik wekasatarum kirit ajatsaj. Kame kiritniunam wekaana nusha nékatsui itiuaranimpia wea.

36 Tsáapnin wáinkuram nin enentáimtustarum. Túrakrum winia tsáapnintrui wekasattarme.” Jesussha nuna tí wémiayi uumak pujustaj tusa.

### *Untsurí Israer-shuar Jesusan enentáimtuscharmiania nu*

37 Jesus aentsti tujintiamun ti untsurí túramtaisha Nin enentáimtuscharmiai.

38 Yúsnan etserin Isayas yaunchu aarma uminkiatniuyi: “Uunta, ¿ya ii ujam antukuit. Yusa kakarmarisha yana iniaktusuit?” tu áarmaiti.

<sup>39</sup> Nuna uminiak Jesusan enentáimtuscharmiayi. Tura nu arantcha Isayas áarmiayi:

<sup>40</sup> “Yus nin kusuru awajsaiti tura ni enentáincha kátsuram awajsaiti. Ni jijijai íimsain tusa tura ni enentájijai nekaawain tusa túraiti. Kame ni tunaari iisar enentáimtuiniakui Yus nin tsuárainti” tu áarmaiti.

<sup>41</sup> Isayas yaunchu Jesusan nayaimpiniam ti shiir pujan wáiniak nuna tímiayi.

<sup>42</sup> Tuma ain untsuri Israer-shuarsha tura ni uuntrinmayasha Jesusan nekas enentáimtusarmiayi. Tura niisha Paríséun ashamainiak paant tícharmiayi. Israer-shuara iruntairya jiki awetamaj tusa ashammiarmiayi.

<sup>43</sup> Yus shiir enentáimtursati tutsuk antsu shuar shiir enentáimtursati tusar túrawarmiyai.

*Shuaran sumantikiatniun táchaitjai antsu uwemtikratniun táwitjai, timiania nu*

<sup>44</sup> Jesus kakantar untsumuk tímiayi “Winia enentáimturuk aya Winiak enentáimurtsui antsu winia Aparun Winia akuptukua nunasha enentáimtawai.

<sup>45</sup> Winia wáitkiusha Winia Aparnasha wáinui.

<sup>46</sup> Wikia tsáapnin asan Winia enentáimturainia nuka kiritniunam wekasain tusan ju nunkanam táwitjai.

<sup>47</sup> Shuáran sumantikiatniun táchaitjai antsu uwemtikratniun táwitjai. Tuma asamtai shuar winia chichamprun antuk umíachkunka sumamaiti. Tura Wikia sumantikiachuitjai.

<sup>48</sup> Winia nakitrur chichampruncha enentáimtachuka sumamtikiamuiti. Wi timiaj nuka amuukatin tsawantaj nin sumantikiattawai.

<sup>49</sup> Wi enentáimmiaain chichaatsjai. Winia Apar akattur akuptukuiti. Tura chichastinia nuna surusuiti.

<sup>50</sup> Wisha nékajai, ashí winia Apar akupeamuka yamaram iwiaakman tuke amuukashtinian súawai. Tuma asamtai winia Apar túrutmia núnisnak tajai” tímiayi Jesus.

## 13

*Jesus ni unuiniamuri nawen nijiatramiania nu*

<sup>1</sup> Paskua jísat jeatin chikichík tsawant ajasmatai Jesusa tsawantri jeatemayi. Túramtai ju nunkan ikiuki ni Aparin wétiniuyi. Jesussha nuna nekaamiayi. Ashí Níiniun ju nunkanam pujuinian tuke anea asa amúamunmasha yapajitsuk tuke aneemiayi.

<sup>2</sup> Nu tsawantajsha murikiun yúatin ármiai. Tura yurumátin jeatsain, uunt iwianch Semunka uchiri Jútas Iskariúti enentáin Jesusan surukat tusa enentáimtikramiyai.

<sup>3</sup> Tura Jesus Yúsajya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa

<sup>4</sup> chíkich yurumuk pujuiniaij wajakmiayi. Tura pushirin ámiak awankéman emenmamamiayi.

<sup>5</sup> Nuyá nijiaamatainiam entsan yará ni unuiniamuri nawen nijiatramiyai. Tura awankémaj japirmiyai.

<sup>6</sup> Semun Pítrunam jeamtai Pítur tímiayi “Uunta, ¿Winia nawer nijiertaj tamek?”

<sup>7</sup> Jesussha tímiayi “Wi túrajna nu yamáí nékatsme tura ukunam nekaat-tame.”

8 Tura Pítur tímiayi “Peṅké winia nawer niijarchattame.”

Jesussha tímiayi “Wi níjiaachkuĩṅkia Wíjǵǵai tsaniṅkia pujuschamniaitme.”

9 Tutai Semuṅ Pítur tímiayi “Nuĩṅkia, Uunta, aya nawerkechu antsu uwe-  
jrusha tura muukarsha niijatrurta.”

10 Tura Jesus tímiayi “Yamáí mainkia ayashí shiir asamtai aya naweṅiṅ  
nijiamártiniaiti. Atumí enentáin ashí péṅkeraitrume. Túrasha ashí shuarcha”  
tímiayi.

11 Kame Jútas Nin suruktinian nekáa “ashí shuarcha” tímiayi.

12 Jesussha níjiaar umik ni pushirĩn entsarmiayi. Tura atak pujus tímiayi  
“¿Atumsha Wi túrajna nu nekaarmek?”

13 Wi atumí Uuntri asamtai nekas “Uunta” túrutrume. Nusha péṅkeraiti.

14 Tura Jintinniuitiatan tura Úuntaitiatan atumí naweṅ niijarchajak.  
Atumsha núnisrumek nuamtak náwem nijiatnairatarum.

15 Atumín nekapruatsan túramjai. Atumsha núnisrumek túratarum.

16 Ti nekas tajai. Takarniuka ni uuntri nankaamaschaiti. Akupkamusha  
akupea nuna nankaamaschaiti.

17 Nu nekaarum túrakrumka shiir átatrume.

18 Tura tájana nuna ashí tátsujrume. Anaikiaitij núnaka Wi nékajai. Tura  
Yus-Chicham uminkiatniuiti, nékajai. Ju aarmaiti:  
“Wíjǵǵai yurumna nu winia nemasur ajasai.”

19 Nuka túmatsaiṅ ujaajrume. Nuyá túrunamtai Yusa Uchirĩntjai nusha paant  
nekaattarme.

20 Wi tájana nu nekasaiti. Shuar Wi akupeaj nuna shiir itiaakka Winiasha  
shiir itiaarui. Tura Winia shiir itiaarna nusha Winia Akuptukuncha iti-  
aawai” tímiayi.

### *Jesus Jútas Nin suruktinian étserei*

(Mateu 26.20-25; Márkus 14.17-21; Rúkas 22.21-23)

21 Nuna ti, Jesus ni enentáin ti ititurchat enentáimpramiayi. Tura paant  
tímiayi “Nekas tajai, chikichik juṅ atumjai pujana nu Winia surutkattawai.”

22 Tutai ni unuiniamurj nuamtak íniaisar “¿Yanak ta?” tiarmiayi.

23 Chikichik unuiniamurj, Jesus ti aneamu, Niijǵǵai tsaniṅ yurumuk puju-  
miayi.

24 Tuma asamtai Semuṅ Pítur ni uwejéjǵǵai iniakmas “Aniasta, ¿yanak  
áujmata?” tímiayi.

25 Tutai Jesusan áyanmatsan aniasmiayi. “¿Yait, Uunta?” tímiayi.

26 Jesussha ayak “Tantan túumnium ajuṅkan susattaj núiti” tímiayi. Nújǵǵaiṅ  
tantan túumnium ajuṅ Semuṅka uchirĩn Jútas Iskariútin susamiayi.

27 Tura wárik Jútas tantan achikmatai íwianch ni enentáin wayamiayi. Nuyá  
Jesus tímiayi “Túrattamna nu wárik túrata.”

28 Tura ashí nuṅ yurumainiak pujuarmia nusha wariniak ta tusa  
nekaacharmiayi.

29 “Kuĩtrincha kuit súsarta” tátsuash tu enentáimprarmiayi. Tura chi-  
kichcha “nampernum yurumátin atsumajnia nu sumakta” tátsuash, tu  
enentáimprarmiayi. Jútas kuítian wáinin asamtai tu enentáimprarmiayi.

30 Jútas tantan yua kashi ajasmanum jíinkimiayi.

### *Yamaram akupkamu*

31 Jútas jíinkimtai Jesus tímiayi “Wi Aents Ajasu asamtai winia kakarmar  
yamaikia paant átatui. Tura wí túramujǵǵai Yusa kakarmarisha ti paant átatui.

<sup>32</sup> Wi Yusa kakarmarin paant awajeakui Wisha ni Uchirí asamtai winia kakarmarnasha Yuska wárik paant awajsattawai.

<sup>33</sup> Uchichiru, atumjaí ti untsurí tsawant pujuschattajai yamaikia. Wi Israer-shuaran tímiaj nútíksanak atumin tájarme. Atumsha Winia eátkáttarme tura wi wéamunam winishtarume.

<sup>34</sup> Ju yamaram akupeamun amaajai nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniutrume.

<sup>35</sup> Anenaiyakrumninkia nujaj ashí shuar “Kristu unuiniamurí ániawai” túramartatui.

*Pítur Nin natsantratniun Jesus ujakmiania nu  
(Mateu 26.31-35; Márkus 14.27-31; Rúkas 22.33-34)*

<sup>36</sup> Semun Pítur Jesusan aniasmiayi “Uunta, ¿tua wéam?”

Jesussha tímiayi “Wi wéajna nuí yamaikia winichminiaitrume. Tura ukunam winittiarme.”

<sup>37</sup> Nuyá Pítur tímiayi “Uunta, ¿urukamtai yamaikia winichminiaitaj? Ámin yáintajtsan jakataj tajai.”

<sup>38</sup> Jesussha tímiayi “¿Nekasmek táme? Ti nekas tájame, atash shiniatsain Winia menáintiú natsantrurtatme” tímiayi.

## 14

*Jesus Yus-jintiaiti*

<sup>1</sup> “Kúntuts pujusairap. Yus enentáimtustarum, Winiasha enentáimtursatarum.

<sup>2</sup> Winia Aparuí átum pujustin ti ankant awai. Tura nuna iwiarataj tusan Aparuí wéajai, nekasaiti. Nekaschaitkiuinkia ¿jitiurak ujakaajrum?

<sup>3</sup> Tura iwiaaran amukan ataksha tátatjai. Tura tana yaruaktatjarme, wi pujamunam atumsha pujusúk tusan.

<sup>4</sup> Wi wéaj nu nékarme tura jintiasha nékarme” tímiayi Jesus.

<sup>5</sup> Tumas tímiayi “Uunta, Ame weam nu nékatsji. ¿Jintiasha itiuurak nekaat-taj?”

<sup>6</sup> Jesussha tímiayi “Wi nekas jintiaitjai. Wíjiainchu wekaana nuka winia Aparuí jeatniun penké tujintiawai. Tura Wisha tuke nekas tiniu asan nekas ana nuna shuáran nékamtkiajai. Wisha shuáran yamaram iwiaakman tuke amuukashtinian súwitjai.

<sup>7</sup> Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

<sup>8</sup> Nuinkia Jiripisha tímiayi “Uunta, Apasha wáinkiarka maak.”

<sup>9</sup> Jesussha tímiayi “Jiripi, atumjaí ti pujusu aisha ¿tuke nékartsumek? Winia wáitka nuka Winia Aparnasha wáinkiaiti. ¿Itiuurak, nuikia, “Apasha wáinkiarka maak” tame?”

<sup>10</sup> Winia Aparjaí tsaningian pujakun tura winia Aparsha Wíjiaí pujakui tuke chikichítji. ¿Nu nékatsrumek? Wi tájarmena nu Winia chicham-pruchuiti. Yus Apa Winí pujak ni wakeramun takaawai.

<sup>11</sup> Nekaatarum. Wisha winia Aparjaí tsaninkia pujakur nekas chikichítji. “Nu chicham itiuurchataiti” enentáimkiurmeka wi túramu nuikia enentáimpratarum. Wi túramujaí chikichik ájinia nu páantchakait.

12 Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuí wéakui nuna nan̄kaamas tujintiamun túrattawai.

13 Ashí Winia enentáimtursarum seatrumna nuna amastatjai. Nújain̄kia winia Apar shiir awajnatatui.

14 Winia enentáimtursarum seakrumn̄kia ashí túrattajai' tímiayi.

### *Jesus Yusa Wakan̄in akupkattawai*

15 'Atumsha anentkurmeke winia chichamur umiktarum.

16 Tura wéakun winia Aparun chikichan akupturmakti tusan seattajai. Niisha atumjai tuke pujak atsantamprartatui.

17 Nusha Yusa Wakan̄inti. Yus-shuarcha Nin nekaachmin ániawai. Tuma asamtai ni enentáin wayachminiaiti. Antsu átumka atumi enentáin pujakui Nii nékarme. Niisha atumi enentáin tuke pujustatui.

18 Mitiaikia áitkiasnak ikiukchattajrume. Atum̄in atak tátatjai.

19 Ishichik tsawant nan̄kaasmatai chíkich shuar irunna nu wáitkiachartatui. Tura Wi iwiaaku asamtai átumka nu iwiaakmajai pujustatume. Tuma asarum wáitkiattarme.

20 Tura nu tsawantai ju nekaattarme. Wisha winia Aparjai tsan̄nkian pujakur chikichkiitji. Núnisnak Wisha atumjai tsan̄nkian pujajai. Tura atumsha Wijjai tsan̄nkian pujarme.

21 Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wisha nin aneajai tura nekarati tusan iniaktustatjai." Jesus nuna tímiayi.

22 Chíkich Jútas, Iskariútichu, tímiayi "Uunta, ¿urukamtai ashí shuarnum iniaktutskesha aya in iniaktustatam?"

23 Jesus tímiayi "Winia anentuka tájana nuna enentáimtawai. Winia Aparsha nu shuaran aneattawai. Tura Wisha winia Aparnum nu shuarjai tsan̄nkian pujustatjai.

24 Antsu Winia anentchaka tájana nuna enentáimtatsui. Átum ántarmena nú chichamka winiachuiti, antsu Yus Apa Winia akuptukua Núnaiti' tímiayi.

25 'Atumjai tuke pujakun nuna tájarme.

26 Yus Apa ni Shiir Wakan̄in atumin yáinmak atsantamprarat tusa akupturmaktatume. Wi seam túrattawai. Nu Wakancha ashí Wi ujakjarmena nuna atak enentáimtikramprar ashí unuitiamprartatui' tímiayi.

27 'Imiatkinchanum pujustarum. Imiatkinchanum pujajna núnisrumek pujustarum tusan amajai. Jú nun̄kanman̄ka warastin wáinkiashtatume. Antsu itiurchatnum pujayatrunkesha Wijjai imiatkinchanum pujustatume. Ashamtsuk pujustarum. Itiurchat enentáimprairap.

28 Nuik timiaj nu antukmarme. Aparuí wena atak atum̄in tátatjai. Winia Aparka Wijjai nan̄kaamas úntaiti. Tuma asamtai ti nekas anentkurmeke "Aparuí wéajai" takui ashí warasāarme.

29 Nuka túmats̄in̄ ujaajrume. Túrunamtai nuyá Winia enentáimtursattarme" tímiayi.

30 'Jú nun̄kanmayan akupin winiakui atumjai núkap chichaschattajai ya-maikia. Winiaka nupettukchamniaiti.

31 Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái' tímiayi.

## 15

*Numi arakma áintsan̄ketjai*

1 'Winia iwiaakmarun amaakun numi arakma áintsan̄ketjai. Wikia kampuĩntjai atumsha kanawentrum. Winia Aparsha arakan wáiniua núnisaiti.

2 Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa.

3 Wi ujakjarmena nujaj puruarmaitrume.

4 Numí kanawesha kampuĩn áchitkiachkuñka niñki nerechamniaiti. Núnisrumek atumsha Winí áchitkiachkurmeka nerechamniaitrume. Wi atumjaj áchitkij núnisrumek atumsha Winí tuke áchitkia atarum' tímiayi.

5 'Wikia kampuĩntjai atumsha kanawentrum. Kampuĩñkia kanawen áchitkia núnisnak achiakjarme. Tura kanawe ni kampuĩniñ áchitkia núnisrum Winí áchitkia atarum. Túrakrumka núkap nerektatrume. Antsu Wíjjaĩnchuka péñker túratin péñké tujintiarme.

6 Winí áchitkiachuka ajapam kukartatui. Kanawesha kukarmatai shuar irumkar áesawartatui' tímiayi.

7 'Tuke Winí áchitkiaiitkiurmeka tura winia chichamprusha kajinmattsuk emetarmeka átum wakerarmena nu seakrumin amatatjai.

8 Átum núkap nereakrumniñkia ashí shuar "Nekas Jesusa unuiniamurĩnti" túramartatui tura winia Aparnasha shiir awajsartatui.

9 Winia Apar anenna nútíksanak Wisha atumin aneajrume. Winia aneamur tuke atarum.

10 Winia Aparu akupkamurjĩn umiakun tuke ni aneamurjĩntjai. Núnisrumek winia akupkamur umiakrumka tuke winia aneamur átatrume' tímiayi.

11 'Wi waraajna áintsarmek warastarum tusan nuna tájarme. Tura ti shiir warastatrume.

12 Wi akupkamu júiti: "Wi aneajrumna nútíksarmek ashí anenaitiarum."

13 Shuar ni amikrjĩn yáĩntaj tusa jakañka ti aneñkartichukait.

14 Wi akupeamu takaakrumka atumsha winia amikruitrume.

15 Takarniuka ni uuntrj takaana nuna nékatsui. Tuma asamtai "winia takarniuruitrume" tátsujrume. Antsu ashí winia Apar táman ujaku asan "winia amikruitrume" tájarme.

16 Aya atumí enentáimsamurijjajĩn Wíi shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrume. Túrarum péñker túratniuitrume nerektinia áintsarmek. Tura nu nere amuutsuk tuke átiniaiti. Tuma asamtai winia Apar searmena nuna amatatui.

17 Júnaka akupeajrume: Nuamtak mai anenai ajatarum' tímiayi.

*Yus-shuarcha Jesunasha Níiniuncha nakitiainiawai*

18 'Ju nunñkanmayá shuar Winia emka nakitrurar atumniasha nakitramarme.

19 Atumsha ju nunñkanmayá shuaraitkiurminkia niiniua nútíksan anenmaintrume. Antsu Wíi shuar ajastarum tusan ju nunñkanmayá achikmajrume. Túramtai nekas ju nunñkanmayanchuitrume yamaikia. Nu asamtai nu shuar nakitramainiawai.

20 "Takarniuka ni uuntrj nanñkaamaschaiti" tíchamkajrum. Shuar Winia yajauch awajtusaru ásar atumniasha yajauch awajtamartatui. Chikichcha umirtukaru ásar atumniasha umirtamkartatui.



21 Winia Akuptukun nékachu ásar Winia enentáimturkurmin yajauch awaj-tamsartatui' tímiayi.

22 'Wi tana Yus-Chichaman nin ujakchamtaínkia tunaanum sumamacharaayi. Antsu ujakma ásar "Nékachkun túraitjai" tíchamin ániawai.

23 Winia nakitruinia nuka winia Aparnasha nakitiainiawai.

24 Aents penké túrachman túrachuitkiuinikia tunaanum sumamacharainti. Antsu wi túramun wáinkiaru ániayat Winiasha tura winia Aparnasha nakitiainiawai.

25 Yaunchu Yus akupkamunam áarmaiti:

"Penké ántar nakitruirarmai."

Nu chicham uminkiatu tusa túrunaiti' tímiayi.

26 "Tura atsantamprattsa yáinmana nuna winia Aparuiya akuptuktatjarme. Niisha tuke nekas tiniu Wakaniiti. Niisha Yusaiya taa atumin nekamtikramprattarme.

27 Atumsha yaunchu Wijjai pujusu asarum nekamtikiattarme' tímiayi.

## 16

1 'Átum kanartukairum tusan júnaka tájarme.

2 Israer-shuar iruntainiumia jiki akuptamkattarme. Nu arantcha mantamainiaksha "Yúsan shiir awajtsantsan túrajai" tíártatui.

3 Nu shuar Winiasha tura winia Aparnasha nékachu ásar túrutmawartatui.

4 Núnaka yamá tájame. Tura túrunamtai "núnisán átiniaiti" timiaj nu nekaarum itiurchat enentáimprairap' tímiayi.

### *Yusa Wakaní túrana nu*

'Atumjai tuke pujá asan núnaka yaunchu ujakchamajrume.

5 Antsu yamaikia wáketjai winia Akuptukmia nujai pujustaj tusan. Tuma áin wéajna nu ininratsrume.

6 Antsu nuna takui ti kuntuts enentáimprarme.

7 Tura Wi wématai atumjaiínkia nuna nankaamas pénger átatui. Iis, Wi wéaknaka atumin yainmaktinia nuna akupkattajai tura wéachkuínkia táchattawai. Nuka ti nekasaiti.

8 Yusa Wakaní taa ashí jú nunkanmaya aentsun ju menaintiun nekamtikiattawai. Ni tunaari aan nekamtikiattawai. Pénger tunaajainchu wekasamiana nunasha nekamtikiattawai. Tura Yus tunaanum súmamtikiamniana nunasha nekamtikiattawai.

9 Winia enentáimturainiachu tunáarintin ániawai.

10 Winia Aparui wáketkui wáitkiashtatume. Tuma asantai ashí shuar wi pénger tunaajainchu wekaamun nekaawartatui.

11 Tura ju nunkanam akupniunka Yus tunaanum súmamtikia asa shuar-nasha súmamtikiamniaiti. Nuna paant nekaawartatui' tímiayi.

12 'Nu arantcha núkap tíntjarme túrasha átumka nekaachaintrume.

13 Yusa Wakaní ashí nekas tiniu asa ashí nekasa nuna nuuitiamprattarme. Ni enentáimmiajai tíchattawai antsu winia Aparui antukma nuna ujatmaktatui. Ukunam átatna nunasha ujatmaktatui.

14 Ashí Wínian ujatmak Winia shiir awajtustatui.

15 Ashí winia Apar takakna nusha Wíniaiti. Nu asantai "ashí Wínian ujatmaktatui" tajai' tímiayi.

*Kúntuts pujuiniayat ukunam warasartatui*

16 'Ishichik pujusrum Winia wáitkiashtatrumé. Nuyá ataksha ishichik pujusrum ataksha wáitkiattarme. Wisha winia Aparuǐ wéajai" tímiayi.

17 Nuyá ni unuiniamurǐ nuamtak aniniaisarmiayi "ǐjú chichamsha warimpait? "Ishichik pujusrum wáitkiashtatrumé tura ataksha ishichik pujusrum wáitkiattarme tura Aparuǐ wéajai" tátsuk.

18 "Ishichik pujusrum" tana nusha ǐwarimpait? Nii tana nu ántatsji" tiarmiayi.

19 Jesussha nin aniaistai táman nekáa tímiayi "Ishichik pujusrum wáitkiashtatrumé nuyá ataksha ishichik pujusrum wáitkiattarme" tímiajai. ǐNúchakait átum inintrustin wakerarmena nu?

20 Ti nekas tájarme: Átumka kúntuts pujusrum úttiatrumé tura Yushuarcha warásártatui. Tuma aǐnk' átum kúntuts pujayatrume ukunam warastatrumé.

21 ǐis, nuwásha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimtsui.

22 Atumsha núnisrumek yamaik kúntuts pujarme. Tura atak íitjarum tusan winiakui ti shiir atumí enentáin warastatrumé. Nu warastinian jurutram-chikminia áiniawai.'

23 'Nu tsawantinkia penké ininsashtatrumé. Ti nekas tájarme Winia enentáimtursarum winia Apar searum nuna ashí amastatui.

24 Yamaisha Winia enentáimtursarum winia Apar seachurme. Seakrumnǐnkia amastatui ti shiir warasaruk tusa' tímiayi.

### *Jesus jú nunkanmayan nupetkaiti*

25 'Métek-taku chichamjai nakumkan nuna tímiajai. Tura ukunmanǐka nujai chichatsuk winia Aparnan paant ujaktatjarme.

26-27 Nu tsawantai átumka Winia enentáimtursarum winia Apar seattarme. Winia Aparsha atumin anea asantai Wi Nin áujsatin atumashtatrumé. Winia anentu asarum tura winia Aparuǐya taman enentáimtakrumin Niisha anemawai.

28 Winia Aparuǐya jíinkin jú nunkanam táwitjai. Yamaikia jú nunkanmaya jíinkin ataksha Aparuǐ wáketjai" tímiayi.

29 Nuyá ni unuiniamurǐ tiarmiayi "Yamaikia métek-taku chichamjainchu chichaame.

30 Mash nékaitme. Shuar Ámin ininmatsajǐ penker áimkiatin nékame. Nu nekaar Ame nekas Yúsumiaǐtme tu enentáimtaji" tiarmiayi.

31 Tura Jesus tímiayi "ǐNekasash enentáimtarum?

32 Ti warik átumka ashamkarum niisháa tsakinmaktatrumé tura Winiak ikiurkittiarume. Antsu winia Apar pujakui Wiki pujatsjai.

33 Winia enentáimturkuram imiatkinchanum pujusarat tusan tájarme. Jú nunkanam ti wáitsattarme. Tura Wi jú nunkanmayan nupetka asantai warastarum" tímiayi Jesus.

## 17

### *Jesus ni unuiniamurǐn Yúsan áujtawai*

1 Nuna ti Jesus nayaimpinmaanǐ íimias tímiayi "Aparu, yamá jeayi ame Uchiram shiir awajsatin. Núnisajǐ ame Uchirmisha penker awajtamsattawai.

2 Ashí shuara Akupniurǐ najataitme. Nujainǐkia Winia surusumna nú shuaran yamaram iwiaakman tuke amuukashtinian súsaitjai.

<sup>3</sup> Aparu, chíkich atsawai. Amek nekas Yúsaitme. Wisha Jesuskrístuitjai Ame akuptukmamna nu. Nu asamtai ashí shuar nuna enentáimtak yamaram iwiaakman tuke amuukashтинian takakui.'

<sup>4</sup> 'Ashí túratniun akuptukmamna nuna amukuitjai. Túran jú nunkanam shiir awajsaitjame.

<sup>5</sup> Nuna túramtai, Aparu, ti yaunchu jú nunka atsaisha Ámijijai pujaku shiir awajtusmamna núnismek yamaisha shiir awajtusta.'

<sup>6</sup> 'Ashí jú nunkanmaya surusmamna nú shuaran Ámin nekamtikiamjai. Áminiu áiniakui surusmame. Niisha ame chichammin umirtámkaruiti.

<sup>7</sup> Ashí Wi takaajna nu Amek surusuitme. Niisha nuna nékainiawai.

<sup>8</sup> Ame chichamem surusmam nuna ujakam niisha umirtámkaruiti. Ame akuptukakmin Amiiníya táwitjai. Nu nekasaiti tu enentáimtuiniawai.'

<sup>9</sup> 'Nin yainkiarta tusan seajme. Jú nunkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme.

<sup>10</sup> Ashí Winia ainia nuka Áminiuiti. Tura ashí Áminiu ainia nuka Winia áiniawai. Winia péñkerusha ni túramunam paant awajsaiti.'

<sup>11</sup> 'Wikia yamaikia jú nunkanam pujuschattajai. Tura nu shuarka jú pjuuartatui. Antsu Ámijijai pujustajtsan winiakui ashí surusumna nuka, Aparu, ti shiir asam ame kakarmarmijijai wáinkia. Wisha Ámijijai chikichik ájinia núnisan niisha ashí iruntrar chikichik ajasarti.

<sup>12</sup> Jú niijijai pujakun ame kakarmarmijijai ti péñker wáinkiamjai. Antsu Yus-Chichamnum aarma uminkiat tusa aya chikichik menkakaiti. Niisha tuke emesnartinia núiti.'

<sup>13</sup> 'Yamaikia Amiini winiajai. Tura jú tuke pujakun júna tájame. Niisha Wi waraajna núnisar ti shiir warasarat tusan tajai.

<sup>14</sup> Wi jú nunkanmayanchuitjai. Niisha núnisan jú nunkanmayanchu áiniawai. Tuma asamtai ame chichammin Wi susamtaí jú nunkanmaya shuarka nin nakitiainiawai.

<sup>15</sup> Jú nunkanmaya jiiikj tusan seatsjame. Antsu íwianch nin nupetkain tusan seajme.

<sup>16</sup> Wi juyanchuitiaj áintsan niisha juyanchu áiniawai.

<sup>17</sup> Ame chichammin ti nekas nuna ántuiniakui péñker awajsata.

<sup>18</sup> Juya shuarnum akuptukmam áintsan Wisha nin chíkich shuarnum aku-peajai.

<sup>19</sup> Aya Áminiuinak takastaj tusan enentáimtimjai. Túra asamtai niisha aya Áminiuinak takastinian enentáimpratin áiniawai' áujtak tímiayi.

<sup>20</sup> 'Aya níniunkeka seatsjame antsu ashí ni chichamen antukar Winia enentáimtusartatna nusha ame yainkiarta tusan seajme.

<sup>21</sup> Ashí niisha chikichiniak enentáimtusarti tusan seajme. Wisha Amesha, Aparu, chíkichik ájinia núnisan niisha Iijjai iruntrar chikichik ajastai tusan seajme. Wíi shuar chíkichik najanata tusan seajme. Nuyá jú nunkanmaya shuar akuptukuitmena nuna nekaawartatui.

<sup>22</sup> Ame shiir awajtusmamna núnisnak Wisha nin shiir awajsaitjai. Iikia chíkichik ájinia núnisan niisha chíkichik ajasarti tusan túraitjai.

<sup>23</sup> Wi ní enentáin pujaku Amesha Winin pujakmin penké chíkichik ajasarti. Túramtai ashí shuar júna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chíkichik ajasmajai ashí shuar nuna nekaawartatui.'

<sup>24</sup> ‘Aparu, shuar surusmam nu, Wi pujustatjana nuĵ pujusarti tusan sea-jme. Tura ti shiir awajtusmamna nuna ísarti tusan nuna seaĵme. Ju nuńka najanchamunmań tuke anentin asam ti shiir awajtusuitme.

<sup>25</sup> Aparu, ti péńker áminin ju nuńkanmaya shuar nekarmainiatsui. Antsu Wi nékajme. Ju shuarsha ame akuptukman nékainiawai.

<sup>26</sup> Nú shuaran Ámin nekarmawarti tusan jintintiaĵtai. Tura nu arantcha jintintiaĵtai. Núĵainkia Wisha ni enentáin pujurkui Winia anenmena áintsan niisha anenkratin ajasartatui” áujtak tímiayi Jesus.

## 18

### *Suntar Jesusan achikiarmiania nu*

*(Mateu 26.47-56; Márkus 14.43-50; Rúkas 22.47-53)*

<sup>1</sup> Jesussha nuna tinia amuk ni unuiniamurĵĵai Setrun entsá katin numi arakmanum wémiayi.

<sup>2</sup> Jútassha Nin suruktajtsa pujumia nuka nu ajan nekaamiayi. Untsurĵ tsawant Jesus ni unuiniamurĵĵai nuĵ iruntramtai Jútas Jesusan nuĵ wáinkiatniun enentáimpramiayi.

<sup>3</sup> Tura untsurĵ suntarĵaĵsha Jesusan tariarmiayi. Pariséusha Israer-shuar Patri uuntriĵsha suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nanĵkincha rámparancha jiniasha júkiar weriarmiayi.

<sup>4</sup> Jesussha ashí átinia nuna neka asa jiintiuki “¿Ya eaarum?” tímiayi.

<sup>5</sup> Niisha “Nasarénumia Jesus” tiarmiayi.

Jesussha “Wiitjai” tímiayi.

Jútassha Jesusan surukua nu niĵĵai pujuarmiayi.

<sup>6</sup> Tura Jesus “Wiitjai” takui ti ashamkar úkumur waketaĵniak iniaararmi-ayi.

<sup>7</sup> Ataksha Jesus “¿Ya eaarum?” tímiayi.

Niisha “Nasarénumia Jesus” tiarmiayi.

<sup>8</sup> Nuńkia Jesus tímiayi “Wiitjai, tájarme. Winia eaťkurmeka Wíi shuar ainia júka waketaĵniak” tímiayi.

<sup>9</sup> Jesus nuik aujuk “Winia Apar surusma nu meńkakacharai” timia nu uminkiat tusa Jesus “waketaĵniak” tímiayi.

<sup>10</sup> Nuyá Semuń Pítiur machitian jusa Marku kuíshĵin untsuurnumaani tsupirkamiayi. Markusha Israer-patri uuntri takarniurĵiyayi.

<sup>11</sup> Túramtai Jesus Pítrun tímiayi “Machitrumka awaińki ikiusta. Winia Apar wáitsatniun surakuńkia ¿wáitsashtinkaitĵ?”

### *Israer-patri uuntriniam júkiarmiania nu*

*(Mateu 26.57-58; Márkus 14.53-54; Rúkas 22.54)*

<sup>12</sup> Nuńkia apach suntarsha ni kapitáintriĵsha Yusa Jeen wainniusha Jesu- san achikiar ĵińkiawarmiayi.

<sup>13</sup> Nuyá Anasa jeen júkiarmiayi. Anassha Kaipiasa wearĵiyayi. Tura Kaipias nu uwitin Israer-patri uuntriĵiyayi.

<sup>14</sup> Kaipiaska nuik “¿Ashí Israer-shuar mesertin péńkerkait. Antsu aya chikichik shuar jákatin péńkerchakait?” timia núiti.

### *Pítiur Jesusan natsantramiania nu*

*(Mateu 26.69-70; Márkus 14.66-68; Rúkas 22.55-57)*

15 Semun Pítieur chíkich unuiniamujaj Jesusa uku weriarmiayi. Israer-patri uuntri nú unuiniamunka nékauyayi. Tuma asamtai ni jeen jeawar, suntar Jesusajaj aa tanishnum wáiniakui níisha wayamiayi.

16 Tura Pítieur aa wáitiniam wajaamiayi. Túramtai chíkich unuiniamu jinki wáitin wáinia nú nuwajaj chichas Pítrun awayámiayi. Nuí nékanu asa yúpichuch awayámiayi.

17 Waiti wáinniusha Pítrun aniasmiayi “¿Amesha nuna unuiniamurinchukaitiam?”

Pítrusha “Atsá, núchaitjai” tímiayi.

18 Tsetsek asamtai suntarsha tura nuí takarniusha jinia ikiapárar ni nawen anaak pujuarmiayi. Pítrusha nuí pachiiniak anamuk pujumiayi.

### *Kaipias Jesusan aniasmiania nu*

(Mateu 26.59-66; Márkus 14.55-64; Rúkas 22.66-71)

19 Israer-patri uuntri Jesusan aniasmiayi “Ame unuiniamurmesha ¿ya ainia. Tura warí nin jintintiaitiam?”

20 Jesussha tímiayi “Ashí íimiainiajn tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nuí arantutsuk tuke etserkaitjai.

21 ¿Urukamtai Winia inintiam? Winia chichamprun antukua nu anias-tarum. Wi timian nii ujatmakarti. Wi timiancha níisha nékainiatsuk.”

22 Jesus nuna takui Yusa Jeen wáiniua nu nuí pujá Jesusan yapiniam awati tímiayi “¿Núnisan nekas úuntnum chichastinkait?”

23 Jesussha tímiayi “¿Warinmampa yajauch aa? Turuttia. Tura tájana nu péneraitkiuinikia ¿urukamtai awattiniam?”

24 Nuyá Anas Jesusan jinkía Kaipias takaamunam akupkamiayi Kaipias Patri uuntri asamtai.

### *Pítieur ataksha Jesusan natsantramiania nu*

(Mateu 26.71-75; Márkus 14.69-72; Rúkas 22.58-62)

25 Tuke Anasa jeen chichainiaj Pítieur jinia anamuk puján shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” tímiayi.

26 Chíkich takarin, Marku shuari, nuí pujumiayi. Pítieur Marku kuíshjn tsupirkamia nuna shuari asa tímiayi “¿Ajanam Jesusajaj wekaamin wáinkiachmakajam?”

27 Pítrusha ataksha “atsá” tain atash shiniukmiayi.

### *Piratu Jesusan aniasmiania nu*

(Mateu 27.1-2, 11-14; Márkus 15.1-5; Rúkas 23.1-5)

28 Nuyá Kaipiasajya Jesusan júkiar tsawant tsawaamunam apach kapitían Piratu takatai jeenam ejeniarmiayi. Israer-shuarsha ni uuntri akupkamia nunisar wapik ajasajj tusar nu jeenam wayacharmiayi. Wayawarka paskua nampernum yurumáchmin ármiayi.

29 Nu asamtai Piratu níijaj chichastaj tusa jínki tímiayi “¿Jú áishmansha warí tunáa túrait?”

30 Níisha “Tunaarinchaitkiuinikia amijni itiachaaji” tiarmiayi.

31 Tutai Piratu tímiayi “Atumek júkirum atumí akuptammarijjaj ni tunaari nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.”

<sup>32</sup> Yaunchu Jesus ni jákatniurin enentáimtus “Wi awajñaitniuitjai” tímiayi. Niisha krúsnum awajñain asamtai apach máataijijai Nii timia nu uminkiamiayi.

<sup>33</sup> Piratusha atak jeá wayá Jesusan untsuk “¿Ámeke Israera Uunt Akupniurinjaitiam?” tímiayi.

<sup>34</sup> Jesussha tímiayi “¿Amekek nu inintram. Kame chíkich túramainiatsuash?”

<sup>35</sup> Piratusha tímiayi “¿Wi Israer-shuarkaitiaj? Ameer shuarak Israer-patri uuntrijijai winin itiararai. ¿Warí tunáa túraitiam?”

<sup>36</sup> Nuñkia Jesus tímiayi “Wi jú nunkanam akupniuchuitjai. Juyaitkiuñkia Winia nemartuiniana nu máanaikiaraayi. Túrawarmatai Israer-shuarnum surutkachaayi. Antsu juyañ akupniuchuitjai.”

<sup>37</sup> Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nunkanam akiinian ashí shuaran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

<sup>38</sup> Tura Piratu “¿Nekasa nusha warimpiait?” tímiayi.

*Piratu Jesusan mantamnatniun tímiania nu  
(Mateu 27.15-31; Márkus 15.6-20; Rúkas 23.13-25)*

Piratusha nuna tí, atak Israer-shuarjai chichastajtsa jünki tímiayi “Jú aishmanka tunaarjin penké wáittsujai.

<sup>39</sup> Tura ashí uwitin paskua nampernum sepunmayá shuar ankant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniurjin ankant akupkattajak?” tímiayi.

<sup>40</sup> Nuñkia ashí kakantar untsumainiak “Jú akupkaip; antsu Parapás akupkatá” tiarmiayi. Nu Parapássha kásauyayi.

## 19

<sup>1</sup> Nuyá Piratu suntaran akupkamiayi Jesusan asutiáwarat tusa.

<sup>2</sup> Suntarsha Jesusan wishikrar tawasap janñi najanamun etsenkrumtikiarmiayi. Yamakai pushincha uunt akupniua áintsan áentsrarmiayi.

<sup>3</sup> Nuyá “Israera Uuntria, kakaram ajasta” tiar yapiniam awatiarmiayi.

<sup>4</sup> Nuyá Piratu atak jünki tímiayi “Átum wáinkiarum nekaatarum tusan Jesusan jüñktiatjai. Wikia tunaarjñkia penké wáittsujai.”

<sup>5</sup> Tímiatai Jesussha janñin etsenkruku tura pushin yamakairman entsaru jünkimiayi. Tura Piratu nuñ káunkarun tiarmiayi “Pai juñti, íistarum.”

<sup>6</sup> Israer-patri uuntrisha suntarsha Jesusan íisar ataksha ataksha kakantar untsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaarjin penké wáittsujai” tímiayi.

<sup>7</sup> Tura Israer-shuar tiarmiayi “Nu shuar “Yusa Uchirintjai” takui jákatniuiti. Iñiu akupeamu aarma nuñ núniskete” tiarmiayi.

<sup>8</sup> Nuna antuk Piratusha nu nankaamas ashamkamiayi.

<sup>9</sup> Ataksha init wayá Jesusan aniasmiayi “¿Tuyampaitiam?” Tura Jesussha penké áñkchamiayi.

<sup>10</sup> Nuyá Piratu tímiayi “¿Urukamtia winia airtsum. Wi jeajna nu nékatsmek? Wakeraknaka krúsnum máatniuncha tura ankant akupkatniuncha jeajai.”

<sup>11</sup> Tutai Jesussha tímiayi “Yus nuna amaschaitkiuñkia penké tujinki-aintme. Nu asamtai amijn surutka nu ámin nankaamas tunaarinniuiti.”

12 Piratusha nú chichamtaik Jesusan an̄kant akupkattsa wakerimiayi. Antsu Israer-shuar untsumainiak tiarmiayi “Ju an̄kant iníakmekame ame úunt akupniú amikrin̄chuitme. Juka “úunt akupniuitjai” taku atumí uunt akupniuri nemasrinti” tu untsumkarmiayi.

13 Piratusha taman antuk akupin pujutainium pujus Jesusan untsukmiayi. Nui kaya ukatkamu asamtai Israer-shuara chichamen Kapata anaikiarmiayi.

14 Paskua jisat jeatsain̄ nantu tutupin ajatsain̄ Piratu Israer-shuaran tímiayi “Uunt akupniuram ístarum.”

15 Tura ashí “Jakati, jakati, krúsnum máatá” tu untsumkarmiayi.

Tura Piratu “¿Atumí uunt akupniurin̄ krúsnum máattajak?” tímiayi.

Tura Israer-patri uuntrī tiarmiayi “Atumí uunt kapitíántrumek in̄ akup-tamji. Chikichka atsawai.”

16 Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

### *Jesusan krúsnum máawarmiania nu*

*(Mateu 27.32-34; Márkus 15.21-32; Rúkas 23.26-43)*

17 Jesussha ni krusrī yanaki Kúrkuta náinnium wémiayi. Kúrkuta naarisha Israer-shuara chichamen “muuka ukunch” tawai.

18 Nui krúsnum ajintrurar awajainiarmiayi. Tura mai pae jimiara shuara chikichik chikichik awajainiarmiayi. Tura Jesus ajapén ámiayi.

19 Piratusha Jesusa krúsrin̄ uunt áarman anujkamiayi. *NASARETNUMIA JESUS, ISRAERA UUNT AKUPNIURI*

Tu áarmauyayi.

20 Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusarén̄ pepru tíjiuch asamtai Israer-shuar ti untsurí áujiarmiayi.

21 Nu asamtai Israer-patri uuntrī Piratun jeariar “Israera Uunt Akupniuri” áaraip. Antsu “Israera Uunt Akupniurintjai tawai” tu aarta” tiarmiayi.

22 Tura Piratu nincha ákiar “Wí áaraj nuke átatui” tímiayi.

23 Suntarsha Jesusan krúsnum awajainiar ni entsarmarin̄ kuátru akankar an̄kant an̄kant júkiarmiayi. Tura ni pushirin̄ apatsuk najanamu asamtai jáaktinian nakitrarmiayi. Kame yakíyā nun̄kaan̄i apaiyīachma takamt-sukuyi.

24 Tuma asamtai suntar tiarmiayi “Juka jáakchatai. Antsu nakurakrin̄ yának ati nu jukiti.” Nújain̄kia yaunchu Yus-Chichamnum aarma nu uminkiamiyi:

“Winia entsarmarun akantrarmiayi tura nakurusar awakmakua nuna winia pushirun súsarmiayi” áarmaiti.

25 Krúsnumsha Jesusa nukurisha Kriúpasa nuarí Marisha tura Máktaranmaya Marisha wajaarmiayi.

26 Jesus ni nukurín̄cha tura ni ti aneamu unuiniamurín̄cha nui wajan wáiniak ni nukurín̄ tímiayi “Nukuru, ju ame uchirnea áintsan̄ atí.”

27 Nuyá ni unuiniamurín̄cha tímiayi “Ju ame nukua áintsan̄ atí.” Nu tsawan-taik nu unuiniamurí ni jé̄n jukí awayámiayi.

### *Jesusa jakamuri*

*(Mateu 27.45-56; Márkus 15.33-41; Rúkas 23.44-49)*

28 Nuyá ashí uminkiamtai Jesus nuna nekáa yaunchu Yus-Papinium aarma uminkiat tusa “kitiamajai” tímiayi.

<sup>29</sup> Nujsha pininnum churuín ámiayi. Tura shuar nuna uruchjaj ejampar sapapjaj ijiu mukunaati tusa susamiayi.

<sup>30</sup> Jesussha churuínian najekaa “ashí túrunatniua nu mash uminkiai” tímiayi. Nuna t̄, muuken nená jakamiayi.

### *Suntar Jesusan paenam nan̄kijaj ijiuiania nu*

<sup>31</sup> Nu tsawantaj, kashinkia paskua námper uunt tsawantr̄i asamtai tura ayampratin tsawant aa asamtai, Israer-shuar jaka ayashí nuj paant aj̄n tusa nakitrarmiayi. Nu asamtai Piratun seainiak “Krúsnum aj̄ntrurma ainia nuna kan̄kajin suntar kupirkarti. Nuyá wari jákarmatai krúsnumiá júkiarti” tiarmiayi.

<sup>32</sup> Nuyá suntarsha weriar emka krúsnum amia nuna kan̄kajin kupirkarmiayi. Nuyá chikichnasha Jesusaj̄i atsankiar aj̄ntrurma nuna kan̄kajincha kupirkarmiayi.

<sup>33</sup> Tura Jesusan weantuk yaunchu jákaiiti tusa kan̄kajin kupirtsuk

<sup>34</sup> suntar aya paenam ijiumiayi. Ijiumtaisha nu chichamtaik numpa yumijaj̄i puarmiayi.

<sup>35</sup> Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nékajai.

<sup>36</sup> Yaunchu Yus-Chichamnum aarma uminkiai tusa túrunaiti: “Ni ukunch̄in kupirkachartatui” tu áarmaiti.

<sup>37</sup> Tura chikichcha:

“Ijiuarmiania nuna wáinkiertatui” tu áarmaiti.

### *Jesus iwiarsamu amiania nu*

(Mateu 27.57-61; Márkus 15.42-47; Rúkas 23.50-56)

<sup>38</sup> Nuyá Arimatéanmayá Jusé Jesusa ayashín jukitiaj tusa Piratun seamiayi. Nu Jusé Jesusan enentáimtaiat Israer-shuara úuntr̄in ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayashín jukimiayi.

<sup>39</sup> Nikiutémusha Jesusaj̄i chichastaj tusa kashi tarimia nu jimiará kun̄kuin pachimpramun tí nukap sumak itiamiayi. Mira kun̄kuinniasha arú kun̄kuinniasha sumakmiayi.

<sup>40</sup> Nuyá Jusé Nikiutémujaj̄i Jesusa ayashín júkiar kun̄kuinian kuérar jaanch esarmajaj̄i penuararmiayi. Israer-shuar tuke nunisar ikiúu ármiayi.

<sup>41</sup> Jesus krúsnum maamua nuj aja tíjiuch ámiayi. Nu ajanmasha waa náinnium paka taurma ámiayi. Nusha yama taurma asamtai jaka nuj ikuschamuyayi.

<sup>42</sup> Nu waaasha tíjiuch asamtai tura Israer-shuara ayampratin tsawantr̄i jeatemamtai Jesusa ayashín nuj iwiarsarmiayi.

## 20

### *Jesus nantakmiania nu*

(Mateu 28.1-10; Márkus 16.1-8; Rúkas 24.1-12)

<sup>1</sup> Tum̄ntincha káshik kirit aj̄n Máktaranmayá Marí Jesus iwiarsamunam ístajtsa wémiayi. Jesusan iwiarsar kaya uuntjaj̄i waān atutkarmiayi. Tura Marí nuj jeá nu kaya uraimiun wáinkiamiayi.

<sup>2</sup> Nuna wáiniak Semun̄ Pítiur pujamunam tséken̄ki wémiayi. Chíkich un̄iniamur̄i Jesus tí anemia nusha nujsha pujumiayi. Tura Marí tímiayi “Iwiarsamunmayá ii Úuntr̄in júkiarai. Tura ¿tuúntsuk ikiusara?”



<sup>3</sup> Pítrusha chíkich unuiniamurjijai jíinkiar iwiarsamunam iyuwarmiayi.

<sup>4</sup> Mai métek tsékenkiar Pítur jeatsain chíkich unuiniamurj iwiarsamunam emka jeamiayi.

<sup>5</sup> Niisha wayatsuk tsuntsumá iis penuarmarinkia nuj tepan wáinkiamiayi.

<sup>6</sup> Nuyá Semun Pítur ukunam jeá iwiarsamunam wayá penuarmarj nuj tepan wáinkiamiayi.

<sup>7</sup> Chíkich jaanchcha Jesusa muuken penuarman nusha nanerma niisháa tepan wáinkiamiayi.

<sup>8</sup> Nuyá chíkich unuiniamurj emka tamia nusha iwiarsamunam wayamiayi. Niisha túruna wáiniak “Jesus nekas nantakni” tu enentáimpramiayi.

<sup>9</sup> Nuna wáintsuk Yus-Chichamnum “Jesus jakamunmaya nantaktiniaiti” áarman áujariat nekaacharmiayi.

<sup>10</sup> Nuyá mai ni jeen wakеткиarmiayi.

*Máktaranmaya Maríncha Jesus wantintiukmiania nu  
(Márkus 16.9-11)*

<sup>11</sup> Tura Marikia iwiarsamunam juak útu pujumiayi. Niisha útiatan tsuntsumá iwiarsamunam ímsamiayi.

<sup>12</sup> Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chikichik múuknumaanj tura chíkichka nawenmaanj pujumiayi.

<sup>13</sup> Nayaimpinmaya suntarsha “¿Urukamtai útam?” tiarmiayi.

Marísha tímiayi “Winia Úntrun jurutkiarai tura ¿tuintsuk ikiusara?”

<sup>14</sup> Nuna tj ayanmar Jesusan wáiniak Nin nekaachmiayi.

<sup>15</sup> Jesus aniak “¿Urukamtai útam. Ya eam?” tímiayi.

Marísha ajan wáinnua nuiti tusa tímiayi “Uunta, ame ni ayashj jukimkia, tui ikiusmam ujatkata wi jurumkitiaj” tímiayi.

<sup>16</sup> Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Uuntá” tawai.

<sup>17</sup> Jesussha tímiayi “Emetruawaip. Winia Aparuj wáatsjai. Antsu weme Wíi shuar titiá “Winia Aparuj nayaimpiniam wéajai. Niisha atumí Aparinti. Winia Yúsruti tura atumí Yúsrinti” tawai titiá” tímiayi.

<sup>18</sup> Nuyá Máktaranmaya Marísha Jesusa unuiniamurj wáiniak “Wí Úntan wáinkiajai, tímiayi. Niisha juna mash túrutui” tu ujakarmiayi.

*Jesus ni unuiniamurj wantintiukmiania nu*

*(Mateu 28.16-20; Márkus 16.14-18; Rúkas 24.36-49)*

<sup>19</sup> Nu tsawantaj, tumintin, ni unuiniamurj Israer-shuara úntrin ashamainiak kashí iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shiir pujustarum” tímiayi.

<sup>20</sup> Nuna tj, nuyá ni uwejen ajintruamuncha ni paen ijiumuncha iniakmasmiayi. Ni unuiniamurjsha Úntrin wáinkiar shiir warasarmiayi.

<sup>21</sup> Ataksha Jesus “Shiir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi.

<sup>22</sup> Nuyá ni matsatmanumaanj umpu tímiayi “Yusa Shiir Wakanj atumí enentáin wayati.

<sup>23</sup> Shuara tunaarinkia átum “asakárti” tákurminkia tsankurnartatui. Tura nu shuar “sumamati” tákurminkia tuke sumama pujawai” tímiayi Jesus.

*Tumas Jesus nantakniun wáinkiamiania nu*

<sup>24</sup> Tura chikichik unuiniamu, Jímiampramu Tumas, Jesus tamia nuḷ pujuch-miayi.

<sup>25</sup> Tura ukunam chikich unuiniamurḷ ujainiak “Ii Uuntrḷ wáinkiaji” tiarmi-ayi.

Tura Tumas tímiayi “Ajintruamurḷ wáinkian uwejrūn awáintiuanitjuḷ. Tura paenumsha awáintiuanitjuḷ. Penké jaka asamtaí aya nujai ini-antkimiun enentáimtustatjai” tímiayi.

<sup>26</sup> Chíkich tumiḷḷin ataksha Jesusa unuiniamurḷ iruntrar-miayi. Nuñkia Tumassha niijjai pujuarmiayi. Tura waiti epenmianumaḷ Jesus wayá ajapén wajas “Shiir pujustarum” tímiayi.

<sup>27</sup> Nuyá Tumasán tímiayi “Winia uwejur ísam ame uwejem awáintiuata. Núnismek winia paerūḷ uwejem awáintiuam íistá. Tura arantutsuk nekas enentáimtursata.”

<sup>28</sup> Nuyá Tumas “Winia Úuntrua, nekas winia Yúsruitme” tímiayi.

<sup>29</sup> Jesussha tímiayi “Winia wáitkiam nuñ enentáimtursame. Antsu Winia wáittsuk enentáimturaru nekas shiir ániawai” tímiayi.

*Shuar Yusa Uchirḷn enentáimtusarti tusa ju papí áarmaiti*

<sup>30</sup> Aentsti tujintiamuncha Jesus túramu ti untsurḷ ju papinium áarchamu ániawai. Tura ni unuiniamurḷ mash wáinkiarmai.

<sup>31</sup> Antsu Jesuska Kristu asa Yusa Uchirḷnti tu enentáimtustarum tusan júnaaka áarmajai. Tura enentáimtakmin Jesus ni iwiaakmarḷn yamarma nuna amastatui.

## 21

*Entsá yantamnum Jesus siati (7) unuiniamurḷn wantintiukmiania nu*

<sup>1</sup> Tipirias antumianka káanmatkarḷn Jesus ni unuiniamurḷn wantintiukmi-ayi. Júnisaḷn ámiayi.

<sup>2</sup> Semuḷ Pítrusha Jímiampramu Tumassha Kananmaya Natanaérsha Sepetéu uchirḷsha tura chíkich jímiaḷ unuiniamurḷsha métek iruntrar pujuarmiayi.

<sup>3</sup> Semuḷ Pítrusha “Namakan nekajai nanḷkiattsan wéajai” tímiayi.

Chíkich mash “Íisha winittiaji” tiarmiayi.

Wéar uunt kanunam enḷkemprar nu kashi achitsuk tsawararmiayi.

<sup>4</sup> Káshik aḷn Jesus entsá káanmatkarḷn wantinkiamiayi tura ni unuinia-murḷsha Jesusan nekaacharmiayi.

<sup>5</sup> Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

<sup>6</sup> Tutai Jesus tímiayi “Neka untsuurnumaanḷ ajunkatarum. Nuḷ achikta-trume.”

Nii tímia núnisaḷn túrawar namakan ti achikiar nekan júsatniun tujinkiar-miayi.

<sup>7</sup> Nújainkia Jesusa unuiniamurḷ Jesus ti aneemia nu Pítrun tímiayi “Ii Úuntrḷnti.” Takui Pítrusha ámiaku asa ni pushirḷn entsar entsá inianmiayi yukuak jeataj tusa.

<sup>8</sup> Chíkich unuiniamurḷsha jeachat pujuiniachuk nekan japiki kanujai káanmatkanam jeawarmiayi.

<sup>9</sup> Káanmatkanam jeawar ji kajir ámanum namakan jiámun wáinkiar-miayi. Tantanacha wáinkiar-miayi.

<sup>10</sup> Jesussha “Átum achikiurmena nuyá jiátin itiatarum” tímiayi.

11 Tutai Semuñ Pítur kanunam we nekan nekartiuk káanmatak japiki itiamiyi. Itiar namaknasha siañtu senkuenta nuyá tres (153) nekapmararmiayi. Ti untsurí áyat nekasha jáankachmiayi.

12 Nuyá Jesussha “Yurumáitiarum” tímiayi. Ni unuiniamurísha “aya ii Untrí áminiaiti” tusar inintrustinian natsantiarmiayi.

13 Nuyá Jesus wajakí tantan jukí súsararmiayi. Núnisan namaknasha súsararmiayi.

14 Jesus jakamunmaya nantaki jujai menaintiu ni unuiniamurín wantintuukarmiayi.

### *Jesus Semuñ Pítrujai chichasmiania nu*

15 Nuyá yurumáwar Jesus Semuñ Pítrun aniasmiayi “Junasa uchirí Semuñka, ¿ju shuar nankaamas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuiñkia winia murikiur ayuratniua áintsam Winia enentáimturainia nu yaiñtá” tímiayi.

16 Ataksha aniasmiayi “Junasa uchirí Semuñka, ¿Winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi.

17 Nú ataksha aniasmiayi “Junasa uchirí Semuñka, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata.

18 Maa, nekas tájame. Natsa asamka iwiarmampram ame wakeramunam wéuyame. Tura úntach ajasmeka ame kunturam ayaparakmin chíkich aentstampattawai tura ame wétin nakitiam nu juramkiartatui.”

19 Jesus nújainkia Pítur máatniun ujakmiayi. Tura núnisan jakamtai shuar Yúsán shiir awajsatniun ujakmiayi. Nuyá Pítrun “Nemartusta” tímiayi.

### *Juan túrunatniun Pítur Jesusan aniasmiania nu*

20 Pítrusha ayanmar chíkich unuiniamurín Jesus ti anea nuna némarun wáinkiamiayi. Kame nu unuiniamuka nuik Jesus jáatsain yurumáiniakui “Uunta, ¿ya surutmaktata?” timia núiti.

21 Nincha Pítur wáiniak Jesusan aniasmiayi “Uunta, ¿jusha warí urukatniuit?”

22 Jesussha ayak “Wi wakeraknaka iwiaaku pujain tátatjai tóminiaitjai. Nuna takuisha ¿warí itiuertama? Ámeka nemartusta” tímiayi.

23 Nújainkia “Nu unuiniamurí jákashtatui’ tusa Yus-shuarnum áujmatiamiayi. Túrasha Jesus “jákashtatui’ tíchiamiayi antsu áyatik “Wi wakeraknaka iwiaaku pujain tátatjai takuisha ¿warí itiuertama?” tímiayi.

24 Wikia nú unuiniamuríntjai. Ju papincha aaru asan “mash nekasaiti’ tajai. Ashí shuarsha núnisan tuñiawai.

25 Nu arantcha juí áarchamusha ti awai. Kame ashí áamka ti untsurí papí asa ashí nunkanam ikiuschamnia ainti. Nuke atí.

## Jesusa Akatramurí Yusa Wakaníjiai

### TÚRAMU

#### *Yusa Wakanín nákasarmiania nu*

<sup>1</sup> Amikiur Tiúpiru:

Nuik akupkamiaj nú papinium ashí Jesus túramia nuna áatramiajme. Tura unuítiampramijaj nunasha áatramiajme. Yámankamtaiknumiá,

<sup>2</sup> nayaimpiniam wétsuk, ashí Nii túramia nuna tímiajme. Jesuska, nayaimpiniam waketsuk Yusa Wakaní kakarmaríjiai túratniua nuna ni akatramurín jintintiawarmiaiyi.

<sup>3</sup> Tura jaka nantaki, Jesus tímiajajik wantintiukmiaiyi ni akatramurín. Tura kuarenta (40) tsawant nin wantintiukarmiaiyi. Nuna tura nekas iwiaakjai tusa iniakmasmiaiyi, nekaawarat tusa. Tura Yusa akupeamurí urukukit nuna mash ujakmiaiyi.

<sup>4</sup> Jesuska ni akatramuríjiai tuke pujus, nin chicharuk “Jerusarénumiá wéerap, tímiaiyi. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiaiyi.

<sup>5</sup> Tuke enentáimsatarum. Juan entsajai atumí ayashín imiatmimiarme. Túrasha wárik Yusa Wakanísha atumniasha tarutmar, atumí enentáin enkemprutmattarme. Nusha enentái imiantin áintsangete” tímiaiyi.

#### *Jesus nayaimpiniam wakamiania nu*

<sup>6</sup> Tura Jesusjai irunar matsamas anintriarmiaiyi “Uunta, Israer-shuar ájinia nu, ankant ajasakrin iiniuk Akupin atak naamkatin yamaí jeayash” tiarmiaiyi.

<sup>7</sup> Jesus áimiuk tímiaiyi “Winia Apar túrattana nu warí tsawantinik túrunatí nu nekaatniusha atumniachuiti. Apar Nínki neka asa ni kakarmaríjiajin túrattawai.

<sup>8</sup> Tura atumsha Yusa Wakaní kakarmarín sunastatrume. Nii taa enkemprutmamtaí kakaram ajasrum, Wíi túramu etserkattarme. Emka jui Jerusarénum péprunam etserkattarme. Nuyá ashí Jutía núñkanam, tura arant Samaria núñkanmasha, tura nú arant ashí núñkanam werum, Wíi túramu etserkattarme” tímiaiyi Jesus.

<sup>9</sup> Nuyá chichas amir, ashí ni akatramurí ii wajainiaí, Jesus nayaimpinmaani junakmiaiyi. Wéa-wéakui yurankim mash Nin amúámiaiyi. Tuma asamtaí ni akatramurí Nin wáinkiacharmiaiyi.

<sup>10</sup> Tura Jesus waakkui ni akatramurísha yakí ii wajainiaí, jimiará áishman puju entsaru núj wantintiukarmiaiyi. Tura ayámach wajattsarmiaiyi.

<sup>11</sup> Nu áishmansha Jesusa akatramurín tiarmiaiyi “Kariréanmaya áishmanka, ¿urukamtaí nayaimpinmaani imiá ímprim? Ju Jesusak atumíya nayaimpiniam wea wáinkiarumna núnisan ataksha winittiwai” tiarmiaiyi.

#### *Matíasan anaikiarmiania nu*

<sup>12</sup> Tuasua amikmataí Jesusa akatramurí Uriwiu náinniumiá akaikiar Jerusarénum waketiarmiaiyi. Uriwiu naincha Jerusarénumsha tjiuchiiti, chikichik kirumitrua núnisan.

13 Tura Jerusarénnum jeawarmiayi. Nuḡ jeawar, jeá wayawar yakí wákararmiayi. Nuḡ Pítrusha, Jakupusha, Juansha, Antressha, Jiripisha, Tu-massha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachí Jútassha, tímian wayawarmiayi.

14 Jusha mash tuke iruniarmiayi Jesusa yachijjai. Tura Jesusa nukurí Marijjai, nuyá chíkich nuwajajsha tuke iruniarmiayi, Yus áujstai tusar.

15 Nuḡ siántu painti (120) aents iruntrarmia nuḡ Pítiur chichastaj tusa wajakmiayi.

16 Pítiur juna tímiayi “Yatsurtírmesha, umarutírmesha antuktarum. Yuska yaunchu ni Papirijn Jutasnan áamtikramiayi. Jútas akiintsain Tawitkia, Yusa Wakaní jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmarj Yus-Chicham asa tímianak uminkin-tniuyi.

17 Nú Jutaska ii írutramuitiat, ii takaamurijn páchitkiaitiat,

18 tunáa tura nujai kuítian achik nunkan sumakmiayi. Tura piniakum iniañ tantane páttimiayi.

19 Tuma asamtai ashí Jerusarénnum pujuarmia nu, nuna nekaawar nú nunkan “Numpa Nunka” anaikiarmiayi.

20 Kame Sarmu papinium Tawitkia juna áarchamkia:

“Ni jeesha itiarak atí.

Nu jeanmanka penké pujuschartí.” Tura

“Ni takatrj chíkich atankiti.”

Tu aarmaiti’ tímiayi.

21 ‘Tuma asamtai yamaikia chíkich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesus iijjai pujumia nuḡ tuke Nin nemarsamia nu atí.

22 Juañ Jesusan imiaimiania nú tsawantnumia jukí, Jesus nayaimpiniam wémiania nú tsawantan tímianu ejé tuke Niijjai wekaimia nu atí. Nu shuar enentáimtusar, chíkich achiktaí. Iisha iruntrar Jesusa nantakmarj et-serkamí tusar túramí” tímiayi Pítiur.

23 Tura nuyá jimiaraí shuaran anaikiarmiayi. Matíasan anaikiarmiayi. Tura chíkichnasha Jusén, ni chíkich naarj Parsapas, tura apach náarínkia Justu, nunasha anaikiarmiayi.

24-25 Tura nuyá Yus-shuar Yúsan áujainiak juna tiarmiayi “Ii Uuntri, Amesha ashí shuara enentái nékame. Juḡ awai jimiaraí áishman. Jútas tunáa túrak jákatniunam wéak akatramu takatan ikiukmiayi. Yamaikia Jútasa takatrj achikiat tusam, ¿tuá achikium, Uunta? Paant iniakmasta.” Tu aujsarmiayi.

26 Tura Israer-shuara túrutairi núnisan, wats yakí nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

## 2

### *Yusa Wakaní taramiania nu*

1 Pintikiustis náartin jisat jeamtai, chíkichí jeanmanḡ nuin Yus-shuar tukarmiayi.

2 Tumaj aya aneachma nayaimpinmayá nasea áintsan téter ajaki winian antukarmiayi. Ashí mash jeá pujuarmia nuka antukarmiayi.

3 Tura nuḡ pujuiniaj ji wajaí kea áaniun wáinkarmiayi. Túruna ankant ankant puunak tarurarmiayi.

4 Tuma asamtai Yusa Wakaní ashí ni enentájn pimiutkarmiyai. Túram chichasarat tusa Yusa Wakaní ni nekatairí sússarmiyai. Tuma asamtai nujají niisha chíkich chichaman chichasarmiyai.

5 Nuí Jerusaréñnum Yus táman umirin Israer-aents ármiyai. Ashí nunñanmayá Jerusaréñnum taar matsamarmiyai.

6 Tura túrunamía nuna antukar káunkarmiyai. Tura ashí shuar ni chichamejain chichaamun antukarmiyai. Tuma ásar, warinkit, tu enentáimsarmiyai.

7 Nekaachar ashamkarmiyai. “Warinkit, tunaim ajarmiyai. Ju aents chíkich chíkich chichaman chichainia nu, ashí Kariréanmayanchukait, tiarmiyai.

8 Tura iisha ankant ankant ii chichamenka ántatsjik. Ausha urukainiakua, nunak chichainiawa, tiarmiyai.

9 Juí ashí nunñanmayá aents pujuiniatsjik. Partianmayá, Eramnumiásha, Misiuputámianmayásha, Puntanmayásha, tura Asia nunñanmayásha,

10 Prijianmayásha, Pampirianmayásha, Ejiptunmayá tura Áprikanmayá Serinia nú nankaamasnumiásha pujuiniatsjik, tiarmiyai. Nuyasha ii shuarsha Ruma péprunmayá yaunchu taar juí matsataniawai. Chíkichcha tuke Israer-shuar áiniawai. Tura chikichcha Israer-shuar ajastaj tusa Israer túrutairin mash túruiniawai.

11 Kritismanmayásha Arapiannmayá pujuinijai. Tura ashí mash ii chichamejajsha Yusa péñker túramurí ántaji” tiarmiyai.

12 Ashí aents nuna nékachu ásar ashamkarmiyai. Tura nuámtak aniniaisarmiyai “¿Warinminiait ju?”

13 Tura chikichcha wishikiarmiyai. “Nampeku ániatsush” tiarmiyai.

### *Pítiur ujakmia nu*

14 Nuñkia Pítiur, chíkich áuntse Jesusa akatramurijají wajaki, kakantar chichasarmiyai. Chichaak tímiyai “Jutíanmayá shuartiram, Jerusaréñnumiáshimesha antuktarum. Wi títiatjana nu antukrum péñker enentáimpratarum.

15 Ju áishman, nampekarai, tárugna nu, nampekcharai. Warí, nantu imiá ishichik takuní. ¿Aísha itiurak?

16 Antsu Yúsnan etserin, ni naarí Juér, yaunchu áarmia nu, yamáí túrunayi, tímiyai.

17 Juna áarmiyai: “Yus tawai “Jú nunka amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumí uchirí, atumí nawantrísha Yusa chichamen áujmariatatui. Tura nátsaka íimiarartatui. Tura uuntka mesekramiartatui.

18 Tura áishmansha nuwásha winia takartin ainia núnaka winia Wakantrun akuptukartatjai. Túram niisha Wíí túramun áujmariatatui.

19 Yaki nayaimpiniam, aents túrachminian iniakmstatjai. Tura nunñanmasha winia kakarmarun iniakmstaj tusan numpancha, jiniasha, mukuintiuncha yuranmia áintsan akupkattajai.

20 Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas uunt átatui.

21 Nuñkia ashí shuar nekas winia kakarmarun seana nuka uwemprartatui” tímiyai Yus.”

Núnis Juér áarmiyai’ tímiyai Pítiur.

22 Tuke chichaak: 'Israernumią shuartiram, wi títiatjana nu antuktarum. Nasarétnumią Jesusnan tajai. Nú Jesusan Yus shiir enentáimtaiwai. Yuska, átum ti enentáimprarum ni kakarmarın paant nekaatarum tusa, nú Jesusan ti ikiakármiai. Tura Jesusjái aentsti túrachminian Yuska túramiayi, átum íimianum. Nuka ti paant nékarme, tímiayi.

23 Tura Jesus surunkamia nuna Yuska yaunchu, túruntsaın, paant nekaamiayi. Túrasha Yus enentáimtia nujái métek túrawarmiayi. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme.

24 Túramunak Yus Jesusan jákatniun nupetmamtik iniantkimiayi, tuke jákachmin asamtai.

25 Iimiata, ii uuntri Tawit Jesusnan kantamprua juna áarmiayi:

Úntan tuke pujurtan wáinmiajai. Winia pujurtakui awajkamu áchattajai.

26 Tuma asamtai winia enentáirjaısha Nin shiir enentáimtusmiajai. Tura wenurjaısha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

27 Winia wakaniur, Yusru, jákatniunam ikiurtuschattame. Wi ame Uchirmetjái, Tunaarıncha. Túmaitkui anentu asam ayashur káurtin tsankatruckhattame.

28 Tura iwiaaku átin jintia jintintrutamame. Tura tuke pujurtakum waramtikrustatme.

Tu áarmiayi Tawit' tímiayi.

29 Pítiur tuke chichaak: 'Páantchakait. Ii uuntri Tawit yaunchu jákai. Tura iwiansamuiti. Ni iwiansamuri iinı pujatsuk.

30 Túrasha Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk tímiayi "Ame akupniuitme. Nekas tájame, ukunam ame iniannamurminian Kristu akiiniattawai. Niisha Akupin anainiaktatui, amea áintsan." Nuna Yus táman Tawit nekaamiayi.

31 Neka asa, túruntsaın Tawit, wainkia nútiksın, Kristu nantaktinrin áarmiayi. Kristu túrunatniurın chicharuk tímiayi "ni wakanıncha jákatniunam ikiukchatniuyi. Ayashıncha káurtinian tsankatkashtiniuyi."

32 Au Krístun tímia nu Jesusaiti. Nu Jesusnak Yus iniantkimiayi. Nuka iisha neka asar étsereraji.

33 Yuska, Jesus nankaamantuiti tusa ni untsuurıni apujsaiti. Tura ni Wakanın Jesusan súsaiti, Nii yaunchu tímia nútiksın. Tuma asamtai jısha átum antukurmena nuna, tura úsurmena nunasha Yus suramsaiti.

34 Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

"Uunt Yus winia Úntrun tímiayi "akupin pujutainium, winia untsuurıni pujustá.

35 Ame nemasrumin nupetkattajai. Nu túruntsaın jui pujustá' tímiayi."

Nunı áarmaiti Jesusnan, tímiayi.

36 Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasha Jesussha in uwemtikkiartin Krístuiti. Ashí áentstíram nu péńker nekaatarum" tímiayi Pítiur.

37 Nuna antukar wake mesekarmiayi. Tura Pitruncha chíkich akatramuncha aniasarmiayi "Yatsuru, ¿nuńkia itıurkatjik?" tiarmiayi.

38 Tutai Pítrusha chichaak "Atumı tunaarı ikiuktiaj tusarum Yus nekas enentáimtustarum. Tura ashı shuartiram Jesukrístu naarı pachisrum

imiantiarum. Nuñkia atumí tunaarın Yus tsan̄kurtamprattarme. Túrunawakrumin Yuska ni Wakan̄ın suramsattarme, tímiayi.

<sup>39</sup> Yus tímia nuka atumin túramprume. Atumí uchrin̄cha tura ashí arant matsatainia nunasha tawai. Kame ii Yusr̄j áentsun untsuktaj tusa wakerana nuna tawai” tímiayi.

<sup>40</sup> Nú chicham̄jaj tura nuyasha Pítur tuke jintintiuk tímiayi “Yajauch shuara asutiátniur̄j átatna nuyá uwempratarum” tímiayi.

<sup>41</sup> Tuma asamtai nuna antukarmia nuka imianiarmiayi. Nú tsawantaj menaintiú mir (3000) aents Yus-shuar ajasarmiayi.

<sup>42</sup> Ashí nu shuar Jesusa akatramur̄j jintintiar̄mia nuna tímiatrusan̄ antukarmiayi. Tura irunar shiir enentáimtunaisar yurumin ármiayi. Túrawar, Kristu enentáimtustin namper̄ın najanin ármiayi. Túrawar Yúsan áujiarmiayi.

### *Yus-shuar pampararmiania nu*

<sup>43</sup> Tura Yuska aentsti túrachminian Jesusa akatramur̄jjaj túramiayi ni kakarmar̄ın iniakmastaj tusa. Tuma asamtai ashí aents nuna wáinkiar ashkarmiayi.

<sup>44</sup> Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi.

<sup>45</sup> Ni nun̄ken surukar, ni takakmar̄ıncha surukar, atsumainia nuna súarmiayi.

<sup>46</sup> Tuke tsawantak Yusa Uunt J̄een káuniarmiayi. Tura ni j̄eencha iruntrar warainiak Kristu enentáimtustin námper najanin ármiayi. Tura nan̄kaamantu enentáimtumatsuk, yurumkan ajamnainiarmiayi.

<sup>47</sup> Túrawar, Yuska ti úuntaiti, tu wear̄miayi. Tura ashí aents nin shiir enentáimtiarmiayi. Tura Uunt Yus tuke tsawant shuaran uwentikiar Yus-shuar írınmanum ikiaun̄ki wémiayi.

## 3

### *Wekaicha wekasamiania nu*

<sup>1</sup> Chíkich tsawantaj, nantu nun̄kaach ajasmatai, Pítur Juan̄jaj, Yusa Uunt J̄een Yus áusatai tusar wear̄miayi, Israer-shuar tuke turin armia nútiksaran̄.

<sup>2</sup> Tura áishman̄, ni akiiniamur̄jiniá wekaicha amia nu, nūj āj wáitiniam tuke tsawant pujumiayi. Nu áishman̄nasha ni shuar̄j entsakí júkiar nú wáitiniam apujin ármiayi, nūj shuar wayan̄ kuítian seat tusar. Nú wáitisha, Shiir Waiti, tutajyayi.

<sup>3</sup> Tura nú shutuapsha Pitrun Juan̄jaj wayan̄ wáinkiamiayi. Wáiniak kuítian seamiayi.

<sup>4</sup> Tura Pítur Juan̄jaj apajas ísarmiayi. Tura nú áishman̄nasha chicharuk “Iirsata” tímiayi.

<sup>5</sup> Aishman̄sha, surustatuapi, tu enentáimias, ímsamiayi.

<sup>6</sup> Nuyá Pítur chichaak “Kuítrusha atsawai, tímiayi. Kurisha atsawai. Antsu kuítjaj nan̄kaamas takakjana nuna amastajai. Wats, Nasarénumiá Jesukristu kakarmar̄jjaj wajakim wekasata” tímiayi.

<sup>7</sup> Tinia iniais, Pítur ni untsuur̄jini achik awajkimiyayi. Túram ni naw̄esha, wanūsesha kakaram ajasmiayi.

<sup>8</sup> Tura niisha wajaki nantent ajakmiayi. Nuyasha wekasamiayi. Tura Píturjajsha Juánjajsha Yusa Uunt J̄een wayawarmiayi. Nuik shutuapka wayá nantent nantent ajak Yusa náar̄ın shiir pachimiayi.



9 Ashí aents pujuarmia nu, nin wekaan wáinkiar<sub>mi</sub>ayi. Tura ni chichamēn anturkar<sub>mi</sub>ayi.

10 Tura chichainiak “Nuik Yusa Uunt Jēen wáitir<sub>in</sub>, Shiir Waiti tutainium, nu áishma<sub>n</sub> tuke pujuuya núchakai<sub>t</sub>” tiar<sub>mi</sub>ayi. Tura ni túrunamur<sub>in</sub> nekaawar, ti ashamkar nusháa enentáimsar<sub>mi</sub>ayi.

### *Pítiur ujakmiania nu*

11 Shutuapka pé<sub>n</sub>ker ajasu asa Pítrujai Juánjaisha penké tsurach<sub>mi</sub>ayi. Tura aents nu<sub>i</sub> pujuarmia nu, warinkit tusar, jeáshkir<sub>i</sub> tsé<sub>n</sub>ki wear<sub>mi</sub>ayi. Nuka Sarumú<sub>n</sub>na tiniu ár<sub>mi</sub>ayi.

12 Aents káunkarun Pítiur wáiniak, chicharuk “Israer-shuartiram, ¿urukamtai winiasha imiá í<sub>ir</sub>u? tiar<sub>mi</sub>ayi. ¿ísha pé<sub>n</sub>ker asarik’ tsuarmaj’? ¿í kakar-marí<sub>j</sub>ai<sub>n</sub>ki<sub>k</sub>’ ewekamsamaj’?”

13 Atsá. Antsu Yuska ni Uchir<sub>in</sub> Jesusan ashí nan<sub>ka</sub>amantu awajsaiti. Ii uuntr<sub>i</sub> Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitián Piratú<sub>i</sub> surukmarme. Tura Piratu akupkataj tau atumsha suritkiarmarme.

14 Jesus pé<sub>n</sub>ker ná<sub>ka</sub>k enentáimniuyana nu “akupnakchati” tí<sub>mi</sub>arme. Antsu shuaran main akupnakat tusarum wakerimiarme.

15 Túrarum iwiaaku á<sub>ti</sub>nian Amaana nu maarmeme. Tuma ai<sub>n</sub> Yuska Nin jakamunmayá iniantkimiayi. Nuka iisha neka asar é<sub>t</sub>sereaji.

16 Tura ju aishma<sub>n</sub> ju<sub>i</sub> wajaana ju tura né<sub>ka</sub>rmena ju, Yusa Uchir<sub>i</sub> naari enentáimta asa kakaram ajasuiti. Jesus enentáimtusu asa nekas pé<sub>n</sub>ker ajasuiti. Nusha wáinniu asarum né<sub>ka</sub>rme’ tí<sub>mi</sub>ayi.

17 ‘Wats, yatsurtiram, wi né<sub>ka</sub>jai. Atumsha atumí ú<sub>n</sub>trí<sub>j</sub>ai Jesusan túramarena nu né<sub>ka</sub>tsuk túramarme.

18 Tura nu túramur<sub>m</sub>í<sub>j</sub>ai Yus yaunchu tí<sub>mi</sub>a nu tí<sub>mi</sub>anak umikiurme. Ni Krístur<sub>i</sub> wáitsatniuya nuna Yuska ashí ni etserniur<sub>in</sub> áamtikramiayi.

19-20 Wats, yamaikia tunaaruminiá kanaktiarum. Túrarum Yúsnumaani ayantá<sub>ta</sub>rum, tunaarun asaká<sub>ra</sub>t tusarum. Túrunawakrumni<sub>n</sub>ka, atumín uwemtikramprarat tusa Yus yaunchu anaikamia nuna akupturmaktatrume. Nusha Jesukristuiti. Tura Nií<sub>j</sub>ai enentáimin ayampratin á<sub>ta</sub>tui.

21 Tura yamaikia Jesukrí<sub>st</sub>u nayaimpiniam pujustiniati, ashí iwiar-natsa<sub>n</sub>. Yuska ukunam ataksha nun<sub>ka</sub>n shiir awajsattawai. Nuna ni etserniur<sub>in</sub> tsá<sub>ap</sub>in enentái takaku armia nuna yaunchu áamtikramiayi.

22 Tuma asa Muisais ii apar<sub>in</sub> tí<sub>mi</sub>ayi:

“Atumi Uunt Yusr<sub>j</sub> ukunam etserniun akupturmaktatrume, winia akuptuk-mia nú<sub>n</sub>isa<sub>n</sub>. Nuámtaktirminiá achik akupturmaktatrume. Tura nii tí<sub>ti</sub>atna nu umirkatarum” tí<sub>mi</sub>ayi.

23 Ná<sub>n</sub>kamas aents nu etserniun chichamēn umíachku<sub>n</sub>ka emesnartatui. Tura Israer-shuarum pá<sub>ch</sub>itkia á<sub>ch</sub>attawai. Nú<sub>n</sub>isa<sub>n</sub> áar<sub>mi</sub>ayi Muisaissha’ tí<sub>mi</sub>ayi.

24 Pítiur tuke chichaak ‘í<sub>mi</sub>iata, Yús<sub>n</sub>an etserin Samuer ju tsawantin túratniur<sub>i</sub> etserkamiayi. Nuyá ashí Yús<sub>n</sub>an etserniusha tuke nuna etseriar<sub>mi</sub>ayi.

25 Etseriarmia nuka atumin túramprume. Tuma asa á<sub>tu</sub>m pé<sub>n</sub>ker pujustinia<sub>n</sub> Yuska ii uuntr<sub>i</sub> Apraá<sub>ma</sub>n ju chichaman susamiayi. “Nekas tá<sub>ja</sub>me, ame shuarum akiiniattana nujai ashí áentsnasha shiir awajsattajai’ tí<sub>mi</sub>ayi. Tura ii ú<sub>n</sub>tr<sub>in</sub> tí<sub>mi</sub>a nú<sub>n</sub>aka incha túram<sub>j</sub>i, tí<sub>mi</sub>ayi.

26 Iimiata, Yus ni Uchirín iniantkimia nuí, atumin emka akupturmakmiarme. Atumsha, atumí tunaariya kanaktiarum tusa, tura atumin shiir awajtamsatniun wakerak túramiayi.” Nunak tímiayi Pítuur.

## 4

### *Pitruncha Juáñnasha kajerkarmiania nu*

1-2 Pítrusha Juanjaj Yusa chichamen áentsun jintintianiak pujuarmiayi. Jesus nantakin asamtai aencha nantaktin áiniawai, tiarmiayi. Tura chichaak pujuiniaj Israer-patri táarmiayi. Tura Yusa Uunt Jeen wainniu úuntrisha Satuséu aentcha táarmiayi. Taar Pitruncha Juáñnasha kajerkarmiayi, niisha Jesusa nantakmiarj chichaman jintintinia asamtai.

3 Yamaikia kíawai, kashin iismí tusar achik sepunam enkea iniaisarmiayi.

4 Tura Pitrun nuik anturkarmia nú aents untsurí Yus-shuar ajasarmiayi. Nuik Yus-shuaraim tura yamaiyaim iruram ti untsurí ajasarmiayi. Aya áishmankak, senku mir (5000) aents áirmiayi.

5 Kashin tsawarmatai Israer-shuara akupniurj, ni úuntrisha, tura ni jintin-niurisha Jerusarénum iruntrararmiayi.

6 Nuisha Anassa, Israer-patri uuntrj anaiamu amia nu, tura Kaipiassa, Juansha, Arejantrusha, tura Israer-patri kapitíantrj shuarisha tímian iruntrararmiayi.

7 Iruntrar Pitruncha Juáñnasha utitiarum tusar akupkarmiayi. Tura itiar-matai, ajapén awajsarmiayi. Tura aniasarmiayi “Kame zyana kakarmarijjaj, yana chichamejaj túrarum?” tiarmiayi.

8 Tutai nuyá Pítuur, ni enentáin Yusa Wakaní pimiutkamu asa tímiayi “Akupniutiram, tura úuntirmesha antukturum.

9 Jü áishman nuik shutuap amia nu péñker ajasmarj anintrarme. Kame itirak péñker ajasuit tátsurmek.

10 Urukamtia úuktataj. Anintrakrumin iisha paant títiatji, Israernumiaj shuar ashí nekaawarat tusar. Jü áishman Jesukrístu kakarmarijjaj péñker ajasuiti. Nasarénumiaj Jesukrístun, átum máamurmena nuna, tura Yus jakamunmaya iniantkimiania nuna tajai, tímiayi.

11 Nú Jesuska kayaa áintsangete. Atumsha jeamniutiram, nú kaya ya-jauchiiti, tímiarme Jesusna. Túrasha túramaitiatan Niisha jeanam emka apusamua núnisan ajasuíti, tímiayi.

12 Tura chíkichjaj uwempratin penké atsawai. Jü nunkanam ii chikicha naarj pachisar uwempratin atsaji. Jesuskete ii uwentikrampratniun Yus suramsamaj nu” tímiayi Pítuur.

13 Pítrusha Juansha nánkamas shuara áintsan áirmiayi. Núkap unuimiar-charu áirmiayi. Tura unuimiarhaitiat, arantutsuk etseriarmiayi. Aentsu uuntrj núnaka nekaawar “Nékachuitiat, itiuira sapijmiatskesha chichainia” tiarmiayi. Tura, júsha Jesusa namarin ármia núiti tiar nekaawarmiayi.

14 Nuyasha áishman péñker ajasmia nu niijjaj nuí wajamiayi. Tuma asamtai, niisha aj wajakuí, Israer-shuara úuntrjnkia, péñker ajaschaiti títiat tukamá tujinkiararmiayi.

15 Tuma ásar, iik nuamtak áujmatsatai tusar, Pítrusha Juansha shutuapsha aa awemartai, tiarmiayi.

16 Tura áujmataniak tiarmiayi “Jü Pítrusha jú Juansha itieurkatjik. Jü uunt túrunamun Jerusarénum matsatainia nu ashí nékainiatsuk. Wáititai titin tujintiaji, tiarmiayi.

17 Tura, ashí aents nekaawarajin tusar yamaik jiaktai. “Ju Jesusa naarj pachisrum penké jintintiarairap,” titiai” tiarmiayi.

18 Tura árusan Pitruncha Juánnasha shutuapnasha ataksha untukarmiayi. Tura chicharkarmiayi. “Jesusa naarj penké áujmatsairap. Tura Jesusa túramurj penké jintintiarap” tiarmiayi.

19 Tutai Pítiur Juanjaj*aj* áimkiarmiayi “Enentáimpratarum. ¿Yus warinia wakera? ¿Iikia Yus umirtsuk atumí chichameñ umirkatniukaitiaj? tiarmiayi.

20 Nekaatarum. Iisha íisjinia nu, tura antukjinia nusha ii etsertsuk pujustin tujintiaji.” Tu áimkiarmiayi.

21-22 Shutuáp penker ajasmia nu kuarenta (40) uwí nankaamas takakuyayi. Ni penker ajasmarin aents nekaawar, “juka aentsti túrachminiaitji” tusar Yusa naarin uunt awajsarmiayi. Tuma asamtai aentsu uuntri Pitruncha, Juánnasha asutiátai tukamá aentsun ashamainiak áyatik chicharkar iniaisarmiayi.

### *Yus-shuar Yusa kakarmarin seawarmiania nu*

23 Pítiur Juanjaj*aj* ankant ajaras ni írutramurjin wakеткиarmiayi. Tura jeawar Israer-patri uuntri tura aentsu úntrisha nin tiarmia nuna mash etserkarmiayi.

24 Nu ujakam antukar métekrak Yúsan áujuk tiarmiayi “Winia Uunt Yusru, Amesha nayaimpisha nunkasha najanaitme. Nayaantsasha tura juj*aj* írunna nusha najanamiáme, tiarmiayi.

25 Tura Tawit ámin umirtamin amia nu ju áamtikramiame:

“¿Urukantai ashí nunkanmayá aents charaatum ajainia? ¿Tura Israer-shuarsha urukantai ántar chichaman enentáimiania?

26 Uunt kapitíán ármia nuka chichaman jurusarmiayi Uunt Yúsan.

Tura pepu úntrisha iruntrar Uunt Yúsan kakerkarmiayi. Ni anaikiamurjin Kristun nútiksaj*aj* kakerkarmiayi.”

27 Tu áarmaiti, Uunta, tura nekasaiti. Erutis apachi kapitíantri Punsiu Piratujaj*aj* jú péprunam iruntrarmiayi. Niisha yajaya shuarjaj*aj* tura Israernumia shuaraim nuim iruntrarmiayi. Ame Uchirmin Jesusan tunaarinchan kakerkarmiayi. Jesuska Ame anaikiamiamie, winia takatrun túrat tusam.

28 Tura ame enentáimjaj*aj* iwiamamna nu uminkiatniuiti. Tura apachcha Jesusan kajerainia ásar, Ame iwiamamna tímianak umikiarmiayi.

29 Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichameñ ii ashamsuk etserkatin ame kakarmaram amasta.

30 Tura ame kakarmarmijaj*aj* jaasha tsuártin amasta. Ame Uchiram Jesus tunaarincha nujaj*aj* ii aentsti túrachmin túratniusha amasta. Aents Yusa kakarmarin nekaawarat tusam túrata” tiarmiayi.

31 Tura Yúsan tú áujas umikmatal nuiñ irunar pujuiniajñ úurkarmiayi. Túrunamtai ashí shuara enentáin Yusa Wakanj*aj* pimiutkarmiayi. Túmaitkiui ashamsuk Yusa chichameñ etserkarmiayi.

### *Wíniakete, tícharmiania nu*

32 Yus-shuar ajasarmia nu, ti untsuritiat, ashí chikichik enentainiak enentáimainiak, ni takaku armia nuna, aya wíniakete tútsuk, jusha ashí iiniu ainiawai, tiarmiayi.

33 Tura Jesusa akatramurjisha, Yus ti yayamu ásar, Yusa kakarmarjijaj*aj* Uunt Jesusa nantakmiarjin tuke etseras pujuarmiayi.

<sup>34</sup> Tura ashí Yus-shuarka nunkan takakusha jean takaku armia nusha, núnaka surukar kuítian itiararmiayi.

<sup>35</sup> Tura itiaar Jesusa akatramurjin súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi.

<sup>36</sup> Chikichík shuar, ni naari Jusé, nunkan takakuyayi. Jesusa akatramurjisha Jusén chíkich náarin apujtusarmiayi, Pirnapín. Nu náarjisha, shiir enentáimtikkiartin tawai. Tura Pirnapísha Riwí áentsuyayi. Tura ni akiinia-murj núnkenka Chípriiyayi.

<sup>37</sup> Niisha ni nunken surukmiayi. Tura nu kuítian itia Jesusa akatramurjin súarmiayi.

## 5

### *Ananías tunaari*

<sup>1</sup> Tura chíkich áishman, ni naari Ananías, ni nuwe Sapirjai ni nunken surukarmiayi.

<sup>2</sup> Niisha nunkan suruk kuítian emeenak akanak júkí Jesusa akatramurjin weri takamtsukea nútikias susamiayi. Ni nuwēsha, Sapir, nuna túran nekaamiayi.

<sup>3</sup> Túramtai Pítur chichaak “Ananías, ¿urukamtai uunt iwianch enentáimin enkemturmatai, Yusa Wakanin anankataj tusam nunka surukam kuit achikumna nu akankam ikiurmasam? tímiayi.

<sup>4</sup> Entá, nuiñkia nunka áminiuchukait. Surukumna nu kuitcha áminiuchukait. Nusha, ¿urukataj tusamea tu enentaímprom? Amesha aya áentsnum wáitruachume. Antsu Yusnumsha wáitruame” tímiayi Pítur.

<sup>5</sup> Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashankarmiayi.

<sup>6</sup> Nú turunamtai áishman tariar Ananías jakan penuararmiayi. Túrawar iwiarsatai tusar júkiarmiayi.

<sup>7</sup> Tura Ananías nuwe arur, menaintiú ura nankaamasaj támiayi. Túrasha ni áishri jakanka nekaachmiayi.

<sup>8</sup> Támatai Pítur nuwan tímiayi “Turuttia. Átum nunka surukurmena nuj, ¿kuit itiarumna núnikik surukuram?” tímiayi. Tutai nuwá tímiayi “Ee, núnik surukji.”

<sup>9</sup> Tutai Pítur tímiayi “¿Urukamtai atumsha Uunt Yusa Wakaní nekapkamsatai tusarum imiá enentáimprarm? Pai, iisiá. Ame áishrumin iwiarsatai tusar júkiaria nu wininiawai. Tura yamaikia amincha juramkiartatui” tímiayi.

<sup>10</sup> Tutai nu chichamaik niisha imia Pitru wajamunam jaka iniaantmiayi. Aishman wayaj tukamá jaka tepan wáinkarmiayi. Túramtai júkiar ni áishrinin ayamach iwiarsarmiayi.

<sup>11</sup> Tura ashí Yus-shuar armia nu tura ashí aencha nuna antukarmia nu ti ashankarmiayi.

### *Yusa kakarmarjijai túrawarmiania nu*

<sup>12-14</sup> Tura ashí Yus-shuar Yusa Uunt Jeen shikirjin irunin ármiai. Nu shikirjisha, Sarumúnna, tu anaikiamuiti. Tura chíkichmamtinkia nuim irun-tratniun ashamiarmiayi. Túmainiyatan, ti penker áiniawai, tu wearmiayi. Tura Yus-shuar Yusa kakarmarin iniakmasarmiayi. Túra asamtai imiá untsurj aents Yus-shuar ajasarmiayi.

15 Tura chíkich aents ni shuarj jainia nuna jintiá amamtikiarmiayi. Peakjaj júkiar, tampunmasha enkeawar júkiar jintiá ayamach áepsarmiayi. Pítiur nankaamak ni wakanínsha enkemprutmawainti tusar nu shuar túrawarmiayi.

16 Núnisan arantiā shuarsha ti untsurj ni shuarj jáinian tura iwianchrunkun-cha nu Jerusarēnum itirmiayi. Tura ashí nuj táaruka tsuámararmiayi.

17 Israer-patri uuntri, tura Satuséu aencha niijjaj pujuarmia nu suir iiniak

18 Jesusa akatramurj achikiar enkeawarmiayi.

19 Túrasha kashi Uunt Yusa suntarj nayaimpinmayā tara sepú wáitirj uraimiayi. Tura Jesusa akatramurj aa jíkikiarmiayi.

20 Tura tímiayi “Wetarum. Tura Yusa Uunt Jēen wajasrum Yusjaj tuke iwiaaku átina nu etserkatarum” tímiayi.

21 Nuna antukar kashin tsawar káshik Yusa Uunt Jēen wayawar jintinti-awarmiayi.

Nu túmainiaj Israer-patri uuntri, tura niijjaj pujuarmia nusha iruntrarmi-ayi. Tura Israer-shuara uuntri, naamka armia nuna iruntrami tusa untukarmiayi. Ashí iruntrar akatar akupkarmiayi, Jesusa akatramurj sepunmayā itiatarum tusar.

22 Tura suntarsha sepunam jeariar Jesusa akatramurj wáinkiacharmiai. Atsawai tukam táarmiayi.

23 Taar chichainiak “Sepú waiti asakamua tímianisan aa wáinkiaji, tiarmi-ayi. Tura suntar wáitin iimpru wajainia wáinkiaji. Tura waiti urair wayajj tukamar atsá wáinkiaji” tiarmiayi.

24 Israer-patri uuntri, tura Yusa Uunt Jēen wainniu úuntrišha, nu chichaman antukar, “tsej ausha žurutiak nunasha iniaisarat?” tiarmiayi.

25 Nu chichamaik áishman taa tímiayi “Aishman átum sepunam enkeamarmena nu, Yusa Uunt Jēen wajasar áentsun jintintiuk pujuiniawai” tímiayi.

26 Túrunamtaí Yusa Uunt Jēen wainniu uuntri ni suntarjijjaj wear achik itirmiayi. Túrasha penké aents kayajaj tukurmarajj tusar, yajauch awajtsuk itirmiayi.

27 Tura achik itiaar Israer-shuar naamka pujamunam naka awajsarmiayi.

28 Tura Israer-patri uuntri tímiayi “Iisha atumin chicháa chicharu awajsar, Jesusa naarj pachisrum etserkairap tusar akupkachmakajrum. Túrasha, žantukurmek? Atsá. Mash Jerusarēnum átum etserkamu pampañkai. Jes, átum, Jesusan máawarai, in tátsurmek. Nusha in makuutai tusarum tárume” tiarmiayi.

29 Nuyá tutai Pítiur chíkich Jesusa akatramurjijjaj chichainiak “Iikia aentsjainkia iniankasar Yus emka umirkatniuitji, tiarmiayi.

30 Jesus atumek krúsnum máamurmēna nuna ii iwiaaku Yusrj Nin inikimiayi.

31 Yus ni kakarmarjijjaj Nin nankaamantu awajsamiayi. Tura nekas Akupniuiti tusa ni untsurjini apujjamiayi. Tura áentsun Uwemtikniuiti. Israer-shuar enentái yapajjāwar tunaarjnia uwemprarat tusa Yus túraiti.

32 Nu tuma asamtaí iisha nu nekaar étserējai. Tura Yusa Wakanínsha nuna étserēawai. Túrasha aya Yusa umirkarua nunak ni Wakanín súsaruiti” tímiayi Pítiur.

33 Tutai nuna antukar ti kakerkarmiayi. Túrawar, maatai tusar wakeriarmi-ayi.

<sup>34</sup> Tura nuḡ Israer-shuara uuntriḡ pujumiayi, ni naari Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin ármiai. Tura niisha wajaki tímiayi “Ju áishmaḡ ḡḡ ishichik wajasarti” tímiayi.

<sup>35</sup> Nuyásha irunar matsamarmia nuna chicharuk “Israer shuartiram, ju áishmaḡ tú túratai tu enentáimsarumna nu aneartarum.

<sup>36</sup> Enentáimsatarum. Nuik áishmaḡ Tiútas wantinkiachmakia. Niisha kapi-tiániitjai takui, kuaru siántu (400) shuar nemarkarmiayi. Tura ukunam nin maawarmatai, ni némarkamuriḡsha pisararmiayi. Túrunawar nuni amuukami-ayi.

<sup>37</sup> Ukunmasha, iruntrar nekarmartin tsawantincha Kariréanmaya Jútas wantinkiachmaka. Tura nincha nútiksaḡ ti untsuriḡ nemarkarmiayi. Túman máawarmiayi. Nu túrunamtaí nútiksaḡ ni némarkamuriḡsha pisararmiayi.

<sup>38</sup> Jes, tuma asamtai nu áishmaḡ ḡḡ wajainia nu iniaisatarum. Auka pachisairap. Au tumainia nu aya áentsnaketkuinḡkia amuukattawai.

<sup>39</sup> Tura antsu Yúsnaítkuinḡkia atumsha amuktai tukamarum tujinkiat-tarme. Aneartarum. Iniaiyachkurmeka nu tumá pujusrum Yusjai máanikchattarmeash” tímiayi Kamarír.

<sup>40</sup> Tú tutai tímianak umikiarmiayi. Túrasha Jesusa akatramuriḡn untsukar asutiáwarmiai. Tura chicharuk “Jesusa naariḡ pachisrum penḡé ishichkisha etserkairap” tiarmiayi. Tú tiar akupkarmiayi.

<sup>41</sup> Jesusa akatramuriḡsha Israer-shuara uuntriḡ pujamunmayaḡ jínkiarmiayi. Tura wáitsamniaitrum tusa Yuska Jesusa naariḡ pachia asakrin ii natsantin wáitsatniun tsaḡkatramkaitji tusar ti shiir enentáimsar wearmiayi.

<sup>42</sup> Tura Jesukristunon áujmatsatniun penḡé iniaisacharmiayi. Antsu tuke tsawant Yusa Uunt Jēncha tura chíkich jeḡnmasha páchitsuk etseriarmiayi.

## 6

### *Yus-shuaran yainian siati anaikiarmiania nu*

<sup>1</sup> Nú tsawantin Yusan umirkaru ti kawenḡkar ármiai. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiayi. “Tuke tsawantin yurumak súarmena nuḡ atumí waje ti nukap súarme. Tura íniuka ishichik súarme” tiarmiayi.

<sup>2</sup> Túruinia Jesusa tuse akatramuriḡ ashí Yus-shuaran irurar tiarmiayi “Iisha Yus-Chicham etserkatín iniaisar yurumak súaschminiaitji.

<sup>3</sup> Tuma asamtai yatsurtiram, atumjiniḡ siati áishmaḡ eáktárum yurumkan súarat tusarum. Penḡer wekainia nu, tura neka shuar, Yusa Wakanḡ pimi-utkamu ainia nu achiktarum.

<sup>4</sup> Iikia antsu Yus áujkir unuiniakratkir Yusa chichameḡ etserkir wétatji” tiarmiayi.

<sup>5</sup> Akatramu tiarmia nuna ashí aents enentáimsar pujuarmiayi. Túmainiak Estepaḡkan anaikiarmiayi. Estepaḡsha Yúsan tuke enentáimtinuiyayi. Tura Yusa Wakanḡsha pimiutkamuyayi. Chíkich áishmaḡkan anaikiarmiayi, niisha jiripi, tura nuyá Purukuru, Nikianúrsha, nuyá Temuḡ, Parmenassha, Niki-urássa. Nikiurássa Antiukia nunḡkanmayaitiat Israernancha ashí umirni-uyayi.

<sup>6</sup> Tura nu siati áishmaḡkan Jesusa akatramuriḡn itiararmiayi. Táarmatai, akatramusha, Yus áujtusar, anaikiaji tusar múuknumsha ni uwejen awantsarmiayi.

7 Túrasha Yusa chichamenka tuke pampanki wémiayi. Nuj Jerusarénnumsha Yus-shuar ti kawenkarimiayi. Tura imia Israer-patrisha untsurj Yus-Chichaman umiriarmiayi.

### *Estepañkan Israer-shuara uuntriin júkiarmiania nu*

8 Estepañsha Yusa waitnenkartutairj pimiutkamuyayi. Tura Yusa kakarmarjsha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmarj nekaawarat tusa túramiayi.

9 Israer-shuar iruntai jea, ni naarj Ankantín, ámiayi. Nuyá áishmanjsha tura Serini nunkanmayá áishmanjsha, tura chíkich nunka Arijiantrianmayasha, Serisianmayasha, Ásianmayasha, tímian Estepañjají áujmatsatai tusar káutkarimiayi.

10 Estepañ Yusa Wakanj nekatairjijají tímianak chicháa asamtai, nu áishman Estepañjají inkiunaikiar nupetkataj tukamá tujinkiarmiayi.

11 Tuma asamtai suiir enentáimtuiniak chíkich áentsun Estepañkan tsanumprurarar tusar eákarimiayi. Estepañ Muisaisnasha Yúsnasha yajauch áujmatuí, titiarum tusar akikiarmiayi.

12 Penké áentsun, tura uunt ainia nunasha, jintintin ármia nujajisha chichaman júsar yajauch enentáimtikrarmiayi. Tura Estepañkan jintiá akirtuawar achikiarmiayi. Túrawar Israer-shuar naamka matsamarmia nuj júkiarmiayi.

13 Tura wait chichamtinian itiarimiayi. Niisha taar chicharainiak “Yusa Uunt Jeeñ ti péñker ana nu, tura Yusa akupkamuríncha ju Estepañ tuke yajauch chicharuí, tiarmiayi.

14 Nú arantcha ju Estepañ tímia nu antukji, tiarmiayi. Estepañ chichaak “Nasarénumia Jesúska Yusa Uunt Jeeñ sáaktiatuí, tura nuyá Muisais in ikiurtamkimiay nunasha yapajíttawai” tímiaayi. Nusha Estepañ tímia nu antukji” tiarmiayi. Tura nunasha penké ántar tsanumprurarmiayi.

15 Nuyasha ashí Israer-shuar naamka iruntramunam pujuarmia nu Estepañkan iyaj tukamá ni yapin nayaimpinmayá suntara yapiya nuní íran wáinkiarmiayi.

## 7

### *Estepañ etserkamiania nu*

1 Tuma wáiniak Israer-patri uuntri Estepañkan aniasmiayi “¿Ju tuinia nu nekaskait?” tímiaayi.

2 Tutai niisha áimkiamiayi “Winia úntrutirmesha, yatsurtirmesha anturtuktarum. Ii Waantu Yusrj ii uuntriñ Apraáman wantintiukmiayi. Apraámka Misiuputámia-Kartea nunkanam pujají, Aran nunkanam wéatsain, nuj wantintiukmiayi.

3 Tura wantintiuk tímiaayi “Ame nunkemsha áminiurmesha ikiukim nunka Wi iniaktustatjamena nuj wetá” tímiaayi Yus.

4 Tutai Apraám Misiuputámia-Kartea nunkan ikiuki Aran nunkanam pujustaj tusa wémiayi. Nuyá ni aparj jakamtai “Arant wetá” tímiaayi Yus. Nuna taku ju nunkan ii pujajnia jui pujsamiayi.

5 Túrayat nunkan ishíchkisha súsachmiayi ju nunkanam. Antsu “Ukunam amastatjai. Ame jakakmin ame uchirmin susattajai” tímiaayi. Tura Apraama uchirj penké atsan nuní tímiaayi Yus.

6 Nuyasha Yus tímiayi “Ame uchirmesha írara núnisaraṅ chíkich nuṅkanam pujusartatui. Nuísha emetamu itit awajtai pujuartatui. Kuaru siáṅtu (400) uwi, tímiyanu uwi wáitsartatui, tímiayi.

7 Túrasha, Wi asutiáttajai ame shuárumin wáitkia núnaka, tímiayi. Túram nuyá nú nuṅkanmayá shiákartatui. Tura Winia enentáimtursartatui jú nuṅkanam’ tímiayi.

8 Yus tuke Apraámasha chicharuk ‘Yamaikia Wíi-shuar asarum tsupirnak-tiniaitrome. Tuma asam amesha uchiram áishmaṅkach akiiniamtai, Wi tímiajna núnismek, sirkunsisiún tutai, shunichirí nuape tsupirkata, tímiayi. Tura chícham Wi yamaikia ámiijai najanaj nu nekas uminkatniuiti tusam nusha túrata” tímiayi Yus. Tuma asamtai ni uchirí Isak akiiniamtai, uchu tsawant naṅkaasmatai, Apraám nin tsupirkamiayi. Tura Isaksha ukunam ni tuse (12) uchirín ii uuntrí armia nunasha nútiksāṅ túramiayi.

9 Tura niisha ni yachín Jusen suiir íyarmiayi. Túmainiak Ejiptu nuṅkanam júkiarat tusar surukarmiayi. Túrasha Yus némarkauyayi.

10 Tuma asa, ashí ni itiuurchatríniá uwemtikramiayi. Tura waitnenkartu-tairíncha nekatairíncha susamiayi. Tuma asamtai Ejiptunam uunt akupin Paraún Ejiptu nuṅkaa akupniurí ajasat tura ni jeen wáinniurí ajasat tusa anaikiamiayi.”

11 “Tímiatam tsuka tura itiuurchatcha ámiayi Ejiptu núṅkanam. Tura júi Kanaaṅ nuṅkanmasha núnisaṅ ámiayi. Tuma asamtai ii uuntrí yurumkan penké wáincharmiayi.

12 Tura Jakup, Ejiptunam yurumak ikiusma awai taman antuk ni uchirín akupkarmiayi. Túrasha wekaicha wearmiayi. Wats, ii uuntríniun ujaajrume.

13 Tura ii uuntrí atak Ejiptunam wéenak Jusesha, wítjai takui ni yachí Jusen nekaawarmiayi. Tura Jusé “Yatsur ániawai” takui Paraún, antuk “au shuarapitia” tímiayi.

14 Nuyāṅka Jusé ni yachín chicharuk “Apar itiatarum uchirtuk” tímiayi. Nu shuarsha untsurí, setenta seṅku (75) matsarmiayi.

15 Nuní tutai Jakupsha ni shuaríjiai Ejiptunam pujustai tusar wearmiayi. Tura ukunam nú nuṅkanmaṅ jakamiayi. Tura ni uchirísha ii uuntrí ainia nu, núnisaraṅ nú nuṅkanmaṅ jákarmiayi.

16 Tura atak ukunam ni shuarí Sikiam nuṅkanam ni ukunchín júkiar iwiarsarmiayi. Kame Sikiam nuṅkanam Apraámka yaunchu játsuk Amura uchirí nuṅken sumakmiayi. Túramtai nuí iwiarsarmiayi’ tímiayi.

17 ‘Yus, Apraáman chicharuk “Nekas wi susattajme” tímiania nú tsawant jeatemamtai, Ejiptu nuṅkanam Israer-aents pampanki ti kawenkarumiayi.

18 Nu tsawantíncha Ejiptunam chíkich akupin naamka ámiayi, tura Jusen nekaachmiayi nii.

19 Nu akupin ii yaunchu úuntrín anāṅkawar yajauch awajarmiayi. “Atumí uchirí kuírchich ana nu ajapa ikiuktiarum” tu wémiayi. Pampankaraiṅ tusa tímiayi.

20 Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi.

21 Tura nuyá ajapa ikiuktin jeamtai entsá apujsamiai. Uunt Paraúnka nawantrí Muisaisan wainiak jukimiayi. Achik, ni uchirínia tímiatrusaṅ júki tsakatmarmiayi.

22 Tuma asa Muisais unuimiátrauyayi ashí Ejiptu aents nékarmia nuna. Túramurísha chichamesha kakarmauyayi.’



23 Estepañ tuke étseruk juna tímiayi: ‘Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuarí asamtai.

24 Nuyá we Ejiptunmaya áishman ni shuarín máatasa pujurun wáinkiamiayi. Tura Muisais ni shuarín ayamprak Ejiptunmaya áishman kan máamiayi.

25 Wíi turamujaj Yuska Israer-aentsun uwentikrattawai, tu nekaamiayi Muisais, Yus timia asamtai. Tura Israer-aencha áintsaran nékainiawai tu enentáimsamiayi. Túrasha nínkia nekaacharmiayi.

26 Kashin tsawar Muisais ni shuarí jímiar maani pujuinian wáinkiamiayi. Tura nawamnaikíarat tusa “¿Urukamtai nuamtak yatsumjajsha yajauch awajiarum?” tímiayi.

27 Tutai emka nankaama nu Muisaisan kárut shitiá “¿Ya amincha ii akuptamin tura ii chichartamin anaitiamkamam?”

28 ¿Winiasha maantuátaj tusam wakeramek, yaú Ejiptunmaya áishman máamamna nútiksamkea?” tímiayi.

29 Nuna antuk Muisaiska Matian nunkanam pisar, nú nunkanam kuarenta (40) uwí yajaya áintsan pujumiayi. Nú nunkanam pujus, nuatak, jímiará uchin yajutmarmiayi.’

30 ‘Kuarenta uwí nankaamas, nu atsamu nunkanam Senai náinnium tíjjuuch Yusa suntari nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi.

31 Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi.

32 Yus tímiayi “Wiitjai Yus. Ame úntrumí Apraáma Isaka, Jakupa Yúsríntjai” tímiayi. Tutai antuk Muisaiska ti kuraimiayi sapijin. Tura ístinian tujinmiayi.

33 Nuyá Uunt Yus tímiayi “Úntrun shiir awajсатаj tusam, ame sapatrum ukuñkiam ikiuktia, wajamna nuj Wí pujaku.

34 Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura útainia nunasha antukjai. Tuma asamtai uwentikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

35 Estepañ tuke étseruk: ‘Ju Muisaisan ni shuarí “¿Ya amincha ii akuptamin tura ii chichartamin átinnisha anaitiamkamam?” tiarmia nuna Yuska akupniun anaik uwentikrarat tusa awainki akupkamiayi. Numiniam ni sunfari wantintiukmia nuna chichamejai Yuska Muisaisan akupkamiayi, tímiayi.

36 Muisaisaiti Israer-aentsun Ejiptunmayan uwentikramia nu. Yusa kakarmarin nekaawarat tusa, aentsti túrachminian untsurín túramiayi Ejiptu nunkanam. Nuyá Kapaántin Nayaantsanmasha, tura nuyá kuarenta (40) uwitin atsamunam pujuiniajsha ti kakarman iniaktusmiayi.

37 Jú Muisaisak Israer-shuaran chicharuk “Atumíinínak etserniun Yus ukunam anaikiattawai, winia anaitiukma áintsan. Tuma asamtai nu shuarsha umirkamniuram” tímiayi.

38 Jú Muisais Israer-aentsjai atsamunam pujumiayi. Senái nainnium Yusa suntari níjjajsha pujumiayi. Tura Muisaiska ii úntríjjaj pujumiayi. Níiyaiti iwiaaku pujustin chichaman sunasmia nu. In ujatmaktinian sunasmiai.’

39 ‘Túrasha ii yaunchu uuntri Muisaisan umirkatniun nakitiarmiayi. Áaniuk imiá umirtaint tusar Ejiptunam waketkitniun wakeriarmiayi.

40 Túmainiak Muisais Yusjaj chichastajtsa murá wématai nu shuar Muisaisa yachin Arunkan tiarmiayi “Ii yusrj najanatá, ii nemarsatin. Áaniusha Muisaissha Ejiptunmayá in juramkiyatcha tútsuk weruma” tiarmiayi.

41 Nuyá wáakachia áaniun najanawarmiayi. Túrawar, júiti ii yusrj tusar, kuntinian maantuawarmiayi, nu susatai tusar. Tura ni uwejejjaj najanamun ísar ti wararsarmiayi.

42 Nuna túruinian wániak Yus, iniaisajai taku, niyya kanakmiayi. Nii wak-erak yaan tikishmatrarti, tímiayi. Tuma asamtai, yaunchu Yusa etserniurj juní áarmiayi:

““Israer-aentsu, kuarenta (40) uwitin atsamunam wekaimiarmena nuj, ¿Winiak kuntin maanturtuamarum? Winia surustai tusarum penké túrachurme, tímiayi Yus.

43 Antsu, Muruk naartin ántar-yusa pujamurj in jukimiarme. Tura chikich ántar-yussha, ni naarj Rempan, yaa áanin najanarum nusha jukimiarme. Júkin asakrumin atumí nunkeya jukin, tímiaj Papirúnia nunkan nankaiki akupkatjarne” tímiayi Yus.”

Nuní áarmaiti’ tímiayi.

44 Estepañ tuke étseruk: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánatá” tímiayi. Tutai Muisais Yus tímianak umikmiayi. Nu jean ii uuntrj yaunchu takaku áarmiayi.

45 Nu jean ni uchirj akintkiar akintkiar wearmiayi. Ukunam, jú nunka achiktin jeamtai, Yuska kapitían Jusuejjaj jú nunkanmaya aentsun jiji akupkarmiayi. Tura ii uuntrj kapitían Jusuejjaj winiarmia nu, nu jeancha jú nunkanam itiarimiayi. Tura Tawit uunt akupin náamtsajin, ii úntrisha nu jean takaku áarmiayi.

46 Kame Yus Tawitian yájau enentáimtichmiayi. Tuma asamtai Tawit Yus shiir pujustinian jean jeamtinian seamiai.

47 Túrasha antsu Tawitia uchirj Sarumún Yusa jeen jeammiai.

48 Túrasha aents jeammanuman Uunt Yus pujuschamniaiti. Jes, yaunchu Yusa etserniurj Yus tímia nuna áarchamkia.

49 Juna áarmiayi:

“Nayaimpikia winia pujutairuiti. Nunkanmasha nawer tarimui.

¿Warí jea najatruatai tusarnea tarum? tímiayi Uunt Yus.

Tura Wi ayampratniusha, ¿tuji aa?

50 Wiki winia uwejrujjaj ashí najanachmakiaj” tímiayi.’

51 Estepañ tuke étseruk: “Tura átumka Israer-shuartzirmeka atumí enentájjiaj tuke umichuitrume. Atumí kuishjsha weaktsui tura Yus nékachua núniniaitrume. Yusa Wakaníjjiaisha tuke nemasnaikaitrume. Tura atumí yaunchu úntrijjjaj métek túrarme’ tímiayi.

52 Íisia, atumí úntrisha Yusa etserniurj in tuke kajerin áarmiayi, tímiayi. Tura nú arant atumí úntrisha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anañkarum máachmakuram, tímiayi.

53 Tura Yusa suntarj nayaimpinmayá Yusa chichamen susamuitiatrum atumsha penké umikchamarne” tímiayi Estepañ.

### *Estepañka jakamuri*

54 Israer-aencha Estepañ tu chichaamu antukar imiá kajerkar nain kátetete awajarmiayi.

55 Tura Estepañsha imiá Yusa Wakaní pimiutkamuyayi. Tuma asa nayaimpinmaani ímias, Yusa wincharin, tura Yusa untsuurinini Jesusan wajan wáinkiamiyi.

56 Tumá wáiniak Israer-áentsun tímiayi “Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuurinini wajan wáinjai” tímiayi.

57 Támaitiat niisha kuishin akiriarmiayi, tura achiktai tusar charáa tiar ashí wajatkiarmiayi.

58 Túrawar, péprunmayá arant júkiarmiayi. Tura antuk etserkarmia nu pushirin áikiar, natsa Sauru wajamunam au iisti tusar áeprusarmiayi. Tura máawartai tusar kayajai tukurarmiayi Estepañkan.

59 Tura Estepañka tukamaitiat Yúsan áujсамиayi. Tura áujuk “Uuntru Jesúsá, winia wakantrusha jurutkitia” tímiayi.

60 Tura tikishmar aujuk “Uunta, ju winia túrutainiana ju makuip” tímiayi. Tura nuna ti iniais, jakamiayi.

## 8

### *Sauru Yus-shuaran kajerkarmiania nu*

1-2 Estepañkan máawarmatai Sauru, péñkeraiti, tímiayi. Tura áishman Yúsan péñker enentáimta armiania nu, Estepañka ayashincha iwiarsarmiayi, tura aneank ti uutiarmiayi. Tura nú tsawantai Yus-shuaran Jerusarénum pujuarmia nuna ti kajerkatin nankamnamiayi.

3 Sáuruka Yus-shuaran kajerak ti pataat wémiayi. Túmak nuí jeá wayá, nuí wayá áishmanasha nuwancha wáinkianka japiki juki sepunam enkeataj tusa túrimiayi. Tumakui Yus-shuar Jerusarénumia pisarar Jutía nunkanam, tura Samaria nunkanmasha jeawarmiayi. Jesusa akatramurinkia antsu Jerusarénuman juakarmiayi.

### *Samaria nunkanam etserkarmiania nu*

4 Túrasha Jerusarénumia aents pisararmia nu, arant wénaksha tuke Yusa chichamen etserkini yujarmiayi.

5 Tura Jiripi Jerusarénumia we tura chíkich péprunam Samaria núñkanam ámiania nuí jeá, chichaak “Yus anaikiamu ana nu Jesusaiti” tu etsermiayi.

6 Túrakui aents iruntrar chikichik enentáijjai Jiripi étseraemun titiú pujusar antukarmiayi. Yusa kakarmarin nekaawarat tusa aentsti túrachminian túrimia nunasha wáiniarmiayi.

7 Ti untsurí aents iwianchruku ármia nuna Jiripi nu iwianchin jírki akuptiarmiayi. Tura íwianch jíiniainiak kakantar charáa tiar jíiniarmiayi. Tura ti untsurí emearusha shutuapsha péñker ajasarmiayi.

8 Tuma asamtai nú péprunmayanaka ashí shuar ti warasar pujuarmiayi.

9 Tura nú nunkanam uwishin Semuñ pujumiayi. Nuikkia wi ímianaitjai tusa Samarianmayá aentsun anañniuyayi.

10 Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semuñsha Yusa kakarmaríjjai áitkiawai.”

11 Tura ti untsurí uwí wawekratmaríjjai anankarta asamtai, umirkarmiayi nu aents.

12 Túrasha Jiripi Yusa akupeamurin, tura Jesukristununcha shiir chichaman etserkamiayi. Tura, nuna antukar nuwasha áishmansha umikiar imian wearmiayi.

13 Semunsha imia uwishniuitiat Yus-Chichaman enentáimtus imianmiayi. Tura Jiripijjaj tسانی wekaimiayi. Yusa kakarmarın shuar nekaawarat tusa Jiripikia aentsti túrachminian túrimiayi. Nuna wáiniak Semun ti enentáimsamiayi.

14 Tura Jesusa akatramurjsha Jerusarénum pujuarmia nuj Samarianmaya aents Yusa chichameņ umirainiawai taman nekaawarmiayi. Tuma asantai Pitruncha Juágnasha nekáa ikiuutarum tusa akupkarmiayi.

15-16 Tura Samarianmaya Yus-shuarsha aya Uunt Jesusa náariņ imianarmiayi. Yusa Wakanıńkia tárachmiayi. Tuma asantai Pitrusha Juanjaj nuj jeawar Samarianmaya Yus-shuara enentáin Yusa Wakanı pimiutkarat tusan Yusan áujtusarmiayi.

17 Tura áujtua umikiar Pítur Juanjaj ni uwejeņ nú Yus-shuaran awantsarmiayi. Nuińkia Yusa Wakanı taramiayi.

18 Jesusa akatramurj uweje awaşmanum Yusa Wakanı taramtai, Semunsha nuna wáiniak, kuitjaj nu kakarman sumaktaj, tímiayi.

19 Tura Jesusa akatramurj chicharuk tímiayi “Winiasha kuitjaj surustarum nu kakaram. Wisha nútiksanak nánkamas aentsnum winia uwejur awantsam Yusa Wakanı tarurat tusan tajaj” tímiayi.

20 Tutai Pítur tímiayi Semunkan “Ámeka kuńtrumjaj métek menkakatniutme. Warı, Yus amaana nu ¿kuitjaj sumaktinkiait?

21 Yus esetram enentáimtachu asam nu túramu pachistincha penké tujinkime, tímiayi.

22 Enentáimprata. Túram Yus seata. Enentáimtamna nuna Yus tsankurtamprashtimpiash.

23 Nékajme, tsańkea áintsan yapá enentáimin pimiutramkaiti. Tura tunaarmıj jinkiamua núniniamtme” tímiayi.

24 Tutai Semun áimkiamiayi “Uunt Yus aurtursatarum. Túrutrumna nuna túrunawaj tusan tajaj” tímiayi.

25 Nuyasha Jesusa akatramurj Jesusa túramurj nú áentsun ujakarmiayi. Tura wésar Samaria nunkanam pepru ámunmańka Yus-Chichaman nuj etserkiar, nuj etserkiar Jerusarénum wakеткиarmiayi.

### *Jiripi Yus-Chichaman etserkamiania nu*

26 Tura Yus ni suntarj nayaimpinmayan Jiripincha akuptukmiayi. Niisha chicharuk tímiayi “Wátskea. Juya jıinkim Jerusarénumia jintia Enkasa péprunam wea nunı weme, anaraanı wetá. Nú jintiaka atsamu nunkanam nankaamawai” tímiayi.

27 Tutai Jiripisha wémiayi. Jintiá wesa Itiupianmaya áishmańkan wáinkiamiayi. Nú áishmańsha Itiupia nunka akupniurj, ni naari Kantasen takarniuyayi. Kantaseka núwauyayi. Tura nu áishmań ti neka asa nuna kuńtrin írniuyayi. Nú áishmańsha Yusan áujsataj tusa Jerusarénum wéu wáketmiayi.

28 Karetanam enkemar wesa, Yusa etserniurj Isayas aarmia nuna aujki wémiayi.

29 Wats, Jiripi nú jintianam wéakui, Yusa Wakanı nin tímiayi “Nú kareta amayáńta.”

30 Tura Jiripisha amayáń, Yusa etserniurj Isayasa áarmarj áujun antuk, chicharuk “¿Aujeamna nu nékamek?” tímiayi.

31 Tutai nú áishmañ tímiayi “¿Itiurak nekaataj? ¿Yaki jintintruat?” tímiayi. Tura antsu iijjaj wetái tusa, Jiripincha enker jukimiayi karetanam.

32 Nu papí áarman áujmia nu júuyayi: “Murikua áitkiasañ jákatniunam júkiarmiayi. Tura uchich murik, ure tsúpiram chichaatsna núnisan niisha chichakchamiayi.

33 Nincha iniatsáarmiayi. Túrasha penké chichamnaka tútsuk tsañkamakmiayi. Niisha nunkanam iwiaaku pujá maamu asamtai, ¿yaki nuna áujmatkat?” Nuní aarma ámiayi.

34 Kantase takarniurj Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniurj níñkik túmama? ¿Chikichnash ta?” tímiayi.

35 Nuyá Jiripi nu aarman áujtus “Júka Jesusnan tawai” tímiayi. Tura nú arantcha Yus-Chichaman ujakmiayi.

36 Nuyá entsa ámanum nankaamak áishmañ Jiripin chicharuk “Juí entsá jeaji. Wikia juí imianchamniakaitaj” tímiayi.

37 Tutai Jiripisha tímiayi “Tukey enentáimjaj Jesus nekas enentáimtakminkia túramniaitjame.”

Tutai áishmañ chichaak “Ee nekasaiti, Jesukrístuka Yusa Uchirínti tajai” tímiayi.

38 Tura, karetan awajas mai jíinkiar entsá wearmiayi. Nuí Jiripikia Kantase takarniurj iniaimiayi.

39 Tura kukar jíinkiar matai Uunt Yusa Wakanj Jiripinkia jukimiayi. Tuma asamtai Kantase takarniurjsha Jiripin wáinkiachmiayi. Túrasha níñkia waras wémiayi.

40 Jiripisha jeachat Asutu péprunam wantinkiamiayi. Tura nuyá jíinki péprunam nuí wayá, nuí wayá Yus-Chichaman etserki we, Sesaria peprunam jeamiayi.

## 9

### *Sauru Jesusan umirkamiayi*

*(Túramuri 22.6-16; 26.12-18)*

1 Nuna tumaj, Jerusaréñnum Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntrj iyutaj tusa werimiayi.

2 Tura jeari tímiayi “Papí ame naarmijjaj áaram surusta. Wi nuna papí jukin timiaj Tamasku péprunam jean, Israer-shuar iruntainiam wayattajai. Túran nú papijjaj Jesusan umirkaru ainia nuna, nanksamán achikiartatjai. Túran áishmanasha nuwancha achikian jinkian, juí Jerusaréñnum enkeataj tusan ikiaankattajai” tímiayi.

3 Tura papí susam Sauru jintiá wéaj, Tamasku péprunam nuntumsaj nuí aya aneachma nayaimpinmayá tsáapin jíitsumir téntakmiayi nin.

4 Túrunamtai Sauru nunká iniaarmiayi. Tura nayaimpinmayá chichaamun antukmiayi. “Sauru, Sauru, ¿Urukamtai yajauch awajustaj tusam imiá pataaturam?” tímiayi.

5 Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nuí, amek enentáimin yajauch awajmamsame, waaka sankanmiak numin ijiuma núnismek” tímiayi.

6 Nuyanka Sauru sapijin kuranki tímiayi “Nuiñkia Uunta, ¿wi warinia iturkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nuĵi jeawakmin ame túratamna nuna turamiartatui” tímiayi.

7 Tura Sáuruĵai irunar wearmia nu, chichaamun antukarmiayi. Tura áentsnaka penké wáinkicharmiayi. Tuma ásar ti ashankarmiayi.

8 Nuyá Sauru nuńká tepá nantakmiayi. Tura wáinmaktaj tukamá wáinmakchamiayi. Tuma asamtai chíkích shuar uweĵnum enĵekiar júkiarmiayi Tamaskunam.

9 Nuĵi jeá menaintiu tsawant ímĵsuk tura yurumĵsuk penké úmĵsuk puĵumiayi.

10 Nuĵi Tamaskunam Yus-shuar Ananías ámiayi. Nin mesekranam Uunt Jesus tímiayi “Ananías.”

Tutai “¿Wari wakeram, Uunta?” tímiayi.

11 Nuyá Uunt Jesus tímiayi “Wajakim ĵintia, Naka tutaiya nuĵi wetá. Nuĵisha ĵutasa jeen jeam, Társunmaya Sáurun eaktaj tusan winiĵiai, titiá, tímiayi. Niisha Yúsan áuĵuk puĵawai.

12 Tura ĵuna mesekranam ipiatkamĵai Sáurun. Aishman wayá ni uweĵéĵai ántiawai, ataksha ímit tusa. Nú áishmanĵa ámetme, Ananías” tímiayi Jesus.

13 Táman antuk Ananías chichaak “Túrasha Uunta, ĵu áishman ame áentsrumin Jerusaréĵnum ti yajauch awajchakait. Ni yajauch túramurĵn ti unĵurĵi aents ujatainiawai, tímiayi.

14 Tura yamaisha Israer-patrĵi chicharniun papirĵn takakui. Tura nuĵai ame náarmin páchiaĵ nuna achik ĵukitĵaj tusa tímiajaĵsha tarutramĵi” tímiayi Ananías.

15 Tutai Uunt Jesus tímiayi “Áankisha wetá. ĵu áishmanĵan winia etserniur atĵ tusan achikĵai Wi. Niisha Israer-shuarchancha tura kapitĵániasha tura Israer-shuarnasha wĵnian etserin átatui, tímiayi.

16 Tura Sauru winia náarun páchia asa ti wáĵsattana núnaka nin iniaktustatĵai” tímiayi Jesus.

17 Tura Jesus táman umirak Ananías Sauru puĵamunam wémiayi. Tura jeari wayá uweĵén awantas tímiayi “Yatsuru Sauru, Uunt Jesus ĵintiá wantintiur-makmamna nusha ame ataksha ímiat tusa, tura Yusa Wakanĵsha enentáimin pimiutramkat tusa winia akuptukai” tímiayi.

18 Nu chichamaik ni ĵiĵiĵa namaká saepeya áanin iniaarmiayi. Túrunamĵai ataksha ímĵmiayi. Túruna wajaki we imianmiayi.

19 Nuyasha yurumámiayi. Tura yurumásha kakaram ajasmiayi. Tura Yus-shuarĵai Tamaskunam wárumchik tsawant puĵusmiayi.

### *Sáuruka Tamasku péprunam Yus-Chichaman etserkamiania nu*

20 Nuyanka Sauru Israer-shuara iruntairĵn wayá Jesusa túramurĵn etserkamiayi. Etserek tímiayi “Nekasaiti, ĵu Jesus Yusa Uchirĵnti” tímiayi.

21 Nuna ashí anturú puĵuiniaka “¿Ausha urukakua aania? tiarmiayi. Entá ĵu áishmanĵsha Jerusaréĵnum Jesusan enentáimtuinian ti pataatimia núchakait. Tura tímiajaĵsha nuna achik Israer-patrĵi akupniurĵn ĵukitĵaj tusa tamia núchakait” tiarmiayi.

22 Tura Sáurusha sapiĵmiatsuk etsermiayi. “ĵu Jesus nekas áentsun Uewtĵkniuiti” tu etsermiayi. Tura ti paant étserkui, Tamaskunmaya Israer-aents, nekaschaiti titĵaj tukamá tujinkarmiayi.

23 Tura ukunam, Israer-aents Sáurun maatai tusar chichaman jurusarmiayi.

<sup>24</sup> Tura Sáurusha nu chicham jurusman nekamamiayi. Israer-aents pepru jínmanum tuke tsawajsha, káshisha achikiar maatai tusar jintian akirtiarmiayi.

<sup>25</sup> Nuna antukar Yus-shuar Sáurun chiiknium kashi enkeawar itiararmiayi. Pepru tanishnum itiarar awemarmiayi.

### *Sáuruka Tamaskunmaya Jerusarénum wémiania nu*

<sup>26</sup> Tura Sauru Jerusarénum jeá Yus-shuarjaj iruntratts wakerimiayi túrasha nínkia ashamiarmiayi. Sáurusha nekas Yus-shuar ajaschaiti tusar ashamiarmiayi.

<sup>27</sup> Túmainiajn Pirnapí Jesusa akatramurj matsatmanum jukimiayi Sáurun. Tura nuj ejé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarjn etserkaiti” tímiayi.

<sup>28</sup> Tura Sauru Jerusarénum juákmiayi. Tura Yus-shuarjaj irunar pujumiayi.

<sup>29</sup> Nuyasha Yus, etserkata tutai, sapijmiatsuk Jesusa túramurjn etsermiayi. Tura Israer-shuar Kriaku chichaman chichau ármia nu, nuj pujuarmiayi. Sáurusha nu shuarjaj áujmatsarmiayi. Túrasha nu shuar Sáurun itiu máatjik tusar chichaman juriarmiayi.

<sup>30</sup> Tura Yusaj yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

<sup>31</sup> Tura Jútianmaya, Kariréanmayasha, Samarianmayasha Yus-shuar shiir tímiajnisan ajasar kakaram ajasarmiayi. Yúsan ashamainia ásar, tura Yusa Wakaní yayamu ásar kawenki kawenki wearmiayi.

### *Pítiur Eneasan yáinmiania nu*

<sup>32</sup> Tura Pítiur Yusaj yachi armiania nuj iráa wekaimiayi. Wekaak Yus-shuar Rítianam matsamarmia nujsa irauumiayi.

<sup>33</sup> Nujsa Rítianam jeá áishmankan Eneas náartinian wáinkiamiayi. Niisha emearu asa wekaicha uchu uwí aya tépenuyayi.

<sup>34</sup> Tura Pítiur chicharuk “Eneasa, Jesukrístu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi.

<sup>35</sup> Nuna túman wáinkiar Rítianmaya aents tura Sarunmaya aencha enentáimprar Uunt Yusan nemarsarmiayi.

### *Nuwá Túrkas nantakmiania nu*

<sup>36</sup> Túrasha Jupe péprunam nuwá Yus-shuar pujuyayi, ni naari Tapitia. Tura nusha Kriaku chichamjainkia Túrkas tuiniawai. Nu nuwasha nuj pujus tuke pépker túriniuyayi. Tura niisha nútiksaj yaj wémiayi.

<sup>37</sup> Nu tsawantinik Túrkas sunkuran jateemak jakamiayi. Túrunamtai ayashin nijiarar yakí tesaamunam áepsarmiayi.

<sup>38</sup> Jupe péprusha Rítianmaya tíjjuuch ámiayi. Júpenmaya Yus-shuar Rítianam Pítiur pujan nekaawar jimiará áishmankan akatrar akupkarmiayi, Júpenam wari winití tusar.

<sup>39</sup> Nuj tutai Pítiur níijaj wémiayi. Tura támatai jaka tepemia nuj awayáwarmiayi. Nu wayamtai waje pujuarmia nu útkiar Pítrun téntakarmiayi. Túrawar pushirjn, Túrkas iwiaaku pujus najankamia nuna iniaktusarmiayi.

<sup>40</sup> Nuyañka Pítur aa akupkarmiayi ashí. Tura niisha nin̄ki tikishmar Yúsan áujsamiayi. Nuyasha nuwan̄ jaka tepaan̄ iis t́imiayi “Tapitia nantaktia.” Tutai niisha íimi Pítur wajaan wáiniak nantaki pujusmiayi.

<sup>41</sup> Tura Pítrusha nuwan̄ uwejn̄um achik awaj̄kimiayi. Tura iniais Yus-shuar ármia nuna tura wajencha untsukar Túrkas iwiaaku ajasun̄ iniaktusarmiayi.

<sup>42</sup> Nu túrunamun̄ ashí aents̄ Jupe péprunmaȳa nekaawarmiayi. Túrawar untsur̄í aents̄ Uunt̄ Jesusan̄ umirkarmiayi.

<sup>43</sup> Tura Pítruka Jupe péprunam untsur̄í tsawant̄ nuapen-iwiarin̄ Semun̄ka j̄eēn̄ pujusmiayi.

## 10

### *Pítur Kurnirij̄aj̄*

<sup>1</sup> Sesaria péprunam Kurniriu naartin̄ suntara kapitian̄tr̄i pujumiayi. Ni suntar̄j̄ Itiaria nun̄kanmaȳa ármiai.

<sup>2</sup> Nu kapitian̄ Kurniriu ni shuar̄ij̄aj̄, Yuska nan̄kaamantuiti, tu enentáimtiarmiayi. Tuma ásar Yúsan enentáimtin̄ ármiai. Tura nútiks̄an̄ kuítniasha takakchan̄ yáin̄taj̄ tusa Israer-shuaran̄ súuyayi. Tura tuke tsawant̄ Yúsan áuj̄tiniuyayi.

<sup>3</sup> Chíkich tsawant̄aj̄, nantu aan̄ku ajas̄aj̄ Kurniriu íimiarmiayi. Yusa suntar̄j̄ Yus nayaim̄pinmaȳa akupkamu, ni pujamunam̄ utuá “Kurniriuá” t́imiayi.

<sup>4</sup> Kurniriuá tutai, Yusa suntar̄in̄ ashamak̄ íimia pujumiayi. Tura “¿Warimp̄iait, Uunta?” t́imiayi.

Tutai Yusa suntar̄j̄ t́imiayi “Ame seamun̄ Yus anturtamkai. Tura atsumainia nu yayakmin̄ Yus shiir enentáimtur̄mawai’ t́imiayi.

<sup>5</sup> Tura Yusa suntar̄j̄ Kurniriuun̄ tuke chicharuk̄ “Wats, áminiuram̄ Júpenam̄ akupkata. Semun̄, chíkich naar̄j̄ Pítur, tatí tusam̄ akuptukta, t́imiayi.

<sup>6</sup> Nu Semun̄sha chíkich Semun̄j̄aj̄ pujawai. Nuka nuapen-iwiarin̄ Semun̄kaiti. Tura ni j̄eēsha nayaantsanam̄ ayaamach̄ pujawai, t́imiayi. Nuī jeawakmin̄, ame túratamna nuna Semun̄ Pítur turam̄tatui” tinia ikiukmiayi.

<sup>7</sup> Tura Yusa suntar̄j̄ waket̄kimtai, Kurniriuuka ni takarniur̄in̄ j̄imiaran̄ itiamiai. Tura suntaran̄ chíkichkiniak̄ nemarsat̄ tusa itiamiai. Nu suntar̄ ni írutramuriyayi. Tura Yúsan enentáim̄tiniuyayi.

<sup>8</sup> Kurniriuusha ni túrunamur̄in̄ ashí uj̄áa-já awajas̄ Jupe péprunam̄ akupkarmiayi.

<sup>9</sup> Kashin̄ tsawant̄aj̄ Kurniriu suntar̄j̄ Júpenam̄ nuntumsar̄aj̄, tutupin̄ aj̄ Pítur j̄eē yakí wáakunam̄ Yúsan áujsataj̄tsa wakamiayi.

<sup>10</sup> Pítrusha ti tsukamak̄ yurumátaj̄ tusa wakerimiayi. Túrash̄a yurumkan̄ iniarain̄aj̄ Pítur íkaj̄tiusmak̄,

<sup>11</sup> nayaim̄p̄ uranmianum̄ wan̄karam̄ tarachia áanin̄ tura nuna tsakar̄in̄ jin̄kiakman̄ tár̄un̄ wáinkiamiayi.

<sup>12</sup> Nu tarachniium̄ yajasmā irunmiayi. Wekainiusha, nanam̄tincha, tura napisha en̄kemiarmiayi.

<sup>13</sup> Tum̄aj̄ Yus Pitrun̄ chicharuk̄ “Pitru, wajakim̄ maam̄ yuata” t́imiayi.

<sup>14</sup> Tutai Pítur t́imiayi “Atsá Uunta. Ii Israer-shuartik̄ia yajauch̄ yajasmā áinia nu tura yúatin̄ surim̄kiamu ana nuka pen̄ké yúchait̄ji. Tuma asam̄tai j̄únaka wik̄ia yuashtat̄jai” t́imiayi.

<sup>15</sup> Túrash̄a Pitrun̄ atak̄ Yus chicharuk̄ “Wi, péñkeraiti, tájana nu, yajauchiiti, tiip” t́imiayi.



16 Nuka menaintiú túrunamiayi. Tura nuyasha tarach ataksha nayaimpiniam wakamiayi.

17 Nuna túrunan wániak Pítiur wariniak áaniuncha wáinkiaj tusa enentáimia pujaj kapitíán Kurniriu ayakma armia nu, anintruiniak jeawariayi.

18 Tura jeawar kakantar untsummiar “¿Semun, Pítiur, jun pujá?” tiarmiayi.

19 Tura Pítruka ímíarmarín tuke enentáimia pujaj Yusa Wakanj chichaak “Menaintiú áishman unturmainsiawai, tímiayi.

20 Wajakim akaikim arantutsuk au nemariarta, Wi akupkamu asamtai” tímiayi.

21 Nuna antuk Pítiur taramiayi. Tura áishmankan Kurniriu akupkama nuna wajainian wániak “Wiitjai Pítiur. Átum eátrumna núitjai. ¿Warí tarin-trum?” tímiayi.

22 Tutai niisha tiarmiayi “Iisha kapitíán Kurniriu akupkamu taji. Kurniriu-ka áishman péñkeraiti. Yúsan enentáimtiniaiti. Tura Israer-aencha nin shiir enentáimtuiniawai. Níiya winiaji, tiarmiayi. Kame nuik, Yusa suntarij, nayaimpinmaya akupkamu, ii kapitíántrín tímiayi “Pitrun untukát akupkata. Nii tatí. Tura nii títiatna nu péñker anturkata” tímiayi. Nuna ii kapitíántrín takui iisha winiji” tiarmiayi.

23 Tutai Pítiur jeá awayámiayi. Tura nu kashi nuj kanararmiayi.

Kashin tsawarar Pítiur níijjai wearmiayi. Túrasha Júpenmaya Yus-shuarsha nin nemariarmiayi.

24 Nuyá tsawarar Sesaria péprunam, Kurniriu nákamun jeariarmiayi. Kurniriu-ka ni shuarín tura ni nekas amikrín, nekaatarum tusa untuk ikiaankamiayi.

25 Tura Pítrusha jeamtai Kurniriu aa jíintiuki Pitrun tikishmatramiayi.

26 Túrasha Pítiur awajki tímiayi “Wajaktia. Wisha aya áentsketjai. Ámea núnisketjai” tímiayi.

27 Tura chichasar jeá wayawarmiayi. Tura wayá, untsurj aents matsatun wáinkiamiayi.

28 Nuyá Pítiur chichaak tímiayi “Amikrua, atumsha nékarme. In Israer áentstinkia, chíkich áentsjai pachiniarchatniuitrume, tura ni jeencha wayashtiniaitruma in jintintra min turamainiaji, tímiayi. Túrasha Núska ni enentáimsamurín wíniaka paant iniaktursayi. Túmaitkiui wikia nánkamas áentsun yajauchiiti, tura auka wapikiaiti, tichamniaitjai, tímiayi.

29 Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamtai untsurkamarum?” tímiayi.

30 Tutai Kurniriu tímiayi “Kuatru tsawant nankaamasaj tura nantusha juní aj, wikia yurumtsuk Yúsan áujsamjai, kjaraj áujsatin ana nuna. Túran chichaj, áishman, ni entsatairj wincharpatniun, naka wajatran wáinkiamjai, tímiayi.

31 Niisha chichartak turutmiayi “Kurniriu, Yus ame áujman anturtamkayi. Tura shuar atsumainia yáinmamna nunasha nekarmayi, turutmiai, tímiayi.

32 Tuma asamtai, Jupe péprunam akatramuram akupkata. Semun Pítrun itiatí. Nu Semun Pítrusha, chíkich Semunjaj pujawai. Nuapen-iwiarin Semunkaiti nuka. Tura ni jeesha nayaantsanam ayámach pujawai. Niisha taa ámin chichartamkattawai” turutmiai, tímiayi.

33 Túrutkui, wí umikian áentsun wárikmasan ámin akuptukjame utitia tusan. Tura nékasep taume. Tuma asamtai iisha juí Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

*Kurniriu jęęn Pítur etserkamia nu*

<sup>34</sup> Nuyá Pítur chichaak “Ayu. Yus ímmianum ashí aents métekrak áiniawai nekas nékajai, tímiayi.

<sup>35</sup> Antsu ashí nunkanam náńkamas aents Yúsan umirak péńker tura nuna, Yus nú aentsun shiir enentáimtawai, tímiayi.

<sup>36</sup> Yuska shiir chichaman Israer-aentsun akuptukmiayi. Nuĵ chichaak “shuar Jesukrístu naarĵn páchiakka, Yusĵaj nawamnaikiatin átiniaiti, tímiayi. Nú Jesukrístu ashí shuara Úuntrĵnti’ tímiayi Yus.

<sup>37</sup> Túrasha Kariréa nunkanam nanĵkamak ashí Israer nunkanam túrunamia nu paant nékarme. Imiakratin Juauĵ imiaak etserak amukmia nú tsawantin nanĵkamamiayi.

<sup>38</sup> Tura ĵusha nékatsrumek, tímiayi. Nasarénumiĵ Jesus, Yus Anaikiamu asa, Yusa Wakanĵ kakarmarĵĵaj péńker túriniuyayi. Iwianchruku wáitias puĵuarmia nuna péńker awajsamiayi. Yus Nĵin puĵurma asa ashí nuna túriniuyayi.

<sup>39</sup> Tura Israer-aents matsatkamunam tura imia Jerusaréń péprunmasha Jesus túramia nu, iisu asar, iisha étseaeji. Tura ayu, Nin achikiar krúsnum máacharmakia, tímiayi.

<sup>40</sup> Tura menainti tsawant jeamtai Yus Nin iniantkimiayi. Tura ataksha iwiaintiurtamkachmakaj, tímiayi.

<sup>41</sup> Ashí áentsnumka wantinkiachmiayi. Antsu íniak nuik, etserin atarum tusa Yus achirmakmĵaj nú áentstiniak wantintiurmakmĵaj, tímiayi. Au nekas jakamunmayĵ nantakmiatai iisha Nĵiĵĵaj tsanĵkiar yurumámĵi, tímiayi.

<sup>42</sup> Tura Jesussha in akuptamkaitĵi. Jesuska “Wĵitĵaj Yus Anaikiamun, tímiayi. Ashí áentsun, ĵuka makuumawai, túrasha ĵuka makuumatsui, Wiki tĵinĵaitĵaj. Kame ashí áentsun, ĵaka áinia nuna tura iwĵaaku áinia nunasha, Wĵiĵitĵaj nuna tĵinĵian” tímiayi Jesus. Nusha átum werum uĵatruktarum, Jesus turammĵaj, tímiayi.

<sup>43</sup> Ya shuarak Jesusa náarĵn pachia nú shuarnaka tunaarĵn tsanĵkurattawai, nuna ashí Yúsnan etserniusha yaunchu etseriarmiayi” tímiayi.

*Israer-shuarchan Yusa Wakanĵ tarurarmiania nu*

<sup>44</sup> Tura Pítur tuke chichaak puĵaj, tura chikichcha antúu puĵuinĵaj Yusa Wakanĵ tarurarmiayi.

<sup>45-46</sup> Tuma ásar anĵkant anĵkant chíkich chichamĵaj chichasarmiayi. Túmainiak, Yus ti péńkeraiti, tiarmiayi. Tura Israer-shuar, Yus-shuar armia nuka Pĵitruĵaj táarmia nu, nuna antukar ti enentáimsarmiayi. Maa, Yusa Wakanĵsha Israer-shuarcha ainia nunasha tarurcharaik, tu enentáimsarmiayi

<sup>47</sup> Túmakui Pítur chichaak “ĵYaki surimkiat ĵu aents imiantinian? Warĵ nincha ínia áintsanĵ Yusa Wakanĵ tarurcharaik” tímiayi.

<sup>48</sup> Nuyá Pítur, Jesukrístu náarĵin imiantiarum tusa akupkarmiayi. Tura nuyasha Pĵitrunka, nĵiĵĵaj ishichik tsawant puĵustinian seawarmiayi.

## 11

*Ni túrunamurĵn Pítur uĵakmiania nu*

<sup>1</sup> Israer-shuarchasha Yusa chichamen umirkarai táman Jesusa akatramurĵsha tura Juĵianmayĵ Yus-shuarsha antukarmiayi.

<sup>2</sup> Túmainiak Pítíur Jerusarénnum jeamtai, Israer-shuar Yus-shuar ármia nu chichainiak

<sup>3</sup> “¿Urukamtia Israer-aents ániachusha iyumam? ¿Tura aujai tsaninġkiam urukamtai yurumámum?” tiarmiayi.

<sup>4</sup> Tutai Pítíur ashí yámankamtaiknumiá túrunamun ujakmiayi.

<sup>5</sup> Chichaak tímiayi “Wikia Jupe péprunam pujumjai. Tura nuġ Yusan auju pujusan ímiarmajai. Tura wanġkaram tarachia ánin kuartru tsakarġn jinġkiakma, nayaimpinmaya táarun wáinkiamjai. Tura wi pujamunam jeartimiai, tímiayi.

<sup>6</sup> Tura nuġ iyaj tukaman inít yajasman, napincha, nanamtúnniasha enġketainian wáinkiamjai, tímiayi.

<sup>7</sup> Tura chichaman antukmajai “Pitru wajakim maam yuata” túrutun antukmajai, tímiayi.

<sup>8</sup> Túrutkui “Atsá, Uunta, ánin wapiknaka, Israer-aents yuatin surimkiamu ana núnaka tuke yúchaitjai” tímiajai, tímiayi.

<sup>9</sup> Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutmiiai, tímiayi.

<sup>10</sup> Nunasha menaintiú túruna wáinkiamjai. Túruna nayaimpiniam mash waketkimiai, tímiayi.

<sup>11</sup> Nuġ túruna pujai menaintiú áishmañ Sesarianmaya akupkamu, winia eatainiak wi pujamunam tarutiarmiai, tímiayi.

<sup>12</sup> Tura nuġ Yusa Wakanġ chichartak “Arantutsuk aujai wetá” túrutkui, wémajai. Tura ju sais Yus-shuarjai wi wémajai. Túrunar ashinġkiar Kurniriu jeen wayamji, tímiayi.

<sup>13</sup> Niisha chichaak “Jearuġ Yusa suntariġ nayaimpinmaya taa wajan wáinkiamjai, tímiayi. Tura niisha chichartak “Jupe péprunam Semuñ Pítíur tatí tusam áishmañ akatram akupkata.

<sup>14</sup> Pítrusha taa, itiura amesha tura áminiurmesha tunaarminiá uwempratam nuna turamtatui.” Yusa suntariġ nuní turutmiayi” tu ujatkamiai Kurniriu’ tímiayi.

<sup>15</sup> ‘Wi chichastasan júarai, Yusa Wakanġ tarurarmiayi, yámankamtaik in tarutrampramiai nútiksañ, tímiayi.

<sup>16</sup> Nuinġkia Uunt Jesus timian enentáimpramjai. Niisha tíchamka “Juan entsajain imiakratmiayi. Tura antsu Yusa Wakanġkia imiantinia áintsañ atumí enentáin enġkemprutmattarme.” Nu timian enentáimpramjai, tímiayi.

<sup>17</sup> Atumsha enentáimpratarum. Uunt Jesukristu umirkamiaiġ nuġ, incha Yuska ni Wakanġn suramsamiaiġ. Tura in suramsamiaiġ núnisañ Yus nincha ni Wakanġn súsarimiayi. Nuna tura asamtai, wikia, túrashtiniaiti, Yusan tintinkiaitaiġ” tímiayi Pítíur.

<sup>18</sup> Tura Pítíur taman antukar mitiat wáinkiar “Nekasaiti, Israer-shuarchancha ni enentáin yapajjáwarmatai tuke iwiaaku átinian Yuska nin súsaruiti” tiarmiayi. Tusar Yusa náarġn ti shiir awajsarmiayi.

### *Yus-Shuar Antiukía péprunam wearmania nu*

<sup>19</sup> Estepañkan máawarmia nuġ, chíkich Yus-shuarnasha maatai tusar pataatiarmiayi. Túram chíkichkia pisarar Pinisia nuñkanam, Chipri nuñkanmasha, tura Antiukía péprunmasha wearmiayi. Tura nuġ jeawar Yus-Chichaman chíkichnaka ujatsuk aya Israer-aentsnak ujakarmiayi.

<sup>20</sup> Tura niijjaiġ Chipri nuñkanmaya pisararmia nu Serini nuñkanmayasha Yus-shuar ármiai. Nuka Antiukíanam jeawar Israer-shuarchan Uunt Jesusa túramurġn ujakarmiayi.

21 Tura Uunt Jesus ikiakárma ásar, nú nunĉkanmayá aents ti untsurĭ yaunchu túrutairĭn iniaisar Jesusan enentáimtuiniak Yus-shuar ajasarmiyai.

22 Tura nu chichaman antukar, Jerusarénnumiá Yus-shuar, ame iyutá tusar, Pirnapĭn Antiukĭanam akupkarmiyai.

23-24 Pirnapĭsha jeá, Yus nú shuaran uwentikrarma nuna wáiniak warasmiyai. Pirnapĭsha péñker áishmanĉauyayi. Yusa Wakanĭsha pimiutkamuyayi. Tura Yúsan nekas umirkauyayi. Tuma asamtai nu shuaran mash jintintiainiak chicharuk “Tuke enentáimĵai umirkarum Yus nemarsatarum.” Tu chicharak ikiukmiyai. Tura nuĭsha nú arant untsurĭ aents Yusaj kawenĉkarmiyai.

25 Nuna turasua amik Pirnapĭ Tarsu péprunam wémiyai Sáurun wáinkiatat tusa. Tura wáiniak Antiukĭa péprunam jukimiyai.

26 Tura nuĭ jeawar, nú péprunmayá Yus-shuarĵai iruntrar chĭkichĭk uwĭ pujusarmiyai. Yus-Chichaman untsurĭ shuáran ujaak pujuarmiyai. Tura nuĭ Antiukĭa péprunmanĉka Yus-shuaran émkaka, Kristu shuarĭ, tiarmiyai.

27 Nuyá Yusnan etserin Jerusarénnumiá táarmiyai Antiukĭanam.

28-30 Túmainiĵai chĭkichĭk etserin, ni naarĭ Akaapu, Yus-shuar matsatmanum ajapén wajakĭ chichasmiyai. Tura Yusa Wakanĭ nekatairĭĵai chichaak “Tĭ tsuka ashĭ núñkanam átatui” tímiyai. Tuma asamtai Antiukĭanmayá Yus-shuar chichainiak “Jutĭa nunĉkanmayá Yus-shuar ainia nu yáñtai” tiarmiyai. Anĉkant anĉkant ni wakeriarmia núnik súsararmiyai. Tura nú kuĭtniasha Jutĭanmayá Yus-shuara úuntriñ akuptukarmiyai. Pirnapĭsha Sáurusha nú kuĭtian júkiarmiyai. Tura Akaapu tímia núnisan túrunamiyai, akupin Krautiu pujai.

## 12

### *Pitrun sepunam enĉkeawarmiania nu*

1 Nu tsawantaj akupin Erutis Yus-shuaran máataj tusa chichaman jurus áentsrĭn ishiakmiyai.

2 Tura Juanĉka yachĭn Jakupun suĉn tsupirkar máawarmiyai.

3 Nuna tura máawarmatai Israer-aents wáinkiar “júka péñkeraiti” tiarmiyai. Erutissha nuna antuk, Pítrusha achikrum itiarum tusa akupkarmiyai. Núnaka wakapruachu tanta yuatin nampertin túrawarmiyai.

4 Pítruncha achik itiarматаi, Erutis sepunam enĉkeata tusa akupkamiyai. Tura sepunam suntarsha anĉkant anĉkant, kuaru kuaru, ashikia tiasisáís (16) irunar Pitrun téntakarmiyai. Tura, ju ĵísat nanĉkaasmatai, mantamnatĭ tusan ĵiĉkiatĵai aents iruntramunam, tu enentáimsamiyai Erutis.

5 Túramu asa Pítruka sepunam pujumiyai. Tura suntarsha mijiatrutsuk iĵarmiyai. Túramunak Yus-shuarka, Pitrun yáñĉkiat tusar iniaitsuk Yúsan ti áujiarmiyai.

### *Yusa suntarĭ Pitrun uwentikramiania nu*

6 Wats, Erutis, kashin ĵiĉkiatĵai takui, nú kashi Pítruka jimiará suntar wajanunam etema tepes kanarmiyai. Tura jimiará jiruĵai ĵinĉkamuyayi. Tura chĭkich suntarka ĵinmanum ii wajarmiyai.

7 Tumaj aya aneachma Yusa suntarĭ nayáimpinmayá taa ajapén wajasmiyai. Túrunamtai jeanmanĉka tsáapin ajasmiyai. Tura Yusa suntarĭsha Pitrun páenum antiñ ishintiarmiyai. Tura jirusha Pitru uweĵéya sayat atiniamiyai.

8 Tura Yusa suntarij tîmiayi “Kaki emenmamata. Túram sapatrumsha aweekata” tîmiayi. Tutai Pítieur túramiayi. Nuyá chichaak “Pushiram entsarta. Túram nemartusta” tîmiayi.

9 Tutai Pítieur nemarsamiayi. Túrasha Pítruka, mesekranmaapi júniája, tu enentáimsamiayi.

10 Túrasha emka suntar ímia wajan nankaikiarmiayi. Tura nuyasha chíkich suntar ímia wajan nunasha nankaikiarmiayi. Tura nuyasha jíntiainium jiru waiti ámanum jeawarmatai, nú wáitisha ímia-nínki kuat uranmiayi. Túrunamtai jíinkiarmiayi. Tura jintiá ishichik wésan, Yusa suntarij Pitrun níniak ikiukmiayi.

11 Túram Pítieur enentáimiar tîmiayi “Yamaikia nékajai. Mesekranmachuiti. Antsu Uunt Yus ni suntarij nekas akupturkayi. Erutis mantuataj tusan pujurtana nuyá Yusa suntarij winia uwemtikrurai. Tura Israer-aents túrutatajtsa wakeriarmia nuyasha uwemtikrurai” tîmiayi.

12 Nuna tu enentáimias nekáa, Marí jeen wémiayi. Nú Marisha Juan Márkusan nukuriyayi. Nú jeenam untsurí aents irunar Yúsan auju matsatainiáj Pítieur jeamiayi.

13 Tura jeá aá wáitin tuntuimiayi, wayataj tusa. Túmakui nuwá uchich, ni naarij Ruti, yákit tusa iyumiayi.

14 Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, inít matsatainian werí “Pítieur taa wáitiniam wajaawai” tîmiayi.

15 Tutai “Wáurtsmek” tiarmiayi.

Tútaisha núwaka “Atsá nekasaiti” tîmiayi.

Tútaisha nú arant “Níchiuiti. Antsu ní wakaní túratsuash” tiarmiayi.

16 Tu chichainiaj Pitruka tuke tuntuí wajamiayi. Tura wáitin uraj tukamá Pitrun wáinkiar ashamkarmiayi.

17 Ashamak chichainiakui Pítieur, uweje takuí itiatmamtikarmiayi. Tura nuyá Uunt Yus sepunmayan uwemtikramun ujakmiayi. Tura “Jú chicham Jakupu tura chíkich Yus-shuarsha ujaktarum” tîmiayi. Nuna tj iniais jíinki arant wémiayi.

18 Kashin tsawar suntarsha Pitrun atsá wáinkiar “Chuwa urukakua menkaka. Áyawa urukattajia” tiarmiayi. Pítieur túrunamun nékachu ásar nuna tiarmiayi.

19-20 Túrunamtai Erutis chichaak Pítieur eaktarum tusa akupkarmiayi, túrasha wáinkicharmiayi. Túrunamtai Erutis suntaran untsukar, Pitrun ísarmia nuna aniasarmiayi “¿Pítieur itiura menkakama?” tîmiayi. Niisha áimiainiachkui, nu suntaran mantámnatí tusa akupkamiayi.

### *Erutis jakamiania nu*

Erutissha Tirunmaya tura Setúnmaya áentsjaisha nemasnaikiarmiayi. Túmayataj Jútia nunkan ikiuki Sesaria péprunam pujustaj tusa Erutis wémiayi. Sesaria péprusha Tíru péprunam tjíjuchiiti. Setúnmaya aents Tirunmaya áentsjaí Erutisa nunkeyan yurumkan súmainia ásar, Erutisjaí nawamnaikiatniun wakeriarmiayi. Tuma asamtai métekrak enentáimsar, Erutisa takarniurí penkeri, ni naarij Parastu, níjjiaí emka amikmawar nuyá Erutisan weriar shiir matsamsatniun seawarmiayi.

21 Tuma asamtai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun ikiaanank áujmatmiayi.

<sup>22</sup> Nuj pujus chichaakui aents untsumainiak tiarmiayi “Ju chichaa pujana juka áenchaiti. Antsu nekaska yúsaiti” tiarmiayi.

<sup>23</sup> Tumaj nuyajik Yusa suntari nayaimpinmaya tari Erutisan jaa awajsamiayi. Tuma asamtai nusha aka yuam jakamiayi. Erutissha Yusan waantu awajtsuk niniki waantu enentáimtuma asa túruna jakamiayi.

<sup>24</sup> Túrunamtaisha Yusa chichamenka nú arant pampanki wémiayi. Túmaki ashí nunkanam anturamiayi.

<sup>25</sup> Tura Pirnapísha Sáurusha ni takatrin amukar Jerusarénumia Antuikianam waketainiak Juan Márkusan júkiarmiayi.

## 13

*Yus-Shuar Pirnapíncha Sáuruncha Yus-Chichaman etserkarat tusar akupkarmiania nu*

<sup>1</sup> Antiukianmaya Yus-shuarnum Yusnan etserin páchitra ármiai. Nútiksan Yus-Chichaman jintinniurisha ármiai. Pirnapísha tura Mukusa Semunsha, nuyá chikich, Serinianmaya Rúsiusha tura akupin Erutisa tsakatkesha, ni naari Manaen, Sáurusha tímianu ármiai.

<sup>2</sup> Tura chikich tsawantai niisha yurumtsuk Yusan áujeak pujuiniyai Yusa Wakaní tímiayi “Pirnapísha, Sáurusha akanturkitiarum, tímiayi. Wi takatan súsaitjana nuna takasarat tusarum túratarum” tímiayi.

<sup>3</sup> Tutai ijiarma Yusan aulsua amikiar, shiir wetarum tusar ni uwejen Sáurun Pirnapíncha awantkarmiayi. Túrawar Antiukianmaya akupkarmiayi.

*Chipri nunkanam jeawarmiayi*

<sup>4</sup> Tura nuyanka Yusa Wakaní akupkam Pirnapísha Sáurusha jíinkiar Serusia péprunam jeawarmiayi. Tura nuyá uunt kanunam enkemprar Chipri nunkanam jeawarmiayi.

<sup>5</sup> Juansha yáintaj tusa némarkauyayi. Nuj Saraminia péprunam jeawar Israer-shuar iruntai jeanam wayawar Yus-Chichaman etseriarmiayi.

<sup>6</sup> Tura Chipri nunkanam pepru ainia nu wáirkutak Papus péprunam jeawarmiayi. Nuj jeawar Israer-aents uwishin ni naari Parjesusan wáinkiarimiayi. Ni chikich náarinikia Erimiasauyayi. Niisha uwishniuitiat, Yúsnan étsereajai, tíniuyayi.

<sup>7</sup> Akupin Serjiu Páurujai pujuyayi. Nu akupniusha ti pénker enentáimniuyayi. Tura Pirnapín Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untsukmiayi.

<sup>8</sup> Tura uwishin Erimias nuna nakitiak “Auka pénkerchaiti” tímiayi. Akupniusha Yusan umirkain tusa nuna tímiayi.

<sup>9</sup> Nuyanka Sauru, ni chikich naari Papru, Yusa Wakaní pimiutkamu asa, nu uwishniun úmamkemas iis tímiayi

<sup>10</sup> “Ámeka wáitaitme. Anankartiniaitme. Yajauchiitme. Maaj, iwianchiitme. Tura ashí pénker ana nuka imía nakitniuitme. Tsej, úrukamtai Yusa jinti naka ana nu emeskim weam?”

<sup>11</sup> Paij, yamaikia Uunt Yus asutiámattawai. Yamaikia amesha jimi kusurmatai untsuri tsawant tsáapnin penké íschattame” tímiayi. Tura nú chichamaik jii kusurmatai kirit ímiuk chikichan emiayi enkeki jurukit tusa.

<sup>12</sup> Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

*Chikich Antiukianam etserkarmiania nu*

13 Nuyá Juan waketki Jerusarénum wémiayi. Tura antsu Pápruka ni tsaniakmarijjai kanunam enkemprar Pápus péprunka ikiukiar Pirji péprunam jeawarmiyai. Nusha amaini Pampiria nunkanam pujawai.

14 Nuyá Pirji péprun nanikaikiar Antiukia péprunam jeawarmiyai. Nú Antiukiasha Pisitia nunkanam pujawai. Nuj jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiyai.

15 Tura nuj Yus-Papinium yaunchu áarman áujas aminkiamtai, Israer-shuar iruntai jeanam úrniuri Páprun tiarmiyai “Yatsuru, jintiatin chicham takakkurmeka yamaik titiarum. Antukarmi” tiarmiyai.

16 Tutai Papru wajaki uweje takuimiayi. Tura chichaak “Israer-shuartiram, tura Yúsán umirkataj tusa wakerarmena nu antuktaram, tímiayi.

17 Ii Yusri ii yaunchu uuntrin Israer-shuartin achikmiayi. Tura niisha írara núnik Ejiptunam matsatainiáj Yuska nin páchiniak uunt awajsarmiyai. Yus ni kakarmarjijai nú nunkanmaya ii yaunchu uuntrin uwemtikrarmiayi.

18 Túrasha atsamu nunkanam ii uuntrin kuarenta (40) uwitin Yuska aya kátsuntramiayi.

19 Tura nuyanka siati áentsun mátsatkainian, Kanaan nunkanam matsamarmia nuna amukarmiyai. Nú nunkan ii yaunchu úuntrin susataj tusa Yus túramiyai.

20 Nuyanka ii uuntri akupniurin, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru siántu seńkuenta (450) uwí ejemiayi. Samuersha Yúsán etserin náamtsáin nuna túrimiyai Yus.

21 Tura nuyanka áencha juísan nakitiainiak, uunt akupin náamkat tusar Yúsán seawarmiyai. Tuńiakui Yuska Sesa uchirin Saúran anaikiamiayi. Nú Saúra úuntrin kĩa Pinjamúnkiauayai. Tura Saúrsha kuarenta (40) uwí nú áentsun akupkat tusa Yus tsanatkamiayi.

22 Tura Saúr náamkan ataksha Yus awainkimiayi. Tura nuyá iksan nú nunkanam uunt akupin atí tusa Tawitian anaikiamiayi. Tura Yuska juna Tawitnian tímiayi “Isaí uchirin Tawitian winia enentáir jeamtai achirmakjai. Tura Winia umirtin átatui” tímiayi.

23 Wats, Tawit weeanmaya Jesusaiti. Tura Yuska Israer-aentsun Uwemtikrartinian Jesusan anaitiukmiayi, yaunchu timiarin uminkiat tusa.

24 Jesuska táatsain Juan ashí Israer-shuaran tunaariniá enentáimtumar imiantinian ukamiayi.

25 Tura Juansha ni jákatniuri jeatemamtai, chichaak “Átum enentáimtarmena núchaitjai. Wikia Yusa anaikiamuri, Kristu tutai, nákarmena núchaitjai. Antsu Nińkia winia ukunmaru winittiwai. Tura Niisha wjijainkia ti nankaamantu asamtai wikia sapatrincha atitratatáitchamniaitjai” tímiayi.

26 ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktaram. Ju uwempratin chichamka íniuiiti, tímiayi.

27 Iis, Jesusa túrunatniurin Yuska yaunchu ni etserniurin áamtikrachimakia. Tura ukunam Jerusarénumia shuar ni akupniurijjai tuke sáwartin nuna áujeatskesha penké nekaacharmiayi. Tuma ásar Jesuska Yusa Uchirinti tícharmiayi. Tura, jakatí, tiarmia nuj, Jesusa túrunatniurin, Yus yaunchu chichakmia nuna, tímiatrusarun umikiarmiayi, tímiayi.

28 Jesuska penké tunaamkachunak yamaikia mantamnatí tusar Piratun seawarmiyai, tímiyai.

29 Tura Yusa Papiriin ashí Jesusnan tímia nuna tímiannak umikiarmiyai. Tura nuyá krúsnumiá itiarar iwiarsarmiyai.

30 Túramunak Yus jakamunmayan iniantkimiayi.

31 Jesuska jakamunmaya nantaki, yaunchu Kariréanmaya Jerusarénum Niijjai irutka wéarmia nuna núkap tsawantin pujus wantintiuksiymiayi. Nú shuaraiti yamaikia Jesusa túrunamurin etserainia nu' tímiyai.

32 'Iisha núnisrik shiir chichaman Yus yaunchu ii apachrin tiarmia nu étsereaji.

33 Iisha Israer-weeá asakrin, Yuska Jesusan iniantkimiya nujai ii apachrin anajmatramia nuna yamá uminkiaiti. Kame Sarmu Jímiair papinium ju áarmaiti:

“Ámeka winia Uchiruitme.

Túmaitkiui yamaikia winia iwiaakmar susamuitme.”

34 Tura Yuska Jesusa nantakmiarín jintintiak, tura ni ayashí káurchatniun jintintiak, chíkich Sarmu papinium juna áantikramiyai:

“Nekas péñkeran Tawitian anajmatramaj nuna atumin amastatjai.”

35 Tura nú arant, nú paant atí tusa, chíkich Sarmu papinium ju aarma awai: “Yusa, ame Uchiram aneamna nuna ayashí káurтинcha tsankatkashtatme.”

36 'Nekaatarum, yatsurtiram, Yuska Tawitia ayashin tichamiayi nuna. Tawitkia Yus tímian amuk jakamiayi. Túrasha ni ayashinkia káurmiayi.

37 Tura antsu Yus iniantkimiya nuna ayashinkia penké káurchamiayi.

38 Tuma asamtai, yatsurtiram nekaatarum. Jesusjainkete tunáa asakártin.

39 Tura Muisais yaunchu akupkamia nujai tunáa tsankurnarchamnia nu, yamaikia Jesusjai tsankurnartiniati.

40-41 Yúsnan etserin juna áarmiyai:

“Enentáimpratarum wishikkartintiram. Ashamkatarum. Túrarum menkatumpratarum. Wi Yus asan, átum pujarmena nuj, aents túrachminian túratajna nusha penkesh nekaashtatrum, chíkich ujatmainiakuisha.” Tu áarmaiti.

Tuma asamtai yatsurtiram, aneartarum atumin nuna túrutmawajrum, Yusnan etserin aarma tana nútiksaj. Nuna chichaak amukmiayi Papru.

42 Tura nuyá Papru Pirnapíjjai jiinki wéenakuí aents chichainiak “Chíkich sáwartincha jútiksarmek etserkatarum” tiarmiyai.

43 Tura nuyá iruntsua tsenkeenak Israer-shuarsha, tura chíkichkia Israer ajasarusha, Yúsan umirkatajtsa wakeriarmia nuka, Páprun Pirnapíncha nemarsarmiyai. Niisha nu áentsun chicharuk “Yusa anenkrattairi enentáimtusurum kakartarum” tiarmiyai.

44 Tura chíkich sáwartinkia nu péprunmaya ti untsurí aents Yus-Chicham antuktai tusar tuakararmiyai.

45 Tura Israer-shuarsha ti untsurí áentsun tuakarun wáinkiar, suir iiniak, ti kajerkararmiyai. Tuma asamtai Páprun katsekkar “Ju chichaana juka ántar tawai” tiarmiyai.

46 Támaitiat Pápruka Pirnapíjjai arantutsuk chichainiak tiarmiyai “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnun tuke iwiaaku pujuschamnia ajasurme, tímiyai. Tuma asamtai iikia yamaikia Israer-aencha ujaktai tusar weraji, tiarmiyai.



<sup>47</sup> Nu túratarum tusa, Uunt Yus akuptamtsujik. Jes, ni Papirijn juna tawai: “Israer-shuarcha Winia nekarawarat tusan anaitiukjame. Tura ashí nunkanmaya aents uwemprarat tusan akuptajme.”

Tu áarmaiti” tímiayi.

<sup>48</sup> Nú chichaman antukar Israer-shuarcha ti wararsar “Uunt Yus tana nuka imiá péñkeraiti” tiarmiayi. Tura, tuke iwiaaku pujusmin armia nu Yus-shuar ajasarmiayi.

<sup>49</sup> Tú tumakj Yus-Chicham nú nunkanam ashí jamarmiayi.

<sup>50</sup> Túrasha nuwan, Yúsan péñker enentáimtuinian tura péñker wekainian, Israer-shuarka yajauch enentáimtikrarmiayi. Áishman penkerj ármia nunasha, yajauch enentáimtikrarmiayi. Túram Páprun Pirnapíncha katsekkar, chichaman iruntur najatawarmiayi. Tú-turukiar ni nunkeya jiki awemarmiayi.

<sup>51</sup> Túram Papru Pirnapíjjai, ju aentska yajauchiiti tusar, wéenak naweyan nunkan akakekiar ikiukiarmiayi. Túrawar Ikiuniu péprunam wearmiayi.

<sup>52</sup> Yusa Wakanísha pimiútkamu ásar Yus-shuarka ti warasarmiayi.

## 14

### *Ikiuniu Péprunam túrunamia nu*

<sup>1</sup> Ikiuniu péprunam Papru Pirnapíjjai jeawar Israer-shuar iruntai jeanam wayawarmiayi. Túrunawar Yus-Chichaman etserkarmiayi. Túram ti untsurj Israer-shuar ármia nu, Israer-shuarcha ármia nusha Yúsan umirkarmiayi.

<sup>2</sup> Tura chíkich Israer-shuar, Yúsan umirkacharu ármia nu, Yus-shuaran kajerkarat tusar Israer-shuarchan yajauch enentáimtikrarmiayi.

<sup>3</sup> Tuma asamtai Papru Pirnapíjjai nú nunkanam ti nukap tsawant pujusarmiayi. Tura Uunt Yúsan enentáimtuinia ásar, arantutsuk Yusa waitnenkratairjn etserkarmiayi. Tura, etserinia nu winia kakarmarjainti tusa, Yuska aents túrachminian najanmamtekiawarmiayi.

<sup>4</sup> Tura Ikiuniunmaya aentska jímiar kanakarmiayi. Chíkichkia Israer-shuar tuinia nu nekasaiti, tiarmiayi tura chíkichkia Jesusa akatramurj tuinia nu nekasaiti, tiarmiayi.

<sup>5</sup> Tura nuyá Israer-shuarchajaj Israer-shuarka chichasar pepru untrijjai chichasarmiayi. Tura Papru Pirnapíjjai katsekkar tura kayajaj tukurar, yajauch awajsatniun nan kamawarmiayi.

<sup>6</sup> Túrasha Papru Pirnapíjjai nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nunkanam pujuiniawai.

<sup>7</sup> Tura Yus-Chichaman etserkarmiayi.

### *Ristra péprunam Páprun kayajaj tukurarmiania nu*

<sup>8</sup> Ristra péprunam tunamaru áishman pujumiayi. Ni akiiniamuriya tuke wekaichauyayi.

<sup>9</sup> Nú áishman Papru chichaamun antúu pujumiayi. Túman Papru úmamkemas nin ísmiayi. Niisha, Yusa kakarmarjijjai tsumartatjai, tu enentáimiun Papru nekaamiayi.

<sup>10</sup> Tura Pápruka kakantar chicharuk “Wajakim wewe ajasam wajasta” tímiayi. Tutai áishman wiut kutsuar wajakí wekaimiayi.

<sup>11</sup> Papru túramia nuna aents wáinkiar Rikiaunia chichamjai untsumainiak “Yuska áishmanka áanin ajasaru in tarutramarji” tiarmiayi.

12 Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi.

13 Nú pepru jeamunam Júpitir náartin yusa jeen pujumiayi. Tura Júpitir náartin yusa pátriri kukujin iwiarkamun, wáakajai itiamiayi. Tura niisha ni áentsriji*ai* wáakan maatai tusar pujuarmiayi. Tura tikishmatrar ajamsatai, tiarmiayi.

14 Tura Jesusa akatramuri Pirnapísha Páprusha nuna nekaawar, auka nakitaiji tusar, ni pushirin jaararmiayi. Túrawar aents írunmanum pachiniawarmiayi.

15 Tura tiarmiayi “Shuara, ¿urukantai áitkiarum? Iisha yúschaitji. Atumea áankiitji, tiarmiayi. Penké ánrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunkancha, nayaantsancha, tura ashí nu*í* írunna nunasha najanaiti, tiarmiayi.

16 Jes, aents ni enentáimmiarji*ai*in wekasarat tusa Yuska yaunchu tsankatkamiayi.

17 Tuma ain shuaran pénger awajsamujai Wiitjai Nekas Yus tusa paant awajmamsamiayi. Kame yumi yutuktinian nayaimpinmaya akupturmaji. Tura ejemamar warasarmi tusa yurumak nerektinniasha súramji” tímiayi.

18 Túrasha Pápruka tímianu támaiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

19 Tura nuyá Antiukíanmaya Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajai tukurarmiayi. Tura jakayi tiar péprunmaya japiki júkiar arant áepsarmiayi.

20 Túrasha Yus-shuar Páprun tariar téntakarmiayi. Túram nuinkia Papru wajaki wé ataksha péprunam wayamiayi. Tura kashin tsawarar Papru Pirnapíjia*í* Tirpi péprunam wearmiayi.

21 Tírpiniun pujusar uwempratin chichaman etserkarmatai untsurí shuar Yusan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi.

22 Waketainiak “ashí Yus tana nu tímiatrusumek tuke umirkatarum” tuiniak Yus-shuaran ikiakáramiayi. Tura nin tiarmiayi, “Yusa akupeamuri*in* pachinkiatat takurkia ti wáitsatniuitji.”

23 Tura Yus-shuar írunmanum Yus-shuaran wáinniun anaikiarmiayi. Yurumsuk Yusan áujsar chicharainiak, “umirkarumna nú Yus iirmasarti” tiar ikiukiarmiayi.

### *Yaunchu jíinkiarma nú Antiukíanam waketkiarmiayi*

24 Nuyá Písitia nunkanam nankaamakiar Pampiria nunkanam jeawarmiayi.

25 Nu*í* jeawar Pirji péprunam Yus-Chichaman etserkar nuyá Ataria péprunam wearmiayi.

26 Nu*í* kanunam enkemprar, yaunchu jíinkiarma nú Antiukía péprunam waketkiarmiayi. Páprusha Pirnapísha tuke jíintsai*in* nú Antiukíanmaya Yus-shuar chichainiak, Yusa takatri túrattarmena nuna Yus waitnentramak yáinmakarti, tiar akupkarmiayi nuik<sup>1</sup>.

27 Nú Antiukíanam jeawar, Yus-shuaran irurar, ashí Yus nin yáinkiarma nuna ujakarmiayi. Tura nútiksai Israer-shuarman Uunt Yus uwemtikrataj tusa untsukmia nunasha ujakarmiayi.

28 Tura nuyá Yus-shuarjai Papru Pirnapíjiai núkap tsawant pujusarmiayi.

## 15

### *Jerusarénum Yus-shuara úuntrijiai iruntrarmiania nu*

1 Nu tsawantin áishman Israer nunkanmaya wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeka uwemprashatruma” tiarmiayi.

2 Tuma asamtai Papru Pirnapíjiai, núchaiti tusar, nú áishmanjai ti kakaram chicharnaikiarmiayi. Túrasa nuu enentáiniak enentáimsatniun tujinkiarmaiayi. Tuma asamtai Antiukíanmaya Yus-shuar Páprun Pirnapíncha, atumsha chíkich áentsjai Jerusarénum wéтарum tusar akupkarmiayi. “Tura nuí Jesusa akatramurísha Yus-shuaran wáinniusha iniasrum itiumainkit tusarum péñker nekaatarum” tiarmiayi.

3 Papru Pirnapísha akupkamu ásar wéenak Pinisia nunkanam, Samaria nunkanmasha nankaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

4 Tura Páprusha Pirnapísha Jerusarénum jeawarmatai Jesusa akatramurísha Yus-shuara wáinniurísha tura penké Yus-shuarsha itiawarmiayi. Tura niisha túrunamia nuna mash etserkarmiayi.

5 Túrasa Pariséu aencha, Yus-shuar ajasarmiania nu, wajakiar chichainiak “Muisais tsupirnaktinian akupkamia nuna tura nú arant ashí Muisais tímia nunasha Israer-shuarchasha umirkatin áiniawai” tiarmiayi.

6 Nuyasha Jesusa akatramurísha Yus-shuaran wáinniusha nu chichaman nekaatai tusar iruntrarmiayi.

7 Chichasua umikiarmatai Pítur wajaki tímiayi, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitsuukmia nu nékarme.

8 Tura Yus Niñki ashí aentsu enentáin neka asa, Wíi shuar ajasmin áiniawai tusa, ni Wakanin Israer-shuarchanacha susamiayi, in suramsamij nútiksán.

9 Yus incha aushatka awajtamsachmaji, tímiayi. Antsu métekraketji. Tuma asamtai niisha Yúsan enentáimtuiniakui, Yuska enentáiyān ni tunaarin japi-rarmai, tímiayi.

10-11 Tura iikia nékaji niia áantsarik Jesukrístu waitnenkartutairijiai uwempraitji. Nuñkia žurukamtia Yus uwempraru áiniawai tajsha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsāchakait. Warí, ii úuntrísha tura iisha ashí Muisais tímia nu umiktin tujinkiamji. Tuma asamtai, žurukamtai nú káarkasha Israer-shuarchasha áentskatin wakerarum?” tímiayi Pítur.

12 Pítur nuna tutai Pirnapísha Páprusha chichainiak, “Israer-shuarchasha ni kakarmarin nekaawarat tusa aentsti túrachminian túratniun Yuska ti yáinmakmaji” tú ujuam miat wáinkar antúu pujuarmaiayi.

13 Nuna ujasua amikmatai, Jakupusha tímiayi “Yatsurú, antuktarum.

14 Nuik túrachman Yus túramia nuna ii yachi Semun Pítur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti” tímiayi.

15 Jusha Yúsan etserin yaunchu áarmia nu tímiatrusān túrunayi. Júiti aarma:

16 “Israer-aents meserar, jeā sáanakniua áintsān áiniawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai.

17 Ashí nunġanmaja aents, Israer-shuarcha ainia nu, winia náarun pachinia nu, Winia eġtkarat tusan túrattajai.

18 Uunt Yus nuna yaunchu ujakmiayi.”

Tu áarmaiti' tímiayi.

19 “Tuma asamtai, yatsurtiram, wi tájarne: Israer-shuarcha Yus-shuar ajasaru áiniana nu, imiatik awajsachmi.

20-21 Iimiatarum, ashí péprunam Israer-shuar iruntainiam yáunchuyan tuke sáwartin Muisaisa áarmarġn jintintiniatsuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajentikramua nu yuawairap. Tura numpasha umarairap.” Tu áatratai' tímiayi Jakupu.

22 Nuyá Jesusa akatramurġsha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapġġajai wéakui, shuar niġġajai nenakar Antiukġanam akupkatai” tiarmiayi. Tuma ásar Jútas Parsapasan, Sérasnasha anaikarmiayi. Niisha mai uunt Yus-shuar ármiai.

23 Tura niġġajai ju papin áarman akupkarmiayi:

“Iisha Jesusa akatramurġ tura Yus-shuara wainniurġ tura ashí Yus-shuaraitġinia nu, atumin Israer-shuarcha árumna nu, Antiukġanam, Sírianam, tura Sirisianmasha, ju papí akupeaji.

24 Juyá aents ii chichameġainchu atumġin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichameġain turamarmayi. Nu chicham atumsha antukrum nushá enentáimprarum “entá nuyanka itiuurkatġik” tárume.

25 Tuma asamtai nu nekaar, iisha métekrak enentáimsar, jimiará áishman akupkatin anaikiamji. Ju áishman ii aneamu yachġ Páprujai Pirnapġġajai sha atumin írmasarat tusar akupeaji.

26 Papru tura Pirnapġsha ii Uuntrġ Jesukrġstunam surumakarmiayi, ni takatrġsha tsuumai ain túrami tusar.

27 Niġġajai Jútassha tura Sérassha akupeaji. Ii chichaaġnia nuna niisha ni weneġai atumin uġatmakartatui.

28-29 Kame túratin asamtai iisha Yusa Wakanġġajai ju áartin enentáimsaji. Namán ántar-yus susamu ana nu yuawairap. Tura numpasha umarairap. Kajentikramu ana nusha yuawairap. Tura penġé tsanirmawairap. Nuyasha chíkichkia nú nanġaamas tġhattajai. Tura antsu nu iniaisarmeka, penġer áatrume. Ayu, Yus wáitmakarti.” Tu áarman akupkarmiayi.

30 Tura Antiukġanam akupkam wearmiayi. Nuġ jeawar Yus-shuaran irurar, papin súarmiayi.

31 Tura Antiukġanmaja Yus-shuarsha nu papin áujsar, penġer jintiamu chichaman áarman wáinkiar, ti shiir enentáimsarmiayi.

32 Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakármiai.

33 Tura nuġ ishichik tsawant pujusarmatai, Yus-shuarka, penġer waketi-tiarum, tiar akupkarmiayi.

34 Tura Séras juáktinian wakerukmiayi.

35 Páprusha Pirnapġġajai juakarmiayi Antiukġanam. Niisha chíkich aentsġai Yus-Chichaman étseruk puġuarmiayi.

<sup>36</sup> Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nuĭ Yusajĭ ii yachĭ ainia nusha urukák pujuinia iyutai” tímiayi.

<sup>37</sup> Pirnapíkia Juan Márkusasan iĭjĭajĭ winiti tusa wakerimiayi.

<sup>38</sup> Tura Pampiria nunkanam Juan Márkussha niisháa weu asantai tura Yusa takatrĭn iniaisa asantai, Pápruka ayatniun nakitramiayi.

<sup>39</sup> Papru Pirnapĭjĭajĭ ti kakannairar kanakarmiayi. Tura Pirnapíkia Márkusasan ayáki Chĭprĭniam wémiayi.

<sup>40</sup> Pápruka Sérasan ayáki wéakui Yús-shuar Yus yáinmakarti tinia akupkarmiayi.

<sup>41</sup> Tura Siria nunkanmaani wekaráktak, Yus-shuaran ikiakárkutak Sirisianam jeamiayi.

## 16

### *Páprusha Sérasajĭ Timiutéun júkiarmiania nu*

<sup>1</sup> Papru Sérasajĭ Tirpi pepru írĭkutak Ristra péprunam jeawarmiayi. Tura nuĭ Ristranam Yus-shuaran wáinkarmiayi, ni naarĭ Timiutéu. Ni nukurĭnkia Israer-shuar Yus-shuarauyayi. Tura ni aparĭnkia Kriaku áentsuyayi.

<sup>2</sup> Tura Ristra péprunmayaĭ Ikiuniu péprunmayasha Yus-shuar ármia nu, Timiutéu péñker wekaawai, tiarmiayi.

<sup>3</sup> Kame Pápruka Timiutéun uyuuntusat tusa wakera asa, Timiutéu aparĭ Kriaku-apachĭn nekaawarmatai Israer-shuar nuĭ pujuarmia nu yajauch enentáimpraraĭn tusa tsupirmantikiamiayi.

<sup>4</sup> Tura nuyá Papru Timiutéujajĭ ashí péprunam nuĭ sétur nuĭ sétur wéenak Jesusa akatramurĭsha Yus-shuaran wáinniusha Jerusaréñnum nuik jintintian umĭktarum tusa ujarkutak wearmiayi.

<sup>5</sup> Tu ujamu ásar Yus-shuar nú arant Yúsan enentáimturar kakararmiayi. Tura ashí tsawant kawenĭki wearmiayi.

### *Papru iimiarmia nu*

<sup>6</sup> Tura Yusa Wakanĭkia Páprun Yus-Chichaman Asia nunkanam ujakĭnian tsanĭkatkachmiayi. Tuma asantai Pirĭjĭa nunkanam tura Karasea nunkanam aĭrkutak,

<sup>7</sup> Misia nunĭka jeatniunam jeawarmiayi. Túrunawar “Pitĭnia nunkanam wetai” tiarmiayi. Túrasha Yusa Wakanĭ nuĭsha wétĭnian suritkiarmiayi.

<sup>8</sup> Tuma asantai Misia nunkanam menantki Truas péprunam pachiniawarmiayi.

<sup>9</sup> Nuĭ jeawar Papru kashi iimiarmiayi. Masetúnia nunkanmayaĭ áishmañkan wajan wáinmiayi. Nu áishmañ Páprun chicharuk “Wĭnitritia. Yáĭntĭkiamnium” tímiayi.

<sup>10</sup> Nuyañka tu iimiarmatai, wisha Páprujajĭ wetai tusar iwiarnarmiaji. Tura Yus incha nú nunkanam ni chichameĭ etserkat tusa ti nekas untsurmakrĭn wéaji, tímiaji.

### *Jirĭpius Péprunam túrunamia nu*

<sup>11</sup> Tura nuyañka kanunam enĭkemprar Truas péprunmayaĭ júĭnkir Samutrásia nunkanam jeamiayi. Tura kashĭn tsawar nuyañka katĭjarar Niápuris péprunam jeamiayi.

<sup>12</sup> Tura Niápurisnumĭa náwek Jirĭpiusnum jeamiayi. Nuĭ Jirĭpius péprunmanka Rúmanmayaĭ aents matsamsa ármiaji. Tura nú péprusha Masetúnia nunkanam nekas uunt pepruyayi. Tura nuĭsha seturmaji.

13 Nuyá sáwartin tsawarmatai pepru ikiukir entsá supichik wémiaji. Yus áujsatniun iruntrarmia nuí pujusar, nuwá iruntrarmia nu Yus-Chicham ujakarmiaji.

14 Nuí Tiatira péprunmaya nuwá, ni naari Ritia wáinkiamiaji. Niisha tarach yamakain péñkeran súriniuyayi. Yúsnasha shiir awajniuyayi. Yus-Chichaman Papru atserkamia nuna niisha péñker anturkamiaji. Túman, Uunt Yus Papru chichaam tuser umirkat tusa ni enentáin takasmiaji.

15 Túruna nú nuwá níiniurijjai imianmiaji. Tura nuyasha chichaak “Yusshuar nekas ajasai túrutkurmeka winia jearuí winitiarum” tímiaji. Tura nuí jeawakrin setumtikrampramajai.

16 Tura nuyá ukunam Yus ajsatai tusar wekaamar nuwach nekaamin-iwianch enkemtuamu inkiunmakmiaji. Nu nuwachikia misatkauyayi. Niisha nékamkui nérenniurisha ti kuitriniawarmiaji.

17 Tura nú nuwach incha Pápruncha pataaturmamaiaji. Tura kakantar untsumuk “Ju áishmansha nekas Uunt Yúsan umirkaru áiniawai. Tuma asa niisha atumin uwempratin chichaman ujatmarme” tímiaji.

18 Tura nú nuwachisha ti núkap tsawant tu wekaimiaji. Titmakui, Papru ayanmar iwianchin chicharuk “Jesukristu naarijjai tájame: jíinkitiá ni enentáiya” tímiaji. Tutai íwianchia nú chichamaik jíinkimiamiaji.

19 Tura nuwáchi nérenniurisha, íwianch jíiki awematniun nekaawar, Páprun Sérasnasha kakerak achikiar pepru uuntri íisarar tusar ajapén júkiarmiaji.

20 Tura pepru úuntriin ejeniar tiarmiaji “Ju áishman Israer-shuar áiniawai. Tura in páchim enentáimtikramainiaji.

21 Tura iisha Rúmanmaya aents árin, ii túrachminian, iikia asumprachman jintintramainiaji” tiarmiaji.

22 Tura nuyanka ashí aents Páprun Sérasnasha kakerkarmiaji. Túramtai pepru uuntri chichainiak “Pushiri áitkiarum numijjai asutiátarum” tiarmiaji.

23 Tura nuyá ti asutsua amikiar sepunam enkeawarmiaji. Tura sepú-iinian chicharuk “Ti péñker iistá pisararain” tiarmiaji.

24 Nu chichaman antuk, sepú-iin ti inít awayámiyai, tura nawen numi najanamujai tee chanuntamiyai. Tú tura ikiukmiyai.

25 Tura kashi ajapén Papru Sérasjai Yusan áujainiak kantampriarmiaji. Tura chíkich enkeamusha nuna antúu pujuarmiaji.

26 Tu pujuiniaj aya aneanchma ti kakantar uurkamiaji. Tura sepusha muchitramiaji. Túrunamtai sepú wáitirisha ashí urantrarmiaji. Tura aents jirujai enkekar jiníkiamusha mash atiniakarmiaji.

27 Túrunamtai sepú-iin shintiarmiaji. Tura wáitisha mash uranar aan wániak, enkeamusha jíiniar shiákchariash tusa ni puniariniak ukuiniak máamattsa pujumiyai.

28 Tura Papru untsuak “Amek yajauch awajmamsaip. Ashí pujuiniaji” tímiaji.

29 Tutai sepú-iincha jinia ekeemak tsékenki wayamiyai. Tura Papru Sérasjai pujamunam kurañki jearmiyai.

30 Tura aa jíiki aniasmiaji “Uunta, ¿warí ititurkattaj uwemprataj tusana?” tímiaji.

31 Tutai niisha tiarmiaji “Uunt Jesukristu nekas enentáimtustá. Túrakmeka amesha, tura áminiurmesha uwemprattarme” tiarmiaji.

32 Tura nuyá ashí ni jeen pujuarmia nunasha Yus-Chichaman ujakarmiaji.

33 Tura tsawant irañkaj sepú-iincha Páprun Sérasjaj numpamnamurjñ ni-jiararmiayi. Túramtai nuyasha sepú-iincha nuarjijaj uchirijijaj imianiarmiayi.

34 Túramtai nuyasha ni jeen júkiarmiayi. Tura nujsha ayurawarmiayi. Tura sepú-iincha niiniurijijaj Yus-shuar ajasu ásar ti shiir warasarmiayi.

35 Kashin tsawar pepru uuntri, Páprun Sérasjaj akupkata tusar suntaran sepú-iinian akuptukarmiayi.

36 Tura nuyanka sepú-iin Páprun tímiayi “Yamaikia pepru uuntri chichaman akupturmakaj, átum wétinian. Tuma asamtai yamaikia péñkerak jíinkitarum” tímiayi.

37 Túrasha Papru suntaran chicharuk tímiayi “Warí, iisha Ruma aents árinin, niisha chichaman iwiartsuk ashí shuar íimiainiañ asutiámamji. Túrawar sepunam enketmamji. Tura çurukamtai yamaikia uuk akuptamkataj tusa wakeruinia? Atsá. Antsu uuntcha niñki taar jíirmaktiai” tímiayi.

38 Tutai suntarsha waketkiar nuna ujarkarmiayi pepru úuntriñ. Tutai niisha ti ashamkarmiayi Ruma aentsun nekaawar.

39 Túmak ashamainiak Páprun Sérasan weriarmiayi tsañkurturtarum titiai tusar. Nuyasha sepunmayaj jíikiar “Yamaikia wáitneasrum wetarum” tiarmiayi.

40 Papru Sérasjaj nuyaj jíinkiar Ritia jeen wearmiayi. Tura Yus-shuaran ikiakárar ikiukiarmiayi.

## 17

### *Tisarúnikianam charaatum ajarmia nu*

1 Papru Sérassha wéenak Ampipuris péprunam Apurunia péprunmasha nañkaamakutak Tisarúnikia péprunam jeawarmiayi. Nuj Israer-shuara irun-tai jeé ámiayi.

2 Tura Pápruka nuna tuke túrin asa nu jeenam wémiayi. Tura nujsha menaintiu sáwartin Yus-Chichaman paant etsermiayi.

3 Tura Páprusha Yus-Chicham tana tímiatrusañ jintintiararmiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurjñ Kristu tútain tájarne” tímiayi Papru.

4 Nuna takui Israer-aents chikishtarchik umikiarmiayi. Túrawar Paprujaj Sérasjajisha tsaniñkiarmiayi. Tura Kriaku aencha ti untsurí Yúsan umirkarmiayi. Tura nuwaj penkerj armia nusha nútiksarañ umikiarmiayi.

5 Tura Israer-shuarka Yus-shuar ajascharmia nu, Páprun Sérasnasha suiir íisarmiayi. Túrawar chikich yajauch áishman naki yujáu armia nujaj chichasar nu pepunam charáa charáa ajarmiai. Tura Páprun Sérasnasha achikiar aentsu úuntriñ suruktai tusar Jasunja jeen árenkarmiayi.

6 Túrasha Páprun Sérasnasha awetrar, Jasunkan tura chikich Yus-shuarnasha achikiar japirkutak júkiarmiayi. Tura pepru úuntriñ juíniak tiarmiayi “Ju áishmansha ashí nunkanam charaatum ajá wekarmia nu yamaikia tímiajaj tarutramarji.

7 Tura ju Jasun ni jeen itiaarmiayi. Tura niisha ashí mash Rúmanmayaj uunt akupni chichamen nakitiainiawai, tiarmiayi. Tura jes, chikich akupin awai, tuiniawai. Niisha Jesusaiti, turamainiaji” tiarmiayi.

8 Nu chichaman antukar, aents nuj pujuarmia nu, úuntriñiak charaatum ajarmiai.

<sup>9</sup> Tura Jasun chíkich Yus-shuarjaj Papru nekas awemattaji tusar, paij, kuit ikuiaji, tiarmiayi. Nuna takui pepru uuntri nin akupkarmiayi.

### *Piríanam*

<sup>10</sup> Nuñkia nú kashi Yus-shuar Páprun Sérasnasha Piríja péprunam akupkarmiayi. Tura nuñ jeawar Israer-shuar iruntai jeanam wearmiayi.

<sup>11</sup> Piríjanmaya aentska Tisarúnikianmaya áentsjainkia nankaamas péñker enentáimkia ármiai. Tuke enentáijaj Yus-Chichaman ántiarmiayi. Túrawar tuke tsawant imia ninñkisha Papru tana nuna nekasashit tusar Yusa papirín ii wearmiayi.

<sup>12</sup> Tuma ásar untsurj shuar Yus-shuar ajasarmiayi. Tura Kriaku aents nuwa péñkerj armia nusha áishmansha umikiarmiayi.

<sup>13</sup> Túrashá Tisarúnikianmaya Israer-shuarka Papru Yus-Chichaman Piríja péprunam étserun antukar nuñ weriar charaatum awajiarmiayi.

<sup>14</sup> Túmainiakui Yus-shuar Páprun árutsuk nayaantsanam akupkarmiayi. Tura Séraska Timiutéujaj nuñ Piríanam juakarmiayi.

<sup>15</sup> Tura Páprun nemariarmia nu Atenas péprunam nin ejeyarmiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

### *Atenasnum*

<sup>16</sup> Tura Papru Atenas péprunam pujus Sérasnasha Timiutéuncha nákamiayi. Nuñ nú péprunam ántar-yus tí írunkui Páprusha kúntuts enentáimmiayi.

<sup>17</sup> Tuma asa Israer-shuar iruntai jeanam Israer-shuarjaj tura chíkich aents Yusan enentáimtiarmia nuñ chichasmiayi. Tura tuke tsawant pepru ajapén aentsjaj inkiunaikiar chichasarmiayi.

<sup>18</sup> Nuyá chichaman jintin chíkich naarj, ipikiuriu, armia nu, tura chikichcha, ni naarj, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritramtajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamurín tura aents jakamunmaya nantaktinian étserkui nuna tiarmiayi.

<sup>19</sup> Nuyanka aents iruntainiam, naarj Ariupaku támanum Páprun júkiarmiayi. Nuñsha tuke irunin ármiai. Nuñ Páprun aniasarmiayi “Iisha ame yamaram támena nu nekaatai tusar wakeraji, tiarmiayi.

<sup>20</sup> Amesha nusháa chicham jintiniaitme. Túmaitkiui ju chichamsha warintuak tusar nekaatai tusar wakeraji” tiarmiayi.

<sup>21</sup> (Atenasnumiã aencha tura chíkich nunñkanmaya shuar nuñ pujuarmia nusha aya yamaram chicham amia nunak ántiarmiayi. Tura aya nunak áujmatiarmiayi.)

<sup>22</sup> Nuyanka Papru Ariupakunam ajapén wajaki tímiayi “Atenasnumiã áishmanñtiram, wi nékajai, atumsha atumi yusrj ainia nuyá tsurakchamni-aitrume, tímiayi.

<sup>23</sup> Kame wi nuik atumí yusrj enentáimtutainiam íistaj tukaman nuñ jeachin iwiamun, JÜ NEKAACHMA YUSNAITI, tu áarman wáinkiamjai. Wátsek, ju Yus átum nékachiattrum tikishmatrumna nuna ujaktajrume’ tímiayi.

<sup>24</sup> ‘Nekaatarum, nu Uunt Yuska ashí nunñkan tura nuñ írúnna nuna nanainiti. Tura Niisha nayaimpin nunñkanchá nérenniurinti. Tura aents nanjanamu jeanam nú Yuska pujuchuiti.

<sup>25</sup> Niisha aents yáinkiat tusa atsumatsui. Warí, imia-ninñki Niisha ii iwiaakmarín, ii mayattairíncha tura ashí írúnna nunasha súrantsujik, tímiayi.



<sup>26</sup> Nekaatarum. Nuu numpanmayanak ashí áentsun najanamiayi ashí nunkanam matsamsarat tusa. Tura Yuska ii tsawantrin nekapmaiti; ii pujustinniasha nútiksar nakakmiayi.

<sup>27</sup> Winia eátkar wáitkiarat tusa Yus nuna túrayi. Túrasha Yus jeashtaka pujurtamsuji, tímiayi.

<sup>28</sup> Jes, iisha Yusjaj iwiaakji. Yusjaj muchitiaji. Tura Yusjaj ii kakarmari takakji. Nútiksar atumí papí-aintri tichamka “Ashí incha Yus najatmaitji.”

<sup>29</sup> Tura iisha Yus najatma asakrin kuri najanamusha, yúsaiti, tu enentáimsashtiniatji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniatji, tímiayi.

<sup>30</sup> Aents Yúsan nékainiachuk túrawarmiania nuna Yuska yáunchuka pachischamiayi. Túrasha yamaikia Yus ashí aentsun chicharuk “Tunaaruminia enentáimpratarum” túramji, tímiayi.

<sup>31</sup> Yuska áishman kan anaikiaiti. Nú áishman ashí aentsti, yáki pépkeran túriniait, yáki yajauchin túriniait núnaka nekarmattaji. Nú áishman Yus akupkamun tuke enentáimtakui Yus nin anaikiaiti. Tura tsawant nú túrunatin átatna nuna Yus Niñki achikiuiti. Túrasha nekas anaikiajai tusa, tura ashí áentstiram nekaatarum tusa nú áishman kan jakamunmayá iniantkimiayi” tímiayi Papru.

<sup>32</sup> Tura nuna jakamunmayá nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmí” tiarmiayi.

<sup>33</sup> Tutai Papru iniaisamiayi.

<sup>34</sup> Tura chíkich aentska Papru táman umikiar nin nemarsarmiayi. Nuisha Tiuníseu páchitkiauyayi. Niisha Ariupaku áentsuyayi. Tura nuyasha nuwá, ni naarj Támaris, tura chíkich aencha nútiksarañ nemariarmiayi Páprun.

## 18

### *Kurintiu péprunam*

<sup>1</sup> Nuyanka Papru Atenas péprun ikiuki Kurintiu péprunam wémiayi.

<sup>2</sup> Tura nuj Israer-shuaran ni naarj Akiran wáinkiamiayi. Akiraka Puntu nunkanam akiiniauyayi. Tura ukunam Itiaria nunkanam pujaj uunt akupin Krautiu ashí Israer-shuaran Ruma péprunmayá awemarmiayi. Rúmaka Itiaria nunkanmaiti. Nuñ awemamu ásar Akira Kurintianum nuik támiayi nuwe Pirisírajaj. Tura Pápruka Akiran chichastaj tusa werimiayi.

<sup>3</sup> Akirasha Páprusha mai juna takau ármiayi, tarach ti núparman jea nantain najanin ármiayi. Tuma asamtai Papru Akiraj seturmiayi nu takat túrawartai tusa.

<sup>4</sup> Tura tuke sáwartin Papru Israer-shuar iruntai jean wéuyayi. Nuisha Israer-aentsun Kriaku-aentsnasha nútiksarañ Yus-Chichaman ujakar enentáimtikrarmiayi.

<sup>5</sup> Tura nuyá Séras Timiutéujaj Masetúnianmayá táarmatai Pápruka mijiatrutsuk Yus-Chichaman étseluk “Yusa anaikiamurj Kristu, atum nákarmenta nu Jesusaiti” tímiayi.

<sup>6</sup> Tura támaitai nú chichaman nakitiarmiayi. Túmainiak Páprun katsekkarmiayi. Tuma asamtai Papru, nuñkia ikiaujrume tusa, ni pushirin pear tímiayi “Atumek makuumarne. Tura wikia Yusaj makuumatsjai. Yamaikia Israer-shuarcha ainia nuna Yus-Chichaman ujakartaj tusan werajaj” tímiayi.

<sup>7</sup> Tura nuyañka Israer-shuar iruntai jeañmaya jiiñki, Yúsan enentáimtin áishman Justu jeen wémiayi. Ni jeenka Israer-shuara iruntai jeen ayamach pujumiayi.

<sup>8</sup> Israer-shuar iruntai jea chicharniuri, Krispu, Uunt Jesusan nekas enentáimturmiayi. Túruna nuaríjjai uchiríjjai sha Yúsan umirkamiayi. Tura chíchich aencha Kurintiumaya armia nu nútiksaran Yus-Chichaman antukar, Jesusan enentáimtusar imianiarmiayi.

<sup>9-10</sup> Nuyá Uunt Yus Páprun mesekran ipiatkamiayi. Chicharuk “Penké ímiatik awajtamsachartatui Wi ámiíjjai pujakui. Ju péprunmasha untsurí aents Winia ajasartin írunui. Tuma asamtai ashamtsuk winia chichamur tuke etserkata” tímiayi Yus.

<sup>11</sup> Tura nuí Kurintiu peprunam jimiará uwí ejesattuk Yus-Chichaman étseruk pujumiayi.

<sup>12</sup> Tura Kariun, Akaya nunka akupniuri anaikiamu ai, Israer-aents Páprun kajerarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi.

<sup>13</sup> Tu túrawar akupniun chicharainiak “Ju áishman Yúsan umirkatniun Muisais akupkamia núnaka íikias ausháa jintiawai” tiarmiayi.

<sup>14</sup> Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuñkia, tura akupniun umirchakuñkia, tárumna nuna anturkaintjarne.

<sup>15</sup> Túrusha aya chichamnak tura aya náariniak atumí uuntri akupkamia nunak tau asamtai, atumek nuámtak íistarum tájarne. Wikia nu chichamnum pachinkiatniun nakitiajai” tímiayi.

<sup>16</sup> Taku aa jiiñkamiayi.

<sup>17</sup> Tura nuyañka Kriaku aents Israer-shuar iruntai jea úuntriñ Sústinisian achikiar awatiarmiayi akupniusha íimmianuman. Túrusha akupin Kariunka túranak penké pachischamiayi.

*Papru Antiukíanam waketki, nuyá atak Yus-Chichaman ipiampartasa wémiania nu*

<sup>18</sup> Tura ni jeen wakеткиarmatai, Papru nu péprunam untsurí tsawant pujusmiayi. Tura nuyasha ukunam Yusai yachi ármiania nuna áujas ikiuak Pírisirajai ni aishri Akirajai Senkrea péprunam wearmiayi. Nuí Israer-shuar túrutain umiak Papru ni intiashin awampراميayi, nuik Yúsan tímiay nuna yamá umíajai tusa. Nuñkia kanunam enkemprarmiayi Siria nunkanam wakеткиtai tusar.

<sup>19</sup> Tura nuyá Ipiisu péprunam jeawar Pápruka Pírisíran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nujai chichasmiayi.

<sup>20</sup> Tura niisha Páprun juñ pujustá tusar seawarmiayi. Túrusha támaitiat, tujintiajai, tímiayi.

<sup>21</sup> Nuyañka áujas ikiuak “Wisha Jerusarénum námper átatna nuna pachintuiktiníaitjai. Tura Yus akuptakuñkia atak tatajai atumin ístaj tusan” tímiayi. Tura kanunam enkemar Ipiisunmaya jiiñkimiayi.

<sup>22</sup> Nuyá Pápruka Sesaria péprunam jeá, nuyañka Jerusarénum wémiayi, Yus-shuaran nu áujasataj tusa. Tura nuyá Antiukíanam wémiayi.

<sup>23</sup> Tura Antiukíanam ishichik pujus ataksha weak Karasea nunkanam tura Pírijia nunkanmaani wekaráktak wémiayi. Tura weak Yus-shuar mat-sarmia nuna chicharak ikiakáarmiayi.

<sup>24</sup> Tumáa pujaj Arijiántria péprunmaya Israer-aents Apurus Ipišiu péprunam jeamiayi. Niisha Yusa yaunchu papirín ti péñker nekaamiayi. Etserkatniuncha ti nékauyayi.

<sup>25</sup> Uunt Yus tímia nunasha unuimiátrauyayi. Tura tuke enentáijijai chichasmiayi. Jesusa túramurín péñker jintinniuyayi. Túrasha aya Juan imiakratmanak nekaamiayi.

<sup>26</sup> Ju Apurus arantutsuk Israer-shuar iruntai jeanam chichamiayi. Tura Pirišira Akirajaj ni étserman anturkar, nincha akanki júkiar Yusa chíchamen ni nekaachmia nuna núkap jintintrarmiayi.

<sup>27</sup> Nuyá ukunam Apurus, Akaya nunkanam wétaj takui, Ipišiummaya Yusshuar yáñkiar papí áarar atakas akupkarmiayi. Nú áentsnum péñkerak jeat tuser túrawarmiayi. Tura Akayanam jeá, nú áentsun Yusa waitnenkratairijijai uwempraru ármia nuna ti yáñkiarmiayi.

<sup>28</sup> Tura Apurus Israer-aentsjaj paant chichasmiayi. Túrasha Yusa Papirijijaj, Jesussha nekas Yusa anaikiamurinti tusa paant jintiák nincha nu-petkamiayi.

## 19

### *Papru Ipišiumam jeamiayi*

<sup>1</sup> Tura Apuruska Kurintiunam pujaj Pápruka náinniumaani wekaráktak, Ipišiumam jeamiayi. Tura nušisha Yus-shuaran wáinkiamiayi.

<sup>2</sup> Tura aniasmiayi “Atumsha Yus-shuar ajasmarmena nu, ¿Yusa Wakaní atumí enentáin enkemturmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakaní awai támaka” tiarmiayi.

<sup>3</sup> Tutai Papru aniasmiayi “Entá, ¿nuikia atumsha warí enentáimsarimea imianmiarum?” tímiai.

Tutai niisha tiarmiayi “Juan jintinramamaj nu iisha enentáimsar imianmaji” tiarmiayi.

<sup>4</sup> Tutai Papru tímiai “Juansha, tunaarminiá enentáimprarum imiantiarum, tíchamka. Nuyá tíchamka, winia ukuruj winittiana nu nekas enentáimtustarum. Niisha Jesus Yusa anaikiamurinti, tu ujatmakchamka” tímiai Papru.

<sup>5</sup> Nuna antukar niisha Uunt Jesusa náarin enentáimtusar ataksháa imianiararmiayi.

<sup>6</sup> Tura Papru ni uwejejaj nin antinmatai Yusa Wakaní tarurarmiayi. Túram chíkich chichamajaj chichasarmiayi. Túrunawar Yus-Chichaman etseriarmiayi.

<sup>7</sup> Nusha tuse (12) áishman ármiai.

<sup>8</sup> Tura nušisha menaintin nantutin Papru Israer-shuar iruntai jeanam werí Yusa akupeamurín pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikarmiayi.

<sup>9</sup> Tura chíkichka ni enentáin ti ikiatsuárarmiayi. Túrunawar umiktinian penké nakitiainia ásar aents ántamunam Yusa jintin penké yajauch chíchararmiayi. Tura asamtai Papru Yus-shuarnaka akanki yaruak Tiran iskuirarjin tuke tsawant Yus-Chichaman ujaarmiayi.

<sup>10</sup> Nuna túruki jimiará uwí etserkamiayi. Túramu asamtai ashí Asia nunkanmaya aents Israer-shuar tura Israer-shuarcha Uunt Jesusa túramurín antukarmiayi.

11 Tura aentsti túrachminian túrat tusa Yuska ni kakarmarın Páprun susamiayi.

12 Jáanchniasha pushincha Papru antınman júkiar, nánkamas jaa shuaran ejetim, nú jaa shuarsha nuna antınkiar péńker ajaarmiayi. Iwianchrukusha nuna antınkiar, íwianch jíinkintai ankant ajaarmiayi.

13 Tura chíkich Israer-aents uwishin ármiai. Tura niisha chíkich chíkich péprunam wear iwianchrukun iwianchrın jíirki akuptin ármiai. Tuma asa niisha Jesusa náarjíjaj iwianchin jíiktiai tusar, iwianchin chichartuiniak “Nu Jesus Papru ujaana nuna náarjíjaj jíinkitiarum tájarme” tiarmiayi.

14 Tura Israer Patri uuntri Esewia náartin, siati uchiri ármia nu, nuna túarmiayi.

15 Túrasa Jesusa náarjíjaj jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, zyátsukaitrum?” tímiayi.

16 Nuna tinia iwianchruku áishman tsékenki nú áishmankan kakaram katsumak nupetkarmiayi. Túram ti katsumam niisha misú tura numpamnawar jíinkiar pisararmiayi.

17 Nusha Ipiisu péprunam túrunamiayi. Túrunamta Ipiisu péprunmaya Israer-shuarsha tura Israer-shuarchasha nuna túrunamun nekaawar ti ashankarmiayi. Tura Uunt Jesusa náarın shiir awajsarmiayi.

18 Túmainiai untsurı shuar Yúsan umirkaru Yus-shuar ajatsuk tunáa túrawarmia nuna paant ujakarmiayi.

19 Tura untsurı uwishniunawarmia nu, wawekratai papı ármia nuna itarmiayi. Itiar, júka iniaiyaji tusar, ashı íimianiaın áesawarmiayi. Nú papı áesawarmia nuna kuírısha senkuenta mir (50.000) nankaamasauyayi.

20 Tu túrunamta Uunt Yusa chichame pampanki tura nupetmaki wémiayi.

21 Tuma asamta nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarénum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi.

22 Masetúnia wétin asa Papru ni tsaniakmarın Masetúnia nunkanam emka akupkamiayi. Timiutéun Erastujaj akupkarmiayi. Tura nińkia Asia nunkanam seturmiayi.

### *Ipiasiunam ti charaatum ámania nu*

23 Pápruka tuke Ipiasiunam pujaj, nuyá aents Yus-Chichaman nakitiainiak charaatum ajarmiayi.

24 Iis, nuı Ipiasiunam kaya-yusa jeé ámiayi. Nu yus núwauyayi, Tiana naartin. Tura áishman, Timitriu naartin, nú jean nakumak uchichin najan-niuyayi kuitjaj. Tura niisha nú takatjaj ti kuírıntin ajasmiai. Tura chíkich áishman nú takatan takarmia nunasha ti kuírıntin awajsarmiayi.

25 Timitriusha niijjaj takarmia nuna ikiaanak, chikichnasha niijjaj métektaku takarmia nunasha ikiaanak niijjaj charaatum ajarmiayi. Timitriusha tímiayi “Winia írutramutiram antuktaram. Iisha ju takat takaajnia jujaj ti kuit achíatsjik.

26 Tura atumsha ju Papru wáintrumna nu tura ántarmena nu chichaak “Ashı aents najanamu yuska ántar áiniawai” tatsuk. Nuna tau asa, juı Ipiasiunam, tura arant ashı Asia nunkanam, ni yúsrın iniaisarar tusa enentáimtikrarai. Tuma asamta untsurı aents, ii yusrı Tiánan ikiuiniak, Papru tana nuna umirainiatsuk.

27 Papru tu étserkui, iisha itiurchat pujuschattajik. Kuit ii achiaj nuka menkakashtatuak. Tura nú arantcha ii yusr̄i Tiana j̄eēn shuar iniaisachartatuak. Tura nuyá Asia nun̄kanmayasha tura ashí nun̄kanmaya aencha, ii yusr̄i Tiana shiir awajainia nuna yapajíáwar aun nakitrachartatuak” tímiayi Timitriu.

28 Nuna antukar aencha ti kajekar charaatum ajarmiaiyi. Túmainiak “Ipiisu shuartikia, aya Tianak wakeraji” tu unsummiarmiaiyi.

29 Nuñkia aents páchim enentáimprarmiaiyi. Túmainiak Masetúnianmaya Kayuncha Aristárkuncha Páprun neman̄in ármia nuna achikiar japirkutak iruntai j̄eanam júkiarmiaiyi.

30 Tura Pápruka iruntai j̄eanam wayá chichastaj taun, nuyá Yus-shuar ármia nu, nuna suritkiarmiaiyi.

31 Tura Asia nun̄kanmaya uuntri, Páprun amikri ásar, añkia wayawain tusar chichaman akuptukarmiaiyi.

32 Túrasha irunar pujuarmia nu, páchim enentáimprar, chíkichka nusháa unsummiarmiaiyi. Tura chíkichcha nútiksarañ ausháa unsummiarmiaiyi. Tura chíkichka ti untsur̄i, nekaachar “wariniak irunturara” tiarmiaiyi.

33 Chíkich nuñ wajarmia nu charaatum amia nuna Israer-shuaran Arejántrun jintinrar eem shitiawarmiaiyi. Arejántrusha Kayun tura Aristárkuncha ayampruktinian wakerak takamatsatarum tusa uwején takuimiayi.

34 Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipiisu shuartikia aya Tianak wakeraji” ímia-imiatainiakua tí nukap pujursarmiaiyi.

35 Ipiisu pepru papí-aintr̄isha áentsun itiatmamtik tímiayi “Ipiisu shuártiram antuktarum. Ii uunt yusr̄i Tiana j̄eē ístinia íchukaitiaj”. Tura ni nakumkamur̄isha nayaimpinmaya iniarmania nusha íschatniukaitiaj. Tura nunasha ashí aents paant nékainiatsuk, tímiayi.

36 Warí, núnaka ashí aents nékainia asamtai atumsha itiatkatarum. Túrarum enentáimtsuk yajauch túrawairap, tímiayi.

37 Ímiatarum. Ju áishman̄ átum itiarumna nu, ii yúsr̄in yajauch chicharkacharai. Tura ni j̄eēn yajauch awajsacharai.

38 Wats, Timitriu tura niññiñ takainiana nu tunáa túramun ujaktai tusar wakeruiniakka pepru pen̄ker̄in werishtinkiait. Nuñkia máimtek iwiainiakartí.

39 Tura chíkich chicham ákuñkia péñker̄ iruntrarum iwiaratarum.

40 Kame ju yamáí túrunamun nekaawar Rúmanmaya kapitián “Ii uunt kapi-tiántri yajauch awajsatai tusarum túrachurmeash” turamchatjiash. Warí, ni-isha “¿Urukamtai charaatum ajarum?” takuisha, ámkiatin pen̄ké tujinkiattaji” tímiayi.

41 Tura papí-aint nuna tuasua amik “Áukete. Wétarum” tímiayi.

## 20

### *Papru Masetúnia nun̄kanam Krisia nun̄kanmasha wémiania nu*

1 Charaatum ajasua amikiarmatai Papru Yus-shuaran untsuk Yusnan jintinrataj tusa ikiaankarmiaiyi. Tura áujas ikiuki Masetúnianam wémiaiyi.

2 Nú nun̄kanam wekaráktak, Yus-shuaran jintinrar ikiakárrarmiaiyi. Tura nuyasha Krisia nun̄kanam j̄eamiaiyi.

3 Nuĵ menaintiu nántuk pujusmiayi. Tura nuyañka kanujajĵ Siria nunĵanam wétasa pujus Israer-shuar chícham jurusman anturmamak “antsu nunĵan Masetúnianmaani wetajajĵ” tímiayi.

4 Tura Piríanmaya áishman Súpater naartin Páprun atamprimiayi. Tura Tisarúnikianmaya Aristárkusha Sekuntusha Tírpinmaya Kayusha Timiutéusha Asianmaya Tikikiusha, Trújimiusha ashí nu shuar Jirípius peprunam Páprun atampriarmiayi.

5 Túrawar niisha emki wear Trúas péprunam jeawarmiayi.

6 Tura iisha wakapruachu tanta yutai jisat amuukamtai, iisha Jirípius péprunmaya jíinkir, kanunam enĵkemprar Masetúnia nunĵanmaya jíinkimji. Tura senĵku tsawant nanĵkaamasmanum emki wearmia nu amaiyañkarmiayi Trúasnum. Tura nuĵsha siati tsawant pujusarmiayi.

### *Trúas péprunam túrunamia nu*

7 Tura tumínĵin kíarai Jesukrístu enentáimtusar yurumátai tusar irun-trarmiayi. Tura Papru Yus-shuaran jintinramiayi. Kame Pápruka kashinkia wétin asa chichaa-chichaakua kashi ajapénĵ ejemiayi.

8 Tura yakí menaintiu pátaranam, tesaamu ámia nuĵ iruntrarmiayi. Nuĵsha ji ekemarma untsurĵ irunmiayi.

9 Tura nuĵsha natsa Eutikiu, áañkamunam ayamas pujusmiayi. Tura Papru ti esaram chichaakui nu nátsasha karĵ pujumiayi. Tumáa pujus kanaki yakí pátanmaya akaiki iniaamiayi. Tura penĵké jakan júarmiayi.

10 Tura Papru akaatuki tsuntsumprua miniakkamiayi. Tura Yus-shuaran chichariniak “Ashamkairap. Ataksha iwiaakui” tímiayi.

11 Nuyá ataksha Papru wakamiayi. Tura tañtan puukar yurumáwarmatai, tuke chichaa-chichaakua tsawantmarmiayi Papru.

12 Eutikiuncha iwiaakun ni jeen júkiarmiayi. Tura ashí aents shiir enentáimsarmiayi.

### *Miritiunam wearmiayi*

13 Wats, Papru Asun péprunam nunĵan we jeataĵtsa wakerimiayi. Tura incha, átumka kanunam wétarum, turamkurin, iikia emkír wémaji Asunnum.

14 Nuĵ Asunnum inĵkiunaikiar, Páprusha kanunam enĵkemprantai, Mí-tiríniniam jeamji.

15 Tura nuyá jíinkir, kashin tsawarar Sámus péprunam jeamji. Tura nuyañka Trujiriunam jear ayampramji. Nuyasha kashin tsawarar Miritiunam jeamji.

16 Pápruka Jerusarénnum wari wétajtsa wakerimiayi, pintikiustís naartin jístatin pachíinkiatajĵ tusa. Tuma asantai, Asia nunĵanam ti núkap pujus-tinian nakitiak “Ipisiunam wéhattajajĵ” tímiayi.

### *Papru Ipisiunmaya úuntrin áujsamiania nu*

17 Túrasha Papru tuke Miritiunam pujus, Ipisiunmaya Yus-shuara úuntrin winitiarum tusa untsukarmiayi.

18 Ni taarmatai Papru tímiayi “Atumsha wi Asia nunĵanam pujusan itiura túraj nu nékarme.

19 Atumjajĵ tuke tsawant pujumaj nuĵ, nanĵkaamantuchu enentáimtumasán, útchím winia Úuntrin takatrĵin takasmiajai. Tura Israer-shuar yajauch awajustinian wakerutainiaĵin tuke takasmiajai.

20 Ashí péñker ana nu nekaatarum tusan mijiatrutsuk jintintiamjarme. Iruntramarmena nuĵ tura anĵkant anĵkant atumí jeen pujumarmena nuĵsha Yus-Chichaman ujakmajrume, tímiayi.

21 Tura Israer-shuarnasha Israer-shuarchancha nútiksanak, enentai yajjárúm Uunt Jesukrístu umirkatarum, tímiajrumé.

22 Tura yamáí Jerusaréñnum wéajai, Yusa Wakaní túrutkui. Nujsha túrunatana nunasha nekamatsuk wéajai.

23 Tura Yusa Wakaní iniakturkui júna nékajai, ashí pepru wi jeattajna nuj enketáta tusar nákarainiawai. Tura ti wáitsatniun nekapsattajai.

24 Kame wikia jákashtajash. Túrusha warí winia itiurtawa. Wikia Yusa jintiñ warasan wekasataj tusan wakerajai. Yusai wea-wéakuan jáakun ini-aisataj tajai. Tura nuyá takatan Uunt Jesus surusmia nuna péñker amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

25 ‘Tura, yatsurtiram, ashí Yúsnan atumin paant ujakjarme. Yamaikia winiaka atakka wáitkiashtatume.

26-27 Nekaatarum, ashí Yusa wakeramurñ wisha penké úurtsuk ujakjarme. Tuma asamtai atumin títiajtsan wakerajrumé, chikichík shuara wakaní jinium wéakuisha wikia penké makuumashtajai.

28 Tuma asamtai emka atumek íimiastarum. Túrarum nuyá chíkich Yusshuar íistarum. Yus-shuaran wáinin ajastarum tusa, Yusa Wakaní achir-makurme. Yus-shuar ainia núnaka ni numpejain Uunt Jesus sumakchakait.

29 Kame wi wématai, chíkich táartatui. Núnaka nékajai. Tura niisha, Yusshuaran amukartajtsa wakeriartatui, uunt yawasha murikiun amuinia áintsan.

30 Túrusha nemartusarat tusar wakeruiniak atumiñiañ wait chichaman unuikiartin wantinkiartatui.

31 Tuma asamtai yatsurtiram, aneartarum. Wisha menaintiú uwitin tsawáisha káshisha úutchim ankant ankant unuiniamajrumna nu kajinmatki-irap’ tímiayi.

32 ‘Pai, yamaikia, yatsuru, Yus yáinmakarti. Yusa anenkrattairi nékaitrumna nú chichamsha kakarmaiti. Nú chicham átum katsuqarar kakaram wekasatniun yainmakarti. Kame nú chicham atumi enentáin pujakui, Yus ni shuarin matsamsatniun anajmatramia nuj pachiñkiattarme.

33 Wats, wisha chikichík shuara kuítrñ warirñcha wakerutkachuitjai.

34 Antsu winia uwejrui takasan wi atsummiaj nuna sumarmakmajai. Tura winia írutkamuru atsumamurñcha wiki sumakmiajai. Nuka paant nékarme.

35 Kame átum takasrum, atsumainia nusha yáinjarum tusan jintintiarume. Wats, Uunt Jesusa chichame enentáimsami. “Achiana nujañkia nankaamas, súana nuka shiir waraawai” tíchamka” tímiayi.

36 Nuna tuasua amik Papru tikishmarmiyai. Tura ashí níijai iruntrarmia nú shuar Yúsan áujarmiyai.

37-38 Tura Papru nuik chichaak “Atakka wáitkiashtatume” tiniu asamtai, ti kúntuts pujuiniak, úutchim Páprun miniaksarmiyai. Túrawar kanunam ejeniarmiyai.

## 21

### *Papru Jerusaréñnum wémiania nu*

1 Tura nuyá Yus-shuar aujsa ikiukir kanunam enkempramji. Tura ínkiuasmak Kus péprunam jeamji. Tura kashin tsawarar Rútas péprunam jeamji. Tura nuyañka Patara péprunam jeamji.

2 Tura nuĵ Pataranam pujusar, chíkich kanu Pinisia péprunam wea wáinkiamji. Túmakui nuĵ enĵemprar wémaji.

3 Nuĵ wésar Chipri nunĵkaka wáinkiamji. Chíprikia menanmaanĵ aa ikiuakur Sírianam jeamji. Kánuka Tíru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmayaĵ jínkir péprunam wayamji.

4 Nuĵ Yus-shuar wáinkiar nuĵ siati tsawant pujusmaji. Tura Yus-shuaran Yusa Wakanĵ uĵakam Páprun chicharainiak “Jerusaréĵnumka wéchatniuitme” tiarmiayi.

5 Tura siati tsawant nanĵkaasmatai jínkimji. Ashí Yus-shuar ármia nu núwentuk uchirtiuk nemartamkamji, péprunam inianĵkatmaktiai tusar. Káanmatkanam jear tikishmarar Yus áujsamji.

6 Tura nu imikiar nuĵńkia áuĵnaisar ikiukiarmaji. Tura iikia kanunam enĵemprakin ninĵkia ni jeĵen waketiarmiayi.

7 Iisha Tirunmayaĵ entsak wea-wéakuar Turumáitiam nuĵń jíntramji. Tura nuĵ jearsha Yusai yachi ármia nu chichasar nuĵń chikichkí tsawant pujusmaji.

8 Kashin tsawarar nuyá jínkir nunĵkan weri Sesaria péprunam jeamji. Nuĵ Jiripi jeĵen jear pujusmaji. Jiripikia Yus-Chichaman etserniuyayi. Nuik Jerusaréĵnum siati áishmaĵkan Yusa takatrĵn wáinkiarat tusar anaikiarmia nú Jiripiiti.

9 Jiripisha kuaru nawantrĵn yarumkauyayi uatnakchan. Niisha Yusa chichamen etserin ármia.

10 Tura iisha Jiripi jeĵen wárum tsawantak pujarin Jútia nunĵkanmayaĵ aents Yusa etserniurĵ, Akapu náartin támiayi.

11 Niisha taa Papru emenmamkarĵn achikmiayi. Tura achik ninĵki ni nawen tura uweĵńcha jńkiamamiayi. Nuna tura tímiayi “Yusa Wakanĵ tawai, juna emenmamka nérenniurĵn Israer-aents jútikia jínkiáwar Israer-shuarchanum surukartatui, tawai” tímiayi.

12 Iisha nu antukar Papru tímiayi “Jerusaréĵnumka weep.” Sesarianmaya Yus-shuarsha núnisarĵ Páprun tiarmiayi.

13 Tutai Papru tímiayi “ĵUrukamtai útkuram winia enentáirui kúntuts awajtarum? tímiayi. Wí Jesusna asamtai Jerusaréĵnum jńkiatainiakuisha mántuiniakuisha ashamatsjai” tímiayi.

14 Tura iisha Papru emetatai tukamar tujinkiar “wats, nuĵńkia Uunt Yus wakera nu tímianak atí” tiarmaji.

15 Nu tiri iniaisar iwiarnarar Jerusaréĵnum wémaji.

16 Chíprinmayaĵ yaunchu Yus-shuar Manasuĵ ni jeĵen Jerusaréĵnum takakuya nuna iĵiatmastinian wakerimiayi. Tuma asamtai Sesarianmaya ishichik Yus-shuar nemartamainiak Manasuĵnasha júkiarmiayi.

### *Papru Jakupu jeĵen irastajtsa wémiania nu*

17 Tura iisha Jerusaréĵnum jeawakrin, nuĵ warasar Yus-shuar ti šiir áuĵtamsarmiaji.

18 Tura kashin tsawar Papru ímiak Jakupu jeĵen wémiaji. Nuĵisha Yus-shuara uuotrĵ matsarmiaji.

19 Páprusha áuĵas amik, Israer-shuarchanum ni étsermajai Yus túramia nuna yámankamtaikniumiĵ júkí chikichkímias uĵakar uĵakar awajsamiaji.

20 Papru taman antukar “Yus ti péńkerchakait” tiarmiayi. Tura Páprun ju chichaman tiarmiayi “Támena nu péńkeraiti, yatsurú, túrasha Israer-shuar



timiá untsurí Yus-shuar ajasu áiniayat, “ashí Muisais akupkamia nu umik-tiniaitji” tuiniawai.

<sup>21</sup> Nú arant yajaya aents taar, chichartamainiak “Pápruka nusháa jintintui, turamainiawai. Israer-shuar chíkich nunkanam pujuinia nuna Muisaisa akupkamurí umirkashtin Pápruka jintintui, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.”

<sup>22</sup> Wátsek, yatsuru, nuñkia iturmainkit. Ame tátintrumin aents nekaawarka juí kajertamainiak káutramkachartatuak.

<sup>23</sup> Wats, antsu nuñkia, ju túrata yatsuru. Juí kuaru áishman Yúsan yaunchu tiarmia nuna umiktasa pujuiniawai.

<sup>24</sup> Nii júkiarta. Túram niisha Muisais akupkamia nuna umikiar nijiaa-mainiakui, amesha nijiaamarta. Núnismek kuñniasha ni susatin ana nu amesha akikmatkarta. Niisha ashí umikiarmatai, ni intiashin awampratin áhattawak. Nu áishmanka intiashin awampran Israer-aents wáinkiar, antur-tamkarainia nu, nekaschaiti, turamartatui. Antsu, Pápruka Muisais akup-kamia tímianak túrawai, turamartatui.

<sup>25</sup> Túrasa yatsuru, nekaata, Israer-shuarcha Yus-shuarka papí yaunchu akuptukmiaji. Israer-shuarti túratin ana nu ashí mash túratarum tátsuji, tu áatramji. Tura antsu namanken máawar ántar-yusan susamu yúashtiniaitrome, tímiaji. Tura numpasha umarchatniuitrome, kajemtikramusha yúashtiniaitrome. Tura tsanirmashtiniaitrome. Tu áatramji” tiarmiayi.

### *Páprun achikiarmania nu*

<sup>26</sup> Nuyá tiniu asamtai Papru nú kuaru áishmankan júkiarmiayi. Tura kashin tsawarar nímiak nijiaamararmiayi, Muisais timia nútiksarañ. Tura Yúsan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi.

<sup>27</sup> Túrasa nu siati tsawant amusattuk ajatemsaj, Ásianmayá Israer-aents Paprun Yusa Uunt Jeen pujan wáinkiararmiayi. Túrawar charaatum ajakiar Páprun achikiarmiayi.

<sup>28</sup> Achikiar untsuamainiak “Israer-shuártiram in yáinmaktarum. Ashí nunkanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujai yamá ju Jeencha yajauch awajturmají” tiarmiayi.

<sup>29</sup> Jes, nuik Ipiasiunmaya Trúpimiu Páprujai péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi.

<sup>30</sup> Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya júkiarmiayi. Túrawar wáitíncha nú chichamaik epentrararmiayi.

<sup>31</sup> Tura maatai tusar matsamtuiniáj suntara kapitíantri Jerusarénnumiá aents ashí charaatum ajainian antukmiayi.

<sup>32</sup> Kapitíancha ni suntarin tura sarjentuncha irur tseke weriarmiayi aents pujuarmia nuí. Aencha suntaran tura kapitíanin wáinkiar, Páprun asutíniayat iniaisarmiayi.

<sup>33</sup> Kapitíanka Páprun jeari achikmiayi. Tura jimiará jirujai jinikiarmiayi. Nuyasha aniasmiayi “¿Niisha yait? ¿Warinia túrait?” tímiaji.

<sup>34</sup> Túrasha aencha untsurí chichaman untsummiarmiayi. Túmainiakui kapi-tiáncha penké nekaachmiayi. Tuma asamtai Páprunka suntar pujamunam júkiarmiayi.

<sup>35</sup> Tura suntar pujamunam wáitiniam jeawar Páprun entsaki júkiarmiayi aents imiá kajeraínia asamtai.

<sup>36</sup> Tura aencha ukunmaanĵ pataakar, mantamnatí, tu untsummiarmiayi.

### *Papru chichastinian seamiania nu*

<sup>37</sup> Tura Papru suntarnum awayám, Páprusha kapitiánin Kriaku chichamĵai chichaak “Wi ishichik chichasaintĵame” tímiayi.

Tutai kapitián chichaak “Warí, ĵamesha Kriaku chicham chichastin nékamek? tímiayi.

<sup>38</sup> Nuńkia amesha ĵEĵiptunmaya shuárchakaitiam? ĵNuik kuartru mir (4000) aents, mańkartin tutai atsamunam yaruakchamkam? ĵKapitiánĵai meset najanataĵ tusa túrachmakum?” tímiayi.

<sup>39</sup> Tutai Papru tímiayi “Núchaitĵai. Antsu wikia Israer áentsuitĵai. Sirisia nuńkanam uunt pepru Tarsu náartin ana nuĵ akiinaitĵai. Tura waitneasam ĵu aents chichastin tsanĵkatrukta” tímiayi.

<sup>40</sup> Tura kapitián, ayu, tutai, Papru watainiam wajas, mitiat pujus-tarum tusa uweĵén takuimiayi. Tura aents itiatkarmatai Israer-chichamĵai chichasmiayi.

## 22

### *Papru áentsun timia nu*

<sup>1</sup> Papru chichaak ĵuna tímiayi: “Yatsurtiram, tura úuntur árumna nu an-tuktarum. Wikia Pápruitĵai. Kíishtumaktaj tusan títiatĵana nu waitneasrum anturtuktarum” tímiayi.

<sup>2</sup> Tura Papru Israer chichaman chichaakui, aents nuna antukar nú nanĵkaamas itiatkarmiayi.

<sup>3</sup> Nuĵ Papru chichaak “Wikia Israer-shuaraitĵai. Tarsu pepru Sirisia nuńkanam ana nuĵ akiinaitĵai. Túmaitiatnak ĵuĵi Jerusaréńnum tsakaruitĵai. Tura unuikiartin Kamaríran chichamen unuimiaruitĵai. Tuma asan ii uuntri akupkarmia nuna ashí umirkaitĵai. Tura átum yamá túrarmena nuna wisha nútiksanak Yusna ana nuna tuke enenáĵĵai wakerukuitĵai.

<sup>4</sup> Tura Jesusan umirkaru ármia ana nuna máataĵ tusan pataatukni wekaimiaĵai. Túran áishmańkan nuwanĵa achikian sepunam enĵkeataĵ tusan túrimiaĵai.

<sup>5</sup> Israer-patri uuntriĵa Israer-shuara uuntriĵa Tamaskunam íi-shuar susatá tusar papin ataktusar akuptukarmia nuna nińkia nékainiawai. Je-susan umirkarun achikia ikiaankan ĵuĵi Jerusaréńnum asutniáwarat tusan werimĵai’ tímiayi.

### *(Túramurĵi 9.1-19; 26.12-18)*

<sup>6</sup> Tura wi ĵintiá wéaĵ Tamaskunam jeastatuk aĵasai nantu tutupin ai aya aneachma nayaimpinmaya newaat wajantruntmiayi.

<sup>7</sup> Túrunamtai wisha nuńká iniaarmajai. Nuyanka chichaamun antukmajai. Chichartak “Sauru, Sauru, ĵurukamtia imiá pataaturam?” turutmiái.

<sup>8</sup> Takui wi aniasmajai “ĵAmesha yáitiam, Uunta?”

Tutai “Wikia Nasaréńnumia Jesusaitĵai. Ame pataaturmena núitĵai” turut-miái.

<sup>9</sup> Wijiꞑ pujuiꞑ nu, newaat wajantun wáinkiar ti ashamkarmai. Túꞑasha ninkia túꞑutun antukcharmai.

<sup>10</sup> Tura wi tíꞑiajai “¿Nuiꞑkia, Uunta, warí itiuꞑkattaj?” tíꞑiajai.

Tutai Uunt chichartak “Wajakim Tamaskunam wetá. Nuꞑisha ame túꞑattamna nuna uꞑatmakartatui” turutꞑiaꞑ, tíꞑiaꞑiaꞑ.

<sup>11</sup> Kame wikia nú newaat ajakun ísan jiuꞑu kusurmai. Tuma asamtai winia tsaniakmar eꞑkeki jurukiar Tamaskunam ejetiarmái’ tíꞑiaꞑiaꞑ.

<sup>12</sup> Papru tuke aujmatki wéawai. “Tura nuꞑ Tamaskunam áishmaꞑ Ananíꞑas pujumai. Niisha Yúsana aneak, Muisais akupkama nuna umirkauyi. Tura nú péꞑrunmaya Israer-shuar áꞑꞑia nu nin péꞑker enentáimtiarmái.

<sup>13</sup> Nú Ananíꞑas winia íꞑsataj tusa táꞑai. Taa turutꞑiaꞑ “Yatsuru Sauru, péꞑker iimtia.” Túꞑrutkui nú chichamaik péꞑker íimꞑiaꞑiaꞑ. Túꞑrunan Ananíꞑasnasha wáinkiamjai.

<sup>14</sup> Tura Ananíꞑas chichaak “Iwiaaku Yus, winia wakeramurun nekartuat tusa winia Uchirnasha, tunaarinchaa nuna, íꞑsat tusa, winia chichampruncha antukat tusa áꞑin yaunchu Yus anaitiamkaiti.

<sup>15</sup> Amesha Papru, Yusna ana nu íꞑsumna nusha antukumna nusha ashí aents uꞑakartatme.

<sup>16</sup> Tuma asamtai yamaisha ¿warí náꞑam? Tunaarun asakáꞑꞑurat tusam Uunt Jesus enentáimtusam weme ni náꞑari ꞑachisam imiantia” turutꞑiaꞑ.

<sup>17</sup> “Tura Jerusaréꞑnum waketkin Yusa Uunt Jeꞑen wéꞑajai Yúsana áuꞑsataj tusan. Nuꞑ íꞑimiamjai.

<sup>18</sup> Nuꞑ Jesus chichartak “Juꞑi Jesusaréꞑnum Wíi túꞑamur etserkattamna nuna antukchartatui. Tuma asamtai warí jiuꞑkim wetá” turutꞑiaꞑiaꞑ.

<sup>19</sup> “Túꞑrutkui wi tíꞑiaꞑiaꞑ “Túꞑasha Uunta, juꞑyá aents wi Israer-shuara iruntai jeꞑen wayaꞑ Ámin umirtamkarmia nuna nuꞑi matsatun achikian awatin sepunam eꞑkeawarmia nuna néꞑkainiawai.

<sup>20</sup> Tura nuyá Áminiu etserniun Estepaꞑkan máꞑiniakuisha wisha wajamjai. Túꞑruiniakui, “péꞑkeraiti” tíꞑiaꞑiaꞑ. Nú arantcha ni pushirín íꝼsamtai” tíꝼiaꝼiaꝼ.

<sup>21</sup> “Túꝼasha Uunt Jesus winia turutꝼiaꝼ “Wetá. Israer-shuarcha matsatainia nuꝼi akupkatjame” turutꝼiaꝼ” tíꝼiaꝼiaꝼ Papru.

### *Suntara kapitíántrín túꝼrunamia nu*

<sup>22</sup> Nuꝼi matsamarmia nu, núꝼnaka antukarka untsumtan juáꝼriarmiaꝼiaꝼ. “Juꝼka mantamnatí. ¿Urukamtai iwiaakusha ꝼujusat?” tiarmiaꝼiaꝼ.

<sup>23</sup> Tura aentska Paprun kajerainiak, ti untsumainiak pushirín tuꝼaat ajapawar nuꝼkancha nuꝼkíꝼmkiamaikia ajarmiaꝼiaꝼ.

<sup>24</sup> Tura kapitíán nuna wáꝼniak Páꝼrun suntar ꝼujamunam awayáꝼiaꝼiaꝼ. Tura suntaran chicharuk “Áꝼtum asutiáꝼrum áimtiatarum. ¿Urukamtai aents nin kajerainiak imiá untsumainia? Nekaatarum” tíꝼiaꝼiaꝼ.

<sup>25</sup> Tura Páꝼrun asutiáꝼtai tusar jiuꝼkiáꝼrar awajsam Páꝼruka kapitíánin chicharuk “¿Rúꝼmanmaya aents áꝼyatik asutiáꝼmniakait, ni túꝼamurí nekartsuk?” tíꝼiaꝼiaꝼ.

<sup>26</sup> Nuna táꝼman antuk kapitíáncha uunt kapitíánin uꝼaktaj tusa werí chichaak “Maaj, túꝼrataj tamena nu anearta. Juꝼ áishmaꝼ Rúꝼmanam ꝼachitkaiti” tíꝼiaꝼiaꝼ.

<sup>27</sup> Nuna antuk uunt kapitíán Páꝼrun werí aniasmiaꝼiaꝼ “¿Amesha nekasmek Rumanam ꝼachitkaitiam?” tíꝼiaꝼiaꝼ.

Tutai Papru “Ee” tíꝼiaꝼiaꝼ.

<sup>28</sup> Tutai “Wikia ti kuítian akikmakmiajai Rúmanam pachiinkiatniun” uunt kapitíán tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachiinkian akiiníaitjai” tímiayi.

<sup>29</sup> Nuna takui Páprun asutiátaj tiarmia nuna wárik iniaisar jíiniar wearmiayi. Tura imia uunt kapitíáncha Rúmanam pachitkian jiníkiá asa ashamkamiayi.

<sup>30</sup> Tuma asa kashin tsawar uunt kapitíán, urukamtaik Páprun imiá ka-jerainia, nekaataj tusa wakerak Paprun werí jiníkiámun atirmiayi. Tura Israer-patrí uuntrín chíkich naamka armia nújajísha ikiaankamiayi. Tura nuínkia ni matsatmanum Páprun itiar ajapén awajsamiayi.

## 23

### *Israer-aentsu Úuntrín Papru timiania nu*

<sup>1</sup> Papru Israer-patrí naamkarín úmamkes iis “Wíi shuartiram antuktarum. Úchichik tuke yamaisha Yus íimmianum pénger wekainuitjai” tímiayi.

<sup>2</sup> Papru nuna takui Israer-patrí uuntrí Ananías, ni suntarín Papruy ayamas pujuarmia nuna “Wenunam awatiarum” tímiayi.

<sup>3</sup> Tutai Papru tímiayi “Tsej, jimíará chichamtinia íimiatá, Yus amincha asutiámtawai. Muisais akupeana nuna umiatsuí tusam yajauch turutattsam pujame. Entá, ¿nuínkia urukamtia Muisais tímia nuka iniaisam ame suntarum winia asutiátarum tame?” tímiayi.

<sup>4</sup> Tura nuna takui nuí wajarmia nu Páprun tiarmiayi “¿Maaj, amesha Patri uuntrí imiá yajauchisha chichaream?”

<sup>5</sup> Tutai Papru tímiayi “Yatsuru, wisha Patri uuntrí áutskaitia tíchamjai. Nékaitkiunka núnaka tíchaajai. Kame wisha nékajai, Yus-Chichamnum tawai “Atumí uuntrí yajauch chicharkairap” tawai” tímiayi.

<sup>6-8</sup> Israer-aentsu úuntriya jimíará írutka ármíayi. Satuséu aents tura nuyá Paríséu aents nusháa írutkan Pápruka nekaamiayi. Kame Satuséu aentska, jakamunmaya nantaktincha Yusa suntarísha aentsu wakanísha tura iwianchcha atsawai, tiniu ármíayi. Antsu Paríséu aentska, nuka ashí awai, tiniu ármíayi. Nuna nekáa Papru kakantar chichaak “Wikia Paríséu áentsuitjai. Wíi shuarsha Paríséu áiniawai. Wikia ashí shuar jakamunmaya ukunam nantaktin átatui tu jintiamun, nekaatai tusar itiaríarmiayi” tímiayi. Tura Papru nuna takui Paríséu aents tura Satuséu aencha nuámtak kaje-naikiarmiayi. Túrunawar kánasarañ nusháa nusháa enentáimprarmiayi.

<sup>9</sup> Nuínkia ashí aents charaatum ajarmiayi. Tura Israer-shuara jintinniurí Paríséunam írutka armia nu wajakiar tiarmiayi “Ju áishman tunaan penké túrichuít. Yusa suntarí chíkich wakancha nin nekas chichaschamashi. ¿Ya neka?” tiarmiayi.

<sup>10</sup> Ti charaatum ajainiakui suntara kapitíántrí Páprun achiárchartimpiash tusa suntaran untsuk, “Júktiarum, túrarum suntar pujamunam awayátarum” tímiayi.

<sup>11</sup> Nuyá kashi Papru Uuntrí mesekra ipiatuk “Kakaram ajasta, Papru. Júi Jerusaréñnum winia ujakarumna núnismek Rúmanmasha ujaktatme” tímiayi.

### *Páprun máatniun wakeriarmiania nu*

12 Nuyá kashin tsawarmatai Israer-aents Páprun maatai tusar chichaman jurusarmiyai. “Papru máachkurkia yurumtsuk tura penké úmutsuk matsam-sattaji. Máachrikia yajauchiniam yumin̄kramu atai” tiarmiayi.

13 Nuna tiarmia nuka kuarenta (40) nan̄kaamas ármiayi.

14 Tura Israer-patri uuntrin̄ tura Israer-aentsu úuntrin̄cha weriar “Papru máachkurkia penké yurumtsuk pujustaji. Máachrikia yajauchiniam yumin̄kramu atai” taji.

15 Tuma asamtai ashí Israer-patri naamkarijjaj̄i suntara kapitíántrī seatarum, Papru tatí tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin̄ iisha maatai tusar nin̄kia táatsaj̄in̄ nákkattaji” tiarmiayi.

16 Tura Papru awē nú chichaman antuk suntar pujamunam taa Páprun ujakmiayi.

17 Tuma asamtai Pápruka suntara kapitíántrin̄ untsuk “Jū uchi uunt kapi-tiánnium jukitia. Niisha chichaman takakui” tímiayi.

18 Kapitíáncha uchin uunt kapitíánnium ejé tímiayi “Papru en̄keamu pujana nu winia untsurak “Jū uchi uunt kapitíánnium jukitia. Chichaman takakui” túrutui” tímiayi.

19 Uunt kapitíáncha nú uchin en̄keki arantach jukí chicharuk “¿Warí turut-taj̄i tame?” tímiayi.

20 Tutai uchi tímiayi “Israer-aents Páprun chichaman jurusarai. “Papru túramurí̄ tí paant nekaatai tusar kashin Israer-shuara uuntrin̄ ejetarum” turamartatui.

21 Tura amesha nuna takui anturkaip. Kuarenta (40) nan̄kaamas jin̄-tiá akirtua pujurainiawai. Tura “Papru máachkurkia yurumtsuk tura úmutsuk matsam-sattaji” tuiniawai. Tuma asamtai yamaisha ámin tití tusa nákkarmainiawai” tímiayi uchi.

22 Tura uunt kapitíáncha uchin chicharuk “Ame túrutmena nu chíkich aents penké ujakaraip’ tímiayi. Nuna tí, uchin akupkamiayi.

### *Akupin Piriksaj̄ ejetiarmiania nu*

23 Nuyañka uunt kapitíáncha chíkich kapitíánin̄ jímíaran itiá chichaak “Urum, kashí ajapén̄ ajastatuk aj̄, untsurí̄ suntar ikiaankarta. Jimiará siáñ̄ (200) aya náwek, setenta (70) kawainium eketka, nuyá chíkich jimíará siáñ̄ (200) nan̄kijjaj̄in̄ Sesaria nun̄kanam wétin̄ iwiarata.

24 Páprusha kawainium ekemkatin̄ iwiarturta. Túrarum péñkerak ejetarum akupin Piriksaj̄” tímiayi.

25 Tura niijjaj̄i jū chichaman áatrar akuptukmiayi:

26 “Ti péñker akupin Píriks, wikia Krautiu Rísias jū papin áatjame.

27 Israer-aents jū áishman̄kan maatai tusar wakeruiniak achikiarmiayi. Tura niisha Rúmanmayā áentsuít̄kui wikia nuna nekaan suntarjaj̄i werin̄ jukimjai.

28 Wikia ¿urukamtaik achikiaruit? tusan Israer-patri naamkarin̄ jukimjai nin̄.

29 Páprunka ii uuntrī akupkamurin̄ umiatsui tusar nin̄ kajeriarmiayi. Pápruka yajauch̄ túrachu asa mantamnachminiuyayi. Sepunmasha en̄kemachminiuyayi.

30 Tura wisha Israer-aents nin̄ máatniun̄ chichaman jurusman̄ nekaan amin̄ akuptajme. Nuyasha nin̄ kajerainia nunasha tajai “Atumsha Piriksaj̄ werum átum warin̄ma kajerarum nu titiarum” tajai. Ayu. Júchiniak tájame.” Nuna tu áatar akuptukmiayi.

31 Tura suntarsha ni uunt kapitiántri tímia nútiksaran Páprun kashi júkiarmiayi Antipatris péprunam.

32 Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujai wearmiayi.

33 Sesaria péprunam jeawar papin Piriksan súsarmiayi. Tura Pápruncha nuí ejeniarmiayi.

34 Akupniusha papí aujsua amik Páprun aniasmiayi “Amesha, ¿tuí akiini-aitiam?”

Tutai “Sirisia nunkanmayaitjai” tímiayi.

35 Nuna takui akupin tímiayi “Wátskea kajertamainia nu taar turamaini-akui anturkatjame” tímiayi. Tura nuyanka uunt akupin Erutisa jeen awayá apujsamaiyi, suntar ísarat tusa.

## 24

### *Papru Píriksjai áujmatsamiania nu*

1 Tura senku tsawant nankaamasaj Israer-patri uuntri, ni naari Ananías, Sesarianam támiayi. Tura Israer-aentsu uuntri tura ti unuimiaru chichamt-tisha, ni naari Térturu nujai táarmiayi. Ju aents Páprun kajerainia ásar akupniunam wearmiayi.

2 Nuí Páprun itiarmatai Térturu chichatan juáirmiayi. “Uunt akupin Píriks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai.

3 Tuma asakmin iisha ashí matsatmanum tuke tsawant ti shiir yu-miñsamajme, uunta.

4 Tura amesha ti núkap chicham antuktin nakitiatspash. Tuma asantai antsu ishichik waitneasam anturtukta, tímiayi.

5 Ju áishman Papru, sunkura utsukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsri, Nasarénu tuinia nuna úuntri.

6 Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujai métek asutiátaí tusar wakerimji.

7 Túrarin nuyanka kapitián Rísias taa tapit achik jurutramkimijai.

8 Tura atumek akupin Piriksai werum nuí aujmatkatarum, turamaji, tímiayi. Tuma asantai amesha Píriks, Papru aniasta. Nuiñkia ii tájinia nu nekasaiti, nu nekaattame” tímiayi Térturu.

9 Tura Israer-aents pujuarmia nu “Nekasaiti ashí ni tana nu” tiarmiayi.

10 Nuyá Píriks, uwejejai, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniurj ti untsurj uwitin pujusuitme. Tuma asantai nuikia shiir enentáimsan páchitsuk chichastatjai.

11 Wats, wi túramur nekartuata. Yúsan áujsatat tusan Jerusarénum wi wémajna nu tuse (12) tsawant nankaamasai.

12 Nujsa yajauch áujmatki weaj wáitkiacharmai. Yusa Uunt Jeencha tura Israer-shuara aujtai jeencha tura pepu jíntianmasha áentsnum charáa charáa ajá wekaaj penké wáitkiacharmai, tímiayi.

13 Ju aents juí matsatainia nu wíniaka penké turutchamnia áiniawai.

14 Túrasha júna paant ujaajme. Jesus yamarman jintiána nuna umíajai. Kame Israer-aentska wáitaiiti tuinia nuna wikia umíajai. Túrasha nuna túran ii uuntri Yusri akupkamia nunak umiktasan pujajai. Jes, ashí Muisais

aar akupkama nuna tura ashí Yúsnan yaunchu etserin aar akupkarmia nunashá uminiaitjai.

<sup>15</sup> Tura jakaasha nantaktin átatui, tajai. Warí, péñker aents nútksan yajauch aencha nantaktartatui imia Israer-shuar tuiniatsuk. Tura wisha nútksanak túrunatniuiti tajai.

<sup>16</sup> Tura wisha tiniu asan, wikia winia enentáiruŷ Yus ímmianum maku-umatsuk wekasataj tajai. Tura áentsnumsha nútksanak penké makuumatsuk wekaajai' tímiayi.

<sup>17</sup> "Tura, uunta, untsurí uwitin chíkich chíkich nunkanam wekaasuan amikian winia shuaruŷ támajai. Kuítrinchan kuítian susataj tusan tura Yusa kuítríncha nin susataj tusan támajai.

<sup>18</sup> Túran wisha, Muisais jintinmia nútksanak nijiaamaran, Yusa Uunt Jéen pujumiajai. Untsurí aents charaatum ajainiasha atsumiayi. Nuŷ wiki pujáŷ Ásianmaya Israer-aents wáitkiarmiayi.

<sup>19</sup> Tura wi yajauch túraitkuŷkia winia wáitkiarainia nu táchatniukait ámin ujatmaktasa.

<sup>20</sup> Túrachkuŷkia juŷ pujuinia nu, Israer-patrí naamkarí matsatmanum wi pujuinjana nuŷ yajauch túramun nékainiakka turutiarti.

<sup>21</sup> Kame, ""jakamunmaya nantakminiaiti" tau asamtai makuurtiajtsarum pujarme" matsatmanum tímiaj nujáŷ turutchartimpiash. Nú arantka yajauch túramun penké nekartuacharmai" tímiayi Papru.

<sup>22</sup> Táman antuk Píríks, Kristu shuarí túramun paant nekáa, áanik iniaisamiayi. "Antsu kapitíán Risias támatai nuŷkia nu chichaman nekaatjai" tímiayi.

<sup>23</sup> Tura nuyá suntara kapitíántrín chichaak "Juŷ Pápruka tuke emetnati. Tura ishichkikia ankant apujsatarum. Tura nuyá ni amikrŷ taa yáŷntaj takui suritkiarap" tímiayi.

<sup>24</sup> Tura nuyá chíkich tsawantaj ataksha Píríks ni nuwejai Tursirajai támiaiyi. Núwénka Israer-shuarauyayi. Píríkska "Papru itiatarum' tímiayi. Papru Jesukrístunun étserkui antimiaiyi.

<sup>25</sup> Tura Pápruka yajauchiniam wekasastincha naka wekasatniuncha, tura ukunam Yus tunáa áentsnaka asutiátniuiti takui Píríkska ashamak tímiayi "Antsu yamaikía máakete. Tura ataksha wi ankant pujakun untsukmijiam" tímiayi.

<sup>26</sup> Tura, ankant ajastaj tusa Papru kuítian akirkashtimpiash, tu enentáimias, Píríks tuke untsúu wémiayi, chichastai tusa.

<sup>27</sup> Tura nuyanka jimiará uwí nankaamasmatai Píríks akupin náamkamu ajapnamiayi. Tura chíkich aents, ni naari Pursiu Jistu akupin náamkamiayi. Tura Píríkska, Israer-aents péñker enentáimtsarat tusa wakerak, Páprun sepunam tuke ikiukmiayi.

## 25

### *Papru Jístujai áujmatsamiania nu*

<sup>1</sup> Jístusha akupkatin takatan nankaamataj tusa Sesaria péprunam támiaiyi. Tura menaintiú tsawant nankaamasmatai nuyá we Jerusarénum jeamiayi.

<sup>2</sup> Nuŷsha Israer-patrí uuntri tura Israer-aentsu penkerísha Páprun tsanumprurtai tusar Jístun weriarmiayi.

<sup>3</sup> Tura tiarmiayi "Waitneasam Páprusha Jerusarénum akupkata" tiarmiayi. Jintía maatai tusar wakeruiniak nuna tiarmiayi.

4 Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nu̇j wárik waketkittiajai” tímiayi.

5 Nuyá nin tímiayi “Atumsha penkeri árumna nu, wijiái Sesarianam wétiniaitrume. Tura nú áishmaṅka tunaari ákuṅkia nuṅsha títiniaitrume” tímiayi.

6 Jístuka Jerusaréṅnum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesarianam waketkimiayi. Tura nu̇j jeá kashin tsawar, akupin pujutainium pujus “Papru itiatarum” tímiayi.

7 Tura Papru wayamtai, Israer-aents Jerusaréṅnumia taarmia nu káunkarmiayi. Túrawar ti nukap chichainiak “Tunáa túraiti Pápruka” tu tiarmiayi. Túrusha penké uyumamtikiacharmiayi.

8 Pápruka chichamprumak tímiayi “Wisha tunaan penké túrachuitjai. Israera uuntri áarmarincha umirkaruitjai. Tura Yusa Uunt Jeencha yajauch awajsachuitjai. Tura uunt kapitánniasha yajauch penké chícharkachuitjai” tímiayi.

9 Jístuka Israer-aents penker enentáimtursarat tusa wakerak, Páprun tímiayi “Wakerakmiṅkia Jerusaréṅnum wemí. Wisha nu̇j ame túramurmin nekaatjai” tímiayi.

10 Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtai Rúmanmaya uunt akupniun wisha winia túramurun ujaktiniaitjai, nekartuati tusan.

11 Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiuṅkia winiaka Israer-shuarnum surunkachminiaitjai tajai. Tuma asamtai seajme, wí túramun uunt akupin Sésar nekartuati” tímiayi.

12 Tutai, nuyá ni írutramurijjai chichasua amik, Jistu Páprun tímiayi “Uunt akupniui wétaj tusam seame. Tuma asamtai nu̇j wétatme” tímiayi.

### *Papru uunt akupniujai áujmatsamiania nu*

13 Tura ishichik tsawant nankaamasmatai akupin Akripia ni nuwejai Pirinisejai Jístun áujсатаj tusa Sesarianam wearmiayi.

14 Tura untsuri tsawant pujusarmiayi. Tura nu̇j pujuiniaí Jístuka Papru túrunamun akupniun ujaak tímiayi “Juí áishmaṅ pujawai. Píriks nin achik enkea ikiukmiayi, tímiayi.

15 Kame wikia Jerusaréṅnum pujái Israer-patri uuntri tura Israer-aentsu uuntrisha, Papru yajauchin túraiti tusar káutrulkarmiayi, tímiayi. Mantamnati tusan akupkata, tu seachtarmiayi.

16 Takú wi tímiajai “Iisha Rúmanmaya áentstikia chícham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumatsaiṅ mantamnati tusar akupeatsji iisha” tímiajai.

17 Tiniu asan, táarmatai, wikia nákatsuk kashin tsawaran akupin puju-tainium pujusan, Papru itiatarum tusan akupkamjai.

18 Tura Páprun tsanumprurtaí tusar taent chichainiaksha, wi enentáimmiajna núnaka tícharmiayi.

19 Antsu áyatik Yus umirkar túmatairin Papru nuna túrachai, tiarmiayi. Tura nuyasha áishmaṅ Jesus naartin nantaki iwiaakui tawai Pápruka, tiarmiayi. Nunak tiarmiayi.



20 Tura wikia nú chichaman túratniun nékachu asan, Páprun aniasmajai “¿Amesha Jerusarénum wétaj tusam wakeramek? Nui nu chichaman nekar-tamawarti” tímiyai.

21 Túrasha “Atsá. Juin pujustajai. Rúmanmaya uunt akupin Akustu Sésar nekartuati” tímiyai Papru. Takui, “nuinkia tuke sepunam pujustá. Tura wi ukunam uunt akupniun akuptuktajame” tímiyai Jistu.

22 Nuyá Akripia chichaak “Wisha itiursanak nu áishman chichaamun an-turkaj” tímiyai. Tutai Jistu tímiyai “Amesha kashinkia anturkattame”.

23 Tura kashin tsawar Akripia Pirinísejai taar, iwiaa-iwiarmamu ajas wayawarmiayi. Suntara úuntrijiai tura nú péprunmaya úuntrijiai wayawarmiayi. Tura nu Jistu, “Papru itiatarum” tímiyai.

24 Tura Papru támatái Jistu tímiyai “Uunt Akripia, tura ashí áentstiram matsatrumna nu, pai, ju áishman íistarum. Ti untsurí Israer-aents Jerusarénumsha tura juí Sesarianmasha ju áishmankan Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai.

25 Túrasha wíjiainkia tunáa jakamnianka túrachuuti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai.

26 Tura wariniak uunt akupniun áatrataj nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjarme. Túrawakmin wi wariniak áatratj nuna nekaatjai.

27 Warí wisha, ni yajauch túramurín áatsuk, uunt akupniunam akupkash-tiniatjai” tímiyai.

## 26

### *Papru Akripiaj chichamprumakmiania nu*

1 Jistu nuna tutai Akripia Páprun tímiyai “Wats, amesha tu timi chicham-prumakta” tímiyai. Tutai Papru uweje takuí chichatan juarmiayi.

2-3 Chichaak tímiyai “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamá wisha ámin chichamprumaktaj tau asan shiir enentáimjai. Israer-aents turutainia nuna mash ujektatjame. Waitneasam péñker anturtukta’ tímiyai.

### *Papru ni yaunchu túrutairn ujakmiania nu*

4 “Wi úchichik winia nunkaruj tura Jerusarénumsha pujusan wi túramajna nuna ashí wíi aents Israer ainia nu nékainiawai.

5 Pariséu ajasan, ni akupeamurín itirchat ajn ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui.

6 Túrasha wikia, jakamunmaya nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úntrin yaunchu tímiyai. Yus tímia nuna túrunattawai wisha tiniu asamtai itiararmiayi, tímiyai.

7 Tura ashí mash Israer-shuarti, tuse (12) aents matsatka ájinia nu, ju nantaktin chichaman Yus tímia nuna túrunati tusar nákiniaji. Tuma asar Yus áujkur<sup>4</sup>, tsawaisha káshisha nú enentáimtuiniaji. Tura wisha nú chichamnak enentáimta asamtai wíniaka kajertuiniawai, uunt Akripia.

8 Warí, atumsha “Yus jakancha iniantkimniaiti” tátsurmek’ tímiyai.

9 “Tura wisha yáunchuka Nasarénumjá Jesusnan umirkaruka kajerkat-niuiti, tu enentáimniuyajai.

10 Tura Jerusarénnun Yus-shuar ármia nuna kajerkarmiajai. Israer-patri uuntri chichamejai untsurí áentsun Jesusnan umirkarmia nuna sepunam enkeamiajai. Tura nú shuaran máiniakuisha wikia péñkeraiti tu wémiajai.

11 Tura Israer-shuara iruntai jeen wayan ti asutiármiajai, Jesusnan umirkatniun iniaisarar tusan. Tura imiá kajerkaran chíkich nunkanmasha pataatu wearmiajai achiktaj tusan' tímiayi.

*Tamasku jintianam túrunamun ujakmiania nu*

(Túramurí 9.1-19; 22.6-16)

12 Tura Israer-patri uuntri tsankatrukmetai, papin ni surusarmia nujai, Tamasku péprunam wétaj tusan jíinkimiajai.

13 Tura, uunta, nantu tutupin ai, jintiá wéai newaat ajaki ti tsáapin, tsawái nantujai nankaamas etsantrutramiaji. Tura wijjai wearmia nunasha núnisaran etsantrurarmiaji.

14 Tura túrunamtai ashí nunká tepetar wáinkiaromiaji. Wiki Israer-chichamjai túrutun antukmajai "Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wíi aents kajera asam túruname" turutmai.'

15 Túrutkui wisha "¿Amesha yáitiam, Uunta?" tímiyai.

Tutai Uunt turutmai "Wisha Jesusaitjai, ame pataatamna núitjai.

16 Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamniun, turutmai.

17 Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuiasha, tura chíkich aents kajertamainiakuiasha ayampruktatjame, turutmai.

18 Péñker jintintia tusan akupeajme. Kame aencha kiritniumiá jíinkiar tsáapniniun wekasarat tusan, tura iwianchin umirtsuk Yúsán umirkarat tusan akupeajme. Tura Winia enentáimtursarmatai Wisha ni tunaarín tsankurattajai. Nuna túran Yusna ajasaru áiniana nujai apujsattajai." Nuna Jesus turutmai' tímiayi.

*Papru mesekrampra umikman ujakmiania nu*

19 Tuma asamtai, uunt Akripia, Uunt Jesus nayaimpinmaya wantintiurak turutmia nuna umirkataj tusan pujajai.

20 Enentai yapajíawar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusarénnunian, Jutía nunkanmayanacha tura nútiksanak Israer-shuarchanacha nuna ujakarmiajai. Tura ujainiakun "Yus-shuar ajasmarum paant ajasat tusarum, péñker túratarum" tímiyai ashí shuaran.

21 Tura wi Yusa Uunt Jeen pujái, Israer-shuar achirkar emetruawar mántuatai tukamá tujinrukarmiaji, Yus winia yaintiu asamtai.

22 Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péejchach ainia nunasha ujainiajai. Tura Muisaissha, Yúsán etserniusha tiarmia nunak étserajai. Nú arantka tátsujai.

23 Krístuka wáitsatniuyayi, tura jakasha émak nantaktiniuyayi, ii uuntri tiniu ármiaji. Tura Krístuka nantaki Yusa chichamen íi áentsun tura Israer-shuarchanacha nútiksán ujaktiniuyayi. Nuna tu tiarmiaji. Tura núnaka wisha tu ujainiajai" tímiyai Papru.

*Papru Akripian Yus-shuar awajsataj tusa wakerimiania nu*

24 Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

25 Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti.

26 Wi tájana nuna, uunt Akripia juí pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajai” tímiayi.

27 Nuyá Akripian chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

28 Takui Akripia chichaak “Maaj, ishichik awajtame Papru, Yus-shuar ajastin” tímiayi.

29 Tutai Papru tímiayi “Tura ishichik chichamjajisha untsurí chichamjajisha, amesha uunt Akripia, tura ashí winia anturtukurmena nu, wijjai métek ajasúk tusan wakerajai. Tura antsu wia núnisan jínkiámua núnaka wakerats-jai” tímiayi.

30 Papru nuna tuasua amikmatai akupniusha, uunt kapitiáncha, Pir-inísesha, tura nuí ashí pujuarmia nu wajakiarmiayi.

31 Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penkesha sepunmasha enkeachminiaiti” tiarmiayi.

32 Tura Akripia Jístun tímiayi “Ju áishman “uunt akupin nekarati” tíchaitkuínia akupmai makuitji” tímiayi.

## 27

### *Páprun Rúmanam akupkarmiania nu*

1 Tura Páprun Ruma péprunam akupkatniun enentáimsarmiayi. Rúmaka tímiaj, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármia nunasha Akustunu tutai suntara kapitiántrijjai nenakar akupkarmiayi. Nú kapitiáni naarí Júriiiti.

2 Tura Atramitiummaya kanu Asia nunkanam pepru ármia nuí wétasa puju-mia nu enkemprarmiaji. Tura Tisarúnikianmaya áishman, ni naarí Aristárku, in páchitkiauyayi. Tisarúnikiasha Masetúnia nunkanmaiti.

3 Nuí enkemprar kashin tsawarar Sitiun péprunam jeamiaji. Nuí jeawakrin kapitián Juriu, Páprun waitnentak tímiayi “Ame amikrumiin wetá. Au írmasarti” tímiayi.

4 Tura Sitiunnumia jíinkir, kanujai wesar nase tukumpramprakrin Chipri núnkaka menanmaani aa ikiukmiaji.

5 Tura nayaantsanam wesar Sirisia tura Pampiria nunkanam ayamchik nanakamakir Mira péprunam jeamiaji. Nuka Risia nunkanmaiti.

6 Nuí jear nú kanu ikiukmiaji tura chikich kanu Arijiántrianmaya taa Itiaria nunkanam wétasa pujumiayi. Nú kanunam suntara kapitiántri, enkempratarum, turammiaji.

7 Tura untsurí tsawant yáitmataik we-wémiaji tura ti wiántkar Nítionam jeastatuk ajasmiaji. Tura nuísha nase tuke tukumkarta asamtai Sarmun nunkanam ayamchik nankaamakir, Kritia nunkanam ááwinini ayamchik wémiaji.

8 Tura Kritia nunkanam ayamchik wesar itiurchat akui wáitsar wea-weákuar “Shiir Pujutai” tutainium jeamiaji. Nusha Rasea péprunam tjiuchiiti.

9 Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin.

10 Tura Papru chicharuk “Amikru antuktarum. Wi nékajai, yamáí wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajiñchatjiash” tímiayi.

11 Suntara kapitiántrínkia Páprunka anturtsuk, kanú wianniurín kapi-tiántríncha tura kanú kapitiántríncha chichamen anturkarmiayi.

12 Tura nuí Shiir Pujutai tutainium yumitin pujustin péñkerchaitkui “Nuñkia juyanka wéartai. Pinise péprunam jeamainchuashit” ashí tiarmiayi. Nú péprusha Kritia nunkanam nayaants ayamach pujawai. Nú péprunam yumitin pujustinian wakeriarmiayi, arakia nunkaani kakaram nase nú péprunam jeachu asamtai.

### *Tsúumainium wekasarmiania nu*

13 Tuma asamtai ukunam nase nunkaaniá tápiriri ajakui, ii wétin yamaikia péñkeraiti, tu enentáimsarmiayi. Túmakui kanu emetai jiru júusar jíinkir Kritisnam ayamchik wearmiayi.

14 Túrasha árusan arakia kakaram nase, Nuristi tuinia nu tukumpramiayi.

15 Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisamiaji.

16 Tura Kritia nunkanam ááwinini nankaamakur nuñkia nase ishichik mijiantmatai, uchich kanu japikír wémiaj nu ti takasar uunt kanunam enkermiaji.

17 Tura enkerar chapikjai uunt kanun jinikiáarmiayi wewe najanatai tusar. Tura náikim mukutniunam, Serti tutainium nase juramkishtajiash tusar, kanunam yakí tarach aan itiararmiayi. Nu tarach nase útsuktin tusar nenarma ármiai. Túrawar áyatik nase juramkitiai, tiarmiayi.

18 Tura kashin tsawarmatai nasesha chíchimisha tímiatrusan kakaram aa asamtai kanunmayan káarak irunmia nuna nayaantsanam ajapawarmiayi.

19 Menaintiú tsawant nankaamasmatai iisha ii uwejéjain kanunam káarak iruniarmia nusha entsá utsanarkarmiaji.

20 Tura untsurí tsawant tsawáisha etsantrachmiayi tura káshisha yaasha tsaparcharmiayi. Tura nasesha ti kakantar tukumpramkurin “Yamaikia uwempratín atsawai” tiarmiayi.

21 Tura iisha ti untsurí tsawant yurumsuk matsatu asakrin, Papru ajapén wajaki tímiayi “Amikru winia nuik Kritisnamayanka jíintsuk anturtukuítki-urmiñkia yamáí ju itirchatnum pujutsuk tura emenkatmatsuk pujuajaji’ tímiayi.’

22-24 ‘Yamáí kashi winia Yusru suntari nayaimpinmaya wantintiurkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikichnasha ámijjai kanunam enketainia ásarmatai uwempratniun Yus tsankatkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrasha kánuka mesertatui.

25 Wisha winia Yúsrin nekas enentáimtajai. Yusa suntari turutainia nuna nekas tu túrunattawai, tajai. Tuma asamtai kakartarum.

26 Tura chíchimisha nunka uchich pujakmanum nuí patatmittiaji” tímiayi.

27 Ayu, katurse (14) tsawant nankaamasmatai nú kashi Atria nayaantsanam jeamiaji. Nuí nase nánkamas juram wémiaji. Nuyanka kashi ajapén wiantin armia nu nunka ámunam jeateman nekaawarmiayi.

28 Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemsan ataksha nekapmamiayi. Nuñkia painti siati (27) mítru nekapmamiayi. Tuma asa nuñká anumsatuk ajasun nekaawarmiayi.

29 Tura kayanam ijiukaj tusar ashamainiak kuaru jirun kijinian chapikjaj kanú senkarin jiníkiáwar entsá ajun\_karmiayi. Kijin asamtai, inít tepeámtai nase juramkichmi tusar túrawarmiayi. Tura wake mesekar, tsawarti tusar matsamarmiayi.

30 Tura matsatainiaj wiantin armia nu, iikia uchich kanunam enkemprar pisarchatjash tu enentáimsarmiayi. Túmainiak kanú nujinia chíkich jirun ajuntai tawa nútiksaran uchich kanun ajuntai tusar pujuarmiayi.

31 Tura tuma wáiniaj Papru suntara kapitíantrin tura ni suntarincha ujakmiayi. “Ausha uunt kanunman enketainiachkuñkia atumsha uwemprashtatrome” tímiayi.

32 Tutai suntarsha uchich kanú chapikrin tsupirkar entsá ajun\_karmiayi.

33 Tura kashin káshik Papru ikiakártasa wakerak tímiayi “Ishichkisha yurumárum. Atumsha katurse (14) tsawant kánutsuk yuruntsuk pujarme.

34 Seajrume, ishichkisha yurumárum kakaram ajastarum, uwemprataj tusarum. Imiata, nekaatarum, imiatkisha túmatsuk péemkattarme” tímiayi.

35 Nuna tuasua amik Papru apatkun achik Yúsan yuminsamiayi ashí ímmianman. Tura puuk yuamiayi.

36 Tura apatkun yuan wáinkiar, ashí aents shiir enentáimsar yurumáwarmiayi.

37 Nusha ashí aents irurmaka jimíar sián nuyá ataksha setenta sais (276) ármiai.

38 Yurumáwar ejemakar, yurumkanka entsá utsan\_karmiayi, uunt kanu wampú ajasat tusar.

### *Kanu penké mesermiania nu*

39 Tura tsawarmatai wiantin armia nu, nuñkan nekaacharmiayi. Túrusha énkentamunam káanmatak aan wáinkiar “Aj kanu anuntai” tiarmiayi.

40 Nuyá jiru entsá ajunman chapikrin tsupirkar entsá ikiukiarmiayi. Tura kanait jiníkiárma ármia nuna chapikrin tsupirkarmiayi. Tura tarach kanú nujijn amia nuna nenakarmiayi. Túram kanu káanmatkanam anumsatuk ajasmiai.

41 Tura wainchi jimíar ámunam jeá kanu entsá wayá tepeamiayi. Tura kanú senkarinkia chíchimi yakí takuir ajíamu asa kupintramiayi.

42 Suntarsha, achik júamu armia nú shuaran máataj tusa wakeriarmiayi, yukuak pisararain tusar.

43 Tura kapitíancha Páprun uwemtikrataj tau asa nuna túratniun tsan\_katkachmiayi. Antsu chichaak “Emka yukuaktin nékarmena nu yukuakrum péemkatarum, tímiayi.

44 Nuyá chíkichkia kanunmayá numi, kame nánkamas numi achikrum awamkarum péemkatarum” tímiayi. Tu túrawar ashí iwíiakuk jíntrarmiayi.

### *Marta nuñkanam túrunamia nu*

1 Tura ashí iwíiakuk jíntrar, nu nuñka Marta naartin nekaamiayi.

2 Tura nuĵ matsamin armia nu, shiir awajtamsarmiaji. Tuma asamtai iisha tsetsema asakrin, tura yumisha yútakui, uunt jinia ikiapáramiaji. Tura “anamaitiarum” turammaji.

3 Pápruka jinia kukarun ikiaanak jinium pataamiaji. Túmawaj napi tsuérán ashamak jiinki, Papru uweĵén nemaramiaji.

4 Tura nú nunĵanmaya aents, Papru uweĵén napi nemaran wáinkiar “Ĵu áishmaṅsha shuáran maĵchuashit, tiarmiaji. Nayaantsanmaya uwempraiti-atan ni yusrĵ iwiaaku átinian suritiawai” tiarmiaji.

5 Páprusha ni uweĵén pear napin jinium awanĵmiaji. Tura penĵkesha yajauch ajaschamiaji.

6 Tura niisha eárchatpiash tusar ii puĵuarmiaji. “Túmatskesha jaka inian-chatpiash” tiarmiaji. Túrasha ti núkap puĵussha penĵké najaweĵeachmiaji. Túrnamtai, nuńĵkia nusháa enentáimprar “Pápruka yúschashit” tiarmiaji.

7 Nú nunĵanam aentsu penĵkerĵ ámiaji ni naarĵ Pupriu. Nú Pupriu ni ĵeĵn in itiaarmamiaji. Tura menaintiú tsawant yurumkancha suramsarmiaji.

8 Tura nuĵ puĵarin Pupriu aparĵ tsuer, numpajaj iĵiarki jáamiaji. Túmakuĵ Papru werĵ iyumiĵiaji. Tura Yúsan áujtus amik uweĵén nin awantkamiaji. Túrám penĵker ajasmiaji.

9 Nu túramun nekaawar, nú nunĵanmaya aents jaa armia nu tariar, niisha penĵker ajasarmiaji.

10 Túram incha ti shiir enentáimturmasar núkap ajampramsamiaji. Túram ukunam ii wétin jeamtai ashí ii atsumamun suramsarmiaji.

### *Rúmanam jeawarmiania nu*

11 Ii wétsuk nú nunĵanam menaintiú nantu puĵusmiaji. Tura nuyá chíkich kananam enĵkempramiaji. Nu kanusha Ariĵiántrianmaya yaunchu tau menaintiú nantu yumi yútakui nuĵ puĵumiĵiaji. Nú kanu nuĵiĵn numi-yus najankamu ĵimiar ekemiarmiaji, ni náarinĵkia Kástur tura Púruks.

12 Iisha nuĵ enĵkemprar werĵ Serakúsa péprunam jeamiaji. Nuĵ menaintiú tsawant puĵusarmiaji.

13 Tura ĵiinkir nuyanĵka nayaantsa ayamach weri Rijiú péprunam jeamiaji. Nuĵ kanarmiaji. Tura kashin anariá nase suut umpuunti támiaji. Tuma asamtai nú kashinkia Putiuri péprunam jeamiaji.

14 Nuĵ jeawakrin Yus-shuar puĵuarmia nu, ni ĵeĵn juramkimiaji. Tuma asamtai nuĵin chikichkí tuminĵ puĵusmiaji. Tura nuyanĵka nunĵkan Rúmanmaani wémiaji.

15 Tura Rúmanmaya Yus-shuar, ii jeatniurĵn neka ásar jintiá inĵiunmaktai tusar winiarmiaji. Chíkichkia Apiu pepu támanum táarmiaji, tura chíkichkia, Menaintiú ĵea tutainium táarmiaji. Nuna káunkan wáiniak Papru shiir enentáimias Yúsan yumĩnsamiaji.

16 Tura ii Rúmanam jeawakrin kapitián Juriu achikia yarumman Rúmanmaya uunt kapitiánin eĵetimiĵiaji. Túrasha, Pápruka ĵea ikiamas niisháa puĵustí, tiarmiaji. Tura Páprun ísat tusa chikichík suntarnak ni ĵeĵn apujtusarmiaji.

### *Rúmanam Papru Yus-Chichaman etserkamiania nu*

17 Nuyá menaintiú tsawant nanĵkaasmatai Pápruka Rúmanmaya Israer-aentsu penĵkerĵn untuk ikiaanak “Yatsurtiram antuktarum. Wisha Israer-áentsun yajauchin penĵké túrachmiajai. Tura ii uuntrĵ akupkarmia nunasha

yajauch chicharkachmiajai. Tuma ain Jerusarénum winia achirkar Rúmanmaya áentsnum surutkarmiyai.

<sup>18</sup> Tura nu aencha winia anintsar, akupkatai, turutiarmiyai, wisha penké yajauchin, mantamnamnia tímianu túrachu asamtai.

<sup>19</sup> Túrasha Israer-shuarka “Atsá, akupkairap” turutiarmiyai. Nu tuma asamtai, “antsu uunt akupin nekarati” tímiajai. Wikia wíi shuara tunaarín kapitiánin ujaktinian táchaitjai.

<sup>20</sup> Tuma asamtai, yatsurtirmin, atumin untsukjarme chichastaj tusan. Yusa anaikiamurj, Israer-shuarti nákanjia nu táwiti wi tu étserkui, jui achikiar jínkiámu pujajai” tímiyai Papru.

<sup>21</sup> Tutai níisha tiarmiyai “Íisha Jutía nunkanmaya aentsti, ame yajauch túramu papí penké wáinkiachuitji. Tura ii shuar nuyá táarainia nusha “au yajauch túraiti” tu ujatmakcharmaji.

<sup>22</sup> Túrasha ashí nunkanam yamaram chichaman jintinian yajauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiyai.

<sup>23</sup> Nú tsawantaj iruntrami tiarmia nú tsawant jeamtai, ti untsurj aents Papru pujamunam iruntrarmiyai. Papru jintintiainiak Muisais yaunchu aar akupkama nujaj tura chíkich Yúsnan etserniu aarmarjijajisha, Jesus nekas Yusa Anaikiamurjinti tusa paant jintintiwarmiyai. Nuna tura káshik nankaama Yus akupeemunam pachiinkiatniun étse-étserkua kjaraj iniaisamiayi.

<sup>24</sup> Tura Papru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiyai.

<sup>25</sup> Chikichkí enentaikí enentáimsatin atsá asamtai, jínki weartasa pujuarmiyai. Túmainiakui Papru chichaak “Nékasen Yusa Wakanj yaunchu Yúsnan etserniu, Isayas naartin áarmarjijaj ii úuntrín chicharuk juna tímiyai:

<sup>26</sup> “Ame weme au aents ju titia:

“Ántutka ántakrumsha nekaashtatruma,

Íitkia iyakrumsha wáinkiashtatruma.

<sup>27</sup> Warí, au shuara enentáj katsuarai;

Kuishijijají ántaksha ántichua núnin ániawai,

Jjisha epetkamua áanin ániawai,

Iyaksha wáinkiajn tusa, ántaksha antukajn tusa

Enentáimkiusha nekaawaj tusa,

Winí uwemprajn tusa, tura Winí tsuamarajn tusa túrunayi”.

Nuní áarmaiti.

<sup>28</sup> Tuma asamtai, nekaatarum. Yamaikia Yusaj uwempratin ana nuna Israer-shuarsha susamuiti. Tura niñkia nekas umikiartatui” tímiyai.

<sup>29</sup> Tura Papru nuna tí iniaisamtai Israer-shuar nuamtak núkap chicharnaiyasa wearmiayi.

<sup>30</sup> Tura Pápruka nuñ jea ikiamsamunam jimiará uwí pujusmiayi. Tura ashí aents nin iyutaj tusa wearmia nuna ni jeen itiaamiayi.

<sup>31</sup> Tuma asamtai Papru arantutsuk urukuk Yus akupeemunam ati, Uunt Jesukristu túramuríncha ashí etserkamiayi. Nútiksaj etserkatniuncha Páprun penké suritkiacharmiyai.

## Papru RÚMANMAYA SHUARAN papi akuptukma

### *Papru Rúmanmaya Yus-shuaran áatramania nu*

<sup>1</sup> Wi Papru Jesukristu takarniuitjai. Núnisan Yus achirak ni Shiir Chichamen etserkat tusa akatar akuptukmiayi.

<sup>2</sup> Nu Chichamun Yus yaunchu “akupkattajai” tímiayi. Núnaka Yúsnan etserin Yus-Papinium paant ujakarmiayi.

<sup>3</sup> Nu Chichamnum Yus ni Uchirín áujmatui. Ayashijjainkia Tawit weeanum akiiniamiayi.

<sup>4</sup> Tura ni tishiir wakanjjainkia Yusa Uchirínti. Tura ti kakarmaiti. Jakamunmaya nantakmiajajai nekas Yusa Uchiríja nu, paant nekanamiayi. Niisha ii Uuntrj Jesukristuiti.

<sup>5</sup> Ni túramujaj Yus shiir enentáimturuk nu Shiir Chichaman etserkat tusa akuptukmiayi. Núnisan ashí nunkanmaya shuar nu chichaman umirkar Jesusa náarin shiir awajsarat tusa akuptukmiayi.

<sup>6</sup> Atumsha nuyá shuaraitrume. Tura Jesukristunu ajasarat tusa Yus achir-makuitrume.

<sup>7</sup> Ashí Yus aneamutirmincha Rúmanam matsatrum nuna ju papin áateajrume. Yus ti pépker awajtamatsatniun wakerutmarme. Ii Aparj Yussaha ii Uuntrj Jesukristusha waitnentrainia ásar imiatkinchanum ti shiir pujustinian yainmakarti.

### *Papru Ruma péprunam irautinian wakerimiania nu*

<sup>8</sup> Émkasha, átum Yus nekas enentáimtamun ashí nunkanam áujmatenan nekaan Jesukristun pachisan Yúsán ti shiir yuminsajai.

<sup>9</sup> Tuke enentáirjai Yusa Uchirín ashí shuarnum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui.

<sup>10</sup> Ashí tsawant ni wakerutakuinkia íitjarum tusan Yúsán seajai.

<sup>11</sup> Nekas íitniun wakerajrume. Nuí jean wakanmin yainkian Yusjai kanakchamin ajasúk tusan wakerajrume.

<sup>12</sup> Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

<sup>13</sup> Yatsurú, tuke íitjarum tusan wakerimjarme. Túrasha iyatsjarme. Kame Yus-Chichaman ujaakun chíkich shuarnuma áintsan atumíncha Yus kakaram takasman wáinkiatniun wakerajai.

<sup>14</sup> Wikia Yus akuptuku asamtai ashí shuaran ujákártiniaitjai. Unuimiaruncha tura unuimiarancha, ti nékainia nunasha tura nékachuncha, métekrak ujakartiniaitjai.

<sup>15</sup> Tuma asan atumniasha Rúmanam pujarmena nunasha Uwempratin Chichaman ujaaitjarum tusan pujajai.

### *Uwempratin Chicham kakarmaiti*

<sup>16</sup> Nu Shiir Chicham Yusa kakarmarjjaj ti kakaram asa ashí shuaran uwemtikramniaiti. Tuma asamtai natsantatsjai. Nekas Israer-shuarnasha tura chíkich shuarnasha núnisan uwemtikramniaiti.



17 Nu chichamnum Yus enentáimsamia nu páantaiti. Júiti: Áyatik Yúsán nekas enentáimtuiniakui Yuska “pénkeraitme” túminiaiti. Yus-Papiniumsha núnisan tawai: “Yúsán nekas enentáimta nuna Yus “pénkeraitme” tutai tuke Yusjaj shiir wekasattawai.” Tu áarmaiti.

### *Aentsu tunaari*

18 Shuar nekas chichaman nakitrar yajauchin túrataj tusar suriimiaini-awai. Túrawar tuke tunaarintin áiniawai. Nu shuaran Yus ti kajerkar ti asutiátniun nayajimpinmaya paant awajsaiti.

19 Tura nu shuarka ashí Yusna nekaamnia nuna Yus paant awajsa asamtai péñker nékainiawai.

20 Kame yámankamtaikniumia Yus wáinchataitiat ni najanamurijjai júka paant nekaamniaiti: Nekas Yus asa tuke kakarmaiti. Nusha ti paant asamtai nu shuar tsankurnarchatui.

21 Yúsán nékainiyat shiir awajsacharmiayi tura yumíñsacharmiayi. Tuma ásar aya ánta nunak enentáimtuiniak ni enentáj tunaajaj piakai.

22 Tura ti nekajaj tuñiyat enentáimcha núnin ajasaraí.

23 Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinnisha napincha kuntinnisha yajasmáncha nakumkar nuna shiir awajenawai.

24 Nu asamtai imiá yajauch enentáimiainiakui “áanik asati” túmiayi Yus. Túramtai ti natsanmainian túrunainiawai.

25 Yusna imiá nekasa nuna nakitrar antsu wait-chichaman anturkar nuna túrin áiniawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnstí” tajai.

26 Nuna túrin ásarmatai Yus natsanmainia nuna wakeruktinian tsankatkarmiayi. Túramtai nuwasha áishmanjaj tsanintinian nakitrar nuamtak yajauch awajnainiawai.

27 Núnisan áishmansha nuwajaj tsanintinian iniaisar nuamtak áishmankak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayashj wáitsatniunak sumamawarmi-ayi.

28 Tura tuke Yúsán nakitiainia asamtai ti yajauch enentáimiainiak penké túrachminia nuna túrawarti tusa Yus tsankatkarmiayi.

29 Nu shuar ti tunaajaj piaku áiniawai. Tsanirmausha aya kuñniak wakerincha tura yajauch awajin áiniawai. Nu arantcha awakmakun kajerniusha mankartincha tuke máanaincha anankartincha péñkercha awajkartincha, tsanumniusha áiniawai.

30 Nu arantcha chikichnasha yajauch áujmatin áiniawai. Yúsnasha naki- tiainiawai. Áimniusha áiniawai. Tura “pénkeraitjai” tiar nankaamantu enentáimtumainiawai. Tunáa túratniun eáiniawai. Aparíncha nukuríncha umirainiatsui.

31 Enentáincha áiniawai. Tana nuna umichu áiniawai. Anenkartichu ásar waitnenkartichu áiniawai. Tsankurcha áiniawai.

32 Yuska “Shuar nuna túrinkia jákatniuiti” taman nékainiyat tuke túrukin wénawai. Tura nu arantcha chikich yajauch túramtai ti shiir wararenawai.

## 2

### *Shuar tunáa túramun Yus paant nékawai*

1 Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame.

<sup>2</sup> Yuska nu tunaan túrin ainia nuna súmamtikiashtinkiait.

<sup>3</sup> Amesha nuna túrin “imíá yajauchiiti” táyatam amesha métek túrakminkia Yus sumamtikiattana nuyá çitiurak uwemprattam?

<sup>4</sup> Yus ti waitnentrama asa nu tunáa ikiukim Nin enentáimtustinian kat-suntramuk nákarmawai. Tura péñker asa wárik asutiámchakui sumamash-tiniaitjai çtu enentáimtumamek? Tu enentáimkium ni waitnentrammari ántar awajsaitme.

<sup>5</sup> Tura tunaarum enentáimtutsuk tuke túrakmeka súmamtikiatin tsawantaj ti tunáa irutmampramujaj ti asutniáttame.

<sup>6</sup> Nu tsawantaj ni túramujaj métek Yus ashí shuaran akirartatui.

<sup>7</sup> Shuar tuke péñker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Nijijaj shiir pujustinian sústartatui.

<sup>8</sup> Antsu péñkera nuna wakerutsuk antsu aya yajauchin wakeruniak Yúsán nakitiainia nuna Yus ti kakerak asutiáwartatui.

<sup>9</sup> Nekas Israer-shuarsha tura núnisañ Israer-shuarchasha tunaan túrin ániakka ti wáitsartatui.

<sup>10</sup> Antsu nekas Israer-shuarnasha tura núnisañ Israer-shuarchancha péñker túrin áinia núnaka Yus ti shiir imiatkinchanum apujstartatui.

<sup>11</sup> Yus ashí shuaran akantsuk mai metek iyawai.

<sup>12</sup> Shuar Muisais akupkamun nékatsuk tunaan túraka aya júnisañ sumamawartatui. Tura shuar Muisais akupkamun nékayat tunaan túranka nu akupkamujaj sumamawartatui.

<sup>13</sup> Akupkamun aya antukarua nuka Yusaj péñker ániatsui antsu antukar umirainia nuna Yuska “péñkeraiti” tawai.

<sup>14</sup> Israer-shuarchaka Muisais akupkamun takakainiachkusha aya ni enentáijijaj nu akupkamun umirainiak

<sup>15</sup> nu umireamujaj Yus nu akupkamun ni enentáin ikiursarua nuka paant nekaamniaiti. Nujaj métek túruiniak shiir enentáimiainiawai. Tura métek túruiniachkunka péñkercha enentáimiainiawai.

<sup>16</sup> Wi Uwempratín Chichaman étsereaj nuñ ashí shuar uúkrisha túramun ashí paant awajsartatui. Tura nuna etserkatniun Jesukrístun anaitiukmiayi. Nu tsawantaj tunaan túrin sumamawartatui.

### *Israer-shuarsha Muisais akupkamun umircha ániawai*

<sup>17</sup> Ámeka “Tura Israer-shuaraitjai. Muisais akupkamun takakkui winia Yúsruka ti shiir enentáimturui, tátsumeash.

<sup>18</sup> Yus wakeramuncha nékajai. Tura akupkamun nekaan péñkera nuna wakerajaj, tátsumeash.

<sup>19</sup> Wakannium kusuraru áinia nunasha jintintiamniaitjai. Tura tsáapninian nekamtikiawarminiaitjai, tátsumeash.

<sup>20</sup> Akupkamu ti penker neka asan nekasa nuna unuimiaruitjai. Tuma asan nékachuncha ántuiniachuncha jintintiamniaitjai” tátsumeash.

<sup>21</sup> Pai, chíkichka unuiniatimesha çurukamtai imia ámeka unuimiatsum? “Kasamkashtiniaiti” tu étsereatsmek. Táyatmesha çurukamtai ámeka kasamam?

<sup>22</sup> “Tsanirmashtiniaiti” tátsumek. Enta, çurukamtai ámeka tsanirmam? “Ántar-yusan nakitiajai” tátsumek. ÇUrukamtai ámeka nu yusa jeeñiã kasamam?

<sup>23</sup> Akupkamun takakjai tusam shiir enentáimtumayatam nu akupkamu umireachkum Yus yajauch awajeatsmek.

24 Yus-Papiniumsha núnis áarmaiti: “Átum pé<sub>n</sub>ker umirchamujai Israer-shuarcha Yúsán yajauch chicharainiawai.”

25 Muisais akupkamia nu ashí umireakmekka nii timia núnismek tsupirnak-tin pé<sub>n</sub>keraiti. Tura takamtsuk umireachkumka tsupirnakcha núnisketme.

26 Chíkich shuarsha tsupirnakchaitiat Muisais akupkamun umireakka tsupirnaksha tsupirnakua áintsan<sub>n</sub>ketete.

27 Nu shuar tsupirnakchaitiat akupkamun ashí umireak atumin tsupirnakutirmin akupkamu takakuítiatrum umircha asakrumin súmantikramawartatui.

28-29 Kame nekas Israer-shuarka aya pátatkechu antsu tuke enentáijjai Yúsán wakera núiti. Núnisan<sub>n</sub> nekas tsupirnak<sub>n</sub>tinkia aya ayashújjai<sub>n</sub>chuiti antsu enentáiniim shiir átinia núiti. Nekas akupkamu aya áarchamuiti antsu nekas enentáijjai umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtawai.

### 3

1 Núnis aisha Israer-shuar ainia nu ¿warí pé<sub>n</sub>kernak takakainia? Tura tsupirnak<sub>n</sub>tincha ¿wariniak yayá?

2 Ti pé<sub>n</sub>keraiti. Warí, émkaka, Yus ni chichamen Israer-shuaran súsacharmakia.

3 Kame chíkich chíkich umichu áiniakui Yus tsan<sub>n</sub>katkamia nuna nú shuaran súsachmata<sub>n</sub>kia nuikia “Yus umichuiti” ¿títinkiait?

4 Pé<sub>n</sub>kea. Antsu Yuska nekas túratniua nujai métek ashí túriniaiti. Shuar umichu áiniakuisha ni támari<sub>n</sub> mash umiktatui. Ni tamajai shuáran wáitri<sub>n</sub> awajeakka nusha pé<sub>n</sub>keraiti. Núnisan<sub>n</sub> atí. Yus-Papisha métek tawai:

“Támena nuna “imiá nekasaiti” tiartatui, tura súmantikramataj tu<sub>n</sub>iakuisha nupetmaktatme” tawai.

5 Nu arantcha, “Wi tunaan túramujai Yus imiá pé<sub>n</sub>kera nuna paant awajeakka ¿urukamtai winia asutiua? ¿Nuka pé<sub>n</sub>kerkai?” tíchatapash. (Kame aents chichainia núnisnak tajai.)

6 Warí, Yus pé<sub>n</sub>kerchaitkiun<sub>n</sub>ka ¿itiurak ashí shuara tunaari<sub>n</sub> súmantikiawarat? Kame imiá pé<sub>n</sub>keraiti.

7 Núnisan<sub>n</sub>, “Wi umirkachmajai Yus tuke umiiniana nuna paant awajeaknaka nuikia nujai in shiir awajsamtai ¿urukamtai “tunaitme” túruta?” tíchatapash.

8 Warí, “tunáa túramujai Yúsán pé<sub>n</sub>ker awajeajai,” tú nekas enentáimpramniaitkiu<sub>n</sub>kia shuar nu<sub>n</sub>kia “Wats, ashí pé<sub>n</sub>ker áti tusar tunáa túratai” tímin ainti. Kame chíkich shuar in kajertamainiak “nuna jintintiainiawai” túramji. Nu shuar sumamawartin áiniawai.

#### *Ashí shuar tunáa túraitji*

9 Nuikia Israer-shuartikia chikichjai nan<sub>n</sub>kaamas ¿pé<sub>n</sub>kerkai<sub>n</sub>taij? Pen<sub>n</sub>kesha. Warí, Israer-shuartisha Israer-shuarchajai<sub>n</sub>sha ashí métekrak tunaan túrin áiniawai. Núnaka jú áarmajai paant awajsaitjai.

10 Yus-Papisha núnisan<sub>n</sub> tawai:

“Pé<sub>n</sub>keran túrin chikichkisha atsawai.

11 Yúsán nekaatniun nakitiainiawai. Yusnasha e<sub>n</sub>giniatsui.

12 Yusnumi<sub>n</sub> kanakiar men<sub>n</sub>katatniunam wénawai. Chikichkisha pé<sub>n</sub>keran túrin pen<sub>n</sub>ké atsawai.

13 Ashí yajauch chichainiak iwíarsamu yama urainiua núnisan áiniawai. Ni chichamejají tuke anankartin áiniawai. Chichame napía áintsan najamin áiniawai.

14 Aya yajauchin kakaram áujmatin áiniawai.

15 Máataj tusa wárik yujarin áiniawai.

16 Aya ti itíurchat ti yajauch awajin áiniawai.

17 Shiir pujustinian nékainiatsui.

18 Ishichkisha Yúsan ashamenatsui.”

19 Yaunchu akupkamun umirkatin ainia nú shuar aya tákamtak umirkatin áiniawai. Tuma asamtai ashí shuar umirkachu ásarmatai Yus nujají súmantiawartatui. Túrakui niisha pachischamin áiniawai.

20 Akupkamuka aya ii tunaarin paant awajturmají. Tuma asamtai akupkamu péñker umirkatniujají Yus “péñkeraitme” turamchamniaitjí.

### *Aya Yus shiir enentáimtusar uwempramniaitjí*

21 Yus-Chicham yaunchu ármanum itiura Yus in “péñkeraitme” túramminiaitjá nuna paant tawai. Kame akupkamujajinchuiti.

22 Antsu iisha ashí shuarsha núnisan aya Jesukrístu shiir enentáimtakrin Yus “péñkeraitme” túramminiaitjí.

23 Kame ashí shuarti tunáa túraitjí. Tuma asar Yusjají métek péñker ajastin penké jeatsjí.

24 Tura Yus in waitnentrama asa kúitchhajají “péñkeraitme” túramjí. Jesukrístujají uwemtikrampra asa túramjí.

25 Tura Krístun akupkamiayi ni jakamujají ashí tunaan asakátratniun. Túramtai shuar Nin nekas enentáimtuiniakui Yus tsankuramniaití. Yaunchu tunáa túramun katsunteak enentáimtuschamiayi. Yamái tsankuramnia nuna yaunchu nekáa, nuna túramniuyayi.

26 Tura yamaiya tunaancha tsankureak ashí shuar Jesusan nekas enentáimtuinia nuna “péñkeraitme” tuke tímíniaití. Krístu jakamujají nuka paant ajasají.

27 Nujajínkia ii péñker ajasjinia nu “winia kakarmarjají túrunajají” tíchamnia asar ¿nankaamantu enentáimtumarminkaitjá? Penkeshá. Warí, akupkamu umitsuk aya Krístu nekas enentáimtakrin Yus “péñkeraitme” túramjí.

28 Nujají páantaití. Akupkamu umirtsuk aya Jesukrístu shiir enentáimtakrin Yus “péñkeraitme” túramminiaitjí.

29 Warí, Yuska Israer-shuarnasha tura núnisan Israer-shuarchancha mai ni Yúsrinchukait.

30 Kame aya chikichik Yúschakait. Tura tsupirnakuncha tsupirnakchancha mai metek aya Jesukrístun nekas enentáimtuiniakui “péñkeraitme” tímíniaití.

31 Shuar Yúsan shiir enentáimtamujají péñker ajastin áiniakui nujají ¿akupkamu ántar awajsamukait? Atsá. Antsu nuna nankaamas umirkatin awajsamuití.

## 4

### *Apraámsha Yúsan shiir enentáimtamujají péñker ajasmania nu*

1 Ashí Israer-shuara uuntrí Apraám enentáimtustai. Niisha ¿itiurak Yusjají péñker ajasma?

2-3 Ni péñker takasmajají Yusjají péñker ajasuitkiunka nankaamantu enentáimtumaraintí. Antsu Yus-Papí tawai: “Apraám Yúsan shiir

enentáimtakui Yus “pénkeraitme” tímiayi” tawai. Nu túramu asa Apraámsha Yus ímmianum nan̄kaamantu enentáimprachminiaiti.

<sup>4</sup> Shuar íniamna nu takasmatai çaya tsan̄ka asam akiktatmek? Warí, ni takasmanum páchitsuk akikchatniukait.

<sup>5</sup> Antsu shuar ni péñker turamurí enentaimtsuk áyatik “Yus tunáa shuaran péñker awajniuiti” tu enentáimtakui Yуска tsan̄ka asa “pénkeraitme” tawai.

<sup>6</sup> Tura péñker túrachunak Yus “pénkeraitme” takui nu shuar shiir warasminiaiti. Núnisan̄ tawai uunt akupin Tawit:

<sup>7</sup> “Shuar ashí ni tunaarín Yus asakátar tsan̄kuramu ana nuka shiir enentáimpramniaiti.

<sup>8</sup> Uunt Yus ni tunaarín enentáimtachma asa ti warasminiaiti.” Tu tímiayi Tawit.

<sup>9</sup> ¿Aya tsupirnakukeash warasminiait? Tura tsupirnakchasha waraschamniakait. Warí, Apraám Yúsan shiir enentáimtakui Yus “pénkeraitme” tímiayi.

<sup>10</sup> Tura Apraám tuke tsupirnatsajín Yus nuna tímiayi. Emka Yus “pénkeraitme” timia nú ukunam Apraám tsupirnakmiayi.

<sup>11</sup> Apraám tsupirnatsuk Yúsan shiir enentáimtusmatai Yus “pénkeraitme” tusa “tsupirnaktiniaitme” tímiayi. Nújajínkia ashí Yúsan shiir enentáimtuinia nu shuar tsupirnatskesha Apraám weeá ániawai. Tura nu shuaran Yus “pénkeraitme” tawai.

<sup>12</sup> Tsupirnakusha aya tsupirnakusa asa Apraám weeá ániatsui antsu nu arant Apraámjají métek Yúsan shiir enentáimtuinia nuka Apraám weeá ániawai. Kame Apraám tuke tsupirnatsuk Yúsan shiir enentáimtusmiayi.

### *Yus shiir enentáimtamujají Nii timia nu uminkiatawai*

<sup>13</sup> Yaunchu Apraáman Yus chicharuk “Amincha amée weeá shuarnasha jú nun̄kan susattajai” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “pénkeraitme” taku nuna tsan̄katkamiayi.

<sup>14</sup> Kame aya akupkamun umirniun súsatniuitkiuin̄kia nuikia Yus enentáimtustin ántrai. Tura Yus Apraáman timia nusha ántrai.

<sup>15</sup> Akupkamu akui shuar umirkachka ti asutniáshtatuak. Tura atsakuin̄kia çasutniátniukait? ¿Itiurak umírtsuk ikiuktin̄?

<sup>16</sup> Tuma asantai Yus ti anenkartin asa Nin nekas enentáimtuinian ashí tsan̄katkai. Nújajínkia Apraám weeasha Yus Apraáman timia nuna páchitsuk wáinkíartatui. Iisha Apraámjají métek Yus nekas enentáimtakur ní weeaitji. Tuma asantai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsan̄katramkattaji.

<sup>17</sup> Kame Yus-Papinium Apraám áatramuuti: “Untsurí shuarsha amée weeá ajasartatui.” Nu asantai iisha Apraámjají métek Yus shiir enentáimtakrinkia Yus incha Apraám weeá áintsan̄ íirmaji. Nú Yуска ti kakaram asa jakancha iwiaaku awajniuiti; tura atsana nunasha ana nútiksán̄ nájanui.

<sup>18</sup> Yus “ti pampan̄tatme” takui Apraám ti uuntach áyat Yus timian enentáimtak yajutmartinian nákasmiayi. Nujají untsurí shuar ní weeá ajasarmiayi, Yus timia áintsan̄.

<sup>19-20</sup> Apraámsha sian̄ (100) uwí takakuítat tura ni nuwé Sarasha júretsuk uunt ajasmataisha tuke iniaitsuk Yus timia nuna nekas enentáimtusmiayi. “Yus nekasash ta” tútsuk shiir awajsamiayi. Nujajisha nuna nan̄kaamas kakaram ajasmiai.

21 Tuma asa “nekas Yus tana nuna páchitsuk umiktatui” tu enentáimpramiayi.

22 Nu asantai Yus “pénkeraitme” tímiayi.

23 Tura Yus nekas enentáimtamunam Yus “pénkeraitme” tana nu aya Apraámnak áatrachmaiti.

24-25 Antsu incha túramji. Iisha núnisrik ii Uuntrj̄ Jesus nekas enentáimtakrinkia Yus incha “pénkeraitme” turamtatji. Jesuska ii tunaarj̄n jarutramkatniun surunkamiayi. Tura nujaj̄ Yus in “pénkeraitrome” taku Jesusan ataksha iniantkimiayi.

## 5

### *Yus “pénkeraitme” túramkurin shíiraiti*

1 Tuma asantai Yus nekas enentáimtakrin Yus “pénkeraitme” túramji. Nujaj̄ iisha Yusjaj̄ shiir nawamnaikiar pujaji. Núnaka ii Uuntrj̄ Jesukristu ni jakamujaj̄ sumartamkamiayi.

2 Tura Nii shiir enentáimtakur Yusaj̄ weankaitji. Tura Kristu jarutramkakin Yus ti anenmaji. Tura tuke anenma asakrin Niijjaj̄ métek shiir ajastin náakur waraaji.

3 Nu arantcha yamá itiurchat pujayatrik nu itiurchatjaj̄ unuimiartatji tusar waraaji. Katsuntratniuncha unuitiamji.

4 Tura nu unuimiarar ii katsuntram paant áatui. Tura nuyá Yus ti shiir awajtamsattajnia nuka shiir enentáijjaj̄ nákastatji.

5 Nu ti shiir enentáimsar nákamujaj̄ ananmamtsuji. Yuska ni Shiir Wakanj̄n ii enentáin pujurtamuk ni anenkartutairin ti paant awajturmajji. Tuma asantai Yus túratin náakajnia nu imiá nekas wainkiattaji.

6 Iikka penké uwemprachmin asakrin tsawant jeamtaí Kristu ashí shuara tunaarj̄n jarukmiayi.

7 Shuar chíkich shuaran uwemtikratniun ¿jaruktatuak? Pénker shuar aij̄ jarukchattawai. Kame ti penkeraitkiuinj̄kia jarukchaintiash.

8 Antsu ii tuke tunáa árinj̄n Kristu jarutramkamiayi. Nujaj̄ in ti anenmajnia nuna ti paant iniakturmaji.

9 Tura ni numpejaj̄ tunaarinja awajsamu asar imiá nekas Yus asutiámatniua nuyá uwempraitji.

10 Yusa nemasrj̄ áyatar Yusa Uchirj̄ jakamujaj̄ yamaikia Yusjaj̄ shiir nawamnaikiar pujaji. Nu arant nuj̄kia Kristu tuke iwiaaku asa iijjaj̄ tsanin̄kiu asa ashí yajauchinmayá uwemtikramar tuke shiir awajtamsattaji.

11 Ii Uuntrj̄ Jesukristu jakamujaj̄ Yusjaj̄ shiir nawamnaikia asar ti waraaji.

### *Atañsha tura Krístusha túrawarma*

12 Ayu. Yámankamtaik emka áishman̄ Atañ nin̄ki tunaan túramtai nú tunaajaj̄ ashí shuar tunaarintin ajasarmiayi. Tura ashí tunaarintin ajasar mash jákatin áiniawai.

13 Akupkamu atsakuin̄kia umirkachma nekaachminiati. Tuma aij̄ Muisais akupkamu atsaisha tuke tunaan túrin ármiai.

14 Atañ pujumia nuyá Muisais tuke akupeatsaj̄n shuara tunaarj̄ paantcha aij̄ ashí shuar tunaan túrawar jákarmiayi. Kame ni tunaarj̄ Atañna áintsachauyayi. Atañka Yus akupkamu paant ujakman umirkachmiayi. Antsu nu shuar Yus akupkamu paant nekainiachiatañ tunaan túrin áiniak jákarmiayi. Tura Atañka Krístujaj̄ apatkar enentáimpratai.

<sup>15</sup> Atan tunáa túramia nujai apatka iisam, Yus in tsankatramaj nuka nankaamas péñkeraiti. Kame Atan nínki tunaan túramujai ashí aents untsurí armia nu, tunaarintin ániak, jákarmiayi. Tura Yus in ti anenma asa chikichik áishmanjai nuna nankaamas tí shiiran tsankatramaji. Jesukristujainkia untsurí shuaran uwentikrar ti shiiran tsankateawai.

<sup>16</sup> Atanka tunaarí imiá yajauch aijn nuna nankaamas péñkeran Yus tsankatramkaitji. Iis, aya chikichik tunaan túramujai aents sumamawarmiayi. Antsu Yus uwempratniun tsankatramaj nújainkia ti untsurí tunaan asakáruiti, tura “péñkeraitme” túramji.

<sup>17</sup> Chikichik áishman tunaan túramujai aents jákatin ániawai. Tura nuna nankaamas chikichik áishman Jesukristu túramujai ti shiir pujustatji. Kame Yus ti anenma asa ii péñker túratsrinin “péñkeraitrume” túramji. Nu asantai yamaram iwiaakmanum kakaram ajaji.

<sup>18</sup> Atan tunaan túramujai ashí tunaarintin ajasar jákarmiayi. Núnisan Jesukristu péñker túramujai ashí shuar Yus “péñkeraitme” timia nuka yamaram iwiaakmajai tuke pujusartatui.

<sup>19</sup> Núnisan chikichik áishman umirkachmajai untsurí tunaarintin ajasarmiayi. Tura chikichik áishman umirkamujai untsurí shuar péñker awajnasarmiayi.

<sup>20</sup> Wats, tunáa ti paant atí tusa Yus ni akupkamurin susamiayi. Túrasha ti tunáa pampaakuí Yus nuna nankaamas waitnentramak nu tunaan asakátramji.

<sup>21</sup> Shuar tunaan túrin ásar jákatin ármiai. Tura núnisan ii Uuntrí Jesukristu túramujai Yus in “péñkeraitrume” túramkurin iisha tuke iwiaaku pujustiniatji.

## 6

*Kristujai jaka asar tunáa túrachminiatji tura Kristujai tsaniñkiu asar iwiaakuitji*

<sup>1</sup> Núnisaitkiuinikia Yus nankaamas waitnentrampratai tusar ¿tunáa túrattajik?

<sup>2</sup> Péñkea. Warí, iikia tunáa túrashtin jákaitji. Jáka ¿itiurak tunaan túramniait?

<sup>3</sup> Imianniutikia Kristujai tsaniñkiu asar imianir Niijjai métek jaka áintsar aji.

<sup>4</sup> Tura imianir Kristujai jaka áintsar métek iwiarnasuitji. Tura Yus ti kakaram asa Kristun jakan iniantkímia núnisan incha nu kakarmajai yamaram enentájjai péñker wekasatniun iniantamkímiaji.

<sup>5</sup> Kristujai tsaniñkiu asar Niijjai métek jaka áintsanketji. Tura núnisan Niijjai métek nantaktiniatji.

<sup>6</sup> Yaunchu enentáimtainkia Kristujai métek jaka asantai ii yajauch wakerutain emenkrátutmakuitji. Tuma asantai yamaikia penké umirkashtiniatji.

<sup>7</sup> Kame ¿jáka itiuurak tunaan túrat? Yamaikia ankant ajasuitji.

<sup>8</sup> Iisha nekas Kristujai jákaiťkiurkia Niijjai métek tuke iwiaaku pujustin enentáimji.

<sup>9</sup> Kame Kristuka chikichkí jaka nantakin asa atakka jákashtatui. Túmaitkiu atakka ajakrachminiatji.

<sup>10</sup> Kristu chikichí jaka asa ashí tunaajaj itit awajsachmin ajasuíti. Tura yamaikia iwiaaku pujá asa Yúsan shiir awajsatniun pujawai.

<sup>11</sup> Atumsha núnisrumek jaka áintsarum tunáa túrachmin enentáimtumastarum. Antsu ii Uuntri Jesukrístujaj tsaniñkiu asarum iwiaaku pujakrum Yus shiir awajsatarum.

<sup>12</sup> Nu asantai tunaaka ayashmjin akuptamkashtiniaitume. Ayashí wak-eramurj umirkashtiniaitume. Ankantaitume.

<sup>13</sup> Atumi ayashí tunaan túrat tusarum ikiasairap. Antsu jakamunmaya nantakin asarum Yus wakeramu túratin surumaktarum. Tura ayashmisha aya péñkernak túratí tusarum Yus íktustarum.

<sup>14</sup> Akupkamu umirkatniujaj iwiaaku pujatsume. Antsu atumin Yus ti anenma asa yamaram iwiaakman suramsaitume. Tuma asantai yamaikia tunaaka nupettamkachminiaiti.

### *Tuke umireajnia nuna takarniurintji*

<sup>15</sup> Nuikia akupkamu umirtsuk antsu Yus ti anenma asakrin iwiaaku pujakur ¿“Páchitsuk tunaan túramniaitjai” títiatjik? Péñkea.

<sup>16</sup> Tuke umireajnia nuna takarniurintji. Nuka nékatsrumek. Tura ni takarjin ajasam umirkatniuitme. Tuma asantai tunáa umirkurkia ni takarniurintji tura umirkar jakattaji. Tura Yus umirkurkia péñker wekasattaji.

<sup>17</sup> Atumsha yáunchuka tunáa umirniuiatrum ikiukrum yamaikia nekas chicham antukurmena nu nekas atumí enentáijaj umirkaitume. Tuma asantai Yus ti yumiñsatniuiti.

<sup>18</sup> Yamaikia tunaanumiã ankant ajasu asarum ti péñker wekasatniunam pachiinkiaitume.

<sup>19</sup> Paant nekaak tusan takarniun pachisan tájarme. Wats, yaunchu atumí ayashí mujmiainian tura ashí yajauchin túrat tusarum tsan̄kamakmarme. Núnisrumek yamaikia atumí ayashí péñkeran túrat tusarum tura tuke Yusjaj shiir wekasat tusarum tsan̄kamaktarum.

<sup>20</sup> Atumsha tunáa umirniuyarme nuikia péñker wekaichauyarme.

<sup>21</sup> Tura nújajisha ¿warí péñkerna yáinmakmarum? Iista, yamá natsanmainchakait. Nusha jákatniunam júawai.

<sup>22</sup> Antsu yamaikia, tunaanumiã uwempra asarum Yus umirniuitume. Antsu júka Yusjaj shiir wekasatniunam júawai tura nuyá tuke iwiaaku pujustatume.

<sup>23</sup> Tunáa takarkumka tuke jákatniun akirmaktatui. Antsu Yuska iikia takaatsriniñ penké ántar tuke iwiaaku pujustinian suramsattaji. Ii Uuntri Jesukrístujaj tsaniñkia pujá asakrin nuna túrutmattaji.

## 7

### *Akupkamujaj ankantaitji*

<sup>1</sup> Enentáimpratarum yatsuru. Jáka akupkachminiaiti. Aya iwiaakna nu akupkamniaiti. Nu paant nékatsrumek.

<sup>2</sup> Wats, nuwá nuátkamu ni aishri iwiaakkui niijjaj tsaniñ pujustiniaiti. Tura aishri jakamtai ankant ajawai.

<sup>3</sup> Tuma asantai aishri iwiaakajin chíkich áishmanjaj tsaniakka tsanirmawai. Tura ni aishri jakamtai chíkich áishmanjaj páchitsuk nuatnakminiaiti tura nuikia tsanirmasui.

<sup>4</sup> Núnisrumek atumsha, yatsuru, Kristu ayashí muchitmarj ajasu asarum akupkamu emettachmin jaka áintsarum ajasuitume. Túrakrum Krístujaj



nuatnaikiatin áintsarum an̄kantaitrume. Niisha jakamunmaya nantakniuiti. Yamaikia Krístunu ajasu asar Niijjaj tsaniñkiar Yus wakeramu péñker túratniuitji.

5 Yaunchu wakerutai umirniuyaj nuj akupkamu enentáimtusar nuna nan̄kaamas yajauchia nu wakerimji tura jákatniunam juramkimji.

6 Antsu yamaikia akupkamu emettachmin jaka asar an̄kant ajasuitji. Túrunar akupkamu yaunchu áarma nu iniaisar yamaikia Yusa Wakanjijaj tsaniakur yamaram iwiaakmajaj péñker wekasamniaitji.

### *Winia enentáiruñ tunáa ana nu*

7 Núnisaitkiuñkia “Akupkamu yajauchiiti” ¿titiyashi? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuñkia wakerukchaajaj.

8 Tura nu akupkamun enentáimtakui winia enentáiruñ tunáa ana nu ashí yajauchin ti wakerumtikrimiayi. Kame akupkamu atsakui tunaan ti enentáimtichaintjai.

9 Yaunchu akupkamun nékachkun nán̄kamsanak enentáimniuyajaj. Tura akupkamun nekaan tunaan nekaamjai tura jaka áintsanak ajasjai.

10 Tuma asamtai akupkamujaj péñker wekasatniuitiatan umirkatniun tujintiaki aya jákatniunam jurukni.

11 Kame tunáa wakerutañkia nu akupkamujaj anañkrua péñker iwiaaku pujustinian surutsuk nu akupkamujaj jákatniunam jurukmiayi.

12 Tuma asamtai akupkamuka Yusna asa ti pen̄keraiti. Yajauchichuiti.

13 Nuikia ¿péñkera nu jákatniunam júrawak? Atsá. Antsu tunáa wakeruktin jákatniunam jurukmiayi. Nuna tura asa tunáa imiá yajauchia nu nekaamniaiti. Tura tunáa wakerutai péñker akupkamujaj jákatniunam jurukmiatai, nujaj Yus “tunáa wakerutai imiá yajauchiiti” tusa paant awajsamiai.

14 Akupkamuka Yúsnaiti. Nu paant nékajaj. Antsu wikia ayashna nuna wakerakun tunaan umireajaj.

15 Kame túrajna nuna ititurchat enentáimtajaj. Péñker túratniun wakeraj nuna túratsjai. Antsu nakitiaj nuna nekaska túriniaitjai.

16 Akupkamu péñkeran nekaan umirkatniun wakerajaj. Túrayatnak umirchaitjai.

17 Tuma asamtai wíchaitjai tunaan wakerakun túrajna nuka. Antsu winia enentáiruñ tunáa wakerutai pujá asa nu túrumtikriniaiti.

18 Yaunchu enentáimtai winia enentáiruñ pujana nu pen̄ké yajauchiiti. Nuna ti paant nékajaj. Tuma asamtai péñker túratniun wakerayatnak pen̄ké tujintiajai.

19 Péñker túratniun wakerayatnak túratsjai. Antsu tunaan nakitiaj nuna túrajaj.

20 Nu asamtai nakitiaj nuna túrakun wíchaitjai antsu winia enentáiruñ tunáa wakerutai pujana nu túriniaiti.

21 Júnisaiti. Péñker túratniun wakerakun aya tunaan ín̄kiuajaj.

22 Nekas enentáijijaj Yusa akupkamurjñ wakerajaj.

23 Tumaj yaunchu enentáimtai winia enentáiruñ pujurtak nupettawai tura nekas wakeraj nuna akirturui.

24 Maa, ti waitiajai. Jú ayash wakeramujaj jákatniunmaya ¿yaki uwentikrurat?

25 Yuska ii Uuntrj Jesukrístujaj túrutmamniaitji. Tuma asamtai Yúsan ti yumĩnkiajai. Ayu. Winia enentáirjaj Yus akupkamun umirniuitjai. Antsu winia ayashrujaj tunaan umireajai.

## 8

### *Yusa Wakanjaj péñker wekasatin*

1 Jesukrístujaj tsanĩnkjarun Yuska “tunaan túrawar jákatniumam wémin áiniawai” tatsui. Nu shuar ni ayashj wakerana nuna umirtsuk Yusa Wakanj wakerana nuna umirainiawai.

2 Jesukrístujaj tsanĩnkiu asakrin Yusa Wakanj nekas iwiaaku awajtam-saitji. Tuma asamtai tunáa túratniumaya tura jákatniumayasha ankant ajasuitji.

3 Ayash wakerutainkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus túraiti. Ni Uchirĩn ayashtin awajas tunaan jarukat tusa akupkamiayi. Tura nujaj ayash tunáa wakeramun nupetkamiayi.

4 Túramtai ii yamaikia ayash wakerana nu umirtsuk tura Yusa Wakanj wakeramu túrar akupkamu tana nu umirniuitji.

5 Ayash wakeramun umirainia nu, ayashnia nunak enentáimtuiniawai. Antsu Yusa Wakanj wakeramun páchinia nuka Yúsnan enentáimtuiniawai.

6 Ayashnia nuna enentáimtuinia nú shuar jákatniumam wénawai. Antsu Yúsnan enentáimtuinia nuka Yusjaj shiir nawamnaikjar tuke pujusartatui.

7 Aya ayash wakeramun enentáimtuinia nú shuar Yusa nemasrj áiniawai. Yus akupeamun nakitiainia ásar ni taman umirkatniun penké jeainiatsui.

8 Tuma asamtai shuar ni ayashj wakeramurj warareakka Yúsan shiir awajsachminiaiti.

9 Tura átumka ayash wakeramu umirtsuk tura Yusa Wakanj pujurtamkurmin ni wakeramu enentáimtiniaitrumé. Ashí shuar Krísturtin ainia nu ni Wakanj takaku áiniawai. Takakchaitkiunka nuikia Krístunuchuiti.

10 Tura Krístu atumĩn pujurtamkurminkia atumĩ ayashj tunaajaj jakamnia ain Yus “péñkeraitme” túramu asamtai atumĩ wakanjnkia nekas tuke iwiaakuiti.

11 Yus Jesukrístun jakan iniantkimiayi. Tuma asamtai ni Wakanj atumĩ enentáin pujurtamkurminkia Jesusan iniantkimia núnisan nu Wakanjaj yamaram iwiaakmajaj iniantamkittiarne.

12 Tuma asamtai, yatsuru, ayash wakeramu penké umirkashtiniaitji.

13 Ayash wakeramu umirniuitkiurmeka jakattarme. Antsu Yusa Wakanj pujurtamkurmin ayash wakeramu nupetkarmeka péñker wekasarum nekas iwiaaku átatrumé.

14 Ashí shuar Yusa Wakanj timiajaj métek wekainia nu, nu shuar nekas Yusa uchirĩnti.

15 Yusa Wakanj in pujurtamkurin Yusa uchirĩn ajasar sapijmiatsuk Yusaj weamkar “Aparú” tímimniaitji.

16 Nu Wakan “nekas Yusa uchirĩnme” ii enentáin túramji.

17 Tura ni uchirĩn ajasu asakrin Yus tímia núnisan ashí Níiniun suramsattaji. Krístun ashí susattana núnisan incha suramsattaji. Yamái Krístunu takaakur wáitiakrikia ukunam Krístujaj métek ti shiir awajnastatji.

18 Maa, yamá ti wáitiakrishna ukunmanka nayaimpiniam ti shiir pujakur nu wáitsamu kajinmatkittiaji.

19 Tsawant jeamtai Yus ashí ni shuarin Niijjaj métek ti shiir awajsartatui. Nuiñ nekas Yusa uchirí ainia nu ti paant nekanattawai. Nu tsawantan wáinkiatniun ashí Yus najanamu irunna nu ti nákañiwai.

20 Ashí Yus najanamia nuna yámankamtaik ti péñker najanamiayi. Túrasha yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsan̄katkamiayi. Tuma asantai iwiarnartin tsawantan nákawai.

21 Nu tsawantaj ashí Yus najanamu emesnartinniumiá uwemprartatui. Tura ashí Yus najanamuka shuar Yusa uchirí ajasarua nujaj métek shiir awajnasar an̄kant ajasartatui.

22 Yamaisha ashí Yus najanamu ainia nu, nuwá jatema wáitia nunis ti wáitiainiwai.

23 Yus najanamuka ashí wáitiainiwai. Iisha Yusa Wakaní takakiatar ti wáitijai. Tura Yusa Wakaní takakkur ashí Yus suramsattajnia nu nékaji achiktin. Tuma asar nekas Yusa uchirí paant awajnastin tsawant nákaji. Nujsha ii ayashísha an̄kant awajnastatui.

24 Nu tuke enentáimtuki wéakur takamtsuk uwemprattaji. Yamái nu wáñchiatar tuke nákaji. Warí, ¿wáinjinia nu nákajik?

25 Tuma asar tuke waincha asar katsuntrar nákaji.

26 Nu arantcha ii kakarmachu nekapeakrin Yusa Wakaní yáinmaji. Kame Yus áusatniusha nékachkurin in yáinmaji. ¿Warí seattaji tura itiu seatjik? Nu nékatsji. Tura itiu chat pujakur ti wáitiakrincha Yusa Wakaní in áujturmaj.

27 Tura Yus ii enentáin enentáimtaj nuna nékaiti. Tuma asa ni shuari asakrin ni Wakaní ni wakeramujaj métek seatramkurin ántawai.

### *Ti nupetmakuitji*

28 Yus anea asakrin ashí nan̄kaatamjnia nujaj Yus pujurtamji. Tura nujaj péñker awajtamji. Nu paant nékaji. Tura Ni wakerimia núnisan̄ Ní shuar awajtamsaitji.

29 Yámankamtaiknumiá in nekarmak ni Uchirí Jesukristujaj métek ajasat tusa achirmakmiayi. Nujaj Yusa uchirí untsurí ajasji. Tura Kristu ii iwiajrinti.

30 Tura Yus achikmia nuna Niñiu awajsamiayi. Tura nu shuaran “péñkeraitrume” tímiayi. Tura ti shiir awajsamiayi.

31 Wats, nuikia Yus in yáinmakrin ¿yaki in nupettamkattaji?

32 Ni Uchiríncha suritramkachmiayi antsu in jarutramkat tusa akupturmakmiayi. Tura asa ni Uchiríjjaj métek ti shiira nuna ashí suramsashtatjik.

33 Yus achikmia nú shuaran ¿yaki sumantikiat? Yus Ápaka “péñkeraitrume” tiniu asa pen̄ké túrashtatui.

34 Tura ¿yaki “jiniun apenáti” titi? Warí, Kristu pen̄ké túrashtatui. Antsu nu shuaran jarukmiayi. Tura nantaki Yusa untsuurin̄ ekemas in áujturmaj.

35 Kristu ti anenma asakrin in akantamkitin atsawai. Wáitiakrish, itiu chat in̄kiuakrish, shuar áintramkurnisha, tsukamakrish, entsatai atsakuisha, tsúmainjajisha, tura mantamnakrish, nujaj “Kristu anentsui” tíchamniaitji. Nuka Kristu anen̄krattairiya akantamkitin jeatsui.

36 Yus-Papñiumsha júnis áarmaiti:

“Améé-shuar asar tuke mantamnatin pujaji. Murik máatniua áintsan enentáimturmaj.”

Tu áarmaiti.

37 Tuma añ̄ Kristu in anenma asakrin Niijjaj ti nupetmakuitji.

38 Kristu aneñkrattairjya akantamkitin penké atsawai. Nuna ti paant nékajai. Jákatniusha, iwiaakmasha, nayaimpinmaya suntarsha, ashí nayaimpinmasha tura nunñkanmasha akupin ainia nusha, yamá írunna nusha, ukunam átatna nusha,

39 yaki írunna nusha, nunká írunna nusha, kame ashí Yus najanmu írunna nusha Yusa aneñkrattairjya penké akantamkichminiaitji. Yusa aneñkrattajsha ii Uuntri Jesukrístu túrunamujai paant wainji.

## 9

### *Yus Israer-shuaran ni shuarj arti tusa achikiarmiania nu*

1 Yamái tájana nu Kristu shuarj asan imiá nekasn wáitruksuk tájai. Winia enentáirsha tura Yusa Wakanjsha “nekas tawai” turutainiawai.

2 Israer-shuaran waitnentakun ti kuntuts enentáimjai.

3 Wíshuar ániakui Krístonmaya kanakin yumiñnaraintjai nujai wíshuaran yáimminiaitkiunka.

4 Israer weeá shuar ániawai. Tura ni uchirja áinis Yus achikiaruiti. Yusa wincharjsha niijjai pujumiayi. Yaunchu Chicham ni weatrjjjai iwiamuncha tura Muisais akupkamuncha susamiayi. Tura Yusa Jeen Nin shiir awajsatniun jintintiamiayi. Tura ukunam shiir tsankatkattana nunasha ujakmiayi.

5 Ni weatrjin Yúsán ti penker enentáimtin irunmiayi. Krístusha aents ajas nú shuarum akiiniamiayi. Krístuka Uunt Yus asa tura ashí akupin asa Nínki tute shiir awájnastí. Núnisan atí.

6 Kame Yus ashí Nii timia nuna Israer-shuaran súsachmataisha nujai “Yus timia nu uminkiachuiti” tichamniaiti. Antsu junis enentáimpratniuiti: ashí Israer weeá ániayatan Yusjai ísmaka ashí nekas Israer-shuar ániatsui.

7 Núnisan Apraám weeá shuarsha ashí nekas ni shuar ániatsui. Iis, Yus Apraáman tímiayi “Aya Isak pampanma amee shuarum ártatui.”

8 Nujai páantaiti. Shuar aya Apraám weeá akiinia asa Yus timian wáinkiashtiniaiti. Antsu Yus timiajai métek akiinia nu nekas Apraám weeá shuar ániak Yus timian wainkiattawai.

9 Kame Yus Apraáman timia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiayi.

10 Nu arantcha, ii weatrj Isaka nuwe Ripikia jimiampramiayi.

11-13 Nu uchisha akiiniainiatsajin penkernasha tura yajauchincha túruiniatsajin Yus Ripikian tímiayi: “Iwiajria nu ni patajin umirkattawai.” Ataksha núnisan Yus ni Papirjin chichak “Jakupan aneakun Esaun nakitramjai” tímiayi. Nujainkia páantaiti. Yus wakerak aya ni enentáijjajin shuaran achikminiaiti. Nu shuar túrunamu enentáimtutsuk túramniaiti.

14 Túruiniatkiui “Yus penkerchaiti” ¿titiajiash? Atsá.

15 Yus Muisaisan júnis tímiayi:

“Wi wakerajna nunak waitnentrattajai.”

16 Tuma asamtai shuar ti wakerakuisha tura kakaram takaakuisha aya nujai Yus waitnentatsui. Antsu aya ní enentáijjajin wakerak waitnentawai.

17 Ataksha Yus-Papininum tawai “Yus Ejiptu nunka akupniurjin tímiayi “Ámijjai ashí nunñkanam winia kakarmarun nekaawarat tusan uunt akupniun awajsamjame” tímiayi” tawai.

18 Tuma asamtai Yus Nii wakera nuna waitnentawai. Túrasha Ejiptu akupniurjin túramia núnisan Nii wakera nú shuaran enentáin kátsuram awajtai.

19 Tura “Núnisaitkiuin̄kia ¿urukamtaí shuaran Yus súmamtikia? turutchata-pash. Nii wakerakuin̄kia ¿itiurkattajik?” turutchatapash.

20 Warí, aents asam Yusjái ¿tunaiminkiaitiam? Nuwa piniñkian nájankui núweka “¿urukamtaí júnis najatam?” tíminkiait.

21 Nuwa wakerakka nu nuwejai amamkuncha tura yukunnasha nusháa takamastinian mai najanachminkait.

22 Yajauch shuar ti asutiátin áiniak emesnartinnium wétin áiniawai. Yus nu shuaran asutiá ni kakarmarín iniaktustaj tayat ti katsuntramiayi.

23 Tura katsunteak ni anenkrattairín iniakmasmiayi. Nú arant nuikia in waitnentramak shíir enentaijjai péñker awajtamkur ni anenkrattairí ti paantchakait. Nekas shíir enentaijjai péñker ajasat tusa yaunchu iwiartam-pramiayi.

24 Tura incha, Israer-shuarnumiasha Israer-shuarchanumiasha, ni shuarij ajasat tusa achirmakmiayi.

25 Núnisan yaunchu Yúsnan etserin Useas Yus-Papinium tawai:

“Wiishuarchan Wiishuar awajsattajai. Aneachmancha aneamu awajsattajai.

26 Tura Yus “Wiishuarchaitrume” tímia nú shuaran “Nekas iwiaku Yusa uchirínuiutrume” ukunam títiatui.”

Tu áarmaiti.

27 Antsu Isayas Israer-shuaran páchis tímiayi:

“Israer weeá ti nan̄kaamas untsurí áiniayat penké ishichik uwemprartatui.

28 Kame Yus yajauchin akupkataj tímia nuna takamtsuk wárik umiktatui.”

29 Núnisan Isayas ataksha tawai:

“Ashí akupeana nú Yus in waitnentramachkurniñkia Sutuma péprusha Kuma péprusha takamtsuk jákarmia núnisan jáqajj.”

### *Israer-shuar uwempratin chichamjai tujinkiarmiania nu*

30 Wátsek, Israer-shuarcha, Yus iisam ni túramurijjai “pénkeraitji” tu enentáimtumainiachunak, Yuska, Nii enentáimtusam, “pénkeraitrume” tímiai.

31 Antsu Israer-shuarka péñker akupkamun umiktinian wakeruiniayatan̄ tujintiainiakui nujai péñker ajastinian tujinkiarmiai.

32 ¿Urukamtaí tujinkiarma? Yúsnan enentáimtutsuk aya ni péñker túramujai péñker ajastinian enentáimtuiniak tujinkiarmiai. Kristun enentáimtustinian nakitiainiak shuar kan̄kapen awan̄kemtuktinia núnisan iniararmai.

33 Tura kaya tukumkar iniarhamniakait. Nu asamtaí Yus-Papinium Kristun pachis tímiayi:

“Seun péprunam kayan ikiujajai, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsáqarchartatui” tawai.” Tu áarmaiti.

## 10

1 Yatsuru, Israer-shuar uwemprarat tusan ti wakerakun Yúsan áujtajai.

2 Maa, uwempratniun nékachiatan̄ Yúsan shiir awajsatniun ti wakeruini-awai.

3 Túmaitiat shuáran Yus péñker awajsatniun nékachu ásar aya ni péñker túramujain̄ péñker ajastinian wakeruiniawai. Tuma ásar Yus péñker enentáimtamujai péñker ajastinian jecharai.

4 Aya Kristu enentáimtamujai péñker ajastin asamtaí akupkamu umirkat-niujai péñker ajastin ántrai.

5 Akupkamujai péñker ajastinian pachis Muisais tímiayi: “Nuna takamtsuk umirniuka nujai péñker pujustatui.” Tu áarmaiti.

6 Antsu Krístun enentáimtus pé<sub>n</sub>ker pujustinian pachis shuar juna tíminiaiti: “Ti itiu<sub>r</sub>chata áinis “¿Yaki nayaimpiniam waka Krístun itiarat?” tírap,” tawai.

7 Tura ¿Yaki jakamunam we Krístun iniantkit?” tírap” tawai.

8 Tura junasha tawai: “Yus-Chicham yúpichuch umirkamniaiti. Aya enentáimjái enentáimtakum wenumjái ujaktiniaitme.” Nu Chicham “Yus enentáimtusiniaiti” tawai. Nu Chicham tuke étsereaj núiti.

9 Yus Jesusan jakan iniantkímia nu enentáimtakum tura wenumjái “Jesus winia Úntru<sub>r</sub>uiti” takum uwemprattame.

10 Kame Krístu enentáimtakmin Yus “pé<sub>n</sub>keraitme” turam<sub>t</sub>atui nuyá wenumjái “Jesukrístun enentáimtajai” tákum uwemprattame.

11 Ataksha Yus-Papinium tawai: “Nin shiir enentáimtuinia nú shuar natsa<sub>r</sub>archartatui.”

12 Tuma asamtai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí pé<sub>n</sub>keran súawai. Tura ashí métek ni Úntrinti.

13 Nu arantcha “Ashí shuar Uuntan áujea nu uwemprattawai” yáunchu Krístunun tu áatramu<sub>i</sub>ti.

14 Tura Krístun enentáimtuiniachusha ¿itiurak Nin áuj<sub>s</sub>arat? Tura Krístun nékainiachusha ¿itiurak Nin enentáimtusarat? Tura Yus-Chicham ujaachmasha ¿itiurak nekaawarat? Shuar Yus-Chichaman ujaktiniaiti.

15 Tura akupkachmasha ¿itiurak Yus-Chichaman ujakar<sub>t</sub>? Tura shuar Yus-Chichaman etserkataj tusa wéana nuna Yus-Papinium tawai: “Shuar Yusa Shiir Chichame<sub>n</sub> etserki weana nu ti shírchakait.”

16 Tura ashí shuar uwempratin chichaman ántuiniayat<sub>a</sub>n umirainiatsui. Isayassa yaunchu aak tímiayi:

“Uuntá, ¿yaki ii étserman antukaru<sub>i</sub>?”

17 Paantchakáit. Krístu túramu ujakam antuktiniaiti. Tura antukar Krístun shiir enentáimtustiniaiti.

18 Tura ¿Israer-shuar Yus-Chichaman antukcharu ásar<sub>a</sub>n Yúsan enentáimtuscharma? Atsá. Warí, Yus-Papi tawai:

“Ashí nunkanam ni chichame antunkaiti.”

19 Tura “Israer-shuar nu chichame<sub>n</sub> antukariat ¿paant nekaawarmaashi?” inintrusminiaiti. Tura nekas nekaawarmai. Tuma asamtai Muisais tawai: “Israer-shuar<sub>h</sub>an nékachu ainiana nuna shiir awajeakun akajkattajrume.”

20 Nuyá Isayas ashamsuk áarmiayi:

“E<sub>a</sub>t<sub>k</sub>acharua nu wáitkiarmiayi. Inintruiniats<sub>a</sub>n wantintiukmiajai.”

21 Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

## 11

### *Chíkich Israer-shuarsha uwemprattatui*

1 Tura Israer-shuar Yúsan umiiniachkui ¿Yus nin iniaisaashit? Pé<sub>n</sub>kea. Warí, wi Israer-shuar<sub>h</sub>akaitiaj. Wi Apraámsha tura Pinjami<sub>n</sub> weeá akiiniachukaitiaj.

2 Yámankamtaikniumi<sub>a</sub> Yus Israer-shuaran ni shuar arti tusa achikiu asa yamaikia iniaiashtatui.

Ti yaunchu Yúsnan etserin Erías Israer-shuaran pachis Yúsan áujtak tímiayi:

3 “Untrú, naman awasar Yus sútaincha mash saakiarai. Áminiu etserni-uncha mash máawarai. Tura wiki juakjai. Tura winiasha “mantuatai” turutainiawai.” Tu áusamiayi.

4 Tura Yus ayak tímiayi “Siati mir (7000) áishmaḅkan Israer-shuarnumiá apujtumsaruítjai. Nu shuar ántar-yus Páaran tikishmatrachu áiniawai” tímiayi Yus.

5 Núnisan yamaisha Yus ti waitnentainia asa ashí Israer-shuarnumiá ni shuarjn achikiuít.

6 Yus ni enentájjain waitnentak túrait. Nú shuar péñker tura asamtai waitnentatsui. Yus aya péñkernak waitnentakka nuikia waitnenkratchainti.

7 Ayu. Nuikia ashí Israer-shuar péñkeran eakarú aín aya Yus achikmia nú shuar wainkiarmiayi. Antsu ni achikchamuka nuna nankaamas nekaachmin ajasar kusurua núnin awajnasarmiayi.

8 Yus-Chichamsha núnisan tawai: “Yus enentáimchatai enentáin súsarmiayi. Wáinmashtai jjincha tura ántushtai kuíshniasha súsarmiayi. Yamaisha núnskete.”

9 Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asutniáwarti.

10 Ni enentáin kusurarti tura wainmakcharti. Itiurchat ana nusha, káarak kijinia áintsan, tuke áentskatá.” Tu áarmiayi.

### *Israer-shuarcha uwempramin áiniawai*

11 Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajai Israer-shuarcha yamaikia uwempratin jeainiawai. Nujai Israer-shuarsha nujai métek uwempratniun enentáimsartatui.

12 Israer-shuar umirkachmajai ashí shuar; Israercha ainia nusha, uwempramnia ajasarmiayi. Nuna nankaamas Israer-shuar atak Yúsan enentáimtuiniak uwemprarmatai nujai ashí shuar ti penker ajasartatui.

13 Israer-shuarchatirnea, atumin uwempratin chichaman etserkatniun Yus akupkamu asan nu takatan ti takaajai.

14 Nuna túrakun átum uwemprarmena núnisan niisha, wíishuar ainia nu, nuna ísar uwemprarat tusan wakerajai.

15 Kame Israer-shuaran iniaisamujai ashí shuar Yusjai shiir nawamnaikiarmatainikia nuikia atak nín achikmajai jakamunmayá nantaktinia áintsan ti shiir átatui.

16 Emka apatuk ana nu Yus súakur yuminsamuitkiunka nuikia ashí apatkunam Yus yuminsamuiti. Núnisan numí kankapé péñkeraitkiunka numi takamtsuk péñkeraiti.

17 Yuska chíkich chíkich Israer-shuaran, numí kanawen tsupik ajapniua áinis, iniaisamiayi. Tura nuyá atumin niisháa numinmayá árumniñ nu numiniam anujtamkamarme. Nujai péñker numijjai tsanínkrum nu kakarmajai iwiaakrume.

18 Tura kanawé tsupikmajai nankaamantu enentáimtumasaip. Warí, ame kakarmarmijjai numí wajatsui antsu ni kakarmarjjai iwiaakme.

19 “Túrasha wí anujnaktinian kanawen tsupikchamka” tíchainmeash.

20 Nekasaiti, túmaitiat niisha Yúsan enentáimtuiniachu ásar tsupinkiararmiayi. Atumsha aya Yus nekas enentáimta asam anujnakuitme. Tuma asamtai nankaamantu enentáimtumsak aya anearta.

21 Yus nekas kanawé péñkercha túrawarun tsupikkia páchitsuk amincha tsupirmakchamniakait.

<sup>22</sup> Iista, Yus atumjaj ti tsánkaiti tura Israer-shuar umichua nuna ti wari asutiaiti. Tura péñker wáinmankata. Yus tuke nekas enentáimtachkurminkia atumniasha páchitsuk tsupirmaktatrum.

<sup>23</sup> Núnisan Israer-shuar ataksha Yúsan enentáimtuiniakui páchitsuk ataksha anujkachminkait. Nekas túrattawai.

<sup>24</sup> Túram Israer-shuarcha asam niisháa numinmayá tsupikiar penké numiniam anujnakuitrume. Nuna tura asa nekas ni kanawé tsupikia ajapamun páchitsuk atak anujkamniaiti.

### *Israer-shuarsha uwempratin ániawai*

<sup>25</sup> Yatsurú, nankaamantu enentáimtumarajrum tusan yaunchu nekaachman ujaajrume. Júiti: Israer-shuarnumiãñka chíkich chíkich Yúsan nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi.

<sup>26</sup> Tura Israer-shuarchasha ti untsurí Yus-shuar ajasarmatai nuyá Israer-shuarsha ashí uwemprattatui. Tuma asantai Yus-Papí tawai:

“Seúñnumiã Uwentikkiartin tátatui. Israernumiã tunaan asakátrattawai.

<sup>27</sup> Jú Chichamnasha niijjai najanattajai: ni tunaarín asakturtatjai.”

<sup>28</sup> Uwempratin chicham atumsha nekaatarum tusa Israer-shuaran Yus ni nemasrí awajsaruiti. Tura yaunchu ni weatrín achikiu asa nincha tuke anenawai.

<sup>29</sup> Kame Yus amáa nuna ataksha ataãtsui. Shuáran achiksha atak iniaiyatsui.

<sup>30</sup> Átumka yaunchu Yus umirchauyarme. Tura yamaikia Israer-shuar umirainiachkui Yus atumin waitnentrarmar.

<sup>31</sup> Núnisan ní yamaikia Yúsan umirainiatsui. Tura atumin waitnentrampararum núnisan nincha waitnentrattawai.

<sup>32</sup> Nujaj ashí métek sumantikiak métek waitnentrar uwentikrattawai.

<sup>33</sup> Maa, Yus imiá shiirchakait. Tí nekachukait. Ni túramu penké nekaachminiaitji.

<sup>34</sup> “Uunt Yus enentáimmian zyaki neka? Tura zyá Nin unuiniaruit.

<sup>35</sup> Yaki Nin péñkeran susa shiira nujaj yapajniuit?” Tu áarmaiti.

<sup>36</sup> Ashí najanamu ainia nu Yus najanamu ániak Niiniu ániawai. Tura Nin shiir awajsatniun najanawarma ániawai. Yus tuke iniaitsuk shiir awájnásti. Núnisan atí.

## 12

### *Yusaj surumaktarum*

<sup>1</sup> Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakarín maa Yúsan suu ármiai. Atumsha núnisrume iwiaaku árumna nuñ Nii túrutataj taku túrutati tusarum tuke enentáijjai Yusaj tsanãkamaktarum. Yusaj ísam ti shiir atí tusarum túratarum. Nu túrakrumka pátatkechu antsu ti nekas enentáimjai Yus shiir awajin átatrum.

<sup>2</sup> Chíkich shuar aya jú nuñkanmayá ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsanãkatkatarum. Nu túrakrumka Yus wakera nu nekaattarme. Ni wakeramusha yajauchichuiti antsu imiá nekas penkeraiti.

<sup>3</sup> Yus winia waitnentrak akatar akuptuku asantai júna tájarme. Atumek wíkitiajtai tu enentáimtumatsuk jeamna nujaj métek enentáimtumasta. Yus enentáimta asakmin takastinian suramsana nujaj apatkam nekaamata.



4 Ii ayashí chikichkiitiat ii muchitmarí untsurínti. Tura métekrak muchi-tiáiniatsui.

5 Núnisrik iisha, Yus-shuarti, ayashí muchitmaríya áintsarik untsuríitiatar chikichik ayashtinia áintsar takaa*ji*. Nusha Krístujai tsanínkiu asar áitkiamuitji. Túramu asar nuamtak atsumnaiyaji.

6 Ii túratniun Yus nusháa nusháa súramji Nii wakera nujai métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuínkia Yus enentáimtakum unuimiarmam nujai métek etserkata.

7 Chíkich shuar yáintinian Yus suramsaitkiuínkia nekas enentáimjai yáintá. Unuiniartiniaitkiúmka yawetsuk unuiniarta.

8 Chíkich shuar ikiakártiniaitkiúmka nekas péñker ikiakárta. Súsatniuitkiúmka shiir enentáijjai ementutsuk súsarta. Shuaran wáinin atí tusa Yus apujtsamsaitkiuínkia ti enentáimsam túratá. Tura shuar iturchat pujuinia nu yáintinian Yus suramsaitkiuínkia shiir enentáimsam túratá.

### *Yus-shuar túratnia nu*

9 Nekas enentáijjai mai anenai ajatarum. Yajauch nakitrarum péñkera nu túratarum.

10 Nuamtak yachi asarum núnisrum mai anenai ajatarum. Chíkich wijjai nankaamas úuntaiti tu enentáimtunaistarum.

11 Nakittsuk kakaram ajasrum ashí enentáimjai ii Uuntrí wakera nu túratarum.

12 Ukunam Yus tsankatramkattajnia nu enentáimtusrum warastarum. Wáitiakrumsha katsuntratarum. Tuke iniaitsuk ashí túrunamujai Yus áujasatarum.

13 Yus-shuar atsumainia nujai yáintarum. Írarsha péñker itiaatarum.

14 Yajauch awajtamainia nu shiir awajsatarum. Yus yajauch yumíntuk nu shuaran péñker túrawarat tusarum seattiarum.

15 Warainia nujai warastarum. Kúntuts pujuinia nujajisha úuttiarum.

16 Chikichik enentáijjai métekrak shiir enentáimtunaitiarum. Nankaamantu enentáimtumasairap. Antsu pééjchach ajastarum. “Ti nekajai” tu enentáimtumasairap.

17 Shuar ámin yajauch awajtamkuisha nincha yapajkiataj tu enentáimsáip. Aents ísam péñker áminia nu amesha tuke túratá.

18 Ame jeamna nujai ashí shuarjai nawamnaikiam wekasata.

19 Yuska ni Papiríin juna áamtikramiayi: “Wíitjai tunaan asutiátniun. Wisha yapajkiattajai” tawai Uunt Yus. Tuma asamtai yatsuru, kajertamkuisha atumsha yapajkiairap. Antsu yajauch awajtamkana nuna Yus ístí. Yus asutiáti.

20 Tura nu arantcha tawai: “Ame nemasrum tsukamakuisha ayurata. Kitiamakkuisha umartin susata. Nu túrakum péñker ajachua nu initsaartatme.”

21 Yajauch nupettamkain. Antsu péñker túrakum yajauchia nu nupetkata.

## 13

1 Akupniunka ashí shuar umirkatniuiti. Akupniuka Yus apujsamuiti. Yus apujsamun akupin atsawai.

2 Tuma asamtai shuar akupniun umirtsuna nu, Yus apujsamun umireachu asa nekas asutniátniuiti.

<sup>3</sup> Kame akupniuka péñker shuar sapijmiakarat tusar apujsachma áiniawai. Antsu yajauch shuar ashamkarat tusar apujsamu áiniawai. Nii ashamt-suk pujustin wakerakmeka péñker túratá. Túrakminkia akupin shiir enentáimturmartatui.

<sup>4</sup> Yainmakat tusa Yus apujsamuiti. Antsu yajauch túrakmeka akupin nekas ashankatniuitme. Warí, Yus ántar apujsachmaiti. Tunáa shuaran asutiátniun Yus apujsaiti.

<sup>5</sup> Nu asamtai akupin tuke umirkatniuiti. Aya asutiúawain tusar umirkash-tiniaitji. Antsu shiir enentáijjai wekasatin umirkatniuiti.

<sup>6</sup> Tuma asamtai núnisan akupniun kuit súsatniua nu páchitsuk susatarum. Nu takatan pujursarat tusa Yus apujsaruiti.

<sup>7</sup> Ashí túratniua nu túratarum. Akiktiniaitkiunka páchitsuk akikta. Akup-niusha uuntcha ashí núnisan írúnna nusha shiir enentáimtikratarum.

<sup>8</sup> Kuitjai tumashrintin airap. Antsu mai anenai tuke ajatarum. Chíkich shuar aneakum nin péñker túrattame. Túram ashí akupkamu páchitsuk umirkattame.

<sup>9</sup> Akupkamusha tawai: “Tsanirmawaip, mañkartuawaip, kasamkaip, chíkich shuar tsanumpruraip, chikichna wakerutkaip” tawai. Tura nusha ashí chikichik chichamjain tüniniaiti: “Ame ayashim aneam núnismek ashí shuar aneata.”

<sup>10</sup> Shuar chíkich shuaran aneakka yajauch awajsashtatui. Tuma asa akupkamun ti shiir umirkattawai.

<sup>11</sup> Ii yámankamtaik Yus nekas enentáimtusmijaj nuj “Ii ti shiir ajasar tuke uwempratin ukunam átatui” tu enentáimprachmashijaj. Antsu yamaikia nu tsawant yuntumsamta ashí túrajnia nujaj shintiarar enentáimpratniuitji.

<sup>12</sup> Tuke káshiitai tsawaqatemprai. Ii Uuntrj Kristu jú tunáa nunkanam tátin ishichik ajasai. Tuma asamtai ii túrutairj kiritniua núnisan yajauch túrutai ana nuka túrutusk tsáapniniun péñker wekasatin kakaram ajastai.

<sup>13</sup> Túratniua nujaj métek wekasatai. Tsawaj wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmat-suk, jianaitsuk, tura kajernaitsuk aya péñker túratái.

<sup>14</sup> Ii Uuntrj Jesukristu túramia núnisrik túratái. Tura ii ayashí wakeramu umikiat tusar tsañkatkashtiniaitji.

## 14

### *Ame yatsum kakantraip*

<sup>1</sup> Shuar Yúsán ishichik enentáimtana nu itiaatarum tura kakantrairap.

<sup>2</sup> Iis, chíkichka ashí yuamniaiti tuiniawai. Tura chikichcha, Yúsnan awajir-ar, namañ yúashtiniaiti tuiniawai.

<sup>3</sup> Tura ashí yúa nuka namañken yúatsna nuna wishikrashtiniaiti. Núnisan ashí yucha nu ashí yuun kakantrashtiniaiti. Warí, núnaka Yus ni shuarin awajsachukait.

<sup>4</sup> ¿Ámeke timiataash péñkeraitiam chíkich shuar kakantinia? Antsu ni úntrin ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

<sup>5</sup> Chikichcha enentáimpratái. Chíkich shuar tsawantan achikar “Jú tsawan-taj Yus nankaamas shiir awajsatniuiti” tuiniawai. Chikichcha ashí tsawan-tan métek enentáimtuiniawai. Ayu, tura ni enentáimtamun nekas paant nekaat-niuiti.

6 Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yúsan shiir awajsataj tusa túrawai. Yurumkajajsha ashí yúana nu Yúsan yumin̄kias shiir awajsataj tusa túrawai. Núnisan ashí yúatsna nusha Yúsan yumin̄kias shiir awajsataj tusa túrawai.

7 Iikkia ii enentáijjajin iwiaaaksuji. Tura jáakrishá ii enentáijjajin jaatsji.

8 Kame iwiaaku pujakrishá ii Uuntrī Kristu shiir awajsataj tusa pujurji. Tura jáakrishá tuke Níiniuitji. Nu asamtai iwiaaku pujakrishá tura jakarsha tuke Krístunuitji.

9 Kame jakancha iwiaakuncha ashí ni Uuntrī ajastaj tusa Kristu jaka nantakmiayi.

10 Tura çurukamtai ame yatsum “yajauchiiti” tame. Urukamtai nakitiam? Warí, ashí iikkia ii túramu paant awajnasat tusa Kristūj naka wajastatji.

11 Nu asamtai Yus-Papinium tawai:

“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniaiti” túrutiatatui” tawai.” Tu áarmaiti.

12 Tuma asamtai iisha chikichik chikichik ashí ii túramu Yus paant ujakar-tatji.

### *Ame yatsum tunaanum ajurairp*

13 Nu asamtai “yajauch túriniaiti” tu áujmatnaisashtiniaitji. Antsu ii yach̄i tunaanum ajurarchatin ti enentáimturtniniaitji.

14 Jesukristu jintintiamu asan juna nékajai: Yus najanamuka péñkerchaka atsawai. Ashí túramniaitjai. Túrashá shuar chichaak “Nu túrushtainti” táyat nuna túrakka níijjaj tunaiti.

15 Tuma asamtai shuar chichartamuk “Nu yúakminkia Yusjaj péñkerchaiti” taj, ame yúakminkia nu shuar itiurchat enentáimsashtatuak. Tura ni-isha tunaanum iniaar men̄kakamniaiti. Nu shuar aneakum túratsme. Enentáimpratá. Aya ame yuamna nujajin ame yatsum Kristu jarukmia nu emen̄kákaip.

16 Tura “yuamniaitjai” táyatam wi yúakui yajauch áujmatrusarajin tusam iniaisata.

17 Kame Yus umirkatin yurumátniuajisha umartinjajisha enentáimtuschatniuiti. Antsu Yusa Wakanjijaj shiir wekasar Yusjaj tura shuarjaj nawamnaikiar ti péñker wekasatniuitji.

18 Ashí shuar Krístun núnis umireakui Yussha tura chíkich shuarsha péñker enentáimtuiniawai.

19 Nu asamtai tuke shiir pujusminia nu túrakur Yusjaj kakaram ajastin yáiniaikta.

20 Yus iisam ashí yuamniaitji. Antsu ame yuamna nujaj chíkich shuar tunaanum ajurartin tunaiti. Tuma asamtai ame yuam nujaj Yus nu shuara enentáin takarsamu emesraip.

21 Nu túrashtin nuikia naman̄ yúashtincha karía umarchatniusha péñkeraiti. Warí, túrushtaijjaj ame yátsum itiurchat enentáimtikram tunaanum ajurarchatapash. Tura nu shuar Yúsan nekas enentáimtushamnia ajastatui. Nuka atsuti.

22 Ame Yus nekas enentáimtakum ashí túramniaitkiumka Yúsak wararsata. Shuar Yus ímmianum shiir enentáijjaj mash túramnia nu nekas shíiraiti.

23 Tura araantushim yua nuka Yúsan shiir enentáimtusuk yua asa sumamattawai. Kame ashí Yus shiir enentáimtusuk túramu tunaiti.

## 15

*Chíkich shuar wakeramuk enentáimtustiniaiti*

1 Yusjaj̄ katsuaru ájiniá nu iik enentáimtumatsuk kakarmachu ainia nu yáintiniaitji.

2 Chíkich shuar wakeramu enentáimtustiniaitji. Tura Yusjaj̄ nu nan̄kaamas shiir wekasatniun yáin̄miniaitkiui túratniuitji.

3 Krístusha ni wakeramun túrachmiayi. Antsu Yus-Chicham tana núnisañ chikichnan enentáimtusmiayi. Nu asamtai Yúsán umirin asa wáitiak timia nu áarmaiti: “Ámin katsekramainiak Winiaja katsekrummiayi.”

4 Núnisañ ashí yaunchu Yus-Papinium aarma in jintinramatniun áararmiayi. Nujaj̄ atsantamkurin shiir wáin̄kiattajnia nuka katsuntrar nákastatji.

5 Yus atsantamar katsuntratniun jintinramji. Tuma asa Jesukrístu túramia áintsañ atumniasha chikichik enentáijijaj̄ enentáimtunaisar pujustinian yáinmakartí.

6 Nujaj̄ ashí wétekrak Yus shiir awajsattarme. Niisha ii Uuntrj̄ Jesukrístuncha Aparínti.

*Israer-shuarchanmasha Uwempratin Chicham etserkamu*

7 Tuma asamtai chíkich shuarjaj̄sha shiir awajnaísatarum. Kristu núnisañ Yúsán shiir awajsat tusa incha shiir awajtamsamajji.

8 Juna tajai. Kristu Israer-shuaran yáintaj̄ tusa támiayi. Tura Yus ti yaunchu nuna weatr̄in “túrataj̄” timia nu uminkiat tusa támiayi. Nujaj̄ Yus timia nuna umikmia nu nekaamniaiti.

9 Tura nu arantcha Israer-shuarchasha Yus waitnentrartin ásarmatai nin shiir awajsarat tusa támiayi. Tura Yus-Papisha tawai:

“Ámin kantamprakun ashí shuarnum shiir awajsattajme.”

10 Tura nu arantcha tawai: “Ashí nun̄kanmayá shuartiram ashí Israer-shuar Yúsna ainia nujaj̄ warastarum.”

11 Tura ataksha tawai: “Ashí aents ii Úuntr̄in shiir awajsarti. Tura ashí shuarsha Nin “Ti úuntaiti” tiartí” tawai.

12 Isayasha áarmiayi: “Tawitia aparj̄ Isai weatr̄iya akupin akiinkiat-tawai. Niisha ashí nun̄kan akupeakui ashí shuar niiniak shiir enentáimtusartatui.” Tu áarmaiti.

13 Yus ashí shíiran suramsattakrin nu shiir nákaaji. Tuma asamtai Nii nekas enentáimtakrumin warasa shiir pujustinian yamá suramsati. Nuyá Yusa Wakanj̄ kakarmarjijaj̄ ti shiir enentáijijaj̄ katsuntrarum, nu nákastarum.

14 Yatsurú, atumsha anenainaitrume. Tura ashí Yusna nekaarum nuamtak chicharnaikiatin nékarme.

15 Tuma aj̄n̄ kajinmatk̄irum tusan ataksha ti paant áakun j̄ú enentáimtikeajrume. Yus winia waitnentrak ni Chichamen etserkat tusa akuptakui nuna áatjarne.

16 Kame Jesukrístu Israer-shuarchanum Yusa shiir chichamen etserkat tusa akuptukuiti. Nuna túrakun Israer-shuarchan Yusa Wakanjijaj̄ shiir awajsamu ásarmatai Yusaj̄juinajai. Tura Yusha shiir enentáijijaj̄ itiaiñiwai.

17 Jesukrístu yaintiui asamtai Yusna takarsamaj̄ nuna wararsamniaitjai.

18 Tura chíkich shuarjaj̄ Kristu túramun pachischattajai. Aya wi chichas-majaj̄sha tura wi túramujaj̄sha Israer-shuarchan Kristu umimtikiamia nunak áujmatsattajai.

19 Yusa Shiir Wakanj kakarmarjjaj aents tujintiamun túran ashí shuaran Jerusaréñ péprunam nanċkaman etserkin Iririkiu nunċkanam ejekamjai. Kristu-chichaman ashí nu nunċkanam etserkaitjai.

20 Nuna túrakun chíkich shuar etserkachmanum Krístunun ántichu ániamunam Uwempratin Chichaman etserkaitjai. Nujaj chíkich takasmanum takarsachuitjai.

21 Yus-Papisha núnisañ tawai:

“Chichaman penċké antukcharuka nekaawartatui. Nin áujmatman anturkacharusha unuimiarartatui.”

### *Papru Rúmanam wétaj tawai*

22 Nuna pujuru asan íttjarum táyatan íchmajrume.

23 Tura yamaikia juyá takatrun umikian tura yáunchusha tuke íttjarum tiniu asan

24 Ispania nukanam wéakun ístajtarme. Tura atumjin shiir irasan Ispanianam wéakui atumsha yaintkiarum shiir akuptukchattarpash.

25 Tura yamaikia kuitjai Jerusaréñnumiá Yus-shuaran yáintaj tusan wéajai.

26 Masetúnianmayá shuarsha tura Akayanmayá shuarsha kuítian irurar Jerusaréñnumiá Yus-shuaran atsumainia nuna akuptuktai tuiniawai.

27 Ti wakeruiniak túrawarmiayi. Nu nekas túrastinkiait. Israer-shuarnumiá Yus-Chichaman antukaru ásar yamaikia ni kuítrijaj páchitsuk yáinchatniukait.

28 Tuma asamtai jú kuitian súsan umiran nuikia Ispanianam wéakun íttiatjarme.

29 Tura nuj winiakun Kristu Shiir Chichamen nujaj shiir yáintajrum tusan ejeettitajrume.

30 Yatsurú, ii Uuntrj Jesukrístunu asarum tura ni Wakanj pujurtamkurmin anenia asarum Yus áujtursatarum. Núnisrum wíjjaj métek Yusna takastin yaintkiattarme.

31 Jutia nunċkanmayá Israer-shuarnumiá uwemtikrat tusarum Yus áujtursatarum. Tura jú kuitian júajna nunasha Jerusaréñnumiá Yus-shuar shiir achikiartí tusarum Yus áujtursatarum.

32 Nujaj, Yus wakerakuinċkia, penċker wampú enentáimsan warasan íttitajrume.

33 Yus ti shiir pujustinian súana nu atumjai tsaniñ pujurtamsati. Núnisañ atí.

## 16

### *Amikmaamun akupramiania nu*

1 Ii umai Jépeka Senċkrea péprunmayá Yus-shuaran yáiniaiti. Ti penċker Yus-shuaraití.

2 Kristu náarijn shiir wáinkiataram. Nuamtak yachí wáinkiatniua núnisrum wáinkiataram. Niisha chikichnasha tura winiasha ti penċker wáitin asamtai atumsha ni atsumamusha yaintarum.

3 Pirisirasha Akirasha wíjjaj métek Jesukrístunun takasaru ásar amikmaatainiajai.

4 Niisha winia uwemtikrurtai tusar jániñkiarmiayi. Tuma asamtai yuminċkiniajai. Tura aya wíkichu antsu ashí Israer-shuarchanumiá Yus-shuar áinia nusha yumċkiniawai.

<sup>5</sup> Núnisan̄ ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Kristun nekas enentáimtusmiayi.

<sup>6</sup> Marisha, atumjaj̄i ti takasua nu amikmaatruatarum.

<sup>7</sup> Tura wíi shuarsha Antrunikiusha Júniassha amikmaatruatarum. Niisha wíjjaj̄i sepunam pujusarmai. Wíjjaj̄i emka Kristun shiir enentáimtusar chikich akatramujaj̄i nankaamas takasaru ániawai.

<sup>8</sup> Ámpriassha Kristunam winia aneamu amikiur asamtai amikmaatruatarum.

<sup>9</sup> Urpanujaj̄isha Jesukristu takatr̄i tsaniñniuitji. Niisha tura aneamu Estakissha amikmaatruatarum.

<sup>10</sup> Apirissha amikmaatruatarum. Niisha Kristun ti shiir enentáimtamtu ti páantaiti. Núnisan̄ Aristúpuru shuarsha amikmaatruatarum.

<sup>11</sup> Wíishuar Erutiún̄sha tura Narsisu shuarsha Kristu shuar̄i ásarmatai amikmaatruawarta.

<sup>12</sup> Tripiniasha tura Tripiusasha Yúsnan takainia ásarmatai amikmaatruatarum. Núnisan̄ ii umai Pírstitia Yúsnan ti takasu asamtai amikmaatruatarum.

<sup>13</sup> Rúpusha, nusha ti penker Yus-shuar, tura nukur̄isha amikmaatruatarum. Niisha wíjjaj̄i nekas winia nukuruu núnisaiti.

<sup>14</sup> Asin̄kritiusha, Pirikiuntisha, Érmassha, Patrupassha, Érmessha, tura ashí niíjjaj̄i Yús-shuar ainia nu amikmaatruatarum.

<sup>15</sup> Núnisan̄ Jirurukusha, Júriasha, Néreusha, ni umajjjaj̄isha, Urimpiassha, tura ashí Yus-shuar niíjjaj̄i pujuinia nu amikmaatruatarum.

<sup>16</sup> Nuámtaksha shiir aujnaisatarum. Ashí juyá Kristu shuar̄i amikmaatmainiawai.

<sup>17</sup> Yatsurú, shuar nusháa enentáimtuiniak Yus-shuaran akanainiak itiu- chat awajenawai. Nu shuar wáinkiarum kanaktiarum. Ni yajauch túramu átum péñker takastin unuiniarmena núnischaiti.

<sup>18</sup> Nu shuar ii Uuntr̄i Jesukristunun takainiatsui. Antsu ni wakeramun uminiawai. Tura ti shiir chichasar nékachun anan̄kenawai.

<sup>19</sup> Átum umirma ashí shuar nékainiakur ti waraaji. Yajauch túrutsuk aya péñker túratin enentáimsarum pujustarum.

<sup>20</sup> Yus tuke shiir pujustinian amawa nu ti wárik uunt iwianchin nupetturmakatui. Tura ii Uuntr̄i Jesukristu shiir yainmakarti.

<sup>21</sup> Timiutéusha, wíjjaj̄i takau, amikmaatmarme. Núnisan̄ Rúsiusha, Jasun̄sha, Susipatresha, mash wíishuar ainia nu amikmaatmarme.

<sup>22</sup> Wíi, Tersiu asan, Papru chichamen̄ ju papinium áateakun Kristu náarijn̄ amikmaajrume.

<sup>23</sup> Káyusha amikmaatmarme. Ni jeen pujaji tura juísha ashí Yus-shuar irunainiawai. Erastusha ju pepru kuítr̄in wáinniuiti. Niisha ii yach̄i Kuártujaj̄i amikmaatmarme.

<sup>24</sup> Ii Uuntr̄i Jesukristu ti shiir yainmakarti. Núnisan̄ atí.

### *Yus shiir awajsatai*

<sup>25</sup> Watsek, Yus shiir awajsatai. Niñki nekas kakaram awajtamsamniaiti. Wi Uwemprat̄in Chichamnum Jesukristunun étsereaj̄i nujaj̄i ikiantamprat̄atawai. Nu chicham yámankamtaiknumiã nekaachmanak Yus yamaikia paant awajsaiti.

<sup>26</sup>Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nun̄kanmaya shuar Nii enentáimtusar umirkarat tusa nu Chichaman yamaikia paant awájsaiti. Yus amuutsuk tuke pujuwiti.

<sup>27</sup>Yúsak Niñki ti neka asa tura Jesukrístu ti penker tura asamtai Niñki tuke shiir awájnástí. Nuke atí.

## Papru KURINTIUNMAYA SHUARAN Emka papin aar akuptukma

### *Kurintiumaya Yus-shuaran Papru áatramiania nu*

<sup>1</sup> Wi Pápruitjai, Jesukrístu akatramu. Yus nuna wakerak, ni akatramurj atí tusa anaitiukmai. Wi, ii yachj Sústinisjai, ju papí akupeaji.

<sup>2</sup> Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujai tsanínkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wak-erawai. Nincha incha Jesukrístu mai metek Úuntrjnti.

<sup>3</sup> Yus ii Aparj tura ii Úuntrj Jesukrístusha waitnentrainia ásar yainmakarti imiatkinchanum tuke shiir pujustinian.

### *Ii Uuntrj Jesukrístujai tsanínkia pujustin*

<sup>4</sup> Yusan áujkun yumínšan atumin shiir enentáimtajrume. Jesukrístujai tsanínkia pujakrumin Yus shiir enentáimturmawai.

<sup>5</sup> Jesukrístujai tsanínkia pujakrumin Yus atumin ti yáinmawai ashí penker ana nu enentáimtakrum tuke shiir chichastinian.

<sup>6</sup> Kristu juna túramniaiti tíchamkají. Ashí yamaikia uminkiaiyi.

<sup>7</sup> Tuma asamtai ashí Yus súranna nu atsumatsrume. Nu túrakrum ii Uuntrj Jesukrístu tatin tuke nákarne.

<sup>8</sup> Tura iniaitsuk tuke emettamattawai ii Uuntrj Jesukrístu támatai atumi tunaarj pachischatin.

<sup>9</sup> Jesukrístu ii Uuntrjnti. Niijjai tsanínkia pujusúk tusa Yus achirmakmarne. Tura Nii tana nuna tuke umiktatui.

### *Yus-shuar akantramu*

<sup>10</sup> Yatsuru, ii Uuntrj Jesukrístu naarj pachisan, seajrume métek enentáimpratarum tusan. Nísháa nísháa enentáimprairap antsu chikichik enentáijjai métek enentáimsa pujustarum.

<sup>11</sup> Átum yajauch chicharnaisarum pujarme. Krúí shuarj tu ujatkarmatai tájarne.

<sup>12</sup> Kame júnis awai: Chíkich “Wi Páprunuitjai” tuiniawai. Chíkich “Apurusnaitjai” tuiniawai. Chikichcha “Wi Pitrunuitjai” tuiniawai. Chikichcha “Wi Kristu-shuaraitjai” tuiniawai.

<sup>13</sup> ¿Warí, nuínkia, Kristu akantramukait. Páprusha krúsnum jarutramka-maashi. Tura Papru naarj pachisa imiaimiukaítrum?

<sup>14</sup> Atumin untsurj imiaichu asan shiir enentáimjai. Aya Krispu Káyujai jímiarchiniak imiaimjai.

<sup>15</sup> Nújainkia shuar “Papru náarj in imiaimiuitjai” tíchamniaiti.

<sup>16</sup> Maa, nekas, Estepanasa shuarj incha imiaimjai tura chíkich wi imiaimiun nékatsjai.

<sup>17</sup> Kristu imiakrattia tusa akuptukchamai antsu uwempratín chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimpararj in tusan. Antsu yúpichuch chichaa-jai Kristu krúsnum jakamuk paant atí tusan.



*Kristu Yusa kakarmarıncha ni nekataırıncha paant iniakmasmiania nu*

18 Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, “ántraiți nu chicham” tu enentáimainiawai. Antsu Yus-shuarti, uwempratniunam wéakur, “nu chichamjajı́ Yusa kakarmarjı́ takusminiayı́” tu enentáimji.

19 Núnisañ tawai Yus-Chicham yaunchu aarma: “Ju nuñkanmayaan ti neka áiniana nuna chichamen emesrattajai; ti unuimiararu áinianak ántar awajsat-tajai” tawai Yus ni chichamen.

20 Iis, ju nuñkanam uwempratın chicham íruntuk. Nu chichaman ashı́ mash Yus ántar awajsaiti. Ti neka áiniana nusha, jintinkiartin áiniana nusha, ashı́ ju nuñkanmayaan unuimiar ti chichastinian nékana nusha, nu shuar mash “wi tájana nuajı́ péñker pujusam uwempratame” tu enentáimainiawai. Tura núnaka mash Yus péñké ántar najanaiti.

21 Aya ni nékamujajı́ aents Yúsan nekaacharmiayı́. Núnisañ atı́ tusa Yus túramiayı́, timiá neka asa. Antsu ashı́ aentsun Yus ni chichamejajı́ uwemtikratniun wakerimiayı́. Chıkich “ántraiți” tuiniana nu chichamjajı́nkı́ Yus Nin enentáimtuinia núnaka uwemtikratniun wakerak túramiayı́.

22 Israer-shuar “aentsti túrachminian iniakmasta, wi nekaatajı́” tuiniawai. Kriaku shuarsha “ti enentáimsam, mash péñker jı́ıkim turuttia wisha métek enentáimpratajı́” tuiniawai.

23 Iikia antsu Kristu krúsnum jarutramkamuk étsereaji. Israer-shuarsha “ju chicham natsantaiti” tu enentáimainiawai. Israer-shuarchasha “ju chicham ánttraiți” tu enentáimainiawai.

24 Tura Yus achikiarma, Niiniu ajasarat tusa, Israer-shuarsha Israer-shuarchasha máı metek “Kristu krúsnum jarutramak Yusa kakarmarıncha ni nekataırıncha paant iniakmasmiayı́” tu enentáimji.

25 “Yusa nekataırjı́ ánttraiți” tuiniawai aents, túrasha imiá nekas péñkeraiti. “Yusa kakarmarjı́sha jeatsui” tuiniawai aents, túrasha imiá nekas kakarmaiti.

26 Enentáimtumastarum yatsuru. Yus achirmakmarme Niiniu ajastinian, tura ju nuñkanam ti neka áinia núnisañ atumjın ti neka íruntusui. Ti akup-niusha ti nankaamakusha atumjın íruntusui.

27 Antsu ju nuñkanam nékachua núnis ana nuna Yus achikiuiti ti neka nuna iniatsáartinian. Tura ju nuñkanam kakarmachua núnis ana nunasha Yus achikiuiti kakarma nuna iniatsáartinian.

28 Péejchachincha, nakitsamuncha, ánttrachincha, Yus achikiuiti ashı́ nankaamantu íranna nuna amuktinian.

29 Nújajı́nkı́a chikichkisha Yusjajı́ waantu enentáimprachminiayı́.

30 Tura Yus atumin Krıstujajı́ tsanıñ apujtamsaiti. Tura Kristu enentáimtusar Yus nekas nekataınkı́a nekaattajı́. Kristu enentáimtakrin Yus shiir enentáimturmajı́, péñker awajtamjı́, tura uwemtikramjı́.

31 Yus-Papinium yaunchu aarma núniskete: “Shuar nankaamantu enentáimpratajı́ tákuñka ii Uuntrjı́ Yus túramun wararsati.”

## 2

*Kristu krúsnum jakamu etserkamı́*

1 Wisha, yatsuru, atumjın jeamaj nujı́ Yus-chichaman ti neka chichainia áintsan tura íwiasanak ujakchamajrume.

2 Tura atumjajı́ pujakun aya chikichkiniak nekaatniun enentáimpramjajı́. Jı́ıti: Jesukrı́stu, tura Jesukrı́stu krúsnum jakamu.

<sup>3</sup> Nékayatan kakarmachu sapíjmiashím jearmiajrumé.

<sup>4</sup> Yus-Chichaman ujaakun ti neka chichainia áintsan nupetkataj tu enentáimturchamajrumé. Antsu Yusa kakarmaríncha tura ni Wakaníncha paant iniakmasan Yus-Chichaman ujakmajrumé.

<sup>5</sup> Aentsu nekatairíjjaí Yus enentáimtuschatniuiti antsu Yusa kakarmari paant nekaarum Yus enentáimtustiniaitrumé. Nuni asamtai Yus-Chichaman tu ujakmajrumé.

### *Aya Yusa Wakaníjjaí Yúsnan nekaamniaiti*

<sup>6</sup> Túmaitiat Yusa nekatairí átsuk. Yúsnan unuimiararujáí Yusa nekatairín áujmatji. Tura Yusa nekatairínkia aentsu nekatairí áintsachuiti. Ju nunkanam akupin ainia nuna nekatairínchuiti Yúsna. Ju nunkanam akupniuka ishichik pujus amuukachartatuak.

<sup>7</sup> Yaunchu ju nunka atsainí Yus in uwentikrampratniun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmatji.

<sup>8</sup> Ju nunkanam akupniuka nuna penké nekaacharmiayi. Nékainiakka ii Uuntrí timiá shiira nuna, krúsnum máacharu aayi.

<sup>9</sup> Yaunchu Yus-Papiniun áarchamukait: “Shuar Yúsán aneana nuna Yus ti shíiran susattawai. Susattana nuka timiá péñker asamtai shuar wáinkiachman, antukchamuncha, enentáimtachmancha Yus susattawai” tu áarmaiti.

<sup>10</sup> Tura Yusa Wakaní ii enentáin pujurtamuk Yus suramsattajnia nuna yamá paant jintinramji. Nu Wakancha imia Yus enentáimmiancha mash nékawai.

<sup>11</sup> Shuar enentáimna nuna chíkich shuar nekaamniakait. Antsu aya ní enentáijjaín nékatsuk. Núnisan aya Yusa Wakaní Yúsnan paant nékawai.

<sup>12</sup> Ju nunkanmaya aents enentáimiainia nujáí Yusna nekaachminiaiti. Antsu Yusa Wakanín in súramaj nujáí Yus shiir tsankatramajnia nu nekaamniatji.

<sup>13</sup> Yusa Wakaní jintinramji Yúsnan chichastinian Nii wakera áintsan. Ni chichamen súramji. Túramtai ii nékamujáí Yúsna étsertsuji. Tuma asamtai imia Yusna nuka Yusjáí péñker wekainia nu jintíaji.

<sup>14</sup> Yus-shuarcha Yusa Wakaníniun ántatsui ántrai tusa. Aya Yusa Wakaní jintintiamniatkiui Yus-shuarcha nuna penké nekaachmin áiniawai.

<sup>15</sup> Antsu Yusa Wakanín takaku ashí mash iis, péñkera nuna nekaamniaiti. Nii túrana nunasha chíkich shuar sümamtikiachminiaiti.

<sup>16</sup> Yus-Papiniun yaunchu áarmaiti: “¿Yusa enentáimmiari ya neka. Tura Yúsán ya jintintiamniat?” tu áarmaiti. Tuma aín iikia Yus-shuar ájnia nu, Kristu enentáimna núnisrik enentáimji.

## 3

### *Páprusha Apurussha Yusa takatrín mai tsanínkiar takainiawai*

<sup>1</sup> Tura wikia, yatsuru, nuik aj atumjáí pujakun Yusa Wakanín umirniun chichastinia áintsanak atumjáí chichastinian tujinkiamjáí. Antsu ayash wak-eramu umirin asakrumin Krístunam katsuárcharujáí chichastinia áintsanak atumjáí chichasmajai.

<sup>2</sup> Uchi kuírach naman ayurachminiaiti antsu aya umuntsatniuiti. Núnisan aya yúpichuchin ujakmajrumé, itiurchat ana nu tujintiakrumin. Tura yamásha itiurchat ana nu tuke tujintiarne.

<sup>3</sup> Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akantramuitrume. Nujají páantaiti átum ayash wakeramu umirniuitrume. Yúsnan enentáimticharujají métek wekainiaitrume.

<sup>4</sup> Atumjínkia shuar “wi Páprunuitjai” tuiniatsuk. Chikichcha “wi Apurusnaitjai” tuiniatsuk. Tu chichaakrum ayash wakeramu umirniuitrume.

<sup>5</sup> Wátsek. Wi Papru ti péñkeraashitiaj. Apurussha ti péñkeraashit. Antsu iisha aya Yusa takarniuríntji. Yus-Chicham étserkurin ii Uuntrí enentáimtuschamkuram. Ii Uuntrí takatan chíkich chíkich suramsamajnia nuke takasmaji.

<sup>6</sup> Wi Yus-Chichaman étserkun arakan araktinia áinis takasmajai. Apurussha entsan ukatramai. Tura Yus nu arakan tsakatmarmai.

<sup>7</sup> Arakan aranaa nusha, entsan ukatna nusha ánrachukait. Antsu Yusak arakan tsakatmaru asa ashí túrachukait.

<sup>8</sup> Arakan aranaa nusha, entsan ukatna nusha métek áiniawai. Túmaitkiuisha takasmajají métek Yus akiktatui. Péñker takasmataínkia péñker akiktatui.

<sup>9</sup> Wisha Apurussha Yusa takatrí mai tsanínkiar takaaji. Tura Yus atumí enentáin takaakuí atumsha Yusa núñķea áintsaitrume.

Jeasha enentáimpramniaiti. Yus atumjají takaak jeá jeamtinia áintsan takaawai.

<sup>10-11</sup> Jeá jeamainiak, emka uunt kaya núñķá init ikiursar kaki awajsatin áiniawai. Tura nuyanka nu kayanam ekeniar júkitniuiti jeá wewe atí tusa. Wikia jeá jeammin ti unuiniamiarua áintsanak uunt kaya núñķá emka ikiustinian nekaan, núnisnak Jesukrístunun emka ujakmajrume. Tura Jesukrístu uunt kaya kaki ikiusma áinis asa Nínkiti nuí jeá ekenkatin. Iis, ashí enentáimtustinia nanķaamas Jesukrístu enentáimtustiniati. Nu asantai Jesukrístunun emka ujakmajrume. Yus nuna etserkatniun tsanķatrukuiti. Wi emka, uunt kaya ikiursatniua áintsan, Jesukrístunun ujakmajrume. Tura nuyanka chíkich shuar ekeniar jeammin áiniawai. Tura anearti péñker jeamtinian.

<sup>12</sup> Tura jeá jeamainiak nii wakerak péñker ana nujají jeamminiaiti. Nii péñker jeamtinian wakerak kurijajisha, kuítjajisha, shíirmach kayajajisha jeamminiaiti. Chíkich jeamkuka numijajisha, kenķujajisha, nukajajisha jeamminiaiti. Núnisanj shuar Yúsnan takaak péñker takasminiaiti túrasha nanķamas takasminiaiti.

<sup>13</sup> Tura amuukatin tsawant jeakuí ashí ni takatrí paant átatui. Nu tsawan-tajsha Yúsajya jí átatui tura nu jisha ni takatrí péñkera nunasha tura ya-jauchia nunasha nekapsattawai.

<sup>14</sup> Tura shiir jeamuka tura nu jeasha esaachmataínkia shiir akinkiatstawai.

<sup>15</sup> Antsu nanķamas jeamuka imianińki jiniumiá uwemprattawai, tura ni jeamma esaa penķé atsuttawai.

<sup>16</sup> Enentáimpratarum. Yusa Wakaní atumjín pujá asantai Yusa Jee aja-suram nu nékatsrumek.

<sup>17</sup> Shuar Yusa Jeeń emeseakuínkia Yus nu shuaran emesrattawai. Yusa Jeeńka timiá shiir asantai túrattawai. Nu Jeeń atumķetrume.

<sup>18</sup> Ju núñķanmayan unuimiarua núnisrum “ti nekaitjai” tu enentáimtusmasrum ananmamawairap. Antsu ju núñķanmayan nékachu áinis ajas Yúsnan ti shiir unuimíartiniati.

<sup>19</sup> Ju núñķanmayá aents nékainia nuna Yus “ántrai” tawai. Yus-Papinium áarmaiti:

“Ju núñķanmayan unuimiarun ni enentáimmiajajín Yus sumamtikiattawai.”

20 Tura nu arantcha áarmaiti:

“Uunt Yuska “unuimiaru enentáimmiancha penké ántraiti” tawai.”

21 Tuma asamtai “Páprunuitjai tárúmna nusha, “Apurusnaitjai”, tura “Pítrunuitjai” tárúmna nusha ántar enentáimprume, nii aya aents ásmatai. Tu enentáimprurum warasairap. Antsu nekaatarum. Ashí írúnna nu atumin yainmaktiniáiti.

22 Páprusha, Apurussha, Pítrusha, ju nunkanmayasha, iwiaakmasha, jákatniusha, yamáí írúnna nusha, ukunam átatna nusha, mash atumniaiti shiir yainmaktin.

23 Atumsha Krístunuitrume, tura Krístusha Yúsnaiti.

## 4

### *Yus akatramu takatri*

1 Júnisan ashí shuar enentáimturmastiniáitji. Iikia aya Kristu yáintrintji. Kristu akatramurintji Yusna yaunchu nekaachma ana nu yamáí etserkatin.

2 Wátsek, akatramuka tána nujaj métek umiktiniáiti.

3-4 Wi umikmancha umikchamuncha ii Uuntri Kristu nékawai. Átum enentáimturarmena nusha tura chíkich aents enentáimturainia nusha wíjajinikia ántraiti. Imia wíkishá nekamatsjai. Kame winia tunaarun penké wáintsujai tura aya nujaj “pénkeraitjai” tíchamniaitjai. Niñki Yus iirui.

5 Tsawant jeamtai ii Uuntri Kristu atak tátatui. Tura ashí yamáí kiritniunam uukma nuna tura shuar ashí enentáimprarma nunasha paant awajsattawai. Nu tsawant jeatsajin shuar umikiuashit tusarum enentáimtusairap. Tura nu tsawantaj Yus ashí pénker umikiarun shiir awajsattawai. Pénker umikiuncha ishichik umikiuncha takasmajaj métek Yus shiir awajsattawai.

6 Átum “Ju shuar pénkeraiti tura chíkich pénkerchaiti” tu akannáirarum penké tíchatniuitrume, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajaj métek enentáimsatarum.

7 Ámeke chíkich shuarjaj méteketme. Tura ashí takakmena nusha Yus amasmaiti. Tura Yus amasu asamtai çitiurak áminiukea áintsam nujaj nankaamantu ajai tu enentáimtumam?

8 ¿Ti kuítrinnia áintsan tura ashí takakua áintsan enentáimturmek. In nankaakarum uunt kapitían ajasua áintsan enentáimturmek? Nekas uunt kapitían ajasrumka maak. Nuñkia iisha atumjaj akupkaintji.

9 Chíkich shuar mash nankaamantu áinis ániakuisha Yus in ni akatramurinj ashí amúamunam apujtamsaitji. Tu enentáimpramniaiti. “Yajauch ániawai, máatái” tu pujurtamji shuar. Tura Yusa suntarisha ashí juyá shuarsha in iistai tusar káutramkaitji.

10 Iikia atumjaj jeatsji. Kristu shuarj asakrin nékachua áinis enentáimturmajj shuar. Átum antsu Krístunam tí nékachuashitrum. Iikia kakarmachuitji. Átum timiá kakarmaitrume. Átumka tí penkeraitrume. Antsu iikia muñjtiantji.

11 Tuke yamaisha tsukamaji, kitiamaji, entsartin atsumaji. Katsumpramji. Jeasha atsumaji.

12 Ii ewejéjaj takaakur ti pimpíaji. Shuar katsekramainiaji túrasha iikia shiir chichamjaj aiyaji. Itiurchat awajtamainiakuisha katsunteaji.

13 Tsanumprutmakrincha tuke shiir chichaaji. Tsuata áintsarik tuke yamaisha ashí yajauchia núnisan ajapramatniun enentáimturmainiaji.

<sup>14</sup> Atumin aya iniatsaartajtsan juní áattsujrume. Antsu winia aneamu uchirua áintsan jintintjarme.

<sup>15</sup> Atumin Yus-Chichaman ujaakun Yus-shuar ajastinian unuiniamjarme. Nujai Jesukrístu enentáimtakrumin atumí aparíja áintsan ajasmajai. Chíkich shuar Kρίstunun jintintrámatin timiá untsurí ákuisha aya wiki atumí aparintjai.

<sup>16</sup> Tuma asamtai wi wekaajna áintsan wekasatarum atumsha.

<sup>17</sup> Nu túratarum tusan winia aneamu uchirun Timiutéun akuptukmajrume. Niisha ii Uuntrí Kρίstun enentáimtamunam winia uchiruiti tura Kρίstun enentáimtak tuke shiir wekaawai. Túrasha wi Kρίstujai wekaamun ataksha enentáimtikramprattawai. Núiti ashí Yus-shuarnum wena jintíajna nuka.

<sup>18</sup> Papru yamaikia iraishtatui enentáimturainiak chíkich chíkich nankaamantuitjai tu enentáimtumainiawai.

<sup>19</sup> Antsu Yus wakerakuinkia wárik ítjam tusan wakerajai. Nuinkia nankaamantu chichamen antukchattajai antsu wátskea, ni túramurísha ístái.

<sup>20</sup> Yus akupeana nú shuar aya chíchainiatsui antsu Yusa kakarmarín iniak-tuiniawai.

<sup>21</sup> Wátsek, ¿warí enentáimprum? Átum tuke núnisan enentáimkiurminkia wi winin asutiátniuitjarme. Tura péñker enentáimkiurminkia, aneakun shiir chichasminiaitjarme. ¿Atumsha túa wakerarum?

## 5

### *Tsanirmamu ti tunaiti*

<sup>1</sup> Atumíin shuar ti tunáa tura awai. Ju yamá ashí nekanaiti. Nu shuar ni aparí nuwé achikiuiti. Timia tunaaka nu tsanirmamu Yus-shuarchanumsha atsawai.

<sup>2</sup> ¿Nu tunaajajisha tuke nankaamantu enentáimprumek? Antsu úttiniaitrum. Nu shuar tunáa túraka atumíiníja akankatniuiti.

<sup>3</sup> Ayashur pujachkuisha wi nuí pujáa áintsan nuna tunaarín paant nekaam-jai, tura asutiátniuiti tajai.

<sup>4</sup> Tuma asamtai átum káunkakrumin ii Uuntrí Jesukrístu kakarmaríjjai tura wi nuí pujáa áintsanak, ii Uuntrí Jesukrístu kakarmaríjjai

<sup>5</sup> nu shuar uunt iwianchnum surunkatniuiti ni ayashi wakeramurí amukati tusa. Nujai ni wakaní uwemprattawai ii Uuntrí Jesukrístu támatai.

<sup>6</sup> “Íikia péñkeraitji” tárugna nu ántrai, tunáa atumíin tuke akui. Iis, “Karía ishichik yuminnium enketam mash karimtiktsuk” tiniu áiniawai. Núnis átatui ju tunaajai.

<sup>7</sup> Tuma asamtai nu karía ukartarum yajauch awajturmasajj tusarum. Núnisrum ju tunaanumiá kanakrum péñker átatrume. Yaunchu enentái karía núnis amukatniuiti. Ashí yamarmak yuminia áintsan ajasuitrume. Tanta wakapruachusha enentáimpratai. Israer-shuar paskua nampernum aya wakapruachu tantan yuu áiniawai. Atumí tunaarí atsakui atumsha nu námper-tantaa áintsar péñker ajasuitrume. Paskua nampertincha Israer-shuar murikiun main áiniawai. Núnisan Kρίstu jaka ii murikrúje áinis ajasuiti.

<sup>8</sup> Tuma asamtai iisha paskua námper nájanku pujakur tuke núnisa shiir wekasatniuitji. Tuma asamtai ashí yajauch tunaasha írunga nuka karía yaunchu nawamua áintsankete. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsankete.

<sup>9</sup> Nuik papin áatramajrumna nuĭ “Tsanirma shuarjainkia íschatniuitrume” tımiajrume.

<sup>10</sup> Ju nunĕanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin áiniatsuk. Nú shuarjainkia penĕ íschatniuitkiurmeka ju nunĕanmaya ĵiinkintrume. Núnaka tátsujai.

<sup>11</sup> Antsu wi tájana nu ĵúiti, Shuar “Yus-shuaraitjai” tákuńka tura tunáa túrniaitkuńkia niĵijai íschatniuitrume. Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuńkia íschatniuitrume. Penĕ niĵijai yurumáshtiniaitrume.

<sup>12-13</sup> Yus-shuarcha tunaarĭ pachischatniuitjai. Yus núnaka ístatui. Átumka antsu atumĵin Yus-shuar ainia nuna tunaarĭ ístiniaitrume. Tuma asamtai nu shuar tunaarintin atumĵiya akankatarum.

## 6

*Yus-shuar nuámtak itiurchat awajnaisarka Yus-shuarchajai nuna iwiarashtin áiniawai*

<sup>1</sup> Yus-shuarka chíkich Yus-shuarjai itiurchat pujakka kapitánjai chichas iwiarashtiniaiti Yus-shuarcha asamtai. Antsu Yus-shuar írúnna nujai iwiarati.

<sup>2</sup> Enentáimpratarum. Amuukatin tsawantai Yus-shuarka ashí ju nunĕanmaya shuara tunaarĭ mash nekaawartatui. Tura ashí tunáa nekaatniuitkiurmeka itiur yúpchuchia nu nekaashtatrum.

<sup>3</sup> Nu arantcha Yusa suntarĭ túramurĵisha nekaattaji penĕkerashit tusarĭ. Nayaimpiniam túrawarma nekaatniuitkiurkia itiura ju nunĕanmaya nu tuĵinkiatĵai.

<sup>4</sup> Pai, itiurchat ákuńkia Yus-shuar penĕ tujintiainiana nujai iwiaratarum antsu.

<sup>5</sup> Natsaruk tusan nuna tájarne. Warí, ĵatumĵini chikichkisha atsawak ni yachĭ itiurchatrĭ penĕker iwiaramnia?

<sup>6</sup> ĵUrukamtai Yus-shuar ni yachĵijai itiurchat pujakka Yus-shuarchanum wea iwiaratniun?

<sup>7</sup> Atumĵi itiurchatrĭ kapitaniunium ĵukirmeka nujainkia átum tujinkiamu páantaiti. Natsantchakait. Itiurchat ana nusha ĵurukamtai antsu katsuntram asakáatsum? Kasamkamusha ĵurukamtai katsuntram asakáatsum?

<sup>8</sup> Antsu átumka nuámtak yachĵijai itiurchat awajnáiyarme tura kasárnáiyarme.

<sup>9</sup> Tunáa túrinkia Yus akupeamunam pachiinkiachmin ainia nu nékatsrumek. Ananĵawairap. Ashí tsanirma nusha, ántar-yusan tikishmatniusha, nuamtak áishmanĵai tsanirmasha,

<sup>10</sup> kasasha, ashí kuítian ikiauwincha, nampencha, tsanumniusha, yajauch chichainia nusha, chíkich shuara ananĵawar atantin ainia nusha Yus akupeamunna nuĭ penĕ wayashtin áiniawai.

<sup>11</sup> Atumĵiyasha chíkich chíkich nuna túrin armai. Tura yamaikia ii Uuntrĭ Jesusa kakarmarĵijajisha tura ii Yusrĭ Wakanĭ kakarmarĵijai atumi enentái shiir ajasuiti, atumsha Yusna ajasurme, tura tuke penĕker ajasurme.

*Ii ayashĭ yajauch áchatniuiti*

<sup>12</sup> “Ashí túramniaitjai” tiniu áiniawai tura nekasaiti. Tuma aĵin mash yáńkiashtatui penĕker wekasatniun. Nekas ashí túramniaitjai tura náńkamas túratniujai nupetnakchattajai.

<sup>13</sup> Junasha tiniu áiniawai: “Apatuk wakejainchu tura wake apatkujainchu mai ántrai.” Apatkujai wakesha nekas mai metek enentáimpratin áiniawai tura Yus mai metek amuktatui. Núnisan ii ayashí ii Uuntrí Kristunuuti tura Kristu ii ayashi nérenniuiti. Tuma asamtai ii ayashíjjai tsanirmashtiniaiti.

<sup>14</sup> Tura Yus ii Uuntrí Jesusan iniantkimia núnisan ii ayashíncha nu kakar-maríjjai iniantkittiawai.

<sup>15</sup> Ashí ii ayashíin Kristu ayashímkiaiti. ¿Nu átumka nékatsrumek? Winia ayashrusha Kristu ayashíya asamtai ¿itiurak nuna tsaniri ayashín najanataj? Penké túrachminiaitjai.

<sup>16</sup> Kame ¿jusha nékatsrumek? Áishman tsaniríjjai tsanínkiar chikichik ayashtinia áinis ajainiawai. Núnisan Yus-Papinium áarmaiti: Mai chikichik ayashtinia áinis ajasartatui.

<sup>17</sup> Tura shuar ii Uuntrí Kristujai tsanínkia mai chikichík wakantin ajainiawai.

<sup>18</sup> Tuma asamtai tsanirmatniunmaya yajáyan wainkiarum tsékentiarum. Chikich tunáa írunna nu ii ayashínkia ti yajauch awajeatsui. Túrasha shuar tsanirmakka ní ayashiniak yajauch awajeawai.

<sup>19</sup> Yusa Wakaní ame enentáimin pujurtamu asamtai, ame ayashim ni jeente. Nu Wakanínkia Yus amasuíti. ¿Nuka nékatsrumek? Tuma asamtai ame ayashmi nérenchaitme.

<sup>20</sup> Kristu numpejai sumakma asamtai, ayashmisha wakanmisha Yusna áiniawai. Yusna asamtai ayashmíjjai péñker túratniuitme, Yus shiir awájnásti tusam.

## 7

### *Nuatkatniusha péñkeraiti, nuatkashtincha péñkeraiti*

<sup>1</sup> Ayu. Átum áatrurmarmena nuna yamaika ujaktajrume. Shuar nuat-teachkusha péñkeraiti.

<sup>2</sup> Tura ti tsanirmatniun enentáimtuinia ásar ashí áishman ní nuwenak nuat-kati tura ashí nuwa ní áishrinín iniumkati.

<sup>3</sup> Áishmansha ni áishri asa nuwen túratniua nuna umiktiniaiti. Núnisan nuwasha ni nuwe asa ni áishrin túratniua nuna umiktiniaiti.

<sup>4</sup> Núwaka niní ni ayashí nérenniuchuiti, antsu ni áishriuiuti. Núnisan áishmansha niní ni ayashí nérenniuchuiti, antsu ni nuwénuiti.

<sup>5</sup> Ni ayashí suritnaikiashtin áiniawai. Tura mai itit awajnaitsuk Yus áujsatin wakeruiniak ishichik tsawant kanakmin áiniawai. Tura nuínkia atak tsanín pujustin áiniawai. Túracharmataínkia uunt iwianch, Satanás, túnaanum iniar-tin útsutkattawai katsuntratniun tujintiaku.

<sup>6</sup> Ayu. Tura nuna áarayatan nújainkia “ashí shuar páchitsuk nuatkatniuiti” tátsujai. Nuatkatniuitkiuumka péñkeraiti.

<sup>7</sup> Túramtai “ashí wíjjai métek nuatkachuitkiuiní maak ainti” tajai. Tura Yus ashí shuaran imiá métek najanachuiti. Chikichan nuatkatniun súsaiti, tura chikichan yúpichuch katsuntratniun súsaiti.

<sup>8</sup> Natsancha wajencha júna tájai, “Wíjjai métek nuattsuk pujusrumka péñkeraiti.”

<sup>9</sup> Tura katsuntratniun tujinkiarka nuatkarti. Ti katsuntrachmin neka-peakum nuatkatniun péñkeraiti.

<sup>10</sup> Nuatnaikiarun antsu tájai, “Nuwa nuatkamuka ni áishrin ikiukchat-niuiti” tajai. Núnaka ii Uuntrí Kristu akupkaiti aya winia chichampruchuiti.

11 Túramtai ni áishriñ ikiukkia niñki atak nuatnatsuk pujustí tura tsanin pujustinian wakerakka ataksha ni áishriñ waketkiti. Núnisan áishmansha ni nuwen ajapashiniati.

12 Chíkich shuaran juna tájai wikia, ii Uuntri Kristu juna akupkachuiti. Yus-shuara nuwenka Yus-shuarchaitkiunka tura ni áishriñai pujustinian wakerakka péñkeraiti; ajapashiniati, tájai.

13 Núnisan Yus-shuara aishri Yus-shuarchaitkiunka tura ni nuwejai pujustinian wakerakka péñkeraiti; ikiukchatniuiti.

14 Nu nuwaka “Yus-shuarchajai tsanin pujakun Yusjai yajauch ajastatjai” tu enentáimprashtiniati. Antsu nii Yus-shuar asamtai ni aishriñ niñjai pujá asa péñker ajasminiati Yusjai. Núnisan núwaka Yus-shuarchaitiat ni aishri Yus-shuaraitkiunka niñjai tsanin pujá asa péñker ajasminiati Yusjai. Núnisan ni uchirísha péñker ajasmin ániawai Yusjai. Núnischaitkiunkia ni uchirí Yus-shuarcha uchiría áintsar ainti.

15 Tura áishmansha nuwasha Yus-shuarcha ana nu kanaktinian wakerakka túrati. Yus-shuar nujai ankantaiti. Núnisan asati. Tuke máaniaktinian Yus nakitramaji.

16 ¿Núwaka ni aishri Yus-shuar ajastatna nuna nekas nékawak. Tura áishmansha ni nuwe Yus-shuar ajastatna nuna nekas nékawak? Yus-shuarcha nuka wétinia wakerakka weti.

17 Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiati. Núnaka ashí Yus-shuarnum akupeajai.

18 Iis, Yus-shuar ajasuka Israer-shuaraitkiunka tuke Israer-shuar atí. Tura Israer-shuarchaitkiunka Israer-shuar ajastin enentáimprashtiniati.

19 Israer-shuaraitkiunsha tura Israer-shuarchaitkiunsha nuka enentáimtuschatniuiti. Aya Yus tana nu umirkatin nekas enentáimtustiniati.

20 Yus-shuar ajasuka nuik pujumia áintsan pujusminiati.

21 Chíkich shuara takarniurí asam ti iturchat pujakmesha iturchat enentáimpráip. Tura ankant jíinkimniaitkiunka jíinkitiaí.

22 Ankantchaitkiunka ankantaitkiunsha ju enentáimpratá. Takarniuka Yus-shuar ajas tuke chíkich shuara takarniurínkiusha shiir enentáimpratniuiti Kristu nin tunaanumiá ankant awajsamtai. Tura shuar takarniuchua nu, Yus-shuar ajas Kristu takarin ajasuiti.

23 Ti wáitsamiayi Kristu in ankant awajtamsatniun. Ni numpejai sumakma asarum shuar emetamu áirap.

24 Tuma asamtai shuar Yus-shuar ajas nuik pujumia áintsan yamaisha pujustí tura Yusñ enentáimtus wekasati.

25 Nuwá natsa túratniua nuna yamaikia áujmatjai. Kristu juna akupkachmai tura Kristu anenkratmarí ti nekapasa asamtai wi tájana nu antukminiati.

26 Tuma asamtai juna tájai. Ti iturchatnum pujá asakrin shuar aya júnisan nuattsuk pujustin péñkeraiti.

27 Nuatkaitkiunka núwem ikiukip. Nátsaitkiunka nuwá eakaip.

28 Tura nuatkunka tunáa túratsme. Nuwasha iniurtukka niisha tunáa túrachuiti. Túrasa nuatnaikiaru iturchatan ti wáinkiertatui ju nunkanam. Nú iturchatnumiá wi uwemtikraintjai.

29 Yatsuru, juna tájarne. Ishichik tsawant taasai. Juyanka nuatkaru ainia nuka aya ni nuarín enentáimprashtiniati antsu Yúsna enentáimtustiniati.

30 Núnisan tuke Yúsnan enentáimsar úutainia nusha uutcha áintsar pujustin ániawai. Warainia nusha warascharua áintsar pujustin ániawai. Súmainia



nusha sumakcharua áintsar pujustin áiniawai. Ju nun<sub>kan</sub>mayajain<sub>ka</sub> itit awajmamsashtiniaitji.

<sup>31</sup> Núnisan aya jú nun<sub>kan</sub>nam pé<sub>n</sub>ker pujustin ti takaschatniuiti. Ashí jú nun<sub>kan</sub>mayan<sub>ka</sub> amuukatniuiti.

<sup>32</sup> Jú nun<sub>kan</sub>mayajain<sub>in</sub> itit ajaschak tusan wakerajrume. Nátsaka Yúsnan enentáimtawai ni wakera nuna umiktinian.

<sup>33</sup> Túrasha nuatkaka ju nun<sub>kan</sub>man enentáimtawai ni nuar<sub>in</sub> shiir enentáimtiksa.

<sup>34</sup> Núnisan nuwá nátsasha nuatkamusha niisháa enentáimiainiawai. Nuwá natsa Yúsnan enentáimtawai ni ayashísha ni wakanísha tuke Yús<sub>ja</sub>i shiir atí tusa. Tura nuátkamuka ju nun<sub>kan</sub>mayan enentáimtawai ni áishr<sub>in</sub> shiir enentáimtiksa.

<sup>35</sup> Atumin yáintajtsan juna tájarne. Itiurchat awajsattsan wakeratsjai antsu shiir wekaakrum itit awajtsuk Yus shiir enentáimtustarum tusan wakerajai.

<sup>36</sup> Tura shuar ni nawantr<sub>i</sub> natsan nuatnaikiati tá<sub>ku</sub>nka pé<sub>n</sub>keraiti. Nawantr<sub>in</sub> natsa tuke apujtsatniun nakitiakka surukminiati. Nusha tunaachui<sub>ti</sub>.

<sup>37</sup> Tura chíkichka tuke natsan apujtsataj tá<sub>ku</sub>nka nekas pé<sub>n</sub>keraiti. Apujtsatin itiurchatchaitkiuin<sub>ka</sub> tura ni nawantr<sub>i</sub> nuatnakchatniuitkiuin<sub>ka</sub> apujtsatniuiti. Apujsan<sub>ka</sub> nekas pé<sub>n</sub>ker túraiti.

<sup>38</sup> Tuma asantai nuatmantikia<sub>nka</sub> pé<sub>n</sub>ker túrayi tura apujsan<sub>ka</sub> nu nan<sub>ka</sub>amas pé<sub>n</sub>ker túrayi.

<sup>39</sup> Nuwá aishr<sub>i</sub> iwiaaku pujakuin<sub>ka</sub> tuke niij<sub>ai</sub> tsanin pujustiniaiti. Tura ni aishr<sub>i</sub> jakantai an<sub>ka</sub>nt ajas ni wakera nuj<sub>ai</sub> Yus-shuaran iis nuatnaiki-amniaiti,

<sup>40</sup> tura tuke nuatnatskesha nu nan<sub>ka</sub>amas nekas shiir pujustatui. Tú enentáimjai wikia tura Yusa Wakanísha métek tátsuash.

## 8

### *Yurumkasha namansha ántar-yusnum susamu*

<sup>1</sup> Ayu. Yamaikia yurumkasha namansha ántar-yusnum susamun áujmatsattajai. Juj<sub>ai</sub> túratniua nuka mash nékaji. Tura shuar “ti nékaitjai” enentáimkiun<sub>ka</sub> nuj<sub>ai</sub>n<sub>ka</sub> “neka asan nan<sub>ka</sub>amantuitjai” tu enentáimiui. Antsu shuar chíkich shuaran aneakka nin pé<sub>n</sub>ker atí tusa yayawai.

<sup>2</sup> Shuar “ti nékaitjai” tá<sub>ku</sub>nka nekas nekaatniua núnaka unuimiarchaiti.

<sup>3</sup> Tura Yúsán aneana núnaka Yus pé<sub>n</sub>ker nékawai.

<sup>4</sup> Wátsek. Ántar-yus susamu yúatin junis enentáimpratniuiti. Yuska aya chíkichkiiti. Tura chíkich Yus atsakui,

<sup>5</sup> aentsu yusr<sub>i</sub> nayaimpinmasha nun<sub>ka</sub>kasha írunna nuka pen<sub>ké</sub> ántar áiniawai. Kame aentsu yús<sub>r</sub>isha tura úuntr<sub>isha</sub> ti írunui.

<sup>6</sup> Tura iikia nékaji, aya chíkichik Yus awai, nusha ii Aparínti. Ashí írunna nuna najanaiti tura ni wakera nuna umikiat tusa najatmamji in. Ii Úuntr<sub>isha</sub> chíkichkiiti, Jesukristu. Niij<sub>ai</sub>n<sub>ka</sub> ashí najanamuiti. Tura iisha ni kakarmarj<sub>ai</sub> iwiaaku pujaji.

<sup>7</sup> Tuma asantai ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiurchat enentáimprar “enentáiru<sub>j</sub> yajauch ajasjai” tiar<sub>atui</sub>.

<sup>8</sup> Watsek, yuamujai Yus in shiir enentáimtikrampratniun jeatsui. Yuarkia nujai penker áchattaji tura yúachrikiya yajauch áchattaji.

<sup>9</sup> Ankantaitme yúatin wakerakmeka. Tura anearta. Ame yúakmin chíkich shuar itiurchat enentáimna nusha ámin wáitmak yúanka ni enentáin tunáa ajastatui.

<sup>10</sup> Ístá. Ámeka neka asam ántar-yusa jeen wayam tura nuj yúakminkia ame yatsum nuj wáitmakchanpiash. Tura niisha itiurchat enentáimiat ántar-yus susamun yúashtimpiash.

<sup>11</sup> Nujainkia ame nékamujai ame yatsum Kristu jaka uwentikramia nu yajauch ajastatui.

<sup>12</sup> Túramtai ame yatsum itiurchat enentáimna nu yajauch awajeakum Kristunmasha tunáa túraitme.

<sup>13</sup> Nu asamtai winia yatsurun wi yúajna nujai yajauch awajeaknaka namannaka penké yuashtatjai nii tunáa ajasain tusan.

## 9

### *Kristu akatramu túramnia nu*

<sup>1</sup> Ashí Kristu akatramurj túratniua nuna wisha túramniaitjai ni akatramurj asan. Iis, wisha ii Uuntrj Jesusan wáinkiaitjai tura wisha Jesukristu takatrin takaaajai. Winia takatrujain átumka Yus-shuar ajasuitrume.

<sup>2</sup> Chíkich shuar “Kristu akatramurinchuítí” túrutainiakuisha átumka winia takatrujai Yus-shuar ajasu asakramin nujai wi nekas Kristu akatramurintiaj nu paant nekaamniaiti. Tura tu enentáimtusatniuitrume.

<sup>3</sup> Ashí shuar “Kristu akatramurinchuítí” túrutainia nuna juna tájai.

<sup>4</sup> Wisha Yus-Chichaman etserkataj tusan shuárnum irakun ashí ajamprunia nuna yuamniaitjai tura umarminiaitjai.

<sup>5</sup> Tura Pítrusha, Jesusa yachisha, tura chíkich akatramusha irainiak ni nuwen Yus-shuar ainia nuna jukimnia ániawai. Wisha núnisnak túramniaitjai.

<sup>6</sup> Chíkich akatramuka kuit susamujai Yus-Chichaman etserainiawai. Wisha Pirnapísha núnisrik túramniaitji. Kame ¿aya íchikik takastiniaitiaj?

<sup>7</sup> Suntarka ¿ní kuítrijaiimpiash takaa? ¿Tsanimpian aráa nu nuna neren yúatsuk. Wáakan wainiua nusha muntsurin úmatsuk? Núnisan Yus-Chichaman étsera nusha nú takasmanumia yurumámniaiti.

<sup>8</sup> Aya aents enentáimmian chichaatsjai. Muisais akupkamunmasha métek tawai.

<sup>9</sup> Muisais akupkamunam áarmaiti:

“Turu takaak jinikiaia saepen pakartaj tusa nájakui ni nuji jinkiatáshtiniaiti.

Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujai.

<sup>10</sup> Antsu in jujai nekaawarat tusa tímiayi. Jinkiain araana nusha tura júukmatai saepen pakaana nusha nuna jinkiain mai yurumátin ániawai. Paant atí tusa Yus nuna áarmiayi.

<sup>11</sup> Tuma asamtai Yus-Chicham atumjin etserkakrin nuyá átum takakrumna nujai in ajamsatniuitrume. ¿Nusha itiurchatkait?

<sup>12</sup> Chíkich akatramu atumjin irutainiak ajamsamun yuamniaitkuinkia iikia nekas túramniaitji ii etserkamujai Yus-shuar ajasakrumin.

Tura wikia antsu túrachuitjai. Atsumaknasha ashí itiurchat ana nuna kat-suntramjai Kristu shiir chichamen étserkui shuar itiurchat enentáimturain tusan.

<sup>13</sup> Ashí shuar ni yúsriñiuni tuke pujurin ainia nu, ni yusri jeen írúnna nuyān yurumáiniawai. Tura yus-sutai namanken maawar nuyá yurumáiniawai.

<sup>14</sup> Núnisan Yus-Chichaman etserniua nuka Yúsnan takasu asamtai penker ajamsatniuiti. Nuna Kristu akupkamiayi.

<sup>15</sup> Tura wisha ajamsamun yuamniaitiatan tuke winia kuítrujai yurumámjai. Tura yamaisha surúsúk tusan áattsujrume. Antsu nuna túrutsuk jakánka maak áintjai.

<sup>16</sup> Uwempratin chichaman wi étserkun aya nújain “ti penkeraitjai” enentáimtumatsjai. Kame Yus nuna túratniun surusuncha ititurkatjak. Nuna túrachkunka ti ititurchat pujusaintjai.

<sup>17</sup> Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai.

<sup>18</sup> Tura jujai antsu nekas warasminiaitjai: Wi túramnian iniaisan chikichnan takatsuk aya winia kuítrujain uwempratin chichaman étserjai. Nujai waraakun akikma áintsankete.

<sup>19</sup> Chíkich shuara takarniuchuitiatan ashí shuara takarniurjya áintsanketjai Kristu shuari untsurí ajasarat tusan.

<sup>20</sup> Israer-shuarjai pujakun niisha Yus-shuar ajasarti tusan Israer-shuara áintsan ajai. Kame Muisaisa akupkamurí umirkatin ániakui wisha aun umirkashiniaitiatnak umirniuitjai.

<sup>21</sup> Tura Israer-shuarchasha Yus-shuar ajasarti tusan, nu shuar Muisaisa akupkamurin umirkashin ániakui, wisha nuna umirkashinia áintsan ajai. Tura Kristu akupeana nuna umirkatin asan nekas Yus akupkamun umirniuitjai.

<sup>22</sup> Yusjai katsuarchasha ti penker Yus-shuar ajasarti tusan wisha katsuarcha áintsan ajai. Chíkich chíkich shuarjai métek ajajai ishichkisha Yus-shuar ajasarti tusan.

<sup>23</sup> Ashí wi túraj núnaka uwempratin chicham tuke shiir atí tusan túrajai. Tura nu chichamjai wisha atsumtsuk shiir wekaajai.

<sup>24</sup> Shuar nekapnaisatniusha untsurí tsékeñtin átsuk tura aya chikichik awakmatsuk. Nínki, awakmakun súsatniua nú shiirmachin achiktatui. Núnisrum kakarum ajasrum awakmak shiirmachin achiktinia áintsarum Yusna takastarum.

<sup>25</sup> Shuar nakurak nekapnaisatin ainia nuka nupetmaktaj tákunka ashí itit awajea nuna ikiuniawai. Iisha núnisrik nu enentáijjai Yusna nu takastini-aitji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjinia nú tawasap tuke amuukashatui.

<sup>26</sup> Wikia aya nánkamsan tsékeatsjai. Nasejai maania áintsan máaniatsjai.

<sup>27</sup> Antsu winia ayashrun awatinia áitkiansnak umimtkiajai. Túrachkunka chikichan unuiniariatan winiasha awakmakun súsatniua nú shiirmachin Yus surustinian nakitruirainti.

## 10

### *Ántar-Yus tikishmatrashtiniaiti*

<sup>1</sup> Enentáimpratarum, yatsuru. Yus yaunchu ii úuntrin ashí métek yáinmiayi. Nusháa yurañmijjai jintian nekapruamiayi. Tura ashí ii uuntrj nu yurañmin apapekar wearmiayi. Ashí núnisar Kapaaku Nayaantsan Yus akankamunam wekasar katitkiarmiayi.

<sup>2</sup> Tura Muisaisan umirkar yurañminiam tura nayaantsanam ashí imi-aimiu áintsan ajasarmiayi.

<sup>3</sup> Núnisan ashí mash Yusnumia yurumkan yuawarmiayi.

<sup>4</sup> Entsancha ashí mash Yus susamunak umararmiayi. Kame Yus kayan-maya entsan akupkamtai ashí umararmiayi. Kristusha, nú kaya áintsan, niijjai tuke weakui ni wakaní atsumamurín Kristunmayan takusarmiayi.

<sup>5</sup> Tuma ajñ Yus ti yáñmaitiat ni wakeramun umikharmiayi. Tura ásar ni nunkeen jeatsuk atsamu nunkanam ti untsurí jákarmiayi.

<sup>6</sup> Iisha nujai unuimiartiniatiji. Iikia ni wakeriarmia áintsar<sup>i</sup> yajauchia nu wakerukchatniuitji.

<sup>7</sup> Nu asamtai ántar-yus ni túrawarmia áintsarum tikishmatrairap. Iis, jiru yusrí shiir awajenakuí Yus-Papinium áarmaiti,

“Nu shuar yurumáwar nampekar námper ti najanawarmiayi.” Tu áarmaiti.

<sup>8</sup> Nii túrawarmia núnisrik iikia tsanirmashtiniatiji. Nuna túrawar paintitres mir (23.000) chikichik tsawantaj jákarmiayi.

<sup>9</sup> Iisha tunáa túrar “Yus asutiuáshtatui” tu enentáimprashtiniatiji. Niisha nuna túrawar napijjai esaim untsurí jákarmiayi.

<sup>10</sup> Yussha yajauch áujmatsashtiniati. Nuna túrawarmatai Yus ni suntarín akupak untsurín maawarmiayi.

<sup>11</sup> Yaunchu ii úuntriijjai túrunamu in amúamu tsawantnum pujajnia nuna jintinramat tusa áarmaiti.

<sup>12</sup> Tuma asamtai shuar “Tunaanum iniaarchattajai” tákunka anearti. Anearchamka iniaarminiaitme.

<sup>13</sup> Tura ame itiurchatrumka aya amek nekapeatsme. Chíkich shuarsha nu itiurchatjai métek nekapsatin áiniawai. Jusha ti enentáimpramniaiti. Ame katsuntratín tujintiamna nuna nankaamas itiurchatan Yuska péñker asa tsankatramatsui. Antsu itiurchat tarutrammatai, nu itiurchatnum pujamin Yuska uwempratniun jintinramattawai. Nújainkia katsuntrattame.

<sup>14</sup> Nu asamtai aneamu yatsuru penke ishichkisha ántar-yus enentaimtu-sairap.

<sup>15</sup> Atumsha nékatsrumek. Wi tájana nu nekaschakait.

<sup>16</sup> Kristu jakamu enentáimtustin námper najanar Yus áujeaji Kristu numpen nakumea nu shiir atí tusar. Tura métek umarar nujai Kristu numpé métek enentáimtaji taji. Tura apatkusha púurar<sup>i</sup> tura métek yuar<sup>i</sup> nujai Kristu ayashí in jarutramkamu métek enentáimtaji taji.

<sup>17</sup> Apatkusha chikichkiitiat púuram untsurí ajatsuk. Iisha núnisrik untsuríitiatar nu apatuk métek yuar<sup>i</sup> métek enentáimprar chikichik ayashtinia áintsar aji.

<sup>18</sup> Israer-shuartisha enentáimpratai. Yus-sutai namanken yuinia nu, métek yuawar Yusan métek enentáimtuiniatsuk.

<sup>19-20</sup> Núnisan Yus-shuarcha ántar-yus sutai namanken suiniak nekas-Yusan suiniatsui antsu yajauch wakanin suiniawai. Kame ántar-yus ániak penké ántar ániawai, iwiaakuchu ániawai. Nu namansha sutai namanketiat péñker namanquete, yajauchichuiti. Aya junak tajai. Yus-shuarcha ántar-yus sutai namanken suiniakui amesha niijjai métek yuamka yajauch wakanniasha niijjai métek enentáimtaji tame. Nu antsu yajauchiiti.

<sup>21</sup> Kristu numpen nakumea nu úmakrum íwianch susamua nuka umarchat-niuitrume. Kristu ayashín nakumea nu yúakrumka íwianch susamua nuka yúashtiniaitrume.

22 ¿Warí, Yus akajkatin wakeramek. Iisha nin nupetkamniashitiaj?

*Aya aneakur takastiniaitji*

23 “Ashí túramniaitjai” tiniu ániawai. Ayu, tura mash yáintkiashtatui péñker wekasatniun. Nekas ashí túramniaitjai tura mash yáintkiashtatui wakaniur kakaram ajastin.

24 Nú arantcha chíkich yáintincha enentáimpratniuitji. Aya íniuk pachischatniuitji.

25 Naman súnakum inintrutsuk sumakta. Tura ántar-yusan susamusha jajauchichuashit enentáimtsuk páchitsuk yuata.

26 Ashí ju nuñkasha tura ashí írúnna nusha Yúsnachuk ainia. Tuma asamtai péñker ániawai.

27 Yus-shuarchasha yurumkan ajampramkuisha ashí mash jajauchichuashit tu enentáimtsuk páchitsuk yuamniaitme.

28 Tura chíkich chichaak “Juka ántar-yus susamu namañkete” túramkuñkia nuikia yuawaip. Yúakminkia nu shuar itirchat enentáimprattawai.

29 Ame páchitsuk yuamniaitkiumnisha nii antsu yúachmin asa itirchat enentáimprattawai.

Tura amesha tíchatameash “¿Urukamtia nii tujintiakui wi yúachminiaitaj.

30 Wi Yúsan yumiñsan yúakuisha urukamtia itirchat enentáimturainia. Yus yumiñsachmakait?” tíchatameash.

31 Ayu, yúakmesha úmakmesha ashí túramna nusha ashí shuar Yúsan shiir enentáimtusarti tusam túratá.

32 Tuma asamtai ii túramujai chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáintiniaitji.

33 Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

## 11

1 Kristu turamia áintsan takaaajai wisha. Atumsha núnisrum wi takaaajna áintsarum takastarum.

*Nuwa Yusa jeen túratin*

2 Yatsuru, átum winia tuke enentáimturarum wi tímiajrumna nu umirniuitrume. Tuma asakrumin shiir enentáimtajrume.

3 Nu arantcha ujaajrume. Yus Apa Krístun akupea áintsan Kristu ashí áishmañkan akupeawai. Núnisan áishmañsha ni nuwen akupeawai.

4-5 Íjijaiñkia shuar Yus áujenak tura núnisan Yus-Chichaman étsereinak áishmañ etsenkrukchatniuiti antsu nuwa múuknum nukumaktiniaitai. Tuma asamtai áishmañ nuj etsenkrakka natsantaiti. Tura nuwa múuknum nukumakchañka natsantaiti. Intiashin tsupimiarua áintsanñkete.

6 Nuwa múuknum nukumaktinian nakitiakka intiashin tsupirtí nuikia. Watsek, nuwa ni intiashin tsupirtinian nakitiakka, tura awampratniun natsamakka múuknum nukumakti nuikia.

7 Áishmañka Yúsan nakumeawai. Yusna shiir ana nuna nakúmkráttsa Yus áishmañkan najanamiayi. Tuma asamtai áishmañka etsenkrukchatniuiti. Antsu nuwanñka áishmañna shiir ana nuna nakúmkráttsa Yus najanamiayi.

8 Iis, Yus áentsun najaneak nuwanmayan áishmañkan najanachmiayi antsu áishmañka ukunchíjjai nuwan najanamiayi.

9 Nuwan yáinkiát tusa áishman kan najanachmiayi antsu áishman kan yáinkiát tusa nuwan najanamiayi.

10 Tuma asamtai núwaka múuknum nukumaktiniaiti, nayaimpinmaya aencha ísarti tusa.

11 Ayu, tura áishman nuwajainchu atsuinti tura nuwasha núnisan áishmanjainchu atsuinti. Yus ju nun kan núnisan ati tusa najanaíti.

12 Iis, Yus nuwan áishmannumia najanamiayi tura áishman sha nuwanmaya akiiniaiti. Tura Yus mai najanaíti.

13 Enentáimpratarum atumsha. Nuwa múuknum nukumatsuk Yus áujsatin çpénkerkait?

14 Ii shuartinkia áishman intiash ajakin natsantchakait.

15 Antsu núwaka intiash ajakin péñkerchakait. Múuknum nukumaktinian susamuiti.

16 Watsek, shuar tuke umiktinian nakitiakka ju na nekaati, iisha tura ashí Yus-shuartisha aya tu enentáimji.

### *Kristu jakamu enentáimtustin nampernum yajauch túramu*

17 Yamái áarattajrumna nujain shiir enentáimtatsjarne. Atum irunkuram yáiniaiktiniaitrume tuke péñker wekasatin. Átum antsu iruntrarum yajauch awajnaiyarme.

18 Wats, Yusa Jeen irunkuram atumshaa enentáimprarum kanakurme. Kame tu ujatkarmai. Nekaschashit.

19 Tuke tupartatrumek Yúsnan ti nekana nu shuar paant nekanat tusarnea. Antsu kajernaikiar kanaktin péñkerchaiti.

20 Kanakin asarum Kristu jakamu enentáimtustin nampernum atum iruntrarum yúarmena nu nekas Yúsnachuiti.

21 Iis, ashí ní yurumken itiaawai ai yurumáttsa tura chikichan nákatsuk niá niá wari yuattsa wakerawai. Chikichkia ishichik itiaana nu tsukamawai tura chikichcha nampekarai.

22 Yurumkan ishichik itiaana nu iniatsáarchamek. Atum áitkiarum núnisan Yusa jeen yurumáshiniaiti. Natsantaiti. Wari, chikich jea átsuk ai yurumátin. ¿Warimpait. Jujai shiirash áujsatjarum? Atsá. Jujai shiir áujsachminiaitjarne.

### *Kristu jakamu enentáimtustin námper*

23 Ii Uuntrj Kristu jintintruama núnaka ujakmajrume. Jútas tuke súratsain, nu kashi ii Uuntrj Jesus apatkun júki

24 Yusan yumínsamiayi. Nuyá puur tímiayi “Yuatarum. Jusha winia ayashruiti; atumín jarutramkatta núiti. Ju yúakrum Winia enentáimtursatarum” tímiayi.

25 Núnisan yurumá umik piniñnasha achik tímiayi “Ju piniñ Yamaram Chichamaiti. Tura winia numpar puármatai Yamaram Chicham nekas uminkiattawai tawai. Ju tuke úmakrum Winia enentáimtursatarum’ tímiayi.

26 Tuma asamtai ju apatuk yúakrum tura piniñsha úmakrum ii Uuntrj Kristu jakamurj enentáimtarme. Kristu táatsain ju tuke túratniuitrume.

### *Shiir enentáijijai Kristu jakamu enentáimtustin nampernum yuatniuiti*

27 Tuma asamtai shuar Yusan enentáimtutsuk ju apatkun yuawar tura ju piniñnumiáncha umarar Kristu ayashincha ni numpencha yajauch enentáimta asa tunáa túraiti.

28 Nu asamtai ashí shuar ju apatkun yútsuk tura ju piniñnumiáncha úmutsuk ni enentáin iwiaratniuiti Yusjai.

<sup>29</sup> Kristu ayashí jakamu enentáimtutsuk yúakka tura úmakka nuna tura asa asutniáttawai.

<sup>30</sup> Atumsha tura asarum jaarne tura pimpiruitrume. Chikichcha jákaru áiniawai.

<sup>31</sup> Ímia-iik ímiakrinkia Yus in asutiámachaintji.

<sup>32</sup> Tura ii enentáin Yus yajauchia nuna wáiniuk asutiámji. Túrachkuḅka ashí Yus-shuarchajai súmamtikramawaintji.

<sup>33</sup> Tuma asamtai, yatsuru, iruntrar yurumáttsa matsatkurmeke nákastarum métek yurumátin.

<sup>34</sup> Shuar tsukamakka ni jéeniink<sup>i</sup> yurumáti. Nújainkia yajauchijjai irunchakrumin Yus asutiámashatrumé. Ayu, chíkich áatrururmena núnaka wi ai jean iwiarattajai.

## 12

### *Yusa Wakaní ni shuarin susamu*

<sup>1</sup> Yusa Wakaní ashí ni shuarin súana nuna yamáí ujaktatjarne. Nekaatarum, yatsuru. Yus-shuar shiir takasarti tusa Yusa Wakaní juna súasaiti.

<sup>2</sup> Yaunchu átum Yus-shuar tuke ajatsuk chíkich shuarjai métek ántar-yus tikishmatramarme. Niisha ántar-yus ásar áujmatramsachmin ármiai.

<sup>3</sup> Tura jújain shuar Yusa Wakaní kakarmarjjiai chichaana nu nekaamni-aiti. Yusa Wakaníjjainkia shuar “Jesus yajauchiiti” tíchamniaiti. Núnisan aya Yusa Wakaníjjain “Jesus winia Úuntur asa akuptuktiniaiti” tíminiaiti.

<sup>4-5</sup> Yusa takatři íruntsuk. Tura Yusa Wakanínk<sup>i</sup> ashí nuna takastinian súasaiti. Tura shuar Yus-shuara Uuntrj chikichik ajn ashí Yusa takatrin métek takaatsui. Antsu chikichkin ashí nankaamas péḅker takaawai. Yusa Wakanísha nuna shiir takasat tusa súawai. Tura Nii wakera nuna Niḅki ni shuarin chikichik chikichik niisháa niisháa súawai.

<sup>6</sup> Yúskete ashí ni shuarin niisháa takamtikeana nu. Niḅki ashí ni shuari enentáin takaak takatnasha shiir takamtikeawai.

<sup>7</sup> Yusak túratin súam Yusa Wakaní kakarmari paant átatui nu takasmanum. Tura ashí shuar ní takatrijjai yáiniaiktin áiniawai.

<sup>8</sup> Júnaka Yus takamtikeawai. Nékana nu shuarnasha, unuimiarua nunasha Yúsnan ujaktinian súawai. Tura mai shuaran Yusa Wakaní kakarmarjjiai nuna túratniun súasaiti.

<sup>9</sup> Chikichnasha Yúsan áujenak Yúsan ti enentáimtusar nekas itiuurchat ana nuna iwiaratniun súawai. Nincha Yusa Wakaní kakarmarjjiai nuna takastinian súasaiti. Chikichnasha jaan tsuártinian súawai.

<sup>10</sup> Chikichnasha aents niḅki túrachminian túratniun súawai. Chikichnasha Yúsnan etserkatniun súawai. Chikichnasha shuar wari yajauch wakan-ia péḅker wakanniasa apatka nekaatniun súawai. Chikichnasha ni-isháa chichaman chichastinian súawai. Chikichnasha niisháa chichasman jintíatniun súawai.

<sup>11</sup> Tura ashí shuara enentáin nu Wakanik takaawai. Tura Nii wakera nuna ankant ankant súawai takastinian.

### *Ashí Yus-shuar Kristu ayashía áintsan ajainiawai*

<sup>12</sup> Iikia Kristu ayashía áintsar<sup>i</sup> ayashímkiaitji. Kristu ayashí muchitmarisha írunui. Niisha túmaitiat chikichik ayashíniaiti.

<sup>13</sup> Tura imianiakrin Yusa Wakaní chikichik awajtamsamji, Kristu ayashía áintsan. Israer-shuarsha, Israer-shuarchasha, ti itiuurchat takaana nusha,

aṅkant ainia nusha, ashí yamáí chikichik ajasuitji. Tura Yusa Wakaní pimiutkamuitji Niijjai tsaniṅkia pujakur.

<sup>14</sup> Ayashi muchitmarj aya chikichkichuiti.

<sup>15</sup> Tuma asamtai, winia nawer uwejruchuitat take winia ayashrunuiti.

<sup>16</sup> Winia kuishrusha jiruchuitat take winia ayashrunuiti.

<sup>17</sup> Wátsek winia ayashur aya jikikiṅkia žitiurak antukaintiaj? Winia ayashrusha aya kuishkitkiṅkia žwarjjaṅ nekapsaintiaj?

<sup>18</sup> Nu asamtai Yus winia ayashru muchitmarj ni wakeramunam ikiusuiti.

<sup>19</sup> Chikichik muchitmajaj žayash áminkiait?

<sup>20</sup> Antsu untsurj muchitma akuisha chikichik ayashkiiti. Iisha núnisrik chikich chikich iisháa takayatrik métek takasar Yus wakeramu takamtsuk umáji.

<sup>21</sup> Winia jiru pénger aṅ winia uwejrúncha wakerishtatjak. Winia muakarsha pénger aṅ winia nawernasha wakerishtatjak. Núnisaṅ Yusshuar shiir enentáimtumak ni yachin “atsumatsjame” tíchamniaiti.

<sup>22</sup> Antsu ii muchitmarj ishichik enentáimtajnia nu atsakuṅkia ti atsumawaintji.

<sup>23-24</sup> Chikich muchitmasha, íimiancha nu, shiir iwiarmamtaji. Tura nu muchitmaka shiir íisminia nujaj nankaamas pénger wainji. Iis, shiircha nu antsu pénger wainji. Yus ii ayashṅ núnisaṅ atí tusa najanamiayi.

<sup>25</sup> Nujajṅkia ayashí muchitmarj máanaitsuk métek yáiniainiawai.

<sup>26</sup> Chikichik muchitmaram najaimiakum ashí ayashnium wáitiatsmek. Núnisaṅ chikichik muchitmaram ayap ajakum ashí ayashnium shiir átsumek.

<sup>27</sup> Núniskete Kristu ayashjjaj ayashímkiaj<sup>i</sup> nu. Tura chikich chikich ni muchitmarj aji.

<sup>28</sup> Ayashnium muchitma írúnna áintsan Yus ni shuarṅ untsurj takatan súsaiti. Emka Yus akatramu, nuyá ni chichamen etserin, nuyá jintinkiarin, nuyá aents túrachminian túrin, nuyá tsuákratin, nuyá yáinkratin, nuyá akupin, nuyá niisháa chichamjaj chicharin, mash írúnui.

<sup>29</sup> Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túriniak ainia.

<sup>30</sup> Ashí tsuákratniuk ainia. Ashí niisháa chichamjaj chichamtiniak ainia. Ashí niisháa chichamjaj chichasman jintinkratniuk ainia? Atsá. Túmachuiti.

<sup>31</sup> Túmaitkuṅkia péngera nu takastin wakeruktarum. Tura imiá péngera nuna juj jintintiatjarne.

## 13

### *Aneatin*

<sup>1</sup> Ju nunṅanmaya aentsu chichamen untsurj chichayatnak tura nayaimpnimaya aentsu chichamencha chichayatnak anenkratchaknaka tampur meserua áintsanak aya ten-ten ajajai. Penké ántranak chichaajai.

<sup>2</sup> Yus-Chichamnasha ti shiir étseriatnak, túrasha ashí uukmancha tura ashí nekaamniancha nékayatnak, túrasha Yúsán ti enentáimtusan murá umuchiayatnak, anenkratchaknaka penké ántraitjai.

<sup>3</sup> Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusan surumayatnak tura anenkratchaknaka ántranak túraitjai.

<sup>4</sup> Anenkartaka wari kajeatsui, tsánkaiti, chikich shuaran shiir awajniuiti, péječach asa waantu enentáimtumsui.



<sup>5</sup> Aneṅkartaka natsanta nuna túrichuiti, níniunak enentáimchaiti, ka-  
jechuiti, páchichuiti.

<sup>6</sup> Chikicha tunaarjṅ wararchaiti antsu péṅker shuaran wararniuiti.

<sup>7</sup> Aneṅkartaka aya katsunteawai. Tsanú chichamnasha nakitiawai antsu  
aya péṅker ana nuna nákwai. Tunáa shuar shiir ajastí tusa tuke nákwai.

<sup>8</sup> Aneṅkrattaiṅkia tuke amuukashtiniaiti. Antsu ju nuṅka amuuk-  
mataisha Yus-Chicham etserkatín atsuttawai, tura niisháa chichamjai un-  
uimiatsuk chichastincha amuukattawai, tura ashí nekanamtai unuimiart-  
incha atsuttawai.

<sup>9</sup> Kame yamaikia aya ishichik nékaji. Yus-Chichamsha amutsuk étsereaji.

<sup>10</sup> Túra ukunam mash nekanamtai yámankamtaik nekaamuka ántar átatui.

<sup>11</sup> Yaunchu wi uchich asan uchichia áintsan enentáimkiun chichasmajai.  
Antsu yamaikia uunt ajasan uchiniun iniaisaitjai.

<sup>12</sup> Núnisrik yamá ju nuṅkanam Yus paant wáintsuji. Íspik kusurunam  
ímsatniua áintsanṅkete. Antsu ukunam mai métek paant wainniaikiattaji. Ya-  
maikia aya ishichik nékajai. Nuṅ antsu Yus winia nékara áintsanak nekaattajai.

<sup>13</sup> Watsek, menaintiu amuukashtin áiniawai. Ju áiniawai: Yus shiir  
enentáimtustin, shiir ana nu nákastin, tura aneṅkrattai. Ju menaintiunmasha  
aneṅkrattaiṅkia ashí naṅkaamakuiti.

## 14

### *Niisháa chicham unuimiatsuk chichastin*

<sup>1</sup> Nu asantai, aneṅkratin atarum. Tura núnisrumek Yúsnan péṅkera nu  
takastin wakeruktarum. Imiankaska Yus-Chicham etserkatín péṅkeraiti.

<sup>2</sup> Nújaiṅkia niisháa chichamjai unuimiatsuk chichastin péṅkerchaiti. Iis,  
nu shuar chíkích shuarjai chichatsuk aya Yusjai chichaawai. Ni chichame  
peṅké antukchamniaiti. Yusa Wakanjṅ nin chichastinian súawai túrasha tana  
nu nekaachminiaiti.

<sup>3</sup> Antsu Yus-Chichaman étserea nuka shuaran yayawai. Shuaran ikiat-  
suártasa, tura ikiakártasa, túrasha atsanṅkrattsa yayawai.

<sup>4</sup> Niisháa chichamjai unuimiatsuk chichaana nuka aya niṅki katsuartinian  
yáinmamui. Antsu Yus-Chichaman étserea nuka ashí Yus-shuaran ikiatsuawai.

<sup>5</sup> Atumsha ashí mash niisháa chichamjai chichastinian wakerajrume.  
Túrasha nuna naṅkaamas Yus-Chicham etserkatniun wakerajrume. Aya  
chichastinjaiṅkia ju imiá péṅkerchakait. Kame chichasma jintiákmeka maak.  
Nujai Yus-shuar shuarartatui.

<sup>6</sup> Enentaimpratarum, yatsuru. Nuṅ iraakun aya niisháa chichamjai  
chichaaknaka ¿itiura yáintatjarum? Antsu Yus winia jintintruamuncha tura  
wi nékajna nunasha étserkunka yáintatjarme. Yus-Chichamnasha tura ashí  
Yúsnnacha jintinkiuncha yáintatjarme.

<sup>7</sup> Peemsha tura tumaṅsha wi tájana áintsan áiniawai. Péṅker tuntuíyamuka  
paant nekaamniaiti. Tura péṅker tuntuíyachkuṅkia, nu tuntuíyamu nekaach-  
miniaiti.

<sup>8</sup> Suntarsha mesetnum wéenakuí ni kapitiántri ni wakeramun ujak-  
tinian kachun umpuawai. Paant umpuakuṅkia suntarsha ni wakeramun  
nekaawartatui. Tura paant umpuachkuṅkia suntarsha ¿itiurak mesetnum  
wétinian iwíarat?

<sup>9</sup> Atumjaiṅsha núniskete. Nekaachmin chichamjai chichaakminkia ¿támena  
nuna itiur nekaawartata? Nase chichartsumeash.

10 Ju nunkanmaya chichamka ti untsurí írunui. Nu chichaman nékakka ashí antukmin áiniawai.

11 Tura chíkich shuara chichamen ántachkunka níjjaiñkia yajaya apachia áintsanak ajajai. Niisha wíjjaiñkia yajaya apachia áintsankete.

12 Tuma asantai, Yusa takatrí ti wakera asarum ashí Yus-shuaran íkjaratatna nú takat nekas wakeruktarum.

13 Nu asantai niisháa chichamjai chichaitkiunka chichasumna nu jintartín Yus seata.

14 Niisháa chichamjai Yusan áujeaknaka nekas winia wakantrujai áujeajai tura áújsajna nuna nékatsjai.

15 Antsu wikia júnisan enentáimjai. Yusan áujeakun winia wakantrujajsha áújsattajai tura enentáimtsuk áújsashtajai. Kantamkuncha kantamaj nuna enentáimkiun winia wakantrujajsha kantamattajai.

16 Amesha shuar iruntramunam aya wakanmijjai niisháa chichamjai Yus shiir yumínsakmincha nekaachmin asantai nékachuka ámijjai métek áújsatniun jeatsui.

17 Ti shiir Yus yumínsam áujeatsmeash tura chíkicha Yusjai ikiakáatsme.

18 Ashí átum nusháa chichamjai chicharmena nuna nankaamas wikia chichajai. Nuna Yusan yumínsajai.

19 Túmaitiatnak untsurí chichamjai chichasan ántumtikiashtinjaiñkia nankaamas Yus-shuar iruntramunmanka aya senku chichamchijjaiñ tiiñjai, paant jintintiaewartaj tusan.

20 Yatsuru, uchía áintsarum enentáimprairap. Kuirchia áintsarum tunáa túrashtin enentáimpratarum tura chíkich írunna nujai uunt enentáimpratniua áintsarum enentáimpratarum.

21 Yus-Papinium áarmaiti:

““Yajaya shuaran akupkan niisháa chichamjai chichastatjai. Tura nújajsha anturtukchartatui” tawai Yus.” Tu áarmaiti.

22 Nújainkia páantaiti, nusháa chichamjai chichastinkia Yus-shuarchan ashantikiar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuarchan enentáimtiktsuk Yus-shuaran yáintinian súsaiti.

23 Tuma ajñ, nékachusha tura Yus-shuarchasha Yus-shuar iruntramunam wayanka tura ashí niisháa chichamjai chichainianak wáinikianka “mash waurka ajasarai” enentáimturmarchartatuak.

24 Tura Yus-Chicham étserkurminkia nékachusha tura Yus-shuarchasha nuj wayanka ashí tárumna nujai ni tunaarín ímias enentáimturtatui.

25 Nújainkia ni enentáin úumak ana nuna paant wáiniak tikishmatar Yusan shiir awajstatawai. Tura “nekas Yus atumjai pujawai” titiatui.

### *Ashí tuke shiir takastarum*

26 Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátniuncha, jintintiatniuncha, Yus iwiainiakman ujaktinniasha, nusháa chichamjai chichastinniasha, nusháa chichasman jintiatniuncha, ashí Yus-shuar Yusjai tsakararti tusar juna mash takasarti.

27 Nusháa chichamjai chichainiakka chikichik chikichik chichasarti. Tura jímiarchik menaintiuchiksha chichasarti. Tura ni timianka jintiartiniaiti.

28 Jintiartin atsakuñkia nusháa chichamjai iruntramunam chichaschatniuí. Antsu níñki Yusjai chichasti.

<sup>29</sup> Núnisan̄ jimiarchiksha menaintiuchiksha Yus-Chichaman etserkarti. Tura chíkich shuar nūj iruntrar ni etserkamun enentáimprarti péñkerashit tusar.

<sup>30</sup> Tura chikichik chichaakui Yus chikichan nūj pujana nuna yamaram chichaman súakuinkia emka chichaa nu iniáísatí.

<sup>31</sup> Núnisrum Yus-Chicham etserkatin wakerarmena nu chikichik chikichik chichasrum ashí jeattarme. Nújajsha Yus-shuar unuimiarar kakarartatui.

<sup>32</sup> Yúsnan̄ étserainia nuka tuke enentáimprar chichastin áiniawai. Enentáimsuk nánkamsan̄ chichasmin áiniatsui.

<sup>33</sup> Yuska pachimtak chichaman nakítiak shiir chichasmanak wakerawai. Chíkich nuñkanmasha ashí Yus-shuar iruntramunam túrainia áintsarum túratniuitrume atumsha.

<sup>34</sup> Yus-shuar iruntramunam nuwá chichastin surimkiamuiti. Yus akupea núnisan̄ núwaka chichatsuk umin átin áiniawai.

<sup>35</sup> Inintrustinian wakerakka ni jéen waketkin ni aishr̄in nūj aniasti. Ashí iruntramunam nuwá chichastin natsantaiti.

<sup>36</sup> Jusha enentáimpratarum. Yus-Chicham atumjaj̄ nan̄kamnachmai. Núnisan̄ aya atum̄jin̄ Yus-Chicham jeartamchaiti. Chíkich nuñkanmasha Yus-shuarti túrutai enentáimpratniuitrume atumsha.

<sup>37</sup> Atum̄j̄in̄ shuar “Yus-Chichaman tuke etserniuitjai” enentáimtumatsuash. Tura chíkich shuarsha “Yusa Wakaní̄ tuke winia akuptaiti” enentáimtumatsuash. Nu shuarka wi áatjarmena nuna enentáimprar “nekas Yúsnan̄ t̄iniuiti” tiarti.

<sup>38</sup> Tu táchakuinkia niisha ántrar áiniawai.

<sup>39</sup> Nu asamtai, yatsuru, Yus-Chicham etserkatin wakeruktarum. Nusháa chichamjaj̄ unuimiatsuk chichastincha surimkiairap.

<sup>40</sup> Túmaitiat antukchamin awajtsuk ashí shiir túratarum.

## 15

### *Kristu nantakmia*

<sup>1</sup> Ataksha, yatsuru, uwempratin chichaman wi etserkamaj nuna atumin enentáimtikratsan wakerajrume. Nu chichamsha atumsha enentáimturarum tariarurme.

<sup>2</sup> Nu chichamsha átum ántar enentáimtachkurmeka uwempraitrume. Wi ukmajrum nu tuke enentáimtaitkiurmeka nekas uwempraitrume.

<sup>3</sup> Winia ujatkamunak ukmajrume. Nu chichamsha ashí nan̄kaamas úntaiti. Júiti nu chicham: Ii tunaar̄in asakártasa Kristu jarutramkamiaji, Yus-Papinium tana núnisan̄.

<sup>4</sup> Tura jakamtai iwiarsarmiaji. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisan̄.

<sup>5</sup> Nantakisha Pítrun wantintiukmiayi, nuyá ni akatramur̄in wantintiukmiayi.

<sup>6</sup> Nuyanka kiniantusa (500) nan̄kaamas Yus-shuaran wantintiukmiayi. Nú shuarnumiasha ishichik jákaru áiniawai tura untsur̄j̄ tuke pujuiniawai.

<sup>7</sup> Nuyasha Sántiakun tura nuyá ashí ni akatramur̄in wantintiukmiayi.

<sup>8</sup> Ashí amúamunmasha winiasha wantintiurkamiayi, wi yajauch wekaa āin̄.

<sup>9</sup> Wisha Yus-shuaran ti yajauch awajsa asan chíkich Yus-akatramujaj̄ ímianchaitjai. Nekas winia péñkerujaj̄ ni akatramur̄int̄jai tíchamniaitjai.

<sup>10</sup> Antsu Yus ti shiir anentak winia enentáiruḡ pujurtus péḡker najataiti. Nu asamtai winia kakarmarḡai takaschaitḡai, antsu Yus, anenḡkartin asa, winia enentáiruḡ takaakuḡi ashí ní akatramurḡin nanḡkaamas takasuitḡai.

<sup>11</sup> Tura wi takaakuḡisha tura ní takainiakuḡisha mai péḡkerkete. Nu chichamka mash étsereaji tura nu chichamsha átum enentáimtusmarme.

### *Jákaru nantakiartatui*

<sup>12</sup> Iisha “Kristu jakamunmaya nantakniuiti” tu étsereaji. ḡItiur nuikia shuar jakamunmaya nantakchatniuiti tuinia?

<sup>13</sup> Jakamunmaya nantakchatniuitkiuḡḡia nuikia Krístusha nantakchaiti.

<sup>14</sup> Tura Kristu nantakchaitkiuḡḡia ii ujajnia nu penḡké ántraiḡi, atumsha Kristu enentáimtarmena nusha ántraiḡi.

<sup>15</sup> Núnisaitkiuḡḡia iisha “Yus Krístun iniantkimiayi” tákur waitruamḡi. Iis, nekas jakamunmaya nantakchamniaitkiuḡḡia nuikia nekas Yus Krístun iniantkichiuiti.

<sup>16</sup> Jaka nantakchatniuitkiuḡḡia imia Krístusha iniantkichmaiti.

<sup>17</sup> Tura Kristu iniantkichmaitkiuḡḡia átum Kristu enentáimtamusha penḡké ántraiḡi. Tunaarmisha asakárchamu áiniawai.

<sup>18</sup> Núnisaitkiuḡḡia Yus-shuar jákaru ainia nu tuke menḡkaru áiniawai.

<sup>19</sup> Iikia Kristu enentáimtusar tuke Niiḡḡai shiir pujustin nákaḡi. Tura aya jú nuḡkanam pujustiniaitkiurkia Kristu ántar enentáimtakrin ashí nanḡkaamas waitmentrampratniuitḡi.

<sup>20</sup> Antsu imiankas Kristu jakamunmaya nantakniuiti. Ashí ukunam jakamunmaya tuke jákashtinian nantakiartatna nuna Nii émtukuḡiti.

<sup>21-22</sup> Yaunchu Ataḡ tunáa túramtai ashí shuar jákatin áiniawai. Núnisaḡ yamaikia Krístujaiḡn tuke atakka jákashtinian nantakiartiniaiti. Iis, chikichik áishmanḡaiḡn jákatin nanḡkamnamiayi. Nuka Ataḡkauyayi. Núnisaḡ chikichik áishmanḡaiḡn nantaktin nanḡkamnamiayi. Nuka Krístuḡiti.

<sup>23</sup> Yus wakerana nuḡ Yusna nu mash nantakiartatui: Kristu emka-juukma áintsan émtukim nantakniuiti tura atak jú nuḡkanam tara ashí ní shuarḡin júuktinia áintsan iniantkittiaiwai.

<sup>24</sup> Nuḡḡia mash amuukattawai. Nuḡ Kristu ashí kapitíanniasha, ashí akupniuncha, ashí núnisaḡ jú nuḡkanam írúnna nunasha nupetak emesrattawai. Krístusha ashí mash ní Aparḡin susattawai. Tura Yus Apa ashí akupin átatui nuikia.

<sup>25</sup> Iis, júnisanaḡ átatui. Emka Yus Apa ashí ní nemasḡin nupetak Krístun susattawai akupin atí tusa.

<sup>26</sup> Tura ní nemasḡin nupetak ashí amúamunam jákatniuncha nupetkattawai.

<sup>27</sup> Yus Apa ashí Krístun súsaiti ashí akupin atí tusa. Yus-Papinium tu áarmaiti. Tura “ashí Krístun súsaiti” táyat Yus Apancha susamuiti tátsui. Antsu Yus Apa ashí Nin susa asa Niḡki súsachmaiti.

<sup>28</sup> Tura Yus Apa ashí mash ní Uchirḡin Krístun nekas susamtai Kristu nuikia ashí akupin ajas atak ní Aparḡin mash awaḡtuki núnisaḡ surumaktatui. Nuḡḡia Yuska tuke ashí nanḡkaamantu átatui.

<sup>29</sup> Ayu. Tura shuar jakan enentáimtusar imiantinniasha ḡurukamtia nuna túruinia? Jákaru nantakchatniuncha ḡurukamtai imianainia?

<sup>30</sup> Iikia ḡurukamtai tuke jániḡkiaruitiaḡ? Nantakchatniuitkiuḡḡia ánta wáitsaintḡi.

<sup>31</sup> Atsá, penké áintsachuiti. Nu asamtai átum ii Uuntrj Jesukrístu enentáimtakrumin wi shiir enentáimtajrume. Tura wisha tuke tsawantin ti itiurchat pujakun jákatniua áintsan pujajai.

<sup>32</sup> Jakamunmaya nantakchatniuitkiuin̄kia wi ántranak kajen shuarjaj Ipisi-unam máaniakuitjai. Maa, uunt yawáa áinis kajen áрмаi. Wats, núnisaitkiuin̄kia antsu “yurumar nampektai, kashin jákashtajik” titiai nuikia.

<sup>33</sup> Anañnawairap. “Pénkeraitiatam yajauch shuarjaj tsan̄kia wekak-meka yajauch máatrattame” tiniu áiniawai.

<sup>34</sup> Tunáa ikuakrum péñker wekasatin shiir enentáimpratarum. Iis, shuar Yúsán nékainiachu tuke awai. Atumin natsāaruk tusan tájarne.

### *Iniantkimiú ayash átatna nu*

<sup>35</sup> Shuarsha inintruschaimpiash zjákarusha itiurak nantakiarat. Nantakiarsha warí ayashniak takusarat?

<sup>36</sup> Enentáimtsuk inintrawai. J̄in̄kiaí araamsha jaka áintsan̄ amúatsuk. Túrayat tsapaatsuk.

<sup>37</sup> Tsapaitniur̄isha araatsme antsu triku j̄in̄kiaichisha ch̄ikich árika j̄in̄kiaichir̄isha araame.

<sup>38</sup> Nuyá tsapaakuisha Yus wakerana núnisan̄ ní tsapaitniur̄incha súawai. Tura an̄kant an̄kant tsapaitniur̄in̄kia súsaiti.

<sup>39</sup> Núnisan̄ ashí ayash métekcha áiniawai. Áentsnaka niishaaiti. Kuntinnisha niishaaiti. Nanamtinnisha namaknasha niisháa áiniawai.

<sup>40</sup> Nayaimpiniam yaa írunei tura j̄u nun̄kanam írúnna nujaj nusháa íimtin áiniawai. Nayaimpinmayasha nun̄kayasha sh̄írmari nushaiti.

<sup>41</sup> Etsá winchar̄isha nantunusha yáanusha mash nushaaiti. Nuamtak yaaksha chikicha winchar̄in̄kia chikichnajāin̄kia nushaaiti.

<sup>42</sup> Núniskete jaka nantaktincha. Káurtinnium iwiarsam jákashtinnium nantaawai.

<sup>43</sup> Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai.

<sup>44</sup> Juyá ayash iwiarnawai, nayaimpinmaya ayash nantaawai. Juyá ayash átsuk. Núnisan̄ nayaimpinmaya ayashsha awai.

<sup>45</sup> Yus-Papinium nuní áarmaiti:

“Emka áishman̄ ni naari Atan̄, aents ajas iwiaaku ajasmiai.” Tu áarmaiti.

Ukunmañka, yamaram Atañka áintsan̄, Kristu, wakan asa, ashí áentsun nekas iwiaaku átinian susamniaiti.

<sup>46</sup> Nayaimpinmaya ayashkia émkaçhuiti antsu juyá ayash émkaiti tura nuyá nayaimpinmaya nu.

<sup>47</sup> Emka áishman̄ nun̄kajaj najanamu asa nun̄kayaiti. Ukunmaya áishman̄sha ii Uuntrj Kristu asa nayaimpinmayaiti.

<sup>48</sup> Atañka áintsan̄ ainia nusha juyá ayashtin áiniawai. Kristu áintsan̄ ainia nusha nayaimpinmaya ayashtin áiniawai.

<sup>49</sup> Yamái juyá áiniakur ukunam nayaimpinmaya ayashtin ajastatji.

<sup>50</sup> Juna tájarne, yatsuru. Ayash númpentin asa nayaimpiniam, Yus aku-peana nuj, wayaçhminiaiti. Iis, káutañkia káurchatniunam wayaçhminiaiti.

<sup>51</sup> Yaunchu uukma nu yamáí nekaatarum. Ashí jákashtatji, túmaitiatar ashí yapajniáttaji.

<sup>52</sup> Tura pusar<sup>i</sup> muítsarn̄in̄ ti wárik yapajniáttaji. Tura ashí amuukai tusa umpuartatui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nuñ yapajniáttaji.

53-54 Jú kautainkia yamá jákatniuiat káurchamnia ajastiniaiti. Túrasha jákachmin átatui. Nu túrunamtaisha Yus-Papinium aarma uminkiatawai: "Jákatniun Yus nupetak amukuiti.

55 ¿Itiur jákatjik yamaikia. Jákatniusha itiur nupettamkañ mantamataj?" Tu áarmaiti.

56 Yaunchu Yus akupkamu tiniu asamtai shuar tunáa tura jákatniuiti.

57 Yamái antsu ii Uuntri Jesukrístu túramujai jákatniunka Yus nupetkaiti. Tura incha nujai uwempratniun amaakui shiir yúmiñkijai.

58 Nu asamtai, aneamu yatsuru, kakaram ajasrum yawetsuk nankaamas Yusa takatri takastarum. Ii Uuntri Krístujai tsaninikia takaarum nuka penké ánrachuiti. Nu paant nékarme.

## 16

### *Yusa kuitri irurtin*

1 Yusa kuitri irurtinkia, Yus-shuaran Karasea nunkanam tímiaj núnisnak atumniasha tájarme.

2 Ashí tuminin, Yus súrarna áintsam akankam ikiusta. Nújaiñkia wi jeattaj nuñ yaunchu akankamu mash irurmin átatui.

3 Nuñ jeancha átum anaiyarmena nu shuaran papijjai Jerusarénum akupkattajai. Tura atumí kuitrumin aisha ii yachin súsartatui.

4 Wisha wéminiaitkiuinikia wijjai wéartatui.

### *Papru irastatna nuñ*

5 Wi Masetúnia nunkanam wétiniaitjai tura nuyá Kurintiunam jeattajai.

6 Nuñsha untsurí tsawant pujuschatjash. Ishichik nantusha wéchamnianum pujuschatjash. Tura wi atak wéakui atumsha yáintkiarum shiir akuptukchat-tarpash.

7 Aya wárik nankaamaktinian nakitiajai. Antsu Yus wakerakuinikia untsurí tsawant atumjai pujustaj tajai.

8 Tura juñ Ipisiunam pintikustís nampernum pujustajtai.

9 Juñkia Yusa takatri ti shiir takastin awai. Tura untsurí shuar wi takaamun nakitiainiawai.

10 Timiutéu nuñ jeamtainkia, shiir awajsatarum; sapijmiakain. Niisha wijjai métek Yusa takatrin takaawiti.

11 Nu asamtai nakitirairap. Antsu yáinkrum winí shiir akupkatarum. Chíkich yachijjai tatí tusan nákejai.

12 Apurusnasha chíkich yachijjai winí írmasartí tusan ti seamjai tura penksha nakiarmai. Kame nii ankant aku nuñ winishtimpiash.

### *Áujmamsamu*

13 Aneara tariarum Yus nekas enentáimtustarum. Áishmanchakaitrum, kakaram ajastarum.

14 Anenkartamujai mash túratarum.

15 Ayu, yatsuru. Estepanasa shuari ashí emka Akaya nunkanam Yus-shuar ajasarmen nékarme. Niisha Yus-shuaran yáintajtsar tuke takainiawai.

16 Niisha tura ashí nijjai métek yáinkiar takainia nú shuar seatmana nu tuke túratarum.

17 Estepanassha Jurtunátusha Akaikiusha atumiyá táarmatai shiir waraa-jai. Átum yajá pujakrum tujintiarmena nuna túrawarmai.

<sup>18</sup> Niisha winia shiir enentáimtikrurarai. Núnisan shiir enentáimtikramprattarme. Nuní aents tuke shiir enentáimtustiniaiti.

<sup>19</sup> Asia nunkanmaya Yus-shuar amikmáatmainiawai. Akirasha ni nuwe Prisirajajsha ashí Yus-shuar ni jeen Yus-Chichaman irunturarusha Jesusa náariin amikmáatmainiawai.

<sup>20</sup> Ashí ii yachisha amikmáatmainiawai. Nuámtaksha shiir awajnaisrum amikmáaniatarum.

<sup>21</sup> Wi Papru asan júchiniak winia uwejrújaj áaran amikmaajrume.

<sup>22</sup> Ii Uuntri Jesukrístun aneachuka yajauchiniam yuminkramu atí. “Ii Úuntri, wari tatá.”

<sup>23</sup> Ii Uuntri Jesukrístu yainmakarti.

<sup>24</sup> Jesukrístunu asakrumin atumin ashí ti aneajrume. Nu atí.

## Papru KURINTIUNMAYA SHUARAN Ataksha papin aar akuptukma

### *Kurintiunmayá Yus-shuaran Papru áatramiania nu*

<sup>1</sup> Wi Pápruitjai Jesukrístu akatramu. Yus nuna wakerakui ni akatramuri anaikiamuitjai. Ii yachi Timiutéujai Yus-shuar Kurintiu péprunam íruntrumna nuna áatjarne. Kame ashí Akaya nuñkanam Yusna ajasurmena nunasha áatjarne.

<sup>2</sup> Apa Yussha, ii Uuntri Jesukrístusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

### *Papru wáitsamuri*

<sup>3</sup> Ii Uuntri Jesukrístu Apari, ii Yusrj ana nuna naari uunt awajsatai. Niisha ii Aparinti. In waitnentrarnajai. Tura Niisha ii Yúsrjinti. Tuma asa in tuke atsantamjai.

<sup>4</sup> Ii wáitajnia nuj Yuska in atsantamjai. Tura in atsantamjinya nútiksarik iisha chíkich shuar wáitaienia nuna atsankrarat tusa túrutmajai.

<sup>5</sup> Warí, Kristu wáitsamuri núkap pachiinkiaitjinya núnisrik ni atsankramurj in núkap pachiinkiaitjai.

<sup>6</sup> Tuma asamtai, wáitajnia nu, Yusa uwentikrampratniurj tura ni atsankratniurj atumsha takustarum tusar wáitajai. Tura Yus in atsantampramjinya nu, Yusa uwentikrampratniurj tura ni atsankratniurj átum takustarum tusar atsankramuitjai. Wats, átum uwentikramu tura atsankramu asarum, ii wáitsajnia nútiksarmek wáitaiyatrum shiir enentáimsarum katsuntramniaitrumek.

<sup>7</sup> Tura “túrattawai” tu enentáimtajrume. Warí, átum iijjai métek wáitsaitrumek. Núnisan iijjai métek Yus atsantamtsurmek.

<sup>8</sup> Yatsurtiram, iikia Asia nuñkanam ti ititurchat wáinkiamjinya nu nekaatarum tusar wakerajai. Imiá ititurchat wáinkiar iikia katsuntratin jeachmajai.

<sup>9</sup> Nu ititurchatnumia “iwiaaku jíinkishtajji” tu enentáimsamjai. Túrusha “iikia tujinchaitjai” tu enentáimtumatsuk, antsu jakamunmayan iniannia nu Yúsan enentáimtusar tusa nu túrunamjai.

<sup>10-11</sup> Jakamnia ititurchatnumia Yuska uwentikrampramjai. Tura yamaisha uwentikrampratajtsa pujurtamjai. Tura atumsha in Yus áujtakrumniñkia “Yuska tuke uwentikramprattajji” taji. Tura untsurj shuar Yus aujsa asakrumin, ii uwempra asakrin untsurj shuar Yúsan yumiñsartatui.

### *Kurintiunam wau wéchatniun Papru ujakmiania nu*

<sup>12</sup> Yatsurtiram, ju nekaatarum tusar wakerajai. Ju nuñkanam pujusar tura nekaska atumjai pujusar anañtsuk tura Yus umirkar wekaimjai. Aya ii nekatairijjain wekaichamjai. Antsu Yus in waitnentrarna asa péñker wekasatniun yainmakmajai. Nu nekaar shiir enentáimjai.

<sup>13</sup> Áatjarmena nu páantaiti. Átum áujsarum nekaatin jearmena nunak aarjai. Chíkichan nekaachminian aatsjai. Péñker nekaatarum tusan wakerajrume.

<sup>14</sup> Ishichik nekayatrumek nú núkap tuke nekaki wetarum tusan wakerajrume. Nuñkia Jesukrístu tátinya nú tsawantaj átum winia



shiir enentáimtursattarme. Tura átum pé<sub>ñ</sub>ker wekasa asakrumin shiir enentáimtustatjarme.

<sup>15</sup> Tura ii shiir enentaimtunij nuna nékaku ataksha Yusá waitnenkartu-  
tairj nekapsak tusan ataksha atum<sub>ij</sub>n irastinian wakerimjai.

<sup>16</sup> Masetúnia nunkanmaani wéakun írkuta nan<sub>ñ</sub>kaikitjarum tusan enentáimmiyai. Tura wáketkuncha ataksha ístajrum tusan wakerimjai. Túramtai wí Jutía nunkanam weakui átum yáintkiatarum tusan atumin ístinian wakerimjai.

<sup>17</sup> Nuinkia ¿urukantai túrachmaj? ¿Pé<sub>ñ</sub>ker enentáimtsukek “wetajai” tímiaj? ¿Wí Yus-shuarcha nunisan, jimiará chichamtiniaiti, tú enentáimtursarumek?

<sup>18</sup> Núchaiti. Yus tana nuna tímiatrusan<sub>ñ</sub> umíana nútiksarik iikia ii chichame umiktai tusar wakeraji. Jú chichamaik, “Ee, atsá” tátsuji.

<sup>19</sup> Wisha Serpanujai Timiutéujai Yusa Uchirj Jesukristunun ujakmajrume. Niisha jú chichamaik, “Ee, atsá” tíchaiti. Antsu nii tana nuna tuke umíawai.

<sup>20</sup> Niijjajsha Yus tana nu tímiatrusan<sub>ñ</sub> uminiui. Tuma asamtai Jesukrístu enentáimtatur “nii tana nuna nekas túrattawai” tu enentáimji. Tu enentáimsar Yusa naari shiir awajeaji.

<sup>21</sup> Atumniasha incha ikiakátmajnia nu Yúsaiti. Krístonu ajasu asakrin túrtumaji. Tura anaitiamak Niiniu awajtamji.

<sup>22</sup> Tura ukunam ii achiktatjina nuna, nekas amastatjai tusa Yus ni Wakan<sub>ñ</sub> ii enentáin apujturmaj. Nujai Níiniuitji tusar paant nékaji.

<sup>23</sup> Atum<sub>ij</sub>n itiurchatan wáinkia<sub>ij</sub> tusan nakitiakun atumí péprur<sub>ñ</sub> Kurintiu-  
nam jeachmajai. Wáitrakuinkia “Yus iirsati” tajai.

<sup>24</sup> “Aya wí tájana nútiksarmek Yus enentáimtustarum” waantu enentáimtumasar nu titin nakitiaji. Yus nekas enentáimtusmaajai kaka<sub>ñ</sub>arme. Antsu nekas warastarum tusar wakeraji.

## 2

<sup>1</sup> Tuma asamtai, atak kúntuts awajsa<sub>ij</sub>rum tusan nakitiakun, “atumí tu-  
naari íwiartsurmin<sub>ñ</sub> jeashtatjai” tímiajai.

<sup>2</sup> Wí atumin kúntuts awajkuncha, ¿yaki winia waramtikrusat? Aya atumek, wí nuik kúntuts awajsamjarmena nuke waramtikrusminiaitrum.

<sup>3</sup> Wí jeakun atumí tunaari íwiartsurmin<sub>ñ</sub> kúntuts enentáimsa<sub>ij</sub> tusan naki-  
tiakun, nu papin áarmaj nútiksanak áarmajai. Warí, atumketrum winia waramtikrustin.

<sup>4</sup> Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

### *Yajauchin túrana nu tsankuratin*

<sup>5</sup> Túrasha kúntuts awajtusmia nu, aya wíniak kúntuts awajtuschai. Antsu atumniasha ishichik kúntuts awajtamsayi. Patasa chichasa<sub>ij</sub> tusan “ishichik” tajai.

<sup>6</sup> Kame nu áishman<sub>ñ</sub>kan iruntra chicharkarum wáitkiasmarum nuke máakete.  
<sup>7</sup> Antsu yamaikía tsankuratniuitrum. Shiir enentáimtikratniuitrum. Ni-  
isha imía kúntuts pujus nú arant ajasá<sub>ñ</sub> tusarum túratniuitrum.

<sup>8</sup> Túrakrum nii nekas anearmena nu paant iniaktustarum tusan seajrume.

<sup>9</sup> Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme.

10 Átum tsankurearmena nú shuaran wisha núnisnak tsankureajai. Tura tsankuratin ákuinkia, wi tsankurajna nu ashí atumnian enentáimtusan, Kristu ímmianum túrajai.

11 Kame uunt iwianch Satanás in emestampratajtsa wakerana nusha nékaji. Tuma asamtai, túrawain tusar tsankuratniuitji.

*Trúas péprunam Papru juákchamiania nu*

12 Kristunu shiir chichaman Trúas péprunam etserkatajtsan jean, ti péñker takastinian wáinkiamjai.

13 Túrasha ii yachi Titun wáinkiachu asan, shiir enentáimsatniun tujinkiamjai. Tura asamtai Trúasnumiã aentsun áusjan ikiukiaran Masetúnia nunkanam wémiajai.

*Kristujai nupetkamniaitji*

14 Kristu Jesusjai Yuska incha nupetmamtikramak ewekatmasuitji. Tuma asamtai Nincha ti shiir yúminsa pujajai. Tura kukuji kunjúakui, ashí nékainia núnisan ii etserkamujai Kristu shiir chichamen Yuska ashí aentsun nekamtikiainiawai.

15 Kristu in pujurtamu asamtai Yusjai nekapsamka iikia kunjúaji. Ii kunjúajnia nuna uwentikramu ainia nusha tura uwentikrachma ainia nusha nekapramnia ainiai.

16 Menkakatniunam weena nuka ii kunjúajnia nuna jakamnia mejea nekapramji. Tura iwiaaku átinnium weena nuka iwiaaku átin kunjúa nekapramji. Maa, nu túratniuncha zyaki jeá?

17 Kame untсурi aents kuitian achiktaj tusar Yusa chichamen yapajinia núniskechuitji. Antsu Kristunu ajasu asar, Yus akupkamu asar, Yus ímmianum anantsuk esetsar étsereaji.

### 3

*Yamaram chícham najanamu*

1 ¿Nu tákurninkia, “ataksha niñki waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman nekas Yus-Chichaman etserin ániawai” tusa papí aarma atumin iniaktustinkiaitaij? ¿Chíkich iniaktustin nú papí atumin seatniukaitaij?

2 Atsá. Átumka ii papirja núniskechukaitrum. Ii enentáin nu papí áarmaiti. Tura nú papí áusatniua núnisan ashí aents atumí túramuri wáinkiar ii etserkamaj nu, Papru nekas Yusa takatrjn takaawai tusa nekaamnia ániawai.

3 Iis, tátsujak. Papí aarma núnisketrume. Nu papí Kristu áarmaiti tura iisha nú papí atumin súaji. Tíntiajainchu antsu iwiaaku Yusa Wakanjijai áarmaiti. Kayanmasha áarchamuiti; antsu shuara enentáin, auka, áarmaiti.

4 Kame Kristunu asar, Yus enentáimta asar, nusha tímniaitji, taji.

5 Ju nékaji; imia iik penké tujinkiaitji. Antsu ii túrajnia nu Yus ni kakarmarjn súramkurin túrajai.

6 Yamaram chichaman Yus najanamia nuna, incha péñker etserkatniun suramsaitji. Yaunchu aarma chichamnum, ashí takamtsuk umirkachrikiatuke jakamniuyaji. Antsu yamaram chichamnum, Yuska ni Wakanjijai yamaram wekasatniun súramji. Yusa kakarmarjijai nu chícham étserji.

7 Yaunchu chichamnaka kayanam aar Yus Muisaisan susamiayi. Susamia nuj, Muisaisa yapi ti wincha ajasmiai. Túrunamtai Israer-shuar ni yapin ístinian tujinkiarmai. (Túrasha nu wincha mushatmaki wémiai.) Túrasha

nu chichaman shuar umirkatniun tujintiakui, nu chichamsha aya tuke jákatniunam shuáran ejemiayi. Túmayatan winchajai susamuyayi.

<sup>8</sup> Tura yamaram chichaman Yusa Wakaní súramna nu, nujai nankaamas shíiraiti.

<sup>9</sup> Kame mesertinnium ejeana nú chicham winchajai susamuyayi. Tura nujai nankaamas Yúsnun ejeana nú chichamka Yus ímmianum péñkeraiti.

<sup>10</sup> Iista; yamaram ana nu imiá shiir asa, yaunchu wincha amia núnaka mushatmamtikiui.

<sup>11</sup> Núkap arur pujuschamnia nu wincha áchamkia. Kame tuke átinia nuke nujai nankaamas shíiraiti.

<sup>12</sup> Nu nékakur ti paant étserji.

<sup>13</sup> Muisais túramia nútiksarik túratsji. Ii uuntri Israer-shuar ni yapin wincha ajas menkaan wáinkiarain tusa tarachjai ni yapin Muisaiska nukumakmiayi.

<sup>14</sup> Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarmai. Tura yamaisha núnisan yaunchu aarma chichaman áújsam antukar nekaatniun tujintiainiawai. Kristu enentáimtuschatin ni enentáin nukukma nu yapajáchmaiti. Aya Krístujai nuka yapajámniati.

<sup>15</sup> Yamaisha Muisaisa áarmarin áújsar nékainiatsui, ni enentáimmiari nukurkamu asa.

<sup>16</sup> Tura aencha ni enentái yapajía Uuntna ajasmataikia ni enentáimmiariya nukurkamu ana nu jusamuíti.

<sup>17</sup> “Uunt” tájiniya nu, Yusa Wakaníiti. Uunt Yusa Wakaní pujana nu ankant ajastiniati.

<sup>18</sup> Nuke asamtai, iisha ii yapí tarachjai nukukchamu asar íspikia núnisketji. Uunt Kristu péñkeri iniakmaji. Kristu péñkeri nú núkap takaki wéakur, Krístujai métek ajastasa pujaji. Yusa Wakaníkia nuna túrawai.

## 4

<sup>1</sup> Yus in waitnentrana asa ni chichamen etserkatniun ataktamsaitji. Tuma asamtai yawetsuk takaaji.

<sup>2</sup> Uúka túratin ana nuyá tura natsanmai ana nuyasha kanakmaji. Anañkatai tusar wekaatsuji. Tura Yus-Chichamjai nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wí tájana nuna Yus nékawai.

<sup>3</sup> Uwempratin Chicham í étserjinia nu páantaiti. Áyatik menkakatniunam weena nu “páantchaiti” tuíniawai.

<sup>4</sup> Uunt iwianch, ju nunká uuntri ana nu, nu aentsu enentáin ukusturuíti. Uunt Krístunu shiir chichaman ii étsermajai tsáapnin enentáimpraraín tusa ukustawai. Nu Kristu Yúsan ímiatrusan nakumui.

<sup>5</sup> Iisha étserkur, Jesukristu í Uuntrinti tu étserajai. Iikia atumí úntrintji tátsuji. Antsu, Jesus ii uuntri asamtai, atumí yáintrintji, taji.

<sup>6</sup> Yaunchu kiritin aan Yus tsáapin ati tusa tsáapnin awajsamakia. Nú Yúsaiti ni enentáin tsaapnin awajtamsamia nu. Nu tsaapnijai ni shiir-marín, Jesukristu iniakmia nuna, ashí aents nekaawarat tusar Jesukristunun étserajai.

### *Yusak enentáimtusar wekasatin*

<sup>7</sup> Nu tsáapin imiá péñker ana nuna ii ayashíin Yus ikiusuiti. Tura ii ayashí kakarmachu, nuwe najanamua áanin asamtai, warí, kakaram ájiniya

nu Yúsnumiächukait. Ii aj nuna nekaawarat tusa Yuska ni tsáapnintrin ii ayashin ikiusuiti.

<sup>8</sup> Tuma asamtai ii itiurchatrin árentmaku árinin tuke jiiinkimniaitji. “Itiurkatjik” taji, túrasha Yus yáinmaji.

<sup>9</sup> Aents pataaturmainiakrincha Yus ikiurmatsji. Emesrataj tukamá tujintiainiawai.

<sup>10</sup> Kame Krístun máataj tusa tuke wakeriarmia núnisan incha tuke mantamataj turamainiaji. Túrasha jákachu asar Kristu kakarmari ii ayashin iniakmaji.

<sup>11</sup> Iisha Jesusna ajasu asar wekaajnia nuj tuke tsawant tsúumainium jasattuk ajaji. Túrar ii ayashin jakamniaitiat nu ayashnium Jesusa iwiaakmari paant iniakmaji.

<sup>12</sup> Iisha Yus-Chicham étserkur ii ayashin jasattuk ajaji, tuma ajn atumsha umikiu asarum nekas iwiaaku atin wáinkiarne.

<sup>13</sup> Yus-Papinium yaunchu áarmanum: “Yúsán enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji.

<sup>14</sup> Yus kakarmaiti. Uunt Jesusan jakamunmayan iniantkimiaji. Incha núnisan Jesusjai iniantamkittiaji. Tura atumjai métek ni pujamunam juramkittiaji. Nusha paant nékaji.

<sup>15</sup> Atumsha untsurí aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yuminsarum pujarme. Nujai Yusa naari uunt awajsamuiti. Nu nekaar wáitsatin ashamatsji.

<sup>16</sup> Tura yaweatsji. Ii ayashin amuiki wéakuisha ii enentáinkia yamaram ajaki wéawai.

<sup>17</sup> Warí, ukunam tuke shiir pujustatinia nu enentáimtakrikia, ju nunkanam wáitiajnia nu, ti itiurchataitiat, aya yamaiya asa tiikia itiurchatchaiti, tura wárik nankaamawai. Túrasha ii itiurchatrinjai Yuska ti shiir ana nuna amuukachmin ana nuna núkap suramsattaji.

<sup>18</sup> Tuma asamtai wáinjinia nu ti enentáimtatsji. Antsu wáintsujnia nu nekas enentáimtaji. Wáinjinia nusha aya yamaiyaiti. Antsu wáintsujnia nuka tuke amuukachminiaiti.

## 5

<sup>1</sup> Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asamtai ii ayashin emesnakuisha warí itiurtamajia. Nuka aaka núnisan amuukamniaiti.

<sup>2</sup> Ju ayashnium pujusar wáitiaji, taji. Yamaram ayashin nayaimpiniam pujana nu achiktai tusar wakeraji.

<sup>3</sup> Ayashtichu ajasajj tusar, yamaram ayashtin ajastaisar wakeraji. Pushia núnik yamaram ayashin nukurmaktai tusar wakeraji.

<sup>4</sup> Tura juj ayashin pujusar wáitsar pujakur shiir enentáimtsuji. Arut pushi áiktinia núnisrik ju ayashin ikiuktiaitsar tátsuji. Antsu yamaram pushi entsartinia núnisrik yamaram ayashnium tuke pujusmí tusar taji. Iista, ju ayashin amuukachminkiait. Yamaram ayashnium pujusar tuke iwiaaku pujustaji.

<sup>5</sup> Yamaram ayashintin ajastinian iwiarthurmaruitjinia nu Yúsaiti. Tura nekas túrattajai tusa ni Wakanin suramsaitji.

6-7 Jū nékaji. Jū ayashnium pujajnia jūinkia Uunt Jesusjaj pujatsji. Tuma asamtai, wáinjinia nu ti enentáimtutsuk Yus enentáimtusar tuke shiir enentáimsar wekaaji.

<sup>8</sup>Tura jū ayashniumiā jūinkir Uunt Jesusjaj tuke pujustaitsar wakeraji. Tura túrattaji tu nékaji.

<sup>9</sup>Tuma asamtai jū ayashnium pujakrishā tura jū ayash ikiukrishā Uunt Jesus tuke waramtikсатаi taji.

<sup>10</sup>Warí, jū ayashjaj ii túramajnia nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristuj jeatniuitji. Tura ii túramujaj métek akirmaktatji.

### *Krístun waramtikсатаj taji*

<sup>11</sup>Tuma asamtai jū nékaji: Uunt umirkashtin ti tsúumainti. Nu nekaar ashí shuar Yus-shuaran awajsataj tusar ti takaaji. Tura incha Yus nékarmaji. Tura ii túramuj átumka atumí enentáin paant nékarme, taji.

<sup>12</sup>Ataksha, “wi pénkeraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya páatkeā nujaj warainia ná shuar tsanumprutmainiakui yaintkiatarum tusar taji.

<sup>13</sup>“Wáurkaiti” turamainiajiash. Nusha warí, itiurtamajia. Ashí túrajnia nu, Yus aneakur tura atumin yáintai tusar túrajji.

<sup>14</sup>Kame ashí ii túrajnia nu Kristu anenkrattairijjaj túrajji. Kame jū nékaji: Kristu ashí shuaran jaruku asamtai, Yus ímmianum ashí iisha jaka núnisaitji.

<sup>15</sup>Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia jū, iik wararmamsuk, Kristu umirkatniuitji.

<sup>16</sup>Tura yamaisha aya ni ayashí írsar, “nu shuar pénkeraiti” tura “nu shuar yajauchiiti,” titin tujintiaji. Kame yaunchu aya ni ayashí írsar “Kristu yajauchiiti” tu enentáimsamajia. Tura yamaikia yapajjár, esetsar enentáimkiur “Kristu Yusa Uchirínti” taji.

### *Krístujaj yamarmaitji*

<sup>17</sup>Tuma asamtai, Krístunu ajasúka yamaram najanamuiti. Yaunchu enentáimtaij menkakayi. Antsu núnaka íkias ni enentáimtaij nekas yamarmaiti yamaikia.

<sup>18</sup>Nunasha Yus túrait. In nawampramkattsa Krístun akupturmakuitji. Tura nu etserkatniun incha ataktamsaitji.

<sup>19</sup>Yuska in tunaarjinniutin asutiámatniun nakitiak Krístujaj nawampramkamajia. Tura incha Yus-shuartin nu ujaktinian ataktamsaitji.

<sup>20</sup>Krístunu ataksamu asar, Yuska “winia Uchirjaj nawamnaikiatarum” tusa ii wenejaj atumin seatmarme. Tuma asakrin, Kristu náarjin “túratatum” tájarme.

<sup>21</sup>Krístuka tunaan penké túrachmiayi. Túmanak ii tunaarjin Yus Krístun makuumiayi. Nuna tura Krístunam makuuchmin awajtamsamajia.

## 6

1-2 Ni Papirijn Yus yaunchu Isayasan juna tímiayi:

Tsawant jeamtai, amé seatmena nuna anturkamjame. Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatrin pachitkiajnina nu, Yusa anenkrattairi pénker achiktarum tusar seajrume.

3 Tura “Papru etserkamurj ántraiti” tíarajñ tusar chíkich yajauch enentáimtiktsuk péñker wekaaaji.

4 Nekas Yusa takarniurjntji nuna paant nekaawarat tusar wáitaiyatrik, atsumayatrik, itiurchatnum pujayatrik shiir katsunteaji.

5 Ju itiurchat wáinkiamji: katsumpramkarmaji; sepunam enketmáwarmiaji; charáa-charáa awajtamiarmiaji; takatcha ti itiurchat takasmiaji; kanutsuk pujumiaji; tura tsukasha ti tsukammiaji.

6 Tunáa nakitrar wekaaaji; Yus-Chicham unuimiátraitji; shiir enentáijjaj katsuntrar wekaaaji. Chíkich shuar péñker awajeaji; Yusa Wakaní pujur-tamkurin shuar nekas aneaji;

7 nekas chicham ana nu étsereaji; tura Yusa kakarmarjsha nú paant iniakmaji. Tura ni nemasrñ nupettukajñ tusa suntar ni tantarñ júana núnisrik iisha ii nemasrñ íwianch nupettamkajñ tusar ii Yusrj tuke umirkar wekaaaji.

8 Shuar shiir enentáimturmainiakrincha, yajauch enentáimturmainiakrincha, péñker chichartamainiakrincha, yajauch chichartamainiakrincha tuke Yusjaj shiir wekaaaji. “Wáitruiniawai” turamainiakrincha tuke nekas chichaaaji.

9 “Nu aents nékatsji” turamainiakrincha Yusnumka nékanji; jákatin tsúmmainnium wekayatrik tuke iwiaaku pujaji; asutiámuitiatrik mantamnatsji. Yusa takarniurjntiaj nu ashí nujaj paant nekaamniaiti.

10 Kúntuts pujayatrik ii enentáinkia waraaji; kuítrinchaitriak chíkich shuar kuítrintin awajeaji; peñké takakchiatrik ashí wáinji.

11 Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme.

12 Wikia atumin paant chichastajtsan wakerajrume; antsu átumka anenttsuk paant chichastin nakitrarme.

13 Winia uchirua núnisnak chichaajrume; wi tuke paant chichaarjarmena núnisrumek atumsha atumí enentájn ana nu, paant ujatkataram tusan seajrume.

### *Yusa jeentji*

14 Yus-shuar Yus-shuarchajaj tsaniñktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjaj métek enentáimiaiiniawak? ¿Tsáapnisha kiritjaj máimtek áminkiait?

15 ¿Kóstuka uunt iwianchjaj nawamnaikiamniakait? ¿Yus-shuar Yus-shuarchajaj tsaniñ shiir pujuminkiait?

16 ¿Jwiaaku Yusa jeencha ántar-yus pujustinkiait? Tura atumsha iwiaaku Yusa jeéntrume. Yus Ninji ni Papirijn juna tíchamka:

Niijjaj tsaniñkia pujusan, niijjaj wekasartatjai tura ni Yusrj átatjai; tura niisha Wíi aents ajasartatui.

17 Tuma asamtai junasha tímiayi:

Nii matsatania nuyá jñinkitarum, tura niijya kanaktiarum, tawai Uunt Yus; tura yajauch ana nu antiñkairap. Túrakrumninkia awayattajrume.

18 Tura atumí Aparj átatjai; átumka winia uchir átatrume. Nuna Wi imiá kakaram uunt Yus asan tajai. Tu áarmaiti.

## 7

1 Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashj tura ii enentájsa yajauch ajasajñ tusar, ashí tunáa

ana nuyá kanaktinaiitji. Túrar “Yusak nekas ii úuntrinti” takur, ii ayashsha, ii enentáisha takamtsuk tuke tsawant Yus íktustiniaitji.

*Kurintiuunmayá shuar enentáimprarmatai Papru warasmiayi*

<sup>2</sup> Ataksha nawamnaikiatai. Iikia shuar yajauch awajsachmaji; yajauch jintincharmaji; anañkachmaji.

<sup>3</sup> Makuutai tusan nuna tátsujai. Antsu nuik tíchamkajrum, iwiaaku pujakrishsha jakarsha átumka ii enentáin áchitkiarme.

<sup>4</sup> Araantutsuk áatjarme; shiir enentáimjai. Itiurchatnum pujayatnak, atumin enentáimtusan enentairuñ kakaram enentáimsan waraajai.

<sup>5</sup> Jui Masetúnianum penké ayamprachmaji. Antsu ti wáitsamji. Áentsnumia itiurchat wáinkiamji, tura ii enentáijjainkia ashamkamji.

<sup>6</sup> Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujai winia enentáirun ikiakármai.

<sup>7</sup> Tura átum nii ikiakármarumna nuna Titiu ujatkamai. Nuna antukan ti warasmajai. Títiuka átum írsatin wakerarmena nuna ujatkamai; túrunamia nuna kúntuts enentáimmiarumna nusha, tura winia anentu asarum enentáimturumna nuna ujatkamai. Nuna antukan nú nankaamas warasmajai.

<sup>8</sup> Papí nuik akupkamaj nu áujsarum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papí áujsarum ishichik kúntuts enentáimprarmna nuna nekaan waraajai.

<sup>9</sup> Kame kúntuts enentáimprakrumin waraatsjai. Antsu atumí tunaari nekaarum kúntuts enentáimprarm atumí enentáj Yusjai yapajjá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papijjai yajauch awajsachji.

<sup>10</sup> Nekaatarum. Yus wakerana nútiksar kúntuts katsunteakka ni enentáj Yúsnum yapajjáwai. Nuñkia ni tunaariya uwempraiti. Nuka “túrmainchu túraitjai” tíchamniaiti. Antsu Yusan enentáimtutsuk kúntuts pujakka ni enentáj yapajjáshataui; yapajítsuk ni tunaariya uwemtsuk jakattawai.

<sup>11</sup> Tura iistarum; Yus wakerana nútiksarmek atumí kúntutsrj katsuntearme. Tuma asarum wí áatjarmena nu esettsarum enentáimtusarme. Atumí túramurj ujatkatajtsa wakerimiarme. Tura nu tunáa nakitramarme; tura ashamkarmarme. Tura yajauchin túramia nu asutiámarme. Tura winia anentu asarum wí tímia tímiatrusrumek turatai tusarum ti wakerimiarme. Nu tura asakrumin péñker túrarmena nu, paant iniakmarme.

<sup>12</sup> Kame yajauchin túramia nuna ni tunaarin iniaisat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nankaamas átum Yúsnum in anearmena nu nekamatarum tusan áatramjarme.

<sup>13</sup> Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujatkamtai nú nankaamas shiir waraajai.

<sup>14</sup> Atumin shiir enentáimtajrumna nuna Titiun ujakmajai. Tura nuna nekas aan Titiu nekaamai. Tuma asamtai atumin natsantrachmajrume. Kame atumin tuke nekas ana nuna tímiajrume. Núnisan atumnian Titiun tímiaj nusha nekasauyi.

<sup>15</sup> Tura Títiuka atumin enentáimturmas ti waraawai. “Jiatmaktajtsa winiat-suash” tusarum ti ashamkachurmek. Túmayatrum, nii péñker tati tusarum

pachischarme. Tura nii taa seatmarma nu umikiurme. Títiuka nuna enentáimias waraawai.

<sup>16</sup> Tura wikia, átum péñker túramurmin nekaan tura péñker túrawartatui tu enentáimsan waraajai.

## 8

### *Yus-shuarti ii kuitri súsatin*

<sup>1</sup> Yatsurtiram, Masetúnia núñkanmaya Yus-shuaran Yus waitnentainia nuna yamáí ujaktatjarne.

<sup>2</sup> Ti itiuurchatnum nekapsamu ainiawai. Túmayatan warainiawai. Tura ti kuítrincha ániayatan emeentutsuk kuítrinnia núnisañ suiniawai.

<sup>3</sup> Juna wi paant nekaan ujaajrume. Niisha wakeramujai súsatniun jeainia nuna súiniawai; tura nú nankaamassha súiniawai.

<sup>4</sup> Yus-shuaran kuítrinchan súsartaitsa ti wakeruiniak, nu túratniun ti seatmarmaji.

<sup>5</sup> Tura ii enentáimijaj nú nankaamas túrawarmiayi. Emka Yúsnum niñki sumamawarmiayi. Tura Yusa wakeramuri túratatjai tusar incha “yáñtajrume” turammiajai.

<sup>6</sup> Tuma asantai, “Masetúnia nunkanam kuit júuktin nankamamamna nu, Kurintiu peprunmasha amukta” tusar Titiu seamiajai.

<sup>7</sup> Atumsha ashí péñker túratin ti nékarme. Yus enentáimtustincha, unuiniart-incha, ju nunkanmaya nekaatniusha, in aneatniusha nuka ashí nékarme. Wats, júsha túratatum. Yus-shuar kuítrincha ainia nu achikiarat tusarum Titiu támatai núkap susatarum.

<sup>8</sup> Kame atumí úuntriá núnisnak akupeatsjarne, túratniuitrume tusan. Antsu chíkich shuar ni kuítrin susartasa ti wakeruiniá nuna atumin ujakan, atumí anenkrattairi nekaspashi tusan nekapsatajtsa pujajai.

<sup>9</sup> Ii uuntri Jesukrístu waitnenkartutairi nékarme. Ashí takakuyayi, tura atumin anenma asa kuítrincha núnisañ ajasmiajai. Ju nunkanam kuítrincha núnis ajasmatai átum nayaimpiniam kuítriniak tusa túramiajai.

<sup>10</sup> Juna enentáimjai. Nuik uwitin, “yáñtatji” tuchamkarum. Tura nu túratin ti wakerimiarme.

<sup>11</sup> Nankamamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum.

<sup>12</sup> Iistarum. Ni kuítrin Yúsan nekas susatajtsa wakerakuñkia, nii jeana nuna susat tusa Yus wakerawai. “Jeana nú nankaamas susati” tátsui Yus.

<sup>13</sup> Chíkich ti núkap susarum atumnia táasat tusan tátsujai.

<sup>14</sup> Antsu ashí métek takusarat tusan tajai. Iis atumsha yamaikia ti nukap takakrume; nujai atuma nu súsatniuitrume. Ukunam chíkich tsawantai átum atumashtarmeash. Nuñkia niisha atumin suramsarti. Nu túratin ákuñkia ashí métek takustin átatui.

<sup>15</sup> Yusa Papiriñ jaunchu áarman núnis tátsuk:

Núkap takusmia nu ampirchamiai; tura ishichik takusmia nu atsumachmi-ayi.

### *Titiu chíkich Yus-shuarjai Kurintiuma wetin ármiajai*

<sup>16</sup> Tura wi aneajrumna núnisañ atumin aneatniun Yus Titiun susamiai. Tuma asantai Yúsan yuminsan pujajai.

<sup>17</sup> Iis, wi takui wétinian wakerimiayi. Tura nú nankaamas, atumin anenma asa, ni enentáijiañ wéawai.



<sup>18</sup> Tura chíkich Yus-shuar Titiujaj akupkatajtsa pujaji. Nu shuar Yusa Chichamen ti penker etserainakui, ashí Yus-shuar iruntramunam nin penker áujmatainiawai.

<sup>19</sup> Tura nú shuarnaka ii tsaniakmarj atí tusar ashí Yus-shuar iruntramunam nuna anaikiarmiayi. Iijjaj kuítian jukiarti tusar anaikiarmiayi. Iis Yusa náarjn ashí aents uunt najanawarat tusar tura ashí shuar atumí tsanjarjn nekaawarat tusar nu takat túratsjik.

<sup>20</sup> Iis, ju kuit ii jukittiajnua nu, núkap asamtai, aents tsanumprutmawarajj tusar, Titiujaj tura ju shuarjajsha wéajj.

<sup>21</sup> Yus íimmianumsha, aents íimmianumsha ii naka wekaajnia nuna nekaawarat tusar túrajj.

<sup>22</sup> Nu jimiará shuarjaj chíkich Yus-shuar akupeaji. Yusa takatrjn takastasa ti wakerana nu nekas nékaji. Tura átum yáingtin ti wakerarmena nuna nekáa niisha atumijn jeataj tusa ti wakerawai. Nuna túmak Yusa takatrjn takastinian wakerana nuna paant iniakmawai.

<sup>23</sup> Tura ajsha chíkich shuar Titiun nekaataitsar anintruiniakuisha, “Titiu Papru tsaniakmarjnti. Incha yáinmaktajtsa Páprujaj takaawai” titiarum. Chíkich Yus-shuaran nekaataitsar anintruiniakuisha, “Yus-shuar akupkamu áiniawai, tura Kristu náarjn shiir awajjn áiniawai” titiarum.

<sup>24</sup> Tura atumí anenkrattairj ashí Yus-shuar nekaawarat tusarum, nu shuar penker itiaatarum. Nu túrakrum, atumnia ii shiir tímiaj nu nekasaiti tu iniakustatrume.

## 9

### *Yus-shuaran kuítrinchana súsarmania nu*

<sup>1-2</sup> Kame átum Yus-shuar kuítrinchana súsatin wakerarme; nuna nékajai. Tuma asan núnaka áatrachminiaitjarme. Atumsha súsatin wakera asakrumin wi nunasha shiir enentáimsan, “Akaya nunkanmayaj shuar nuik uwitinia wakerusmatak yáingtinian wakeruiniawai” tusan Masetúnianmayaj shuáran ujaajj.

<sup>3</sup> Tura “kuítniasha súsatniun ti wakeruiniawai” tímiaj nuna, “wáitaiiti” tíarajjn tusan nakitiajaj. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajaj.

<sup>4</sup> Wi ukunam Masetúnianmayaj shuarjaj atumijn jean, kuit súsatin tímiarmena nuna iwiarachman wáinkian natsarajj tusan, tura atumsha natsarajjirum tusan túrajaj. Warí, “súsatniun ti wakeruiniawai” tuke tu wéatsjak.

<sup>5</sup> Nu tuma asamtai, au takui súarme tu enentáimsarajjn tusan ju Yus-shuaran emka akupenajaj. Niisha nu kuítian iwiaratniun yáinmakarti, tajaj. Nuínkia wisha Masetúnianmayaj shuarjaj ukunam jeawakrin, nu kuit atumsha nekas atumí enentáijjaink<sup>i</sup> súsatin wakerarmena nu nekaamnia átatui.

<sup>6</sup> Tura junasha paant tájarme: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete.

<sup>7</sup> Tura ashí shuar ni enentáijn enentáimsana nunak susati. “Nakitiayatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtaiwai.

<sup>8</sup> Ashí penker ana nuna suramsatniun Yus tujintiatsui. Nujaj átum atsumashtatrume. Tura chikichan yáingtin núkap takustatrume.

<sup>9</sup> Yus-Papinium ju aarma awai:

Kuítrinchan núkap susayi;

nuna tura, tuke túratin átatui.

<sup>10</sup> Arakmaun araakan súana nusha Yúsaiti. Tura yurumkan súana nusha Yúsaiti. Niisha átum péñker araatniun suramsattarme. Tura araarumna nujaj péñker túratarum tusa araakrumin ipiampartatui.

<sup>11</sup> Tuma asamtai núkap juukma takaku asarum, núkap súsatín jeattarme. Nuñkia súarmena nuna ii uwejeḡan chíkich Yus-shuar achikiar Yúsan yu-miñsartatui.

<sup>12</sup> Warí, ju kuit Yus-shuar kuítrincha súakrin ni atsumamuríncha atsumachartatui. Tura nú nankaamas Yúsan ti yumíñsartatui.

<sup>13</sup> Nu shuar yaíñtai tusarum tura ashí Yus-shuar yaíñtai tusarum súatsrumek. Nujaj Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarín uunt awajsartatui.

<sup>14</sup> Kame Yus atumin ti waitnentrainiakui kuítrum súatsrumek. Sua asakrumin nu shuar atumin ti anenmainiak Yúsan áujturmasartatui.

<sup>15</sup> ¡Tura ashí iisha ii Yusrj ti yumíñsatniuiti! ¿In súramjinia nuna yaki jintíartinian jeá?

## 10

### *Papru nekas jintintiamniaiti*

<sup>1</sup> Wats, “Papru iijjaj pujak pééjchach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkatutairjjaj juna seatjarum tusan pujajai.

<sup>2</sup> Atumí weatkamurjya shuar chichainiak “Papru ni tsaniakmarjjaj ju nuñkanam akupin ajastai tusar wakeruiniak jintintiainiawai” turutainia nuna kíishtumaktajtsan enentáimjai. Wisha atumíin jean kakaram chichaschataj tusan, nu antukairap tu seajrume.

<sup>3</sup> Áentstan̄ka nuñkanmaja áentsuitji, túrasha jú áents maania aintsar máaniatsji.

<sup>4</sup> Ju nuñkanmaja nan̄kijjaj máaniatsji antsu ii nan̄kirj Yusa kakarmarjinti. Nujaj iwianchi kakarmarj núpeteaji.

<sup>5</sup> Ju nuñkanmaja aentsu jintíamurínkia tura waantu enentáimtumamurínkia, Yus nekaatniun itit awajea nuka, nu nan̄kijjaj núpeteaji. Tura ashí ju nuñkanmaja enentáimsatin yapajniak, emetamu áintsan, Kristun umirkarat tusar nu nan̄kijjaj núpeteaji.

<sup>6</sup> Nekas umirkatin átum jeawakrumnínkia nuñkia umirkatniun tuke naki-tiainia nu, Yusa kakarmarjjaj asutiáttaji, tajai.

<sup>7</sup> Atumsha aya pátatek ana nu iyyarme. Wats, shuar nekas Kristunu ajasman nekamaka, núnisan winiasha Kristunuiti tu enentáimtursatniuiti.

<sup>8</sup> Yusa kakarmarjjaj akupeaji tuke tákuncha natsaamatsjai. Nu kakarman atumin péñker jintintiatarum tusa Kristu suramsaitji. Kame atumin emes-ratniun suramsachuitji.

<sup>9</sup> “Ni áarmarjjaj awaktamkatajtsa wakerutmaji” tátsurpash. Núchaiti.

<sup>10</sup> “Papru áarmarj ti kakaram ániawai, tura juj pujak kakarmachuiti; tura etserkatniuncha nékatsui” turutainiawai.

<sup>11</sup> Wats, tuinia nuka junasha nekaawarti. Yajá pujakur kakaram áajinia núnisrik atumjaj pujakrishá kakaram túrattaji.

12 “Wiki imiá péñkeraitjai” tuinia nujai méteketji tátsuji. Ní shuaraitji tátsuji. Warí, niisha imia nínki nekapmamainiawai. Tura ni ai ísar “nu nankaamas péñkeraitjai” tu wéenawai. Nuna túruiniak netse túruiniawai.

13 Antsu iikia, ii nekamatin jeajnia nú nankaamas waantu ajaschattaji. Ii takastatjinia nuí Yus Niñki jintinframji. Nu arant wéatsji. Kame atumíin takastinian Yus tsan̄katramkaitji.

14 Tuma asamtai, tájnia nu Yus tsan̄katramka nú inian̄kas túratsji. Warí, iisha emka Kristu chichamejai atumíin jeachmakaji. “Emka jeamji” tájnia nu ánrar tátsuji. Kame Yus tsan̄katramakrin jeamji.

15 Chikich takasmanum iikia waantu enentáimtumasar, “ii takatr̄inti” tátsuji. Antsu yamáí enentáimtarmena nú nankaamas Yus enentáimtustarum tusar wakeraji. Nu túrakrumninkia atumíin tuke takasminiaitji.

16 Nuyasha chikich takaana nuí takatsuk átum pujarmena nú arant pujuinia nusha Yus-Chicham ujaktaj tusar wakeraji. Nu túrar chikich shuar takasma “íniuiti” tíchattaji.

17 Tura péñker enentáimtumastaj tusa wakerakka, Yúsnaítjai tusa péñker enentáimtumasti.

18 Warí, nínki “péñkeraitjai” tumamna nuka anturkachminiaiti. Antsu Uunt “péñkeraiti” tana nú shuar nekas péñkeraiti.

## 11

### *Ántar etserniun Papru áujmateawai*

1 Waurua núnisnak chichastatjana nu anturtukaintrumeash. Ee, anturtukarum tusan seajrume.

2 Atumniasha Kústunak anajmamtikrajrume. Tura nuwá chikich áishman̄an nékatsuk ni áishrijaiñk<sup>i</sup> nuatnaiya núnisrumek átum chikicha chichame umirtsuk aya ni chichamenk<sup>i</sup> umiakrumin Kústuj ejetaj tusan wakerajrume. Nuna túrataj tusan atumin akasmatajrume. Nu akasmaktinian Yus surusuiti.

3 Túrasha iwianch ni nekatair̄ijjai emka nuwá Epan anañkamia nútksan̄ atumniasha Yusa jintiya awajimtikramar Kristu aneashtinian enentáimtikrampramatai anañkamu ájrum tusan tsuutajrume.

4 Warí, chikich shuar Jesusnan nusháa étserkamujai táiniakuisha péñker ántarme. Tura nusháa wakan achikiam, nusháa chichamjai uwempramniaiti tu etserainiakuisha, nekasapitia tárume.

5 Kame “Yúsnumiá akatramu asar etserkatin imiá nékaitji” tuinia nujai nankaamas nékaitjai, tu enentáimjai.

6 Ti péñker chichastinian nékachiatnak winia nekaatairsha taamtsui. Núnaka ii túramur̄ijjai tuke paant iniakmaji.

7 “Akirkata” tútsuk Yus-Chichaman atumin ujakmajrumna nuí çtunáa túrajak? Átum an̄kant ajastarum tusan wikia pééjchach ajasu asan, “etserkamunam akirkata” tíchamjarme.

8 Antsu atumin yáintaj tusan pujakun chikich Yus-shuarnumiá kuítian suruiniakui achikmiajai. Nuna túran ni kuítr̄in emeentukmiajai.

9 Tura atumjai pujusan atsumaknasha atumniaka seachjarme. Masetúnianmayá Yus-shuar taar, wi atsummiajna nuna surusarmiayi. Nu tuma asamtai tájarme, seachjarme tura seasatjararme.

10 Ashí Akaya nun̄kanam nuna ujaktinian suritrukchartatui. Nuna tákun Kristu nekasr̄ijjai tajai.

11 ¿Urukamtai nuna taja? ¿Atumin aneachu asanak taja? Atsá. Anejrumna nuna Yus nékawai.

12 Túrasha wi túrajna nuna tuke turu wétatjai. “Papru túrana núnisrik túraj” tuinia nuna tíaraj̄n tusan túratatjai.

13 Warí, niisha Yúsnumiã akatrachma áiniawai. Anan̄kartin áiniawai. “Kristu akatramur̄intji” tumá átaj tusar wekainiawai.

14 Nusha urukaku túmait tíchamniati. Warí, imia Satanáskesha “nayaimpin-maya akatramuitjai” tumá átaj tusa wekaatsuk.

15 Nuin̄kia imia ni suntar̄isha péñkeran túrawai tumá atai tusar wekasachartinkiait; túrasha ni amuamur̄inkia tunáa túriarma nujai métek nekampá asutiátin átatui.

### *Papru wáitsamia nu*

16 Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsan̄katruktarum. Ishichik waantu enentáimtumastaj tusan wakerajai.

17 Tura waantu enentáimtumastaj tájana nu, Uunta tsan̄katramur̄ijjai tátsujai. Antsu waurka núnisnak chichaaajai.

18 Untsur̄i ju nun̄kanam uunt ajasar ti waantu enentáimtumainiakui wisha ishichik waantu enentáimtumastatjai.

19 Imiá nékayatrum waurka ainia nu shiir enentáimtusrum ánturearme.

20 Niisha atumin takamtikramainiakuisha, kasartamainiakuisha, atumí nérenniur̄i ajainiakuisha, yajauch chichartamainiakuisha, yapimin awattamainiakuisha ashí nu katsuntearme.

21 Natsamayatnak tájarme jikia nu túratin kakarmachuuji! Wats, niisha araanainiatsna nuna wisha araantatsjai. (Waurka núnisnak chichaaajai.)

22 Niisha Ipr̄iu-shuar áiniakuisha wisha núnisnak Ipr̄iu-shuaraitjai. Israer-shuar áiniakuisha wisha núnisnak Israer-shuaraitjai. Apráama weetri áiniakuisha pai, wisha núnisnak.

23 Kristu takarniur̄intji, tuiniawai. Wikia aujai nan̄kaamasaitjai. Kame nuna tákun waurka núnisnak chichaaajai. Kame niijjai nan̄kaamas takasuitjai; niijjai nan̄kaamas asutiámuitjai; niijjai nan̄kaamas sepunam en̄keamuitjai; ti nukap jánin̄kiamjai.

24 Israer-shuar chikichkí achirkacharmai. Antsu tímiajni señku jea achirkarmai. Tura emka achirkarmia nūj awa-awatatkuwa trainta nuiwi ejeyarmiayi. Tura nu tímiajni señku jea achirkarmia nūisha nútiksaj̄n nujai métek awatturarmiayi.

25 Numijjai menaintiú awatturarmai. Kayajaj̄sha mantuatai tusar chikichkí tukurarmai, kanusha menaintiú wayamai wi en̄kempran wekaimiaj nūj. Tura nayaantsanm ajapén chikichik kashi nūj pujusan tsawarmajai tura nu tsawantcha tuke pujusmajai.

26 Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjaj̄sha, wíi shuarjaj̄sha tura yajaya shuarjaj̄sha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajtustaj tusar wakeriarmai.

27 Itiurchatnasha ti wáinkiaitjai; takatnasha ti takasuitjai. Ti untsur̄i kánutsuk pujusuitjai. Tsukamaknasha, kitiamaknasha wáitsaitjai. Ti ijiar-maitjai. Pushir táasmatai tsetsekr̄uj̄ wáitsaitjai.

28 Tura nuna nan̄kaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai.

29 Chikichik Yus-shuar kakarmachu pujakui wisha kakarmachu neka-peajai. Shuar chikichan tunaanum ajuawarmatainkia wisha natsamakun kajekan wáitijai.

30 Maa, waantu chichastin ákuin<sup>ka</sup>, antsu winia kakarmachu awajtuinia nuna ujakan waantu ajasaintjai.

31 Yus, ii Uuntri Jesukristu Apari ana nu (ni naari tuke shiir awajsamu ati) wi wáitratsjana nuna nékawai.

32 Tamasku péprunam pujai nu nunkanmaya akupin winia jinkia juruktiaj tusa wakerak pepru tanish téntakma wáitir<sup>in</sup> suntaran apujsamiayi. Aretas uunt kapitian pujai túramiayi.

33 Túrasha uunt chankinnium enketawar pepru aa tanishri áankamunam jiki itiararmiayi. Tu uwempramiayi.

## 12

### *Papru wáinkiamia nu*

1 Kame wiki shiir chicharmamsatniun nakítijai. Túmayatnak íimiarjana nuna tura uunt Yus iniaktursamia nuna ujaktiniaitjarne.

2 Kristun umirin ana nú áishman<sup>kan</sup> nékajai. Nu áishman<sup>j</sup> imiará nayaimpin nan<sup>ka</sup>ikin menaintiú nayaimpiniam junakniuiti. Nusha katurse uwi nan<sup>ka</sup>amasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai.

3 Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai.

4 Yus-shuara wakaní shiir pujutainium junakmiayi. Nujsa paant awasachmin ana nuna antukmiayi. Nii antukmia nú chicham paant awajsatniun suritkiamuiti.

5 Nu áishman<sup>ka</sup> túrunamuri nan<sup>ka</sup>amakuiti tajai. Tura wikia nan<sup>ka</sup>amakuitjai túmamtsuk, kakarmachuitjiana nuna paant ujaajai.

6 Nan<sup>ka</sup>amakuitjai túmamtiaj tusan wakeraknaka nekas tímniaitjai, ántran tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujai métek enentáimtursatarum tusan wakerajai.

7 Wi nayaimpiniam wáinkiamajna nu timiá pé<sup>n</sup>ker asamtai ántar waantu enentáimtumaschatniun, jan<sup>ki</sup> mesertinia núnisa<sup>n</sup> winia ayashru<sup>j</sup> najaimiatniun sunasmiajai. Nuka wi wáitsatin Satanásnumiá akupkamuiti.

8 Nuka jurutkitia tusan Úuntan menaintiú seamjai.

9 Tuma ain Uunt winia turutmiayi “Atsá. Jaa pujayatmek winia waitnenkartutair<sup>jai</sup> shiir pujame. Shuar kakarmachun winia kakarmarun Wi suakui ashí aents nu shuara ayash<sup>in</sup> winia kakarmarun wáiniainiawai.” Tuma asamtai, Kristu kakarmari winia ayashru<sup>j</sup> paant ati tusan kakarmachuitiatnak araantatsjai.

10 Tuma asamtai, wi Kristun anekui shuar katsekruuniakuisha, kajertuiniakuisha, winia kuítrusha, kakarmarsha atsai<sup>n</sup> waraajai. Kame ashí ititurchat ana nu<sup>j</sup> kakarmachuitiatnak kakaram nekapeajai.

11 Wi “pé<sup>n</sup>keraitjai” túmamkun waurua núnisnak chichaajai. Tura atumsha winia pé<sup>n</sup>ker chichartusminiaitiatrumek, túrachu asakrumin tu chichasjai. Warí, wi pé<sup>n</sup>ké ántraiatnak, “ti pé<sup>n</sup>ker akatramuitji” tumamainia nú nun<sup>ka</sup>achichuitjai.

<sup>12</sup> Atumjaj pujumiaj nuĵ, itiuŕchat ámanmañ katsuŕtran takasmaĵajai. Yuska ni kakarmariñ iniakmastaj tusa ti uuntan aents tujintiamun túratniun surusmiayi. Nuĵaj “Papru nekas winia akatramuruĵi” tusa paant iniakmasmiayi.

<sup>13</sup> Warí, chíkich Yus-shuaran yáinĵmĵaj núnisnak atumniasha yáinĵmajrume. Áyatik atumin “kuit surusta” tíchamjarme. ĵNu yajauchiitkiuinĵkia tsañkurturtarum!

### *Papru atak táinĵrin uĵakmiania nu*

<sup>14</sup> Jújainĵkia menaintiú iwĵiarnarjai atumin ístaj tusan. Tura jeaknaka, “etserkamun akirkatarum” tíchattajrume. Atumí kuĵĵrin wakeratsjai. Antsu atumin wakerajrume. Warí, winia uchirchakaitrum. Uchisha aparĵin kuĵĵian ikĵiauntukchatniuiiti. Antsu aparĵi ni uchirĵin kuĵĵian ikĵiauntukĵinĵiaiti.

<sup>15</sup> Atumniasha yáinĵtaj tusan ashí takakjana ĵuna ajapawaintjai, tura winia kakarmarnasha ashí emenĵkákaintjai. Wi ti wakeramaitiatrum átumka ishichik wakerutarminiñ túrawaintjai.

<sup>16</sup> Túřasha chíkich shuar chichainiak “Nekasaiti; Papru niñki ii kuĵĵrin juru-tramkichmĵai. Túřasha anañkartuatniun neka asa in anañkramachmiashia” turutainĵatsuk.

<sup>17</sup> ĵNusha itiuřa? ĵShuáran wi akupkamaj nuĵaj kuĵĵrumin achĵikĵak?

<sup>18</sup> Atumin ířmasat tusan Titiun “wetá” tímiĵajai. Tura nin atamprĵit tusan chíkich Yus-shuaran akupkamĵai. ĵTitiusha kuĵĵrumin juruttramkĵimĵiarum? ĵWisha niisha mai metek enentáimsar métek takaschamĵaj’?

<sup>19</sup> ĵWarí enentáimsarum? ĵÁtum péñker ániawai turutik tusar nu táĵik? Antsu, aneamu yatsurtiram, ii táĵinia nu atumin Yúsnum ikiakártajrum tusar taji.

<sup>20</sup> Wi atumĵin jeaknasha, wi wáitĵiatĵaj tusan wakeraj nuna wáinkiashtatjai, tu enentáimsan itiuŕchat enentáimĵai. Tura atumsha wakerarmena núnisrumek wáinkiashtatrumĵe, tu enentáimĵai. Yajauch chicharnaĵiatniunĵcha, yajauch enentáimĵtunaistinniasha, kajernaĵiatniunĵcha, niñki enentáimĵtumastinniasha, tsanumpratniunĵcha, máĵ-tunai ajatniunĵcha, waantu enentáimĵtumastinniasha, yajauch wekasatniunĵcha, ashí nuna wáinkiashtajash tusan itiuŕchat enentáimĵai.

<sup>21</sup> Tura wi jeaknasha, átum yajauch túratniusha, tsanĵřmatniusha tura yajauch ti wakerarmena nu, yaunchu túřiniarmena nu, unĵsurĵ shuirtiram inĵiaisachurmena nuna nekashtajash. Tura enentáimĵ yapajĵtsuk tuke tura asakrumin úťchatĵajash tĵajai. Kame wi átum umikchamun nekaamtai Yus winia inĵiatsářtattawai tusan tsúumĵajai.

## 13

<sup>1</sup> Jujaj menaintiú ístajrum tusan winĵajai. Ashí iwĵiartin ana nu, ĵimĵiará tura menaintiú shuara chichameĵaj iwĵiarnartatui.

<sup>2</sup> Wi atumĵaj puĵachiatnak, atumĵaj puĵáa núnisnak áatjarme. Yaunchu tunáa túřiniarmena nuna tura ashí shuártirmin wi nuik tímiĵajrumna nuna ataksha tájarme, wi atak tana tunaarum iwĵiareachkurmĵinkia inĵiaisashtatjarme.

<sup>3</sup> Nuñkia wi Kristu kakarmariĵĵaj chichaaĵna nu nekaattarme. Nu nekaataĵ tusarum wakeratsrumek. Tura Krĵstuka kakarmachuchuiti. Antsu atumĵi enentáinĵ kakaram takaawai.

<sup>4</sup> Kristu nekas kakarmachua núťksañ krúsnum máamuitiat, Yusa kakarmariĵĵaj iwĵiaakuiti. Ayashniunĵ Kristu kakarmachu nekapmĵia núnisrik iikĵia

kakarmachuitji. Túrasha Yusa kakarmarjijai ni takatř takaaji. Nu atumin iniakmastatji.

<sup>5</sup> “Nekas Yúsan umirniuashitiaj” tusarum nekamatarum. Ímiastarum. Ántar Yus-shuarchaitkiurmeka Jesukřistu atumí enentájn pujurtama nu nekaattarme.

<sup>6</sup> Tura iikia ántar Yus-shuarchaitji nu nekaatarum tusan wakerajai.

<sup>7</sup> Tura átum tunáa túrawájrurum tusar Yus seaji. Aents in péńker enentáimtikramprat tusar tátsuji. “Ántar áiniawai” túrampriniġ, átum péńker wekasatarum tusar wakeraji.

<sup>8</sup> Warí, Yusa nekas chichameġ emesratin tujintiaji. Antsu ii túrajnia nu Yusa nekas chichameġjai túraji.

<sup>9</sup> Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji.

<sup>10</sup> Atumin emesratin Yuska winia akuptatsui. Antsu Yus akuptukuiti atumin ikiakártinian. Tuma asamtai, wi atumġjn jeaknaka kakaram chicharkajjrurum tusan winitsuk ĵu papin áatjarme.

### *Amikmaawai*

<sup>11</sup> Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprarti. Chikichík enentáik enentáimsatarum. Shiir awajnisarum pujustarum. Tura Yus anenmarmena nu, shiir enentáimtikramna nu atumġjai pujurtamsattarme.

<sup>12</sup> Yúsnurum shiir enentáimtunaisrum amikmaanaisatarum.

<sup>13</sup> Ashí Yus-shuar ainia nu amikmaatmarne.

<sup>14</sup> Uunt Jesukřistu waitnenkartutairġ, Yusa anenkrattairġsha atumġjn pujurtamsati. Tura Yusa Wakanġsha tuke nemartamsarti. Nu atí.

## Papru KARASEANMAYA SHUARAN Papi aar akuptukma

### *Karaseamaya Yus-shuaran Papru áatramiania nu*

<sup>1</sup> Wi Pápruitjai, Yus akatramu. Yúsak winia akatturuíti. Shuarka akatturchamai. Yussha chíkich shuáran akupturak akatturchamai, antsu Nunki, Yus Apa, Jesusan jakamunmaya iniantkímia nu, tura Jesussha winia akatturarmai Yusa shiir chichamen etserkatniun.

<sup>2</sup> Wisha, ashí Yus-shuar wijiáj pujuinia nusha, ju papi akupeaji. Ashí Yus-shuar Karasea nunkanam pujarmena nu áujsatarum tusan ju papin akuptajrume.

<sup>3</sup> Yus Apa tura ii Uuntri Jesukristusha waitnentrainia ásar yainmakarti imiatkinchanum tuke shiir pujustinian.

<sup>4</sup> Yus ii Aparj nuna wakera asamtai, Jesus ni ayashin surumak wáitsamiayi ii tunaarj asakartinian. Nuna tura ashí tunáa ju nunkanam ana nuyá ankant awajtamsatai tusa in yáinmaji.

<sup>5</sup> Tuma asamtai tuke Yus shiir atí. Ayu.

### *Chíkich uwempratin chichamka atsawai*

<sup>6</sup> Maa, nekasaash timiá wárik Yus ikiukmiarum. Kristu in ti anenma asamtai Yus ni shuarj ajastinian in anaitiamkamji. Urukamtaitasuk nuikia imiá wárik ni chichame inaisamarum nusháa chicham umikrum uwemprataj tusarum.

<sup>7</sup> Wátsek, nekas chíkich chicham penké atsawai shuar umikar uwempratin. Antsu yajaya shuar atumjin taar péñkercha awajtamainiawai. Tura nusháa chichaman etserkar Yusa shiir chichamen yapajilatniun wakeruinawai.

<sup>8</sup> Tuma asamtai Yus nin yajauchiniam yumiñkrattawai. Wisha Yus-Chicham yapajiámun etserkamtaíñkia Yus winia yumiñkrurtatui. Nayaimpinmaya suntarsha nusháa chichaman wi etserkachmaj nuna étserkuíñkia nunsha yumiñkrattawai.

<sup>9</sup> Paant ujakjarme túmaitiatnak ataksha ujaajrume: Nánkamas shuar nisháa uwempratin chichaman, wi etserkachmaj nuna étserkuíñkia Yus yumiñkrattawai.

<sup>10</sup> Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

### *Papru júnis Yus akatramu ajasmiai*

<sup>11</sup> Antsu nekaatarum, yatsuru. Uwempratin chichaman wi étserjana nuka áentsnumianchuiti.

<sup>12</sup> Aentska ujatkachmai. Unuitiutnasha unuitiurchamai. Antsu Jesukristuk winia paant jintintruamai.

<sup>13</sup> Tura wi yáunchu ti yajauchin túramiaj nuka antukchakaitrum. Israer-shuar Yúsnan takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme.



14 Tura kakaram ajasan, ii uuntri yaunchu tiarmia nuna yawetsuk umiktinian ti enentáimpramjai. Tura untsuri shuaran wijiai métek uunt armia nuna nankaamas Yúsnan takasmajai. Túmaitiatan aya winia úuntron chichamen ti umirniuyajai.

15 Túrasha wikia akiintsain Yus winia achirkamiayi, tura ti anenkratmarijiai winia anaitiukmiayi.

16 Nuikia shiir enentáimiuk ni Uchirín paant nekamtikruamai. Tura Israer-shuarchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai.

17 Uunt péprunmasha, Jerusarénumka, wéchamjai wini emkaru Yus akatramujai chichastinian. Antsu wárik Arapia nunkanam wémajai. Tura nuí Yúsan enentáimtasuan atak Tamasku péprunam waketikimjai.

18 Tura menaintiú uwí nankaasmatai, nuyá Pítrujai áujmattsataj tusan Jerusarénum jeamjai. Tura jimiará semanachik pujusmajai Pítrujai.

19 Tura Jakupuncha, ii Uuntri Jesusa yachia nuna, wáinkiamjai. Nú arantka chikichnaka Yus akatramunka wáinkiachmajai.

20 Yus iirui. Wi tájana nu nekasaiti, wáitchaiti.

21 Nú ukunmasha Siria nunkanmasha, Sirisia nunkanmasha wémajai.

22 Tuma asamtai ashí Yus-shuar Jútía nunkanam pujuarmia nu winia nekaracharmai.

23 Aya antukarmai. “Yaunchu in ti áinrammij nu yamaikia Yus-Chichaman étersek wekaawai. Yaunchuka in amutmaktinian wakeriniaitiat yamaikia iniaisaiti” tiarmai.

24 Túravar winia enentáimtursar Yúsan shiir yuminsarmai.

## 2

### *Chíkich Yus akatramu Paprun shiir enentáimtuiniawai*

1 Tura katurse uwí nankaasmatai wisha Pírnapijiai Jerusarénum wémajai. Titiuncha jukimjai wijiai.

2 Yus akupta asamtai Jerusarénum wémajai. Tura nuí jean aya Yus-shuara úuntrijaiin áujmattsamjai. “Júnisnak ashí Israer-shuarchan Yus-Chichaman ujainiajai” timiajai. Takasmajna nusha tura tuke takastin enentáimjiana nusha ántar aijn tusan tu áujmattsamjai.

3 Niisha Yus-shuara úuntrintiat itiurchat enentáimpracharmai. Antsu chíkich shuarka Titu Israer-shuarchaitiat wijiai pujakui niisha Israer-shuar ajastí tusa tsupimiamtikiatniun wakeriarmai. Túrasha tujinkiarmai.

4 Tura nu shuar ántar yachi áiniak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asamtai ti shiir iisha Yus yúpichuch umíajai. Tura nuna nekaawar, atakka, aya yaunchu akupkamu itiurchat ana nujaj uwentikrampratniun wakerutmakarmajai.

5 Túrasha penké ishichkisha umikchamji. Antsu atumijn Yus-Chicham yapajniátsuk métek jeartamat tusar ni chichame penké anturkachmaji.

6 Nu arantcha Yus akatramu uuntrinika yamaram túratniunka suruscharmai. Nincha ashí aents ti neka ainiawai tu enentáimtuiniawai. Kame nu shuar ti nékainiakuisha ti enentáimtatsjai. Yus ashí shuaran mash métek iyatsuk.

7 Yus akatramu uuntrisha Yus winia Israer-shuarchan Yus-chicham ujaktinian akuptukma nuna nekarawarmai. Tura Pítruncha akupkamai Israer-shuaran Yus-Chicham ujaktinian.

<sup>8</sup> Pítrun Israer-shuarnum akupkama nú Yusak winiasha akuptukmai Israer-shuarchanum.

<sup>9</sup> Tuma asamtai Jakupusha, Pítrusha, Juansha, Yus akatramu uuntri ásar, Yus winia ti paant akuptan nekaawar, winiasha Pirnapínsa, “Ayu, átum, Israer-shuarchanum Yus-Chicham etserkatarum, tiarmai. Iisha Israer-shuarnum Yus-Chicham etserkattaji” tiarmai. Túrawarmatai shiir áujnaisar ii uwejejai achirnaikiamji métek enentáimji tusar.

<sup>10</sup> Áyatik “Kuítrincha enentáimtusum tuke yáintarum” tiarmai. Wisha núnaka ti wakerakun tuke túriniaitjai.

### *Papru Pítrun chicharkamai*

<sup>11</sup> Tura nú ukunam wi Antiukía péprunam pujajñ Pítur tamai. Tura nuñ yajuch túramtai, Yus-shuara úuntriñiak chicharkamjai.

<sup>12</sup> Iis, Israer-shuar tuñiawai, “Israer-shuarcha Muisais timia núnisan tsupirnakcha asamtai, nu shuarjai yurumáshtiniaiti” tuñiawai. Túmaitiat Pítur yurumámñian nékaka, emka Sántiak shuar táatsajñ Israer-shuarchajai yurumámai. Tura nuyá Sántiak shuar Jerusarénnumiá Antiukíanam jeawarmatai Pítur ashamak tsupirnakcha shuarnumiá kanakin yurumáchmai. “Tsupirnakhtiniaitme” tiniu ainia nuna ashamak túramai.

<sup>13</sup> Tuma asamtai chíkich Yus-shuar, Israer-shuar armia nu, Pítrujai métek emka yurumáwaru ániayat jimiará enentai takusar ukunam iniaisarmai. Pirnapísha neka áyat nútiksajñ nupetnakmai.

<sup>14</sup> Tura nuna ísan ashí íimiainiañ Pítrun chicharkamjai. Yus Shiir Chicham tana nujai métek wekasachu ásarumatai tímiajai “Ame Israer-shuaraitiatam Israer-shuarti ikiukim tsupirnakchajai yurumám Israer-shuarcha áintsamek túrame, tímiajai. Nuikia “Israer-shuarcha Israer-shuurtijai métek wekasatin ániawai” tiip” tímiajai.

### *Israer-shuarsha Israer-shuarchasha mai métek Yúsan enentáimtusar uwemprartatui*

<sup>15</sup> Iikia nekas Israer-shuaraitji. Israer-shuarcha, tunáa ainia áaniuchuitji.

<sup>16</sup> Túmaitiatar ju nékaji. Akupkamu umiamujai uwemprachminiaitji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajainchu atai tusar. Aya Kristu nekas enentáimtusar péñker átatji. Akupkamu takasar umirkarsha tuke nujai péñker ajaschattaji. Akupkamunka shuar umiktaj táyat, chíkichki shuarke-sha nujai péñker ajaschamniaiti. Nu nekaar antsu Jesukrístu nekas enentáimtusmaji péñker ajastai tusar.

<sup>17</sup> Tura Israer-shuar enentáimprashtimpiash, “Wátsek, núnisaitkiuñkia wisha Krístun enentáimtustaj tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” péñké tu enentáimprashtiniaiti.

<sup>18</sup> Antsu yaunchu, wi túrashtiniaitjai tímiaj nuna awainkin túratniuitjai tákunka nuikia nekas tunaitjai.

<sup>19</sup> Iista, akupeamun umiktaj tukaman péñké tujinkiamjai. Umiktinian tujinkian jaka áintsanak ajasmajai akupeamunam. Antsu Yusjai iwiaaku pujajai ni wakera nuna umiktinian.

<sup>20</sup> Wisha Krístujai krúsum jákaitjai. Tuma asamtai yamaikia wikia iwiaak-tsjai wi wakeraj nuna túratniun antsu Kristu winí iwiaakui ni wakera nuna túratniun. Tura ju ayashniun pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi.

<sup>21</sup> Yus ti péñker asamtai itiurak “Kristu ántar jakamiayi” títiáj. Iis, aya akupkamun umirkan péñker ajasminiaitkiuñkia, nuikia Kristu ántar jákaayi.

### 3

#### *Yus akupkamu tura Yus enentáimtustin*

<sup>1</sup> ¿Warin aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant étserkun atumin iniaktuschamkajrum?

<sup>2</sup> Wátsek, aniastatjarne, enentáimpratarum. ¿Warijiain Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusurum ni Wakaní achikchamkuram?

<sup>3</sup> ¿Tuke nétsékaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarijiain umiktin enentáimprarmek.

<sup>4</sup> Penké ántarmek wáitsamarum tura antsu ishichkisha unuimiar-chamkarum?

<sup>5</sup> Naka enentáimpratarum. Yus ni Wakanín súrantsuk tura aents túrachminian atumíin ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraiti.

<sup>6</sup> Yaunchu ii uuntri Apraám enentáimpratai. Yus-Chicham nin tawai: “Apraám Yúsan enentáimtusmatai Yus “Ayu, péñkeraitme” tímiayi” tawai.

<sup>7</sup> Iis, nujai páantchakait. Ashí shuar Yúsan enentáimtuinia nuka Apraámjai métek enentáimpraru ásar, ni uchirja áintsan ajasaru ániawai.

<sup>8</sup> Yamái páantaiti. Yus ashí Israer-shuarchancha tawai “Aya winia enentáimtusarum péñker átratume”. Israer-shuarchasha nujai péñker ajastinia nuna ti yaunchu neka asa, Apraáman ujakmiayi, “Ámijjai ashí aents ti shiir ajasartatui.”  
Tu ujakmiayi.

<sup>9</sup> Tuma asamtai ashí shuar Yúsan enentáimtuinia nuke Apraámjai métek péñker ajasar shiir warasartatui.

<sup>10</sup> Antsu ashí shuar “akupkamun umirkan uwemprattajai” tuinia nuka yajauchiniam yumiñkramu ániawai. Yus-Papinium áarchamukait “Ashí shuar Yus akupkamun ashí aarma nuna takamtsuk umirkachka yajauchiniam yumiñkramu ániawai.” Tu áarmaiti.

<sup>11</sup> Nújainkia páantaiti. Akupkamu umirkatniujai péñker ajaschamniaiti Yusjai, antsu aya Yus enentáimtusam péñker ajasam uwemprattame.

<sup>12</sup> Shuar akupkamu umirkatniun enentáimna nuka aya nujai péñker ajastinian enentáimuii; Yúsan enentáimtak péñker ajastinian enentáimtsui.

<sup>13</sup> Tura Kristu yamaikia uwentikrampramji. Akupkamun umirkachu yumiñkramuiti tana nuka in túramtsuji. Antsu Kristu in yainmaktin krúsnum jaka yumiñkramu ajasmiayi. Kame áarmaiti: Shuar jakati tusa numiniam nenasma yumiñkramuiti.

<sup>14</sup> Tuma asamtai Jesukristu jakamujai ashí Israer-shuarchasha Apraámjai métek péñker shiir warasartatui. Iisha núnisrik nu shuarjai Yusa Wakaní, Yus akupkataj timia nusha, achiktatji Yus enentáimtusar.

#### *Yus akupkamu tura Yus túrattana nu anajmarma*

<sup>15-16</sup> Iis, yatsuru, Yus Apraáman Chichaman najana anajmatuk,

“Ámijjaj tura amée weeá akiinkiatana nujajsha ashí aents ti shiir ajasarta-tui” tímiayi.

Kame ‘amée weeá akiinkiatatna nujaj’ tíchamiayi, antsu ‘akiintiatta nujaj’ tímiayi. Nuna taku chikichik átinia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naarj apujas nuikia nekas yapajítsuk umikiniiaiti. Umítsuk iniaisachminiiaiti. Patattasha patattsachminiiaiti.

<sup>17</sup> Wátsek, Yus núnisan Chichaman Apraámjaj najana, ukunam umítsuk iniaisachminiiaiti. Tura Chichaman najanamia nú ukunam, kuaru sianu nuyá trainta (430) uwí nankaamasmatai, Yus ni akupkamurjñ Muisaisan susamiayi. Túramaitiat nujaj Yusa yaunchu Chichamen yapajjáchmiayi iniaisatniun.

<sup>18</sup> Tuma asamtai Yus timia nuka tuke uminkiatatawai, Yus yaunchu Apraámjaj Chichaman najana asamtai. Nújainkia páantaiti, péñker ajastajtsar akupkamu umikrikia shiir pujuschartatji antsu Yus timia nujaj iikia takatsuk shiir pujustatji. Nuna tsanekatkamiayi Yus Apraámjaj Chichaman najaneak.

<sup>19</sup> “¿Nuikia Yus urukamtai akupkamun susamia?” tíchaintmeash. Ayu, Apraám weean, Kristu táatsajñ Yus tímia nu uminkiachminiuyayi. Tuma asamtai nii táatsajñ ashí tunaan túrawarmia nu timia yajauchiiti tusa Yus akupkamun susamiayi. Tura Yusa suntari jñ akupkamun ashí iwiarar Muisaisan susar akatarmiami Israer-shuaran susárti tusar.

<sup>20</sup> Antsu chikichik shuar ninki takastinian enentáimkiunka chikichan atsumatsui. Tura Yus aya chikichkiiti. Ninki chikichan akattsuk ashí aentsun Apraámjaj péñker awajsatniun Apraáma anajmatar niijjaj Chichaman najaniayi.

### *Yus akupkamu ititúrkátin*

<sup>21</sup> “¿Tura Yus jimiará chichamjaj chichaawak, tíchaintmeash. Emka Apraáman “Jujaj uwemprattame” tíchamkia, nuyá Muisaisan ni akupkamurjñ súsachmakia?” tíchaintmeash. Tura áintsachuiti. Nekaata, akupkamu umirkatniujaj Yusjaj tuke péñker pujusminiaitkiunka nuyá aya akupkamujaj uwempram tunaajainchu ajasaintme.

<sup>22</sup> Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukrístu enentáimtuinia nú shuar, aya Yus timia asamtai, uwemprartatui.

<sup>23</sup> Tura Kristu táatsajñ Nin enentáimtuschamniauyayi. Tuma asamtai Nii táatsajñ akupkamuka in emettama pujurtamji aya akupkamu tana nu umirkatin. Tura ukunam jñ nekanayi: Kristu enentáimtusar uwempratniitji.

<sup>24</sup> Akupkamu, nuika, in waitmakmaji uchin kuírchin wainnia áintsajñ. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsaj péñker áiniawai.

<sup>25</sup> Yamái Kristu nekas enentáimtustiniiaiti tuma asamtai yamaikia akupkamu kuírchia áintsajñ wáitmsajñ.

<sup>26</sup> Antsu Jesukrístu enentáimtusar, nujaj Yusa uchirí úuntmaru ajasuitji.

<sup>27</sup> Ashí Kristu náarjñ imiaimutirmeka Kristu áintsajñ ajasuitrume.

<sup>28</sup> Jesukrístujaj tsanijñku asarí imiá métek aji. Israer-shuar, Israer-shuarcha, ankant ainia nu, ankantcha ainia nu, áishman, nuwá, ashí mash Jesukrístunuitkiuinikia yamaikia “niishaaiti” tu enentáimprashtiniiaiti. Ni shuari mash chikichik áinijaj.

<sup>29</sup> Tura Krístunuítkiurmeka Apraám weeá áintsan ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

## 4

<sup>1</sup> Kuítrinniu uchirí ashí ni aparí takakna nuna niiniu áchattawak ukunam. Tura uchichitkiunka ni aparí takarniurija núkete.

<sup>2</sup> Tuke uunt ajatsuk ni wáinnia nuna umirkatniuiti. Tura uunt ajasmatai tura ni aparí “Ayu” takui nuyá nii antsu ni aparíniu ashí wáinkiatniuiti.

<sup>3</sup> Núnisrik iisha úchichik asarkia ashí aentsu akupkamurí umirkatniui.

<sup>4</sup> Tura tsawant jeamtai, Yus ni Uchirín akupkamiayi ju nunkanam. Niisha Yúsaitiat nuwanam akiiniamiayi. Tura aents ajasmiayi. Tura aents ajas yaunchu akupkamuncha umirkatniuyayi.

<sup>5</sup> Nujaj ashí aents akupkamun umirkatin armia nuna uwemtikrataj tusa támiayi. Tura iisha yamaikia nujaj ni uchirí uunt ajasminiaitji.

<sup>6</sup> Atumsha nekas ni uchirí ajasakrumin Yus ni Uchirí Wakanin atumi enentáin akupturmakuiti. Tura nu Wakan atumí enentáiya Yúsan “Aparú” tawai.

<sup>7</sup> Tuma asamtai yamaikia aya takarniuchuitme antsu Yus ni uchirín najatmaiti ámin. Tura ni uchirí asakmin ashí Yus takakna nuna amastatui Krístuiyan.

### *Papru nu Yus-shuaran yáintinian wakerawai*

<sup>8</sup> Yaunchu átum nekas Yus nékachkuram, ántar-yus írúnna nu umirkamarme nekascha yúsak.

<sup>9</sup> Tura yamaikia nekas Yus nékarme, kame Yus atumin nekarmarme. Núnis asamtai itiuirtsuk atak aentsu akupkamurí umirkatin enentáimprum. Nujaj kakaram ajaschamniaitme tura umikmesha yainmakchattawai uwempratin.

<sup>10</sup> Átumka jísat ti najanearme. Yaunchu jisat najanatin amia nú tsawantcha, nantusha, nuwisha, jísat tuke najanearme Yus shiir enentáimtursati tusarum.

<sup>11</sup> Ashamajai, atumíin ántankeash takasmaj tusan.

<sup>12</sup> Yatsuru, wi atumea áintsanak ajaschamkaj; atumsha yamaikia wi wekaa-jna áintsarmek wekasatarum. Wi nuí pujakui ishichiksha yajauch awaj-tuschamarme.

<sup>13</sup> Antsu nekamarme ayashruj itiuirchat pujayatan Yusa shiir chichamen emka ujakmajrume.

<sup>14</sup> Tura winia sunkur ti yajauch awajtajin atum winia nakitrurum muírukchamarme, antsu Yusa suntaría áintsarmek itiararmarme. Jesukrístu anturkatniua áintsarum anturtukmarme.

<sup>15</sup> Maa, wi nékajai, nuik atumí jjiimi ukuinkiarum surusaarme, túramniaitkiurmeka. Tura shiir enentáimprarmena nusha itiuirsukait yamaisha.

<sup>16</sup> Yamaikia nekas chichaman étserkun áatumí nemasrj ajasjak?

<sup>17</sup> Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winíya akantamkitiai tusa wakerutmainiawai, winia antsu shiir enentáimtursat tusar.

<sup>18</sup> Niisha nekas yainmaktinian wakerutmainiakka atumin shiir awajtam-satin tuke péñker ainti, wi atumjai pujajinsha tura pujatsajinsha.

<sup>19</sup> Uchirú, nuwá jurertaj tana núnisnak ataksha wáitijai Kristu atumíin paant atí tusan.

<sup>20</sup> Atumjaj pujaknaka maak aintjai. Yamái pujaknaka nekas nusháa chichasaintjarme. Itiurkatjarmetsuk nékatsjai.

*Akarsha, Sarasha jimiara Chichaman nakumainiawai*

<sup>21</sup> Ayu, “akupkamu umirkatniuiti” támena nu nekaata; akupkamuka júnisaiti.

<sup>22-23</sup> Aarma awai: Apraám jimiara uchirtiniuyayi. Emka ni takarniurj jurermiayi Ismaeran. Nuyá Apraáma nuwe jurermiayi Isakan. Ismaera nukurj Apraáma takarniuriyayi. Tura Apraám Yusan enentáimtutsuk ni-ijjai kanarmatai, ni takarniurj jurermiayi. Tura antsu Isaka nukurjñkia takarniurinchuyayi, antsu nekas ni nuwe áuyayi. Niisha ti úntchiniak, Yus “jureratme” tímiayi. Tuma asamtai Yus timiajai Isakan jurermiayi.

<sup>24</sup> Ayu. Yamái tájana nuka Yusa Chichamen jímíaran nakumui. Ismaera nukurj Akar chikichik Chichaman nakumui. Yaunchu Senái muranam Yus ni akupkamurjñ áarmiayi Israer-shuar, takarniua áintsan, umirkarti tusa.

<sup>25</sup> Senái murasha Akara nunke Arapienam wajaawai. Akarsha Senái muran nakumak, ashí Israer-shuaran “Akupkamujaj uwempramniaiti” tunia nuna nakumui. Yamaisha Israer-shuara uuntrj Jerusarennum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan waítsar takainiawai.

<sup>26</sup> Antsu ashí Yus-shuarti uwempra asar imiankas ankant pujaji. Nayaimpinmayá Jerusarennumiá áentsuitji. Nuyá áentsti tuke ankant pujuinijai. Nuyá aents asakrin, nu yakiya Jerusarenka ii nukurja áintsan enentáimpramniaiti.

<sup>27</sup> Júnis áarmaiti:

Warasta, misurma, uchi takakchiatmek;  
Ti shiir warasta, uchi najawe nékachiatmek.  
Nuwa ajapamu uchin jurertatui;

Nuwa áishrinnia núnaka nankaamas uchirtin átatui.

<sup>28</sup> Iisha, yatsuru, Isaka áintsar<sup>i</sup>, Yus timiajai akiiniaitji.

<sup>29</sup> Yaunchu Ismaer Isakan kakerak itiurchat awajsamiayi. Núnisan yamaisha Ismaera áintsan aya ayashnumiá ainia nú aents Yusa Wakanija akiinia nuna yajauch awajenawai.

<sup>30</sup> Tura Yus-Papinium áarmaiti:

“Takarniusha, ni uchirijjai, ajapam awemata. Nekas péñker nuwa uchirijjai tsanin pujuschamniaiti. Aparj kuítrincha achikchamniaiti,” tawai Yus-Papí.

<sup>31</sup> Ayu, yatsuru, nekaatarum. Takarniu uchirinchuitji antsu ankant pujaji nekas péñker nuwa uchirj asar<sup>i</sup>.

## 5

*Yusjaj tuke ankant atarum*

<sup>1</sup> Kristu uwemtikrampramijai tuke ankant átinian. Tuma asamtai kakaram ajasam tuke ankant pujustá. Ataksha nu itiurchatnum waketkip.

<sup>2</sup> Wi Papru asan ujaajrume. Átum Muisais timia núnisrumek tsupirnakrumniñkia ¿Kristu nuikia warí ititurtamkamniait?

<sup>3</sup> Ataksha tájarme, ashí tsupirnakua nu shuar ashí Muisais timia nuna takamtsuk umirkatniuiti.

<sup>4</sup> Atum “Akupkamu umiakmin Yus shiir enentáimturmastatui” tárumna nu, nu shuartiram Krístuiyā tupañniuitrume. Yusa aneñkrattairiyā kanakni-urme.

<sup>5</sup> Iikia, antsu, Yusa Wakanjijai tura Yus enentáimtakrin Yus shiir enentáimturmatatji, tu enentáimji.

<sup>6</sup> Nekas Krístunuiťkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

<sup>7</sup> Atumsha Krístujai péñker wekaimiarme. ¿Urukamtai nekas Yus timia nu iniaisatin enentáimprum ataksha akupkamunam waketkitin?

<sup>8</sup> Nú enentai Yúsaiyanchuiti. Nijijai wekasatniunka Yus achirmakuitrume.

<sup>9</sup> Ju enentáimpratarum: Karía ishichik yuminnium enketam mashí karimťiktisuk. Aneartarum atumsha.

<sup>10</sup> Ayu, Yus yáinmakrumin wi tájana nu nusháa enentáimprashtatrume, nékajai. Tura atumin yajauch áujmatramainia nuna Yus asutiáttawai páchitsuk.

<sup>11</sup> Wikia, yatsuru, yamaisha “tsupirnaktiniaiti” tuke tákuinkia Israer-shuar yajauch awajtuscharainti. Antsu Krístu jakamun étsereatnak “tsupirnaktini-aiti” tákuinkia kajertukcharainti.

<sup>12</sup> Atumin yajauch awajtamsatin wakeruiniana nú shuar antsu niñki tsupimiakar yajauch awajmamsarti.

<sup>13</sup> Atumniasha, yatsuru, Krístu tuke ankant awajtamsarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum.

<sup>14</sup> Ju chichamjai ashí akupkamu mash uminkiatstawai: Ame ayashim aneamna áintsamek chíkich shuarsha aneata.

<sup>15</sup> Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrume.

### *Ayash wakeramu tura Yusa Wakanj wakeramu*

<sup>16</sup> Ju na tájarme: Atumí ayashj wakerana nu umikijaj tusarum Yusa Wakanj kakarmarjijaj wekasatarum.

<sup>17</sup> Yusa Wakanj wakera nuna ame ayashim nakitiawai. Tura ame ayashim wakerana núnaka Yusa Wakanj nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait.

<sup>18</sup> Tura Yusa Wakanj jintinramkuinkia, aentsu akupkamurijaj itit áchattame.

<sup>19</sup> Wats, ayash túramu ti paant áiniawai. Ju áiniawai: tsanirmatin, wapik túratin, yajauch túratin,

<sup>20</sup> ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nañkaamantu enentáimtumastin, aya niisháa niisháa enentáimsartin, níiniunak íistin,

<sup>21</sup> yajauch enentáimtunaistin, mankartuatin, nampektin, nampernum aya ti yurumin, tura ti nampen átin. Chíkich nujaj métek áiniawai. Nuik ujakmajrumna núnisnak ataksha tájarme: Shuar nuna túrakka Yusaj pujustinian penké tujinkiattawai.

<sup>22</sup> Ayu, yamaikia Yusa Wakanj kakarmarjijaj túratin enentáimsatai. Yusa Wakanj ii enentáin pujak, péñker túratniun nerektinia áintsan neremťikramji. Ju áiniawai: aneatin, shiir enentáimsatin, Yusjaj tura shuarjaj nawamnaikiar wekasatin, shiir enentáijaj katsuñtratin, chíkich shuar shiir awajsatin, tsañka átin, tana nuna tímiatrusañ umiktin,

<sup>23</sup> péejchach ajastin, iik ímiasar tunáa túrashtin. ¿Ju túratniuncha yaki surimia?

<sup>24</sup> Shuar Jesukrístunu ainia nu, ni ayashí wakeramuríncha tura nunisan ni túramuríncha surimiak wekaawai. Ni ayashí krúsnum maatniua áintsan túraiti.

<sup>25</sup> Yusa Wakaní kakarmaríjiaí Yus-shuar ajasu asar, núnisrik Yusa Wakaní kakarmaríjiaín wekasatai.

<sup>26</sup> “Wats, nekapnaisatai. Wi imiá péñkeraitjai” nuámtak túnaitsuk, yajauch enentáimtunáischatniuiti.

## 6

### *Yáinniaiktarum*

<sup>1</sup> Túrasha, yatsuru, Yus-shuar tunáa túrashtimpiash. Atumsha nekas Yusjái wekaarumna nu, nu wáinkiumeka, yátsum Yusjái iwíarat tusarum yáinítarum. Tura nankaamantu enentáimtumatsuk túratarum. Tura amesha nekamata. Tunaanum iniarajj tusam anearam wekasata.

<sup>2</sup> Káarak kijin akui nuámtak yáinniaiktin átsuk. Núnisrumek atumsha, itiurcha-trí akui nuámtak yáinniaiktarum. Túrakrumka Kristu akupeamurí umíarme.

<sup>3</sup> Shuar tujintiayat “nankaamantuitjai” tákunka ananmamui.

<sup>4</sup> Shuar ní túramuríniak enentáimtumastiniaíiti. Níiniunak enentáimtumakuíñkia tura péñkeraitkiuñkia chikícha túramurí iirtsuk, antsu níiniun péñker iis wararsattawai.

<sup>5</sup> Iis, ashí ní káarkariniak júkishtinkiait.

<sup>6</sup> Shuar Yus-Chichaman unuimiatna nu, nu shuar nin jintiana nuna ashí takakna nujají yáinítí.

<sup>7</sup> Ananmamawairap. Shuar Yúsan anankatniun tujintiawai. Ame araanma nuna nereñ júuktatme. Chíkich nere áhattawai. Atumí enentáincha núnikete.

<sup>8</sup> Iista. Shuar ni ayashí wakeramunak tuke enentáimtakka, jataí nereá áintsan araaíti. Nerekmataj jákatniun júuktatui. Tura Yusa Wakaní wakera nuna tuke enentáimtakka Yusjái tuke shiir pujustinian júuktatui.

<sup>9</sup> Nu asamtai péñker túratin yawetkishtiniaíiti. Tura pimpitsuk takasar júuktin tsawant jeamtaí, páchitsuk júuktatji.

<sup>10</sup> Tuma asamtai yáinmin ákuíñkia ii jeajnia nu túratniuitji nekaska ii yachi yáiníkiartin, Yus-shuar ainia nu. Tura ashí shuarsha yáinínaiti.

### *Jesukrístunu ajarar yamaram akiiniatin nekas péñkeraiti*

<sup>11</sup> Íimsakua, winia uwejrújaj urutá uuntna áatjarum.

<sup>12</sup> “Nekas tuke tsupirnaktiniaítme” tuinia nuka áyatik shuar shiir enentáimtursartí tusa tuiniawai. Kristu krúsnum jakamun étsereakuíñkia itíurchat awajtusarajj tusar “tsupirnaktiniaítme” tuiniawai. Shuar “ashí akupkamun umiktajai” tusa, Muisais timia núnisan tsupirnaktiniaíiti.

<sup>13</sup> Pai. Tura nú shuar tsupirnaku áiniayat ashí akupkamun umiiniat-sui. Muisais timia nuna ajapén ikiuiniawai. Túmaitiat tsupirnaku tusa wakerutmainiawai. Áyatik atumin “Pai, niisha tsupimiatkiakji” titiaí tusar wakerutmainiawai.

<sup>14</sup> Wikia, antsu, aya ii uuntrí Jesukrístu krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak ju nunkanmayá ana nuna jaka áintsan páchiatsjai; tunaanum winia útsutkatin atsawai.



<sup>15</sup> Krístunu ajasrikia tsupirnaktincha tsupirnakchaitkiursha mai ántrai ti antsu yamaram akiiniatin nekas pé<sup>n</sup>keraiti.

<sup>16</sup> Ashí nekas Yus-shuaran, wi tájana nujai métek wekainia nuna, Yus shiir enentáimias yáin<sup>t</sup>i tuke shiir pujustinian.

<sup>17</sup> Yamaikia itiurchat najatawarain. Jesusa takat<sup>r</sup>i takaakui asutiuawarma paant ayashruj chimikma írunui.

<sup>18</sup> Yatsuru, ii uun<sup>t</sup>r<sup>i</sup> Jesukrístu atumin shiir yainmakarti. Nuke atí.

## Papru IPISIUNMAYĀ SHUARAN papí akuptukma

### *Papru Yūs-shuaran Papru áatramiania nu*

<sup>1</sup> Yūs nuna wakerakuí Jesukrístu akatramuitjai. Jesukrístu nekas enentáimtusurum Yūs-shuar ajasrum Ipisiunam pujarmena nuna jú papin áatjarne.

<sup>2</sup> Yūs ii Aparísha tura ii Uuntri Jesukrístusha waitnentrainia ásar imiatkinchanum shiir pujustinian yainmakarti.

### *Krístujai tsanínkiu asakrin Yūs ti shiira nuna tsankatramji*

<sup>3</sup> Ii Uuntri Jesukrístu Aparí Yūs nekas shiir awajtustiniati. Iisha Krístujai tsanínkiu asar ii enentáin ashí nayaimpinmaya ana nujai warasminiaiti. Túmaitkiui Yūs nu waratain ashí suramsaitji.

<sup>4</sup> Krístujai uwemprar ti shiir tunaajainchu Niijjai pujusarat tusa Yūs, jú nunka atsaisha, anaitiamkamiaji.

<sup>5</sup> Yámankamtaiksha incha ti anenmak Jesukrístu túrunamujai ni uchirí ajasat tusa wakerutmakmaji.

<sup>6</sup> Ni aneamu Uchiríjjai tsanínkiu asakrin nekas ti anenmaji. Nu enentáimsar ti shiir awajsatniuitji.

<sup>7</sup> Yūs ti anenmakrin ni aneamu Uchirí numpé puarmatai, nu jakamujai ii tunaarín akikmatramak uwentikrampraitji.

<sup>8</sup> Tura ti anenmak ni enentáimtaijin tura nekatairíncha suramsamiaji.

<sup>9</sup> Nujai shiir enentáimturmak in uwentikrampratniun wakerutmakmiaj nuna, yaunchu nekaachman, yamá paant awajturmaji.

<sup>10</sup> Ashí jú nunkanam íranna nunasha tura nayaimpiniam íranna nunasha Kristu ashí akupin ati tusa Yūs tsankatkattawai. Nunasha Yūs yaunchu enentáimturú asamtai tsawant jeamtai ashí uminkíattawai.

<sup>11</sup> Iisha Krístujai tsanínkiu asakrin Yūs yaunchu achirmakmiaji ashí Niiniu ana nuna tsankatramkatniun. Nunasha, ashí Nii túrana núnisan, aya Nii wakera asa túramiayi.

<sup>12</sup> Iikia Israer-shuar asar Kristu emka umirkakrin in imiá péñker túrutmamun nekaawar ashí shuar Yúsan ti shiir awajsamín ániawai.

<sup>13</sup> Núnisan atumsha nekas uwempratín chicham antukrum Kristu nekas enentáimtusurme. Túrarum Kristu-shuar ajasakrumín Yūs ni shiir Wakanín akuptuktaj timia nuna akupturmakmai. Nuna tura “nekas Wí shuaráitume” tawai.

<sup>14</sup> Yamá Yusa Wakaní ii enentáin pujuruk tuke uwentikramji. Tura takas umik nu tsawantaj ashí tsankatramkattaji. Tura ii enentáin pujá asamtai Yūs ukunam Niijjajisha ashí tsankatramkattaj nu paant nékaji. Maa, Yūs ti péñker asamtai Nin ashí ti shiir awajsarti.

### *Papru Yūs-shuaran áujtusmiania nu*

<sup>15</sup> Átum ii Uuntri Jesukrístu nekas enentáimtamuncha tura ashí Yūs-shuarjai shiir awajnaiyamuncha antukjai.

<sup>16</sup> Túran shiir enentáimkiun Yúsan áujkun tuke yúmínkijajai.

<sup>17</sup> Ii Uuntri Jesukristu Apari Yus ti shiir asamtai Nin áujeakun ni Wakani ni nekatairin suramas ashí jintintramawarti tusan seajai. Nujai nuna nankaamas Yus nekaattarme.

<sup>18</sup> Tura enentáimíncha paant enentáimtikramparti tusan seajai. Nujai shiir túrtmataj tusa achirmakuitrum nu nekaattarme. Nu arantcha imiá shíira nu, Yus ni shuarin ashí tsan̄katkattana nusha nekaattarme.

<sup>19</sup> Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asamtai

<sup>20</sup> nujai Kristun jakamunmaya iniantkimiayi. Tura nayaimpiniam juki ni untsuurin̄i akupin pujutainium apujamsiayi.

<sup>21</sup> Tura ashí ju nunkanam akupin ainia nujajisha tura ukunam nunka átatna nu akupin áinia nujajisha tura ashí akupin ainia nujajisha tura ashí naari nékamu ainia nujajisha Yus Kristun ashí nankaamas akupin najanamiayi.

<sup>22</sup> Tura ashí írúnna nu, Kristun umirkartin ániawai. Tura Yuska Kristunak ashí Yus-shuara Akupniur̄i awajsamiayi. Túramtai Kristu ni shuar̄i muuké áintsan̄kete.

<sup>23</sup> Tura ashí nunkanam Yus-shuar ainia nu Kristu ayash̄i najanainiawai. Tura Kristu ashí ni ayash̄in pimiutkaiti tura nu arantcha ashí írúnna nunasha pimiutkaiti.

## 2

### *Yus anenma asa uwemtikramji*

<sup>1</sup> Átum yajauch túrakrum tunaanum tuke wekaakrum Yúsnumiá kanakin asarum jákauyarme.

<sup>2</sup> Nu tunaanum jú nunkanam pujuinia nujai métek tuke wekainiuyarme. Túrarum uunt iwianchi wakeramur̄i umirniuyarme. Uunt iwianch ashí Yúsan umirainiatsna nuna akatenawai.

<sup>3</sup> Ashí iisha núnisrik yaunchu nu shuarjai métek ii ayash̄i wakerakmu umirniuyaji. Tura íi enentái wakeramusha umirniuyaji. Tuma asar tura tunajai akiinia asar chikich shuarjai métek ti kajernakmiayi.

<sup>4</sup> Antsu Yus ti waitnen̄kartin asa in ti anenmamiayi.

<sup>5</sup> Tuma asa ii tunaanum tuke jaka pujarnin̄ Kristujai métek iwiaaku awaj-tamsamiayi. Aya ti anen̄kartin asa uwemtikrampramiayi.

<sup>6</sup> Tura Kristujai métek iniantamkimiayi. Nuyá Jesukristujai métek, akupin pujutainium yamaisha apujtamas tuke nupetkatniun tsan̄katramkaitji.

<sup>7</sup> Nujai ni ti anen̄kratmarin̄cha tura Kristu túrunamujai waitnentramp-ranucha tuke iniaktusmin̄ átatui.

<sup>8</sup> Jesukristu nekas enentáimta asakrumin Yus waitnentramar uwemtikrampraiti. Juka átumkeka túrunachuitrume. Antsu Yuska Niñki kuitchajai suramsaitrume.

<sup>9</sup> Shuar ni takatr̄ijai uwempratniuitkiun̄ka nankaamantu enentáimsainti winia kakarmar̄ai uwemprajai tusa. Nu enentáimsatniuka atsutí tusa Yuska átumka takaatsrumniun̄ uwempratniun suramsamiarme.

<sup>10</sup> Yus najanamuitji. Kame Jesukristujai tsaniákrin yamaram iwiaakman suramas tuke péñker túratniun najatmamji. Yáunchuk nuna enentáimturmasmiayi.

### *Kristujai tsaniñkiu asar shiir nawamnaikiar pujaji*

<sup>11</sup> Nuik ámarum nu enentáimpratarum. Ashí Israer-shuar ni ayash̄in tsupir-naku ásar ashí Israer-shuar̄chan, tsupirnakcha ániakui, pen̄ké Yúsachua

núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme.

12 Nujk Krísturtinchauyarme. Israer-shuarcha asarum ashí ni túrutairisha tura ashí Yus nin tsan̄katkarmasha nekaachuyarme. Tura jú nun̄kanmaya asarum nekas Yusa nu enentáimtichuyarme tura shiir pujustin nán̄kamsarum enentáimpramarme.

13 Antsu yamaikia Krístujai tsan̄n̄kiu asarum, yaunchu Yusaýya yajá pjuwitiatrum, yamaikia Krístu numpé puármatai ni jarutramkamujai tántaitrume.

14 Israer-shuarjai Israer-shuarchajai nemasmanaikiar ajapén péen̄kramu ámiaji. Tura Krístu nuna sáaki nawamnaimtikramkamiaji. Tura chikichik shuar najatmamiaji.

15 Nuik aya Israer-shuar Muisais akupkamu untsurí armia nuna umirkatin ániak nujai chíkich shuarjai nemasmanainiarmiayi. Tura Krístu jaka nu akupkamun ántar awajas chikichik shuar yamaram awajtamsamiaji.

16 Núnisan̄ ámiaji. Krístu krúsnum jaka nemasjai mai apattamak chikichik awajtamas Yusjaisha nawamnaimtikramkamiaji.

17 Krístu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamiayi.

18 Yamaikia Israer-shuartisha tura Israer-shuarchasha mai metek Krístu túrunamujai tura Yusa Wakan̄i takaku asar Yusaj jeatniuitji.

19 Tuma asantai yamaikia chíkich shuarchaitrume, antsu ashí Yus-shuarjai métek ajasuitrume. Nekas Yusa shuarin̄trume.

20 Átum uunt jea jeamma núnisaitrume. Uunt jea jeamtin, emka kaya apujtuktiniaiti jea ti wewe atí tusa. Núnisan̄ yaunchu Yúsnan etserniusha tura Krístu akatramurisha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujai nan̄kaamas Jesukrístu enentáimtustiniaiti.

21 Jea apujtukmari Krístu asantai Nji ti pen̄ker ekeniar jea jeamnaki wéawai. Tura ii Uuntr̄i Krístujai Yusa Jee ti shiir átatui.

22 Núnisrumek atumsha Krístujai tsan̄n̄kiu asarum átum ashí Yus-shuarjai Yusa Jeeya áinsan̄ ajasuitrume. Tura Yusa Wakan̄i ashí Yus-shuara enentáin̄ pujú asantai nekas Yusa Jeēnte.

### 3

#### *Papru Israer-shuarchanum Yus-chichaman etserkatniuya nu*

1 Nu asantai atumin Israer-shuarchatirmin yáintaj tusan Jesukrístunu etserkun sepunam pujajai.

2 Yus anentak Yus-Chichaman atumin etserkatniun akatar akuptukuiti. Nu nékatsrumek.

3 Yus nuna túrutak yaunchu nekaachmancha paant awajtursamiayi. Núnaka ishichik áatraitjarne.

4 Nu áujсарum Krístunu yaunchu nekaachman yamaikia paant nékajna nu nekaattarme.

5 Nú chichaman yáunchusha chikichkinkesha ujankachmiayi. Túrasha yamaikia Yusa Wakan̄i Krístu akatramur̄incha etserniur̄incha nu chichaman paant awajtusarai.

<sup>6</sup> Nu chicham juiti: Uwempratin chichaman umirkar Israer-shuarcha Israer-shuarjai métek Krístujai tsaniñkiaru ásar chikichik shuar ajasartatui. Tura nu arantcha Yus ni shuarin ashí shíran tsankatkatniun anajmatrama nu*j* métek pachiinkiatatui.

<sup>7</sup> Yus ni kakarmarijai winia yáintiuk tura ti anentu asa nu uwempratin chichaman etserkat tusa akatturmiayi.

<sup>8</sup> Ashí Yus-shuarjai nankaamas wi péñkercha ain Israer-shuarchanum shiir chichaman etserkat tusa Yus tsankatrukmiayi. Krístujainkia kuitjai nankaamas péñker, enentáimustin jeatsjinia nu, takakji. Nusha ti shiir chichamaiti.

<sup>9</sup> Yuska, ashí najana nu, nu enentáimian yáunchusha etsertsuk yamaikia ashí shuar nu chichaman nekaawarat tusa winia akatturmiayi.

<sup>10</sup> Yamaikia ashí nayaimpiniam pujuinia nuka Yus ni shuarin túrunamun ísar Yuska imiá neka asa ashí enentáimniua nuna paant nékainiawai.

<sup>11</sup> Yus júnis túratniun yáunchuk enentáimpramiayi. Tura ii Uuntri Je-sukrístujai mash uminkiamiayi.

<sup>12</sup> Tura Krístujai Yusai yúpichuch jeaji. Tura Nin nekas enentáimtusar sapijmiatsuk Nin tantamniaitji.

<sup>13</sup> Tuma asamtai tájarme, atumin yáingtaj tusan sepunam pujaku*i* kúntuts enentáimprairap. Antsu nujai Yus atumin ti shiir awajtamkurmin átum warasuk tusan wakerajrume.

#### *Kristu ti anenkratniuiti*

<sup>14</sup> Nu asamtai ii Uuntri Jesukrístu Aparin tikishmatran áujtajrume.

<sup>15</sup> Ashí nayaimpinmasha tura nuñkasha Yus-shuar ájinia nu nekas ni shuari áini*ja*i.

<sup>16</sup> Yus ti kakaram asa ni Wakanijai atumí enentáin pujureak ashí ni kakarmariyan atumin suramsarat tusan áujtajrume.

<sup>17</sup> Yus nekas enentáimtakrumin Kristu atumí enentáin pujusat tusan áujtajrume. Tuke yapajtsuk anenkratin átarum tusan áujtajrume.

<sup>18</sup> Túrakrum ashí Yus-shuarjai Kristu anenkrattairi nekaattarme. Imiá uunt asa nankantsuk tuke amuukachmini*aiti*.

<sup>19</sup> Nu anenkrattai ashí takamtsuk nekaachmin ain nekaatarum tusan áujtajrume. Nujai Yus takamtsuk pimiutramkattarme.

<sup>20</sup> Nekas Yus shiir awajnasti. Ni ti kakaram asa ii seajnia nuna nankaamas tura enentáimprachminia nunasha nankaamas in pujurtamuk ashí túramniaiti.

<sup>21</sup> Ashí Yus-shuarjaisha tura Krístujaisha Yusa péñkeri tuke paant wantinin atí. Yus tuke iniaitsuk shiir awajnasti. Núnisan atí.

## 4

#### *Yusa Wakanija tsaniñkiar pujakur túratin*

<sup>1</sup> Atumsha ni shuari ajastin Yus achikma asarum péñker wekasatarum tájarme. Ii Úuntriniun étserkun sepunam pujakun seajrume.

<sup>2</sup> Nekasmiancha ajasrum aneniakrum katsunnairatarum.

<sup>3</sup> Yusa Wakani chikichik shuar awajtamkurmin shiir awajnalisarum pujustarum.

<sup>4</sup> Yusa Wakaninkia chikichkiiti. Tura ashí métek Yus achikma asar métek Niijai shiir pujustin enentáimji. Iisha Kristu ayashi ayashimkia asar chikichik ayashkiitji.

<sup>5</sup> Ii Uuntri chikichkiiti. Niŋki nekas enentáimtusar métek imiantiniaitji.

<sup>6</sup> Chikichkiiti Yus, ashí Yus-shuarti ii Aparínti. Ashí akuptamniuitji. Ashí ni shuariin pujak ii enentáin pujurtamji. Ti nekas ashí mash, Israer-shuartisha Israer-shuarchasha, imiá chikichik ajasuitji.

<sup>7</sup> Tura chikichik chikichik niisháa shiir takastinian suramsaitji. Tura Kristu wakerimia núnisaŋ suramsaji.

<sup>8</sup> Nu asamtai Yus-Papiniumsha tawai:

“Achikman jukí nayaimpiniam wakamiayi. Tura shuáran shíran susamiayi.” Tu áarmaiti.

<sup>9</sup> Tura “wakamiayi” tana nu ¿warintuia? Kristu nayaimpiniam pujá asa yakí wákanka emka tárash tinkiait. Nekas nuŋká taramiayi.

<sup>10</sup> Niŋki ataksha nekas nayaimpiniam wakamiayi. Nuna tura asa ashí ni shuarin pimiutkarmiayi.

<sup>11</sup> Tura nujai chikichan akatramun awajsamiayi. Chikichnasha Yúsnaŋ etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinniuŋ awajsamiayi. Tura chikichnasha unuikiartinian awajsamiayi.

<sup>12</sup> Túramtai ashí Yus-shuar ni takatrijjai yáiniaikar ti penker shuar ajainiakui Kristu ayashí takamtsuk katsuarartatui.

<sup>13</sup> Nujai Yus nekas enentáimtamunam Yusa Uchirí ashí métekrak penker nekaattaji. Nu túratur katsukir Krístujai métek penker ajastatji.

<sup>14</sup> Tura uchía áintsar áhattaji. Úchikia ashí yamaram chichaman antukar wari yapajiniawai. Tura anaŋkartinia chichamen antukar waaku áiniawai. Kame nu anaŋkartin shuar ti paant chichayataŋ ni shiir chichamejai anaŋkatniun pujurenawai.

<sup>15</sup> Antsu nekas aneniakur nekas chicham ujanaiktiniaitji. Túrar Krístujai tsaniŋkiar tuke tsakakir ashí penker túratniujai Niijjai métek ajastatji. Krístuka ashí ni shuari muuké áintsan ketete.

<sup>16</sup> Tuma asa ni ayashin wáinkiu ashí nuna muchitmarj penker yáiniaikar ashí ni túratniurin shiir takasartatui. Nujai nu ayashniun muchitmarj chikich chikich penker takainiak métekrak shiir tsakartatui. Tura anenainiakui nu ayashsha penker úntmartatui.

### *Krístujai tsaniŋkiu asar yamaram iwiaakmanum wekaaji*

<sup>17</sup> Ii Uuntri Kristu ímmianum juna akatjarne: Chikich aents Yúsna nékachu ásar ántar ni enentáimmiájain wekainia núnisrum wekasairap.

<sup>18</sup> Ni enentáin kusuru ániak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiatsui.

<sup>19</sup> Nu arantcha, ni túramurijjai natsamtichu ásar ti yajachiniam surumakar ashí tunaan wararainiak túrin áiniawai.

<sup>20</sup> Antsu átumka núnisrum enentáimtustin unuimiar chamarme.

<sup>21</sup> Nekas Nii anturkaitkiurmeka tura Jesus nekas tama Kristu unuimiar-maitkiurmeka Nin shiir enentáimtustin unuimiar marme.

<sup>22</sup> Yaunchu enentáimtairmeka ayash wakeramu anaŋkramin ainia nujai piaku asa imiá yajauchiiti. Nu enentáimtairmesha yaunchu túrutairmesha ajapa iniaisatarum.

<sup>23</sup> Túrarum penker enentáimsarum wakannium yapajiatarum.

<sup>24</sup> Tura yamaram enentáimtairam emetatarum. Nuka Yusjai métek najanamu asa nekas penker tura shiira nuna tuke túriniaiti.

<sup>25</sup> Nu asamtai chikichik ayashi muchitmarj asarum wáitrusuk nekas chicham chicharnaisatarum.

<sup>26</sup> Kajeakrum tunáa túrawairap. Tura nu kajekmasha tsawant takamtsuk áchatniuiti.

<sup>27</sup> Uunt iwianch yajauch awajtamsatin tsan̄katkaip.

<sup>28</sup> Kasasha kasamtsuk kakaram takakmasti. Tura ni uwejējaj̄i pé̄nker takaak atsumainia nú shuarnasha susati.

<sup>29</sup> Muujmiai chicham chichasairap. Antsu chichastin akui pé̄nker chicham, chíkich shuar pé̄nker awajsamnia nu chichastarum. Anturtuinia nuna yáintaj̄i tusarum nu chicham ujaktarum.

<sup>30</sup> Yusa Shiir Wakaní kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwemtikramprattaji.

<sup>31</sup> Ashí yajauch ana nuyá kanaktiarum. Nakitratniusha, kajernaiki-atniusha, tura kakantrar charáa charáa ajatniusha, katsekmahtincha, tsanumpratniusha mash atsutí.

<sup>32</sup> Antsu shiir awajkartin ajasrum waitnennairarum, Kristu jakamujaj̄i Yus atumí tunaar̄in tsan̄kurtampra nútiksarmek tsan̄kurnairatarum.

## 5

### *Yus-shuar túratin*

<sup>1</sup> Nekas Yusa Uchirí aneamu asarum Nii tura núnis túratin wakeruktarum.

<sup>2</sup> Kristu in anenmaj̄i núnisrum anenaitiarum. Kame ii tunaar̄in akikmaktaj̄i tusa jákatniunam surumakmiayi. Túramtai Yus shiir enentáimtusmiayi.

<sup>3</sup> Yusna asarum tsanirmatniusha yajauch túratniusha tura jú nun̄kanmayan̄ ikaiaun̄katniusha ishichkisha enentáimtuschatniuitrume.

<sup>4</sup> Natsanmaincha, ántar chichamsa yainmakchamnia asamtai chichaschatniuitrume. Antsu Yus shiir yum̄nsatniuiti.

<sup>5</sup> Shuar chíkich nuwajaj̄i tsanirmakka tura ashí yajauchin wakerakka tura jú nun̄kanmayan̄ ikaiaun̄katniun wakerakka Yusaj̄i Kristu akupea nūj̄i penk̄é pachiīnkiachminiaiti. Kame jū nun̄kanmayan̄ ikaiaun̄katin ántar-yus tikishmatratniua nujaj̄i méteketé.

<sup>6</sup> Nu túramniaiti tusar ántar chichamjaj̄i anañkramacharti. Warí, nuna túruiniakui Yúsan umirainiachun Yus ti asutiáwartatui.

<sup>7</sup> Tuma asamtai nu shuar penk̄é pachischatniuitrume.

<sup>8</sup> Yáunchuka atumsha kiritniunam wekainiuyarme. Tura yamaikia Kristujaj̄i tsanin̄kiu asarum pé̄nker tsáapninium wekaarme. Shuar tsáapninium wekainia nujaj̄i métek wekasatarum.

<sup>9</sup> Tsáapninium wekainiaka shiir awajkartincha tura nekas chichamtincha tura pé̄nker túrin áiniawai.

<sup>10</sup> Ii Uuntrīj̄i Kristu wakeramu nekaatin wakeruktarum.

<sup>11</sup> Kiritniunam wekainia nu túramu pachisairap. Antsu nu shuar tsáapninium en̄keatarum.

<sup>12</sup> Ni uuk túruinia nu áujmatsatin natsanmainiaiti.

<sup>13</sup> Tura ashí tsáapninium itiamu ashí paant ajawai. Tsáapnikia ashí paant awajeatsuk.

<sup>14</sup> Nu asamtai Yus-Papinium tawai:

“Kanaruitme nu shintiártá. Jakamunmayá nantáktiá. Tura Kristu tsáapin awajturmastatui.”

Tu áarmaiti.

<sup>15</sup> Nu asamtai átum túramu ímiastarum. Nékachu áintsarum pujusairap. Antsu pé̄nker enentáimprarum wekasatarum.

<sup>16</sup> Pé̄nker túratin tsawant wasúrkáip. Tunáa ti pampaatsuk.

17 Enentáincha áirap. Ii Uuntrj̄ Kristu warinia wakera nu enentáimtustarum.

18 Nampekairap. Nampeakmeka aya yajauch ajame. Antsu Yusa Wakani winia enentáiruj̄ takamtsuk pujurtusti, tu enentáimsatarum.

19 Túrarum Yus shiir enentáimtakrum Yus-kanta kantamkirum shiir áuj̄naisatarum.

20 Ii Uuntrj̄ Jesukristu náarijj̄ai ashí irunna nu Yus Apa tuke yuminsatarum.

### *Yus-shuar túratin*

21 Yus-shuar asarum nuámtak umirnaikiatarum. Túrakrum Kristu shiir awajsattarme.

22 Núwaka Kristun umirna núnisan̄ ni áishr̄incha umirkatniuiti.

23 Kristu ni shuar̄in akupeana núnisan̄ áishman̄sha ni nuwen akupkatniuiti. Kristu ni shuar̄in ayashimiak ni muuké áintsankete. Tura nin uwemtikiar-tiniaiti.

24 Nu asantai Yus-shuar Kristun umirin áiniawai. Núnisan̄ ashí ana nuj̄ai nuw̄a ni áishr̄in umirkatniuiti.

25 Kristu ni shuar̄in ti aneak nin yáintaj̄ tusa jákatniun surumakmiayi. Núnisrumek áishman̄tirmesha atumi nuwé aneatniuitrume.

26 Kristu ashí ni shuar̄in ni Chichamejj̄ai tura entsaj̄ai nijjar ní shuar péñker árat tusa jakamiayi.

27 Nuj̄ai ashí ni shuar̄in tunaarinniuchu tura yajauch máatrachu antsu ti penker shiir awajas Niini éjetaj̄ tusa túramiayi.

28 Núnisan̄ áishman̄ ni ayash̄in anea núnisan̄ ni nuwen aneatniuiti. Shuar ni nuwen aneak nuj̄ai ni ayash̄incha aneawai.

29 ¿Yaki ni ayash̄in nakitniuit? Antsu péñker wáiniuk áyureatsuk. Kristu núnisan̄ ni shuar̄in wainiui

ni ayash̄i asantai. Kame ni ayash̄i muchitmarintji.

31 “Tuma asantai áishman̄ ni apar̄incha nukur̄incha ikiukin ni nuwejj̄ai tsan̄inkiar chikichik ayashtin ajainiawai.” Tu áarmaiti.

32 Nusha Kristu ni shuar̄ij̄j̄ai tsan̄inmán tawai. Nuka yaunchu nekaachma yamaikia nekanaiti, tura ti enentáimtur̄tiniaiti.

33 Tura núnisan̄ ashí áishman̄tiram atumí nuwé atumí ayash̄ia nútiksarmek aneatniuitrume. Nuw̄asha ni áishr̄in umirkatniuiti.

## 6

1 Uchitirmesha, Yus-shuar asarum apasha nukusha umirkatarum. Nuka ti péñkeraiti.

2 Emka akupkamu “umirkam nekas shiir átatme” tana nu júiti: “Apasha nukusha umirkata.

3 Túrakmeka shiir átatme tura jú̄ nuñkanam untsur̄i tsawant pujustatme” tawai.

4 Atumsha, uchirtintirmesha, atumí uchir̄i ántrarum akajkairap. Antsu Yúsan shiir enentáimtusarat tusarum ti péñker jintinkirum tsakatmartarum.

5 Takakmautirmesha, atumí uuntrj̄ jū nuñkanam pujuinia nu ti penker umirkatarum. Kristu umirkatniua áintsarum wishiktsuk ashamakrum tuke enentáij̄j̄ai takarsatarum.

6 Aya wáitmakui shiir enentáimtursat tusarum péñker takarsairap. Antsu Kristu takarniur̄ja núnisrum ashí ame enentáimjj̄ai Yus wakera nu túratarum.

7 Aya shuárnak yayá nútiksarum takasairap. Antsu ii Uuntrj̄ Kristu takarsat-niua nútiksarmek ásump enentáij̄j̄ai takastarum.



<sup>8</sup> Kame chíkich chíkich ni takasmajaj métek akinkiertatui. Ii Uuntrj Kristu nu shuar péñker túramujaj métek akiktatui.

<sup>9</sup> Tura atumsha, iniamniutirmesha, atumí takartamu wakaní mántutsuk shiir enentáijijaj iniartarum. Nekas enentáimpratarum. Ii Uuntrj nayaimpiniam pujana nuna niisha atumjaj métek umirainiawai. Tura Yusa ashí shuaran akantsuk métek iyawai.

*Yusa kakarmarijjaj íwianch taritrarum*

<sup>10</sup> Wátsek, yatsuru, ii Uuntrj Yusjaj tsanínkiu asarum ni ti kakarmarijjaj iwianchjaj máanaiktin kakaram ajastarum.

<sup>11</sup> Apach máanainiak jiru entsarua núnisrum Yus susamujaj entsartarum. Nujaj íwianch nupettamkui tariartatme.

<sup>12</sup> Kame Yusna takáa asar penké áentsjaj máaniatsji antsu yajauch wakan kakaram írunka nujaj máaniaji. Niisha ju nunkanam, kiritniunma áintsan, tunaanum wekainia nuna akupin áiniawai.

<sup>13</sup> Jiru entsartinia áintsarum Yus súramna nu entsartarum. Nu entsarmajaj itiurchat tsawant taritra nupetkarum tuke tariarum wajastatrum.

<sup>14</sup> Wats, nekas tariartin nekas chicham emenmatarum. Tura péñker túratnuijaj jatairum ajaktarum.

<sup>15</sup> Sutar iwiarnak sapatán aweá áintsarum Yusa shiir chichame etserkatin iwiarnartarum.

<sup>16</sup> Nuyasha ashí nankaamas, tantar takustinia áintsan, Yus tuke nekas enentáimtustarum. Nujaj íwianch eketrámkamusha uwemturtatme.

<sup>17</sup> Múukem ajaktincha Kristu uwentikrampramu múukmjín etsenkruktarum. Tura Yus-Chicham puniáa áintsan achiktarum. Nuka nekas Yusa Wakaní puniarjinti.

<sup>18</sup> Yusa Wakaníjjaj Yus áujeakrum tuke seatniuitrume. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum.

<sup>19</sup> Núnisan winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum.

<sup>20</sup> Yus nu chichaman etserkatniun akuptukuiti. Nuna túrakun sepunam pujajaj. Sapijmiatsuk etserkat tusarum Yus áujtursatarum.

*Amikmaamu*

<sup>21</sup> Ii aneamu yachj, Tíkikiu, ashí wi túramun ujatmaktatui. Niisha Ii Uuntrj Kristunu etserkatniun ti penker yáinniuiti.

<sup>22</sup> Tuma asamtai ii juj pujamun ujatmak ikiantamprarat tusan akuptarume.

<sup>23</sup> Yus Apasha tura ii Uuntrj Jesukristusha ashí Yus-shuartermin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti.

<sup>24</sup> Ashí ii Uuntrj Jesukristun tuke enentáijijaj aneana nuna Yus shiir yáinjtí. Nuke atí.

## Papru JIRIPIUSNUMIA SHUARAN papí akuptukma

*Papru sepunam pujus Jiripiusnumia Yus-shuaran áatramiania nu*

<sup>1</sup> Wi Papru Timiutéujai Jesuskrístu takarín asar ashí Yus-shuar Jiripius péprunam pujarmena nu ju papí akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisan Yusna asarum tura Jesukrístujai tsanínkiu asakrumin ju papí áateajrume.

<sup>2</sup> Yus ii Aparísha Jesukrístu ii Úuntriísha atumin waitnentramainia ásar imiatkinchanum tuke shiir pujustinian yainmakarti.

*Papru Yus-shuaran Yúsan áujtawai*

<sup>3</sup> Ashí tsawant atumin enentáimtakun Yúsan tuke shiir yúminíkjajai.

<sup>4</sup> Yúsan áujeaknasha ti warasan seatjarme.

<sup>5</sup> Kame iikia yámankamtaiknumia Yus-Chicham metek yáiniáikiar iniaitsuk takasuitji.

<sup>6</sup> Yus atumín ti péñker awajsatniun naníkaasa asa núnisan Jesuskrístu táatsain tuke shiir awájtámki nekas péñker najatmattarme. Nuka ti nekasaiti.

<sup>7</sup> Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakuí átum yáintiarme. Yus ti aneñkartin asa nu túratniun mai metek tsañkatrámkaitji. Tuma asamtai atumin júnisan enentáimtustin ti penkeraiti.

<sup>8</sup> Jesukrístu aneñkrattairíjjai wi atumin aneamun Yussha paant nékarui.

<sup>9</sup> Yúsan áujeakun anearmena nú naníkaamas aneak tusan seatjarme. Tura nújajsha ti neka ajasrum

<sup>10</sup> ashí péñkera nu achikiuk tusan Yúsan áujtajrume. Atumin nu túrunamtainkia yamaisha tunáajainchu pujustatrume tura Kristu támatai sumamashtatrume.

<sup>11</sup> Núnisan Jesuskrístu kakarmaríjjai ashí péñker túrin átatrume. Tura nújai ashí shuar Yúsan ti shiir enentáimturartatui.

*Wi ju nuníkanam aya Krístunak enentáimtakun pujajai*

<sup>12</sup> Winin túrunamu itiuurchat ain nujai uwempratin chicham nekas pam-paawai. Nu nekaatarum tusan wakerajrume, yátsuru.

<sup>13</sup> Iis, uunt akupniú suntarísha tura ashí shuarsha wi Krístunun etseru asan sepunam pujamun paant nékainiawai.

<sup>14</sup> Ti untsurí Yus-shuar wi sepunam enketman nekaawar ii Uuntrií Jesusan nekas enentáimtusar sapijmiatsuk Yus-Chichaman etserainiawai.

<sup>15</sup> Kame shuar awai winia kajertuiniak tura naníkaamantu enentáimtumainiak Krístun páchiniawai. Antsu chíkich shuarka nekas enentáijjai Krístun etserainiawai.

<sup>16</sup> Yajauch shuarka Krístun shiir enentáimtusuk antsu ashí shuar ní chichamenak anturkar wí shuar ajasarat tusar etserainiawai. Túruiniak wísha sepunam pujakuí nu arant itit awajustinian wakerutainiawai.

<sup>17</sup> Antsu péñker shuar Krístun nekas aneek etserainiawai. Nu uwem-pratin chicham imiá penkeraiti wi titin asamtai winiasha anentainiak shiir etserainiawai.

<sup>18</sup> Wats, mai metek chíkich yajauch enentáijai tura chíkich shiir enentáijai Krístun etserainiakui shiir enentáimjai.

Tura nuna nankaamas shiir enentáimprattajai.

<sup>19</sup> Kame Yus áujtursa asakrumin tura Jesukrístu Wakanísha yaintiu asamtai ti péñker uwempran jiinkittiajai.

<sup>20</sup> Nekas juna wakerajai: Natsamtsuk uunt akupniun Jesukrístun paant ujakartinian wakerajai. Nujai winí Kristu kakarmari pujamu ti paant nekanattawai. Mántuiniakuisha tura mántuiniachkuisha ashamatsjai. Aya Kristu kakarmari winí nankaamas nekaawarat tusan wakerajai.

<sup>21</sup> Wíjjaiñkia ju nunkanam iwiaaku pujakun aya Krístunak enentáimtakun pujajai. Tura jákatniusha ju pujajnia nuna nankaamas péñkeraiti.

<sup>22</sup> Ju nunkanam pujakun Uunt Jesusnan takasminiaitjai. Nu asamtai tunatsuk achiktaj nékatsjai.

<sup>23</sup> Wíjjaiñkia itiurchataiti mai achiktin. Jákatniuncha wakerajai Krístujai tsaninikian pujustaj tusan. Wíjjaiñkia nu imiá péñkeraiti.

<sup>24</sup> Túrasha atumin yáin taj tusan tuke ju nunkanam iwiaaku pujusminiaitjai.

<sup>25</sup> Kame tuke pujustaj nékajai. Núnisnak atumjai pujakun Yus nekas enentáimtakrum nankaamas waraakrum tuke katsuaruk tusan yáin tajarme.

<sup>26</sup> Nu asamtai wi atumjai pujakuí Jesukrístu yuminsarum shiir warastatrume.

<sup>27</sup> Kristu chichame ti péñker asamtai atumsha aya péñkera nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratim chichaman nekaawar umirkarat tusarum chikichik enentáijai kakaram ajastarum.

<sup>28</sup> Atumí nemasrísha ishichkisha sapijmiamtikramkarain. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisan atí tusa Yus túraití.

<sup>29</sup> Krístunu asarum Nii nekas enentáimustinniaasha tura Niiniu asarum wáitsatniusha Yus anenma asa tsankatramkaitrume.

<sup>30</sup> Yus-Chicham pamparat tusar maimetek ti takáa asar wáitajai. Wi nuik ti takasmaj nu nekamarme. Tura yamá tuke takaaj nusha ántarme.

## 2

### *Kristu péjchach ajasmatai Yus ti uunt awajsamiayi*

<sup>1</sup> Kristu ikiantamkuisha, ni anenkrattairi atsan tamkuisha, ni Wakaní atumjai pujakuisha, anenkratniuitkiurmesha, waitnenkratniuitkiurmesha

<sup>2</sup> waramtikrustarum. Métekrak takastarum. Mai metek anenaitiarum. Yusa Wakaní atumí enentáin pujá asamtai chikichik enentáik enentáimsatarum.

<sup>3</sup> Átum wakeramuk túrawairap. Nankaamantu ajastaj tírap. Antsu péjchach ajasrum chíkich shuar atumjai nankaamas péñker enentáimtusta.

<sup>4</sup> Aya níniak péñker átatna nunak shuar túrashti. Antsu chíkich shuar yáinminia nuna túrati.

<sup>5</sup> Kristu Jesus enentáimpramia núnisrum enentáimpratarum.

<sup>6</sup> Niisha Yúsaitiat ju nunkanam winiak tuke Yusjai métek átinian emetsuk

7-8 antsu nuna ikiuak aents ajas pééjchach asa ashí aentsu takarjñ ajasmi-ayi. Tura aentsu ayashjñ ayashimiak tura Yúsam umireak jákatniuncha surim-  
iakchamiayi. Maa, imiá tunaarinnua áintsan krúsnum natsanmainium  
jakamiayi.

9 Túramtai Yus nekas nankaamantu awajsamiayi. Ni náarjñcha ashí paant  
awajsamiayi.

10 Tuma asamtai ashí nayaimpiniam írúnna nusha, nunká írúnna nusha,  
tura iwarsamusha Jesusa náarjñ antukar tikishmatrartatui.

11 Tura ashí shuar Jesukristu ashí akupin ajasman paant nekaawartatui.  
Nújajñkia Yus Apá kakarmarjsha paant nekanattawai.

*Yus-shuar kiritniunam keeák tsáapin awajeana áintsan áiniawai*

12-13 Nu asamtai, aneamu yatsuru, wi atumjaj pujakuí umirtukmarmena  
nuna nankaamas yamaikia arant pujakuísha umirtuktarum. Iis, Yus  
atumí enentájñ takaak ni shiir wakeramu wakeruktinniasha tura umik-  
tinniasha pujurtamprume. Nu asamtai atumsha kakaram ajastarum Yus  
ti penker awajtamsatniun wakera nu túrunati tusarum. Tura pééjchach  
enentáimprarum awajirminiaitjai tusarum aneara wekasatarum.

14 Ashí yajauch tunaitsuk tura jianaitsuk wekasatarum.

15 Túrakrum makuumatsuk tunaajajñchu átatrume. Antsu Yusa uchirjñ  
átatrume. Ju nunkanmasha shuar imiá tunaan túrinjajñsha máatrachu asarum  
kiritniunam ji keeá áintsan ketrume

16 iwiaaku pujustñ chicham paant awajeakrum. Nújajñ Kristu támatai  
atumjñ antran takascha asan ti shiir wararsattajrume.

17 Winia takatrujajñ Yus-shuar ajasakrumin wi jákatniuitkiuncha nújajñsha  
warasaintjai. Atumsha wi warajjna jujñ núnisrumek warastarum tusan  
wakerajrume.

18 Atumsha waraakrumin métek wararnaisatai.

*Timiutéuncha Epaprutíiuncha Papru ujakamiania nu*

19 Ii Uuntrjñ Jesus wakerakuñkia Timiutéun írmainiarat tusan ti warik  
akuptuktatjarne. Tura átum shiir pujamu ujateakui warastatjai.

20 Kame Timiutéu wijiájñ métek enentáimna áinis chíkch shuar atsawai.  
Niisha átum shiir pujusuk tusa ti nekas enentáimturmarne.

21 Chíkchka Kristu wakeramun iniaisar ní wakeramunak páchiniawai.

22 Túrusha átumka Timiutéu tuke penker túramu nékarme. Uchi ni aparjñjajñ  
takaana áinis Yusa shiir chichame etserkatniun yáintkiaiti.

23 Winia itiurtukartiñ nuna nekaan Timiutéu írmainiarat tusan akuptuk-  
tatjarne.

24 Kame Kristu yáintkiui wíkisha wárik íimniaitjarne.

25 Wi atumaj nuna írsati tusarum Epaprutíi akupturkamarme. Wijiájñ  
métek tsanñ takasuiti. Tura métek wáitsaitji. Aunkesha akupkamnia  
enentáimjai.

26 Nii jaawai taman átum antukman nekáa, írmaitniun ti wakerutmarne.

27 Maa, nekas ti janñkiamai. Túrusha Yus nin waitnentramai. Kame  
winiaasha wi jujñ wáitiakun nii jakamtai nu arant ti kuntuts pujuschatniun  
waitnentrumai.

28 Tuma asamtai akuptuktinian wakerajrume. Tura atumsha ataksha  
wáinkiarum waraakrumin wisha ti kuntuts enentáimchakun akuptuktat-  
jarne.

<sup>29</sup> Kristu yumiņsarum ti shiir warasrum wáinkiatarum. Chíkich shuar niijjaj métek péņker Yus-shuar ainia nusha shiir enentáimtustarum.

<sup>30</sup> Kristu takatrin takaak ti janinkiamai. Átum yáintkiachminia nuna winia yáintkiataj tusa pujus janinkiamai.

### 3

#### *Kristu nekaatin ashí nankaamas péņkeraiti*

<sup>1</sup> Ayu. Warastarum, yatsurtiram, ii Uuntrj Kristu ti peņker asamtai nuik áatramajrum nuna ataksha títiatjarne. Ataksha ujam yainmakminiaitkiuinkia wíjjajinkia itirchatchaiti atak enentáimtikratin.

<sup>2</sup> Yajauch shuarjaj aneartarum. Nu shuar Muisais timia núnis tuke ya-maisha tsupirnaktiniaitrum tuiniawai.

<sup>3</sup> Antsu iikia ayash tsupirnakmajaj péņker átiniaitji tu enentáimtsatsji. Iikia antsu ii wakaníjjaj Yus shiir awajeaji tura Jesukristunu asar Niņki shiir wararji. Nu túrakur Muisais timia nu umintikia iitji.

<sup>4</sup> Ju nunkanam íranna nujaj waantu enentáimpramniaitkiuinkia ashí shuarjaj nankaamas wikia waantu enentáimtumaraingtjai.

<sup>5-6</sup> Israer-shuar asan Muisais timia núnisan wi akiiniamtai uchu (8) tsawant nankaasmatai tsupirtukarmiyai. Israer-shuarum Pinjamín weeitjai. Winia aparsha nukursha mai Israer-shuar ániakui wi imiá Israer-shuaraitjai. Wisha Pariséu tuinia núnisan Muisais akupkamun ti umirin asamtai chíkichka winia sumamtikiatniun tujintrin ármiyai. Tura Pariséu asan Kristu-shuarin ti kajerkan áintramjai.

<sup>7</sup> Ashí nujajinkia waantu enentáimtumauyajai. Antsu yamaikia Krístujajinkia peņké ántar ániawai tajai.

<sup>8</sup> Ashí enentáimpramnia ákuisha winia Úuntur Jesukristu shiir enentáimtustin nekas péņkeraiti. Nu asamtai Krístunu ajakun wi takusmaj nu muijmiai ajasmatai núnaka iniaismajai.

<sup>9</sup> Nuna túran Nijjaj tsaninkian pujajai. Tura akupkamu umirkatniujaj péņker ajaschaitjai antsu Krístun enentáimtakui Yus “péņkeraitme” túrutui.

<sup>10</sup> Tuma asamtai ashí nankaamas wakeraj nu júiti: Krístun péņker nekaan nekas enentáimtustinnia sha tura ni iniantkímiu kakarman takustinnia sha wakerajai. Tura Nijjaj métek ajastinian wakerakun ni wáitkiamunam tsanintinnia sha tura Nii jakamia núnisan jákatniuncha wakerajai.

<sup>11</sup> Túraknaka Krístujaj métek jakamunmayá nantaktiaj tusan wakerajai.

#### *Papru kakaram ajasmiayi Kristu wakeramun umiktinian*

<sup>12</sup> Kame wakerukuitjia nuna mash umirkachuitjai. Krístujaj métek nekas péņker shuar ajaschaitjai. Túrasha Kristu Jesus “nuj ejetajam” emka túrutkui, wisha nuj jeataj tusan kakaram ajasan pimpitsuk takaajai.

<sup>13</sup> Yatsuru, wisha nuj jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai.

<sup>14</sup> Tura nuna umikmatai nayaimpiniam Jesukrístujaj tsaninkian shiir pu-justinian Yus surustatui.

<sup>15</sup> Ashí shuar Yusjaj katsuaru ájinia nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme.

<sup>16</sup> Tura aneartarum. Naki pujutsuk jeajnia nujaj métek umirkatin pimpit-suk takastiniaitji.

17 Yatsuru, wisha tura chikichcha wíjjaj métek péñker túrajnia nu wáinkuram atumsha núnisrumek túratarum.

18 Tura yajauch shuarsha írunui. Wi nuiksha ti ujakmajrume tura ataksha útkun ujaajrume, nu shuar Kristu krúsnum jakamun mujjaiawai.

19 Tuma ásar emesratniunam akupnakartatui. Ni ayashí wakeramun, ni yusrja áintsan, tuke umirainiawai. Natsanmainian túruiniayat wararainiawai. Tura ju nunkanmayanak enentáimtuiniawai.

20 Antsu iikia nayaimpinmaya shuar asar ii Uuntrí Jesukrístu in uwentikrampra asamtai nayaimpinmaya tati tusar nákaji.

21 Nii taa, ii yajauch ayashin yapajjá ni ayashíjjaj métek ti shiir awajsat-tawai. Ashí uunt akupun ajas nu kakarmajaj túrutmattaji.

## 4

### *Krístujaj tsaniñkia wekáa asarum warastarum*

1 Nu asamtai, aneamu yatsuru, ii Uuntrí Krístujaj tsaniñkiu asarum kakaram ajastarum. Maa, ti aneakun atumin enentáimtakun ti waraajaj tura ístajrum tusan wakerajrume. Tawasap achikiar shiir enentáimsatniua núnisnak shiir enentáimtajrume.

2 Ewautiancha tura Séntikincha, ii Uuntrí Kristu shuarj ásar, mai metek enentáimsarat tusan seajai.

3 Amincha, winia airú, nu nuwá yáinkta tusan seajme. Niisha wi iwiaaku chichaman étsereakui wíjjaj métek takasarmai. Tura Krimintisha tura chikichcha wíjjaj métek takasarmai. Nuna náarin iwaaku átinnium Yus átraiti.

4 Nu asamtai Uunt Jesusaj tsaniñkia pujá asarum warastarum. Ataksha “warastarum” tájarne.

5 Uunt Jesus tátin ishichik ajasai. Tuma asamtai tsanka enentái takakrum nu paant nekanati.

6 Itiurchat enentáimsatin atumjaj penké atsutí. Antsu tuke Yus ájukum ashí itiurchatrum ujakta. Atsumamuram Yus seata. Túram Yus yumínsata.

7 Nuñkia atumí enentái ankant átinian, áentstikia penké nekaachminia nuna, Yus amastatui. Yus atumin ankant awajtamsa asa atumí enentáin tura atumí enentáimsamuríncha yajauch wayawajin tusa shiir waitmaktatrume Jesukrístujaj tsaniñkiu asakrumin.

### *Ashí péñker ana nu enentáimsatarum*

8 Yamaisha yatsuru, júchiniak títiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chíkich shuarnasha péñker enentáimtusminia nusha, kame ashí péñker ana nu enentáimsatarum. Nuyásha chíkich shiir anturkamnia ana nusha enentáimsatarum.

9 Wi unuinarmajrumna nu umiktarum. Tura wi túramur ísurmena nu tura antukurmena nusha umiktarum. Túrakrumñkia Yuska ankant átinian amastaj tusa pujurtamsattarme.

### *Jiripiusnumiq Yus-shuar Páprun kuítian akuptukarmiania nu*

10 Ii Uuntrí Kristu anea asarum winiasha ataksha enentáimturu asakrumin ti waraajaj. Kame kajinmatrukmiarme tátsujaj antsu kuítrum atsakui yáintkiatin tujinkiamarme.

<sup>11</sup> Tura kuítian atsumakun tátsujai. Antsu wi takakjana nujaj̄n warastinian unuimiáruitjai.

<sup>12</sup> Kuítrinchati pujustinia nuna nékajai tura ti nukap takustinia nunasha nékajai. Tsukamaknasha jéemarnasha, itiarar takustinniasha tura penké takutsuk pujustinniasha unuimiáruitjai.

<sup>13</sup> Kristu ni kakarmar̄n surakui ashí túramniaitjai.

<sup>14</sup> Tuma aj̄n atumsha wi atsumamu akupturkarum ti péñker túramarme.

<sup>15</sup> Jiripiusnumiá shuartiram, ju ti penker nékarme. Masetunia nunkanam Yus-Chichaman etserumtai aya atumek kuit akupturkamiarme. Wi etserkamujai atumí wakan̄n yá̄nma asamtai yum̄sarum akupturkamiarme.

<sup>16</sup> Atumek wi Tisarúnikia nunkanam atsumakun pujaj̄sha kuit akupturkamiarme.

<sup>17</sup> Aya kuit akupturkakrumin tu enentáimtsujai. Antsu nu kuit Yusaj̄ kawentramkaku tusan wakerajrume.

<sup>18</sup> Epaprutitijai akupturkamarum nujaj̄sha atsumamaj nuna nan̄kaamas tiaruncha wáinkiajai. Akupturkamarum nusha ti kun̄kuin Yus susamua áinis ti shiir auyi.

<sup>19</sup> Winia Yúsrusha ti péñkeran núkap takakui. Atumsha Jesukristunu ajasu asarum Yus seamniaitrume. Tura Yuska ti takakna nujaj̄ ashí atsumarmena nuna suramsattarme.

<sup>20</sup> Ii Apar̄j Yus tuke shiir atí. Nuke atí.

### *Amikmaamu*

<sup>21</sup> Winia náaruisha tura Jesukristu náar̄ncha ashí Yus-shuar ainia nu chícham ujatruktarum. Niisha shiir pujusarti. Wi írutramusha núnisañ shiir pujusarti tusa akupturmainiawai.

<sup>22</sup> Tura ashí akupin Sésaraj̄ pujuinia nuyá Yusna ajasaruka tura chíchich Yus-shuarsha shiir pujusarti tusa chichaman akupturmainiawai.

<sup>23</sup> Ii Uuntr̄j Jesukristu atumniasha ti shiir yainmakarti. Nuke atí.

## Papru KURUSENMAŸA SHUARAN papí akuptukma

### *Kurusenmaya Yus-shuaran Papru áatramiania nu*

<sup>1</sup> Wi Pápruitjai. Yus wakerutak Jesukrístunun etserkat tusa akatra akupka-muitjai. Wisha ii yachí Timiutéujai

<sup>2</sup> ju papí áarar nuí Kuruse péprunam Kristu péñker umirkarum Yusna ajasuitrumna nu akuptaji. Yus ii Aparí atumin wáitnentaimturma asa yain-makarti imiatkinchanum tuke shiir pujustinian.

### *Papru Yus-shuaran Yúsan áujtushmanis nu*

<sup>3</sup> Iisha atumin Yus áujtakur ii Uuntrí Jesukrístu Aparí Yus ashí tsawant yúminíkiaji.

<sup>4</sup> Atumsha Jesukrístu ti shiir enentáimtamusha tura ashí Yus-shuar aneamusha antukji.

<sup>5</sup> Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatái tusarum nákarme.

<sup>6</sup> Nu chicham ashí nunkanam pampaakui shuara enentáin nereá áinis nusháa ajar yamaikia péñker túrin áiniawai. Núnisan atumíincha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiai.

<sup>7</sup> Nu chichaman Épapas ujatmakmarme. Niisha iijjai métek takasu asam-tai ti aneamuiti. Atumniasha Kristu takatrín ti shiir takartamsaiti.

<sup>8</sup> Niisha átum Yus-shuar asarum mai anenai ajamun ujatmakmaji.

<sup>9</sup> Iisha nu antukar Yus ashí tsawant áujtajrume. Yus ni wakeramun ti paant nekaprutmawarat tusar seaji. Ashí Yúsnan ni enentáimtairíjiai ashí Niiniun paant nekaatniun Yus jintinramat tusar seaji.

<sup>10</sup> Atumsha Krístunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerektinia áintsarmek, túrattarme. Núnis túrarum Yus unuimiatki wéakrum Nin ti penker nekaak tusar seaji.

<sup>11</sup> Yus ti kakaram asa ikiantamprat tusar seaji. Nujai ashí iturchat ákuisha páchitsuk ti shiir warasrum katsunrattarme.

<sup>12</sup> Yus ni shuarin tsáapninia nuí ashí péñkeran susattawai. Tura incha nuí pachíinkiatniun tsankatramka asakrin Yus Apa yumínsamniaitrum.

<sup>13</sup> Yus iwianchin nupetak iwianch akupeana nú kiritniunmaya uwentikramar ni aneamu Uchirí akupeana nuí wearmakmaji.

<sup>14</sup> Ni Uchirí krúsnum jaka ii tunaarín nijiar tsan куртamar uwentikram-pramaji.

### *Kristu jakamujai Yusjai nawamnaikiar shiir pujustin*

<sup>15</sup> Yus wáinkiachminiaiat ni Uchirí akiiniamai tura ayashimkiamiayi. Túmaitiat ashí najanamua nuna yaunchu pujú asa ashí akupniuiti.

<sup>16</sup> Niijjai Yus ashí nayaimpiniam írunna nunasha nunká írunna nunasha, ashí wáiniaj nunasha núnisan wáintsuj nunasha mashí najanamiayi. Nu arantcha ashí akupin ju nunkanam írunna nusha, nayaimpiniam írunna nusha, iwianchnium írunna nusha, ashí Niijjai najanamu áiniak Nin umirkarti tusa najanamu áiniawai.



17 Ashí najanamua nuna yaunchu, Krístuka tuke pujuwiti. Ashí najanamu írrunna nuna emestsuk wáinnuuti.

18 Ashí Yus-shuar métekrak chikichik ayashtinia áinis enentáimkiumka nuna muuke Krístuiti. Tura nu ayashín ni iwiaakmarijjaj iwiaaku átinian súsaiti. Niisha ashí jakamunmayá nantakniujaj imiá nankaamantuuti. Nújajńkia ashí enentáimpramnia írrunna nunasha akupniuiti.

19 Yus ashí takamtsuk Kristuj shiir pujumiayi.

20 Núnisan Yus Kristu krúsnum jakamujaj ashí nayaimpinmasha tura ju nuńkanmasha írrunna nuna Niijjaj nawamnaikiar shiir pujusarat tusa wakerukmiayi.

21-22 Atumsha nuik tunáa túrin asarum atumí enentáin Yusa nemasri ámarne. Tuma asarum yajá wekaimiarne. Antsu Kristu, aentsu ayashín ayashimiak, krúsnum wáitias jakamujaj ii tunaari asakármatai yamaikia Yusjaj nawamnaikiar shiir pujaji. Nujaj Kristu in péńker ajasuncha tunaan máatrachmancha tura sumamachuncha Yúsaj ejetatatji.

23 Tuma asantai Jesukrístu shiir enentáimtusurum kakaram ajasrum kat-suarťiniaitrum. Tura uwempratin chicham antukuitrum nuyá kanakchat-niuitrum. Ju uwempratin chichaman ashí nuńkanam etsernakuiti. Wisha, Papru asan, etserkatniun yaimjai.

### *Papru ashí Yus-shuaran yáinťratniuiti*

24 Atumin wáitiaknasha ti shiir waraajai. Kristu ni shuarin nekas péńker awajsat tusa wáitiana nuj pachiińkia asan waraajai. Ashí Yus-shuar Kristu ayashí áintsan ániakui Yus-shuaran yáinťajtsan ayashrujaj wáitiakun shiir enentáimjai.

25 Atumin yáinťkiai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáinťrintjai.

26 Yámankamtaiknumia nekaachman Yus yamaikia ni shuarin paant awaj-saiti. Nu chichamnasha ujakarai tusa winia akatar akuptukuiti.

27 Nu chichamsha júiti: Kristu atumí enentáin pujak Niijjaj métek ti shíram awajtamsattawai. Nu imiá shiir chichamnum Israer-shuarchasha pachiińnianian Yus ashí ni shuari nekawaarat tusa wakerimiayi.

28 Iisha Kristu étsereaji. Túrar ashí enentáimťkrar péńker nekaawarat tusar jintintiańiaji. Nujaj Krístujaj tsaninťkiar ashí péńker tsakarartatui.

29 Tuma asantai Kristu ni kakarmarin tí surakui nekas kakaram takaajai.

## 2

1 Nekaatarum, yatsuru. Yus-shuaran yáinťaj tusan ti takaajai. Tura atumincha, Rautiséanmayá shuarnasha, tura ashí winia waitcha ainia nunasha yáinťaj tusan ti takaiťjai.

2 Ashí shiir enentáimťkratniun ti takaajai. Núnisan aneniarum chikichik enentáijjaj métekrak wekasatarum tusan wakerajrume. Nu arantcha, ashí Yusna ti péńker nekaarum tuke katsuaruk tusan takaajai. Nujaj Kristu ti péńker nekaattarme. Tura yaunchu nekaachman Yus yamá paant awaj-saiti. Nuka Krístuiti. Tura Nii nekaatin nekas shíraitai.

3 Tura kakaram ajasam Kristu péńker nekaam ashí shiir enentáimpramnia nusha tura ashí Yusna nekaamnia nusha nekaattarme.

4 Atumin chikich shuar niisháa chichamjaj shiir chichartamas anańkramawarajń tusan nuna tájarne.

<sup>5</sup> Wi nu*j* atum*jai* pujachkuncha nu*j* pujajna áintsanak enentáimtajrume. Tuma asan átum métek enentáimprarum tura kakaram ajasrum Kristu nekas enentáimtururmena nuna ísnaka shiir enentáimjai.

<sup>6-7</sup> Nu asantai átum ii Uuntri Jesukristu nekas enentáimtusrum Yushuar ajasmarmena núnisrum yamaisha Nii nekas enentáimtusrum Nii*jai* tsanin*krum* ashí túratarum. Nu túrakrum Nii enentáimtakrum tuke tsakaki wétatrume. Tura te tariara wajasrum Yus*jai* kanakchattarme. Yus-Chicham núnisa*n* etsernakmatai nekamar*me*. Tuma asarum Yus tuke yuminsarum, núnisa*n* p*en*ker wekasatarum.

### *Kristujai yamaram iwiaakma takakji*

<sup>8</sup> Aneartarum atumsha. Shuar aentsti enentáimmi*ajain* ashí ju nunkanmayan enentáimprar tura Kristun enentáimtutsuk niisháa chichaman áujtamainiak nekaschaj*ai* anan*kr*amataj tusa wakerutmainiawai.

<sup>9</sup> Kristunam Yus ashí takamtsuk pujuwiti.

<sup>10</sup> Túmakui atumsha Kristuj*ai* tsanin*kiu* asarum ni iwiaakmar*ai* takamtsuk takakuitrume. Kristusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti.

<sup>11</sup> Nu arant átum ayashnium tsupirnatskesha Kristu shuar*ai* ajasakrumin ashí ayash wakeramun, tsupirkatniua áintsan, Kristu ajapamiayi.

<sup>12</sup> Tura atumsha Yus ni kakarmari*jai* Kristu jakan iniantkimia nu enentáimtusrum imianmiarme. Túrarum Kristuj*ai* métek iwiarnasmarme. Tura núnisrumek Kristuj*ai* métek nantakmiarme.

<sup>13</sup> Nuikkia átumsha tsupirnatsuk atumí tunaar*ai* tuke akui atumí wakan*jin* jákauyarme. Tura yamaikia Jesukristuj*ai* tsanin*kiu* asakrumin Yuska atumí tunaar*ai* tsan*kur* yamaram iwiaakman suramsaitrume.

<sup>14</sup> Tura ashí ii tumashrin sumamtikramatin amia nuna japiruiti. Kristu krúsnum jakamta*ai* ashí akupkamuj*ai* sumamtikramamun tsan*kurt*ampramiai*ai*.

<sup>15</sup> Núnisa*n* Kristu krúsnum jaka, iwianchnium ashí akupin ainia nuna nupetak ashí ímiainai*n* iniatsararmiayi.

### *Nayaimpiniam írunna nu enentáimtustarum*

<sup>16</sup> Akupkamunmayá Yus an*kan*t awajtamsantai chíkich shuar ame túramuj*ai* yajauch enentáimturmar*ain*. Yúamna nuj*ai*, úmamna nuj*ai*, uwit-incha, nantut-incha, tura tsawant-incha nampermam nuj*ai* chíkich shuar yajauch áujmatramkuisha çwar*i* urukati*n*?

<sup>17</sup> Nu nampernum Israer-shuar Kristu túrattana nuna nakumainiak túrin armiai. Tura Kristu taa imia Ni*n*ki pujá asantai nakumkamuka á.

<sup>18</sup> Tura shuar “Péejchach ajasam Yus áujtsuk aya Yusa suntar*ai* shiir awasatniuiti” túramkuin*ka* anturkairap. Nu shuar mesekranam wáinkiamun áujmatenak ántar nan*ka*amantu enentáimtumainiawai. Aya aentsti enentáimian chichainiawai.

<sup>19</sup> Tuma ásar Kristuj*ai* tsanin*kiar* wekainiatsui. Kristu ashí akupin asa ni shuarin Yúsna*n* jintintiá shiir tsakar*at* tusa p*en*ker wáiniui. Nu arantcha ashí ápateak Yus wakerana áintsan chikichik awajeawai.

<sup>20</sup> Atumsha Kristuj*ai* jaka asarum aya aentsti enentáimta*ai* ikiukniuitrume. Nuikkia çurukamta*ai* ju nunkanmayá ana nu tuke páchiarum? Nii tuinia nu umirkashtini*ai*ti.

<sup>21</sup> “Ju antinchatniuiti, tuiniawai. Ju yúashtiniaiti. Tura ju achikchatniuiti” tuiniawai.

<sup>22</sup> Nusha ¿warí, takasam amuukashtatuak? Kame áyatik aents akupkamu áiniawai.

<sup>23</sup> Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeteatsui.

### 3

<sup>1</sup> Nuikia Krístujai nantakin asarum nayaimpinmaya írunna nu wakeruktarum. Nuí Kristu pujawai Yusa untsuuríni.

<sup>2</sup> Ju nunkanam ana nu enentáimtsuk aya nayaimpinmaya ana nu enentáimtustarum.

<sup>3</sup> Atumsha Krístujai tsaninkrum jakamarme. Tuma asarum Krístujai tsaninkrum Yusjai iwiaaku pujarme.

<sup>4</sup> Krístukete ii iwiaakmarí. Nii nayaimpinmaya wantinkuiusha atumsha Nijijai métek wantinkiattarme. Tura Nijijai métek ti penker átrume.

#### *Yaunchu iwiaakmasha tura yamaram iwiaakmasha*

<sup>5</sup> Tuma asamtai ju nunkanmaya ana nu ajakratniua áintsarum ini-aisatarum. Tsanirmatniusha, tunáa wakeruktincha, tura takakna nujai nankaamas wakeruktincha ántar-yus tikishmatratniua áintsan asamtai ini-aisatarum.

<sup>6</sup> Shuar Yúsan umirtsuk aya nuna túrin ásarumatai Yus nin kajerak ti asutiáttawai.

<sup>7</sup> Atumsha núnisrumek túriniuyarme.

<sup>8</sup> Tura yamaikia jusha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chícham chichastincha, mash iniaisatarum.

<sup>9</sup> Yus-shuar ajasrum yaunchu enentáimtairam iniaisamarme. Tura yaunchu túrutairmesha iniaisatrume. Tuma asarum nuamtak tsanumprunairairap tura wáitruawairap.

<sup>10</sup> Yaunchu enentai, pushí mamuru áiktinia áintsarum, iniaisatrume. Núnisrum yamaram enentái, shiir pushí entsartinia áintsarmek, wekasatrume. Tura Yus nu yamaram enentáin najana asa ashí tsawant pujrtawai nuna nankaamas Nijijai métek shiir atí tusa. Túramtai Yus ti penker nekaki wéaji.

<sup>11</sup> Krístuka ashí írunna nujai nankaamas ashiyaiti. Niiniun pujurui. Tuma asamtai ashí ni shuari enentáin pujá asamtai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarín ainia nusha tura ankant ainia nusha, Kristu ashí ni enentáin pujakui nusháa enentáimtunairchatniuiti.

<sup>12</sup> Yus atumin anenmak Niiniu arti tusa achirmakmarme. Túrutma asamtai jujai shiir iwíarmampratniua áintsarum tuke túrin atarum: waitnenkartin, shiir awajkartin, péejchach átin, émtin áchatin, tura katsuntin átin.

<sup>13</sup> Kristu atumí tunaarín tsankuramia núnisrumek nuamtak tsankurnáiratarum. Chíkik yajauch awajtamkuisha shiir katsuntram yapajniaitsuk tsankurnáiratarum.

<sup>14</sup> Tura ashí nankaamas anenaitiarum. Túrakrumka chikichik ajasrum mash penker túrattarme.

15 Kame chikichik ayashtinia áintsarum ajastarum tusa Yus ni shuarj ajasat tusa achirmakmarme. Tuma asamtai Yusa shiirj atumí enentájn pujurtam-sati. Nujaj Yus yumiņsatarum.

16 Kristu shiir chichame atumí enentájn piakti. Nekas naka enentáimprarum jintinnaiyarum mai ikiakánai ajatarum. Yus kanta kantamarum tuke enentáijjaj Yus yumiņsarum shiir awajsatarum.

17 Tura takaakmesha, chichaakmesha, kame ashí túramna nuka Jesukristu shiir awajsataj tusam ni kakarmarjijajin túrata. Túrakum Krístujaj Yus Apa yumiņsata.

### *Yus-shuar túratniua nu*

18 Nuwatiram, atumí aishrj umirkatarum Uunt Yus nuna wakerakui.

19 Áishmantiram, atumí nuwé aneatarum. Atumí nuwejaj kajernaikiarap.

20 Uchitiram, ame apa nukusha tuke umirkatarum. Nu túrakum Yus shiir enentáimtiksatarme.

21 Uchirtintiram, atumí uchirj ti kakantrairap. Ti kakanteamka uchisha ti kuntuts pujus péņker wekasatniun nakitchanpiash. Nu túrunawajin tusarum ántrarum atumí uchirj kakantrairap.

22 Takarniutiram, atumí uuntrj shiir umirkatarum. Ju nunkanmaya uuntrj ajn aya nii iimkiui shiir enentáimturati tusarum takaschatniuitrume. Antsu Yus enentáimtakum tuke péņker takastiniaitrum.

23 Ashí túramna nu asump enentáijjaj takakmasta. Aya aentsuk yáinginia áintsachu antsu nayaimpinmaya Úuntrum yayá áitkiasrum takastarum.

24 Ame Úuntrum Kristu asa nayaimpiniam ashí shiir takustinian tsankatramkattawai.

25 Antsu tunáa túrin ni yajauch túramujaj métek akinkiáttawai. Yus ashí áentsun métek iyawai.

## 4

1 Úunttirmesha, atumí Uuntrj atumin wáiniuk nayaimpiniam pujatsuk. Tuma asamtai atumí yáinma jiatsuk péņker iniatiniaitrum.

2 Yus áujkuram Nii yumiņsarum asummiarum iniaitsuk áujstatarum.

3 Incha Yus áujtustarum. Kristu-chicham yaunchu nekaachman yamá etserkun sepunam pujajaj. Tuma asamtai nuna shiir ankant etserkat tusarum áujtustatarum.

4 Tura wi paant etserkatniuitiaj núnisan etserkat tusarum áujtustatarum.

5 Yus-shuarchajaj shiir túratarum Yus-Chichaman yajauch enentáimturarajin. Kakaram ajasrum tsawant ántrarum iniankasairap.

6 Ti shiir chichamtin átiniaitrum tura anturújamin átiniaitrum. Núnisrum chíkich chíkich Yus-chicham paant ujaktin nekaattarme.

### *Amikmaamu*

7 Ii aneamu yachj Tikikiu ashí wínian ujatmaktatrum. Niisha wijjaj métek Yúsnan pimpitsuk ti peņker takasuiti.

8 Nu asamtai ii juj pujajnia nuna ujatmak ikiantamprarat tusan akuptarume.

9 Núnisan ii aneamu yachi Unisemu niijjaj winiawai. Niisha atum wéeaite, tura Yusjaj shiir wekaawai. Nu shuar ashí juj túrunamun ujatmaktatrum.

<sup>10</sup> Aristarku wi sepunam tsaniñkia pujamur amikmaatmarme. Núnisañ Markus, Pirnapí kaná yachia nu, amikmaatmawai. Niisha nuñ jeamtai antukmarum núnisrum péñker wáinkiatarum.

<sup>11</sup> Justu Jesus náartin amikmaatmarme. Júchik ániawai Rúmanmaya Israer-shuar winia Yúsnañ etserkatin atutkaru ainia nu. Túmainiak ti shiir ayamtikruiniawai.

<sup>12</sup> Épaprassha, atum weeá, Krístunun etserin asa atumin amikmaatmarme. Niisha ashí tsawant Yúsnañ áujeak Yusjaj kakaarum tuke shiir Yus wakera nu túrak tusa seatramprume.

<sup>13</sup> Wisha Épapas atumin ti enentáimturman nékajai. Núnisañ Rautiséanmaya shuarnasha tura Irapurisnumia shuarnasha ti páchiniawai.

<sup>14</sup> Rukas, aneamu tsuákratin, núnisañ Témassha amikmaatmarme.

<sup>15</sup> Tura Rautiséanam pujuinia nú Yus-shuarsha amikmaatruatarum. Núnisañ Nímpiassha tura ni jeen irunainia nú Yus-shuarsha amikmaatruatarum.

<sup>16</sup> Átum ju papí áujсарum umikrum Rautiséanmasha nuyá Yus-shuar áujсarti tusarum akupkatarum. Tura atumsha núnisañ Rautiséanmaya papí támatai atumsha áujсatarum.

<sup>17</sup> Tura ju Arkipiu titiarum: “I Uuntrj Jesus ni takatrjñ suramsa nu péñker umikta” tawai, titiarum.

<sup>18</sup> Wi, Papru, winia uwejrújaj júchiniak áatkun amikmaajrume. Sepunam pujajna ju enentáimturatarum. Yus shiir yainmakarti.

Nuke atí.

## Papru

# TISARÚNIKIANMAYA SHUARAN

## Emka papín aar akuptukma

*Papru ni tsaniakmarijjai Yus-shuaran áatramiania nu*

<sup>1</sup> Wikia Pápruitjai. Wisha Serpanujaj tura Timiutéujaj Tisarúnikianmaya Yus-shuar ajasuitrumna nuna áatjarme. Atumsha Yus-shuar asarum Apa Yúsnaitrume, tura Uunt Jesukrístunuitrume. Ii Aparj Yus, tura ii Uuntrj Jesukrístu waitnentrama ásarmatai, ti shiir imiatkinchanum pujustarum, tu wakerajrume.

*Tisarúnikianmayg shuar Yus nekas enentáimtusar umirkatniun jintintiarmiania nu*

<sup>2</sup> Iisha Yus áujkurkia atumniasha tuke enentáimtusar Yus shiir yumínsaji.

<sup>3</sup> Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarne. Nu neka asar, ii Aparj Yus áujkur, nusha ashí enentáimsar áujtajrume.

<sup>4</sup> Yatsurú, Yus anenmarme. Anenma asa Winia arti tusa achirmakurmena nusha nékaji.

<sup>5</sup> Enentáimpratarum. Iisha Yúsaj Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakanj kakarmarijjai tímiaji. Tura átum péñker matsamsarat tusar atumjai pujusar shiir iruntrar wekasarmiaji. Nusha paant nékarne.

<sup>6</sup> Atumsha yamaikia íksarmek ii túramiaj nu, tura ii Uuntrj Jesukrístu túramia nu túrarme. Itiurchat ajñ Yus-Chicham umikiurme. Tura wáitiatrumek Yusa Wakanj shiir enentáimtikramkui warasrum pujarme.

<sup>7</sup> Nu túrakrum ashí Masetúnia tura Akaya nunñkanmaya Yus-shuarsha shiir wekasatin jintintiarme.

<sup>8</sup> Tuma asarum Uunt Yusa chichame ti ipiamparurme. Tuma asamtai Masetúnia tura Akaya nunñkanmaya shuar nuna nékainiawai. Tura nú nanñkaamas Yus nekas umirkarmena nuna ashí aents nékainiawai. Nuna nékainia ásar ii étserman atsumainiatsui.

<sup>9</sup> Antsu átum in péñker itiaamun níi íksañ ujatmainiaji. Tura nuyasha ántaryus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji.

<sup>10</sup> Tura nuyasha Yusa Uchirj Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Nínkiti Yusa kajetáirj tsawantrj jeattana nuyá uwentikrampratin.

## 2

*Yus-chichaman paant ujakarmiania nu*

<sup>1</sup> Atumsha nékarne, yatsurú, iisha ántrar atumín jeachmaji.

<sup>2</sup> Antsu itiurchat wáinkiaitiatar arantusuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkiui Yusa chichamen ujakmajrume. Nuka atumsha ti péñker nékarne.

<sup>3</sup> Warí, iisha Yus-Chicham atumin ujakmiaj nu nekasauyi. Tura yajauch enentáimsan, anaṅkatjarum tusan tíchamjarme.

<sup>4</sup> Antsu Yus in péṅker enentaimturmas Uwempratin Chicham etserkatarum tusa akatrampramijai. Tuma asamtai núnisrik étserieaji. Túrasha aya aents waramtiksatatai tusar étsertsuji. Antsu Niṅki Yúsak ii enentáin nekartamin asamtai, shiir enentáimtiksatataisatir túraji.

<sup>5</sup> Átumka nékarme, peṅkesha shiirmach chichasan anaṅkachjarme. Nuyasha, kuit achiktai tusar ánrar chichaschamji. Núnaka Yus nékawai.

<sup>6</sup> Iisha Kristu akatramurintji. Tuma asar ni kakarmaríjijai akupkatin takakuji. Páchitsuk túramniauji. Túrasha waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji.

<sup>7</sup> Antsu uchi kuírchin ni nukurj péṅker iis tsakatmana áintsarik iikia atumniaka shiir ísmajrume.

<sup>8</sup> Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachajai, atumín ti anea asar<sup>1</sup>.

<sup>9</sup> Yatsurú, ii atumaj nu sumarmaktai tusar kakaram takakmasmaj nu ĉkajinmatkintrumek? Atsá. Nékarme. Iis, Yus-Chicham étserkur, tsawaishsha káshisha takasmiaji. Nusha, akirkata, tíj tusar takakmasmiaji.

<sup>10</sup> Yatsurú, atumjai pujumiaj nuj iisha Yus wakerana nu túrimiaji, tura yajauch túrutsuk shiir wekasamiaji. Nujai incha chikichkisha yajauch chichartamkatniusha atsumiaji. Nuka atumsha nékarme tura nú arant Yus nékawai.

<sup>11</sup> Tura atumniasha ankant ankant Yúsnum ikiakármajrumna nu nékarme. Tura uchin ni aparj átsaṅkeana nútiksarik shiir enentáimtikramajrumna nusha nékarme.

<sup>12</sup> Tura Yúsjai shiir wekasatarum túmiajrume. Yus naṅkaamas uunt asa ashí akupeawai. Tura Yus-shuaraitrumna nuna, Winin pachíinkiarat tusa, Yus untsurmarme. Yus untsurma asamtai Níniuitrume. Niiniu asarum Yusa uchirja núnisrumek wekasatniuitrume.

<sup>13</sup> Yus-Chicham ii étserma antukrum, aya áentsnumiaṅchaiti tímiarme. Yúsnumiaṅti tímiarme. Nu tiniu asarum umirkamarme. Kame nekas tárume. Ii étserjinia nu nekas Yusa chichamēnte. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúminĉkaijai.

<sup>14</sup> Yatsurú, ju nekaatarum. Aya atumek wáitiatsrume. Ashí Jutía nuṅkanam Israer-shuar, ni shuarinĉketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásar matai wáitkiasarmiaji. Yamaikia atumniasha atumí shuarin wáitkiarmainiawai. Nujai Jutía nuṅkanmaya Yus-shuarjai métekrak ajasurme.

<sup>15</sup> Niisha Israer-shuaraitiatan Yus-Chichaman etserin armia nuna nuamtaketiati máawarmiaji. Tura nú weeák Uunt Jesusnasha máawarmiaji. Tura incha aa jĉlki akuptamkarmiaji. Maaj, niisha Yúsan shiir enentáimtikiainiatsui. Tura núnisar ashí áentsun kajerainiawai.

<sup>16</sup> Warí, Israer-shuaracha Uwempratin Chicham ujaktaj tákurnisha niisha suritramainiaji. Nuna túruiniak yaunchu tunaan túriarmia nújainĉkia naṅkaamas yamaikia túrawarai. Paí, túrasha yamaikia Yusa kajetairiĉi imía tsuumai ana nuj pujusarai.

17 Iisha, yatsuru, ishichik tsawant atumj<sub>iiya</sub> kanakir jeachat pujayatrik, atumj<sub>ai</sub>sha wáinniaiychiatrik tuke ii enentá<sub>inkia</sub> enentáimtimjiarme. Tuma asar ataksha atumin iistai tusar ti wakerimji.

18 Nekas winitiaitsar wakerimji. Imia wíkisha winitniun ti nukap enentáimsamjai. Tura iwianchi uuntri Satanás tuke nuna suritrammiaji.

19-20 Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukristu tátintri shiir enentáimsar nákaji. Nii támatai imiá warastatji. Atumin Yus-shuar awajsa asar, Nii támatai atumsha iij<sub>ai</sub> Jesus shiir inkiuntatji. Tuma asamtai nu enentáimsar tawasap achiktinia áintsar waraaji.

### 3

1-2 Iisha ataksha atumin ístaitsar ti wakerimji. Tura tujintiakur iikia Atenas péprunam juákur ii yachi Timiutéu atumin írmainiarat tusar akupkatai, timiaji. Iisha Kristuj Uwempratin Chicham etsermiaj nuj, Timiutéuka iij<sub>ai</sub> métek takasuiti. Tuma asa niisha Yusa takatrin takáa asa atumniasha Yusaj kakartarum turamarti tusar akupkamji.

3 Tura nú arant, itiurchatan wáiniuk iniaisar<sub>ain</sub> tusa ikiakátmararti tusar Timiutéu akupkamji. Yatsurú, átumka nékarme, ashí Yus-shuaraitjinia nuka páchitsuk wáitsatniuitji. Iis, tuma asamtai atumsha ti nekas itiurchatnum pujarme, Yus-Chicham umirka asarum.

4 Iimiatarum, atumj<sub>ai</sub> nuik tuke pujumjinia nuj “iisha wáitsartatji” tíchamkajrum. Iis, túrunachaik. Nuka nékarme.

5 Tura atumin íwianch tunaanum ajunmarchariash tusan, wisha kúntuts enentáimsamijai. Tura ánrar takaschajiash tu enentáimsamijai. Tuma asamtai nekaataj tusan ti wakerakun, wisha ti nukap tsawant nákaschamijai. Antsu wárik Timiutéun akupkamijai. Yús<sub>ai</sub> pé<sub>n</sub>kerash wekainia tusan, “nu inintrusam ikiuuta” timiajai.

6 Tura yamaikia Timiutéu Tisarúnikianmaya waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin ístaitsar wakerajnia núnisrumek atumsha incha írmaitiai tusarum wakeramuncha Timiutéu ujatmaji.

7 Tuma asamtai, yatsuru, ashí itiurchat tura wáitsatin wáiniatrik átum Yus shiir enentáimta asakrumin iisha shiir enentáimji.

8 Atumsha Yús<sub>ai</sub> tariara weká asakrumin, shuar jaa pé<sub>n</sub>ker ajas enentá<sub>inkia</sub> chinkiana áintsarik enentáimji.

9 Yus pé<sub>n</sub>ker umirka asakrumin, iisha shiir waraaji. Warasu asar ii Yusri ti yúmin<sub>ki</sub>aji.

10 Incha Yus akuptamkurn<sub>inkia</sub> atum<sub>ijn</sub> tímiajaik jeartiai tusar wakeraji. Túrar Yusna nekaatin mash nékatsrum nu jintintiatat tusar tuke ti seaji.

11 Atum<sub>ijn</sub> weri ístinian ii Apar<sub>i</sub> Yussha tura ii Uuntri Jesukristusha in yáinmaktai tusar wakeraji.

12 Atumin ii aneajnia núnisa<sub>n</sub> Yus atumniasha mai anenai ajatniun tura chikichcha aneastinian enentáimtikrampartí. Tura nú nukap anen<sub>kr</sub>attain Yus amasartí tusar wakeraji.

13 Yus ikiakátmakui átum tunáa túrutsuk Yus umirkarum wekasatarum tusar ii Apar<sub>i</sub> Yus seaji. Ii Uuntri Jesus Níiniur<sub>ijai</sub> winiak pé<sub>n</sub>ker wekaarmin tati tusar taji.



## 4

*Pénker túratniun Yus wakerana nu*

<sup>1</sup> Iikia Uunt Jesus akupkamuitji. Tuma asar nu kakarmajaj atumniasha ju túratarum tusan akupeajrume. Atumsha iwiaaku pujarmena nuj Yus shiir waramtiksatarum tura tuke pénger túrukum wetarum tusar seajrume. Iisha nuik atumin unuiniarmajrumna nútiksarmek túratarum.

<sup>2</sup> Uunt Jesusa akupeamurjjaj tura nu kakarmajaj atumniasha nuik unuiniarmajrumna nu átumka nékarme.

<sup>3</sup> Atumin Yus wakerutmarmena nu júiti: “Shuar aya Winin sumama pujusat tusan chikichkinkesha shuar tsanirmaashti”.

<sup>4-5</sup> Yus-shuarcha ainia nu, Yúsan nékainiachu ásar, aya niniki enentáimtumasar aya ni ayashj wakeramunak umiktinian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuarj pénger enentáimtusurum shiir aneasrum ayastarum.

<sup>6</sup> Nú arant, amesha ame yatsum anankam ni nuarj yajauch awajtusaip. Nu túrakrumninkia ii tímiajrumna nútiksaj Uunt Yus ti kakaram asutiámawartatui.

<sup>7</sup> Warí, Yus incha péngercha yajauch túratarum turamchaitji. Antsu aya péngerak túratarum turamji.

<sup>8</sup> Tuma asamtai shuar ju chichaman nakitiakka áentsun nakitiatsui, antsu Yúsan nakitraití. Tura nu Yussa ni Wakanin amaawiti tunaan túrashtinian.

<sup>9</sup> Tura yamaikia nuamtak Yus-shuar aneniastin ana nuna ti neka asakrumin áatrashtatjarne. Warí, imia Niniki Yus atumin mai anenai ajatniun jintinramawarmatai nékarme.

<sup>10</sup> Iis nútiksarmek aneniatsrumek ashí Masetúnianam matsatainia nujaj. Túrashá, yatsuru, atumí anenkrattairj nú nukap ajasti tusan, seajrume.

<sup>11</sup> Yamaikia tímiaj nútiksarmek, yayauchin túruinia nuj wekatsuk, chikich shuarna pachittsuk, atumí takatrjin shiir ankant pujusrum atumí uwejejain takakmá pujutarum.

<sup>12</sup> Átum táasajrum tusan tájarne. Túrakrumninkia atumniasha chikich shuar pénger enentáimturmasartatui.

*Kristu tátintri*

<sup>13</sup> Yatsuru, Yus-shuarcha ni shuarj jakamtai “atakká wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsajrum tusan júna tájarne. Jákaru ainia nu urukawartinkit paant nekaatarum.

<sup>14</sup> Jesus jákayat nantakchamkia. Núnisan Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha.

<sup>15</sup> Tuma asamtai Yus-Chicham nekaprutamnia nuna atumniasha jintintiajrumne. Iisha tuke iwiaaku pujarin Kristu táakuisha jákaru ainia nuka ikiuakur émkishtatji.

<sup>16</sup> Antsu Yus akupeakui, Yusa suntarj uuntrj unsumkui tura Yusa kachurj unpuarматаi Uunt Jesukristu unsumuk Yus pujamunmaya taratawai. Nuinkia Krístunu ajarar jákaru áiniana nu iwiarsunmunmaya nantakiartatui emka.

<sup>17</sup> Tura nuyá iisha Yus-shuar tuke iwiaaku pujajnia nu Krístujaj yuraminiam ajapén inkiunaikartatji. Nuní ashí nayaimpiniam ii Uuntrj Jesukristujaj tuke iwiaaku pujusartatji.

<sup>18</sup> Tuma asamtai ju shiir chicham atumin ujakjana jujaj mai ikiakánai ajatarum.

## 5

<sup>1</sup> Túrasha, yatsuru, ni tátintri waritiñ tura warí tsawantaj, nuka áatratin atsumatsrume.

<sup>2</sup> Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisan̄ nákatsuk pujuiniaj Uunt Kristu tsawantri jeattawai.

<sup>3</sup> Ashí shuar “Pai, yamaikia ti nekas shiir péñker pujuiniaji” tu matsatainiaj, aya aneachma nuñka mesertin tsawant jeattawai. Nuwá ajamtin aya aneachma jatema áintsan̄, nékachmanum átatui. Túmakui pisartin penké átsuttawai.

<sup>4</sup> Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsan̄ tarutrámashatui.

<sup>5</sup> Enta, átumka tsáapninium wekáa asarum Yus-shuurtirmeka nékaitrume. Iikia kiritniumiãñchuitji.

<sup>6</sup> Nu tuma asar, chíkich uruka núnisrik, ii enentájn kanartinia núnisrik “Warí, winia itiurtawa” tíchami. Antsu naka enentáimsar anearmi.

<sup>7</sup> Iis, kashi kanarchatniukait. Tura nampeena nu kashi nampeenawai.

<sup>8</sup> Túrasha iikia shiir tsáapninium wekainiaj nuka naka enentáimprar tuke nampetsuk pujustiniaitji. Suntar ni nemasri anañkruawajñ tusa anear wekasatniuiti. Tura iisha núnisrik íwianch yajauch awajtamsajñ tusar anearmi. Yus enentáimtusar aneetnuiitji. Tura núnisrik iisha, ju nuñkanmaya uwemprar Yúsaj tuke pujustajji, tu enentáimprar wetái.

<sup>9</sup> Páantchakait. “Jinium wéchatniuitrume” Yus incha túramji. Antsu ii Uuntri Jesukristujaj uwempratniun tsañkatramkaitji.

<sup>10</sup> Niijjiaj métekrak iwiaaku ami tusa Jesukristu in jarutramkamiaji. Nu tuma asamtai iisha ii ayashijiaj iwiaaku pujakrishna Niijjiaj iwiaakji, tura ii ayashijiaj jáakrishna Niijjiaj tuke iwiaakji.

<sup>11</sup> Tuma asamtai tuke túrarmena núnisrumek, shiir enentáimtiknaisarum mai ikiakánai ajatarum.

*Papru Yus-shuaran jintintiamiania nu*

<sup>12</sup> Yatsurú, juna seajrume. Atumjaj pujuinia nú shuar Yúsnañ takamainiakui shiir enentáimtustarum. Jintinramuk chichartamainiakui umirkatarum.

<sup>13</sup> Yúsnañ takainia ásarmatai ti péñker enentáimtusarum aneestarum. Tura yajauch awajnaitsuk ti shiir nawamnaikiarum matsamsatarum.

<sup>14</sup> Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakárarum. Kakarmachu ana nusha yáin̄tarum. Tura ashí shuarjaj kajetsuk katsuñtrarum wekasatarum.

<sup>15</sup> Aneartarum, yatsuru. Chíkich yajauch túrutmamtai amesha nútiksamek yapajkiaip. Antsu nuka túrutsuk átumka mai péñker awajnai ajatarum. Tura nú arant, ashí nuñkanmasha ashí shuarsha nútiksarmek túratarum.

<sup>16</sup> Tuke shiir warasrum pujustarum.

<sup>17</sup> Tuke tsawant iniaitsuk Yus áujsatarum.

<sup>18</sup> Péñker pujakmesha, itiurchat pujakmesha ashí warí wáiniam nuñsha Yus shiir yumñsatarum. Kristu Jesusaj Yus-shuar ajasutiram nu túratniun Yus wakerawai.

<sup>19</sup> Ji ikiajniaktinia núnisan̄ Yusa Wakanj enentáimin keana nuka tunaajaj téenmamtikiarum ikiajniakairap.

<sup>20</sup> Yus jintintrar akupkamu asa pé<sub>n</sub>ker chichaman etserainia nu naki-trairap.

<sup>21</sup> Ashí etserkamu ana nu nekasashit tusarum nekaatarum. Túrarum aya pé<sub>n</sub>ker ana nuke achiktarum.

<sup>22</sup> Ashí yajauch ana nuyá<sub>n</sub>ka kanaktiarum.

<sup>23</sup> Yuska, imiatkinchanum wekasatin amaana nu, atumin takamtsuk shiir awajtamsartí. Tura ii Uuntri<sub>j</sub> Jesukrístu táatsá<sub>i</sub>n, atumí wakan<sub>j</sub> atumí enentaj tura atumí ayashísha mash métek tunaajá<sub>i</sub>nchu awajtamsati.

<sup>24</sup> Yus atumin untsurmakmarumna nu tímianak uminiaiti. Nii tana nuna yawetsuk túrattawai.

*Amuamunam amikmaatin*

<sup>25</sup> Ashí yatsurtiram winiasha Yus áujtursatarum.

<sup>26</sup> Ashí Yus-shuar árum nu, amikmaaniatarum.

<sup>27</sup> Winia Uuntru Jesukrístu chichamejái juna tájarme. Ju papí ashí Yus-shuar antukarti tusarum ashí iruntramunam áujtsatarum.

<sup>28</sup> Ii Uuntri<sub>j</sub> Jesukrístu atumin yáinmákartí. Nu atí.

## Papru

# TISARÚNIKIANMAYA SHUARAN

## Ataksha papin aar akuptukma

*Papru ni tsaniakmarijiai Yus-shuaran áatramiania nu*

<sup>1</sup> Wikia Pápruitjai. Wisha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarne. Atumsha ii Apari Yusna tura Uunt Jesukristunu ajasuitrume.

<sup>2</sup> Tuma asakrumin ii Apari Yus tura ii Uuntri Jesukristusha waitnentrama áarmatai yáinmakar péñker awajtamsarat tusan wakerajrume.

*Kristu támatai tunáa shuáran Yus asutiáttawai*

<sup>3</sup> Yatsurú, átum péñker matsatu asakrumin iisha Yus tuke yúminkiaji. Átumka Yus nekas enentáimtustin nú nukap nekaakrum wéarme. Tura nuamtak aneniastincha nú nukap nékarme. Nu tuma asamtai Yus yuminsatniuitji.

<sup>4</sup> Átum Yus-shuar asakrumin chíkich shuar atumin yajauch awajtamainiawai. Tura itiurchat wainiu asarum ti wáitiarme. Nu tuma aijn átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatania nuka warasar ujainiaji.

<sup>5</sup> “Yusa akupeamurjn pachiinkiamniaitrume” Yus túramprume. Nuj pachiinkiatat tau asarum ju nunkanam wáitiarme. Tura wáitiakrumsha nuna nankaamas iwiarnaruitrume nuj pachiinkiatin. Kame nújainkia Yus atumin achirmak péñker túrait, nuka páantaiti.

<sup>6</sup> Núnisan atumin wáitkiarmainia nunasha Yus túmirusan wáitkiasartincha nekas péñkeraiti.

<sup>7</sup> Tura wáitiarmena nusha Yus íjjaisha ayamtikramprartin péñkeraiti. Ii Uuntri Jesukristu ji keana ímianisan kakaram suntarjiaj nayaimpinmaya tara wantinkiamtai, nu tsawantaj Yus ayampratniun suramsartatji.

<sup>8</sup> Tura nú tsawantajsha Yúsan nékainiatsna núnaka ii Uuntri Jesukristu ti asutiájtajsa tátatui.

<sup>9</sup> Taa, nincha menkakatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nuj akupeajrume, átum winia umirtukcha asakrumin” nin tiartatui.

<sup>10</sup> Kame Uunt Jesukristu tátin tsawantri jeamtai, ni shuarj, ni enentáin péñker awajсарu áinia nu, ni náarin shiir pachisartatui. Tura Yúsan umikiaru ásar, ti shiir enentáimsar Jesukristun ísartatui. Ii ujakmajrumna nu antukrum umirka asarum atumsha nuj pachiinkiatarme.

<sup>11</sup> Nu tuma asamtai ii Yusrjn atumin tuke áujtajrume. Yus atumin achirmakuitrume. Nuñkia Yuska atumí enentáin takas Nii wakera nujai métek awajtamsati, taji. Yus umirka asarum péñker wekasataj tusarum wakerarme. Túrarum Yus enentáimtusurum péñker túratin wakerarme. Tura wakerarmena nu umiktin Yuska ni kakarmarjiaj yáiní, tu áujtaji.

<sup>12</sup> Átum péñker wekasa asakrumin chíkich shuarsha ii Uuntri Jesukristu náarin nankaamantu enentáimtusartatui. Nusha auka ii Yusrj tura ii Uuntri Jesukristu waitnentáimturmasar péñker wekasatniun yáinmakui túrarme. Túramtai chíkich shuar shiir enentáimturmasartatui.

## 2

*Tuke Tunaarintin wantinkiattana nu*

<sup>1</sup> Tura, yatsuru, ii Uuntri Jesukristu tátatna nuna tura Niijjai inkiunaiktatjinia nunasha ujaktinian wakerajrume.

<sup>2</sup> Chíchich shuar anaŋkramawar “Uunt Jesukristu tsawantri jeayi” tu ujamaktaj tusa wakeruiniawai. “Iimiarmaj nujai nékajai” turamainiakuisha, “chícham étserman antukmaj nujai nékajai” turamainiakuisha, tura “Papru papí áarmari nuna takui nékajai” turamainiakuisha, páchim enentáimprairap. Tura sapijmiakairap tusan seajrume.

<sup>3</sup> Penké anaŋnawairap. Nekaatarum. Nu tsawant jeatsain Yúsnumiá kanaktin átatai. Tura nú arant, Tuke Tunaarintin, emesnartatna nu wantinkiattawai.

<sup>4</sup> Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatrarain tusa ti nakitrattawai. Niŋki ti naŋkaamantu enentáimtumas, Yusa nuke ajas, Uunt Yusa Jeeŋ wayáa pujus-tatui. “Júiti Yus” shuar turutiarat tusa mash túrittaiwai.

<sup>5</sup> Yatsurtiram, wi atumjai pujakun nuna ashí ujakmajrume. ¿Nuka kajin-makniurmek?

<sup>6</sup> Yámaikikia, ni tsawantri jeatsain, Tuke Tunaarintin wantinkiajn tusa surimia nu nékarme.

<sup>7</sup> Tunaasha yamaisha awai, tura paantcha. Túrasa tunaan surimia nu juramkitniuk taasai nu tunaaka paant átin.

<sup>8</sup> Nuŋkia nu Tuke Tunaarintin wantinkiattawai. Tura Uunt Jesus ni wenejai umpuí aun máattawai. Tara ni wincharijjai nuna amuktatui.

<sup>9</sup> Nu Tuke Tunaarintin, iwianchi uuntri Satanás akupkam tátatui. Ni kakarmari iniakmastaj tusa, aentsti túrachminian túrak anaŋkawartatui.

<sup>10</sup> Jinium wémin ainia nú shuaran ashí tunáa ana nujai anaŋkawartatui. Nu shuar Yus-Chichaman nekas ana núnaka nakitraru ásar uwemprachmin áiniawai.

<sup>11</sup> Iis, nekas ana nuna nakitia ásar matai, ti anaŋmamawar wait-chichaman umirkarat tusa Yuska tsanŋkatkattawai.

<sup>12</sup> Wari, niisha ni tunaarjn wararainiak, nekas ana nuna nakitraru ásar matai, Yuska “jinium wétatrumé” tiartatui nuna.

*Uwempramin ainia nu*

<sup>13</sup> Tura, yatsuru, Uunt Jesus aneamu árumna nu, iisha atumin enentáimtusar ii Yusri yumisaji. Átum nekas ana nuka umikiurme. Tuma asakrumin Yusa Wakanj atumi enentáin péŋker awajtamsaitrume. Nu tuma asamtai yámankamtaiknumiá Yuska “átum uwempranniaitrume” túramprume.

<sup>14</sup> Nu túrunat tusa Yus wakerutmarme. Krístujai Uwempratin Chicham ii ujakjinia nujai Yus untsurmakmarme. II Uuntri Jesukristu ti penker pujana nu pachiinkiamniuram tusan ujakmajrume, nú chichaman.

<sup>15</sup> Wátsek, yatsuru, Yusjai katsuqartarum. Yus-Chicham etserkamu an-tukurmena nu, tura wisha áaran akuptukjarmena nusha kajinmatkiirap.

<sup>16</sup> II Uuntri Jesukristusha tura ii Apari Yussha ti penker ásar incha anen-matsjik. Tura waitnentra ásar incha shiir enentáimtikramji. Tura nú naŋkaamas ii tuke péŋker pujustinian ikiurtamsaitji.

<sup>17</sup> Nu tuma asamtai, péŋker chichastarum tusa, tura péŋker takastarum tusa Jesukristuka shiir enentáimtikramar ikiakátmarartí.

## 3

*Papru “áujtursatarum” tímiania nu*

<sup>1</sup> Nuyá, yatsurú, Yusa chichameşhiir pampartí tusarum Yus áujtursatarum. Átum Yus-Chicham wakerukmarmena áintsan ashí nunkanam wakerukartí tusarum Yus seatarum.

<sup>2</sup> Tura yajauch shuar, penker ana nuna ti nakitiainia nu, incha yajauch awajtamsachartí tusarum Yus áujkartustarum. Kame chíkich aents Yúsan umirkacharu ániawai.

<sup>3</sup> Túrasha Uunt Jesusak atumin iniaitsuk wáitmaktatrume. Tura atumin ikiakátmartatrume. Tura íwianch anankramatanaj takui kíishturmaktatrume.

<sup>4</sup> Kame Yus atumin yainmaktatrume, taji. Íi tájinia nu yamáí umíarme. Tura tuke umirkattarme. Nusha nekaar shiir enentáimji.

<sup>5</sup> Uunt Yus yainmakartí ní anenkrattairin nekaatniun. Kristu itiurchatan katsuntramia núnisan atumniasha katsuntratniun Yus yainmaktí.

*Takastiniatji*

<sup>6</sup> Yatsurtiram, antuktarum. Íi Uuntrj Jesukrístu chichamejai ju taji: “Nuyá Yus-shuar wi jintinramun nakitiak aya wékana nu ikiuktiarum.”

<sup>7-8</sup> Íi túrajnia núnisrumek túratin nékarme. Júiti: atumjai pujusmaj nuju tuke takakmasmiaji. Atumí yurumkarj iisha akikmakar yurummiaji. Atumjai itiurchat áchatí tusar tsawajsha káshisha tuke takakmasmiaji.

<sup>9</sup> Kame iisha, Kristu akatramu asar “yáintkiatarum” tíminiuji; túrasha nu tútsuk, íi túrajnia núnisrumek túratin nekaatarum tusar, iisha tuke tsawant takaamiaji.

<sup>10</sup> Warí, atumjai pujumiaj nuju “Takastinian nakitiana nuka yurumashti” tíchamkají.

<sup>11</sup> Íis, atumjiniá weeá, nánkamas enentáimiainiak tura nánkamas túruiniak penké takatsuk pujuiniawai, túramainiaji.

<sup>12</sup> Nú shuáran íi Uuntrj Jesukrístu chichamejai “Tákamtak shiir takakmasartí” tajai.

<sup>13</sup> Yatsurtiram, yawetsuk shiir túratarum.

<sup>14</sup> Ju papinium íi tájinia nuna, shuar umiktinian nakitiakuinikia “umichuiti” tákuram, ní natsarat tusarum ikiuktiarum.

<sup>15</sup> Túrasha “Yus-shuara nemasrjinti” tíip. Áyatik jintintrata, tura Yúsaj enentáimtikrata, ame nekas yatsumeá áitkiasmek.

*Papru ajsua ikiuamu*

<sup>16</sup> Uunt Yuska, imiatkichu enentái susamniaiti. Jú Yus, itiurchatnum pujarminin atumin tuke imiatkichu enentáimtikramsartí. Uunt Yuska atumin pujurtamsartí, tajai.

<sup>17</sup> Juju wi Papru juna aajai. Wi papin akupeaj nuju júnisnak winia náarun áaran apujeajai, wíniatí tusan.

<sup>18</sup> Íi Uuntrj Jesukrístu atumin ashí yainmakarat tusan wakerajrume. Nu atí.

## Papru TIMIUTÉUN Emka papin aar akuptukma

<sup>1</sup> Wi Papru Jesukristu akatramurintjai. In uwemtikkiartin Yussha tura ii Uuntri Jesukristusha winia akuptuku ániawai. Jesukristujai métek ti shiir ajastai tusar nákJai.

<sup>2</sup> Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukristusha ti anenma ásar waitnentramainiak imiatkinchanum ti shiir pujustinian yainmakarti.

### *Wait chichamjai anerta*

<sup>3</sup> Masetúnia nunċanam wéakun “Ipisiu péprunam pujuuta” timiaj núnisnak tájame. Shuar nuċ wait-chichaman jintin áinia nu suritkiarta.

<sup>4</sup> Niisha Israer-shuara weātrċn áujmatsamunak tura ni weātrċ naarċ ti unturċ irurtinniak Yus-Chichamjai nanċaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asamtai nusha suritkiatá.

<sup>5</sup> Yus-shuar tuke enentáijċai Yúsán shiir enentáimtusar tura tunáa túrutsuk aya péċkera nuna wakerukar anenċkartin ajastin ániawai. Núnisan péċker ajastat tusar Yus-Chicham étsereaji.

<sup>6</sup> Chċkċch shuar juċa iniaisar ántar chichaman áujmatainiawai.

<sup>7</sup> Yúsánan nékachiċat “jintinniuitċai” tuiniawai. Tura unuiniainia nuna nékainiatsui.

<sup>8</sup> Yus wakeramun nekaatin tura tunaan suritkiatin akupkamuka nekas péċkeraiti. Nu paant nékaji.

<sup>9</sup> Kame akupniuka péċker shuaran itit awajsatniun akupenatsui. Antsu yajauch shuar juċa túrin áinia nuna itit awajsatniun akupenawai: Tunáa shuarnasha, umichuncha, Yúsasha tura ashċ Yúsánanċa nakitiainia nunasha, aparċn máinniasha, nukurċn máinniasha, kame manċkartinniasha,

<sup>10</sup> nuwanċha tura áishmanċnasha tsanirma áinia nunasha, shuaran kasamak juu áinia nunasha, wáitrinniasha, tsanumniuncha, ashċ nuna itit awajsatniun akupenawai. Kame ashċ péċkerċha nuna iwiaratniun akupenawai.

<sup>11</sup> Núnisanċ tawai ti shiir uwempratin chicham Yus suramsamajnia nu. Nu chichamnaka etserkatniun Yus péċker asa tsanċkatrukuiti.

### *Yus waitnenkartin asamtai Papru yumċnsamiayi*

<sup>12</sup> Ii Uuntri Jesukristu shiir enentáimturu asa Níiniun etserturkat tusa kakarman surusuċiti. Túruta asamtai yúmiċċkċajai.

<sup>13</sup> Wi Yúsán imiá yajauch chicharniuyajai. Yus-shuarnasha áintrarmiajai. Yusnasha katseċniuyajai. Túrin aċċn Yus winia waitnentrumiayi. Kame Jesuska Yus Anaikiamun nékachu asan wi túramu yajauchiiti tu enentáimċhauyajai.

<sup>14</sup> Tura ii Uuntri Jesukristu ti nekas waitnentrumiayi. Tura Jesukristujai tsaniċċkia pujakuċi Yus nekas enentáimtustinniasha tura anenċkartin ajastinniasha surusuċiti.

15 Ju chicham ti nekasaiti. Tunáa shuáran uwemtikrataj tusa Jesukrístu ju nunkanam taramiayi. Nunasha ashí shuar nekaatin áiniawai. Tura wikia ashí shuarjaj nankaamas tunáan túriniaitjai.

16 Ti tunáa ajn Jesukrístu ti anenkartin ana nu paant nekanati tusa Yus winia waitnentrurmiayi Tuma asamtai chíkich shuar, wijjaj métek, Yúsán nekas enentáimtusar Niijjaj tuke iwiaaku pujusartatui.

17 Yus tuke jacha asa tuke iniaitsuk akupniuiti. Wáinchataitai imia nankaamas nékaiti. imia Niñki Yúsaiti. Tuma asamtai imia Niñki tuke iniaitsuk ti shiir awajsatniuiti. Núnisanj tuke atí.

18 Uchiru, Timiutéu, yáunchuyá Yus-shuar ámin “Ju shuar péñkeran túrattawai” túramarmia nútiksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawajj tusam anearam túrata.

19 Chíkich shuar tunaajaj anearcharu ásar Yúsán ikiukiarmai.

20 Iminíusha tura Arejántrusha núnisanj Yúsán ikiukiarmatai uunt iwianch-nium surukarmajai. Nujaj Yúsán ti yajauch chicharsacharat tusan túraitjai.

## 2

### *Yus áujsatin*

1 Wátsek, emka seajrume Yus áujeakum Yus yumínsam ashí shuar yainkíat tusam áujtusarta.

2 Imiatkinchanum pujusar Yusjajsha tura áentsjajsha shiir túratai tusar tura ashí akupin ainia nusha péñker akupkarat tusar Yus áujtustiniaitji.

3 Áitkiasar seatin péñker asamtai, uwemtikramajnia nú Yus wakerawai.

4 Ashí shuar nekas chichaman nekaawar uwemprarat tusar wakerawai Yus.

5 Aya chikichik Yus awai. Tura Jesukrístu aents ajas Yusjaj áentsun nawamnaimtikartiniiaiti.

6 Ashí shuara tunaarín akikmatkataj tusa jákatniunam Jesukrístu surumak-miayi. Tura tsawant jeamtai nu chicham ashí shuarnum etsernaktiniuyi.

7 Nuna túratniun Yus winia akatar akuptukuíti. Israer-shuaracha nekas chichaman enentáimtusarti tusa Yus akuptukmiayi. Krístunu asan wáitrusuk nekas tajai.

8 Nu asamtai áishmancka kajetsuk yajauch tunaitsuk antsu péñker enentáijjaj uweje takuiniar Yúsán áujsarti.

9-10 Núnisanj núwaka iwiarmamuk nekasmiancha péñker enentáijjaj entsararti. Chíkich shuar nu nuwan iis temashmarmaríncha, sháukríncha, kurimkiamuncha, iwiarmampramuríncha núnaka enentáimtutsuk antsu ni péñker túrunamun enentáimtusarti. Núnisanj áchatniukait nuwá Yús-shuar ainia nujaj. Ni péñker túramujaj nekas shiir awajmamsashtinkiaiti.

11 Núwaka takamtak pujusar umiiniak unuimiararti.

12 Nuwanka ashí iruntramunam unuiniartinniasha tura ni áishrin akup-katniuncha suritiajai. Antsu takamtak pujustiniaiti.

13 Yus emka áishmankan Atančan najanamiayi. Nuyá nuwan Épan najanamiayi.

14 Tura Yus timian umirkach Atancka anannachmiayi. Antsu Épa ananna asa tunaan túramiayi.



<sup>15</sup> Túmaitiat jurertin asa, emesnartinniumiā uwempraithi. Tura Yúsan nekas enentáimtak anenkartiniyaiuik tura esetar enentáimiuk péñker wekasatniuiiti.

### 3

#### *Yus-shuaran wáinin*

<sup>1</sup> Shuar Yus-shuaran wáinkiatniun wakerakka péñker takatan achikiuiti. Nuka nekasaiti.

<sup>2</sup> Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuiiti. Niisha péñker esetar enentáimin naka wekasatniuiiti. Íraran ni jeen ti shiir itiaatniuiiti. Péñker jintinkratin átiniaiti.

<sup>3</sup> Nampechusha tura suuir enentáimtichusha átiniaiti. Aya kuítian iki-aunakatniun enentáimtuschatniuiiti. Antsu tsan̄ka átiniaiti. Kajechusha átiniaiti. Chikichnancha wakerutkashtiniiaiti.

<sup>4</sup> Ni shuar̄in shiir akupeakui ni uchir̄isha umin tura shiir awajkartin ártiniiaiti.

<sup>5</sup> Kame ni shuar̄in akupkachminiaitkiun̄ka ¿itiurak Yus-shuaran wáinkiat?

<sup>6</sup> Yus-shuaran wáinniuka yama Yus-shuar̄i ajasu áchatniuiiti. Túmaitkiun̄ka ti nan̄kaamantu enentáimtumak iwianch̄jai métek tunaan túrak sumamat-tawai.

<sup>7</sup> Yus-shuarchasha nin shiir enentáimtustin ániawai. Núnischaik̄kiun̄kia nin yajauch chicharainiakui iwianch wárik tunaanum ajuartatui.

#### *Yus-shuaran yain*

<sup>8</sup> Núnisan̄ Yus-shuaran yaincha péñker asamtai ashí shuar nin shiir enentáimtustin ániawai. Nii tana nuna túmatrusan̄ umin átiniaiti. Nampechu átiniaiti. Aya kuítian ikiaun̄katniun enentáimtuschatniuiiti.

<sup>9</sup> Yúsnan ti pen̄ker nekaatniuiiti. Tura esetar enentáimsatniuiiti.

<sup>10</sup> Emka péñker ístiniaiti nuyá péñker wekaakka Yus-shuaran yain átiniaiti.

<sup>11</sup> Nuwasha péñker asamtai ashí shuarsha nin shiir enentáimtustin ániawai. Tsanunniuchu antsu esetar enentáimiar nii chíchaa ímatrusan̄ umin átiniaiti.

<sup>12</sup> Yus-shuaran yainkia nuwan̄ apatkachu átiniaiti. Tura ní uchir̄incha ni shuar̄incha ashí shiir akupin átiniaiti.

<sup>13</sup> Yus-shuaran yayak nekas péñker takaakka shiir enentáimtusmin asa páchitsuk Kristu Jesus enentáimtamun arantsuk etserkamniiaiti.

#### *Yusna ana nu imiá nan̄kaamas péñkeraiti*

<sup>14-15</sup> Wárik íitniun wakerajme. Túmaitiatnak sétaknasha Yus-shuar̄jai takastin nekaak tusan̄ juna áatjame. Ashí Yus-shuar̄i, iwiaaku Yusna ainia nu, nekas chichaman tuke emetawar akasmatainiawai.

<sup>16</sup> Maa, imiá nekasaiti, Yus iwiainturmakma ashí nan̄kaamas ti pen̄keraiti. Tura júiti:

Yuska aents ajas jú nuñkanam paant wantinkiamiyai.

Yus Wakancha “ti shiiraiti” Nin tímiyai.

Yusa suntar̄isha Nin wáinkiar̄miyai.

Ashí nuñkanam nu etsernakmiyai.

Túramtai ashí nuñkanmaya shuar umirkarmiiai.

Tura nayaimpiniam waketkimiiai.

## 4

*Amuukatin tsawantin*

<sup>1</sup> Yusa Wakanj ti paant tawai, amuukatin tsawant jeaakui untsurj aents Yus enentáimtustinian iniaisar antsu yajauch wakanin nemarsar íwianch jintíamun anturkartatui.

<sup>2</sup> Yajauch shuaran anturkartatui. Nu shuar ni enentáj narúa áinin ásar ni tunáa túramun penké enentáimtichu áiniawai. Tuma asa shiir chichainiayatan wáitrin áiniawai.

<sup>3</sup> Nu shuar nuatnaikiatniun suritiainiawai. Núnisan chíkich chíkich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsan yumĩnsar páchitsuk yuámin áiniawai.

<sup>4</sup> Ashí Yus najanamu penker asamtai nakittsuk antsu Yusan yumĩnsar yúatniuiti.

<sup>5</sup> Yus-Chicham tana nújajisha tura yuuniak Yúsan yumĩnkias áujсамужай ashí penker ajasuiti.

*Jesukristu penker takarín*

<sup>6</sup> Wi tájamna nu chíkich Yus-shuar jintintiakmeka Jesukristu penker takarín átatme. Tura ashí Yus-Chicham penker jintíamu unuimiaru asam nujaj kakaram ajastatme.

<sup>7</sup> Ántar chichamsha tura netse chichamsha enentáimtutsuk nekas Yusna ana nu túratin kakaram ajasta.

<sup>8</sup> Kame ayash kakaram awajsatniusha ishichik penkeraiti. Antsu Yusna nu túratin kakaram ajastinkia imiá penkeraiti. Yamái jü nunkanmasha yáinmajj tura ukunmasha Yusjaj pujustin asakrin nankaamas penkeraiti.

<sup>9</sup> Nu imiá nekas asamtai ashí shuar nuna enentáimtustiniaiti.

<sup>10</sup> Nekas iwiaaku Yus ashí shuaran uwemtikramniaiti, tura ashí Nin enentáimtuinia nú shuaran nekas uwemtikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

<sup>11</sup> Nuka ashí ame jintiakum akupkatniuitme.

<sup>12</sup> Ti úuntchaitkiumnisha nakitrampraraj. Antsu penker túrakum Yus-shuar unuiniarta. Chichammijajisha, túramurmijajisha, anenkratmarmijajisha, nekas Yus enentáimtamujajisha, tura esetra enentáimsam Yusna penker túramujajisha niisha túrawarat tusam iniaktusarta.

<sup>13</sup> Wi jeatsajin Yus-Chicham áujeakum shuar jintintiata. Túram Yus-shuar ikiakárarta.

<sup>14</sup> Yus-shuara uuntrj Yúsnan takastin anaitiamak uwején awantramsarmai. Nuna túramainiak “Jü shuar kakarman Yúsnunian takustatui” túramarmia nu, kakaram ajasam tímatrusam túratá.

<sup>15</sup> Tuke enentáimjaj wi tájamna nu enentáimtakmin ame penker túruki wéamun nekaawartatui.

<sup>16</sup> Túramna nusha tura unuiniamna nusha penker wáinmamkata. Nu túratin pimpikiip. Nu túrakmeka uwemprattame amesha tura ujainiam nusha uwemtikrattame.

## 5

*Yus-shuarjaj itiuur túratniuit*

<sup>1</sup> Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumea nútiksamek shiir awajsarta.

2 Nuwā úuntchisha nekas ame núkua nútiksamek shiir awajsarta. Nuwā nátsasha nekas ame umaimia nútiksam shiir enentáimjaj pēnker awajsarta.

3 Waje nekas atsumin ainia nusha yáin̄kiarta.

4 Tura waje uchirtiniaitkiuin̄kia tura tiran̄krinniuitkiuin̄kia, nu shuar wajen wáinkarti. Emka ni shuarin̄ pēnker wáinkiatniun unuimiararti. Ni apar̄ anemia núnis awantuiniak shiir wáinkarti. Núnaka Yus ti shiir enentáimtawai.

5 Nekas waje nin̄ki pujana nu Yúsan enentáimtak tsawaisha káshisha iniait-suk Yúsan áujeawai.

6 Antsu aya wárastiniak wakera nuka iwiaakiat jaka áintsan̄kete.

7 Tura wajenka ni shuar̄i wáinkarti. Yus-shuaran yajauch chicharnaktin atsutí tusam wí tájamna nu ashí Yus-shuar ujakarta.

8 Shuar ni jēen pujuinia nuna nekaska wáinkiatniuiti. Tura nuyá chíkich shuárnasha yáin̄tiniaiti. Túrachkun̄ka Yus tana nuna umiátsui, tura Yus-shuarcha nujaj nan̄kaamas yajauchiiti.

9 Yusa kuitrijjaj yáinniaiktiniaitkiun̄ka waje sesenta (60) uwí nan̄kaamas takustiniaiti. Tura chikichik aishriniak takusu átiniaiti.

10 Ti paant pēnker túrin átiniaiti. Ni uchir̄in pēnker tsakatmaashit, íran pēnker táata t̄inuashit, nekasmiancha enentáimtumar Yus-shuaran yáiniaashit, wáitainia nuna waitnenniuashit, tura chikichnasha pēnker túriniaitkiun̄ka maak.

11 Tura sesenta (60) uwí takakchaka chíkich wajejaj iruraip. Ni ayash̄i wakeramur̄i Kristuȳa kanamtikiainiawai tura ataksha nuatnaikiatniun wakeruiniawai.

12 Tura emka enentáimtiarmia nuna iniaisar sumamainiawai.

13 Nu arantcha nakimiainiak ántar irauwear chíkicha itiurchatr̄in áujmatsachminia nunasha áujmatin áiniawai.

14 Nu asamtai waje úchipiak ainia nuka uyurtukar uchin takusarti. Tura nuwā nuatkamu takastinia nuna túrawarti. Tura ni túrunamur̄ijjaj in kajertamainiaj nú shuar yajauch enentáimturmarsharti.

15 Kame nuik chíkich chíkich waje Kristuȳa kanakiar iwianchin nemarsaru ásar matai nuna tájai.

16 Áishman̄sha nuwasha Yus-shuar ainia nu ni shuar̄in waje ákuin̄kia Yusa kuitrin seatsuk nui yaín̄tí. Nujaj chíkich wajēn nekas atsumainia nuna Yusa kuitr̄j yáin̄tatui.

17 Yus-shuara uuntr̄i Yus-shuaran pēnker wáinkiarua nu, nekas shiir enentáimtustin áiniawai. Tura akinkiamniasha áiniawai. Nekaska Yus-Chichaman etserkatniuncha tura unuiniartinniasha tuke takaaka imiá shiir enentáimustinaiti.

18 Yus-Papiniumsha núnisan áarmaiti:

Jin̄kiaia saepen pakartaj tusa turu takaak nájakui ni nuj̄j jin̄kiatáshtiniaiti.

Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

19 Chikichik shuarak Yus-shuara uuntr̄i tunaar̄in etsertukmatain̄kia an-turkaip. Antsu jímiarsha menaintiusha tsanumtsuk métek tuiniakui an-turkata.

20 Chíkich shuarsha ni tunaar̄in ikiuktinian nakitiainia nu, ashí iruntramunam chicharkarta. Chikichcha, nuna ísar, ashamkarti.

21 Yussha ii Uuntri Jesukristusha tura nayaimpinmaya suntarsha íimiainiamunam “túrata” tájame. Ashí shuarjaj niisháa enentáimtutsuk métekrak túrata.

22 Yus-shuara uuntri atí tusam wárik anaikiaip. Wárik túramka chikicha tunaarín sumamattame. Ashí tunaanum penké pachiinkiaip.

23 Wakemjaj jau asam aya éntsak úmutsuk karía ishichik pachimpram umarta.

24 Chíkich shuara tunaari wáitsatin imiá paant ániawai wáitsatin tsawant jeatsain. Tura chíkich shuara tunaarínkia paantcha ániawai antsu ukunam paant nekanawartatui.

25 Núnisan péñker túramusha ti paant ániawai. Tura yamá páantchaitiat tuke paantcha áchammiaiti. Páchitsuk nekanattawai.

## 6

1 Takarniutirmesha, atumí uuntri ti shiir umirkatarum. Túrachkumníquia chíkich shuar Yushasha ii unuiniamuncha yajauch áujmattsartatui.

2 Atumí uuntri Yus-shuar ániakka aya Yusjaj yatsum asamtai nakiarchat-niuitrume. Antsu nuna nankaamas péñker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

### *Yusna wakeruktincha tura kuit wakeruktincha*

3 Shuar ti shiir naka chichaman ii Uuntri Jesukristunu ana nuna nakitiak antsu niisháa chichaman étserkunka

4 nu shuar nankaamantu enentáimtumayat ántraiiti. Ni enentáimmianak chichaak aya ántar chichaman antumtiknaíkiatniun chichaawai. Tura nu chichamjaj nupetmaktaj tusar nankaamas áujmatainiak kajernaikiar tura katseknaiikiar péñker enentáimtunaitsuk

5 tuke kakannainiawai. Tura tu aujmatnaisatniun wakeruiniana nú shuar nekas-chichaman nékachu ásar aya tunaan enentáimtin ániawai. “Yusna ana nujaj kuítrintin ajasminiaiti” tuiniawai. Nu shuar pachisaip.

6 Shuar takakna nujajin waraakka Yusna ana nujajisha waraak ju nunkanmasha tura nayaimpinmasha nekas kuítrinniuiti.

7 Iis, ju nunkanam misuk támaji; núnisar misuk jünkittiaiji.

8 Tuma asamtai yurumkasha tura entsataisha takakkurkia nujajin warasa pujustiniaitji.

9 Antsu kuítrintin ajastaj tuinia nu, tunaanum awañkemkar iniainiawai. Tura antra nuna wakerukar itiurchatan wáiniainiawai. Nujaj emesratniun-masha jeainiawai.

10 Kame kuit aneatniuka ashí tunáanum útsutmakminiaitji. Chíkich shuar nuna wakerukar Yus enentáimtustinian iniaisar ti itiurchatjaj yajauch awaj-mamsarai.

### *Yusna nu túrunat tusam kakaram ajástá*

11 Antsu ame Yus-shuar asam nuyá pisarta. Yus nekas enentáimtakum péñker túrata. Waantu enentáimtsuk Yus péñker umirkata. Aneakum katsuntrata.

12 Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamun untsurj shuar iruntramunam etserkaitme.

<sup>13</sup> Yuska ashí iwiaaku átinian súwiti. Jesukristusha Punsu Piratuḽ nekasa nuna ti paant ujakmiayi. Tuma asamtai Yussha Jesukristusha írainiamunam nuna tájame.

<sup>14</sup> Ii Uuntriḽ Jesukristu táatsaiḽ wi tájamna nu yapajítsuk tura yajauch chicharnakchamnia péḽker umiktá, tájame.

<sup>15</sup> Tsawant jeamtai Jesukristu tatí tusa Uunt Yus, imiá péḽker asa, akupkat-tawai. Niḽkiti Yus. Akupniuncha Akupniuiti. Uuntjaiḽ naḽkaamas Úuntaiti.

<sup>16</sup> Iwiaaku átinia nérenniuriḽ Niḽkiti. Ti tsáapninnium pujakui nuntumtuach-miniaiti. Wáinchatai asamtai shuar péḽké wáinkiacharu áiniawai. Niḽki ashí shiir awajsatniuiti tura Niḽki tuke ashí akupin atí. Núnisaiḽ ati.

<sup>17</sup> Jú nuḽkanam kuítrintin ainia nusha naḽkaamantu enentáimtumasharti. Kuitcha yúpichuch meḽkakamnia asamtai kuítniak enentáimtusar pujuscharti. Antsu iwiaaku Yus ashí in ti péḽkeran núkap súramaj nuna nekas enentáimtusarti.

<sup>18</sup> “Péḽker túratarum” tiarta. Tákumin niisha shiir enentáijjaiḽ ni takakman ajamsarti. Nuyá nú péḽker túramujaiḽ Yusaiḽ ikiáunkartí.

<sup>19</sup> Nuna túruiniak kuítriniawartatui. Núnisaiḽ tuke iwiaaku átinian wáinkiertatui.

### *Amuak Timiutéun akatramu*

<sup>20</sup> Timiutéu, ashí ame túratniua nu tuke enentáimturta. Jú nuḽkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip.

<sup>21</sup> Chíkich shuar nuna umirkar Yusajyaḽ kanakiarai.

Wátsek, Timiutéu, Yus shiir yainmakti.

Nuke atí.

## Papru TIMIUTÉUN Ataksha papin aar akuptukma

### *Papru Timiutéun áatramiania nu*

<sup>1</sup> Wi Pápruitjai. Yus wakerakui Jesukrístu akatramurj ajasuitjai. Ashí Jesukrístujaj tsanin̄kiarun “Nekas iwiaaku átinian susattajai” tíniuiti Yus. Tuma asa nuna etserkat tusa akuptukuiti.

<sup>2</sup> Aneamu uchiru, Timiutéu, ju papín áateajme. Yus Apasha tura ii Uuntri Jesukrístusha ti anenma ásar waitnentramainiak imiatkinchanum shiir pujustinian yainmakarti.

### *Krístunu takastiniaitjinia nu*

<sup>3</sup> Tsawajsha káshisha Yúsan áujeakun ámin tuke enentáimtusan ti shiir Yúsan yúmin̄kijajai. Winia weatur túrawarmia nútiksanak Yúsan enentáimtakun ti shiir awajejai.

<sup>4</sup> Kanakmijaj nuj eantramiam nuna tuke enentáimtajme. Ataksha warar-naisatai tusan íitniun wakerajme.

<sup>5</sup> Yus nekas shiir enentáimtiniaitmena nuna nékajai. Nukuchrum Ruítiasha tura ame nuku Eunisiasha emka Yúsan nekas enentáimtin ármiai. Amesha núnisketme.

<sup>6</sup> Tuma asakmin tájame: Yusna takasái tusan winia uwejrún ámin awan-teakui Yus kakarman suramsamia nujaj atak kakaram takasta.

<sup>7</sup> Yus sápij enentáin suramsachuitji. Antsu kakaram ajastinniasha anenait-niuncha péñker wekasatniuncha suramsaitji.

<sup>8</sup> Ii Uuntri Jesukrístunu etserkatin natsantraip. Níiniun étserkun sepunam pujamusha étserkum natsantruraip. Antsu Yus kakaram awajtamkui ame étseream nujaj shuar yajauch túramainiakui surimiamtsuk wáitsatin enentáimtumarta.

<sup>9</sup> Ii péñker túrichu árin̄n Yus in anenma asa uwemtikramar péñker túratniunam apujtamsaitji. Iisha Jesukrístujaj tsanin̄kiaru asakrin tura Yus nuna túratniun wakerak túramiai. Yaunchu ju nun̄ka atsaisha in tuke waitnentrampramijaj.

<sup>10</sup> Tura yamá in Uwemtikkiartin Jesukrístu támatai nu anenmamú paant ajasuíti. Niisha jákatniun nupetak emesramiai. Tura uwempratin chichamjaj jáchatai iwiaakman paant awajturmajj.

<sup>11</sup> Nuna etserkat tusa Yus anaitiukmijaj. Tura akattur Israer-shuarchanum akuptukmijaj.

<sup>12</sup> Túruta asamtai ti wáitajaj. Túrusha Yúsan nekas enentáimta asan natsamatsjai. Imiá kakaram asa amuukatin tsawant jeatsaj̄n ashí winian susamaj nuna ti péñker waitruktatui.

<sup>13</sup> Shiir chichaman jintintiamajmena nuke emetata. Jesukrístujaj tsanin̄kiu asar Yus nekas enentáimtaji tura nujaj anenkratniuitji. Tuke núnismek túrata.

<sup>14</sup> Yus ámin takasat tusa suramsamu shiir takasta. Tura Yusa Wakanj in pujurtamaj nuna kakarmarjijaj túrata.

<sup>15</sup> Asia nun̄kanmayá shuar mash iniaitiusarmaj. Nu nekaachmaashum. Nu shuarnumij Pijirusha Ermujenessha armaj.

<sup>16</sup> Antsu Unisépuru niisháa shuar amai. Ti nukap shiir enentáimtikrurmai. Tura wi sepunam pujamuncha natsantrurchamai. Ii Uuntrĭ Kristu ni shuarĭncha waitnentrati.

<sup>17</sup> Rúmanam taasha natsantrutsuk eatak wáitsuk iniaitiúschamiayi.

<sup>18</sup> Ipisu péprunam pujarin ti yainmakmiaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

## 2

### *Kakaram ajasta*

<sup>1</sup> Amesha, uchirú, Jesukristujaj tsaninĭkiu asam nu kakarmajaj kakaram ajasta.

<sup>2</sup> Untsurĭ ántuiniamunam wi etserkamaj nu, shuar umikmin ainia nu jintintiwaram chikichnasha jintintiwarat tusam akupkarta.

<sup>3</sup> Ame ti penĭker Jesukristu suntarĭ asam wáitsatin katsuntrata.

<sup>4</sup> Suntarka ni uuntrĭ tana nunak umiktin asa chĭkich takatan pachin-tukchatniuiti.

<sup>5</sup> Núnisaĭ nakurĭncha nakurustinia nujaj métek nakurachkuĭka nekas péŋkeran awakmakun súsatniua nuna achĭkchamniaiti.

<sup>6</sup> Ataksha núnisaĭ shuar ajan takaana nu, ashí shuara nanĭkaamas nuyān yúashtinkiaiti.

<sup>7</sup> Wats, ju menaintiu métek-taku chicham ániawai. Péŋker enentáimtakmin ii Uuntrĭ Kristu paant awajturmastatui.

<sup>8</sup> Jesukristu jaka nantakmia nu enentáimprata. Tura Uunt akupin Tawit ni weatrĭ asamtai Jesussha uunt akupin átiniaiti. Núiti wi uwempratin chichaman étsereaj nu.

<sup>9</sup> Nuna étsereakun sepunam jirujaj jinĭkiamu pujakun wáitiajai. Túrasa Yus-Chicham jinĭkiachminiaiti.

<sup>10</sup> Ashí shuar ni shuarĭ arti tusa Yus achĭkiarua nuna yáintajtsan ashí iturchatan katsunteajaj. Nujaj Jesukristujaj tsaninĭkiaru ásar uwemprar tuke shiir pujusartatui Yusjaj.

<sup>11</sup> Ju imiá nekasaiti:

Jesukristujaj jákaitkiurkia Níjjajsha tuke iwiaaku pujustatji.

<sup>12</sup> Wáitiakrisha Niijjaj akupkattaji.

Natsantakrĭnkia Niisha natsantramprattaji.

<sup>13</sup> Umichuitkiurniisha Niĭkia tuke uminiaiti. Warĭ, Yuska ni enentáimmiajajĭn yapajniátsuk tuke umiktiniaiti.

### *Yusaj natsaqrajĭ tusam ashi túrata*

<sup>14</sup> Shuar jintintiakum ju enentáimtikrata. Ii Uuntrĭ Yus ímmianum chichamjaj yajauch tunaiyarainĭ tusam chicharkarta. Nu tunaitin penĭké áantrati antsu ántuiniana nuna yajauch awajenawai.

<sup>15</sup> Yus-Chicham tuke enentáimjaj péŋker unuimíatram shiir jintintiwarta. Túrakum Yus péŋker írsat tusam péŋker takarin atá. Túramka Yusaj natsaqarchattame.

<sup>16</sup> Ju nunĭkanmayanak ántar áujmatin ainia nujaj kanaktia. Shuar nuna áujmatainiak tunaanum nuna nanĭkaamas wáiniawai.

<sup>17</sup> Ni jintiniamusha suĭkurjaj métek pampaawai. Iminíusha tura Piritiusha nu shuar ániawai.

<sup>18</sup> Niisha nekas chichaman iniaisar tura ashí Yus-shuar nantaktincha nanĭkaamasai tuíniakui chĭkich chĭkich shuar Yúsan naka enentáimtuiniatsui yamaikia.

19 Túrasha Yus ashí nankaamas enentáimtustinia nuna paant awajsaiti. Júnisaiti: “Uunt Yus ni shuarin nékainiawai,” tura nuyá “Ashí Kristu shuari ainia nu tunaanumiá kanakiarti.”

20 Kuítrinniu jeen kurijjai najanamusha kuitjai najanamusha írunui. Nújainkia ti shiira nu takastin ániawai. Tura numijjai najanamusha nuwejai najanamusha írunui. Antsu nújainkia nekasmiancha ainia nu takastin ániawai.

21 Núniskete Yusa takatrijjai. Ashí tunaanumiá kanakir péñker wekasar shiira nu takasmin átatji. Kame ashí péñkera nu takasmin asakrin ii Uuntri Jesukristu wakerak péñker takata nuí apujtamsamniaitji.

22 Natsá wakerutai iniaisam esetram péñker wekasata. Amesha ashí shuar shiir enentáijjai Yúsán áujena nujai Yus nekas enentáimtakum aneniakum ti shiir pujustá.

23 Enentáimtsuk chichainiak aya ántar tunaitinian chichainia nu pachisáirap. Nusha aya némasmanainiawai.

24 Ti uuntri Jesukristu takarniuka chikich shuarjai nemasmanaikiashtini-aiti, antsu ashí shuarjai péñker nawamnaikiatniuiti. Tura waitnentáimturar péñker jintintiatniuiti.

25 Tura umircha shuarnasha Yus ni enentáin yapajtiakui nekas chichaman shiir enentáimturarat tusa péñker enentáijjai jintintiatniuiti.

26 Nujai íwianch ni wakeramu túrawarat tusa achikmaitiatan uwemprarta-tui.

### 3

#### *Amuukatin tsawant jeatemamtai aents ti tunaan túrawartatui*

1 Amuukatin tsawant jeakui ti itiurchat átatui.

2 Shuar aya niniki enentáimtumarsartatui. Kuítian ti wakertiartatui. Nankaamantu enentáimtumarsartatui. Yúsnasha yajauch chicharsartatui. Aparincha umirkachartatui. Yumiñsatniuncha nékachu ártatui. Ashí Yúsnan cha enentáimtuschartatui.

3 Aneetsuk waitnenkartichu ártatui. Tsanumin ártatui. Ni ayashí wakera-mun katsuncha ártatui. Aya kajen ártatui. Ashí péñker túrinia nuna nemasri ártatui.

4 Amikrincha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui.

5 Yusa kakarmari “ántraiti” tuñiak péñker umirkachartatui. Túrasha Yúsan umirua núnisar túrawartatui.

Nu shuar penké pachisáip.

6 Nu shuarsha shiir chichayatan anankawar jeá wáiniawai. Tura nuwá esetar enentáimchan nekas tunaarinniu anankainiawai. Nu nuwá ashí yajauch wakeramujai anannainiawai.

7 Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai.

8 Yaunchu Ejiptu nunkanam Muisais uunt akupniujai chichaakui jimiará iwishin, Jánissha Jámpriissha, Muisaisan kajerainiak “ántar tawai” tiarmiayi. Núnisan ju shuar nekas-chichaman nakitiainiawai. Naka enentáimiainiachu ásar Yúsnan naka jintiatniun penké tujintiainiawai.

9 Túrasha nuna nankaamas kuakchartatui. Shuar ti paant ni netse túruiniamurin nekarawartatui. Núnisan nu jimiará iwishniujai túrunamiayi.



*Amúak Papru Timiutéun akatramiania nu*

<sup>10-11</sup> Tura ámeke wi tímiaj nu umireame. Wi Yusjaj shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame. Tura Yúsan enentáimtakun tura anenkratkun shiir enentáijijaj katsuntramjaj. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntrj uwemtikrurmiayi.

<sup>12</sup> Nekasaiti, shuar Jesukrístujaj shiir túrataj tákuṅka ni nemasrj áintiam ti wáitsatniuiti.

<sup>13</sup> Tura ashí ananṅkartin ainia nusha kame ashí yajauch shuarsha nú yajauch túrukiaj wétatui. Iwianchjaj ananṅkamu ásar chikichnasha ananṅkiar wéartatui.

<sup>14</sup> Antsu ámeke unuimiam nu imiá nekasaiti tu enentáimtakum tuke emetata. Jintinramawarmia nú shuarsha wáitrichua nu nékame.

<sup>15</sup> Úchichinmayan Yus-Chicham nékame. Yus-Chichamka uwempratniun jintinramamniaiti. Nusha “Jesukrístu nekas enentáimtakum uwemprat-tame” tawai.

<sup>16-17</sup> Ni Papirjín áarat tusa Yus ni shuarjín áamtikramiayi. Ashí shuar ni Chichamen nekaawar péṅker túrawarat tusa túramiayi. Tuma asamtai Yus-Papí shuartin unuiniakartin asa imiá peṅkeraiti. Tunáa túrajnia nu Yus-Papijaj nekamatniuitji. Tura awajiakrincha Yus-Papí núnaka paant jintin-tramji. Nuyá naka wekasatniun jintinramji.

## 4

<sup>1</sup> Ii Uuntrj Jesukrístu amuukatin tsawantaj Uunt Akupin ajas iwiaakuncha tura jákaruncha ashí péṅker túramuncha tura yajauch túramuncha nekaattawai. Tuma asamtai Niisha tura Yus Apasha íimainiamunam juna akateajme.

<sup>2</sup> Uwempratín chicham etserkata. Yúpichuchia nuṅsha tura itiuarchata nuṅsha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta.

<sup>3</sup> Ukunmaṅka péṅker chichaman nakitrar ii wakeraj núchik nekaatai tusar, shuar teremak péṅker pujuschamnia nekapea áintsan, nanṅkaamas unuimiaru atai tusar, nánṅkamas unuikiartinian ti untsurj eakartatui.

<sup>4</sup> Nekas shiir chichaman iniaisar ikiuniak ántar áujmatsamun enentáimtusartatui.

<sup>5</sup> Antsu ámeke tuke péṅker túratin wakerakum ashí itiuarchat katsuntrata. Uwempratín chicham étserkum takatrum péṅker umikta.

<sup>6</sup> Ishichik ajasai winia iwiaakmar Yusaj surumaktin. Mantamnan nay-impiniam wétin jeatimiai.

<sup>7</sup> Shuar kakaram maanainia núnisnak tuke kakaram takasmajai. Tséken péṅker tsekea áintsanak yawetsuk takasmajai. Tura Yus-Chichaman nekas akasmatkun péṅker wáinkiaitjai.

<sup>8</sup> Tuma asamtai tawasap nukajaj najanam tsékena susamua áintsan wisha péṅker túramunam akinkiaitajai. Tura aya wíniak akirkashtatui. Antsu ashí ni tátinian shiir enentáijijaj nákaiania nunasha nekas péṅkera nuna akikiartatui.

*Timiutéu túratin akatmamturma*

<sup>9</sup> Wárik iiraitin enentáimturata.

<sup>10</sup> Témas aya jú nuṅkanmayanak wakerak ajapa ikiuruk Tisarúnika péprunam weyi. Tura Kresentisha Karasea nuṅkanam weyi. Núnisan Títiusha Tarmasia nuṅkanam weyi.

11 Túrawarmatai aya Rúkas wijjaj pujawai. Márkus eaka wáinkiam ame itiaritia. Jui ti penker yainkiamniaiti.

12 Tura Tíkikiunka Ipiisu péprunam akupkamjai.

13 Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisan nuparam papísha tura nekaska penké papí takurtuktia.

14 Arejántruka jirujaj takawa nu ti yajauch awajtsuítí. Túrutaitkiuisha ni túramujaj métek Yus akiktí.

15 Nu amesha pénger wáinkiatá. Ii étseamun penké nakitiawai.

16 Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturcharka maak.

17 Tura ii Uuntri Jesukrístu ni kakarmarín surus yaintkiamiayi. Nujaj uwempratin chichaman ashí nunkanam Israer-shuarcha antukarti tusan etserkamjai. Tura núnisan akupniunmayasha ii Uuntri uwemtikrurmiayi.

18 Tura núnisan ashí yajauchia nuyá uwemtikrurmatai Nii akupeana nui nayaimpiniam jeattajai. Niñki tuke shiir awajnasti. Núnisan atí.

### *Amikmaamiania nu*

19 Piriskancha ni áishri Akirancha amikmainiajai. Núnisnak Unisépuru shuaríncha amikmainiajai.

20 Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai.

21 Michá nantu jeatsajin iiraitin enentáimturata. Tura Eupurusha Putente-sha Ríniusha Kráutiasha tura ashí Yus-shuarsha amikmaatmainiawai.

22 Ii Uuntri Jesukrístu ámijaj tsanin pujustí. Tura Yus ashí pénger waitmakarti.

Nuke atí.

## Papru TITIUN papí áatramu

### *Papru Titiun áatramiania nu*

<sup>1</sup> Wikia Pápruitjai Yusa takarniurj. Tura Jesukrístu akatramurjntjai. Yus achikma ainia nú shuar niisha antukar Yúsán umirkarat tusan akatramuitjai. Shuar nuna nekaawar péñker wekasartatui.

<sup>2</sup> Tura nú arant, nú shuarsha tuke iwiaaku pujusarat tusan étsereajai. Nú shuarnasha, nuñkan najantsuk, “uwemtikrattajai” Yus tímiayi. Tura Niisha wáitruatniun tujintiawai.

<sup>3</sup> Tura yamaikia, tsawant jeamtai, nuna nekaawarat tusa ii Yusri uwemtikkiartinia nu, winia chichamur ujakarta tusa, winia akatturmiayi.

<sup>4</sup> Titiu, wi Yusna étserma umikiu asakmin winia uchirua áitkiasnak papin áateajme. Iis, iijjai métek Yus nekas enentáimtsjik. Yus waitnentrama asa shiir awajtamsati tusan wakerajme. Tura ii Aparj Yussha, ii Uuntrj Jesukrístusha, Uwemtikkiartin ana nu, enentáimin imiatkincha awajtamsati, tajai.

<sup>5</sup> Wats, wi iwiarachmajna nu ame iwiarata tusan Kreta nuñkanam ikukchamkajam. Tura “ashí péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

### *Yus-shuaran wáinin*

<sup>6</sup> Yus-shuaran wáinin júnis atí. Niisha makuuchmin ti péñker wekasatí. Tura chikichík nuwentin átiniaiti. Tura ni uchirjsha Yusna ártiniaiti. Tura shuar yajauch chicharsachmin niisha tutupnisan wekain ártiniaiti.

<sup>7</sup> Enentáimprata. Yus-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiau áchatniuiti. Tura anañma kufrintin ajastaj tusa wakerukchatniuiti.

<sup>8</sup> Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nuñkanmaya akupeamuncha, núnisan Yús akupeamuncha umirkatniuiti. Tura niñki ímiastiniaiti.

<sup>9</sup> Tura nú arantcha, chíkich shuáran péñker jintinrataj tusa tura Yus-Chichaman nakitin áinia nuna nupetkataj tusa, Yúsnumia nekas chichaman, nii unuimiátramiania nuyá kanakchatniuiti.

<sup>10</sup> Nekaata. Umichu ti irunui. Niisha ántar chichau ásar anañmau áiniawai. Israer-shuar weeanam ti irunui nú shuar.

<sup>11</sup> Niisha kuítian achiktaj tusar wakeruiniak, yajauch unuiniarchatniua nuna unuiniainiawai. Nuna túruiniak untsurj shuáran, ni írutkamurijjai yajauch enentáimtkiainiawai. Tuma asamtai auka, ni wene epetkatniuiti, ántar chichainiakui.

<sup>12</sup> Warí, imia Krétanmaya chichaman etserin juna tíchamka: “Krétanmaya aentska tuke wáittrin áiniawai. Tura nákitiat ti yurumin áiniawai. Yajasma núnisan áiniawai.” Nuna tíchamka.

13-14 Maa, niisha nékasān tǐmiayi. Nu tuma asamtai, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurǐn umirkachartí tusam, antsu Yúsan nekas umirkarat tusam, umichu shuar kakaram chicharkarta.

15 Enentáimprata. Yus-shuarka, ni enentáǐ chamir ajasu ana nuka, ashí ni wainnia nuna péñkernak enentáimtaiwai. Tura chíkich shuar, Yúsan umirkachu asa, ni enentáǐ wapik asa, péñker ana nuna enentáimtustinian tujintiawai. Achapai enentáimuk, péñkercha ana nuna “péñkeraiti” tawai.

16 Tura niisha “Yus-shuaraitǐai” tuǐniayatan, Yúsan umirtsuk niisháa túruiniawai. Tuma ásar mujǐmiaǐ áiniawai niisha. Umichu ásar péñkeran túratniun péñké tujintiainiawai.

## 2

### *Péñker jintintiatin*

1 Tura amesha, Titiu, péñker chicham etserkata. Yus-Chicham tátsuna nu etserkaip.

2 Antsu áishmañ katsunt Yusna ainia nu, ju jintintrata. Nampechu, náñkamas enentáimcha, esetas enentáimin arti. Yus tana nuna umirín tura anenain arti. Ni iturchatrǐñ Yúsan enentáimtusar katsuntin arti.

3 Tura núñismek nuwǎ katsunt Yusna ainia nusha ju jintintrata. Niisha núñisarañ Yus-shuarti túramnia nuna péñker túrawartí. Tsanumin tura nam-pen áchartí. Antsu péñker wekasatniun unuinin arti.

4 Niisha yama nuatnakua nuna ni áishrǐn ni uchirǐncha nekas aneetniun unuinartí.

5 Junasha jintintrartí. Esetas enentáimin, péñker wekain ártiniaiti. Ni takatrǐn péñker takastin áiniawai. Ni áishrǐn umirín ártiniaiti. Tura waitnentin ártiniaiti. Yus-shuarcha Yus-Chichaman yajauch chicharkarǐñ tusar túrawartiniaiti. “Tu jintintrarta” titiá.

6 Nuyá, Titiu, natsa áinia nu “náñkamsar enentáimsarum wekasairap” titiá.

7-8 Tura amesha, Titiu, ashí tsawant péñker wekasatá. Nu natsa wi túramun júkiar nunak túrawarmi tusam, nu túrata. Tura anturtamna nu “nekaschapitia” tǐñ tusam, esetsam enentáimsam, Yus-Chicham tana nu ímiatrusmek jintintiatia. Nú túrakmiñkia, Yus-Chichaman nakitiana nu shuar “Titiu náñkamas chichaawai” titiaj tukamá, natsaamak tujintramkattawai.

9 Takarin ainia nu, ni takartairǐn umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá.

10 “Kasamkairap, tura anankawairap. Iis, péñker túrakrumka, takarniuiti-atrum, shiir tura asarum ii Uwemtikramin Yusrǐ chichamēn shúiraiti, tu enentáimtikrattarme” titiá.

11 Yus in waitnentrama asa ashí áentstin uwemtikramprataj tusa wakerutmaji.

12 Kame Yus waitnentrama asamtai, tunáa ana nu iniaisatniuitǐj, nu nékaji. Tura ju nuñkanmaya yajauch ana nu wakerukchatniuitǐj. Tura antsu ju nuñkanam pujayatrik esetsar enentáimsar anañma wekatsuk tuke tsawant Yus anear wekasatniuitǐj.

13 Túrar ii Yusrǐ Jesukristu, uwemtikramajnia nu, imiá shiir iwiarnar tatí tusar nákastiniaitǐj.

14 Jesukristuka in jarutramkamiaǐj, ii tunaarǐniǎ uwemtikrampratajtsa. Tura, Winia ajasar tuke enentáǐiaǐj péñker túrawarat tusa, ii tunaarǐn japir-tampramajǐj.

<sup>15</sup> Titiu, anaikiamu asam arantutsuk nu jintintrata. Yajauch ana nuna túrawarain tusam chicharkarta. Pénkeran túruinia nu ikiakárta. Tura yajauch chichartukarain tusam tuke péñker wekasata.

### 3

#### *Yus-shuarti túratin*

<sup>1</sup> Titiu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. ““Pénkeran túratin ana nuna páchitsuk túrattajai” títiniaitrumé” titiá.

<sup>2</sup> “Tsanumprairap, kajernaikairap, antsu shiir enentáimtunaistarum” titiá. Nankaamantu enentáimtumatsuk ashí shuar péñker awajsatarum tusam tu jintintrarta.

<sup>3</sup> Warí, iisha núnisrik Yus-shuar ajatsuk nánkamsar wekaimji, Yuska umirt-suk. Tura íwianch emetamu pempée wekaimji. Tura ii ayashj wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji.

<sup>4</sup> Túrasha Yus in uwemtikiartin ana nu, aneñkratin asa, ni aneñkrattairin ashí áentsun iniaktus in uwentikrampramijai.

<sup>5</sup> Yus in waitnentrama asa, iikia júkeshá péñker túrachma aijn uwentikrampramijai. ¿Itiurak uwentikrampramijaj? Íi tunaarín asakátrampramijai, nijí-aktinia áintsan. Tura Yusa Wakanj pujurtamkurin, ii iwiaakmarin yamarman amasmaji.

<sup>6</sup> Jesukrístu jakamujai Yus in emeenturmatsuk ni Wakanin suramsamijai.

<sup>7</sup> In anenma asa nuna túramiayi. Nuñkia iisha yamaram awajsamu asar tuke iwiaaku átin, ti wakerimij nu íiniuiti.

<sup>8</sup> Nuka ti nekasaiti. Tuma asamtai Yúsán umirkarmia nu, péñker túratniun tuke wakerukarat tusam tuke jintinki wetá. Wi tímiajna nu, péñker asamtai, ashí aents nuna nekaatniun atsumainiawai.

<sup>9</sup> Shuar netse áujmatainiakui amēja pachisaip. Tura “aya winia úuntruk péñker áiniawai” tu chichasaip. Tura Israer-shuara akupkamurj ititurkit tusa shuar ti áujmatainiakui nusha pachisaip. Ántrai ti nuka. Péñker wekasatniun yayatsui.

<sup>10</sup> Shuar tsanumprur yajauch enentáimtumaintikiana nu chicharkata. Ántachkuñkia ataksha chicharkata. Tura penké tujinkiamka jiji akupkata.

<sup>11</sup> Nujai juna nekaamnaitme: nuna tura asa awajiruiti. Tura ni tunaariniñ jakattui.

#### *Papru wakerana nu*

<sup>12</sup> Wisha Artemasan akatran akuptukchatjameash. Nin akupeachkunka Tikikiun akuptuktatjame. Nii jeamtaí amesha wari winitritia Nekapuris péprunam. Juí Nekapurisnum yumí nantu asamtai seturan pujuttajai.

<sup>13</sup> Senas, chichaman ti unuimiaru pujana nu, amikiur Apurusjaj jeamtaí, nii atsumtsuk shiir weartí tusam, ame túratin jeamna nu yaináta.

<sup>14</sup> Iní Yus-shuar ainia nusha péñker túratniun tura atsumainia nunasha yáintinian nekaawartí. Ántar pujusarain tusan nuna tajai.

<sup>15</sup> Ashí wijjai pujuinia nu amikmaatmainiawai. Tura ii amikrj Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

## Papru JIRIMIÚÑKAN papi áatramu

### *Papru Jirimiúñkan papin áatramania nu*

<sup>1</sup> Wi Papru ju papin áaran akuptajme ámin, Jirimiúñká. Ii yachi Timiutéusha juna akupturmawai. Wi Jesukrístu takaru asan sepunam pujajai. Ame iijiai tsaninkia takáa asakmin ju papin akuptajme.

<sup>2</sup> Núnisan ame jeemiin Yus-shuar irunainia nunasha tura ii umaj Apiancha tura Arkipiuncha iijiai ti kakaram takasu asamtai ju papin akuptajrume.

<sup>3</sup> Yus ii Apari tura ii Uuntrj Jesukrístu shiir enentáimturma ásar yainmakarti imiatkinchanum tuke shiir pujustinian.

### *Jirimiúñ pénker Yus-shuar ámiayi*

<sup>4-5</sup> Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúminkiajai.

<sup>6</sup> Áujeakun chíkich shuarsha ámijiai métek Yúsan nekas enentáimtuiniak ashí pénker ana nuna ti paant nekaawarat tusan seajai. Ashí pénker ana nuka Jesukrístu shiir awajsamujai takakji.

<sup>7</sup> Wisha ame anenkratmajai ti shiir enentáimtakun waraajai. Yatsurú, ámijiai ashí Yus-shuarsha shiir enentáimiainiawai.

### *Papru Unisemun waitnentratniun Jirimiúñkan seamiani nu*

<sup>8</sup> Nu asamtai kakaram tátsujme. Kame wakeraknaka Kristu akatramu asan “Ju túrata” tímíniatjijame.

<sup>9</sup> Antsu aneakun aya júnisan tájame. Wi Papru úuntach asan tura Krístun takarkun sepunam pujakun

<sup>10</sup> Unisemu waitnentrai tusan seajme. Niisha wi ujakmajai Yus-shuar ajasa asa winia uchirua áintsan\_kete. Sepunam pujayatan ni aparíya áintsanak ajasjai.

<sup>11</sup> Nuikkia Unisemu ántrauyi antsu yamaikia aminiisha winiisha yáimniuiti.

<sup>12</sup> Ataksha awantajme. Wi ti penker aneamu asamtai pénker itiaata.

<sup>13</sup> Wi Yus-Chichaman étserkun sepunam pujajai. Túmakun ame yajá pujakum yáintkiatin tujintiakmin nii antsu wijiai pujus yáintkiat tusan wakerimjai.

<sup>14</sup> Túrasha ámin ujatsuk túrachmin enentáimpramjai. Kame ame wakerakum útsukchamujai “pujustí” tákumnikia maak.

<sup>15</sup> Júnissha enentáimpramniaiti. Unisemu ishichik tsawant menkakamai tura yamaikia waketki ámijiai tuke pujustatui.

<sup>16</sup> Kame yamaikia emetachma antsu ame aneamu yátsumeá áinis átatui. Nuka ti pénkerchakait. Wisha nin ti anejai. Tura yainmakmin asamtai tura Krístunam ame yatsum ajasu asamtai winia iniankattsam aneashapash.

<sup>17</sup> Wisha ti penker amikrumchakaitiaj. Tuma asam winia itiaarua nútksam shiir awayáta.

<sup>18</sup> Yajauch awajtamkaitkiuñkia tura ámijiai tumashitkiuisha wi akikatjai.

<sup>19</sup> Wi Papru nekas winia uwejruij juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkum.

<sup>20</sup> Wátsek, yatsurú, amesha Yus-shuar asam wi seajme jú túrutata. Kristu enentáimtakum shiir enentáimtikurta.

<sup>21</sup> Ti penker uminiaitme nuna nékakun júnisan áatjame. Tura wi seajmena nuna nankaamas túrattamna nuna nékajai.

<sup>22</sup> Ayu. Átum Yus áujturkurmin Yus winia tsankatruktatui atumjin iiraitniun. Tuma asamtai wi nuj jean pujustin iwiarturata.

### *Amikmaamiania nu*

<sup>23</sup> Épaprasha niisha Jesukristunu étseruk sepunam wijjai pujus amikmaatmarme.

<sup>24</sup> Núnisañ Márkussha Aristárkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

<sup>25</sup> Ii Uuntrij Jesukristu atumniasha ti shiir yainmakarti.

Nuke atí.

## ISRAER-SHUARAN papi akuptukma

### *Yus ni Uchirijjai ni chichamen ujatmakji*

<sup>1</sup> Yáunchuka Yúsnan etserniujai chichas Yus ni enentáimmian ii úuntrin ujakmiayi. Tura untsurí nunkanmasha tura untsurí uwitíncha niisháa niisháa chichas ujakmiayi.

<sup>2</sup> Antsu ju amúamu tsawantajkia ni Uchirí Jesukrístujain ashí Niiniu ana nuna ujatmakji. Yus Niijjai ashí Írunna nuna najana asa mash Nin súsaiti.

<sup>3</sup> Níyaiti Yúsan imiá métek nakumeana nu. Tura Níyaiti Yus nankaamas shiira nuna paant awajeana nu. Niisha aya ni chichamejai kakarma nujai ashí Írunna nuna wáiniuk emeta pujurui. Tura ii tunaarin nijiatramak akupin pujutainium, Yusa untsuurini, pujusmiayi.

### *Nayaimpinmaya suntarjai Kristu nankaamantuiti*

<sup>4</sup> Yusa Uchirí nayaimpinmaya suntarjai imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtawai.

<sup>5</sup> Wátsek, nayaimpinmaya suntaran chikichkinkesha juna tútsuk Krístun tímiayi:

“Ame winia Uchiruitme. Túmaitkiui yamáikia winia kakarmarun átakeajme.”  
Tura núnisan tímiayi:

“Wi ni aparí átatjai, tura Nii winia uchir átatui.”

<sup>6</sup> Tura jú nunkanam ni Iwiairin akupeak tímiayi:

“Ashí Yusa suntarí tikishmatrarti.”

<sup>7</sup> Nayaimpinmaya suntarnan júnis chicharui:

“Nayaimpinmaya suntarin takartursarat tusa nasea áintsan awajsaiti. Ni suntarin chárpia áinis akupeawai.”

<sup>8</sup> Antsu ni Uchiriniun tímiayi:

“Ame, Yusá, tuke akupniuitme. Ame akuptairmésa aya péñkeraiti.

<sup>9</sup> Péñkera nu anenaitme, tura yajauchia nu muíjniuitme. Tuma asamtai ashí shuar shiir warartamu asamtai Yus, ame Yúsrum, ashí akupniujai nankaamas uunt awajtamsaiti.”

<sup>10</sup> Nu arantcha tawai:

“Uuntá, yámankamtaik Ame ju nunka najanamiame. Túram ame uwejmijjai nayaimpisha najanaitme.

<sup>11</sup> Nusha mai amuukarmataisha Ame tuke pujuttame. Tarachjai métek mamurartatui.

<sup>12</sup> Tura ipijram ikiustatme. Pushiya áintsam yapajíattame. Túrasha Ámeká núnismek átatme. Játsuk tuke pujuttame.”

<sup>13</sup> Ataksha tímiayi:

“Akupin pujutainium, winia untsuurini, pujusam nácarsatá. Ame nemas-rumin nupetkan Ámin umirtankarti tusan amastatjai.”

Núnisan nayaimpinmaya suntaran penké tíchamiayi.

<sup>14</sup> Antsu Yusa suntarí wakan áiniak ashí shuar uwemprartatna nuna yáinkiarat tusar Yus akupkamu áiniawai.



## 2

*Anearta. Uwempratin Chicham nakitrashtiniati.*

<sup>1</sup> Nuikia Kristu ti uunt asamtai ashí Niiniu antukajnia nujaj kanakchatin ti enentáimtustiniati.

<sup>2</sup> Yaunchu nayaimpinmaya suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asut-niáwarmiayi.

<sup>3</sup> Antsu ii Uuntri Krístuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakitiakrikia nuna nankaamas uwemtsuk asutniáttaji.

<sup>4</sup> Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian kakarman Yus iniakmasmiayi. Núnisan ni Shiir Wakanj ni wakerana núnisan niisháa niisháa kakermajaj takamtikeyawai. Nujaj Yus-Chichama nu paant nekanamniati.

*Jesukrístu aents ajasmiania nu*

<sup>5</sup> Ayu. Nuik áujmatkur “jú nuńka amuukattawai” taji. Tura yamaram nuńkanam nayaimpinmaya suntar akupkachartatui.

<sup>6</sup> Antsu ii akupkattajnia nu, Yus-Papinium áarmaiti: “¿Shuarti warimpiaitaj ame imiá enentáimtitniusha? Kame, ¿shuar warí asamtai pujarsataj tamea?”

<sup>7</sup> Ishichik tsawant nayaimpinmaya suntarjaj péejchach awajsamiame. Túram ti shiir nankaamas uunt awajsattame. Ame najanamun ashí akupkati tusam tsankatkattame.

<sup>8</sup> Ashí nin umirkarti tusam susattame.” Tu áarmaiti. Yus “ashí nin umirkarti” takui nin umirkashtinkia atsawai. Túrasha ya- maikia ashí umirainiaka wáintsuji.

<sup>9</sup> Tura wáinjinia nu Krístuiti. Niisha aents ajas ishichik tsawant nayaimpin- maya suntarjaj péejchach ajasmiai. Yus ni shuarin ti aneak jarukarti tusa wakerimiayi. Tura ni wáitias jakamujaj yamaikia ti shiir nankaamas Uunt awajsamuiti.

<sup>10</sup> Ashí írunna nu Yus najanamun ásar ni wakeramun umiktin ainiawai. Tura ashí ni uchirjsha ni shíirmarj pachiinkiarat tusa wakerawai. Tuma asa Yuska Jesukrístun, nu shuaran Uwemtiknia nuna, ni waitsmujaj nekas Uwemtikiartin awajsamiayi.

<sup>11</sup> Yusna atí tusa shiir awajsamuncha tura Kristu nin shiir awajea nunasha Yuska mai metek ni Aparinti. Nu asamtai Yusa Uchirj nu shuaran “yatsur” titinian natsantatsui.

<sup>12</sup> Yus-Papinium núnisan tawai: “Ame náarmin winia yatsurun ujakartatjai. Ashí iruntramunam kantampru- attajme.”

<sup>13</sup> Ataksha ni shuarijjaj métek enentáimtamun tawai:

“Yúsan ti shiir enentáimtustajai.”

Tura ataksha:

“Yus surusmia nú uchirjaj Yúsan umirkun pujajai” tawai.

<sup>14</sup> Tura nu uchi aents ásarmatai núnisan Jesssha aents ajasmiai. Tura aents ajas jaka, iwianchin, jatai nérenniurj, ashí emesramiayi.

<sup>15</sup> Tura ti untsurj shuaran uwemtikrarmiayi. Nu shuar yaunchu jákatniun ashamainiak tuke wáitin ármiai. Antsu ni jakamujaj yamá ankant áiniawai.

<sup>16</sup> Maa, imiá nekasaiti, nayaimpinmayá suntaran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi.

<sup>17</sup> Túratin asa penké métek ni yachía áinis ajasmiai. Nujai in tuke waitnentrampromniaitji. Tuma asa Yúsnan pujurniu uuntri ajas Yúsán tuke péñker chichartamsamniaitji. Núnisan murikiun maa Yus súsatniua áintsan ni jakamujai ashí shuara tunaarjin tsankurniuiti.

<sup>18</sup> Tura imia niniki waitsa asa tura íwianch nekapsamu asa yamaikia iisha wáitiakrincha tura íwianch nekaprakurnisha yainmakminiaitji.

### 3

#### *Jesus Muisaisjaisha nankaamantuiti*

<sup>1</sup> Tuma asamtai, péñker yatsuru, atumniasha Niiniu atí tusa Yus achir-makuitrume. Tuma asarum Kristu Jesus péñker enentáimtustarum. Niisha Yus nekas Akatramuyayi. Tura ashí Yus-shuar ajasarua nujai Yúsnan pujurniu uuntria núnisaiti.

<sup>2</sup> Nu atí tusa Yus anaikiamiayi. Túramtai Kristu nuna ti péñker takasuiti. Núnisan Muisais ashí Yusa aentsrin, Israer-shuar armia nuna ti shiir wainkiamiayi.

<sup>3</sup> Túrasha Muisaisjai nankaamas Kristu ti shiir awajnasuiti. Jeajai nankaamas jea jeamniuka nekas péñkerchakait. Núnisan Kristu Muisaisjai nankaamas péñkeraiti.

<sup>4</sup> Kame ashí jean shuar jeamtsuk. Tura Yus ashí írunna nuna najanaiti.

<sup>5</sup> Wats. Muisais Israer-shuaran wáiniuk Yusa Jeen takastinia áintsan péñker takarniuyayi. Tura ni takaak ukunam Yus títiatna nuna etserkatniuyayi.

<sup>6</sup> Túrasha Kristu Yusa Jeen takarniuchu asa antsu Yusa Uchiri asa nuj ashí akupeawai. Nu jeasha iitji. Tura tuke iniaitsuk kakaram ajasar Yus suramsattaj nu wararsar nákastiniaitji.

#### *Yusa shuari shiir pujustin*

<sup>7</sup> Nu asamtai, Yusa Shiir Wakanj Yus-Papinium tawai:

“Yamaikia, Yus tana nu ántakrumka

<sup>8</sup> nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsán nekapsar akajkarmiai.

<sup>9</sup> Túramtai Yus tímiayi “Nuj atumí uuntri nekaprusar akajtukarmiai. Kuarenta (40) uwitin wi kakaram túramun ísarsha nakitrurarmiai.

<sup>10</sup> Tuma ásarmatai nu shuaran kajerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiajai.

<sup>11</sup> Tura kajerkan nekas tákun “Wijjai shiir pujustinian penké tsankatkachartatjai” tímiajai” tímiayi Yús.”

Tu áarmaiti.

<sup>12</sup> Anearta, yatsuru. Yajauch enentáimsarum tuke iwiaaku Yus enentáimtutsuk kanakiirap.

<sup>13</sup> Kame kashinkia tunaajai anannam enentáimin Yúsna nakitrashtapash. Tuma asamtai yamaik tura ashí tsawant ikiakánairatarum.

<sup>14</sup> Yámankamtaik Kristu shiir enentáimtusmaj núnisrik tuke iniaitsuk émeteakrikia Kristujai shiir tsaniñkiar pujustatji.

<sup>15</sup> Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap.”

16 Muisais Ejiptu nunkanmaya jiiikmia nú shuar Yusa chichamen an-turkariat nakitrarmiyai.

17 Tura umiiniachkui kuarenta uwi kajerkarmiyai. Tunaan túrawaru ásar untsurí shuar aents atsamunam kajinkarmiyai.

18 Kame umirkacharunka Yus “Wijjai shiir pujustinian penké tsankatkachartatjai” tímiyai.

19 Iis, Yúsán enentáimtachu ásar Niijjai shiir pujustinnium wayatniun tu-jinkarmiyai.

## 4

1 Nu asantai, ii wayatin tsankatkamu áyatar Yusjai shiir pujustinnium páchitkiachu aij tusar aneartiniaitji.

2 Yaunchu nu shuaran ujakarmia núnisan incha Uwempratin Chichaman ujatmakuitji. Nu shuar Yúsán enentáimtutsuk antukaru ásarmatai nu chicham yáincharmiyai.

3 Antsu iikia ni chichame enentáimta asar Yusjai shiir pujustinnium nekas wayaji. Tura chikichan Yus tímiyai:

“Nu asantai kajerkan nekas takun “Wijjai shiir pujustinian penké tsankatkachartatjai” tímiajai” tímiyai. Kame Yus jú nunkan najana umik nuyá shiir pujus ayampramiyai.

4 Yus-Chichamnum ayampramun júnis tawai.

“Yus sais tsawant takakmas nuyá tsawantai ayampramiyai.”

5 Tura ataksha tawai:

“Wijjai shiir pujustinnium wayá ayamprashtatui.”

6 Shuar nuí wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiyai.

7 Nu asantai ataksha Yus wayatin tsawantan áanturmaitji. Nusha yamáí tsawantaiti. Wats, Israer-shuar ni nunké Yus susamunam wayáawarmiyai. Tura nuna ukunam Uunt Tawit timiajai Yus ni chichamen ujatmaji:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tímiyai.

8 Kame ni kapitántri Jusué Israer-shuaran ni nunkeen awayá ayamtikraitk-iuinkia Yus ukunam ataksha tsawantan áanturmachaaji.

9 Nujai páantaiti, ashí Yus-shuar Yusjai shiir pujusar ayampratin tuke awai.

10 Yusjai ayampra nu, ni kakarmarjjai takastinian ayampraiti Yus ni takat-rjjai ayampramia núnisan.

11 Nu asantai iisha Yusjai shiir pujustinnium pachiinkiachajj tusar Yus shiir enentáimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

12 Yusa chichame iwiaaku chichamaiti, imiá kakarmaiti. Puniá mai érea núniniaiti. Tuma asa shuara enentáin inít wayá ashí ni enentáimmian tura wakeramurín tí paant awajtawai.

13 Yus najanamuka penké Nin umprukchamniaiti. Ashí írúnna nu Yus ímmianum mísúa áintsan paant ániawai. Tura ii túramu ashí paant ujakartatji.

### *Jesus nekas Yúsán pujurniu úuntriinti*

14 Jesus Yusa Uchirí nekas Yúsán pujurniu uuntri ajas Yusai wayá iiniun chichartamji. Nu asantai iniaitsuk tuke nekas enentáimtustiniaitji.

15 Niisha iijjaj métek ashí tunaanum nekapsamuiti. Túrasha tunaan túrachmiayi. Tuma asa ii tujintiaj nuna paant nékak ii ititurchatrín waitnentramniuitji. Tura Yúsnan pujurniu uuntri asamtai

16 Yús-akuptainium shiir enentáijjaj sapijmiatsuk jeamniaitji. Tura Yus in anenma asa waitnentramak ititurchat pujanjia nuj yainmaktatji.

## 5

1 Tura Yúsnan pujurniu úntrikia shuar anaikiamuiti tura ni takatrí jímiaraiti. Yusaj shuárnan chicharsatniuiti. Nuyasha Yus súniamun súsatniuiti tura núnisan namanken maa Yúsán súsatniuiti shuara tunaarín asakátratniun.

2 Tura Yúsnan pujurniu uuntri niisha shuar asa ni tujintiamun nékak shuar nékachuncha tura waak yujainia nunasha waitnentramniaiti.

3 Tura niisha tujintia asa ni tunaaríncha chíkichnajaí métek tsan̄kurnarat namanken maa Yúsán súsatniuiti.

4 Shuar ni enentáijjain̄kia Yúsnan pujurniu uuntri ajaschamniaiti. Antsu Yus nu shuaran anaikiatniuiti. Núnisan̄ Arun̄kan anaikiamiayi.

5 Núniskete Kristujaj. Niisha ni enentáijjaj Yúsnan pujurniu uuntri ajaschamiayi. Antsu Yus Nin anaik nujaj shiir awajsamiayi. Tura tímiayi: “Ame winia Uchiruitme. Túmaitkui yamaikia winia kakarmarun átakeajme.”

6 Tura ataksha Yus-Papinium júnis tawai:

“Mirkisetékka Yúsnan pujurin amia núnismek Amesha tuke Yúsnan pujurin átatme.”

7 Kristu jú nunkanam pujak kakantar útuk Yúsán ti seamiayi. Nin jákatniunmaya uwentikramnia asamtai seamiayi. Tura Yusa wakeramurín tuke enentáijjaj enentáimtakui Yus anturak ti yáin̄miayi.

8 Nujaj Kristu Yusa Uchiríntiaí ni wáitsatniujaj umirkatniun unuimiarmiayi.

9 Nujaj ti nekas Uwentikin ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetékka Yúsantikrarminiaiti.

10 Túramtai Yus Nin Yúsnan pujurniu uuntri Mirkisetékjaj métek awajsamiayi.

### *Anearta. Yusjaj kanakchatniuiti.*

11 Ju ti nukap áujmatsatin awai. Túrasha ántichu asakrumin mashi ujakchamniaitjiarme.

12 Átumka yaunchu mash nekaamaintrume. Túmaitiatrum ataksha yaitiás Yúsnan jintinruat tusarum atsumarme. Warí, kuirchia núniniaitrume. Kátsuram yútsuk muntsu muntsúatniuitrume.

13 Kuírchikia Uwempratin Chichaman áujenak péñker unuimiainiatsui. Tin̄kiamnumiá ásar tujintiainiawai.

14 Apatuk kátsurman aya uunt yuámniaiti. Uunt ainia nuka péñkernasha tura yajauchincha apatkar paant nékainiawai.

## 6

1 Uunt ajastai. Kristunu ana nuyá aya yúpichuchia nuke enentáimtsuk nu arantcha unuimiartai. Kame emka unuimiartinia nu ju áiniawai: shuar ni tunaarín jákatniunam júana nuna kúntuts enentáimtur Yúsán shiir enentáimtustincha,

2 imiantinnium nekaatniuswai:

“Mirkisetékka Yúsnanha, Yus-shuar yain̄manum uweje awantsatniusha, jakamunmaya nantaktincha, tura sumamtikiatín tsawanta nu nekaatniusha.

<sup>3</sup> Tura Yus yáinmakrin nuna nan̄kaamas nekaattaji.

<sup>4</sup> Shuar Yusna nuna nekaan̄ka tura Yus susamun takakkūnka tura Yusa Shiir Wakan̄j kakarmarīn nekapsaitkiun̄ka

<sup>5</sup> tura Yusa chichamen̄cha pé̄nkeraiti nekaan̄ka tura Yusa kakarmarī ukunam nūnka yamarmanum takastatna nuna yamáí nekapeakka,

<sup>6</sup> nu shuar nuna nakitiak kanakniaka atak ni tunaarīn enentáimtak ik-iuktinian wakerachuk tujinkiattawai. Warí, ní enentáij̄ij̄i Yusa Uchirīn krúsnum máiniaiti túrak ashí íimiainiāi natsanmain awajeawai.

<sup>7</sup> Nu shuar yajauch nūnka áintsan̄ ániawai. Yumi yútakui pé̄nker nūnka arakan pé̄nker tsapatmakka arakmaun yayawai. Túramtai Yus shiir enentáimui.

<sup>8</sup> Antsu jan̄kí nupan tsapatmakka nu nūnka yajauchiiti. Yus áeseak emes-rattawai.

*Yus tsan̄katramkattajnia nu enentáimtakur kakaram ajaji*

<sup>9</sup> Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú pé̄nker túrattarme.

<sup>10</sup> Yus ti pé̄nker asa átum takasman̄cha tura ni aneakrum Yus-shuar yayin̄man̄cha kajinmatkishtatui. Tura yamaisha tuke túrarme.

<sup>11</sup> Tura nuik túrarmena núnisrumek tuke iniaitsuk kakaram takasrum ashí Yus tsan̄katramkatta nu wáinkiatarme. Núnisan̄ atí tusar wakeraji.

<sup>12</sup> Nakimtsuk kakaram ajastarum. Niiniua nuna Yus ni shuarīn susattawai. Tura shuar Yúsán enentáimtak shiir enentáij̄ij̄i nákkaka nuna wainkiattawai. Tu takastarum tusar wakeraji.

<sup>13-14</sup> Yus yaunchu Apraám̄j̄i chichaak “Ti nekas shiir awajsattajme tura ti nukap pampantikrattajme” tímiayi. Nuna taku imiá nekas tajai tusa tura chíkich Niij̄ij̄i nan̄kaamas uunt atsakui imia Nīnki pachiiimas tumammiai.

<sup>15</sup> Tutai Apraám̄ yáitmataik nákas Yus timia nuna wáinkiamiyi.

<sup>16</sup> Shuar “nekas tajai Yus íirui” tákūnka chíkich niij̄ij̄i nan̄kaamas úntan páchiawai. Tura tu chichasmatain̄kia nuyán̄ka imiá nekas tana nu nekaamniaiti.

<sup>17</sup> Tuma asamtai Yuska “ti nekas an yapáij̄itsuk túrattajai” tusa imia Nīnki pachiiimas tumammiai. Nuj̄aj̄i ni tsan̄katkamun júkiartatna nu shuar Yus ti nekas umiktatna nuna nékainiawai.

<sup>18</sup> Yus pen̄ké wáitruachmin asa áyatik ni tamaj̄i nekasaiti. Nuna arant nuikia imia Nīnki pachiiimas ti ikiakátmaj̄i in. Nuj̄aj̄i iisha uwempratai tusar Niini weamkatikia tsan̄katramkattajnia nu ti shiir enentáimsar wáinkiatin nákaji.

<sup>19</sup> Nu enentáimsar kakaram ajaji. Yusaj̄i yn umuchtiamkamnia pen̄ké atsawai. Yusaj̄i áchitkia asakrin ti kakaram emettam̄j̄i.

<sup>20</sup> Jesussha emka Yusaj̄i wayá mash iwiarturmaj̄i. Tura Mirkiseték amia núnisan̄ Niisha yamáí tuke amuukashtinian Yúsnan pujurniu uuntrī ajasuiti.

## 7

*Mirkiseték amia núnisan̄ Jesussha Yúsnan pujurniu uuntrī ajasuiti*

<sup>1</sup> Nu Mirkisetéksha Sarem nūnkanam akupniuyayi. Tura ashí nan̄kamas kakaram Yúsnan pujurniuyayi. Apraám̄ chíkich akupniun mesetj̄i awakak támatai Mirkiseték j̄iintiuki in̄kiun̄ ti shiir awájsámiayi.

<sup>2</sup> Túramtai Apraám̄ nupetmakar kuit jukimiun tias (10) akantuk susamiayi. Mirkisetéka naarī tana júka “ti pen̄ker uunt akupin” tawai. Tura Saremka

“ti shiir imiatkincha” tawai. Tura Mirkiseték Sarema akupniurj asa “ti shiir imiatkinchanum akupin” tawai.

<sup>3</sup> Nukurisha aparisha Yus-Chichamnum atsawai. Núnisan ni uuntrisha atsawai. Ni akiinimurincha ni jakamurincha ujaatsui. Tuma asamtai Yusa Uchirja áintsan tuke inianakchatniun Yúsnan pujurniu uuntrj ajasuiti.

<sup>4</sup> Mirkiseték timiá uuntauya nu enentáimprata. Ii uuntrj Apraámsha nupet-makar kuit jukimiun tias akantuk susamiayi.

<sup>5</sup> Tuma asamtai Apraám nankaamas úuntaiti. Muisais akupkamujaj Riwi weeáka Yúsnan pujurin ániawai. Niisha ashí Israer-shuarjaj métek Apraám weeá ániawai. Túmaitiat penké Israer-shuar ni warirjn tias akantuk Riwi shuaran suu ármiayi. Muisais tu akupkamiayi.

<sup>6</sup> Túrasha Mirkiseték Riwi weechunak Apraám tiásan akantuk nin susamiayi. Apraám Yus shiira nuna tsanatkamuitiat Mirkisetékan niijaj uunt asamtai susamiayi. Túram Mirkiseték Apraáman shiir awajsamiayi.

<sup>7</sup> Imiá nekas Mirkiseték Apraáma nankaamas páantin asa Apraáman shiir awajsamiayi.

<sup>8</sup> Israer-shuarti tias akankamun súajnia nú shuar aya aents ásar tuke pujushamin ániawai. Antsu Mirkiseték jakamun Yus-Chicham penké ujaatsui.

<sup>9</sup> Yamái Riwi weeá shuar kuit akankamun achiktin ániawai. Túrasha Apraám Mirkisetékan súakui Riwi weeá nujaj susa ániawai.

<sup>10</sup> Apraám weeá ániak ni ayashja áinis enentáimtusmin ániawai.

<sup>11</sup> Muisais akupkamunam Riwi-shuarnumiá aya Arun weeá shuar Yúsnan pujurin ármiayi. Niisha Muisais akupkamu timia nujaj métek penké shuarjaj takasarmiayi. Tura Riwi-shuarnumiá Yúsnan pujurniu takatrijaj tunáa nekas asakármiaitkiuinjia Yúsnan pujurin yamarmak, Arun weechu, anaiki-ashtin ainti. Túrasha Yus Jesusan, Mirkiseték amia áinis, Yúsnan pujurniu anaikiaiti. Nusha Arun weechuíti.

<sup>12</sup> Tura Yúsnan pujurin yapajniámtai Muisais akupkamusha yapajniátniuiti.

<sup>13-14</sup> Nu arantcha, ii Uuntrj Jesukristu Riwi-shuarcha antsu Jutá-shuarauyayi. Tura Muisais akupkamujaj Jutá-shuarnumiá Yúsnan pujurin atsutniuiti. Antsu nuna takatrn penké túrashtiniuyi. Tuma asamtai nújajsha Muisais akupkamu yapajniátniuiti.

<sup>15</sup> Nú páantcha awajsamniaiti. Wats, Yúsnan pujurin yamarma nuka Mirkisetékjaj méteketi.

<sup>16</sup> Niñkia Riwi shuar asa Yúsnan pujurin ajaschamiayi, antsu jákashtin asa nu kakarmajaj Yúsnan pujurin ajasmiayi.

<sup>17</sup> Tuma asamtai juna Yus Jesusan áujmatui:

“Mirkisetékka Yúsnan pujurin amia núnismek Amesha inianatsuk Yúsnan tuke pujurin átatme.”

<sup>18</sup> Nujaj yaunchu akupkamu penkercha ajasmatai japirmaiti.

<sup>19</sup> Muisais akupkamuka shuáran penker awajsachminiuyayi. Antsu Yus in ti shiir awajtamsattajnia nu nákjaji. Nujaj Yusaj ti shiir jeeáitji.

<sup>20</sup> Nunasha Yus “nekas tajai” tusa Niñki pachimias tumammiai.

<sup>21</sup> Riwi-shuarnumiá Yúsnan pujurin Yusa naarj pachitsuk anaikiamu ármiayi. Antsu jú Yúsnan pujurniunka Yus imia Niñki pachimias anaikiamiayi. Tura Nin júnis tímiayi:

“Uuntka imia Niñki pachimias tiniu asa penké yapajiashtatui. Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

<sup>22</sup> Tuma asamtai Jesuska nekas uwemtikrattajai tusa yaunchu amia nujaj nankaamas penker Chichaman iwiarturuiti.

<sup>23</sup> Yaunchu Yúsnan pujurin untsurí ármiai. Chíkich jakamtai chíkich tuke takaarmiai.

<sup>24</sup> Antsu Jesus tuke jákashtin asa chikichan ikiurkishtatui.

<sup>25</sup> Tuma asa tuke iwiaaku pujak ni shuarin tuke Yúsan áujtusminiaiti. Tuma asa shuar Nin enentáimtusar Yúsaj weankarun tuke uwemtikramniaiti.

<sup>26</sup> Tuma asa Jesus Yúsnan penker pujurin asa ii atsumajnia núkete niisha. Niisha ti shiir asa penké tunaarinchaiti. Ashí tunaariniunmayá kanakniuiti. Tura Yúsajaj métek Uunt ajasuíti.

<sup>27</sup> Niisha yaunchu Yúsnan pujurniu uuntri armia núnikchaiti. Yaunchua nuka murikiun máawar ashí tsawant Yúsan suu ármiai. Nujaj emka ni tunaarín nuyá ashí shuara tunaarín asakátin ármiai. Tura Jesuska jákatniunam chikichí surumak ashí shuara tunaarín asakátramiayi.

<sup>28</sup> Muisais akupkamuka penké shuarnak tuke penkercha ajn Yúsnan pujurniu úuntrin anaikiaiiti. Tura nu ukunmanka Yus, nekas niníki pachíimias, ni Uchirín, tuke penkera nuna, Yúsnan pujurniu úuntrin anaikiaiiti.

## 8

### *Nankaamas penker Chichaman Jesus takartamji*

<sup>1</sup> Nekas juna tájame: Yúsnan pujurniu uuntri Jesus in ti shiir yainma asa akupin pujutainium Yusa untsuurinj nayaimpiniam pujusuíti.

<sup>2</sup> Nekas Yusa Jee nayaimpinma nu aents najanachma antsu Yus najanauiti. Nuj Jesus Yúsnan pujurui.

<sup>3</sup> Ashí Yúsnan pujurniu uuntri ainia nu, shuar Yúsnan susamuncha tura naman maar Yus sútaincha Yúsan ashí súsatin áiniawai. Núnisan Jesukrístusha Yúsan súsatniuiti.

<sup>4</sup> Juyá Yúsnan pujurin Muisais timia nuna Yúsan yamaisha susamin akui Jesus ju nunkanam pujakka Yúsnan pujurin áchainti. Antsu nayaimpiniam takaawai.

<sup>5</sup> Yus yaunchu Muisaisan nayaimpiniam írúnna nuna iniaktus tímiayi “Ame wáinkiamna nujaj métek ashí najanata.” Túramu asamtai ashí yaunchu Yúsnan pujurin Muisais najanamujaj takainia nu aya nayaimpiniam ana nuna nakumkamujain takainiawai.

<sup>6</sup> Antsu Jesus ti nekasa nujaj nayaimpiniam takaawai. Muisais akupkamuka shuáran penker awajsachminiaiti. Antsu Yus in ti penker awajtam-sattaji. Kame Yamaram Chichamnum Yus ashí túrutmattajnia nu Muisais akupkamunam ana nuna nankaamas ti penker áiniawai. Tuma asamtai nankaamas penker Chichaman Jesus takartamji.

<sup>7</sup> Kame Emka Chicham, Yus Muisaisajaj yaunchu najanamia nu, nekas penkeraitkiuiníki Yamaram Chichaman najanachajaj.

<sup>8</sup> Antsu penkercha áiniakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarajaj Yamaram Chichaman najanattajaj.

<sup>9</sup> Yaunchu ju shuara uuntrin Ejiptunmayá yaruakmiaj nuj Emka Chichaman najanamjai. Tura Yamaram Chichaman najanattaj nu núnisha átatui. Emka nuna uminiachkui ajapan iniaisarmajaj.” Núnis tawai Uunt Yus.

<sup>10</sup> Tura nu arantcha tawai: “Tsawant jeamtai Israer-shuarjaj Yamaram Chichaman najanattaj nuka júnis átatui. Wi akupeajna nuna enentáin paant enentáimtikrartatjai. Nuyá ni Yusrj ártatjai tura niisha Wíi shuar ártatui.

<sup>11</sup> Nuísha Yúsán nekaat tusa jintinnaiyachartatui. Kame ni ajísha ni yachísha kame ashí shuar, uchisha uuntcha, ashí nekarawartatui.

<sup>12</sup> Tura ashí ni tunaaríncha tsankuraran ni yajauchirín atak penké enentáimtuschartatjai” tímiayi.” Tu áarmaiti.

<sup>13</sup> Wats, Emka Chícham yajauch ajakui Yus Yamaram Chichaman nájaneak pujurui. Tura yajauch ajasua nuka wárik ajapnattawai.

## 9

### *Yusa Jee nayaimpinmasha tura ju nunkanmasha*

<sup>1</sup> Ayu. Yus shiir awajsatniuka Emka Chicham timia nujaj métek túratniuyayi. Tura ju nunkanmaya Yusa Jee weriár Yús shiir awajsatniuyayi.

<sup>2</sup> Nu Jeasha júnis tesakmauyayi. Nékatka Shiir Tesaamu tutainti. Nuí asuitin ekeemakar tsáapin awajtaisha tura misasha Yus iniaktusma tantajaj pujuyayi.

<sup>3</sup> Nuyá-tesaamuka Imiá Shiir Tesaamu tutainti.

<sup>4</sup> Nuí kunkuin ekeemataisha kurijijaj kuerma tura Chícham Aarma Chumpitiaisha pujuyayi. Nusha ashí kurijijaj kuérmauyayi. Tura inít kurijijaj najanamu ichínkian maná yurumak enkemniuyayi. Nuyá Yúsán pu-jurniu uuntrj Arúnka ushukrutairj yaunchu tsapaak janúkumia nusha enkemniuyayi. Nuyá Yus najanamu Chícham Muisais kayanam aarmasha enkemniuyayi.

<sup>5</sup> Nuna úkurín Kirupín, nayaimpinmaya suntara nu, kurijijaj nakumkamu wajarmiayi. Nusha Yusa shíirmarín nakumkarmiayi. Tura ni nanapéjaj shuara tunaarín ayamprutain nukúakuyayi. Nuna arantka yamá etserkatin atsumatsji.

<sup>6</sup> Núnis aa asamtai Shiir Tesaamunam ashí Yúsán pujurin tuke wáiniak Yúsán takasarmiayi.

<sup>7</sup> Tura Imiá Shiir Tesaamunmanka aya ni uuntrj wáiniayuyayi. Tura niisha ashí uwitin aya chikichik tsawant wayamiayi. Wayak ni tunaarísha tura ashí shuara tunaarj tsankurnarat tusa Yus súsatniu namanké numpen juu ámiayi.

<sup>8</sup> Yusa Wakanj núnis atí tusa nuna mash iwiamiyayi. Tura asa júna paant awajturmajj. Jú nunkanmaya Yusa Jee pujakuí tura aya nuín Yus shiir awajsamniaitkiuínkia nekas Imiá Shiira nuí Yus pujamunam wayatin tuke iturchat ainti.

<sup>9</sup> Nusha yamá pujuiniaj nuna enentáimtikrampratniuitji. Shuar Yus shiir enentáimtikratniun namanken maa suíniaksha nu shuar ni tunaaríjjaj tuke itit enentáimtumainiawai.

<sup>10</sup> Warí, aya yurumátniusha umartincha nijartincha tura ashí núnisan túratniujaj aya pátatek asamtai enentáiniam ana nuna iwiarachmin áiniawai. Antsu Yus nú túratniunka yapajjátniuyayi. Tuma asamtai yapajnjátsajín túratin áiniawai.

<sup>11</sup> Tura yamaikia Kristu táwiti tura Yúsán pujurniu uuntrj ajas Yamaram Chichamnum Yus ti penkeran túrutmatniua nuna pujurturmajj. Niisha ti shiir Yus Jee aents najanachmanum takaawai. Nu Jee ju nunkanmayanchuiti.

<sup>12</sup> Tura Kristu Imiá Shiir Tesaamunam namanke numpéjaj wayachuiti antsu ni numpejaink' wayaiti. Tura aya chikichkí wayá ii tunaarín asakturmar tuke uwentikrampramijj.



13 Nekas namaŋké numpesha tura áisamu yun̄kunmiriŋsha tunáa shuar-num páatek ukatkamu aya páatek shiir awajsamniuyi.

14 Túrasa Kristu numpé ii tunaar̄in pen̄ké asakáruiiti. Túramtai yamaikia tunáa jákatniunam júana nujai itit enentáimtumatsuk nekas iwaaku Yus shiir umirkamniaitji. Kristu pen̄ké tunaarincha asa tuke jákashtin Wakan̄i kakarmarij̄jai jákatniunam Yusaj̄i surumakmiayi.

15 Nu asamtai Jesukristu Yamaram Chichaman shiir takarniuiti. Yaunchu Chichamjai tunáa nekas tsan̄kurachma asamtai Kristu jaka nu tunaancha tsan̄kurarmiayi. Nujai ashí Yus-shuarti Yus achikma asar Yus tsan̄katramajnia nu wáinkiar tuke wararsattaji.

16-17 Shuar ni kuítr̄in akantrattak chichaman najanatniuiti. Tura jáats̄ain nu kuit akantrashtiniaiti. Aya nii jakamtai nu chicham najanamum uminkiatniuiti.

18 Nu asamtai Emka Chicham Muisaisjai najanamusha maamu numpé ukatramujai akupkamuyayi. Nujais̄ha naman̄ máatniuyayi.

19 Muisais nu akupkamun ashí shuáran ujakarmiayi. Nuyá ure kapaakujai tura nupajais̄ha namaŋké numpé entsajai pachimpramujai ayak akupkamu papincha ashí shuarnasha ukatkarmiayi.

20 Tura tiarmiayi “Ju numpajai “Chícham Yus akupturmarmena nu nekas umiktiniaiti” tawai.”

21 Nuyá nu numpajai Yusa J̄encha ashí nūi takastin irunmia nunasha ukatkarmiayi.

22 Nu akupkamujai pen̄ké ishichik numpajain̄chu shiir awajsamniaiti. Túrasa numpajain̄chu tunáa pen̄ké asakárchamniaiti.

### *Kristu jakamujai tunáa asakárminiaiti*

23 Tuma asamtai Muisais najanamum nayaimpiniam ana nuna aya nakumkamu ásar namaŋké numpejai shiir awajsamu ármiai. Antsu nayaimpiniam nekas írunna nu, naŋkaamas kakaram numpajai shiir awajsatin áiniawai.

24 Kristuka yaunchu Yusa J̄en aents najanamunam takastaj tusa wayach̄miayi. Nuka nayaimpinmayan̄ aya nakumkamuiti. Antsu nekas nayaimpiniam Yus pujamunam wayá asa in̄ áujturmaji.

25 Yaunchu Yúsnan̄ pujurniu uuntr̄i ni numpejain̄chu ashí uwitin Imiá Shiir Tesaamunam wain̄ ármiai. Tura Kristuka untsur̄i wayach̄uiti.

26 Kame untsur̄i wayatniuitkiun̄kia ni numpejain̄k' wayá asa yamaŋkamtaiknumiá untsur̄i jákaayi. Antsu yamaikia ju nun̄ka amúamunam Kristu chikichkí jákatniunam surumak tunaan ashí asakáruiiti.

27 Ashí shuar chikichkí jakar nuyá ni túramun Yusaj̄i nekatatniun nantaktin̄ áiniawai.

28 Núnisan̄ Kristu chikichkí jákatniunam surumak shuara tunaar̄in asakáruiiti. Tura atakka tunaan asakártinian wantinkiashtatui. Antsu ni tátrin̄in̄ nákania nuna uwemtikkraŋtsa wantinkiat̄tawai.

## 10

1 Muisais akupkamuka ukunam ti pen̄ker átatna núchaiti. Antsu nuna aya nakumeawai. Tuma asa ashí uwitin naman̄ maar Yus s̄utaj̄ijais̄ha shuara tunaar̄in asakátrachminiaiti.

2 Kame asakátraka shuar nekas shiir awajsamniaitkiun̄kia Yus naman̄ maar s̄usatniun atsumachuk iniaisar̄ayi. Iis, mash tsan̄kuramuitkiun̄ka ni

tunaarjijai itit enentáimtumashcharainti. Túrawar naman̄ maar Yus súsatniun iniaisarainti.

<sup>3</sup> Antsu naman̄ken maar ashí uwitin tuke suíniak nujai ni tunaarj̄n tuke enentáimtuiniawai.

<sup>4</sup> Wari, naman̄ké numpejai ii tunaarj̄ penké asakárchamniaiti.

<sup>5</sup> Nu asamtai Kristu j̄u nuñkanam taa Yúsan chicharuk tímiayi:

“Naman̄ maar sutaisha penké nakitráme. Antsu ayash̄ iwiam surusuitme.

<sup>6</sup> Naman̄ áesamusha tura tunaan asakártin naman̄ susamusha wakeratsme.

<sup>7</sup> Tuma asamtai “Yusrú, tímiyajai. Winia áatrurma núnisnak ame wakeramurmin umiktajtsan táwitjai” tímiyajai” tímiayi.

<sup>8</sup> Emka, Muisais akupkamú aijn̄, naman̄ susamuncha, tunaan asakárat tusa naman̄ maar susamuncha, naman̄ áesamuncha Yus ashí nakitraitit tawai Kristu.

<sup>9</sup> Nuyá “Yusrú, ame wakeramurm̄jn̄ umiktajtsan táwitjai” tawai. Nuna taku naman̄ maar sútain “Asakáiniaiti” tawai. Tura chikichan ikuawai.

<sup>10</sup> Jesukristu Yúsan umiruk jákatniun chikichkí surumakmatai Yus in tunaar-incha shiir awajtamsaitji.

<sup>11</sup> Tura Israer-shuarnumia Yúsnan pujurin ashí tsawantaj̄ nú naman̄nak máawar tunaan asakáchunak Yúsan ti suu áiniawai.

<sup>12</sup> Antsu Jesukristuka jákatniunam chikichkí surumak ashí shuara tunaarj̄n asakár atakka penké jákashtiniaiti. Nuna tura Yusa untsuurinj̄ nekas akupin pujutainium pujusuiti.

<sup>13</sup> Tura Yus ni nemasr̄jn̄ nupetak nin umirkarti tusa súsartatna nuna nákwai.

<sup>14</sup> Chikichkí jakamujai ni shuarj̄n tuke tunaar-incha awajsaruiti.

<sup>15</sup> Yusa Wakan̄isha núnisan̄ tawai. Emka tímiayi:

<sup>16</sup> “Yamaram Chichaman najanattaj̄ nuka j̄únisan̄ átatui: Wi akupeaj̄ nuna ni enentájn̄ paant enentáimtikrartatjai.”

<sup>17</sup> Nuyásha tawai: “Ni yajauch tunáa túramurj̄n penké enentáimtuschatatjai.”

<sup>18</sup> Tuma asamtai, ii tunaarj̄ tsan̄kuramu asamtai atak in jarutramkatin atsumatsji.

### *Yus tuke shiir enentáimtusar Yusaj̄ jeartai*

<sup>19</sup> Tuma asamtai, yatsurú, Jesukristu numpejaī pénker awajsamu asar sapijmiatsuk shiir enentáij̄jaī Imiá Shiira nūj̄, nekas Yus pujamunam wayamniaitji.

<sup>20</sup> Nūj̄ wayatniuka Kristu jaka Yusa J̄eñ tesaamun j̄usatniua áintsan ánturmamiaji. Yamaisha tura tuke wayamnia átatui.

<sup>21</sup> Jesus Yúsnan pujurniu uuntr̄j̄ asa ashí Yus-shuartin wáitmak pujurtamji.

<sup>22</sup> Tuma asamtai, tuke enentáij̄jaī Yus imiá nekas enentáimtusar Yusaj̄ jeartai. Ii enentá̄j̄ Kristu numpejaī ni j̄iarma asamtai nekas enentáimtakur ii tunaarj̄jaī itit enentáimtumashchatniuitji. Tura ii ayash̄isha pénker entsajaī imianniuitji.

<sup>23</sup> Yus tsan̄katramkattajnia nu shiir enentáimtamú iniaitsuk kakaram ajasar tuke emetatniuitji. Yus tsan̄katramkaitji nuna umiktatui.

<sup>24</sup> Pénker anenain tura pénker túrin ajasartai tusar mai yainiaikiartiniaitji.

<sup>25</sup> Yusa J̄eñ Yus-shuarj̄jaī tuke iruntrat̄in iniaisashhtiniaitji. Chikich iniaini-akuisha iikia tuke iruntrat̄niuitji. Nūj̄ irunkurkia ikiakánaairtiniaitji. Tura Kristu tátin tsawantr̄j̄ ishichik ajasu asamtai nú nukap túratniuitji.

*Aneara. Ti tsúumainti iwiaaku Yusa kakarmarij̄jaī asutniátin.*

<sup>26</sup> Túrasha shuar nekas chichaman nékayat wakeramurijjain tunaanum wekaakka Kristu jakamun nakitia asamtai chíkich atsawai ni tunaarín asakátratniun.

<sup>27</sup> Áyatik ashamak ti tsumai sumamatin tsawantan nákasminiaiti. Nu tsawantai Yus ni nemasrín ti kajerak asutiák mash emesrattawai.

<sup>28</sup> Shuar Muisais akupkamun umikchamtai tura jímiar shuar menain-tiusha etserkarmatai waitnentsuk máatniuyayi.

<sup>29</sup> Núnisaitkiuñkia shuar Yusa Uchirín wishikiainiakka ni numpencha nakitiainiakka tura Yus nin anea nuna Wakaníncha katsekainiakka nuna nankaamas asutniáchartatuak. Warí, nii nakitiana nu numpajai Yamaram Chicham nekas umirkatin awajsamuyayi. Tura nújajisha nii ti péñker awa-nastiniuyayi.

<sup>30</sup> Ii Uuntrj Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wíi shuara tunaarín ti paant nekarattajai.”

<sup>31</sup> Ti tsúumainti iwiaaku Yusa kakarmarjijai asutniátin.

<sup>32</sup> Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itirchat katsuntramarme.

<sup>33</sup> Chíkichtirmeka katseknarmarme tura ashí íimiainiamunam yajauch awaj-nasmarme. Chíkichcha nu shuarnum pachitkia asarum itit awajnasmararme.

<sup>34</sup> Atumsha sepunam pujuinia nusha waitnentrarmarme. Tura shiir waras-rum kuítrumin atantramainiakuiusha katsuntramarme. Nayaimpiniam tuke amuukashtin kuit pachiktin asarum túramarme.

<sup>35</sup> Tuma asarum yawetsuk Yus tuke enentáimtusrum kakaram ajastarum. Túrakrum nankaamas akinkíattarme.

<sup>36</sup> Atumsha esetra enentáimsarum Yus wakera nu túrakrum Yus atumin amastinia nu wainkiattarme.

<sup>37</sup> Kame Yus-Chichamnum áarmaiti:  
“Tátinia nu ishichik ajasai. Wárik tátatui.

<sup>38</sup> Shuar Yúsan nekas enentáimtak péñker wekaak uwemprattawai. Tura iniaiyakuñkia nin wararsashtajai.”

<sup>39</sup> Tura iikia iniaisar mesena nú shuarchaitji. Antsu Yus shiir enentáimtusar uwempraitji.

## 11

### *Yus nekas enentáimtustin*

<sup>1</sup> Yus nekas enentáimtakur “nákajnia nuna, Yus nekas suramsattaji” taji. Tura wáinchaitiatar “nekas wainkiattaji” taji.

<sup>2</sup> Yaunchu ii uuntrj Yúsan nekas enentáimtuiniakui Yus “péñkeraitme” tiarmiayi.

<sup>3</sup> Aya Yus enentáimtakur ju nékaji: Yus aya ni chichamejain ashí nunkan najanamiayi. Túramtai ashí wáiniainiaj nu wáinchataijjai najanamu áiniawai.

<sup>4</sup> Apir Yúsan nekas enentáimtak Kaínjai nankaamas péñkera nuna Yúsan susamiayi. Túramtai Yus “péñkeraitme” taku shiir yumínsamiayi. Tuma asamtai Apir jákaitiat tuke enentáimtikramji.

<sup>5</sup> Eruksha Yúsan nekas enentáimtak iwiaakuk nayaimpiniam junakmiayi. Yus jukimiu asamtai wáinkiacharmiayi. Tura Yus-Chichamnum aarma “Eruk júnutsuk Yúsan ti shiir enentáimtikniuyayi!” tawai.

<sup>6</sup> Tura Yus nekas enentáimtachkumka žitiurak Nii shiir enentáimtiksatam? Nekas enentáimjai Yúsan weantuktaj tusam wakerakmeka, emka, Yus

iwiaaku pujawai, tu enentáimpratinuitme. Nuyásha, Wi Yúsan eakuinkia Yuska winia yáintkiattawai, tu enentáimsatnuiutme.

7 Yus, ‘amaarkatniun akupkattajai’ tiniu asamtai, Nuaisha Yúsan nekas enentáimtak, amaarun wáinchaitiat, “túrunattawai” tímiayi. Túrak Yus timiajají métek uunt kanun najana ni shuarincha uwemtikramiayi. Tura Yúsan nekas enentáimta asamtai Yus “penkeraitme” tímiayi. Tura ni umirkamujají chíkich shuar Yúsan enentáimtachun súmamtikiawarmiayi.

8 Tura Apraámsha Yúsan nekas enentáimtak Yus “núnkem ikiukim wetá” tutai shiir umikmiayi. Yus tuke nin súsatniua nú nunkanam wémiayi. Turasha ni nunken ikiuak ni jeatniun nékatsuk jiinkimiayi.

9 Yúsan shiir enentáimtak nú nunkanam Yus nin tsankatkamuitiat írara áinis pujusmiayi. Nuap jeanam pujuyayi. Núnisan ni uchirin Isaksha tura ni tiranki Jakupsha nun tsankatkamuitiatan írara núnisar pujuarmiayi.

10 Kame Apraámka nayaimpinmaya ashirchamin péprunam pujustinian nákasmiayi. Yus nu pepru penker iwiar jeamka asamtai umuchkiachminiaiti.

11 Apraáma nuwé Sarasha Yúsan shiir enentáimta asa úuntach áyat ajaprukiayi. Yus timia nuna umiktatui tau asa uchin takusmiayi.

12 Tura nujají Apraám ti úuntchitiat ti pampanmiayi. Nii chikichkitiat ni pampanmarj ti untsurí ajasar yaajají métek tura náikmijají métek nekapmar-chamnia ajasarmiayi.

13 Ashí nu shuar Yus tsankatkamun wáintsuk jákarmiayi. Túrasha Yúsan nekas enentáimtuiniak arantá wáinkiar warasar shiir enentáimtiarmiayi. Túrawar “ju nunkanam nekas aya íraraitji” tiarmiayi.

14 ‘Íraraitji’ tu chichainiak chíkich nunka eamun páant awajainiawai.

15 Niisha matsatu winíarmia nun atak waketkitniun wakeruiniakka páchitsuk waketkíarayayi.

16 Tura antsu niisha nuna nankaamas penker nunkan nayaimpinmaya nuna enentáimtiarmiayi. Túmainiakui Yuska péprun iwiartur susa asa “wi ni Yusrintjai” títinian natsantsatsui.

17 Ataksha Apraám Yúsan nekas enentáimtak “chikichik uchi amasmaj nu, namankea áitkiasmek maam surusta” takui Apraám Isakan ni uchirin Yus susatniun penké suritkiachmiayi.

18 Kame Yus “Isakjají ti pampanatme” tau asamtai

19 Apraám “máamtaisha Yus iniantkittiwai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsan wáinkiamiayi.

20 Isaksha Yúsan nekas enentáimtak ni uchirin Jakupnasha Esauncha ukunam ni túrunattana nuna ujakarmiayi.

21 Núnisan Jakup Yúsan nekas enentáimtak jatsuk ni tirankin, Jusé uchirin, shiir túrunattana nuna ujakarmiayi. Tura ti uuntach asa máshtunkrin ushukruma Yúsan shiir awajsamiai.

22 Tura Jusesha jákatniurj ishichik ajatesmatai Yúsan nekas enentáimtak Yus ukunam Israer-shuaran Ejiptu nunkanmaya júkiartatna nuna ujakarmiayi. Tura jíiniainiak ni ukunchin júkiar Yus tsankatkamu nunkanam iwíarsarat tusa akupkamiayi.

23 Muisaisa aparísha nukurísha Yúsan nekas enentáimtuiniak Muisais ti shíirmach asamtai suntar máawarin tusa akiiniamunmaya menaintiu nantu úukarmiayi. Tura uunt akupin akupkamun ashamkacharmiayi.

24 Muisaissha Yúsan shiir enentáimtak uunt ajas Ejiptunmaya uunt akupniu nawantrí uchirí ajastinian nakitramiayi.

25 Antsu Ejiptu nunkanam ishichkisha tunaan warartsuk Yusa shuaríjjai métek wáitsatniun nankaamas wakerukmiayi.

26 Nujai Krístun yajauch awajsarmia núnisan niisha wáitsatniuyu. Túrasha ashí Ejiptu nunkanam péñker irunmia nuna nankaamas Yus nin ukunam tsan̄katkatta nuna shiir enentáimtusmiayi.

27 Niisha Yúsan shiir enentáimtak uunt akupin kajeramu ajin ashamsuk Ejiptu nunkanmaya jinki wémiayi. Yúsan wáinchiat shiir enentáimtamujai wainuia áinis kakaram ajas ashí katsuntramiayi.

28 Muisais Yúsan shiir enentáimtak yámankamtaik paskua namperan naneak ashí Israer-shuaran numpajai ni wáitirin kuérat tusa akupkarmiayi. Nujai Yus timia núnisan nayaimpinmaya suntar nuna iis nu jeanam iwiairin máatsuk nan̄kaikit tusa tímiayi.

29 Israer-shuarsha Yúsan shiir enentáimtuinia ásar Kapaantin Entsa nakaakamtai ajapén ti penker kukarnum katinkiarimiayi. Ejiptunmaya suntarsha núnisan katintai tukamá jakerarmiayi.

30 Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai aa tanish sánákmiayi. Nujai ti yúpichuch nupetkarmiayi.

31 Raapsha nu péprunam pujak, Yúsan nekas enentáimtak tsanirmatai ayat Israera suntarin mamikmak wekaan ti penker itiaa asa chikich shuar Jerikiúnam matsatua nujai jákachmiayi.

32 Nu arantcha Yúsan shiir enentáimtin ti írunui. Jeteúnsha, Paraksha, San̄sunsha, Jiptísha, Tawitcha, Samuersha, Yúsnan etserniusha nu shuar árimiayi. Mash ujaktinian jetsjai.

33 Niisha ashí Yúsan nekas enentáimtuinia ásar Yusa kakarmarin niisháa niisháa iniaktusarmiayi. Nuna túruiniak chikich chikich nunkanmaya aentsun nupetkarmiayi, nuísha péñker akupkarmiayi, tura Yussha ni timia núnisan yan̄kiarmiayi. Uunt yawancha kajéchu awajsarmiayi,

34 uunt jiniasha ikiajniakarmiayi, puniajai mantamnatniuncha uwemprarmiayi. Kakarmachusha kakaram ajasar mesetnumsha ni nemasrincha nupetkarmiayi.

35 Nuwasha ni uchirí jakan iniantkimiun wáinkiarimiayi.

Chikichcha wáitias mantamnewarmiayi. Ti shiir pujustinnium nantaktiai tusar nú tsawantai uwempratniun nakitrarmiayi.

36 Chikichcha katseknakarmiayi, asutniáwarmiayi, jirujai jin̄kiawar sepunam en̄kenawarmiayi.

37 Kayajai tukú mantamnewarmiayi, jímiapetek tsupinkiarimiayi, Yúsan iniaisarar tusa nekapsarmiayi, puniajai mantamnewarmiayi. Aya wékainiarimiayi, kuítrinchá ásar nuapen entsararmiayi, shuar nincha áintrar wáitnenmai awajiarimiayi.

38 Atsamunmasha, naincha, waanmasha, ashí nunkanam wekain árimiayi. Nu shuarjainkia ju nunkanmaya shuar imia yajauch ásar niíjjai pujumainchu ániawai.

39 Nu shuar Yúsan shiir enentáimtuiniakui Yus “péñkeraitrume” tiarmiayi. Túmaitiat ni tsan̄katkamun wáinkiacharmiai.

<sup>40</sup> Yuska nuna nan̄kaamas p̄nkeran iwiarturaru asa tura in yamá pu-jajnia juna enentáimturma asa niisha iisha mai metek tsan̄inkiar ti p̄nker ajasarti tu enentáimsamiayi.

## 12

### *Jesus tuke enentáimtusar tsékentiai*

<sup>1</sup> Ashí ju nun̄kanam túrajnia nuka shuar nakuruiniak tsékena nujai nakumkamniaiti. Ashí shuar yaunchu Yúsan shiir enentáimtusaruka téntakar írmainiaji. Tuma asamtai ashí kijin ana nusha tura ashí tunaaka itit awajta-maj nusha ajapa iniaisar tura katsuntrar tsékn̄kir jeatai.

<sup>2</sup> Túmakur Jesus tuke enentáimtusar tsékentiai. Ashí shuarjai nan̄kaamas Jesus Yúsan ti nekas enentáimtak aya p̄n̄kernak túramiayi. Tuke nekas awak-makmiayi. Imiá tunáa shuáran krusnum máatin ājn̄ núnisan̄ natsanmainium jákatniun surimiakchamiayi. Antsu ukunam ti shiir warastin átatna nuna enentáimtak nuna ashí katsuntramiayi tura nuyá Yusa untsuurinj̄ akupin pujutainium pujusuiti.

<sup>3</sup> Tunáa shuar Jesusan wáitkiasarmia nu enentáimpratarum. Túrarum pimpit-suk katsuntratarum.

<sup>4</sup> Atum tunaajai máaniakrum Jesus túramia áintsarum numpemsha puárchaitrume tura jákachuitrume. Nujsa katsuntrarum jeatniuitrume.

<sup>5-6</sup> Yus nekas ni uchir̄n̄ chicharkatniua áinis túramprum nu kajinmatkich-mashuram. Júnis tawai:

“Uchirú, wi jintinramajmena nu kajinmatkip. Asutiámkuisha kúntuts puju-saip. Kame Uuntka Nii aneana nuna jintintiawai. Tura ni uchir̄j̄ ajasat tusa achána nuna asutiawai.”

<sup>7</sup> Tuma asamtai Yus ni uchir̄ja áinis asutiámkuisha katsuntratarum. Warí, ashí apa ni uchir̄n̄ chicharkashtatuak.

<sup>8</sup> Tura ashí uchin chicharkatniua núnis Yus atumin chichartam-chakrumn̄nkia nekas ni uchir̄n̄chuitrume. Antsu chikichnaitrume.

<sup>9</sup> Nu arantcha ii apar̄j̄ uchich árinīn̄ chichartamkurin umirniuyaji. Nu arant nuikia nekas ii Apar̄j̄ nayaimpiniam pujana nu shiir umirkar tuke shiir pujustin wakerishtatjik.

<sup>10</sup> Ii apar̄j̄ ishichik ni enentáijjai wakeramu chichartamniuyaji. Antsu Yuska ti p̄nker awajtamsataj tusa nekas atsumajnia nujai métek chichartamji.

<sup>11</sup> Kame nekasaiti, ashí asutiámu yamaikikia waraschamniaiti, antsu kúntuts enentáimtikramji. Túrasha ukunam nu asutiámujai unuimijai nuka p̄nker túratniun tura shiir pujustinian yáinmaji.

### *Anearta. Yus tana nu nekas antuktiniaiti.*

<sup>12</sup> Nujai pimpirarusha tura kakarmachu ainia nusha ikiakáratarum.

<sup>13</sup> Túrarum p̄nker esettsa enentáimsarum wekasatarum. Túrarum tujintin-ainia nusha shiir wekasatin yañtarum.

<sup>14</sup> Ashí p̄nker túrakrum ashí shuarjai nawamnaikiarum p̄nker wekasatarum. Tunaan túrinkia Yusaj̄ pen̄ké jeashtatui.

<sup>15</sup> Aneartarum. Shuar nakitiakuñkia Yus nu shuáran shiir yáin̄tinian tujinkiattawai. Nu shuar yajauch enentáimiuk chikich shuárnasha itit awajas tunaanum útsukartatui.

<sup>16</sup> Tsanirmawairap.

Yusna nusha nakitrairap. Isaka uchir̄j̄ Esau p̄nkerana nuna nakitramiayi. Yus “iwiair̄n̄ núkap súsatniuiti” timia nuna enentáimtuschamiayi. Tura asa aya ishichik yurumkajai yapajíamiayi.

<sup>17</sup> Tura nuyá ni aparí ukunam túrunattana nuna takui Esau ti penkeran wakerimiayi. Tura ti úutkuisha ni aparí nin nakitramiayi tura ni chichasman yapajátniun tujinkiamiayi.

<sup>18</sup> Atumjainkia Yusna enentáimtusminia nuka yaunchu Israer-shuarjai ashammai amia núnischaiti. Yáunchuka Yus ni akupkamurín Israer-shuaran súaku Senai muranam jeeáirmiayi. Muranam uunt jisha kiritniusha teesha nasesha ajamiayi.

<sup>19</sup> Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi.

<sup>20</sup> Kame Yus chichaak “Shuarsha tan̄kusha ishichkisha nú muranam najarmatai nuka kayajai tukurar tura nan̄kijjajisha máatniuiti” tímiayi. Nu akupkata ti ashamai asantai “chichaschati” tiarmiayi.

<sup>21</sup> Wáinkiarma nu ti tsumai asantai imia Muisaissha “Ashamakun kuraajai” tímiayi.

<sup>22</sup> Antsu atumjainkia Yusna enentáimtustin nujai nan̄kaamas péñkeraiti. Átumka nayaimpinmayā Seun̄ náinnium, Jerusaréñ iwiaaku Yus pujutai péprun nakumeana nū jeeáitrumé. Nūisha ti untsurí nayaimpinmayā sun̄tarsha

<sup>23</sup> ashí Yus-shuarsha shiir irunraru áiniawai. Yus-shuarsha ashí nayaimpiniam ni naari anujtukma ásar ni uchirí áiniawai. Nūisha Yus, ashí shuaran ti nékana nu, pujawai. Niisha shuáran ti penker awajsantai nu shuar jákar ni wakan̄ nū shiir pujuiniawai.

<sup>24</sup> Nūisha Yamaram Chichaman in takartamajnia nu, Jesus, pujawai. Nuna numpé ukatramujai ashí shiir awajsaiti. Nu numpasha Apira numpejai nan̄kaamas péñkeraiti. Kame Apir ántar máamu asantai yapajmiatrukta titinia áintsan̄ enentáimtaji. Antsu Jesus tunáa shuáran péñker awajsartaj tusa jakamiayi.

<sup>25</sup> Nuka ti penker asantai Yus chichartamprumna nu nekas anturkatniuitrumé. Yaunchu Yus jú nuñkanam murá chichaamun anturkachar asutniátniunam uwempracharmiayi. Nūikia Yus nayaimpinmayā chichartamkurin ántachkurkia ishichkisha uwemprashatji.

<sup>26</sup> Yaunchu Yus chichamejai nuñkan úurmantikiarmiayi. Tura yamaisha tawai “Ataksha aya núñkankechu antsu nayaimpinmasha úurmantikiattajai.”

<sup>27</sup> “Ataksha” tana nujai “ashí muchitrámnia nu amuukartatui” tawai. Tura muchitrachminia nu juakartatui.

<sup>28</sup> Yus in akupkatniun tsan̄katramaj nuka umuchnakchattawai. Tuma asantai Yus yumiñsatniuitji. Yus wakerana núnisrik wishiktsuk shiir enentáimtusar Yus shiir awajsatniuitji.

<sup>29</sup> Maa, ii Yúsriñkia kajerkan̄ka uunt jía nuke áesaa mash emesramniaiti.

## 13

### *Yus shiir enentáimtiksatin*

<sup>1</sup> Nuamtak yachja núnisrum tuke mai anenai ajatarum.

<sup>2</sup> Tuke írar shiir itiaatarum. Nuna túruiniak shuar nékachminiak nayaimpinmayā suntaran itiaawaruíti.

<sup>3</sup> Sepunama pujuinia nusha atumsha niijjai pujáa núnisrumek waitnen-trarta. Wáitkiasarma nusha wisha núnisnak wáitsamniapitjia tusarum waitnen-tratarum.

<sup>4</sup> Nuatnaikiatin péñkeraiti. Shuar ni nuwejaj tsaniñ pujustin péñkeraiti. Tura nuatkamu ainia nusha chikichan eakchatniuiti. Tsanirmana núnaka Yus asutiättawai.

<sup>5</sup> Aya kuítiak enentáimtusam pujusaip. Yuska “Kanakchattajai tura penké ikiukchattajme” túramui. Tuma asantai ame takakmena nujaj shiir enentáimsam “maakete” titiá.

<sup>6</sup> Tiniu asantai arantutsuk ju tíminiaitji: “Winia yainnia nuka Uunt Yúsaiti. Nu asantai shuar túrutannia nuna ashankashtatjai.”

<sup>7</sup> Atumin Yus-Chichaman jintintramawarmia nu enentáimtustarum. Yúsan shiir enentáimtuiniak péñker wekasarmia núnisrumek atumsha túratarum.

<sup>8</sup> Jesukristuka tuke yapajítsuk nuikiya núnisan yamaisha tura ukunmasha tuke núnisan átatui.

<sup>9</sup> Chíkich chicham niisháa írúnna nu anturkairap. Yus in anenma asakrin kakaram ajasartai. Shuar niisháa yurumkajaj enentáiruñ kakaram ajastaj táyat penké yáinçhaiti. Yurumeaj nujajinçu antsu Yusa anenkrattairijijaj ii enentáin kakaram ajasminiaitji.

<sup>10</sup> Yáunchu Yúsnan pujurin naman maar Yus susamunmayan yuu ármiayi. Tura iikia Yus-sutaj nusháa ana nu súaji. Nusha Kristu jakamu asantai yaunchua nu Yúsnan pujurin nuñ pachiinkiachmin áiniawai.

<sup>11</sup> Israer-shuarnumia Yúsnan pujurniu uuntri tunaan asakártaj tusa namanké numpen júkiar Imiá Shiir Tesaamunam wain ármiayi. Tura nu naman arant áesatniuyayi.

<sup>12</sup> Núnisan Jesussha péprunam arant wáitkianas mantamnamiayi. Nujaj ashí shuara tunaarñ ni numpejaj nijiatkaiti.

<sup>13</sup> Núnisrik iisha péprunmaya arant wétinia núnisrik Jesusaj weri Niiijaj métek wishikmain katsuntutai.

<sup>14</sup> Kame ju nuñkanam amuukachmin pepru atsawai. Antsu ukunam ti shiir pepru átatna nu nákaji.

<sup>15</sup> Tuma asar naman maar Yus sútsuk antsu shiir chicham súakur tuke Yus shiir yúminçkijai. Tuke núnisar túratai.

<sup>16</sup> Péñker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

<sup>17</sup> Yus-shuaran akupin ainia nu umirkarum shiir enentáimtikratarum. Ni takatrñ Yúsan ujaktin ásar atumí wakanñ shiir wainiainiawai. Niisha itirchatcha antsu wakerumainian túrawarat tusarum shiir yáinçtarum. Nu túrachkumka çitiurak yainmakarat?

<sup>18</sup> Incha Yus áujсарarum. Iisha ashí péñker túratin wakeraji. Túraji enentáimji.

<sup>19</sup> Tura Yus áujkuraм Yus ataksha atumjaj wainniaikiatniun wari tsañkatrukak tusarum seatritiarum.

### *Amúak shiir chichaawai*

<sup>20-21</sup> Imiatkinchanam apujkartinia nú Yus, Jesukristun jakamunmaya iniantkimia nuka, nu numpé kakarmarijijaj ashí péñker ana nuna suramsarti. Nujaj ni wakeramu túrattarme. Tura Jesukristu kakarmarijijaj ashí ni wakeramun in pujurtamas takasti. Ii Uuntri Jesukristu ashí Yus-shuaran ti penker Wáinniuiti. Tura ni numpejaj Yamaram Chichaman kakaram awajsamiayi. Nu Chichamsha tuke menkakashtatui. Aya Kristu tuke shiir awajnasti. Núnisan atí.

<sup>22</sup> Yatsurú, kakaram chicharkajrumna ju shiir enentáimjaj anturkatarum. Kame ti wárik áatrajume.



<sup>23</sup> Yamaikia ii yachi Timiutéu sepunmayā jiinki aṅkant ajasai. Nuna ujaajrume. Wárik támataiṅkia atumin íitiaj tusan winiakun niijiaj winittiajai.

<sup>24</sup> Atumí úuntriṣha tura ashí Yus-shuarsha amikmaatarum. Itiaria nunkanmayā shuarsha amikmatmainiawai.

<sup>25</sup> Ashí Yus ti shiir yainmakarti. Nuke atí.

## SÁNTIAK papin áarar akuptukma

### *Sántiak aarmiania nu*

<sup>1</sup> Wi Sántiak Uunt Yúsan tura núnisan ii Uuntrj Jesukristun umirin asan ju papin aajai. Ashí Yus-shuartermin ashí nunkanam tsakinmakarum matsatrumna nuna amikmaajrume.

### *Nekataĩnkia Yúsnumiĩiti*

<sup>2</sup> Yatsuru, ashí itiurchat wáinkiuřmesha tuke warastarum.

<sup>3</sup> Iis, itiurchatnum pujakrum nekas Yus enentáimtaitkiurmeka katsuntratin unuĩmiartatrum.

<sup>4</sup> Tura tuke páchiachkuram, tuke katsunteakrum, nuikia Yúsjaĩ ti penker katsuartatrum. Penké atsumashtatrum.

<sup>5</sup> Átum náńkamsarmek nekaatin tujintiakrumka Yusa nekatairj seata. Shuar seakuĩ Yuska kajetsuk tura ementutsuk antsu patatas súawai. Tuma asamtai seakminkia suramsattawai.

<sup>6</sup> Túřasha Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeka áńtram seame. Nayaantsa tsukaturj junĩ taa, atúu waketki ajatsuk. Amesha áintsamek túmame.

<sup>7</sup> Enentáimjĩn núnisketkuĩnkia, seamna nuna Yus penké suramsashtatui.

<sup>8</sup> Shuar jimiará enentáimna nuka shiir wekasatniun tujintiawai.

<sup>9</sup> Yus-shuar, ju nunkanam kuĩtríncha ainia nu, Yus shiir awajsamu nujaj warasti.

<sup>10-11</sup> Tura Yus-shuar kuĩtrinniuitkuisha péejchach enentáimtikramsha warasti. Iis, nupa kuńkam tura nantu ti sukuam kaar miniatsuk. Kuĩtrinniuka áńska áńtram seame. Nayaantsa tsukaturj junĩ taa, atúu waketki ajatsuk. Amesha áintsamek tánkete. Tuke súrutnak pujurkusha itiurchat wáiniuk wárik amuukattawai.

### *Ii itiurchatrj ana nu*

<sup>12</sup> Shíiraiti shuar ni itiurchatrjĩn nekas katsunteana nuka. Nekapsam jĩnkĩnka akinkiatniun wáinkiatťawai. Iwiaaku áńnian, tawasap achiktinia núnisan, wáinkiatťawai Yus ni aneam tsanťatka nuna.

<sup>13</sup> Shuar tunáa túramnia nekapeakka “Yus nuna útsutrutui” tu enentáimprashťiniaiti. Yuska yajauch túramnia enentáimtsui túřasha Niisha penké chikichkinkesha tunaanum útsuchuiti.

<sup>14</sup> Antsu ni wakeramurjjaĩn aents tunaan nińki ikiatmamkaiti yajauch túratniun. Nújaĩnkia tunaanum útsukmaiti.

<sup>15</sup> Nu yajauch wakeramunmayá tunáa akiĩniui. Tura nu tunáa mash amuukamtai jákatin akiĩniui.

<sup>16</sup> Yatsuru, aneakun tářarme, ananmamawairap.

<sup>17</sup> Ashí péńker ana nu, ashí shiir ana nusha nayaimpinmayá Yusak ama-suiti. Yus ashí tsáapńinia nuna najanaiti. Tura Niĩn kiritin atsain yapajĩtsuk tuke tsáapńiiti.

<sup>18</sup> Nii wakera asa ni nekas chichamea nujaj ni uchirj najatmamji. Tura ashí ukunam átatna nujaj ii émkaitji.

*Yus nekas shiir awajsatin*

<sup>19</sup> Tuma asamtai aneamu yatsuru, wárik chichastin enentáimprairap antsu antuktin emka enentáimprata. Núnisan̄ wárik kajekaip.

<sup>20</sup> Kajena nuka Yus péñker wakeramun túratsui.

<sup>21</sup> Nu asamtai, ashí péñkercha nu tura ashí yajauch írunna nusha iniaisata. Tura tuke enentáijjaj̄i Yus-Chicham ame enentáimin araamu anturkata. Tura nu Chicham kakarmaiti uwemtikrampratniun.

<sup>22</sup> Yus-Chicham umikta. Aya ántukaip. Aya ántakmeka amek ananmamattame.

<sup>23-24</sup> Shuar íspikia ímiak ni yapin wapikian wáiniak tura nuyá jáupmitsuk we, ni urukuít nuna wárik kajinmatkishtimpiash. Shuar Yus-Chicham umitsuk aya ántana nuka nujaj̄i méteketete.

<sup>25</sup> Yus tana nujaj̄i an̄kant ajasminiaiti. Shuar íspikia iimia áintsan̄ nekas Yus péñker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

<sup>26</sup> “Nekas Yúsan shiir umirjai” tana nu tura eseer chichaachkun̄ka imia nin̄ki ananmamui tura “Yúsan shiir umirjai” tana nuna ántar tawai.

<sup>27</sup> Nekas Yus Apa awajitsuk shiir umirkatin júiti: mitiaikiasha wajésha itiurchatnum pujuiniakuisha yáinḡtiniiaiti tura ju nun̄kanam ashí tunáa ana nujaj̄isha máatrashtiniiaiti.

## 2

### *Shuar antra akantrastin*

<sup>1</sup> Yatsuru, ii Uuntr̄i Jesukrístu ti shiir nan̄kaamantua nu enentaimtatirmeka shuar akantratin enentáimsairap. Shuara enentáim enentáimtsuk antsu aya páatke wáinmena nujaj̄i aents akantram niisháa enentáimturairap.

<sup>2</sup> Iis, iruntrumna nu shuar kuítrintin kurí aniyu aweera tura péñker iwiarmampra wayashtimpiash. Tura núnisan̄ chíkich kuítrincha aruta entsaru wayashtimpiash.

<sup>3</sup> Tura kuítrinnia nu “Péñkera jui pujusta” tíchatameash. Tura kuítrincha “Atu wajauta, túrachkumsha jui nun̄kan̄sha pujusta” tíchatameash.

<sup>4</sup> Nu tákumka yajauch enentáimpram jimiará enentáijjaj̄i aents enentáimtame.

<sup>5</sup> Aneamu yatsuru, antuktarum. Ju nun̄kanam kuítrincha ainia nuna Yus achikiuiti Ní shuar ajar Nin nekas enentaimtin ajasartinian. Tura ashí nayaimpiniam írunna nunasha Yus nin tsan̄katkattawai. Ashí shuar Yúsan aneena nuna anajmatra asa nin tsan̄katkattawai.

<sup>6</sup> Átum antsu kuítrincha natsant awajearme. Iista, kuítrinnia nuka timiá itiurchat awajtamainiatsuk. ¿Nuikia níchuk ainia achirmak kapitíannium japiki júramprumna nu?

<sup>7</sup> ¿Nín̄kichuk ainia Kristu naar̄i shiira nuna ántar pachikiar pen̄ké yajauch áujmataina nu? Tura átumka nuna naar̄i tuke shiir awajkurmin, ashí shuar “Kristu shuar̄i” túramainiawai.

<sup>8</sup> Yus-Chichamnum ju akupeamu nekas péñkeraiti:

“Ame ayashim aneamna núnismek ame írutramuram aneeta.”

Nu nekas umirniuitkiurmeka maak.

<sup>9</sup> Nú enentaijjaj̄i kuítrinnijjaj̄i chichasminiaiti. Tura nuyá kuítrinchojjaj̄i shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamurjjaj̄i amek sumamame.

<sup>10</sup> Chíkich akupkamu írúnna nu ashí umikiam tura aya chikichik akupkamu umikchamka nuikia ashí akupkamu umircha ajasume.

<sup>11</sup> Iis, Niṅki Yúsak chichaak tíchamka “tsanirmawaip.” Tura chikich-nasha “maṅkartuawaip” tímiayi. Nu asantai, shuar tsanirmatsuk túrasha maṅkartakka ni wakeramun umirtsui.

<sup>12</sup> Kristu anṅkant awajtamsantai ii yamá ni akupeamuri yúpichuch umirkamniaitji. Nu asantai nu akupkamujai métek wekaurniṅkia Yus “péṅker túraitme” turamtatji. Tura umikchakriṅkia “péṅker umikchaitme” turamtatji. Tura nu enentáimsar péṅker chichasar takasar wekasatniuitji.

<sup>13</sup> Chikichan waitnentachkuṅka waitnennatsuk asutniáttawai. Tura waitnenṅkratniuitkiurniṅkia tsawant jeamtai Yus in waitnentramprattaji.

### *Yus enentáimtustin tura umirkatniusha*

<sup>14</sup> Yatsuru, shuar “Yusan shiir enentáimtajai” táyat tura péṅker túrachkuṅkia péṅkerashit. Nujai uwemprattawak.

<sup>15</sup> Wátskea, Yus-shuar, áishmaṅsha nuwasha, entsátáirin tura yurumṅen atsumashtúpiash.

<sup>16</sup> Tura ame nékayatmek ayashj atsumana nu sútsuk tíchatapash “Péṅker wetá, entsatai entsaram túram péṅker yurumáta.” ¿Nu sútsuk tákum péṅkerkait?

<sup>17</sup> Núnisan takatsuk Yus enentáimtustin ántrai.

<sup>18</sup> Tura shuar tíchanpiash, “Chíkich takaawai tura chikichcha Yúsan shiir enentáimtawai. Mai péṅkerchakait” tichanpiash. Wats, ame Yus enentáimtamun takatsuk paant inaktusminiashitiam. Tura wi antsu péṅker takatrujai Yus enentáimtamun paant inaktustatjai.

<sup>19</sup> Nekas Yus chikichkiiti tu enentáimtame. Nuka péṅker túrame. Túrasha iwianchcha nunasha nékainiawai. Tura umircha ásar ashamainiawai.

<sup>20</sup> Netse enentáimpraip. Ashí Yus wakera nu takaachkumka, Yus enentáimtustin ántrai. ¿Nu nekaatin wakeramek? Iista.

<sup>21</sup> Apraáman Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Péṅkeraitme” tímiayi Apraáman.

<sup>22</sup> Páantchakait. Apraám Yusa shiir enentáimtak umirkamiayi. Umirt-suk Yúsan enentáimtakka nuikia ántar enentáimtiaayi. Tura umirak Yus enentáimtamun umikmiayi.

<sup>23</sup> Nujai Yus-Chicham aarma nu uminkiamiayi. Juuti:

Apraám Yúsan shiir enentáimtusmiayi tura Yus chicharuk tímiayi “Máakete. Nújainkia tuke péṅker túraitme Wijiai” tímiayi. Apraámsha nekas “Yusa Amikrj” tu náamkamiayi.

<sup>24</sup> Páantchakait. Shuar aya Yúsan shiir enentáimtamujainchuk tura péṅker takasmajajsha Yus nin shiir enentáimtawai.

<sup>25</sup> Núnisan Raap tsanirmatajyayi. Túmaitiat Israeran suntarin mamik-mauta tusar akupkamun ni jeen itiaawar tura úṅkar chíkich jintianam akupak uwemtikrarmiayi. Nuna túramtai Yus “péṅkeraitme” tímiayi nincha.

<sup>26</sup> Ayash wakantichuka jákachukait. Núnisan Yus enentáimtustin tura ni wakeramu takaachkurkia, jaka ántsan ántrai.

## 3

<sup>1</sup> Atum untsurí jintin<sub>ki</sub>artin ajastin wakerukairap. Yus in, jintin<sub>ki</sub>artin ájinia núnaka, nan<sub>ka</sub>amas neka asar, awajiakrin nan<sub>ka</sub>amas Yus asu-tiámattaji.

<sup>2</sup> Iis, ashí mash ti awajiatsjik. Tura shuar chichaak, aya pé<sub>n</sub>kernak chichaakka, nu shuar tuke eseer enentáimniuiti. Tura ayashí<sub>u</sub>sha tuke pé<sub>n</sub>ker ana nuna túriniaiti.

<sup>3</sup> Kawaisha enentáimpratai. Jiru wenuchiniam ikiursam ni ayashí ashí ayantaatsuk.

<sup>4</sup> Kanusha ti úntaitiat tura kakaram wéayat ishitiapach wiantaijia<sub>i</sub> shuar wakera nu<sub>u</sub> ayantarminiaiti.

<sup>5</sup> Núniskete ii inia<sub>i</sub>. Timiá ishitiapchitiat awakmaktinia tímianu chichaatsuk. Ji ishichik kapa<sub>aj</sub> ashí numi tsaruaku ekeemakchamniakait.

<sup>6</sup> Ii inia<sub>i</sub>sha jija<sub>i</sub> méteketete. Ashí tunáa piáku<sub>i</sub>ti. Tura ii ayashí<sub>u</sub>n tunáa túratniun útsutmaji. Tú<sub>n</sub>kuruanmaya<sub>u</sub> jija<sub>i</sub> ikiapármaiti tura ashí ii wekajnia nu<sub>u</sub> émesewai.

<sup>7</sup> Shuar ashí yajasman nawamkamin áiniawai. Ashí kajen írunna nunasha, nanamtincha, napincha, tura entsayan<sub>cha</sub> ashí nawamkaru<sub>i</sub>ti.

<sup>8</sup> Tura iniaikia pen<sub>ké</sub> nawamkachminiaiti. Ti yajauch asa pen<sub>ké</sub> nu-petkachminiaiti. Iniaikia ti taráa tseasaiti.

<sup>9</sup> Nu iniaijia<sub>i</sub> Yus Apa shiir awajeaji tura nu iniaijia<sub>i</sub>n aentsti yajauch chichárnaiyaji. Áentsun Yus Niijia<sub>i</sub> métek-taku najanamaitiatar yajauch chicharna<sub>i</sub>yaji.

<sup>10</sup> Nu iniaijia<sub>i</sub>n pé<sub>n</sub>kersha tura yajauchisha chichaaji. Yatsuru, nuka pen<sub>ké</sub> atsutniuíti.

<sup>11</sup> ¿Púkununmaya<sub>u</sub> entsa sáawijia<sub>i</sub> kusuku jíinkimniakait?

<sup>12</sup> Yatsuru, ¿Kushin<sub>ki</sub>ap shuinin nereawak. Munchisha kushin<sub>ki</sub>apen nerektatuak? Núnisan<sub>u</sub> púkununmaya<sub>u</sub> entsa sáawijia<sub>i</sub> kusuku jíinkichminiaiti. Ii iniaijia<sub>i</sub> núnisan<sub>u</sub> aya pé<sub>n</sub>kera nu chichastiniaiti.

### *Yusa nekatairi*

<sup>13</sup> Shuar ti neka enentái takakna nu, pé<sub>n</sub>ker túrattawai. Nekas nékaitkiun<sub>ka</sub> péjchachia núnis tuke pé<sub>n</sub>ker ana nuna túrattawai.

<sup>14</sup> Antsu atumí enentáijia<sub>i</sub> pen<sub>ké</sub> yajauch enentáimtunairum tura atumek pé<sub>n</sub>ker pujustin enentáimtumarum, nékaitiatam pé<sub>n</sub>ker túrachiatam “pénkeraitjai” tiip. Nuka wáitrame. Nekaska núchaiti.

<sup>15</sup> Nú enentaikia Yúsai<sub>y</sub>anchuiti. Antsu ju nun<sub>kan</sub>may<sub>ai</sub>ti, shuara enentáiy<sub>ai</sub>ti, núnisan<sub>u</sub> iwianchnumi<sub>ai</sub>ti nú enentaikia.

<sup>16</sup> Shuarsha yajauch enentáimtunairar tura nin<sub>ki</sub> enentáimtumainiakui, nu<sub>jai</sub> ashí meseawai tura ashí yajauch ti awai.

<sup>17</sup> Antsu Yusai<sub>y</sub> enentái takakua nu júnisaiti: ashí nan<sub>ka</sub>amas emka eseeratin, nuyá nawamkartin, shiir ajá, pé<sub>n</sub>ker anturnain, waitne<sub>n</sub>kratin, ashí pé<sub>n</sub>ker takáa tura ana<sub>nts</sub>uk naka chichamtin.

<sup>18</sup> Eseera enentáimsatniusha shiir takawai ashí shuar pé<sub>n</sub>ker ana nuna túrawarti tusa.

## 4

### *Ju nun<sub>kan</sub>am írunna nu aneashtin*

<sup>1</sup> ¿Urukamtaituk tuke kajernaikiarum ti máanaisrum pujarum. Mesetnumsha urukamtai wéarum? Júnisaiti: Atumin yajauch enentái katsuntra-chmin útsutmakrumin tuke máaniarme.

<sup>2</sup> Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam. Chíkich takakna nujaj itit enentáimtuniarme tura atajin tujinkiam máanaitrume. Wakerarmena nusha Yus seachu asarum wáintsurme.

<sup>3</sup> Tura seakrumsha yajauch searme. Atumí péñkerijaj warastin enentáimiu asarum searmena nusha wáintsurme.

<sup>4</sup> Jú nunñanmayá wakerakum Yusa nemasrijaj tsanirma áintsan̄ketrume. Nékatrumek atumsha. Ju nunñanmayan wakerakrikia Yusa nemasr̄ntji. Shuar ju nunñanmayan wakerakka Yusa nemasr̄j ajawai.

<sup>5</sup> Yus-Chicham juna tawai:

Yus ni Wakanj̄ ii enentáin apujturmasuitji. Nu Wakan in anenma asa ti akasmatramaji, táwai.

Tura nuna ¿ántran̄keash ta?

<sup>6</sup> Tura anenma asa ti yáinmaji. Tuma asamtai Yus-Chicham tawai:

Kajemtinian Yus íistatui tura péjchachin Yus nin aneak ti shiir yáin̄tatui, tawai.

<sup>7</sup> Yusaj̄ ikiumastarum, tura íwianch taritratarum. Túrakrumin íwianch ikiur-maktiatui.

<sup>8</sup> Yúsaini weamkata tura Nii atumin wearmaktatrum. Tunáa shuartiram Kristu numpejaj nijiamartarum. Tura átum, Yussha tura ju nunñanmayasha mai métek wakerarmena nu, atumí enentáj naka eseratarum.

<sup>9</sup> Atumí tunaari enentáimsarum kúntuts enentáimpratarum. Nu kúntutsjaj ti úttiarum. Nuik shiir enentáimprarum wishikmiarumna nuka iniaisarum kúntuts enentáimprarum úttiarum.

<sup>10</sup> Yusjaj̄ péjchach ajasta, túrakmin shiir awajtamsattawai.

### *“Yajauchiitme” tunaichatin*

<sup>11</sup> Yatsuru, yajauch áujmatnaisairap. Yus-shuar ni yachin yajauch áujmatas tura yachj̄ tunaari tuke áujmatuk Yus “aneniatarum” tana nuna umichuiti. Antsu umichu asa “nu akupkamu ántrai, umirkashiniaiti” tawai nu shuar. Nujaj̄ nu shuar umirtsuk Yus akupkamu nan̄kaamas enentáimtumawai.

<sup>12</sup> Yus Niñki akupkamu najana asa Niñki nu akupkamu umirkamun nekas nekaamniaiti tunaashit tusa. Niñkiti uwemtikratniun tura emesratniunam akupkatin jea nu. Amesha yáitiam chikicha tunaari íistincha.

### *Kashin átatna nuna Yusak nékawai*

<sup>13</sup> Watsek, átum áujmateakrum “Arumsha kashincha nu péprunam weri nu chikichik uwí takasar kuit achiktatji” tíchattarpash.

<sup>14</sup> Ishichkisha pen̄ké nékatrum kashin átatna nu. Ju nunñanam ii iwiaakmarj̄ wárik amúatsuk. Yuran̄kim utsanar tura nantu sukuam mash wárik men̄kaatsuk. Núnisketji.

<sup>15</sup> Antsu júnis t́miniaitrum: “Yus wakerakuñkia iwiaaku pujakrikia nusha túrattaji” titiarum.

<sup>16</sup> Túrachkurmeka átumka Yusjaj̄ nan̄kaamantu enentáimprume. Tura ashí nu enentáikia yajauchiiti.

<sup>17</sup> Shuar péñker túratniun nékayat, túrachkuñkia, nuka tunaiti.

## 5

### *Kuítrintin enentáimpratniua nu*

<sup>1</sup> Kuítrinniutiram ju antuktarum. Ti úttiarum. Ti wáitsatin asarum ti kakantra úttiarum.

<sup>2</sup> Kuítrum mash mamukarai tura iwiarmampramurmesha mash tin\_kishap yúkayi.

<sup>3</sup> Kurirmesha tura kuítrumsha ashí ijiakmamkarai. Ijiakmampramurisha ame pé\_nkercha túram nuna paant iniakmawai. Tura jinium áesamua áintsan ame kuítrum yajauch awajtamsattawai ayashmíin. Amuukatin tsawant jeamunam anearchamame entsu ame kuítrum ikiaun\_kamame.

<sup>4</sup> Ame takat iniararam ementushim akirarmamna nu “akirkati” tura-mainiawai. Anearta. Yakiyá Yus, nayaimpinmaya suntara uuntri, nu takartamni chichamen antukai.

<sup>5</sup> Ashí ju nun\_kanam írunna nu wararsaruítrume. Tuma asarum kapun\_ka nuke machararme tura yamaikia máatin tsawant jeayi.

<sup>6</sup> “Nu shuar tunaiti” tíirum tunaachu tsanumprurum máamarme, tura nin\_kia surimiakcharmai.

### *Yawetsuk takastin tura Yus áujsatin*

<sup>7</sup> Nu asamtaí, yatsuru, nu páchitsuk ii Uuntri Kristu tatin nákastarum. Arak-mausha ni arakri pé\_nker tsapaiti tusa yumi yutuktinian shiir enentaijiaí nákatsuk. Yútasua umirmatai esatrurmatai júuktatjai tusa nákatsuk. Tura júurmaksha ti waraatsuk.

<sup>8</sup> Núnisañ atumsha katsuntsatarum tura yawe\_kiirap. Kristu tatin yun-tumtemayi.

<sup>9</sup> Yatsuru, nuám\_tak “ju yajauch túrutui” tunainirap. Tákurminkia Yus írmastatrume. Nín\_kichukait nuna ístin tura anearta nu Yúsak tíjiuch wajatra-mui.

<sup>10</sup> Yatsuru, yaunchu Yúsnan etserin enentáimpratarum. Tuke ii Uuntri Yus timia nuna shiir etserkarmiyai. Túmaitiat wáitsarmiyai túrasha pachischarm-iyai. Núnisrumek enentáimsatarum.

<sup>11</sup> Itiurchatan katsuntainia nuka nekas shíiraiti, tu enentáimji. Shuar itiur-chatan ti katsuntin ámiyai, ni naari Jup. Tura ni itiurchatari nan\_kaasmatai Yus ti núkap kuítrin susamiyai. Nu nékatsrumek. Ii Uuntri Yus ti wait-ne\_nkratchakait.

<sup>12</sup> Ju ashí nan\_kaamas enentáimtustiniaiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumninkia Yus írmastatui. Nu asamtaí nayaimsha nun\_kasha ashí írunna nusha páchitsuk, aya támena nu tuke nekas atí.

<sup>13</sup> Wáitakmeka Yus áujsata. Waraakmeka, warasam kantamám Yus shiir awajsata.

<sup>14</sup> Yus-shuarteram, shuar jáakka, Yus-shuara úntrin untsukti. Tura niisha taarti. Tura Jesusa naari pachikiar asuitijiaí jaa shuaran ishichik kuerarti. Túrawar Yúsán áujtusarti nu shuaran.

<sup>15</sup> Tura “Yus nuna nekas anturtamkattaji” tu enentáimsar áujsarti. Túrawarmatai jaa shuar pé\_nker ajastatui. Yus nin tsuártatui. Tura tunaan tura asa jáakuinkia Yus nu tunaan tsan\_kurattawai.

<sup>16</sup> Nu asamtaí, atumí tunaari paant etsertunaiktarum. Túrarum Yus áujtunaistarum atumí tunaari tsan\_kurnarat tusarum. Pé\_nker shuar Yúsán tuke enentáijiaí áujeamurinkia ti kakarmaiti.

<sup>17</sup> Yaunchu Yus-Chichaman etserin ámiyai, ni naari Erías. Niisha iijiaí méteketiat yumi yutukai tusa Yusa áujsamtaí menaintiu uwí nuyá nan\_kaamas yutukchamiyai.

<sup>18</sup> Ataksha yutukti tu áuj<sup>s</sup>am<sup>t</sup>ai ataksha yutuk<sup>m</sup>ia<sup>y</sup>i tura araksha ataksha tsapainiarmi<sup>y</sup>i.

<sup>19</sup> Yatsuru, shuar eseera wek<sup>t</sup>ain<sup>m</sup>aya kanaaku<sup>i</sup>ñ<sup>k</sup>ia chí<sup>k</sup>ich nin wak<sup>t</sup>ek<sup>i</sup>it<sup>n</sup>iun ya<sup>i</sup>ñ<sup>t</sup>i.

<sup>20</sup> Shuar tunáa shuaran yajauch wekaan awakeakka jákatniun<sup>m</sup>aya uwentikrattawai tura ti untsur<sup>j</sup> tunaar<sup>j</sup> tsañkurnartatui.



## PÍTIUR Emka papin aar akupkamu

### *Pítur Yus-shuaran áatramiania nu*

<sup>1</sup> Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum chíkich chíkich nuñkanam matsatrumna nuna áatjarne. Puntu nuñkanmasha, Karasea nuñkanmasha, Kapatúsea nuñkanmasha, Asia nuñkanmasha, Pitinia nuñkanmasha pujarmena nuna áatjarne.

<sup>2</sup> Yaunchu Apa Yus, “uwemtikrataj” tímia núnisan achikmaitrume. Tura, Winia ajasat tusa ni Wakanijjai akantamkamiarme. Umirtukat tusa nuna túramiayi. Tura Jesukrístu numpejaisha atumí enentáin atsajkir chamir awajturmamiarme. Wats, Yus tuke waitnentamar ti shiir awajtamsarat tusan wakerajrume.

### *Shiir enentáimsar pujustin*

<sup>3</sup> Wats, Yus, ii Uuntrj Jesukrístu Aparj ana nuna naari shiir awajsatai. Yussha ti waitnentrama asa, atak akiiniatniun suramsaitji. Jesukrístu jakamunmayá nantakin asamtai, iikia atak akiiniar tuke iwiaaku pujustiniaitiajnia nu árutramji.

<sup>4</sup> Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiati. Tura nusha yajauchichuiti.

<sup>5</sup> Yus nekas enentáimta asakrumin ni kakarmarijjai wearmarme. Tura tuke uwemtikrampratniun, nuñka amuuamunam paant iniakmastatna nu achikmintrum tusa tuke tsawant ni kakarmarijjai wáitmarne.

<sup>6</sup> Nu enentáimsarum wararme. Kame ju nuñkanam pujakrum ititurchat wáinkiashtarmeash. Tura ju nuñkanam pujustin ishichkichukait. Ukunam pénger pujustaj tu enentáimsarum wararme.

<sup>7</sup> Enentáimsatarum. Shuar kurin wakerana núnisan atumniasha umirtukat tusa Yus wakerutmarme. Aents kurin jinium áesainiawai, aya kurik juakat tusar. Kurin ti wakeruinia ásar, amuukamnia ajn túruiniawai. Atumsha, ititurchat wáinkiarmenta nujai, Yusan nekas enentáimtusartimpiash tusa nekap-samuitrume. Nu enentáimtam kurijjai nankaamas péngeraiti. Ukunam, Jesukrístu támatai, Yuska atumin “pénger túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarat” tusa túrutmattarme. Nu tuma asamtai ju nuñkanam nekap-samuitrume, ititurchat wáintrumna nujai.

<sup>8</sup> Jesukrístu wáinchaiatrum anearme. Tura yamá wáinchiatrumek nekas enentáimtarne. Tuma asarum ti wararme. Nu warastin nayaimpiniam warastajinia núniskete; nuka paant titin jeatsji.

<sup>9</sup> Iimiatarum. Uwemtikrurat tusarum Yus umirkachurmek. Nu uwempratin wainiu asarum waraarme.

### *Krístujai ii uwempratniun yaunchu etserkarmiayi*

<sup>10-11</sup> Yus áentsun waitnenta asa, uwemtikrataj tusa tuke wakerimiayi. Núnaka Yúsnan etserin etseriarmiayi. Kristu Wakanj ni enentáin pujuriarmia nu, túruntsajñ Kristu wáitsatniurin jintiarmiayi. Tura ukunam ni ti shiir

pujustinrjncha etseriarmiayi. Túrasha “tuu áishmaṅkait Kristu tutai, tura urutiák túrunat” tusar nu etserin émamkesar anintrusarmiayi.

<sup>12</sup> Tura nii pujuiniainkia túrunashtinian, antsu ti ukunam, ii pujajnia juí túrunatniun Yus nekaamtikiamiayi. Núnaka Yusa shiir chichameṅ ujatmakarmia nú shuar nekaprutmarme. Nú shuar Yusa Wakanj, nayaimpinmaya akupkamu ana nuna nekatairjjai ujatmakurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, túrasha tujintiainiawai.

### *Pénker wekasatin*

<sup>13</sup> Tuma asamtai, péñker enentáimsarum tura péñker íimiasrum wekasatarum. Tura Jesukristu ukunam wantiniak waitnentramprattana nu yawetsuk nákastarum.

<sup>14</sup> Umin uchi áintsarmek yaunchu nékachu asarum wakerimiarmena nu iniaisarum Yus umirin atarum.

<sup>15</sup> Ashí túramurmijjai timiá péñker wekasatarum. Yus, untsurmakuana nu, péñker asamtai, átumka ni shuarj asarum péñker wekasatarum.

<sup>16</sup> “Wi péñker asamtai atumsha péñker wekasatarum” Yus tana nu ni Papirijn áarchamukait.

<sup>17</sup> “Yus winia Aparuítí” tárúmna nu aneartarum. Ashí aentsu túrutairjn métek Yus nekaattawai. Nu neka asarum, ju núnkanam pujarmena juí Yus ashamkatarum.

<sup>18</sup> Warí, ánta wekasatniun atumí uuntrj jintintramarmena nuyá Yus uwemtikramprarme. Túrasha kurisha kuitcha amuukamnia ainia nujaj uwemtikrachmaitrume.

<sup>19</sup> Antsu Kristu numpe ti shiira nujaj uwemtikramuitrume. Nu nékarme. Yaunchu, shuar tunáa túrakui, Yus timiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarjn tsanṅurattajai” tiniuyayi. Núnisaṅ Kristu in jarutramka asa ii tunaarjniá uwemtikrampraitji.

<sup>20</sup> Nunṅkan nájantsuk áentsun jaruktinian Krístun anaikiamiayi Yus. Tura wárik akupkachmiayi. Antsu yamá tsawantin, átum pujarmin, péñker pujusúk tusa wakerak, atumin jarutramkat tusa Krístun akupkamiayi.

<sup>21</sup> Niijjai átumka Yus umiirume. Yuska Krístun jakamunmayan iniantki nanṅkaamantu awajsamiayi. Yus nekas enentáimtakrum, aya péñkernak túrawai titiarum tusa túraití.

<sup>22</sup> Yus nekas tana nuna, Yusa Wakanj yainmakui, umirka asarum atumí wakanijn péñker ajasuitrume. Yus-shuarjai yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum.

<sup>23</sup> Nekaatarum. Yusa chichameṅ umirka asarum atak akiiniaitrum nuka ju nuṅkanmayanchuítí. Antsu Yusa chichameṅ iwiaaku tuke amuukachmin ana nú chichamjai tuke iwiaaku átiniaitrum.

<sup>24</sup> Ju ayash tuke pujuschamniaiti. Yusa Papirijn junis áarmaiti:

Ashí aentsti nupáa áaniuitji. Ii péñkerjsha kukuja áaniuiti. Nupa wárik kaawai. Kukujsa núnisaṅ wárik iniaawai.

<sup>25</sup> Tura Yusa chichamesha tuke amuukachminiaiti.

Nu Chichamjai uwempramnia asamtai atumin etsernakuiti.

## 2

<sup>1</sup> Tuma asamtai, ashí yajauch ana nu iniaisatarum. Anan̄katin, ántar-chichamtin átin, chikichna wakeruktin, ashí tsanumpratniusha iniaisatarum.

<sup>2-3</sup> Antsu, Uunt Jesukristu waitnenkartutairi nekapsa asarum, uchi yama akiinia muntsun ti wakeruinia áintsarmek, Yusa chichame aya pen̄kerkea nu ti wakeruktarum. Yusa chichamejai tuke tsawant tsakakrum tuke uwemprami tusarum túratarum.

*Iwiaaku kaya*

<sup>4</sup> Ii Uuntri Kristu kayáa áantsan̄kete. Tura shuar kayan yajauchin nakiti-ainia núnisan Jesukristun nakitrarmiayi. Tura kayan ti pen̄keran wakeruinia núnisan, Yuska, “winia Uchir ti pen̄keraiti” tusa Jesukristun achikmiayi. Atumsha Jesukristu weantuktarum. Nii iwiaaku kayaiti.

<sup>5</sup> Atumsha iwiaaku kaya áantsan̄ketrum. Tuma asarum Yus wijjai ni jeen jeamti tusarum tsan̄kamaktarum. Tura nútiksarmek Jesukristui atumí iwiaakmarj tsan̄kamaktarum, Yus wakera nuna túrutati tusarum. Jesukristujai tura asarum Yus shiir enentáimtikrume.

<sup>6</sup> Jesukristunun Yusa Papiriin júnis áarmaiti: “Iistarum. Kayan ti pen̄keran achikjai” Yus tímiayi. Jeen emka apujtuamuri atí tusan Seunnum apujejai.

Nin enentáimtana nu ántar enentáimtsui. Aarma ana nu pen̄ké kayan chichaatsui. Antsu Jesukristun tawai.

<sup>7</sup> Yus umirkaitrumna nu, “kaya ti pen̄keraiti” tarume. Tura Yúsan umirainiatsna nuka Yusa Papiriin tana nujai métek ániawai. Ju áarmaiti: Jeen jeamin nakitrarmia nú kaya jeen emka apujtuamuri atí tusa apujamuiti.

<sup>8</sup> Tura jusha aarma awai: Tukumak iniaartin kayaiti.

Kame shuar Jesukristunun etserkamun nakitiakka, ¿enentáinium itiur pen̄ker wekasat? Wats, nú shuar, Kristun umirainiachu ásar, tuke túrunatin asamtai tukumaini-awai.

*Yusna ajasaru ainia nu*

<sup>9</sup> Tura átumka Yus achikmaitrume. Tura, wínian pujurtursarat tusa ya-jauchinmaya Uunt Yus akantamkaitrume. Yusna asarum pen̄ker enentáimin ajasurme. Tura Yus sumakmaitrume. Niisha winia pen̄kerun etserturkarat tusa túrait. Kame kiritniunmaya jinkirim ni tsáapnintrin wekasatniun achir-makurme.

<sup>10</sup> Yaunchu nusháa shuar áuyarme. Tura antsu yamaikia Yus-shuar ajasurum, Niiniu ajasurme. Yus-shuar ajatsrumni, ¿ya waitnentrampria? Antsu yamaikia Yus waitnentrामuitrume.

*“Yúsnaitjai” tu enentáimsatin*

<sup>11</sup> Yatsurtirmin tájarme, Yusna ajasrum, ju nunkanam írar matsatu asarum, atumí ayashí wakerana nu tsan̄katkairap. Ayashim wakerana nu túrakmiñkia ame enentáim nujai yajauch ajastatui.

<sup>12</sup> Yus-shuarchanum pen̄ker wekasatarum. Túrakrumniñkia niisha yamáí “Yus-shuar yajauch túruiniawai” ántar tuíniayatā, ukunmañka, Yusjai in̄kiunaiktin tsawant jeamtai, pen̄ker wekarmena nuna enentáimturmasar, nú shuarsha Yúsan shiir awajsartatui.

13 Kristu atumí Uuntri asamtai, ju nunkanam akupin áiniana nusha umirkatniuitrume. Uunt akupin ashí akupin asamtai umirkatarum.

14 Tura ni akupeamuri ainia nusha tunaan túruinia núnaka asutiáti tura péñkeran túruinia núnaka shiir awajsati tusa uunt akupin akupkamu ásmatai umirkatarum.

15 Nekas peñker wekaamurmijai enentáimcha ainia nu netse chichaamuri itiatmamtiatarum tusa Yus wakerawai.

16 Tunaanumia ankant ajasu asarum péñker wekasatarum. Túrasha wi ankant ajaschajak tusarum nánkamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum.

17 Chíkichcha shiir enentáimtustarum. Yus-shuar ainia nusha aneatarum. Yus péñker asamtai ashamkatarum. Uunt akupin shiir awajsatarum.

### *Yus-shuarti katsuntratin*

18 Takarniutirmesha ame úuntrum péñker shiir enentáimturmakeisha tura yajauchiitkuisha umirkatarum.

19 Nekaatarum. Antar wáitkiarmainia nuí, “Yus iirui” tu enentáimsa katsunteakrumka, ti peñkeraiti.

20 Yajauch túrawakmin asutiámamtai katsunteakmekka nuísha warin ati. Antsu péñker túrawakmin asutiámamtai katsunteakmekka júka ti peñker túrame Yusaj.

21 Núnisan túrunatin achikmaitrume. Kristu waitrutmasmiarme nuí, Wi túraj núnisan túrawarmi tusar wáitsamiayi.

22 Krístuka tunaan peñké túrachmiayi. Tura chikichkinkesha peñké anañkachmiayi.

23 Kátseeamsha Niñkia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iist’ tímiayi, Yus péñker túrin asamtai.

24 Kristu Niñki ni ayashjin ii tunaarjin entsaki krúsnum jarutramkamiaji. Tunáa enentáimtusairum tusa, antsu Yusaj péñker wekasamniuram tusa jarutramkamiaji. Atumí enentáin tsuártaj tusa Kristu asutniámiaji.

25 Murik ni pujutairjin waketkitniun nékatsna ántsarmek atumsha menkaka wekaimiarme. Tura yamaikia atumí wáitmaurjin waketkintrume. Atumí wáitmau Krístuiti, atumí enentáin wáinnia nu.

## 3

### *Nuatnaikiaru itiur túratniuit*

1-2 Tuma asamtai, nuwatiram atumí áishri umirkatarum. Amesha péñker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámekka chichaatsminin, niisha Yus-shuar ajastinian wakerittiwai.

3 Nu asamtai aya pátatek iwiampratniusha ti enentáimtusairap. Inti-ash ti peñker iwiaratniusha, kurijjai iwiampratniusha, pushí ti kuitjai entsartincha ti enentáimtusairap.

4 Antsu, “nekas shírmach ajastaj” tákumka, enentáimin “shiir kajechu átajai” tu enentáimsatarum. Nuka sakarchattawai. Tura nuka Yúsnumka ti peñkeraiti.

5 Yaunchu núnisanu nuwá Yúsan enentáimtusarmia nu, tura Yúsan shiir enentáimtikratniun wakeriarmia nu, ni áishrin umirkar nujai ni enentáin shírmach ajasar pujuarmiayi.

<sup>6</sup> Atumí weat̄ri Sara ni áishrin Apraáman umirmiayi. Umirin asa, “winia uuntru” t̄niuyayi nin. Atumsha péñker túrakrumka tura sapijmiatsuk wekaakrumka, Sarajai métek átatrume.

<sup>7</sup> Tura áishmant̄irmesha Yus wakerana nu nekaarum atumí nuwe shiir enentáimtusum tsanint̄arum. Nuwem̄sha, nuw̄a asa, áishman̄jai métek kat-suntrachminiati. Tura niisha, ámijjai métek Yusa waitnenkartutairrijjai tuke iwiaaku átinian takusminiaiti. Tu enentáimta asam ame núwem̄ shiir enentáimtustá. Yus áujkuram it̄iurchat atsuti tusarum túratarum.

### *Yúsnum péñker wekasatin*

<sup>8</sup> Nuyasha ashí Yús-shuirtirmin tájarme, aya chikichík enentaik atí. Waitnen-nairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáint̄aj tu enentáimsatarum.

<sup>9</sup> Yajauch turamainiakuisha “yapajkiataj” tiirap. Katsekramainiakuisha “iikkiataj” tiirap. Antsu “Yus winia shiir awajtusuiti” tu enentáimsarum, yajauch turamainiana nu péñker awajsatarum.

<sup>10-12</sup> Yus-Chichamnum júnis aarma asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákuñka tura tuke tsawant warastinian wakerana nu, péñker ímiastí, yajauch chichakaj̄ tusa tura wáitruawaj̄ tusa. Tunaanumiā kanaki péñkeran túratí. Tuke enentáijjai shiir átinian eakti.

Tu áarmaiti.

### *Itiurchat aijn péñker túratin*

<sup>13</sup> ¿Yaki yajauch túrutmat péñker turamnisha?

<sup>14</sup> Túrasha péñker túrayatmek wáitiakminkia Yus shiir enentáimtikramprattarme. Tuma asamtai ashamkartutsuk, sapijmiatsuk wekasatniuitrume.

<sup>15</sup> Tura “Kristu winia Úuntruiti” tu enentáimtustarum. Tura “¿urukamtia Yus-shuar ajasuitiam?” turamainiakuisha, péñker áimkiamnium iwiarnarum pujustarum. Waantu enentáimtumatsuk, nin péñker enentáimtikrataj tusam túrata.

<sup>16</sup> “Yúsjai péñker wekasataj” tu enentáimsarum wekasatarum. Yus-shuar asakrumin chíkich shuar ántar áujmatramainia nu ni ántar áujmatramsamun nekaawar natsaárarat tusarum Yusjai péñker wekasatarum.

<sup>17</sup> Yajauch túrakur wáitsatniujain̄kia nankaamas, Yus wakerakuñkia péñker túrakur wáitsatniuka ti pen̄keraiti.

<sup>18</sup> Kristu ii tunaarin asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan pen̄ké túrichuitiat, ii tunáa asakrin wáitrutmasmiaji, Yúsnum ejetamtā tusa. Ayash̄iinkia jakayat ni wakan̄jjai ni ayash̄i ataksha iwiaaku ajasmiaji.

<sup>19</sup> Ni wakan̄jjai jakáa wakan̄in emetamu armia nuna etserkataj tusa wémiaji.

<sup>20</sup> Nusha yaunchu Nuai uunt kanun nájanuk sian̄tu painti (120) uwi pujurmia nūj Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumijjai uwemtikrarmiayi.

<sup>21</sup> Nu yumi Yus-shuarti imiantinian nakumui. Ii ayash̄i chamir awajsatai tusar imiantsuji. Antsu ii enentá̄j péñker atí tusar Yus sear imianji. Nujai iisha uwemji. Jesukristu nantakin asamtai, nujai uwempraitji.

<sup>22</sup> Tura Niisha nayaimpiniam we akupin pujutajniun Yusa untsuurjini apujsamuiti. Túramtai nayaimpinmaya suntarsha, tura ashí kakaram akupin áiniana nusha Jesukristun umirainiawai.

## 4

### *Ju nunkanam wáitsatin*

<sup>1</sup> Kristu ni ayashjiiin wáitsa asamtai atumsha núnisrumek wáitsatin ákuisha, katsuntratjai tútiarum. Ni ayashjiiin wáitiana nú shuar yajauchin páchiatsui.

<sup>2</sup> Antsu “iwiaakjana nuikia Yusa wakeramurjiiin tuke umirkatjai” tu enentáimuii. Ni ayashjii wakerana nuna yamaikia páchiatsui.

<sup>3</sup> Warí, Yúsan nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekrum ti yurumárum, enentáincha ajasrum charaatum ajatniusha, ántar-yusa namperjiiin yajauch ana nu najanatniusha nusha ashí wakerimiarme.

<sup>4</sup> Tura surimiatsuk yajauch túrimiarmena nu iniaisa asakrumin, yaunchu atumjai nuna túrin armia nu, “urukamtai iniaisara?” tusar yajauch áujmatramprume.

<sup>5</sup> Túrásha ukunam nu aents ni túramurjiiin etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumantiki-awartatui.

<sup>6</sup> Túrásha jaka armia nu Yusa shiir chichame ujanarmiayi. Ni ayashjiiin ashí shuarjai métek jakamniaitatan Yus iwiaaku pujana núnisañ ni wakanjii iwiaaku pujusarat tusa ujanarmiayi.

### *Shuar yáintiniaitji*

<sup>7</sup> Ashí amuukatin jeatemayi. Tuma asamtai péñker enentáimsatarum; túrarum anearum Yus auju pujutarum.

<sup>8</sup> Aneniamujajii untsurjii tunaasha tsankuratin awai. Tuma asamtai ashí nankaamas nuamtak anenaistarum.

<sup>9</sup> Kajé-kajejainchu atumí jeen itiaaniátarum.

<sup>10</sup> In ankant ankant shiir awajtamsatniun Yus ti núkap takakui. Tura in shiir awajtamsamujajii chikich shuarsha shiir awajsatarum tusa chikich chikich túratniun suramsaitji. Tuma asamtai péñker takaawa áintsarmek Yus amasmania nujajii ame írutramuram yaiñtá.

<sup>11</sup> Etserkatniun Yus amasuítkiuñkia ame tamena nu, Yus tana nujajii métek atí. Chikich shuar yáintiniaitkiumka Yus amaana nú kakarmajajii túrata. Ashí túramna nu Yusa naarjii shiir atí tusam Jesukristu náarijjajii túrata. Jesukristun ashí aents shiir enentáimtusartí. Tura ashí áentsnum ni kakarmarjii tuke atí. Nuna tajai.

### *Yus-shuarti wáitsatin*

<sup>12</sup> Aneamu yatsurtiram, ti waitsatin nekapiamsartin jeartampramna nu nusháa enentáimprairap. Wáitsatin támatai, “¿urukamtai waitsa pujaj?” tu enentáimsairap. Kame túrunamniaiti.

<sup>13</sup> Tuma aijn shiir enentáimsatarum. “Kristu wáitsamurjii métek-taku wáitiakun péñkeraiti” tu enentáimsatarum. Ukunam Kristu wincharjii wáinkiarum timiá warasmi tusarum túratarum.

<sup>14</sup> Krístunu asakrumin katsekkramkachartimpiash. Túmaitkiuisha Yusa Wakanj shiir ana nu atumjin pujurtamkui shiir awajsamuitrume. Katsekkramainia nú shuar imia Yusa Wakanj yajauch áujmatainiawai. Tura átumka Yusa Wakanj shiir awajearme.

<sup>15</sup> Túra atumsha yajauch túrawajrum aneartarum. Mankartana nu, kasamkana nu, tunáa túrana nu, tura chikichna páchiana nusha ní wáitsatniurinkete. Atumjainkia nu wáitsatniuka atsutí.

<sup>16</sup> Tura antsu Krístunuiti tusar wishikramuk wáitkiarmainiakui natsaarairap. Krístunu asam wáitiatmek, natsamtsuk Kristu naarj shiir awajsata.

<sup>17</sup> Yuska ní shuarin nekapsatajtsa nanamatniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartin. Ti asutniáwartatui.

<sup>18</sup> Imia Yus umirjinia nu uwempratniurj iturchataitkiuisha tunaan túruiniana nusha urukawartin.

<sup>19</sup> Tuma asantai Yus wakeramujaj wáitainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

## 5

### *Yus-shuara uuntri túratin*

<sup>1</sup> Yamaikia Yus-shuara úuntritiram, jintintjiarme. Wisha núnisnak Yus-shuara úuntritjai. Kristu wáitsamurin wáinkiaitjai wisha. Tura ukunam ti shiir átatna nuj chikich Yus-shuara uuntria núnisnak wisha pachiinkiaitjai.

<sup>2</sup> Yus-shuar ame ístiniaitmena nu, péñker iistá, murikiu wáinin ni murikrin wainnia áintsamek. Nakittsuk, shiir enentáimsam túrata, Yus wakerana nuke. “Chikich akupta asantai túratitjai” tútsuk tura nujaj kuítrintin ajastin enentáimsuk nekas wakeritia, Yusa takatrij asantai.

<sup>3</sup> Turasha, “Yús-shuara uuntri ajasan, Yus-shuaran akuptiaj” tu enentáimsaip. Antsu shiir túramurmijaj Yusa murikrij jintintiata.

<sup>4</sup> Nuñkia murikiu wainniu Uuntri taa wantiniak iwiarmamtai tawasap ti shiirmachia núninian suramsattawai. Aents súana nú shiirmach wari mamuriniaiti. Tura Úuntrum ámin suramsattana nuka penké mamurchattawai.

### *Yus-shuarti umirnaikiatin*

<sup>5</sup> Tura natsatirmesha atumí uuntri umirkatarum. Kame yaunchu Yús-Papinium aarma asantai ashí Yus-shuarteram nankaamantu enentáimtumsuk umirnaikiatarum.

Waantu enentáimtuma núnaka Yus nakittaiwai. Antsu nankaamantuchu enentáimtuma nuna Yus waitnentak yayawai. Tu aarmaiti.

<sup>6</sup> Wats, Yus timiá kakaram asantai, amek nekamam, péejchach enentáijaj enentáimtumasta. Nuñkia tsawant jeamtai ni wakerak Yus ámin penkerj awajtamsattawai.

<sup>7</sup> Yus ámin ti enentáimturmakui ame iturchatrum ainia nu Yus ashí iiktusta.

<sup>8</sup> Aneartarum tura ímiastarum. Íwianch atumí nemasrij ana nu, uunt yawáa nuke, yanak emesrainitaj tusa eajak tentaa wekaawai.

<sup>9</sup> Tura tuke Yus nekas enentáimtusrum surimiaktarum. Ashí nuñkanam Yusnum atumí yachj ainia nu átum wáitarmena núnisaraj wáitainiawai. Nusha kajinmakchatniuitrume.

<sup>10</sup> Wats, ishichik tsawant wáitsarmena nu nankaasmatai Yus ataksha péñker awajtamsattarme. Tura numi wewe wajana núnisaraj iki-akátmartatrume. Tura Yus ikiakárma asarum ni jintin tuke péñker wekasattarme. Ju Yus tuke in waitnentramtsujik. Tura iisha Jesukrístunu asakrin

Niijjaj métek Yus ni shiir pujutainium tuke shiir pujusmintrum tusa achir-makuitji.

<sup>11</sup> Nū Yúsnasha ashí aents shiir enentáimtusartí. Tura ashí áentsnum ni kakarmarij tuke atí. Nuke ati.

*Amiak áujmamsamu*

<sup>12</sup> Serpanujaj ju papin ishichik áarmaj nuna akupeajai. Serpanu Yusjaj péñker wekaak Yusnum winia yatsur ajasuíti; núnaka nékajai. Yus waitnen-trama asa ti yainmakmania nuna enentáimtikeajrume ju papijjaj. Tura tuke ni waitnenkartutairiin wekasatarum tájarme.

<sup>13</sup> Papirúnianmaya atumjaj métek Yus achikma áinia nu amikmaatmarme. Winia uchir Markus núnisan amikmaatmawai.

<sup>14</sup> Yusaj yachí ajasu asarum anenaisrum shiir awajnaisatarum. Jesukristunu ajasuitrumna nuna Yus imiatkinchanum pujustinian suramsarat tusan wakerajai.

Nu atí.



## PÍTIUR Ataksha papin áarar akupkamu

### *Pítiur Yus-shuaran áatramiania nu*

<sup>1</sup> Wikia ju papin aajna ju Semun Pítruitjai. Jesukrístu akatramu asan ni takarniuríntjai. Ii Yusri tura in Uwemtikramin Jesukrístu umirumna nuna atumniasha juna áatjarne. Niisha ashí áentsun métekrak enentáimtin asamtai atumsha iijjai métek Niiniu ajasurme. Nuka ti penkeraiti.

<sup>2</sup> Yus, tura ii Uuntrj Jesussha nékarmena nú núkap nekaki wéakrumin, Yuska atumin ti nukap yáinmaktatrome tura ti nekas imiatkinchanum pujustinian suramsattarme. Nuna nekaan tuke núnisañ atí tusan wakerajrume.

### *Yusaj páchitkia atin*

<sup>3</sup> Yus uunt asa tura ashí túramnia asa, umirtukat tusa achirmakuitji. Nii neka asar atumajnia nu wáinkiaitji. Yus-shuarti wekasatniusha, tura Nin aneatniusha ii atumajnia nuna Yuska kakaram asa suramsaitji.

<sup>4</sup> Niisha uunt asa tura tujinkiachu asa ni chichamen suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashj yajauch wakerana nuyá uwemprarum, Yusaj páchitkia átinian suramsaitrome.

<sup>5</sup> Yus umirkarme. Yamaikia juna túrataj tusarum kakartiniaitrome. Ti penker wekasatniuitrome. Nuyá Yusna nekaatniuitrome.

<sup>6</sup> Nuyá yayauch túrashtin ímiastiniaitrome. Nuyá katsuntratniuitrome. Nuyá Yus shiir enentáimtusurum wekasatniuitrome.

<sup>7</sup> Tura nuyá ashí shuar shiir enentáimtustiniaitrome. Tura nu nankaamas ashí shuar aneatniuitrome.

<sup>8</sup> Ashí nu túrakrumka, tura tuke túrukum wéakrumka, nakiarchattarme. Túrarum ni takatři émamkesrum takastatrome. Tura ii Uuntrj Jesukrístu nekas nekaattarme.

<sup>9</sup> Tura nuna túruiniatsna nuka, kusurua áanin áiniawai. Jesukrístu wakera-murj in enentáimtuiniatsui. Ni tunaariya uwemprarmia nuna kajinmataini-awai.

<sup>10</sup> Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarhattarme.

<sup>11</sup> Tura ii Uuntrj Jesukrístu uwemtikramprajnia nu, Nii tuke akupeana nuj, nakittsuk shiir awaintiamattarme.

<sup>12</sup> Tuma asamtai nékarminiñ tura Yusna nekas ana nuyá kanaatsrumniñ tuke enentáimtkratjarne.

<sup>13-14</sup> Nekaatarum. Winia jákatniurun jeatema nuna ii Uuntrj Jesukrístu ujatkeyi. Tuma asamtai iwiaaku pujajna juik atumin tuke enentáimpratarum tusan jintinratniuitjarne, tu enentáimsajai.

<sup>15</sup> Tura wi jakamtai, wi aajna juna tuke kajinmatkiirum tusan, wi jeajna nuna túrattajai.

### *Kristu waantu ajasun wáinkarmia nu*

<sup>16</sup> Ii Uuntrj Jesukrístu kakarmari tura ni táratniuri etserkamajnia nu, aya áentsnumiá ántar chichamchauyi. Antsu imia ii juijjai Uunt Jesukrístu waantu ajasu wáinkia asar ujakmajrume.

17 Tura Apa Yus Jesukrístun shiir waantu awajsamia nuĵ, ni imiá shiir pujutairiĵa chichaak tímiayi, “Ĵuka winia ti aneamur Uchiruiti. Nin ti wararĵai.”

18 Iisha naint “Yusna” tájinia nuĵ Niiĵĵai pujá asar nu nayaimpinmaya chichaamu paant antukmaji.

19 Tura nuna nankaamas ti nekasa nu, Yúsnan etserin yaunchu etserkarmia nusha nékaji. Ĵu étserma ĵusha, tsawant tsawaĵtsain kiritniunam ĵi keak tsáapin awajeana áintsan asamtai, péñker enentáimta asarum péñker túrarme. Tura Kristu taa, yáñkuam etsantea núnisan atumí enentáin ashí paant awajsattawai. Tura nu tsawant jeatsain nu étserma tuke péñker enentáimtustarum.

20 Tura ĵu emka nekaatarum. Shuar aya ni enentáimmiarĵĵiain, Yusa Wakanĵĵiainchu, Yus-Chicham urukamtai tu chicháa nuna nekaatniun jeat-sui.

21 Warí, Yúsnan etserin yaunchu etserkarmia nu, aya ni wakeramurĵĵiain tícharmiayi. Nu áishmanĵkan enentáin Yus pujursarmiayi. Tuma asa ni tiarmia nuna Yusa Wakanĵ jintintiam tiarmiayi.

## 2

### *Wait chichaman unuiniainia nu (Ĵútas 4-13)*

1 Tura Israer-shuarnum wait chichaman etserniusha páchitkiarmiayi. Atumĵincha wait chichaman unuinau páchitkia ártatui. Niisha awaĵintikrampratniun wakeruiniak wáitian ti yajauchin uĵkar unuiniartatui. Tura “Uunt Jesus uwemtikrurmia nusha ántrai” tiartatui. Nuna takui ni amuukatniurĵsha wárik jeartiatui.

2 Tura untsurĵ shuar ni yajauch túruiniamurĵn ĵirsar métek túrawartatui. Iis, “Yus-Chichaman unuiniatĵai” tuĵniayatan imiá yajauch túruiniakui untsurĵ aents “Yus-Chicham ántrai” tiartatui.

3 Kuítian ti wakeruinia ásar, wait chichaman unuitiamprar akiam kuítriniawartatui. Tura nú shuar yaunchu Yus jákatniunam sumamtkiawarna ásar, ni amuukatin tsawantrĵ jeatemayi.

4 ¿Warí? Yuska ni suntariĵ nayaimpiniam puĵuarmia nunasha penké tsanĵkurachmiayi. Antsu nayaimpinmaya ĵiniun akupkarmiayi. Tura nekapsatin tsawant jeatsain kiritniunam ĵinkiamu emetamu puĵuiniawai.

5 Yáunchuyá shuarnasha Yus tsanĵkurachmiayi. Antsu aya Nuain, Yusĵai wekasatniun etserin asamtai ni shuarĵ siati armia nujai uwemtikramiayi.

6 Enentáimpratarum. Sutuma pépruncha tura Kumura pépruncha nayaimpinmaya ĵin akuptuk Yus mash amukmiayi. Aya yúnkunmik awajsamiayi. Ukunam nu túrunamun nekaawar, shuar tunáa túratin tsúumainian nekaawarat tusa túramiayi.

7 Tura Yus Ráutan uwemtikramiayi. Péñker shuar asa, Sutumanmaya shuar imiá yajauch ásar tunáa túruiniakui, Raut kúntuts enentáimsamiayi.

8 Péñker áishman asa, nuyá shuara yajauchirĵn wáitiainiak, ni enentáin péñker asamtai tuke tsawant kúntuts enentáimiuk wáitmiayi.

9 Tura incha tunaan inakturmakin, nu tunaanum nupetnakchati tusa Uunt Yus uwemtikrampranĵiĵi, ni umirka asakin. Túrnasha yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

10 Tura Yus akupeana nuna umirkatniun nakitrar ni yajauch wakera-murin túruinia nunasha Yuska nekas asutiáttawai. Enentáimcha áiniawai. Tura ni wakeramuriniak wakeruiniawai. Niijjai nankaamas akupin ainia nuna yajauch áujmatainiawai.

11 Warí, imia Yusa suntari Yusai matsatainia nu, nuna túratniun tsúumainiawai. Nankaamas kakaram tura nankaamas uunt áiniayat nu akupniun katsekainiatsui.

12 Nu áishmansha enentáincha yajasma núnin áiniawai. Achikiar mantam-natniuk akiinia áiniawai. Enentáimtsuk nánkamsar yajauchin chichainiawai. Tuma ásar yajasma núnisan jákartatui.

13 Chikichan wáitkiamia áintsan wáitsartatui. Tuke tsawant ni wakeramunak túruiniak “waraajai” tuiniawai. Tura atumjai irunar yurumáiniayatan atumin anankramawar warainiawai. Nuka natsantaiti.

14 Nuwan wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuítian wakeruktinniasha ti nékainiawai. Jákatniunam sumamawaru áiniawai.

15 Yúsnumaanj naka wétsuk awajirarai. Peura uchirj Paraam Yúsnan etserniuitiat yaunchu awajimia núnisan awajiniawai ju shuar. Paraamka tunaan tura, kuítian achiktinian ti wakerukmiayi.

16 Tura niisha tunáa túratajtsa weaj Yuska umpuurun chichachun aents chichaana nujai métek chichamtikiamiayi. Nuiñkia umpuuru timia nujai Yúsnan etserin ni netse túratniurin enentáimiar iniaisamiayi.

17 Nu áishmansha yumirnat kuyua núnis áiniawai. Tura núnisan yu-ranmisha kfariat nase umpuim menkaana nu, yumi ajuaracha ásar, penké ántar áiniawai. Warí, Yus-Chichamjai áentsun yainiainiatsui. Niisha imiá kirit ámanum tuke pujustin áiniawai.

18 Niisha ti chichainiayat ántar chichainiawai. Yajauch túratniujai tura ayash wakera nujajisha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai.

19 “Iiya núnis túrakrumka ankant átatrume” tu wénawai. Túrasha imia niñki ni tunaarjin emetamu áiniawai. Páantchakait. Shuar warí tunaajaim nupetnaka, nuna emetamurjinti.

20 Kame shuar, uunt Jesukrístu uwemtikiartin ana nuna chichamen nékainiak ju nuñkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nujainkia nankaamas yamá imiá yajauch pujuiniawai.

21 Yusa akupkamurin imiá péñkera nuna Yus nú shuarnasha súsarmiyai. Túrasha nékainiayat tunaanum waketkiaru ásar ti asutniáwartatui. Tuma asamtai, nekas jintia nekaachuitkiunka maak árantí.

22 Tíchamukait, “yawá iyak ataksha yúawai,” tura, “kuchisha imiaimiuitiat ataksha tsakusnum maajkimiui.” Nu áishmansha núnisan yajauchiniam ataksha wáketainiawai.

### 3

#### *Uunta tátintri*

1 Aneamu yatsurtiram ju papin jimiará áatjarme. Mai papinium winia jintintiamurjai atumí chamir enentáin enentáimtikratjarum tusan wakera-jrume.

2 Yúsnan etserin, péñker wekain armia nuna etserkamurj enentáimturtarum. Tura ii Uuntri akupkamurin ni akatramurjijai

ujatmakarmia nusha enentáimpratarum. Jesukrístu uwentikrampramaj nuna chichamen tajai.

<sup>3</sup> Jusha emka nekaatarum. Amuamu tsawantin Yúsnan wishikin wantinkartatui. Tura niisha ni yajauch wakeramurin túrusar wekasartatui.

<sup>4</sup> Tura juna tiartatui. “¿Kóstuka “wi atak tátatjai” timia nusha urukuit? Warí, ii untrj yaunchu kajinikiarma nuyá yapajjáchmaiti. Yus yaunchu ju nunkan najanamia nuyá yamaisha tuke núniskete” tiartatui.

<sup>5</sup> Túrasha nunkancha nayaimpincha Yus yaunchu najanamia nuna nekaatniun nakitiainiawai. Yusa chichamejai nunka entsaya jünkimiyai tura nunkasha entsá nanatrawai, Yus timia nujai métek.

<sup>6</sup> Tura ukunam nu nunkan amaarkamujai Yus emesramiyai. Ashí nuna nekaatniun nakitiainiawai.

<sup>7</sup> Tura Yus tiniu asantai nayaimpisha nunkasha yamáiya nuka jijiai emesnarat tusa ikisma áiniawai. Yus áentsun nekapsattana nu tsawantaj yajauch aents emesnartatui; tura jisha nu tsawantaj nunkancha nayaimpincha áesattawai.

<sup>8</sup> Tura jusha, aneamu yatsurtiram, enentáimsatarum. Uunt Kóstujajinkia chikichik tsawant mir uwiya núniskete; mir uwisha chikichik tsawanta núniskete.

<sup>9</sup> Uunt Kristu, “atak tátatjai” tana nuna umitsuk menkakashtatui. Áyatik áentsti “wau taatsui” taji. ¿Urukamtai wau taatsua? In áentstin nákarmaji. Shuar chikichiksha menkakain tusa nakitiawai. Antsu ashí shuar enentáin yapajjáwarat tusa wakerawai.

<sup>10</sup> Túrasha Uunta tsawantj aya aneachma jeattawai. Kasa aya aneachma kiritniunam taana núnisan tátatui. Nu tsawantin nayaimpisha ipiamta núnis charáa timiatai menkakattawai. Tura nuj ashí írúnna núurtiuk esaawartatui. Tura nunkasha tura ashí írúnna nusha esaawartatui.

<sup>11</sup> Ashí nu emesnartin neka asarum atumsha imiá nekas Yus tuke enentáimtusurum, takamtsuk umirkarum wekasatniuitrume.

<sup>12</sup> Yusa tsawantj wárik tati tusar, jintiá ímprusar nákastiniatiji. Nu tsawantaj nayaimpisha esáa emesnartatui, tura ashí írúnna núurtiuk ti tsuer ajas entsamnattawai.

<sup>13</sup> Tura iikia yamaram nayaimpisha, yamaram nunkasha ati tusar nákaji. Nu átatui, tímiyai Yus. Tura nujsha aya péñkerak átatui.

<sup>14</sup> Nu tuma asantai, aneamu yatsurtiram, ju túrunati tusarum nákarmena nuj, imiatkinchanum wekasam chamir enentáimjai makuuchmin Yus wáitkiati tusarum wekasatarum.

<sup>15</sup> Ju nekaatarum. In uwentikramprataj tusa Yus ti nákarmaji. Ii aneamu yachi Páprusha núnisan Yus ni nekatairj susamia tímiatrusan áatramprarmame.

<sup>16</sup> Ashí papí aarmia nuj Pápruka wi tajana nuna chichaawai. Kame ni áarmari chikichka ishichik nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapajjáwar nusháa jintintiainiawai. Tura chikich chichamsha Yus-Chichamnumia ana nuna núnisan túruiniawai. Túmainiakka ninji emesmamainiawai.

<sup>17</sup> Wátssek, aneamu yatsurtiram, túruntsainj ujakjarmena nu neka asarum, yajauch shuar anankramatts wakerutmainiak awajimtikrurainj tusarum, tura Yusaj tariarumena nuyá iniarajj tusarum anearum wekasatarum.

<sup>18</sup> Tura ii Uuntrj Jesukrístu in Uwentikkiartin ana nu, yamáí nékarmena nú nankaamas nekaatarum. Tura enentáimin nú nankaamas tariarum wetarum. Yamaisha tura tuke, ii Uuntrj Jesukristu náarj uunt awájsartí. Nu atí.

## JUAN

### Emka papin áarar akupkamu

#### *Tuke iwaaku átinia nérentin Chicham ana nu*

<sup>1</sup> Ashí nan̄kamamia nú yaunchu Yusa Uchir̄i tuke pujuuyayi. Nusha iisha anturkait̄ji. Nekas ii j̄ij̄ij̄i wáinkiait̄ji. Wáinkiarsha ii uwejēj̄aisha antin̄kiuit̄ji. Niisha Yúsán ti paant awajeak̄, Chícham t̄iminiaiti. Tura tuke iwiaaku átinia nérennuiti. Nuna áateajrume.

<sup>2</sup> Iwiaaku átinia nérenniusha paant nekanamiayi, nusha Jesukrist̄uiti. Iisha Nii wáinkia asar nu étsereaji. Tura tuke iwiaaku átinia nérenniur̄i asa tuke Yus Apaj̄aj̄i pujuyayi. Tura yamaikia īini paant ajatramsakrin atumniasha ujaajrume.

<sup>3</sup> Ii Yus Apaj̄aj̄aisha ni Uchir̄i Jesukrist̄uj̄aisha tsanin̄kiar nekas chikichík ajaji. Tura atumsha núnisrumek īij̄ij̄i chikichík ajasuk tusa wáinkiamajnia nuna anturkamajnia nunasha ujaajrume.

<sup>4</sup> Ti shiir warastarum tusan j̄una áatjarne.

#### *Yus tsáapniniaiti*

<sup>5</sup> Yus imiá tsáapnin asamtai kiritin Nīinkia pen̄ké atsawai. Nu chichaman Jesukrist̄u in unuitiamprakrin nuna atumniasha ujaajrume.

<sup>6</sup> “Nīij̄ij̄i tsanin̄kia pujaji” táyatar kiritniunam pujustinia áintsar tunaanum pujakrikia wáit̄raji tura nekas pen̄ker ana nu túrats̄ji.

<sup>7</sup> Yuska tuke tsáapninium pujuwiti. Iisha núnisrik tuke tsáapninium pujakrikia nuámtak nawamnaikiar pujuiniaji. Túrakrin Yus ni Uchir̄i Jesukrist̄u numpéj̄aj̄i ashí ii tunaar̄j̄i japirtam̄ji.

<sup>8</sup> “Wi tunaan túrichuit̄jai” tákurkia ímia iik anan̄mamaji. Nekas ana nu nékats̄ji.

<sup>9</sup> Antsu ii tunáar̄j̄i Yus paant ujakrinkia Yuska tsan̄kurtamprattaji. Tura ii tunaar̄in asakátramprattaji. Yuska ti pen̄ker asa Nii tana nuna t̄imiatrusan̄ umikmin asa túrattawai.

<sup>10</sup> Kame “Tunaan túrichuit̄jai” tákurkia nuj̄aj̄i “Yus wáit̄riniaiti” taji. Ni chichamesha ii enent̄aj̄in pujurtam̄suj̄i.

## 2

#### *Jesukrist̄u in Yúsán áujturmaid̄ji*

<sup>1</sup> Yus-shuartiram, tunaanum iniaar̄aj̄rum tusan j̄u papí áateajrume. Túrasha Yus-shuar tunáa túramt̄ain̄kia Apa Yusan ii áujturmau awai. Nuka Jesukrist̄uiti. Niisha ti pen̄keraiti. Niisha Yúsán áujturmakui Yusj̄aj̄i ataksha iwiaarar pujust̄at̄ji.

<sup>2</sup> Jesukrist̄u ii tunaar̄in asakártaj̄ tusa jarutramkamiaji. Túrasha aya íiniunkechu antsu ashí shuara tunaar̄in asakártaj̄ tusa jarukmiayi.

<sup>3</sup> Yus tana nu umirkurkia nuikia Yus nekas nékait̄ji.

<sup>4</sup> Tura shuar “Yúsán nékait̄jai” tayat Yus tana nuna umirchakka wáit̄rawai. Nekasa nuka ni enent̄aj̄in atsawai.

<sup>5</sup> Antsu shuar Yus tana nuna umireakka Yúsán ti shiir aneawai. Túrakur Nīij̄ij̄i tsanin̄kiar pujamu nékaji.

6 “Yusjaj tsanin̄kia wekaajai” tana nú shuar Jesukrístu wekasamia núnisan wekasatniuiti.

### *Yamaram akupkamu*

7 Yatsuru, yamaram akupkamun áattsujrume. Áyatik yámankamtaiknumiá an-tukmiarum nunak tájarme. Ashí atumín jintintiamu yaunchu akupkamuiti.

8 Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atum̄incha nu akupkamu nekas paant awajsamuiti. Nujaj kiritin menkaatemka asamtai tura nekas tsaapniñkia paant tsaapnir-tasa pujakuí nu akupkamun ataksháa aateajrume.

9 Shuar “tsáapninium pujajai” táyat chíkich Yus-shuaran nakitiakka tuke kiritniunam wekaawai.

10 Yus-shuaran aneana nu nekas tsáapninium pujawai. Niisha iniaatsuk chikichnasha tunaanum ajuarchamniaiti.

11 Tura shuar chíkich Yus-shuaran nakitiakka kiritniunam tuke wekaawai. Tura kiritniunam iimiu asa ituraani wea nuna nékatsui.

12 Uchitirmincha, Jesukrístu jakamujaj atumí tunaarj tsankurnaru asakru-min juna áateajrume.

13 Úntirmincha yámankamtaiknumiá tuke pujuuya nu nekáa asakrumin juna áateajrume. Únmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume.

14 Úntirmincha yámankamtaiknumiá tuke pujuuya nu nekáa asakrumin juna áatjarme. Únmarutirmincha atumí enentáijjai Yus-Chicham umirkarum kakaram asarum íwianch nupetka asakrumin juna áatjarme.

15-17 Aya áentsnumiá ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nankaamantu ajastin. Nuka ju nunkanmaya áiniawai. Shuar aya nunak wakerak Yúsnaa aneatsui. Kame ju nunkasha amuukattawai. Ashí nu wakeruktincha ti nekas amuukattawai. Túrasha shuar Yusa wakeramurj umiána nu tuke iwiaaku pujustatui Yusjaj. Nu asamtai atumsha ju nunkanam ana nu pachikiairap. Tura aya juyá ana nu aya tákustin enentáimsáip.

### *Nekas chicham tura wait chicham*

18 Uchirú, amuukatin tsawant jeatemayi. Atumsha Kristu nemasrj tátin antukuitrume. Yamaikia untsurj Kristu nemasrj wantinkarmatai amuukatin tsawant jeatemayi.

19 Nusha ii weeak ármayi. Túmaitiat nekas Yus-shuar ácharmayi. Nekas Yus-shuar áiniakka tuke iijjai irunar pujuaraayi. Tura júnkiarmatai nekas Yus-shuarcha ainia nu paant nekanamniaiti.

20 Antsu atumniaka Yusa Shiir Wakanjín Kristu suramsamtai ashí paant nékarme.

21 Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarme. Wáit-chichamsha nekas-chichamsha penké nushaachuk ainia.

22 Wáitrin júiti: Jesusan “Yus anaikiamuka Krístuchuiti” tana núiti. Núiti nekas Kristu nemasrj. Yus Apancha ni Uchirincha nakitia asa Kristu nemasrjnti.

23 Yusa Uchirin nakitiainia nu Yus Apajajsha tsanin̄ pujatsui. Tura Yusa Uchirin shiir awajea nu, Yus Apajajsha tsanin̄ pujawai.

<sup>24</sup> Yámankamtaiknumiá antukmiarum nu atumí enentáin pujurtamsati. Nu túrakrum atumsha Yusa Uchirijíajsha Yus Apajaisha tuke tsaniñkrum pujustrume.

<sup>25</sup> Jesukristusha Niijjaj tuke iwiaaku pujustinian tsañkatramkaitji.

<sup>26</sup> Anañkartin írunkui juna áatjarne.

<sup>27</sup> Atumniasha Jesukristu Yusa Shiir Wakanin suramsakrumin, nu Wakan tuke pujurtamkurmin shuar jintinramatin atsumatsrume. Antsu Yusa Wakaní ashí jintinramprume. Ni jintintrammasha imiá nekas asa wáitchaiti. Tuma asamtai Nii jintinramna áintsarum Krístujaj tuke tsaniñkrum pujustarum.

<sup>28</sup> Yamaikia, uchiru, Krístujaj tuke tsaniñkrum wekasatarum. Nu túrakrikia Nii támatai natsamtsuk ti shiir inkiunaiktatji.

<sup>29</sup> Atumsha Jesukristu ti penkera nu nékarme. Núnisan ashí shuar péñkeran túruinia nuka Yusa uchirí áiniawai. Nusha nekaatarum.

### 3

#### *Yusa uchirí áiniana nu*

<sup>1</sup> Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirintji. Tuma asakrin jú nunñkanmaya Yús-shuarcha nekarmainiatsji. Kame Yusnasha nékainiatsui.

<sup>2</sup> Aneamu yatsurtirmea, juna tájarne: nekas Yusa uchirí ajasuitji. Kame ukunam urukuk átají nusha nékatsji. Túrashá jú paant nékaji: Jesukristu támatai imia Nii paant wáinkiar Niijjaj métek ajastatji.

<sup>3</sup> Tura shuar shiir enentáijjaj nuna nákkaka imia niñki shiir awajmamui Jesukristujaj métek shiir atajaj tusa.

<sup>4</sup> Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin.

<sup>5</sup> Jesukristu ii tunaari asakártaj tusa jú nunñkanam támia nu nékarme. Tura Niñkia tunaan túrichuyayi.

<sup>6</sup> Tuma asamtai shuar Niijjaj tsaniñ wekáa nuka tunaanum wekaatsui. Antsu shuar tunaanum wekaakka nu shuar Krístun wáinchaiti, núnisan nékachuiti.

<sup>7</sup> Uchiru, shuar anañkramawairap. Péñker túrinkia Kristu ti penker asamtai niisha péñkeraiti.

<sup>8</sup> Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchirí jú nunñkanam táwiti ashí íwianch túramun emesrataj tusa.

<sup>9</sup> Shuar nekas Yusjaj akiinia nu tunaanum wekaatsui. Yusa uchirí asa Yusa iwiaakmarijjaj wekaawai. Tuma asa tunaanum tuke wekaatsui.

<sup>10</sup> Shuar péñker túratsna nuka tura Yus-shuaran kajera nuka Yus-shuarchaiti. Nujaj Yusa uchirí ainia nusha tura iwianchi uchirí ainia nusha paant nekaamniaiti.

#### *Mai anenai ajatin*

<sup>11</sup> Atumsha yámankamtaiknumiá chicham antukmiarum nu júiti: mai anenai ajartin.

<sup>12</sup> Iisha Kañkia áanin áchatniuitji. Íwianch-shuar asa ni yachin máamiayi. Tura ¿urukamtai maamia? Enentaimprata. Nii yajauch asa tura ni yachi péñker asamtai máamiayi.

<sup>13</sup> Yatsurtiram, jú nunñkanmaya shuar nakitramainiakui ti enentáimsairap.

14 Iikia jákatniunmaya uwempra asar<sup>i</sup> nekas iwiaaku pujaji. Túmakur Yus-shuar ainia nu aneaji. Nujaj<sup>i</sup> yamaram iwiaakma takakjinia nu imiá páantaiti. Shuar Yus-shuaran aneachkuṅka tuke jákatniunam wekaawai.

15 Shuar Yus-shuaran nakitiakka maṅkartinia núnisaiti. Tura maṅkartinkia tuke amuicha iwiaakmanum pujuiniatsui. Nuka nékaji.

16 Jesukrístu in jarutramka asakrin nujaj<sup>i</sup> nekas in anenmaj nu nékaji. Iisha núnisrik Yus-shuar ainia nu ti aneakur ni yaintai tusar jarukmin átiniaitji.

17 Túrasha shuar chíkich Yus-shuar atsumana nuna takakiat waitnentachkuṅka nekas ni enentáijjaj<sup>i</sup> Yúsán aneawash.

18 Uchiru, aya chíchamjain<sup>i</sup> anenain áchatniuitji antsu nekas aneniakur péñker túrar yáiniaiktiniaitji.

#### *Yusaj natsamtsuk jeamniaitji*

19 Jujaj<sup>i</sup> ii Yúsaj<sup>i</sup> sapijmiatsuk jeatniusha tura nekas Yus-shuaraitji nu nekaatniusha nekapmampramniaitji.

20 Ii enentáí yajauch túramun enentáimtikramkurnisha Yus iijjaj<sup>i</sup> naṅkaamas ashí mash nékatsuk.

21 Tura, aneamu yatsurtiram, ii enentáí yajauch túramun enentáimtikramchakrinkia Yúsaj<sup>i</sup> sapijmiatsuk jeamniaitji.

22 Tura ni wakeramu túrakrikia tura ni chíchamesha umiru asakrin ashí ii seaj nuna suramsattaji.

23 Júiti Yus akupkamu: ni Uchirí Jesukrístu nekas enentáimtustin tura Kristu timia áintsarik shuartisha mai anenai ajartin.

24 Shuar ni chíchamen umiá nuka Yusjaj<sup>i</sup> tsanin wekaawai tura Yus niijjaj<sup>i</sup> tsanin wekaawai. Mai chikichik ajasu áiniawai. Tura Yusa Wakan<sup>i</sup> ii enentáin pujá asamtai nujaj<sup>i</sup> Yus iijjaj<sup>i</sup> tsanin wekaana nu nékaji.

## 4

### *Yusa Wakanisha tura Kristu nemasrj wakancha*

1 Aneamu yatsuru, untsurí shuar wáitruiniak “wi Yúsán etserniuitjai” tuiniawai. Tuma asamtai ashí shuar “wi Yusa Wakan<sup>i</sup> takakkun chíchajai” tuinia nu péñker nekapsuk enentáimtusairap. Antsu íisrum nekas Yusa Wakan<sup>i</sup> mpiashit tura chíkich wakaniashit nu nekaatarum.

2 Jujaj<sup>i</sup> nekapsarum ya nekas Yusa Wakan<sup>i</sup> takaka nu nekaattarme: Shuar “Jesus Yusa Uchirí Krístuítai nekas aents ajas ayashimkiamiayi” tana nu Yusa Wakan<sup>i</sup> nekas takakui.

3 Tura Jesusan tu enentáimtatsna nuka Yusa Wakan<sup>i</sup> takaktsui antsu Kristu nemasrj wakan<sup>i</sup> takakui. Kame Kristu nemasrj wakan<sup>i</sup> tatin tama ántichukaitrum. Nu wakan yamaikia ju nuṅkanam táwiti.

4 Uchiru, átumka Yusna asarum Yus atumí enentáin pujawai. Tura ju nuṅkanmaya shuara enentáin íwianch pujawai. Atum<sup>i</sup>in pujana nuka niijjaj<sup>i</sup> naṅkaamas kakaram asamtai wáitrin ainia nu nupetkaitrume.

5 Niisha ju nuṅkanmaya ásar aya ju nuṅkanmayan áujmatainiawai. Túmainiakui ju nuṅkanmaya shuar ti péñker anturainiawai.

6 Antsu iikia Yúsnaítji. Tuma asakrin Yúsán nékainia nu anturtamainiaji. Tura Yúsna chu ainia nu anturtamainiatsji. Nujaj<sup>i</sup> nekas Wakan<sup>i</sup> takakusha tura wáitrin wakanin takakusha nekaamniaiti.

### *Yus tuke anenkratniuiti*

7 Aneamu yatsuru, anenaitin Yúsnumiá asamtai mai anenai ajartai. Shuar anenkratniua nuka Yusa uchirí asa Yúsna ncha nékawai.



8 Shuar anenkratcha nuka Yúsanka nékatsui. Kame Yuska tuke anenkratniuiti.

9 Tuma asa ni Uchiri chikichkiniak ju nunkanam akupturmakmiaji. Iisha ni túrunamujai nekas iwiaaku pujaji. Nujai Yus in yáinmak ni anenkrattain paant iniakturmasmiaji.

10 Jujai nekas anenkrattainkia paant nekanamniaiti: ii Yus aneaj núchaiti. Antsu ii ti tunáa árinin Nii aneachmaitiatan Yuska ti anenma asa ni Uchirin ii tunaarin asakarat tusa akupturmakmiaj nujai nekas nekanamnaiti.

11 Aneamu yatsuru, Yus núnis anenma asakrin iisha núnisrik mai anenai ajartai.

12 Chikichkisha Yúsán wáinkiahuiti. Túmaitai mai anenai ajakrikia Yus ii enentáin pujurtamkui Nijjai métek anenkratin ajaji.

13 Yus ni Wakanin suramsa asakrin Yus iijjai tsanin wekaana nusha tura ii Nijjai tsaninkia wekaajnia nusha, nujai nékaji.

14 Yus Apa ni Uchirin ashí shuaran uwentikrarat tusa ju nunkanam akupkamia nu wáinkia asar<sup>i</sup> étsereaji.

15 “Jesus Yusa Uchirinti” tana nu shuarjai Yus tsanin wekaawai tura niisha Yusjai tsanin wekaawai. Mai chikichik ajasu ániawai.

16 Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusjai tsanin wekaawai tura Yussha nijjai tsanin wekaawai. Mai chikichik ajasu ániawai.

17 Núnisar ti penker anenkartin ajaji. Túrar<sup>i</sup> súmamtikiatin tsawantaj natsamtsuk wajastatji. Kame ju nunkanam pujayatrik Jesukristujai méteketji.

18 Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiátin akui sapijmiaktinaiti. Tuma asamtai ántar sapijmiana nu nekas anenkratchaiti.

19 Yus emka in anenma asakrin iisha Nii aneaji.

20 Tura shuar “wi Yúsán aneajai” táyat chikich Yus-shuaran nakitiakka nuka wáitriniaiti. Kame Yus-shuaran tuke wainnia nuna aneachkuŋka çitiurak Yusan wáinchasha aneat?

21 Yus incha juna turammiaji: Yúsán anea nu shuar chikich Yus-shuarnasha aneatniuiti.

## 5

### *Ju nunkanmaja írunna nu núpeteaji*

1 Ashí “Jesus Yusa Uchiri Krístuiti” tu enentáimtana nú shuar Yusa uchirinti. Tura aparí aneakrikia ni uchirisha aneattaji.

2 Yus Apa aneakur tura Nii wakera nu umirkur Yusa uchirisha ashí aneattaji.

3-4 Yus aneakur Nii tana nu umiktatji. Ashí Yusa uchirija nu Yúsán nekas enentáimta asa, ashí ju nunkanmaja írunna nuna núpeteawai. Nu asamtai Yus tana nu umirkatin itiuurchatchaiti.

5 Aya “Jesus Yusa Uchirinti” tu enentáimtana nú shuar ju nunkanmaja ana nuna awakkamniaiti.

### *Jesukristu “Yusa Uchirinti” tu etserainia nu*

6 Jesukristu jú nunkanam taa entsajai imiankui Yus nayaimpinmaja chichaak “Juka winia aneamu Uchiruiti” tímiayi. Tura nuyá Jesus jakamtai ni numpé puarmiayi. Entsajai imianin ni takatrin nankamamiayi túrasha in jarutramak ni takatrin amukmiayi ju nunkanam. Chikichinkia túrutsuk

mai metek túra asamtai Yusa Uchiríya nu paant nekanamniaiti. Yusa Wakaniḡsha tuke nekas tiniua nu métek tawai.

<sup>7-8</sup> Nu asamtai menaint “Yusa Uchirínti” Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nunkanmasha Yus Wakancha, entsasha tura numpasha. Mash métekrak tuiniawai.

<sup>9</sup> Aents étsereiniaakui ántureaji. Nuna nanḡkaamas Yus ni Uchirín tana nu nekas anturkatniuitji.

<sup>10</sup> Yusa Uchirín enentáimtana nú shuar ni enentáincha nékawai. Antsu Yus ni Uchirín timian enentáimtatsna nú shuar Yúsan enentáimtachu asa Yúsan “wáitriniáiti” tawai.

<sup>11</sup> Yus ni Uchirín timia júiti: Tuke iwiaaku pujutai nérenniuiti tura nu iwiaakmancha in suramsaitji.

<sup>12</sup> Yusa Uchiríjajai tsaniḡ wekaana nú shuar, nu iwiaakmajaj iwiaaku pujuiniawai. Tura Yusa Uchiríjajai tsaniḡ wekaatsna nú shuar, nu iwiaaku átinnum pujatsui.

*Amuak Yus nekas enentáimtustinian áarmiania nu*

<sup>13</sup> Yusa Uchirí nekas enentáimtakrum tuke amuicha iwiaakmajaj iwiaaku pujarme. Nu nekaatarum tusan júna áatjarne.

<sup>14-15</sup> Yus wakeramujaj métek seakrinkia anturtamji. Tura anturtamkurin ii seamaj nu nekas takusua nu enentáimpramniaitji. Nu neka asar Yus ti shiir enentáimtaji.

<sup>16</sup> Tunáa awai jákatniunam júana nu. Shuar nu tunaan túramtaiḡkia Yus áujtustin ántraiti. Tura shuar chíkich tunaan túrakuḡkia nuka nekas Yus áujtustiniáiti. Nekas jákatniunam júatsna nú tunaan túraitkiuḡkia iwiaaku átinian Yus susattawai.

<sup>17</sup> Ashí yajauch<sup>i</sup> ana nuka tunaiti. Tura jákatniunam júatsna nú tunaasha awai.

<sup>18</sup> Nekas Yusjaj akiinia nú shuar tunaanum tuke wekaatsui. Antsu Yusa Uchirí nin ti penḡker wainkiui íwianch antiḡkiachminiaiti.

<sup>19</sup> Iḡkia nekas Yúsnaitji tura ashí jú nunḡkanmaya shuar iwianchnia áiniawai.

<sup>20</sup> Yusa Uchirí jú nunḡkanam taa nekas-Yus aa nuna paant jintin-tramji. Yusa Uchirí Jesukristujaj tsaniḡkia wekaakur nekas-Yusa nujajsha tsaniḡkiar wekaaji. Nekas-Yus asa tuke iwiaaku átinia nuna nérenniuiti.

<sup>21</sup> Uchirú, ántar-yus írrunna nuḡ pachiinkiarap. Antsu nujaj aneartarum.

Nuke atí.

## JUAN

### Ataksha papin aar akupkamu

#### *Nekasa nunasha tura anenaitniuncha ujaawai*

<sup>1</sup> Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekas anamin aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme.

<sup>2</sup> Nekas-chicham tuke amuutsuk ii enentájn pujá asamtai aneajrume.

<sup>3</sup> Yus ii Aparísha tura ii Uuntri Jesukrístusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaittiarme.

<sup>4</sup> Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin ániawai.

<sup>5</sup> Yamaikia, umaru, tájame: mai anenai ajartai. Yamaram akupkamun áattsujme antsu yámankamtaik antukniaj nunak tájame.

<sup>6</sup> Nekas anekartinia nú shuar Yus akupkamun uminiaiti. Tura Yus akupkamuka “anekartin tuke atarum” tawai. Nusha yámankamtaiknumia antukuitrume.

#### *Anekartincha írunui*

<sup>7</sup> Ju nunkanam anekartincha ti írunui. Jesukrístu nekas aents ajas aki-iniamia nuna enentáimtuiniatsui. Nu shuar anekartin ásar Kristu nemasri ániawai.

<sup>8</sup> Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

<sup>9</sup> Ashí shuar Kristu jintíamun iniais “nankaamas nékajai” tana nu, Yúsnachuiti. Antsu Kristu jintíamun umiana nu shuar Yus Apajajisha tura ni Uchirijjajisha mai tsanin pujawai.

<sup>10</sup> Shuar Kristu chichamen jintíachu atumí jeen írmástaj tusa jeakui awayáwairap tura “shiir taume” tíirap.

<sup>11</sup> Kame nu shuar “shiir taume” tákumka nu shuar yajauch jintíamu jímiareame.

#### *Umíamu chicham*

<sup>12</sup> Ti nukap atumjai áujmatsatniun wakerajai. Túrasha ju papinium mashi áatrashatjarne. Antsu imia wiki atumin iyakun jeátjai. Nuyá naka chichasar ti shiir warastatji.

<sup>13</sup> Ame kaim Yus achikma nuna uchiri amikmaatmainiawai.

Nuke ati.

## JUAN

### Nuyá Ukunam papin aar akupkamu

#### *Kayu ti penker shuaraiti*

<sup>1</sup> Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme.

<sup>2</sup> Aneamu yatsurú, Yusjai penker wekaakum ame wakanim penker pujana núnisan ame ayashmisha penker atú tusan Yúsan áujtajme.

<sup>3</sup> Ame nekas chicham umirman shuar ju taar ujatkmayi. Tura nuna antukan ti warasmajai.

<sup>4</sup> Yus-shuar nekas chichaman umiiniaku imiá shiir enentáimtuinijai.

<sup>5</sup> Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu penkeraiti.

<sup>6</sup> Nu shuar ame nekas anenamun ju taar Yus-shuar iruntramunam etserkarai. Ataksha irauwenaku atsumainiana nu súsam shiir akupkarta. Penker wáinkiumka Yus shiir enentáimtikrattame.

<sup>7</sup> Nu shuar Jesukristun takarsatai tusar wekainiawai. Túrawar Yus-shuarcha ainia nuna kuítrijjai yurumátniun nakitarmatai

<sup>8</sup> ii Yus-shuarkia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

#### *Tiútrepes yajauch túriniaiti*

<sup>9</sup> Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai.

<sup>10</sup> Nu asantai nu jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayáiniatsui. Tura chíkich awayátaj tákuisha suritiawai. Tura nuyá Yus-shuarjai iruntratniun surimiawai.

<sup>11</sup> Aneamu yatsurú, nu yajauch túramu jumamkiirap antsu penker túratarum. Penker túrinia nuka Yúsnaiti. Antsu tunáa túrinia nuka Yúsan nékachuiti.

#### *Timitriu penker túriniaiti*

<sup>12</sup> Imiá nekas penker shuar asantai ashí shuar Timitriun penker áujmatainiawai. Iisha núnisrik penker shuaraiti tákurin nekas tájinia nusha nékarme.

#### *Umíamu chicham*

<sup>13</sup> Wi ti nukap títinian wakerajme. Túrasha ju papinium mashi áatrashtatjame

<sup>14</sup> wárik ítin asan. Nuj jean chichasmi.

<sup>15</sup> Shiir pujustá. Juyá amikrum amikmaatmainiawai. Ii amikrishá chíkichik chíkichik amikmaatruata.

## JÚTAS

### papin áarar akuptukma

#### *Jútas Yus-shuaran papin áateawai*

<sup>1</sup> Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukrístujai tsaninñiaru ásar matai Yus nin wainiainiawai niñijai kanakchatniun.

<sup>2</sup> Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

#### *Ti tunáa shuar írunui* *(2 Pítiur 2.1-17)*

<sup>3-4</sup> Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar ananñkramawar atumúin pachiinkiarmai. Niisha “Yus ti anenñkartin asamtai páchitsuk tunáa túramniatiji” tuiniawai. Nu arantcha Yus in Akuptamniuncha tura ii Uuntrí Jesukrístuncha nakitin ániawai. Nu asamtai nu shuaran “yaunchu sumamawaruítí” tímiayi Yus. Tuma asamtai tájarme “Tuke Yus-Chicham yapajáshtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

<sup>5</sup> Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunñkanmaya júkiar Nin umirkacharua nuna máawarmiayi.

<sup>6</sup> Nayaimpinmaya suntarsha ni pujutairin ajapa ikiukiari Yus susamun umitsuk iniaisarmiayi. Túrawarmatai Yus kiritniunam jirujai tuke jinñkiá sepunam apujas pujurainiawai. Tura Uunt Tsawant jeamtai súmamtikiawartatui.

<sup>7</sup> Núnisan Sutuma péprusha Kumura péprusha tura tíjiuch péprusha áishmanñajisha nuwajajisha ti yajauch nuamtak tsanirmanainiakui ti tunaan penñké túrachmin ana nunasha túrin árimiayi. Túmainiakui ashí shuar ashmkarat tusa Yus amuicha jinium asutiáwarmiayi.

<sup>8</sup> Ayu. Atumúin yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch awajmamainiawai, Yushasha nakitiainiawai, tura ashí akupin ainia nunasha yajauch áujmatainiawai.

<sup>9</sup> Antsu Mikiar, nayaimpinmaya suntara kapitántrintiat, iwianchñají máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi.

<sup>10</sup> Túrasha ju shuarka nékainiatsna nuna nánñkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura núñajisha imia niñki yajauch emesmamainiawai.

<sup>11</sup> Maa, anearartí. Kañ yajauchin túramia núnis tura ásar jákartatui. Tura Parama áinis kuítian ti wakeruiniak imia niñki tunaanum tsanñkamakaru ániawai. Tura Kurea áinis ashí akupniun nakitin ániak kajinñkiartatui.

<sup>12</sup> Átum numtak anenaitiai-jisat náñankurmin nu shuar chikichan enentáimtutsuk Yushasha ashamsuk imia niñki enentáimtumainiawai. Penñké ántar ániak yumi kiñ tee ajasua núnin ániawai. Tura nase umpuim yútutsuk

naṅkamainiawai. Árak nerektin nantutin nerechua áanin áiniawai. Tuma ásar uwemu peṅké jaka áanin áiniawai.

<sup>13</sup> Entsa nujan̄krak saur̄in ajekeawai. Nu shuarsha núnisar ni natsan̄tr̄in natsam̄tsuk ajekenawai. Tura yaa waakua áanin áiniawai. Tuma ásar nekas kiritniunam tuke meṅkakat̄in áiniawai.

<sup>14</sup> Ataṅka tiran̄kiyayi Eruk. Ti peṅker Yúsna etserin asa juṅa tímiayi “Uunt Yus ti untsur̄j ni shuar̄ij̄j̄i winitt̄iawai.

<sup>15</sup> Nuyá ashí shuar túrawarman nekaattawai. Tura ashí yajauch shuar-nasha ti tunáa túrawarua nuj̄aj̄ tura Yúsna yajauch áujmatsarua núj̄aj̄sha súmamtikiawartatui” tímiayi Eruk.

<sup>16</sup> Nu shuarka péṅkera nuj̄aj̄ waratsuk “yajauchiiti” tuiniawai. Aya ni ayashí wakeramunak wakeruiniawai. Naṅkaamantu enentáimtumainiak chíchainiawai. Tura chikich shuaran shiir chícharainiaksha aya nii wakera nuna túrutati tusa peṅker chíchainiawai.

*Yus-shuar enentáimtikratin*

<sup>17</sup> Tura atumsha, aneamu yatsurú, ii Uuntr̄j Jesukristu akatramur̄j yáunchu “aneartarum” tiarmiania nusha enentáimtustarum.

<sup>18</sup> “Amúamu tsawant ishichik ajatesmatai shuar Yúsna wishikrar naki-trartatui. Tura ni yajauch wakeramur̄j̄niak umí pujuartatui” tiarmiayi.

<sup>19</sup> Nu yajauch shuar atumín akantamenawai. Ju nun̄kanmayan̄ak páchiniak Yusa Wakan̄j̄n takakainiatsui.

<sup>20</sup> Tura átumka, aneamu yatsurú, tuke Yus nekas enentáimtusum kakaram ajastarum. Yusa Wakan̄j̄ kakarmarij̄j̄i ashí Yus seatarum.

<sup>21</sup> Yus ti anenmakui nii wakera nu wakeruktarum atumsha. Túrarum ni anenmamu shiir nekaattarme. Tsawant winiawai, ii Uuntr̄j Jesukristu in waitnentrama asa tuke shiir Niij̄j̄i pujustinian amastat̄j̄. Nu tsawant naká pujutarum.

<sup>22</sup> Mai yapaji ajá ainia nu naka enentáimtikratarum.

<sup>23</sup> Chíkich shuarsha jiniumiá júsatniua áitkiasrum uwemtikratarum. Tura chikichcha ti yajauch ásarmatai anearum waitnentratarum. Tura ni pushir̄j̄sha ni tunaar̄ij̄j̄i maatra asamtai muj̄kiatniuiti.

*Yúsna shiir awajeawai*

<sup>24-25</sup> Yus chikichkiiti. Ti nekaiti. In uwemtikiartin asa ni kakarmarij̄j̄i yainmakminiaiti tunaanum iniarchatniun. Tuma asa tunaaj̄j̄i máatrachu awajtam̄as ni ti shíirmariṅ ejetamtatrume. Túrutma ti waramtikramsat-tarme. Ii Uuntr̄j Jesukristu túrunamuj̄aj̄ Yuska Niṅki shiir awajsatniuiti tura naṅkaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.

## APUKARÍPSIS

### Jesukrístu Juánkan paant iniaktusma

#### *Jesukristu paant awajsamu*

<sup>1</sup> Jú áarman Jesukristun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asamtai Jesukristu ni suntarin akupak ashí winia paant awajtursamai. Wisha Juánkaitjai.

<sup>2</sup> Yus timia nunasha tura Jesukristu ujatkamia nunasha tura wi íismaj nunasha ti paant aya nekasa nuna tájai. Penké wáitratsjai.

<sup>3</sup> Jú papin áujea nu shuarsha tura núnisan juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

#### *Juan siati péprunam Yus-shuar írunun juna áateawai*

<sup>4</sup> Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakanj siati naka pujurainia nusha shiir yainmakarti.

<sup>5</sup> Núnisan Jesukristu shiir yainmakarti. Nii tana nu imiá nekasaiti. Ni-isha emka jakamunmaya yamaram iwiakmajai nantakniuiti. Tura ju nunkanmaya akupniu Uuntrinti. In anenma asa ni numpejai ii tunaarin nijiatramkaitji.

<sup>6</sup> Túrutma akupin awajtamsaitji. Tura ni Apari Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.

<sup>7</sup> Wats, Krístuka yuranmijajai winittiwai. Tura íjiuarmia nusha tura ashí shuarsha nuna wáinkíartatui. Túrawar ashí sapijmiainiak útiartatui. Maa, nekas nunis átatui.

<sup>8</sup> Krístuka “yámankamtaiknumiá amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai ti kakaram Uunt Krístu. Tuke yaunchu pujuyayi. Núnisan yamaisha pujawai. Tura nuke ataksha winittiwai.

#### *Kristu ti shiir wincha ajasun Juan wainkiamiania nu*

<sup>9</sup> Wi Juan atumjai métek waitia asan atumí yachintjai. Núnisan nayaimpiniam, Yus akupeana nuj, métek jeattaji. Tura katsuntrar nákastinian Jesukristu máí métek súramji. Yus-Chichamnasha tura Jesukristu timiancha étsereakun nayaantsa ajapén atentramunam Pátmus nunkanam sepunam apujsamua núnisan pujumjai.

<sup>10</sup> Tumai tumin tsawantaj Yusa Wakanj pujurtakuí winia úkuruinj kakan-tar untsumman antukmajai. Kachu umpúamua núnis ti kakarmauyayi.

<sup>11</sup> Tura turutmiai “Wiitjai. Yámankamtaiknumiá amúamunam ashí nérenniuitjai. Wisha A rétranmaya Y rétranam ashí retra áintsaitjai, tímiai. Tuma asamtai wáinmena ju, papiniium áaram Asia nunkanam siati péprunam Yus-shuar írunna nuj akuptukarta. Ju peprunam akupkarta: Ipisiusha, Ismirnasha, Pírkamusha, Tiatirasha, Sártissha, Píratírpiasha, tura Rautiséasha.” Tu turutmiai.

<sup>12</sup> Túrutkui yaki túruta tusan apajasan íkman siati shirikip ikiutain kurijjai najanamun wainkiamjai.

13 Tura nuĵi ajapén Aents Ajasua núninan wajan wáinkiamjai. Tura pushirĵsha nawęa timiai nuntuaru entsaruyi. Emenmamķesha kúriniaĵ netsepnum emenmamauyi.

14 Tura ni muuke intiashĵsha murikiu urę nijiamua núnisaĵ tura micha núnisaĵ ti puju chĵaruyi. Tura ni ĵiĵsha ĵiya núniskeyi.

15 Ni nawesha ti wincha asa ĵiru yaĵkutaku ĵiamua áinis néwar ajarmiaiyi. Ni chichamesha ti kakaram asa uunt entsa téter ajá áintsauyi.

16 Ni untsuurĵni siati yaan takakuyi. Tura ni weneniasha puniá áinis tsakatskat mai ere awajsamu ĵinmiai. Ni yapĵsha etsa ti etsantuk ĵischammnia núnisauyi.

17 Nuna wáinkian jaka áintsanak nawęen iniaarmajai. Túrasha ni untsuurĵi uweĵen awaĵntrus turutmiayi, “Ashamkaip. Wiĵtjai. Yámankamtaiknumiĵ amúamunmasha tuke pujuwitjai, timiai.

18 Wikia tuke iwiaakuitjai. Jakamiajai tura nantakin jákashtinian tuke iwiaaku pujajai. Jákatniuncha tura jaka puĵuinia nuna yawirĵn takakkun nérenniuitjai, timiai.

19 Tuma asamtai wáinkiamna ĵusha, yamá wáinmena nusha, tura ukunam áatna nusha aartá, timiai.

20 Wáinmena nu ĵúnisaĵti. Siati shirikip-ikiutai kúrik wainkiam nu, siati péprunam Yus-shuar ĵrunun nakumeawai. Tura winia untsuurĵni siati yaa wainkiam nu, siati péprunmayĵ Yus-shuaran wáinnium nakumenawai, turutmiiai.

## 2

### *Ipisiunam chícham áatramu*

1 Nuyá turutmiiai ‘Ipisiunmayĵ Yus-shuaran wáinin ĵu áatratá: Siati yaan untsuurnum takakna nu tura núnisaĵ siati shirikip-ikiutai kúrinman ajapén atenta wekáa nu, tawai:

2 “Ashĵ ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awemaitrume. Shuar “Yus akatramuitjai” ántar tuinia nu nekaamarme. Wáitrinia nusha nékaitme.

3 Ti wáitiatmek katsuntram yawętsuk Winia ti takartusuitme.

4 Túrin áminiĵ ĵuna títiatjame. Yus aneakum yámankamtaik ti penķer wekainiuyam núnisam túratsme.

5 Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shirĵpkirmin wari jurustatjame.

6 Tura ĵu penķer túriniaitme. Nikiurás shuar nakitniuitrume. Nu shuar “ayash wakeramu páchitsuk túramniaĵti” tuiniaĵi Wisha núnisnak nakitiajai.

7 Kuĵstinia nu shuar Yusa Wakanĵ ashĵ Yus-shuaran timian antukti: Nupetmakunka tuke iwiaaku puĵutai numi neren yúatniun tsankatkattajai. Nu numi Yus puĵana nuĵ wajaawai.” Tu áartá’ turutmiiai.

### *Ismirnanam chícham áatramu*

8 Nuyá turutmiiai ‘Ismirnanmayĵ Yus-shuaran wáinin ĵu áatratá: Yámankamtaiknumiĵ amúamunam tuke pujuwa nu tura núnisaĵ jaka nantakmia nu, tawai:

9 “Ashĵ ame túram nuna nékajai. Ti wáitiam nunasha tura kuĵtrinichaitmena nunasha nékajai. Antsu Yusajĵkia ti kuĵtrinniuitme. Tura shuar uunt iwianch Satanása shuari áiniayat “Israer-shuaraitjai” tuĵniak yajauch áujmatramena nuna nékajai.



10 Ti wáitsattamna nu ashamkaip. Íwianch ashí nekapramsataj tusa atu-mijnian sepunam enkeattawai. Nuí tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai.

11 Kuíshtinia nu shuar Yusa Wakaní ashí Yus-shuaran timian antukti: Nupetmakuka jimirá jákatniuka waitsashtatui.” Tu aartá’ turutmiai.

#### *Pírkamunam chícham áatramu*

12 Nuyá turutmiai ‘Pírkamunmaya Yus-shuaran wáinin ju áatratá: Puniá áinis tsakatskat mai ere awajsamun takakna nu, tawai:

13 “Ashí ame túram nuna nékajai. Uunt iwianch Satanás akupea nuí pujayatmek tuke shiir enentáimturmena nuna nékajai. Winia shiir umirtínian Ántipasan máawarmataisha Winia enentáimtursatin ishichkisha iniaitiuschamame. Nusha íwianch pujutainium pujakrumin túrunamai.

14 Túrin áminin juna títiatjame. Atumijnia shuar yaunchu Yúsnan etserin Param yajauch jintíamun tuke emetainiawai. Niisha Israer-shuaran tunáa awajsa tusa kapitían Parakan unuiniarmiayi. Nuyá Parak Yus-sutai namanken maar yúatniun Israer-shuaran jintintiamiayi. Núnisan ti tsanirmatniun jintintiamiayi.

15 Atumijnia shuarsha Nikiurás jintíamuncha, Wi nakitíaj nuna, iniaisatniun nakitiainiawai.

16 Wats, enentáimpram iniaisata. Túrachakminkia Wi wari winin winia wenuruja puniá jinia nujai máaniaktajai.

17 Kuíshtinia nu shuar Yusa Wakaní ashí Yus-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naarj aarma átatui. Nunasha chíkich shuarka penké nékatsain aya achía nuke nekaattawai.” Tu aartá’ turutmiai.

#### *Tiatiranam chícham áatramu*

18 Nuyá turutmiai ‘Tiatiranmaya Yus-shuaran wáinin ju áatratá: Yusa Uchirí jii jijjai métek keena nu tura núnisan nawe jiru yanikutaku jiamua núnis néwar ajawa nu, tawai:

19 “Ashí ame túram nuna nékajai. Yus shiir enentáimtakum aneam nuna nékajai. Tura katsuntram pénger takaamna nuna nékajai. Yáunchujai nankaamas pénger túrame yamaikia.

20 Túrin áminin juna títiatjame. Nu nuwá Jesapír awematsme. “Yúsnan unuiniajai” tinia Wíi shuaran ti anankenawai. Tura ti tsanirmatniuncha tura ántar-yus-sutai namanken maar yúatniun jintintiainiawai.

21 Niisha ni tunaarjin enentáimiar iniaisat tusan nákasuitjai. Tura nakitiawai.

22 Wátsek, sunkurmatkiakan peaknum áepsattajai. Tura chíkichcha niijjai tsanirma ainia nunasha niijjai métek ti wáitkiastatjai. Ni tunaarjin enentáimiar iniaisacharmatainkia túrattajai.

23 Ni uchirinja mantúattajai. Nujai ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik chikichik takasmajai métek akiktatjarne.

24 Tura chíkich shuar Tiatiranmayatiram, nú chicham enentáimtuscharmeha nu, “nekas iwianchnia uukma” tútaiya nu nékachu asakrumin atakka túratniun patatkashtatjarne.

25 Tura Wi jeatsain takakrum nu emetatarum.

26 Nupetmakunka Wi wakeraj nunak tuke initsuk túrana nuna untsurj nunkanam akupkatniun tsan̄katkattajai.

27 Winia Apar tsan̄katrukniia núnisnak akupkatniun tsan̄katkattajai. Tura nuwe najanamu jirujai awati ijiakratniua áinis ti kakarmajai akupkattawai.

28 Yáñkuam káshik jiinia nuna susattajai.

29 Kuíshtinia nu shuar Yusa Wakanj ashí Yus-shuaran timian antukti." Tu aartá," turutmiai.

### 3

#### *Sártisnum chícham áatramu*

1 Nuyá turutmiai 'Sártisnumiá Yus-shuaran wáinin ju áatratá: Siatí Yusa Wakanj takakna nu tura núnisan̄ siatí yaan takakna nu, tawai: "Ashí ame túram nuna nékajai. Iwiaakua áintsan̄ wekayatmek Wíjiañkia jákaitme.

2 Shintiarta. Kajinia nu umpuím ekeemakta. Kame Yusjaj ísam péñker túrichuitme.

3 Yus-Chicham ti shiir enentáijiaj emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumñikia kasa núnisnak nékatsmin jeartiatjame.

4 Tura Sártisnum shuar ishichik pushirj wapik máacharu pujuiniawai. Nusha ti pen̄ker áiniak pushí pújun entsarar Wijiaj wekasartatui.

5 Nupetmakuka pushí pújun entsartatui. Tura iwiaaku átinia nu papiniumiá ni naarj áarman japirashatjai. Antsu winia Apar tura ashí nayaimpinmayá suntar íimmianum shiir áujmattsattajai.

6 Kuíshtinia nu shuar Yusa Wakanj ashí Yus-shuaran timian antukti." Tu aartá," turutmiai.

#### *Piratírpianam chícham áatramu*

7 Nuyá turutmiai 'Piratírpianmayá Yus-shuaran wáinin ju áatratá: Ti shiir túrin tuke nekasan tana nu, uunt akupin Tawitia yawirj takaku asa uraimtai chíkich pen̄ké epenchamniaiti. Tura epenmiatai chíkich pen̄ké uraichmini-aiti. Juna tawai:

8 "Ashí ame túram nuna nékajai. Kakarmachuitiatmek winia chichamur shiir enentáimtakum Winia inítiuschaitme. Tuma asakmin wáitin uratjame. Nuna chíkich pen̄ké epenchamniaiti.

9 Wátsek. Shuar wáitruiniak "Israer-shuaraitjai" tuíniayat uunt iwianch Satanás-shuar áiniawai. Nu shuáran, nekas ámin aneajna nuna nekaawarat tusan amíjini tikishmatkiarartatjai.

10 Katsuntrata tímiaj nu, shiir umirka asakmin Wisha ti wáitsatin ashí nunkanam áatam nuyá uwemtikrattajme. Nu wáitsatniujaj ashí nunkanmayá shuar nekarnasartatui.

11 Wárik winittiajai. Takakmena nu emetata. Akinkiatniuitmena nuna chíkich shuar atantramkiarain.

12 Nupetmakunka winia Yusru jee tan̄kirin awajsattajai. Tura nuyá pen̄ké júnkichartatui. Tura nijn winia Yusru náarin áatrattajai. Tura winia Yusru péprurj náarincha áatrattajai. Nu pépruka nayaimpinmayá yamaram Jerusareñka Yúsnumiá tára núiti. Núnisan̄ winia yamaram náarun nijn áatrattajai.

13 Kuíshtinia nu shuar Yusa Wakanj ashí Yus-shuaran timian antukti." Tu aartá," turutmiai.

#### *Rautiséanam chícham áatramu*

14 Nuyá turutmiai ‘Rautiséanmayá Yus-shuaran wáinin ju áatratá: Wáitrusuk nekasa nunak tiniua nu tura núnisan ashí Yus najanamun Úuntriya nu, tawai:

15 “Ashí ame túram nuna nékajai. Tura michaash míchachuitme. Núnisan tsuersha tsuérchaitme. Míchaitkiumsha tura tsuéraikiumsha maak.

16 Kame míchachu tsuercha antsu aya tsuésuetak asakmin imiutkattajme.

17 Iis, “Kuíttrinuiitjai, ti irumpraitjai, warinkisha atsumatsjai” tame.

Túrasha ashí yajauch, wáitnenmai, kuíttrincha, kusuru, tura misú iyajme.

18 Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Péñker ímprataj tusam jiiinium enketai enkeeta.

19 Aneajna nuna chichareajai. Nu asamtai kakaram ajasam tunaarum enentáimpram iniaisata.

20 Enentáimprata. Shuar wáitiniam wajas untsumna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan ámijijai yurumáttajai. Tura amesha Wijijai yurumáttame.

21 Nupetmakuka akupin pujutainium Wijijai pujustatui. Wisha núnisnak nupetmaku asan winia Aparjai akupin pujutainium pujusuitjai.

22 Kuíshinia nu shuar Yusa Wakanj ashí Yus-shuaran timian antukti.” Tu áartá,” turutmiai.

## 4

### *Nayaimpiniam Yúsan shiir awajenawai*

1 Nu nankaasmatai nayaimpiniam waiti uranniun wainkiamjai. Tura nuyá kakaram untsumman antukmajai. Nuik kachujai métek kakaram chichartukma nu turutmiai “Juí yakí wakatá. Ukunam átatna nuna iniaktus-tajame” turutmiai.

2 Nu chichamaik Yusa Wakanj akantukmiai. Túrutamtai nayaimpiniam akupin pujutainium pujan wainkiamjai.

3 Niisha jaspi kayasha tura kurnarínia kayasha nujaj métek ti wíinchauyi. Akupin pujutain tuntiak téntakuyi. Nusha ismirarta kayajaj métekeyi.

4 Chíkich paintikuatru (24) akupin pujutain nu pujutain téntakarun wainkiamjai. Tura paintikuatru uunt púju entsarainian tura kurin et-senkrakainian, nuj pujuinian wainkiamjai.

5 Akuptainiumia peemsha ipiamtasha untsummasha jíiniarmai. Tura nu pujutainium naka siati shirikip kearmai. Nusha siati Yusa Wakaninti.

6 Núnisan nu pujutainium naka nayaantsa áanin ti saar amai.

Nu pujutainium wakenmaanjsa niisháa tanqu kuaru téntakar ármiayi. Ukurijnsha tura eemsha jii irunmiai.

7 Emka tanqu úunt yawáa áanniuyi. Chíkichka turu uchichia áanniuyi. Tura chikichcha shuara yapia áanniuyi. Tura chíkichka churuwia nanamua áanniuyi.

8 Nusha sais nanamtin ármai. Tura jiiisha ti irunainiak ashí wainmarmai. Káshisha tsawaisha tuke iniaitsuk juna tiniu armai:

“Ti nekas péñkeraiti Uunt Yus. Ashí nankaamas kakarmaiti. Tuke yaunchu pujuyayi. Núnisan yamaisha pujawai. Tura ataksha juke winittiwai” tiniu armai.

9 Tura uunt pujutainium pujana nu tuke iwiaaku pujú asamtai nu tanku ti shiir awajsar yúmñkiak pujuriarmai.

<sup>10</sup> Túruiniakui paintikuatru uunt tuke iwiaaku pujun tikishmatainiak ni etsenkrutairin naka áepuiniak tuiniawai:

<sup>11</sup> “Úuntá, ii Yúsrinme. Tuke shiir awajmainme. Ashí nankaamas kakarmaitme. Amek ashí írruna nu najanaitme. Tura aya wakerakum najanamame. Ame wakerakmin irunainiawai” tuiniawai.

## 5

### *Murikkia papin urakminiaiti*

<sup>1</sup> Nuyá akupin pujutainium pujuya nuna untsuurin papí penuarma áanniun wainkiamjai. Nu papisha initiaanisha tura páatkesha áarmauyi. Tura urakchamnia atí tusa siati anujtukmajai kaki peekmauyi.

<sup>2</sup> Tura nayaimpinmayá suntar ti kakarma nu, ti kakantar inintran wainkiamjai. Niisha tímiai “¿Ya akupniuk ju papin kaki anujkamun jaák urakminiait?”

<sup>3</sup> Tura nayaimpinmayásha nunkanmayásha tura jakamunmayásha chikichisha nu papin urakmin atsumiayi. Áujtsuk íistinniasha tujinkiarmai. Tímianu akupin atsumai.

<sup>4</sup> Nu papin uraktincha tura áujsatniusha, kame íistincha atsakui ti úutmiajai.

<sup>5</sup> Nuyá chikichik uunt turutmiai “Ti úutíp. Israer-shuarnumiá Úunt-yawá, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaák urakminiaiti.”

<sup>6</sup> Nuyá uunt pujutaiya nuju tura kuatru taŋkunam ajapén tura úuntnum ajapén Murik wajan wainkiamjai. Maamua áintsanketiat iwiaakuyi. Kachurisha siátiyi. Ni juisha siátiyi. Nusha Yusa Wakanj siati ashí nunkanam akupramua nuuyi.

<sup>7</sup> Nu Murik we nekas uunt Akupniun untsuurinian nu papin achikmiayi.

<sup>8</sup> Tura papin achikmatai kuatru taŋkusha tura paintikuatru uunt arma nusha Murikiun tikishmatrarmiayi. Ashí uunt arpa tuntuitiain takaku armai. Tura ashí kunkuin enketain kuri najanamun takaku armai. Nu kunkuin Yus-shuar áujsamuiti.

<sup>9</sup> Ju yamaram kantancha kantampriarmai:

“Amek imiá nankaamas akupniuitme. Amek papí achikiam anujtukmarj jáakminiaitme. Yus-sutai namaŋkea áinis mantamna asam túramniaitme. Ashí nunkanmayá shuarnumiásha Yusna árat tusam ame numpemjai in sumakmiame.

<sup>10</sup> Turam akupin awajkartusuitme tura núnisanj ii Yúsriniun pujurin awajkartusuitme. Tuma asakmin akupin ajaras ju nunkanam akupkattaji.” Tu kantamainiawai.

<sup>11</sup> Tura untsurj nayaimpinmayá suntar uunt pujutaincha taŋkuncha tura úuntnasha éŋkekawarun wainkiamjai. Nusha nekapmarchamnia ti untsurj armia nu

<sup>12</sup> kakantar tiarmai:

“Murik mantamnamia nu akupin ajaras ashí kakarmancha, kuítiniasha, nekaatniuncha Niŋki achikminiaiti. Tura nupetmaku asamtai yumiŋsar Nin ti shiir awajsatin áiniawai.” Tu tiarmai.

<sup>13</sup> Núnisanj ashí Yus najanamu, nayaimpiniam írruna nusha, nunkanam írruna nusha, nunká init írruna nusha, nayaantsanam írruna nusha, tuínian antukmajai:

“Muriksha tura akuptainium pujana nusha ti shiir tura ti kakaram ásar tuke iniatsuk shiir awajnasarti.” Tu tuiniawai.

14 Tura kuaru tanꝓkusha “Tuke núnisaꝓ atí” tiarmai. Tura paintikuaru uuntka nekas tuke iwiaaku puja nuna tikishmatar shiir awajsarmai.

## 6

### *Murikkia siati anujtukman jaꝓkmai*

1 Wi iyaku Murikkia chikichik anujtukman jaꝓkmai. Túramtai chikichik tanꝓ ipiamtajai métek kakantar unsumun antukmajai. “Winim iitiá” turutmai.

2 Túrutkui kaway pújun wainkiamjai. Nuꝓ ekeemia nu tishimkiun takakuyi. Akuptai tawaspasha susamuyi. Tura tuke nupetmaktinian jíinkimiai.

3 Nuyá Murik anujtukma jímiarana jaꝓkmatái tanꝓ jímiara nu “Winim jíitiá” turutmai.

4 Túrutkui chikich kawai kapaꝓkun wainkiamjai. Nuꝓ ekeemia nuna puniá úntana susamuyi. Nusha shiir pujuscharat tusa ashí jú nuꝓkanmaya shuaran máanaimtikiatniun akupkamuyi.

5 Nuyá Murik anujtukma menaintiun jaꝓkmatái tanꝓ menaintiua nu “Winim íitiá” turutmai. Túrutkui kaway mukusan wainkiamjai. Nuꝓ ekeemia nusha kijin nekapmatain takakuyi.

6 Tura kuaru tanꝓ ajapénia chichaamun antukmajai. “Tsawant takamt-suk takaakmesha apatkuka penké ishichik sumakmin átatme. Tura núnisaꝓ machasha nijiamchisha amuukacharat tusam penker wáinkiaata.” Tu timiai.

7 Nuyá Murik anujtukma kuátrun jaꝓkmatái tanꝓ kuarua nu “Winim íitiá” turutmai.

8 Túrutkui kaway yanꝓkun wainkiamjai. Nuꝓ ekeemia nusha Jákatina náartiniuyi. Tura nuna úkurin Jatai nemark winimiai. Nusha ashí nuꝓkanmaya shuar kuaru akankamunmaya chikichkin máatniun akupkarmuyi. Nusha mesetjaisha tsukajaisha sunꝓkurjaisha tura yajasmajai máawarmai.

9 Nuyá Murik anujtukma sénkun jaꝓkmatái Yus-sutai kunꝓkun ekemtai wakenmaanꝓ íismajai. Túran Yus-Chichaman etserainiakui máawarma wakanꝓn wainkiamjai.

10 Nusha kakantar unsumainiak tiarmai “Uuntá, ti penker asam támena nu umiatsmek. ¿Urutiak nuꝓká pujuinia nú shuar íi mantamnamunam yapajmiátruktam?” tiarmai.

11 Tuíniakui puhi pújun susar tiarmai “Chikichcha Krístunun etserainiakui mantamnatin áiniawai. Nu náakrum ishichik ayampratarum” tiarmai.

12 Nuyásha Murik anujtukma saísana jaꝓkmatái ti úurun wainkiamjai. Tsawai-nantusha itirchat ajasua áintsana mukusa ajasmai. Kashí-nantusha numpá áintsana ajasmai.

13 Tura yaasha wampú nere nase umpuim ti majúwa áintsana kákekarmai.

14 Nayaimpisha papí penuara júamua áintsana menkakamai. Tura naintcha yaja apujnasarmai. Tura nuꝓkasha nayaantsana ajapén atentrainia nusha yaja apujnasarmai.

15 Tura jú nuꝓkanam akupin ainia nusha náinnium wear kayá wáanam uumkarmai. Nijijaisha ashí shuar, uuntcha, kuítriniusha, suntara kapi-tiántrisha, ashí kakaram ainia nusha, tura takarniusha anꝓkant ainia nuꝓjí náinnium wearmai.

16-17 Túrawar náinnisha kayancha tiarmai “Asutniátin tsawant jeayi. ¿Yaki aun katsuntrat? Nu asamtai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

## 7

*Israer-shuarnumiq anujturma armia nu*

<sup>1</sup> Nu nan̄kaasmatai kuaru nayaimpinmaya suntar, nunkaa kuaru yantamén wajan wainkiamjai. Nusha kuaru nase kukarsha, nayaantsanmasha tura kampunniunmasha nasenkacharat tusar wajatiarmai.

<sup>2</sup> Kame kukarsha tura nayaantsanmasha yajauch awajsatniun akupkamu armai. Tura chikich suntarnasha nantu tátainmaania winian wainkiamjai. Tuke iwiaaku Yusa anujtutairin takakauyi. Nusha kuaru suntaran kakan-tar untsuak tímiai,

<sup>3</sup> “Ii Yusri takarjn ainia nu nijiajnium árar anujtatsriniñ kukarsha, nayaantsasha, tura kampunniusha nasejai yajauch awajsaipap” tímiai.

<sup>4</sup> Tura tímiajni untsurí aara anujtukman antukmajai. Ashí Israer-shuar tuse (12) shuar weeá ainia nuyá chikichik sian̄tu kuarenta kuaru mir (144.000) armai.

<sup>5</sup> Jutá weeanmaya tuse mir (12.000) anujtukma armai. Rupin̄ weeanmayasha tuse mir anujtukma armai. Kat weeanmayasha tuse mir anujtukma armai.

<sup>6</sup> Aser weeanmayasha tuse mir anujtukma armai. Niptarí weeanmayasha tuse mir anujtukma armai. Manasés weeanmayasha tuse mir anujtukma armai.

<sup>7</sup> Semeun̄ weeanmayasha tuse mir anujtukma armai. Riwí weeanmayasha tuse mir anujtukma armai. Ísakar weeanmayasha tuse mir anujtukma armai.

<sup>8</sup> Sapurún̄ weeanmayasha tuse mir anujtukma armai. Jusé weeanmayasha tuse mir anujtukma armai. Pin̄jamín̄ weeanmayasha tuse mir anujtukma armai.

*Ti untsurí shuar pújun entsararu*

<sup>9</sup> Nuyá ti untsurí shuaran wainkiamjai. Ashí nun̄kanmaya nusháa shuaraim iruntrarú ásar nekapmarchamnia armai. Tura nusha uunt akupin pujutainium tura Muriknium naka wajaarmai. Tintiuki nuk̄ea áaniun takaku armai. Tura ashí pújun entsaru armai.

<sup>10</sup> Ashí kakantar untsumainiak tiarmai:

“Ii Yusri uunt akupin pujutainium eketna au tura Muriksha imia Niñki Uwemtikin áiniawai” tiarmai.

<sup>11</sup> Tura nayaimpinmaya suntarsha uunt akupin pujutaincha, kuaru tan̄kuncha, tura úuntnasha téntatkar armia nu piniakum nun̄ká tepersar Yúsan shiir awajsar

<sup>12</sup> tiarmai

“Nekasaiti. Tuke iniaitsuk ii Yusri ti shiir awajsatniuiti. Niñki ti neka, ti kakaram, ti akupin, tura ti pen̄ker asamtai tuke yuminsatniuiti. Núnisañ atí.”

<sup>13</sup> Nuyá chikichik uunt inintsamai “Pújun entsaru ainia jusha ¿ya ainia tura tuyá ainia?”

<sup>14</sup> Túrutkui “Uuntá, amek nékame” tímiajai.

Tutai nii túrutmiai “Ju shuar ti waitsaru áiniawai. Túrawar Murikiu numpéjai ni pushiri nijiamawar puju awajсарu áiniawai.

<sup>15</sup> Nuna túrawaru ásar yamaikia Yusaj naka pujusar tsawajsha káshisha Yúsnan ni Jeeñ takainiawai. Tura akupin pujutainium eketna au tuke wainkiartatui.

<sup>16</sup> Yamaikia tsukajajsha kitiakjajsha wáitsachartatui. Tura etsasha sukuiniak yajauch awajsachartatui.

<sup>17</sup> Murik, akupin pujutainium naka wajana au, ni murikrin wáiniuk áyureak ti penker púkuni entsa waana nuí apuj Sartatui. Tura Yus ni neajkincha ukujtiurartatui.” Tu túrutmiai.

## 8

### *Anujtukma siatia nu jaakma tura kunkuin ekeemataijai túrunamu*

<sup>1</sup> Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai.

<sup>2</sup> Nuyá siati suntar Yusaj naka wajainia nuna wainkiamjai. Nusha siati kachun susamu armai.

<sup>3</sup> Nuyá chíkich suntar kunkuin enketain kurijjai najanamun itiamai. Tura Yus-sútainium ayamas wajasmatai núkap kunkuin sunasmai. Nu kunkuin ashí Yus-shuar áuj samujai métek kunkuin ekeematainimum ekeemaktiniuyi. Nu ekeematai kurijjai najanamuyí tura uunt akupin pujutainium naka pujumai.

<sup>4</sup> Tura suntar ekeemakmatai kunkuinia mukuintiuri Yus-shuar áuj samujai métek Yúsan amainkiamai.

<sup>5</sup> Nuyá nu kunkuin enketain suntar achik ekeematainimaya ji kapaan káirin áimiak ju nunkanam ukaamai. Túramtai ipiamtasha unsummasha, peemsha, tura uusha armai.

### *Kachu umpuarma*

<sup>6</sup> Nuyá siati suntar kachun takakainia nu umpuarta tusar iwiarnararmai.

<sup>7</sup> Emka suntar kachun umpuarmatai micha kákekamai. Nunasha ji numpajai pachimpramuncha nunkanam ajapawarmai. Túmakui menaintiu nakakma jeeán numincha tura ashí íranna nuí ekeemakmai. Tura ashí nunkanam chírichrin takamtsuk ekeemakmai.

<sup>8</sup> Nuyá suntar jímiara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmai.

<sup>9</sup> Núnisan menaint jeeá nayaantsanam matsatania jákarmai. Tura menaint jeeá uunt kanua nu emesnararmai.

<sup>10</sup> Nuyá suntar menaintiua nu kachun umpuarmatai ti uunt yaa nayaimpinimaya kapaá kákekamai. Tura entsasha tura púkunimasha menaint nakakam jeeánum kákekamai.

<sup>11</sup> Nu yaasha Yapá-numi náartiniuyi. Tura menaintiu nakakam jeeá entsa yapá ajasarmai. Túrunamtai ti untsuri shuar nu entsa yapá ajasmájai jákarmai.

<sup>12</sup> Nuyá suntar kuatrua nu kachun umpuarmatai menaintiu nakakam jeeá tsawai-nantusha kashí-nantusha tura yaasha emesnarar ajapén tee ajasarmai. Túrunawar tsawajsha káshisha menaintiu nakakam jeeánum tsápnircharmai.

<sup>13</sup> Nuyá chíkich suntar nayaimpiniam nanamun wainkiamjai. Nusha kakantar unsumuk timiai “Maa, chíkich menaintiu suntar umpuiniakui nunkanam pujuinia nu ti wáitsartatui.” Tu timiai.

## 9

<sup>1</sup> Nuyá suntar senkua nu, kachun umpuarmatai yaan nayaimpinimaya nunká kákeran wainkiamjai. Tura nu yaan tunáa shuar jákaru matsamtai yawirín susamuyi.

<sup>2</sup> Tura uraimtai nu nánkatkachu wáanmaya ti mukuint jiinmiai uunt jiniumia áintsan. Tura etsancha tee awajsamai, yuranmincha tee awajsamai.

<sup>3</sup> Nuyá nu mukuintiunmaya manchi jíntrar nunká ti yujaarmai. Tura ju nunkanmaya titínkia áinis najamin ajastinian susamu armai.

<sup>4</sup> Chíríchrincha ashí arakmancha ashí numincha yajauch awajsatin suritki-amuyi. Antsu áyatik shuar nijiaínium Yusa naari áarar anujtukchamunak yajauch awajsatin armai.

<sup>5</sup> Túrasha ajaktsuk senku (5) nántutin wáitkiastin susamu armai. Kame titin, shuaran ijiú, najawea núnis najaweatin susamu armai.

<sup>6</sup> Nují shuar wari jakataj tuínaiyatan jákachartatui. Ti wakeruiniyatan jákatniun tujinkartatui.

<sup>7</sup> Manchisha ísam mesetnum weena nu kawaiya áinis armai. Kuri tawaspa áinis etsenkraku armai. Yapjisha shuarna áinis armai.

<sup>8</sup> Intiashísha nuwanua núnis armai. Najisha úunt yawá najiya núnis armai.

<sup>9</sup> Netsepén namaka saepea áinis jiru péeramu armai. Tura nanamenaksha kaway karu japiiniak mesetnum tsékeena núnisan téter ajarmai.

<sup>10</sup> Ujukésha titínki ujukea áinis asa janí ajakin armai. Nujai tuke senku nantu yujarsar shuaran íjuar wáitkiastin armai.

<sup>11</sup> Ni uuntrisha nánkatkachu waa uraimia nuyaiti. Nusha Israerchichamjai Apatún tutainti. Tura Kriaku-chichamjainkia Apuriún tutainti. Nuka Yajauch Awajkartin tawai.

<sup>12</sup> Jujai emka wáitsatin nankaamasai. Túrasha tuke jímiar taasai.

<sup>13</sup> Nuyá suntar saisa nu kachun umpuarmatai chichaman antukmajai. Yusaj naka kunkuin ekeemaka Yus-sutai kurimpramu amai. Tura ni kuaru yantame kachu jiinmiai. Tura nuyá chichaak

<sup>14</sup> suntar kachu takakun saisa nuna timiai “Kuaru suntar Eupratis kanusá pujuinia nu atiram akupkarta.”

<sup>15</sup> Túrantai nu kuaru suntar wear menaintiu nakakam untsurí shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atiatin ikiusma armai.

<sup>16</sup> Tura suntarnasha kawainium eketainian wainkiamjai. Tura timiá untsurí nekapmarchamnia asamtai aya númirurín antukmajai. Nusha jimirá sianu miyún (200.000.000) armai.

<sup>17</sup> Tura ímiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapaaku winíka tura yanjú armai. Tura kawaiasha úunt yawáa muuke áinin armai. Tura ni wenyasha jisha, mukuintiusha, asuprisha ti tsuer keá nu jíniarmai.

<sup>18</sup> Nu menaintiu ti yajauch wáitsamujai menaintiu nakakam shuar untsurí jákarmai. Jijíajisha, mukuintiujaisha, asuprijaisha jákarmai.

<sup>19</sup> Nujai nu kaway ni wenejai shuáran wáitkiasarmai. Tura ni ujuké napí múukeya áinin armai. Nújaisha shuaran wáitkiasarmai.

<sup>20</sup> Tura nujajisha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha tikishmatratniun iniaisacharmai. Nu ántar-yus kurijajisha, kúitjajisha, jiru yanikutakujajisha, kayajajisha, numijajisha najanamu ásar wainmaktinniasha, antuktinniasha, tura wekasatniuncha tujintiainiawai.

<sup>21</sup> Núnisan mankartuatniuncha, wawekratatniuncha, tsanirmatniuncha, tura kasamkatniuncha iniaisacharmai.



## 10

### *Papichin suntar takusmia nu*

<sup>1</sup> Nuyá chíkich kakaram suntar nayaimpinmaya táarun wainkiamjai. Nusha yurankim amúámu tura múuknum tuntiák téntakmauyi. Yapísha etsajai métek wínchauyi. Tura kujapésha ji keá áintsankeyi.

<sup>2</sup> Nusha papin urak takakauyi. Tura imiá uunt asamtai ni nawé untsuurnumani nayaantsanam tura menarini kukar tarimias wajasmai.

<sup>3</sup> Tura uunt yawá kakar shiniak chicháa áinis ti kakaram untsumkamai. Nujai siati (7) ipiamtasha chichasarmai.

<sup>4</sup> Nii chichasarmatai ni chichamen áartiniujai tura nayaimpinmaya chichartak “Áaráip, túrutmiai. Juka nekanashti” túrutmiai.

<sup>5</sup> Tura nuyá, suntar nayaantsanmasha tura kukarsha tarimias wajama nu ni uweje untsuuriñ nayaimpinmaanji takuimiai.

<sup>6-7</sup> Tura timiai “Penké ishichik ajasai. Suntar siatia nu umpúakuinikia Yus ashí yaunchu enentáimpramia nu uminkiatawai. Emka ujatsuk ukunam ni shuarin Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nunkancha, nayaantsancha, tura ashí nuñ írunna nunasha najanaiti” timiai.

<sup>8</sup> Nayaimpinmaya “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsurini papin urak takakna nu achiktá” turutmiai.

<sup>9</sup> Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakeminkia yapamprattame” túrutmiai.

<sup>10</sup> Nuyá papichin suntarnumiá jukin yuamjai. Tura nii turutmia núnisan wenuruinkia ti yumin nekapramjai. Tura antsu yuan wakeruinikia yapampramjai.

<sup>11</sup> Tura nuyá turutiarmai “Waketkim ataksha ashí nunkanmaya shuaran tura ni kapitiánrincha Yus tana nu ujakartiniaitme.” Tu túrutmiai.

## 11

### *Jimiará shuar Yusaia akupkamu*

<sup>1</sup> Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram namañ-maa-Yus-sutaisha nekapmartá. Tura nuñ Yúsan shiir awajeena nusha nekapmartá.

<sup>2</sup> Antsu jea áarinikia yajaya shuar susamu asamtai nekapmatsuk ikiuktiá. Nu shuar ti shiir péprun Jerusaréñkan kuarentitús (42) nantu nuñ akupeenak mash yajauch awajsartatui.

<sup>3</sup> Túruiniakui Wikia Wii-shuaran jímiaran akatran akupkattajai. Nusha chikichik mir jimiará siantú sesenta (1.260) tsawant pujusar Winian etserkartatui. Nuka menaintiu uwí nankaamasaiti. Úutkur-entsatai pushin entsaru ártatui.” Tu turutiarmai.

<sup>4</sup> Nu jímiar shuarsha nayaimpiniam nakumkamu áiniawai. Uriwiu numisha jímiar tura shirikip ekeemataisha jímiar nayaimpiniam awai. Nusha ju nunká Uuntri Yusaj wajainiak, jímiar akatramua nú shuaran nakumaini-awai.

<sup>5</sup> Shuar nin yajauch awajsataj tutai ni weneniá jinia jiki nemasri ashí áesatniuiti. Núnisan nin yajauch awajsatniun wakera nuka jákartatui.

6 Nu aentska Yúsnañ áujmatainiak yumi yutukajp títinian kakarman takakainiawai. Núnisañ entsancha numpa awajsatniun kakarman takakainiawai. Tura ashí yajauchia nujaj aentsun wáitkiastinian takakainiawai. Nuna ashí ni wakeruinia nuj páchitsuk túramin áiniawai.

7 Tura ni takatrñ umikiarmatai Ti Kajen Yajasma náñkatkachu wañmaya jüinia nu mesetan najata nupetak máawartatui.

8 Tura iwiarnatsuk ni ayashí uunt pepru jintüin ajapén tepeartatui. Nu péprunmasha ii Uuntri Jesukristuncha máawarmiayi. Nu péprunmaya shuar tuke tunaan túrin áarmatai Ejiptu tuñiak tura núnisañ Sutuma tuñiak nu péprun páchiiniawai.

9 Tura menaintiu tsawant nuyá nañkaamas ashí nuñkanmaya shuar jaka tepan lisar iwiarnascharti tiártatui.

10 Nu jákarmatai ashí nuñkanam pujuinia nú shuar ni jakamun ti wararainiak mai sunai ajartatui. Kame nu jimiará aents Yúsnañ áujmatenak ashí shuaran wáitkiasaru áarmatai ti warasarmai.

11 Nuyá menaintiú tsawant nuyá nañkaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashankarmai.

12 Nuyá nu nantakiaru nayaimpinmaya kakaram untsumman antukarmai: “Jüi yakí wakatarum.” Tu untsummiái. Tutai ashí ni nemasrj íimiainiañ yurañkim amuam nayaimpiniam wákarmai.

13 Túmainiañ ti úrkamtaí tias nakakam jeeá pepru saanakmiai. Tura siati mir (7.000) shuar jákarmai nu uujaj. Chíkíchikia sapijmiainiak Yus nayaimpiniam pujana nuna shiir awajsarmai.

14 Jímiar wáitsatin nañkaamasai. Chíkíchik ajasua nu túrunatin ishichik ajasai.

### *Suntar siatia nu kachun umpuarmai*

15 Nuyá suntar siatia nu, kachun umpuarmatai chícham kakaram chichainian nayaimpinmayaan antunkamai. Juna tímiayi:

“Yamaikia ii Uuntri Yus tura ni Anaikiamu Kristu ashí shuaran akupin ajasaraí. Niisha tuke amutsuk akupkartatui.”

16 Nuyá paintikuatru uuntka akupin pujutainium Yusaj naka pujuarmia nu piniakum tepersar Yúsnañ shiir awajenak tiarmai:

17 “Uunt Yusá, ti kakaram asam Ámijjaj tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmijjaj nekas akupkatin juarme yamaikia. Tuma asakmin yuñsajme, tiarmai.

18 Ashí shuar kajertamkaru ajñ yamaikia amesha kakerkatin tsawant jeayi. Jákarusha iniantkim ni túramurj íisartatme. Turam amée shuarka shiir etser-turmakua nusha, tura Aminiak enentáimturmasaru nusha, tura Ámin shiir awajtamsaru nusha ashí mash ti shiira nuna súakum akiktatme. Antsu ju nuñkan emesniuka ashí emesratniunam akupkattame.” Tu tiarmai.

19 Tuñiakui Yusa Uunt Jeeñ nayaimpiniam ana nu uranmiatai wakenmaani Chícham Aarma Chumpitiai paant amai. Túrunamtaí peemsha, ipiamtasha, cháarpisha, uusha amai tura michasha ti kakekamai.

1 Nuyá nakumkamu ti enentáimpramnia nayaimpiniam wantinkiamai. Nuwá etsajaj penuarma wantinkiamai. Nawesha nantunam ekeemai. Tura múuknum tuse yaan etsenkrakuyi.

2 Nu nuwá ajamtin asa jurertaj tusa wáitiak ti kakantar uutmiai.

3 Tumaj ataksha ti enentáimpramnia nayaimpiniam wantinkiamai. Ti Kajen Yajasma kapaaku wantinkiamai. Muukeshá siati asa siati akuptai tawaspan etsenkraku áрмаi. Tura kachurjsha tiásauyi.

4 Menaintiu nakakam jeeán yaan ni ujukéjaj japiki akakermai. Tura nunká utsamai. Nu Ti Kajen Yajasma nu nuwá jatema nuj wajasmai. Júermataik yuruataj tusa wajattsamai.

5 Tura nuwásha áishmankan jurermai. Nu uchi uunt ajas ashí nunkanam ti kakaram akupkatin asa, nu uchi akupin pujutainium Yus pujana nuj junakmiai.

6 Tura núwaka atsamunam pisarmai. Nu jujustinian Yus iwiarturmai. Tura chikichik mir jimiará siañtu sesenta (1.260) tsawant ayurnat tusa akupkamai. Nuka menaintiu uwí nankaamasaiti.

7 Nuyá nayaimpiniam meset amai. Nayaimpinimaya suntara kapitiantri Mikiar ni suntarijjaj Ti Kajen Yajasmajaj máanaikiarmai. Ti Kajen Yajasmasha ni suntarijjaj ti máanaikiarsha

8 nupetmakcharmai. Túramtai nayaimpinimaya jjiiki akupkamuyi.

9 Núnisaj Ti Kajen Yajasma ashí ni suntarijjaj nunká akupnakmai. Nu Yajasmasha iwianchi kapitiantri Satanás tutainti. Yáunchuya-napiiti niisha. Ashí nunkanmaya shuáran anañniuiti.

10 Nuyá nayaimpinimaya kakaram untsunnan antukmajaj. Tura timiai: “Uunt iwianch ii yachin yajauch áujmatin jjiiki akupkamu asamtai yamaikia ii Yusri uwentikratniusha tura ni kakarmarin iniakmastingha tura akupkatniusha jeayi. Anaikiamu Kristusha ashí akupin ajastincha jeayi. Tura uunt iwianch ii yachin tsawaishá káshisha iniaitsuk Yusaj yajauch áujmatniua nuna

11 iksan ii yachí nupetmakarai. Yus-susamu murikiu numpea áinis Jesukristu numpejaj nupetmakarai. Niisha jákatniuitkiusha surimiatsuk nekaschichaman páchitsuk etserkarmai. Nujajsha uunt iwianchin nupetkarmai.

12 Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantri ishichik ajatesman nekáa ti kajekuiti.” Tu timiai.

13 Nuyá Ti Kajen Yajasma nunká ajapna nuwá áishmankan jurerma nuna áinramai.

14 Turakui nuwan uunt nanapen churuwia nanapea áinis sunasmai. Nujaj nanamuk yáunchuya-napiya pisar atsamunam wemai. Tura ni ayuratniunam menaintiu uwí nuyá sais nantu pujusmai.

15 Nuyá nu napi ni weneya entsá jjiiki nujankrumamai nuwan ajekrataj tusa.

16 Túrasha nunka nuwan yayak nakaak nu entsan mash ukuyámai.

17-18 Túramtai nuwan ti kakerak ni weeá chikich íronna nujaj máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, niijjaj máaniaktaj tawai.

1 Nuyá nayaantsa káanmatkar<sub>in</sub> wajasan nayaantsanmayá Yajasma jiniun wainkiamjai. Muukeshá siátitiat kachur<sub>i</sub> tias tura akuptai tawaspasha tias armai. Ashí muuken Yúsan yajauch chichar<sub>in</sub> tu áarmauyi.

2 Nu<sub>i</sub> wáinkiamaj nu Yajasma nekas uunt yawáa áinniutiati nawenka chaj naweá áinniuyi. Weneshá nekas kajen yawáa áinniuyi. Tura Ti Kajen Yajasma Entsaya<sub>u</sub> Yajasma ni kakarmar<sub>in</sub>cha tura ni akupkatniur<sub>in</sub>cha susamai nujai<sub>i</sub> ti kakaram akupkati tusa.

3 Entsaya<sub>u</sub> Yajasma muuké chikichkin jakamnia awatmian wainkiamjai. Túrasha penker awajnasmai. Túramtai ashí nunkanmayá shuar nuna ísar ti enentáimturar nemarsarmai.

4 Túrawar nin tikishmatrar shiir awajsar “¿Yaki jujai<sub>u</sub>sha jeá. Imiá kakaram asantai yaki niijjai<sub>i</sub> máanaikminiati?” tiarmai. Tura Ti Kajen Yajasma ni kakarmar<sub>in</sub> Entsaya<sub>u</sub> Yajasma susa asantai ashí shuar nincha tikishmatrarmai.

5 Núnisa<sub>n</sub> nu Entsaya<sub>u</sub> Yajasma waantu enentáimtumak Yúsan yajauch chicharkatniusha tsan<sub>u</sub>katnakmai. Tura kuarentitús (42) nantutin kakaram akupkatniun sunasmai.

6 Núnisa<sub>n</sub> túrak Yúsan yajauch áujmatuk ni náar<sub>in</sub>cha ni Jeencha tura ashí ni shuar<sub>i</sub> nayaimpiniam pujuinia nunasha katsekkarmai.

7 Tura Yusna ainia nujai<sub>i</sub> mesetan najana nupetkatniun tsan<sub>u</sub>katnakmai. Tura ashí nunkanmayá shuaran akupkatniun tsan<sub>u</sub>katnakmai.

8 Túramtai ashí shuar tuke iwiaaku átinia nu papinium ni naari yámankamtaiknumia<sub>u</sub> anujkamu atsúarma nuka nu Yajasma tikishmatrarmai. Nu papincha Murik<sub>u</sub> jaka nantakmia nu takakui.

9 Shuar juna ántakka enentáimprati:

10 “Shuaran emetá juinia nusha emetnattawai.

Núnisa<sub>n</sub> shuaran nan<sub>u</sub>kijjai<sub>i</sub> mainia nusha nan<sub>u</sub>kijjai<sub>i</sub> mantamnattawai.”

Tuma asantai Yajasma mesetan najanamtai Yus-shuar Yus iisti<sub>u</sub> tusar tuke enentáimtusar katsuntsar pujustin áiniawai.

11 Nuyá chikich Yajasma kukaria<sub>u</sub> wáakun wainkiamjai. Nusha murikiu áanin jimiara<sub>u</sub> kachurtiniuyi. Tura Ti Kajen Yajasma áinis kakaram chichaakuyi.

12 Niisha Entsaya<sub>u</sub> Yajasma kakarmar<sub>in</sub> súam akupniuyi. Tura ashí nunkanmayá shuaran “Entsaya<sub>u</sub> Yajasma penké<sub>u</sub> jaa tsuarma nu, shiir awaj<sub>u</sub>nasti” tímiai.

13 Núnisa<sub>n</sub> shuarti túrachminian ti turin asa ashí shuar ímiainai<sub>n</sub> nayaimpinmayá jinia nunká<sub>u</sub> ajuarmai.

14 Tura Entsaya<sub>u</sub> Yajasma súam aents túrachminian ti turak ashí nunkanmayá shuaran anan<sub>u</sub>kawarmai. Túrak Entsaya<sub>u</sub> Yajasma nakumkamur<sub>in</sub> najanawarat tusa akupkamai. Túramtai puniajai<sub>i</sub> penké<sub>u</sub> jakamnia awatmia penker ajsama nuna nakumkamur<sub>in</sub> najanawarmai.

15 Kukaria<sub>u</sub> Yajasma kakaram sunasmai. Nujai<sub>i</sub> Entsaya<sub>u</sub> Yajasma najanamun iwiaaku awajsatniua áintsan<sub>u</sub> ichachkiamai. Túram ashí níniak shiir awajeacham máatniun susamai.

16 Nu arantcha ashí shuar anujmamprarat tusa akupkamai. Uuntcha uchisha kuítriniusha kuítrinchasha an<sub>u</sub>kantchasha ashí ni ni<sub>u</sub>jai<sub>n</sub>cha tura wakerakka untsuur<sub>in</sub>cha anujtuktiniuyi.

17 Entsaya<sub>u</sub> Yajasma náar<sub>in</sub> tura wakerakka ni náari<sub>u</sub> númirur<sub>in</sub> anujtuktiniuyi. Túrachuka sumatnasha sumakchamniuyi, surutnasha surukchamniuyi.

18 Wats, wi tájana ju nekaatniuka ti nekas enentáimtustiniaiti: Entsaya Yajasma númururj áishmanka númururj asa sais siañtu seséntisáisaiti (666). Ashí ti neka ainia nú shuar Entsaya Yajasma númururjñ nekapmar nin nekaati.

## 14

### *144.000 shuar Yúsán kantampruawarma*

1 Nuyá Murikiun Señ náinnium wajan wainkiamjai. Nijiajsha siañtu kuaréntikuátru mir (144.000) shuar wajaarmai. Nusha nijiaj Murikiu náarñncha tura ni Aparj náarñncha anujtukma aarmai.

2 Ti untsurj árpan nayaimpiniam túntuiniak teer awajenak kanusa uuntri nujankrak téter ajá núnisan antukmajai. Ti kakaram ipiamta núnis amai.

3 Nu tuntuiyamujaj siañtu kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuartru tanñunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armai. Aya nu siañtu kuaréntikuátru mir shuarka jú nunñkanmaya shuarnumiá uwempraru ásar nu kántan kantamiarmai.

4 Nu shuarsha nuwajaj yajauch ajascharu ásar ti shiir ániawai. Túrawar Murikweana nuj nemarainiawai. Ju nunñkanmaya shuarnumiá uwempraru ásarmatai Yussha tura Muriksha ti shiir enentáimtiarmai. Niisha emka juukma ti shiira núnisan armai.

5 Nu shuar penké wáitruachu ásar Yúsajsha ti shiir tunáa máatrachu armai.

### *Menaintiu suntar chichaman etserainiawai*

6 Nuyá nayaimpiniam suntar nanamun wainkiamjai. Nusha uwempratin chicham tuke amuukashtinia nuna ashí nunñkanam pujuinia nú shuaran ujaktiniuyi.

7 Nusha ti kakantar utsumuk timiai: “Yus ashamkatarum. Nínki shiir awajsatarum. Yamaikia ashí shuaran súmamtikiawartin tsawant jeayi. Nayaimpincha nunñkancha nayaantsanacha ashí entsanacha najana asamtai shiir awajsatarum.”

8 Nuyá chíkich suntar, jímiara nu, taa timiai: “Pai, Uunt Papirúnia pépruka penké meserai. Niisha tuke tsanirmaua núnisan ashí shuaran anampratniua núnisan utsuurmai. Tuma asa niisha nú shuarjaj nupetnak tuke emesnarai.”

9 Nuyá chíkich suntar, menaintiua nu, taa timiai: “Shuar Entsaya Yajasma ncha tura ni nakumkamurñncha shiir awajeakuñkia tura nijiajñniumsha uwejnnumsha ni naarj anujtukmaitkuñkia

10 Yus nin kakerak ti asutiáttawai. Yapá pachimprachman áartinia áintsan ti kakerkattawai. Túramtai asupri ti tsúer keá nujaj jinium wáitsartatui. Yusa suntarj tura Murik ímmianum apenáwar jinium wáitsartatui.

11 Ni wáitsatniurj jí esaak kajintsuk tuke mukuintia nuniskete. Entsaya yajasman tura ni nakumkamurin shiir awajeenak ni naarj anujmamañnia nuka tsawajsha káshisha ayamtsuk wáitsartatui.

12 Nu asamtai ni chichamen umirainiak Yusna ainia nuka Krístun ti shiir nemarainia ásar nu tsawantaj itirchatnum pujuiniak katsuntratin ániawai.”

13 Nuyá nayaimpinmaya chichaman antukmajai. Nusha turutmiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

‘Núnisan Yusa Wakanj tawai. “Eta, ti takasaru ásar jakar yawerman ayamprartatui. Tura ti penker túrawar akinkiertatui” tawai” turutmiai.

*Jú nunñkanam arakma juukma*

14 Nuyá yuraṅkim pújun wainkiamjai. Tura yuraṅminiam Aents Ajasua nuna eketun wainkiamjai. Akuptai tawaspan kurijjaj najanamu etseṅkrakuyi. Tura machitian éren takakuyi.

15 Tura chíkich suntar Yusa Uunt Jeeniā jiinki yuraṅminiam eketun kakantar chicharuk tímiai “Árak júuktin tsawant jeayi. Machitrumjaj tsupiram juuktá.”

16 Tutai yuraṅminiam eketu ni machitrijjaj nuṅká arakman tsupir juukmai.

17 Nuyá chíkich suntar Yusa Uunt Jeē nayaimpiniam ana nuyá jíinkimiai. Niisha ni machitrī éren takakuyi.

18 Tura chíkich suntar naman̄ maar Yus-sútainmayā jíinkimiai. Niisha jinia wáinniuyi. Tura máchit ti éren takakun kakantar chicharuk tímiai “Machitrum ti érea nujaj uwa nuṅká arakma nu tsupiram juuktá. Mash tsamakarai.”

19 Tutai suntar ni machitrijjaj ashí nuṅkanmayā uwa nerēn tsupir juukmai. Tura neketainiam chumpiamai. Nu neketai Yus ti kajerak shuáran ti asutiáta nuna nakumeawai.

20 Tura uunt péprunmayā arantach ijiurarmai. Tura neketainmayā numpa jíinkimiai. Nu numpa tres siaṅtu (300) kírumitrua nū pajamar kawayu nujjaj̄ métek ajasmai.

## 15

*Nayaimpinmayā suntar amúamunam wáitkiastinia nuna piniṅnumiaṅ ukainiawai*

1 Nuyá ashammain ti enentáimprannian nayaimpiniam wainkiamjai. Siati suntar amúamunam wáitkiastinia nuna takusarmai. Nujaj̄ jū nuṅkanam yajauch shuáran ti wáitkiasar Yus kajeamun umirtatui.

2 Nuyá antumiaṅka áiv 20 Tura uunt péprunmayā aranntsān ti saar jijjaj̄ pachimpramun wainkiamjai. Ni káanmatkar̄incha Entsayā Yajasman tura ni nakumkamur̄incha nupetkarma nū wajaarmai. Tura nin arpa tuntuitiain Yus súsarmai.

3 Túramtai kantamáwarmai. Yusa yaintrī Muisaisa kantar̄incha tura Murikiu kantar̄incha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme.

Ashí Uunt Akupin asam ashí nekasa nu túrasha péṅkera nu túriniaitme.

4 Uuntá, zyaki ashampramkachat̄i. Tura yaki ti shiir awajtamsachat̄i? Aya Amek ti shiir tunaarinchaitme. Ashí nuṅkanmayā shuar ame ti shiir túramun wáinkiár Aminiak jeartamar ti shiir awajtamsartatui.”

Tu kantamáwarmai.

5 Nuyá atak Yusa Uunt Jeēn íisan, Ti Shiir Tesaamun uranniun wainkiamjai.

6 Tura Ti Shiir Tesaamunmayā siati suntar siati wáitkiastinjaj̄ jíinkiarmai. Niisha ti shiir pújun entsaru armai. Netsepnumsha kurin emenmama armai.

7 Nuyá kuartru taṅkunmayā chikichik kurí piniṅkian súsarmai. Nu piniṅtuke iwiaaku Yusa kajetairijjaj̄ piaku armai.

8 Tura Yusa kakarmar̄i ti ashammai Ti Shiir Tesaamunam mukuintia núnis piakmai. Túramtai nū siati suntar wáitkiastinian ukarar amuiniatsaj̄n Yusa Jeēn wayachminiuyi.

## 16

*Wáitkiastin pinin ukararma*

<sup>1</sup> Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nuńká werum Yusa kajetairi siati pininnum ana nu ashí ukartarum.”

<sup>2</sup> Tutai emka suntar we, pininnumiá kukar ukarmai. Túramtai ashí shuar Entsaya Yajasma náarin anujmamprar ni nakumkamurin shiir awajiarma nuna ti najamin kuchap jiintiurarmai.

<sup>3</sup> Nuyá chíkich suntar jimiara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nuí pujuinia nu kajinkiarmai.

<sup>4</sup> Nuyá suntar menaintiua nu, entsanam tura púkunimasha ukarmai. Túramtai ashí numpa ajasarmai.

<sup>5</sup> Nuyá suntar entsá wáinnia nuna chichamen antukmajai. “Uuntá, amek ti penker Yus asam jútikiame. Yáunchusha tuke pujú asam ti shíiraitme.

<sup>6</sup> Iis, nu shuar amée shuárumincha tura ame chichammin etserniuncha máawar ni numpen ukatraru ásmaratai Amesha núnismek numpa áarume. Maa, páchitsuk áitkianatin ániawai.”

<sup>7</sup> Tutai naman-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujaj métek akiruitme, timiai.”

<sup>8</sup> Nuyá suntar kuarua nu, tsawaj nantunam ukarmai. Túramtai jijjai shuáran esaamujaj wáitkiastin kakaram sunasmai.

<sup>9</sup> Tura shuar ti sukuám wáitiarmia nu, nu wáitkiastinian nérenniun Yusan yajauch chicharkarmai. Tura ni tunaarín enentáimsuk Nin shiir awajsatniuncha penké nakitrarmai.

<sup>10</sup> Nuyá suntar senkua nu, Entsaya Yajasma akupin pujutairin ukarmai. Túramtai ni nunkeen ashí kashi ajasmai. Tura shuar ti najaimiainiak iniajncha esamiarmai.

<sup>11</sup> Tura nújajsha yajauch túratniuncha iniaisacharmai. Antsu kuchapríjjajsha tura ti najaimiainiak wáitiainiak nayaimpinmaya Yúsan ti yajauch chicharkarmai.

<sup>12</sup> Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaaniá akupin taarti tusa jintiamnamai.

<sup>13</sup> Tura nuyá juna wainkiamjai. Ti Kajen Yajasma weneyasha, Entsaya Yajasma weneyasha tura núnisan penké Kukariá Yajasma ántar yúsnan etserniua nuna weneyasha puachia núnin yajauch wakan menaint jiniarmai.

<sup>14</sup> Íwianch ániak aents tujintiamun túruiniak ashí nunkanmaya akupniun irurarmai. Ti Tujincha-Yusaj ni uunt tsawantri jeamtai mesetan najanatai tusal weriarmai.

<sup>15</sup> (Yamáí Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairin penker wáinia nú shuar ti shiir átatui. Misuchu asa natsaarchattawai.” Tu tawai.)

<sup>16</sup> Tura yajauch wakan uunt akupin ánian Armajetún nunkanam irurarmai. Israer-chichamnum nu nunka tu anaikiamuiti.

<sup>17</sup> Nuyá suntar siatia nu, nasenam ukarmai. Túramtai nayaimpinmaya Yusa Uunt Jeeniá ti kakaram chicham Yus akupin pujutainmaya chichaak “Mash uminkiai” timiai.

<sup>18</sup> Tura nuyanka peemsha, chárpisha, ipiamtasha ajamai. Tura nunkasha ti kakaram úrkamai. Maa, aents jú nunkanam yámankamtaik pujuarmia nuyá júnis úrkamuka atsuwiti.

<sup>19</sup> Ti Uunt Péprusha menaint nakantramai. Ashí nunkanmaya péprusha saanakiarmai. Nujsha Yus ti kajerak Papirúnia pépruncha kajinmattsuk ni kajetairín yapá umutaia áintsan aarmai.

<sup>20</sup> Entsá ajapén atentrasha tura murasha menkaramai.

<sup>21</sup> Núnisan nayaimpinmaya uunt kaya núnisan micha kákeramai. Ti uunt ániak kintiarjai métek kijin armai. Shuarsha nujai ti wáitianiayatan áyatik Yúsan yajauch chicharkarmai.

## 17

### *Tsanirmatai nuwá asutiámu*

<sup>1</sup> Nuyá siati suntarnumiá chikichik taruti turutmiai “Winitia. Tsanirmatai nuwá ti asutiátniun iniaktustatjame. Nu nuwá nayaantsanam uku eketui.

<sup>2</sup> Ashí jú nunkanmaya akupin nijjai tsanirmawaru ániawai. Núnisan ashí jú nunkanmaya shuar, nu nuwá tsanirmatniun tsankateam, nijiamanch umartinia áintsar nijjai ti yajauch túrawar nampekarmai.” Nuna taku Yusnumiá kanaktinian nakumkamai.

<sup>3</sup> Nuyá mesekranam kampuntin atsamunam jurukmiai. Tura nuj Yajasma kapaakunam nuwá eketun wainkiamjai. Nu Yajasma manmasha ashí Yúsan yajauch chichareamu áatramuyi. Muuke siátitiat kachurj tiásauyi.

<sup>4</sup> Nu nuwasha tarachin yamakai kapaakujajisha ti shiir iwiarmamar entsaruyi. Kurijajisha, shiirmach kayajajisha, ti shiir sháukjajisha iwiarmamprauyi. Kurí piniñkian mujmiainniasha tura ashí ni tsanirmatairj imiá yajauch armia nunasha piakun ajaamak takakauyi.

<sup>5</sup> Nijjainiumsha ni naarja áintsan yúpichuch nekaachminia nu júnis áarmauyi: UUNT PAPIRÚNIA, Ashí Tsanirmauncha tura Ashí Jú Nunkanam Mujmiainian Túrinia Nunasha Nukurinti.

<sup>6</sup> Nu nuwasha Yus-shuar Krístunon etserkar máawarma ainia nuna numpen nampekuyi.

Nuna wáinkian ti enentáimturmajai.

<sup>7</sup> Túrunamtai nayaimpinmaya suntar túrutmiai “¿Urukamtai imiá enentáimtam? Wats, ashí nuwanun paant ujaktatjame. Núnisan yajasma ekenak júana nunasha paant ujaktatjame. Muukeshá siátichukait tura kachurjisha tiáschak áinia.

<sup>8</sup> Nu yajasma wáinkiam nuka yaunchu pujuwiti tura yamaikia juj pujachiat amúamunam tuke játsuk nánkatkachu wáanmaya jíinkítiawai. Shuar nuna wáinkiar ni naari tuke iwiaaku pujutai papinium yámankamtaiknumiá anujtukchamua nuka nu yajasma ashankartatui. Nu yajasma yaunchu pujú yamaikia atsayat atak wantinkiattawai’ turutmiai.

<sup>9</sup> ‘Nekas neka ainia nu júna enentáimturarti: Siati muukenka siati náintian nakumui. Nu nuwá nuj eketui.

<sup>10</sup> Núnisan ni siati muuke siati akupniun nakumui. Kame senku akupniuka nankaamasaru ainiawai. Chikichik tuke akupniuiti tura chikichka tuke taatsui. Nii taasha núkap tsawant akupkashtatui.

<sup>11</sup> Nuyá ashí ukunmanka yaunchu amia nú yajasma wantiniak nujai uchu akupin ajastatui. Túmaitiat chikich siati akupniujai iruram métek



enentáimpranniaiti. Tura nu yajasma yamaikia atsayat wantiniak akupak umik tuke emesnartinnium wétatui' turutmiai.

<sup>12</sup> Tias kachurj wáinkiam nuka tias akupin tuke akupeenatsna núiti. Niisha nu yajasmajaj métek penké ishichik tsawant akupin ajasartatui.

<sup>13</sup> Ju tias akupniusha métekrak enentáimiainiak ni kakarmarj yajasma súsartatui nújaisha akupkat tusa.

<sup>14</sup> Murikjaisha mesetan najanawartatui. Túrasha Murik nupetkartatui. Niisha uuntjaj nankaamas Uunt asa tura núnisañ akupniujaj nankaamas Akupin asa nupetmaktatui. Tura Nijijaj írutraa nu, Yus Winia atí tusa achikma ásar tura Nin tuke umirin ásar Nijijaj nupetmakartatui.'

<sup>15</sup> Suntar tuke chichartak turutmiai 'Tsanirmatai nuwá nayaantsanam uku eketu wáinkiachumek. Nu nayaantsaka ashí nunkanmayá shuáran nakumeawai.

<sup>16</sup> Tura tias káchuka yajasmañ wáinkiam nu, tsanirmatai nuwáñ nakitrar ajapawar misú ikiukiartatui. Ni ayashíncha yuawartatui tura áesawartatui.

<sup>17</sup> Nu akupniu enentáin Yuska ni wakeramurj apujsaiti. Nii timia nu umintsajñ akupniusha métekrak enentáimprar ni kakarmarj takamtsuk yajasma súsatniun enentáimtikramai.

<sup>18</sup> Nuwá wáinkiam nuka ashí nunkanmayá akupniun akupeana nu pépruiti."

## 18

### *Papirúnia emesramuiti*

<sup>1</sup> Nuyá nayaimpinmayá suntar táarun wainkiamjai. Ti kakaram akupin asa nunkancha tsáapin awajsamai.

<sup>2</sup> Tura ti kakantar chichaak timiai "Pai, Uunt Papirúnia penké meserai. Tura yamaikia íwianch matsamtaisha ashí yajauch wakanj pujutairisha ajasai. Mujjmiai nanamtincha tura ashí yajauch nanamtin ainia nusha nuj pasunmainiawai.

<sup>3</sup> Nu péprunmayá shuar tuke tsanirmaua núnisañ ashí nunkanmayá shuaran anampratniua núnisañ ni ti yajauch turamujaj utsuurmai. Núnisañ ashí jú nunkanmayá akupin Yúsan iniaisar nijijaj tsanirmawarua áinis áiniawai. Tura shuarsha ni yajauch wararmajaj ti kufrintin ajasaruiti." Tu timiai.

<sup>4</sup> Nuyá nayaimpinmayá ti kakantar chichaman antukmajai. "Wii shuaraitrumna nuka nú peprunmayá jinkitiarum. Túrachkurmeke ni tunaarj jumamkirum ni wáitsatniurjñcha pachiinkiatarme.

<sup>5</sup> Ni tunaarjsha ti piak nayaimpiniam jeastatuk ajasai. Tuma asamtai Yus ni tunaarjñ kajinmatkichiuiti.

<sup>6</sup> Ni tunáa túramujaj métek akikiam ataksha nuna nankaamas métek patattsata. Ni yajauch túramu nijiamchin ashí áararma núnisañ nuna nankaamas ti wáitsatin nijiamanch pachimpruram susata.

<sup>7</sup> Waantu enentáimtumak yajauchin wararsama nujaj métek ti wáitkiastá yamaikia. Tunáan ti túriniaitiat ni enentáinkia enentáimias "Uunt Akupniuit-jai. Wajechu asan penké wáitsashinaijtaj" tu enentáimtumawai.

<sup>8</sup> Tuma asamtai ti wárik chikichik tsawantaj ni wáitsatniurj tarittiawai. Jákatniusha ti wáitsatniusha tura tsukasha tarí ashí jijjaj ekeemankattawai. Uunt Yus ashí Tujincha nu kajerkamu asa nujaj asutniáttawai." Tu timiai.

<sup>9</sup> Ashí nunġanmaja akupin niijjaj tsanirmawaru ainia nu ashí yajauchin niijjaj wararsaru ásar nu pepru esaak múkuint ajakui eġarmai.

<sup>10</sup> Ti esaak wáitiakui nuġ pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruitiat nekas wáitnenmai ajawai. Imiá wárik ni wáitsatniurġ tarini.”

<sup>11</sup> Núnisaġ ashí nunġanam súrin ainia nusha nu péprun ti kuntuts enentáimturar eġartatui. Ni surutain itiamun ġyaki sumarkat?

<sup>12</sup> Kame ġuna itiaru áiniawai: kurincha, kuítniasha, kaya shíirmachincha, ti shiir sháuknasha, ti péŋker tarachniasha, akupin entsatai shiirmachin yamakaincha kapaġaniuncha, sétanġha, itiaru áiniawai. Núnisaġ ashí kunġuin numincha, ti shiir awara najanamuncha, ti shíiram numincha, yanġkú ġiruncha, penġké ġiruncha, mármur kayanġha itiaru áiniawai.

<sup>13</sup> Núnisaġ ishpiġnasha, nusháa kunġuinniasha, mira kunġuinniasha, umutainġha, asuítinġha, trikiu nerenġha, tura trikiu ti péŋker nekenmanġha itiaru áiniawai. Núnisaġ áintstai taŋġuncha, murikniasha, kawainġha ni kárurġijjaj, tura nú arantka shuárnasha suruktinian itiaru áiniawai.

<sup>14</sup> Tura nu péprun tiarmai “Numí neren ti wakeruk súmauya nu yamaikia nuġ atsawai. Ashí ni kuítriġsha tura ashí ni péŋkerġsha tuke penġké amuukayi.” Tu tiarmai.

<sup>15</sup> Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar eġartatui.

<sup>16</sup> Túrawar tiartatui “Maa, uunt pépruitiat ti wáitnenmai ajakai. Nuwa ti penġker iwiarmampra áinis nuyá shuar akuptai tarachin yamakaijjaj kapaġaku entsarmai. Kurġijaisha kaya ti shíirmachġijaisha tura ti penġker sháukġajisha ti shiir iwiarmampraruġi.

<sup>17</sup> Ti wárik ashí ġu kuit amukaiti.” Tu tiarmai.

Ashí uunt kanú kapitíántriġsha, ashí nayaantsanam katiinia nusha, ashí kanú wiánniusha, tura ashí kanú nérennurġsha árantak wajasarmai.

<sup>18</sup> Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.”

<sup>19</sup> Tiar ti kuntuts puġiuniak awatmamar kakantar úutainiak tiarmai “Maa, ti uunt pépruitiat ti wáitnenmai ajakai. Ashí uunt kanu nérentin nayaantsanam niijjaj takasar kuítrintin ajasarmai. Tura ti wárik mash emesnarai.” Tu tiarmai.

<sup>20</sup> Antsu nayaimpiniam puġarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamujaj warastarum. Nu wáitsamujaj atumin yajauch awajtamsamarmena nuna yapajtiurmakurme.

<sup>21</sup> Nuyá ti kakaram nayaimpinmaja suntar ti uunt neketai kayan ġuki nayaantsanam aġun timiai “ġúnisaġ uunt pepru Papirúnia emesnar atakka wainniakchatin tuke menġkattawai.

<sup>22</sup> Tura atakka jantsemma pinġkiuisha tampursha shakapsha antunkashtatui. Nu arantġha nuġŋkia shuar penġké takakmaschartatui. Túramtai nekeamusha antunkashtatui. Ashí mitia átatui.

<sup>23</sup> Shiripkinġha ekeemakchartatui. Nuatma nampersha antunkashtatui. Nuikkia ni shuarġ súrin arma nu ashí nunġanam nanġkaamantu armai. Tura ashí nunġanmaja shuaran waweatniua áintsan niġya núnis ajasarat tusa anaŋkawarmai. Túrasha núnisaġ ti kakarmaitiat ġu mash túrunayi.” Tu timiai.

<sup>24</sup> Kame ni akupkamujaj péŋker shuar ti mantamnawaru asamtai nu péprunam ashí yaunchu Yusna etserniu numpesha, ashí Yus-shuara

numpesha tura péñker shuar ashí nun<sub>kan</sub>am maamu ainia nuna numpesha nu<sub>j</sub> paant wáinkiamniaiti.

## 19

<sup>1</sup> Nuyá nayaimpinmaya ti untsur<sub>j</sub> aents kakantar untsu<sub>main</sub>ian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nan<sub>ka</sub>amaku átinniasha, tura ashí kakarmancha nekas nérenniuiti.

<sup>2</sup> Niisha aya nekas péñker túratniua nuna túrin asa ti nukap tsanirmaun ashí shuaran tsanir<sub>jijai</sub> utsuun ti asutiáyi. Nin ti wáitkias ashí ni shuar<sub>j</sub> máawarman yapájmíátkaiti” tiarmai.

<sup>3</sup> Ataksha kakantar untsu<sub>main</sub>iak tiarmai:

“Ti shiiraiti. Nii wáitsatin ji esaak tuke kajintsuk múku<sub>int</sub> ajawai.” Tu tiarmai.

<sup>4</sup> Tuíniakui paintikuatru uunta nu tura kuaru tan<sub>k</sub>usha nun<sub>ká</sub> piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai.

<sup>5</sup> Akupin pujutainimaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitáitkiurmesha pééjchachitkiurmesha, ii Yusr<sub>j</sub> tuke shiir awajsatarum.” Tu timiai.

### *Murik nuatnaikiatin namperi*

<sup>6</sup> Nuyá ti untsur<sub>j</sub> aents chichainiak kanusa uun<sub>trj</sub> nujan<sub>krak</sub> téter ajá núnisa<sub>n</sub> antukmajai. Ti kakaram ipiamta núnis amai.

“Tí shíiraiti, tiarmai. Ii Uun<sub>trj</sub> Yus ashí tujincha asa ashí akupkatniun nan<sub>ka</sub>amayi.

<sup>7</sup> Tuma asamtai shiir enentáimsartai. Murikiu anajmarmar<sub>j</sub> shiir iwiarnarmatai ni nuatnaikiatin tsawan<sub>trj</sub> jeayi. Tuma asamtai ti shiir warasar nincha shiir awajsatai.

<sup>8</sup> Murikiu anajmarmar<sub>j</sub>nia iwiarnarti tusa ti shiir pushí sunasmai. Nusha yamaram máatrachu asa ti pújuiti.” Tu tiarmai.

Nu pushí Yus-shuar péñker túramun nakumeawai.

<sup>9</sup> Nuyá nayaimpinmaya suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Ju<sub>ka</sub> Yus timia asa imiá nekasaiti.”

<sup>10</sup> Takui nu sun<sub>tan</sub>an shiir awajsataj tusan tikishmatramjai. Túramtai turutmiai “Peñke áinkiaip. Wisha Yusa yáin<sub>trj</sub>ntjai ámijjai métek tura yatsumjai métek Kristu nekas chichamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yús<sub>nan</sub> etserainia nú shuar paant awajkartin áiniawai.

### *Kaway pújunam eketna nu*

<sup>11</sup> Nuyá nayaimp uranniun wainkiamjai. Nu<sub>j</sub> kaway puju wantinkiamai. Nu kawaynium ekeema nuna naar<sub>j</sub> Ti Peñker Umin tutajyi. Núnisa<sub>n</sub> Ti Nekas Turin tutajyi. Ti peñker Akupin asa aya nekas péñker túrak mesetan najanaiti.

<sup>12-13</sup> Ni jíisha jíijai métek keeármiai. Múuknumsha akuptai tawaspan untsur<sub>j</sub> etsen<sub>krak</sub>uyi. Nu<sub>j</sub> ni naar<sub>j</sub> Yus Chicham áarmauyi. Túrasha tana nuna Niñki takamtsuk nekaamai. Numpajai en<sub>kr</sub>erman entsaruyi.

14 Ti untsurí nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmai.

15 Nu suntara Uuntrí wenegeya, ashí nunkanmaya yajauch shuaran máatin, puniá mai ere tsakatskatin jiinmíai. Tura jirujai asutiátniua áintsan ti kakaram akupkattawai. Túrak Ashí Tujincha Yusa kajetairí ti kakarma nujai shuáran asutiáttawai. Uwa nekeñkar ijiuratniua áitkiasan wáitkiasartatui.

16 Ni pushiríncha makuíncha ni naari áarmauyi: Ashí Akupiniun Akupin tura Ashí Uunta Uuntrí.

17 Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timíai “Yusa uunt namperin yurumáitarum.

18 Akupniun namañkésa yútiarum. Suntara kapitántri namañkésa, kakaram suntara namañkésa, kaway namañkésa tura eketainia nuna namañkésa, kame ashí shuara namañkésa nankaamantu ainia núnasha tura penké shuar ainia núnasha yútiarum.” Tu untsukmai.

19 Tura nuyá Entsaya Yajasmáncha tura jú nunkanam akupin ainia nunasha ashí ni suntaríjjai wainkiamjai. Niisha kawainium eketka nujai tura nuna suntaríjjai mesetan najanatai tusar iruntrarmai.

20 Tura nu mesetnum Yajasmasha tura Kukariá Yajasmasha, penké ántar yúsnan etserniua nu, mai achinkiarmai. Nuikkia Entsaya Yajasma ni kakarmarin súam nu Kukariá Yajasmaka aents tujintiamun ti turak shuáran anañkawarmai. Túramtai nu shuar Entsaya Yajasma náarin apujmamsar ni nakumkamurin shiir awajsarmai. Tuma asamtai Entsaya Yajasmáncha tura Kukariá Yajasmáncha íwiakuk asuprijjai ti kea nu ji-antumiannum apeáwarmai.

21 Chíkichka kawainium eketkanumiá puniá tsakatskatin weneya jiinmíai nujai mantamnewarmai. Túramtai nanamtin ni ayashin yuawar ejemakarmai.

## 20

### *Kristu mir uwi jú nunkanam akupkattawai*

1 Nuyá nayaimpinmaya suntar táarun wainkiamjai. Nusha náñkatkachu waa yawirin tura jinñkíatai jirun kampurman takakuyi.

2 Nu suntarsha Ti Kajen Yajasman jiru kampurmajai jinñkíamai. Nu Yajasma iwianchi kapitántri Satanas tutainti. Yáunchuya-napiti niisha. Tura nu iwianchin jinñkiá mir uwi pujusat tusa

3 náñkatkachu waanam epenmíai. Tura waiti uraichminian anujtukmai. Mir uwi nankaamatsain ashí nunkanmaya shuaran anañkawarain tusa túramai. Antsu mir uwi nankaamasmatai ishichik tsawant ankant akupnaktiníaiti.

4-5 Nuyá akupin pujutainium pujuinian wainkiamjai. Tura shuara túramurin írsarat tusa kakaram sunasarmai. Tura núnisan muuke tsupirka maamu wakaníncha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha Entsaya Yajasmáncha ni nakumkamuríncha tikishmatracharu armai. Núnisan náarincha nijainiumsha tura uwejniumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Kristujai métek mir uwi akupeamun wainkiamjai. Antsu chíkich jákaruka mir uwi nankaamatsain nantakcharmai.

<sup>6</sup> Antsu emka nantaktin tsawantnum pachiinkiarua nú shuar, ti penker áimak, ti shiir warasmin áiniawai. Nu shuarka jimiará jákatniunam pachiintsuk Yusna tuke takarin tura núnisan̄ Krístunu tuke takarin ártatui. Tura Krístujai métek mir uwí akupkartatui.

<sup>7</sup> Tura mir uwí nan̄kaasmatai uunt iwianch urani akupnaktatui.

<sup>8</sup> Túram ashí nun̄kanmaya shuáran anañkawartaj tusa jíinkitiawai. Kuk nun̄kanmasha tura Makuk nun̄kanmasha ashí pujuinia nuna anañkawartatui. Tura mesetan najanataj tusa ni suntarjñ nekapmarchamnia ti untsurj̄ irurtatui.

<sup>9</sup> Tura ashí nun̄kan enetak Yus-shuar matsamtaincha tura Yus ti aneamu pépruncha mash êñkekarmai. Túramtai Yus nayaimpinmayā jinia akuptuk mash áesawarmai.

<sup>10</sup> Tura iwianchi kapitiántri, nin anañkawarmia nu, asuprijjai keá ji-antumiañnum apenámai. Nu yaunchusha Entsayā Yajasmasha tura Kukariá Yajasmasha, penké ántar yusnan etserniua nu, nūj apenáwarmai. Nujs̄ha tsawaish̄a káshisha iniañnatsuk ti wáitsartatui.

### *Ashí amúamunam súmamtikiatin tsawant*

<sup>11</sup> Nuyá akupin pujutain úntan tura ti pújun wainkiamjai. Tura nūj pujancha wainkiamjai. Niisha ti kakaram asamtai nun̄kasha nayaimpisha aya menkarar tuke atsúarmai.

<sup>12-13</sup> Tura túrunatsajñ nayaantsanam jákarua nusha jíinkiarmai. Núnisan̄ iwiersamunam jaka pujuinia nusha jíinkiarmai. Tura jákaruncha, nan̄kaamantu arma nunasha tura penké shuar arma nunasha, ashí wainkiamjai. Tura Yusaj̄ naka wajaarmai. Nuyá ashí shuar túramu aakma papí urantrarmai. Tura nu papinium aarma nujai métek ashí ni turamurj̄ paant nékaneakui súmamtiknawarmai. Tura chíkich papisha tuke iwiaaku pujustin papí urankamai.

<sup>14</sup> Nuyá jákatin amuukati tusa ji-antumiañnum apenámai. Nu ji-antumiañnum wétin jimiará jákatin tútainti.

<sup>15</sup> Tura ashí shuar ni naarj̄ tuke iwiaaku pujustin papinium atsúarma nusha nūj apenáwarmai.

## 21

### *Nayaim yamaram tura yamá nun̄ka*

<sup>1</sup> Nuyá nayaimpisha tura nun̄kasha menkaramtai nayaim yamarman tura yamá nun̄kancha wainkiamjai. Tura nayaantsasha atsumai.

<sup>2</sup> Wi, Juan̄, ti shiir péprun, Yusnumiá yamaram Jerusareñkan nayaimpinmayā táarun, wainkiamjai. Anajmarma ni áishrjñ in̄kiuntaj tusa ti shiir iwiarmanpra áintsan̄ ti penker iwiarmanuyi.

<sup>3</sup> Nayaimpinmayā ti kakantar chichaamun antukmajai. “Iisía, Yus yamaikia aentsjaj̄ pujawai. Tuke niijjaī pujakuí ashí ni shuarj̄ ártatui. Tura niijjaī tuke pujak nekas tuke ni Yusrj̄ ártatui.

<sup>4</sup> Yus ni ñejkin ujujturartatui. Tura nuik amia nuka ashí amuukarmatai jákatniusha, úttincha, wáitsatniusha, tura najaimiatniusha atsuttawai.”

<sup>5</sup> Tura akupin pujutainium ekema nu “Iístá, Wi ashí penké yamarman nájanjai” timiai. Nuyá nu arantcha turutmiai “Jūka imiá nekas asamtai aartá. Nekas enentáimtutinaiiti.”

<sup>6</sup> Ataksha turutmiai “Yamaikia mash uminkiyai. Wiitjai. Yámankamtaiknumiá amúanmasha tuke pujuwitjai. Wisha A rétranmayā Y

rétranam ashí retra áintsaitjai. Ashí kitiamo núnaka tuke iwiaaku pujutai entsan penké kúitchajai áartatjai.

7 Nupetmakunka ashí yamarma juna mash susattajai. Wisha ni Yusri átatjai. Núnisan niisha winia uchir átatui.

8 Antsu sápijka, Yúsan enentáimitchusha, yajauchin máatrasha, mankartincha, tsanirmatan pujurniusha, wawekratniusha, ántar-yusan tikishmatniusha, tura ashí wáitrincha asuprijai keá ji-antumiannum apenáwartatui. Nuka jimiará jákatin tútainti.”

### *Yamaram Jerusarén*

9 Nuyá siati suntar pinin amúamunam wáitkiastinjai piakun takakua nuyá chikichik taruti túrutmiai “Winitia. Murikui anajmarmarin iniaktustatjame.”

10 Taku mesekranam naint yakí juruki Yusnumiá ti shiir Jerusarén pepru nayaimpinmaya táarun iniaktursamai.

11 Nu péprusha Yusa wincharijjai tsáapniniuyi. Nu tsáapnincha kaya ti shírmachia núnis jaspi kaya nuni saar asa ti tsáapniniuyi.

12 Pepru yantamesha ti yakí pénkramuyi tura wáitiri tuse amai. Tura nu wáitinium suntar wajatiarmai. Nu wáitinmasha Israer-shuara uuntri tuse armia nuna naarj áarmauyi.

13 Nantu tátainmaanj menaintiu waiti amai. Nantu akatainmaanisha menaintiu waiti amai. Nunkaanisha menaintiu waiti amai. Arakaanisha menaintiu waiti amai.

14 Ti uunt kaya tuse apujsamu armai. Tura nuj ekenir pénkramuyi. Nu tuse kayanam Murikui akatramuri tuse armia nuna naarj áarmauyi.

15 Suntar wijjai chichaua nu, nekapmatain kurin takakuyi. Nujai pépruncha, wáitirincha, tura pénkramurincha nekapmartiniuyi.

16 Pepru esantisha wan Kantisha yakirisha mash métekrak armai. Sun-tarsha péprun nekapmataijjai nekapmaram esantisha wan Kantisha tura núnisan jeamkamu yakirisha jimiará mir jimiará siañtu (2.200) kirúmitru amai.

17 Nuyá pénkrincha nekapmarmai. Suntar aents nekapmataijjai nekapmaram sesentikuatru (64) mitru amai.

18 Nu pénkramusha jaspi kayajai najanamuyi. Péprusha aya kúrikuyi. Nu kuri ti penker sáarauyi.

19 Pen apujtukma kayasha ti shiir kaya ainia nujai najanamu asa ti shiir iwiamuyi. Emka nu jaspi káyauyi. Jímiara nusha sapiru káyauyi. Menaintiua nusha ákata káyauyi. Kuatrua nusha ismirártauyi.

20 Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatista káyauyi. Ti kayaim apujsamu asamtai ti shírmachiuyi.

21 Pepru wáitiri tuse ainia nu, ti shiir nayaantsanmaya shaukjai chikichik najanamu armai. Pepru jintisha aya kúrikuyi. Nu kuri ti penker sáarauyi.

22 Yusa Uunt Jeencha wainkiachmajai. Antsu nu peprunam Uunt Yus ashí tujincha nu tura núnisan Muriksha nu péprun pímiutkui takamtsuk Níiniuyi.

23 Nu péprunmasha tsawai-nantusha kashí-nantusha atsumchamai. Antsu Yusa wincharj tsáapin awajmiai. Núnisan Muriksha tsáapin awajmiai.

<sup>24</sup> Nu tsáapnijiiaisha ashí nunkanmaya shuar wekasartatui. Tura ashí nunkanam akupin ainia nusha nuí yujainiak ni péñkerijjai nuna shiir awajtuiniawai.

<sup>25</sup> Tura kashi atsá asamtai tuke tsawaiti. Tuma asamtai wáitiri tuke epenchamu ártatui.

<sup>26</sup> Tura ashí nunkanam péñker ana nuna nuí itiaartatui.

<sup>27</sup> Tura yajauchikia penké wayashatatuí. Mujjmiainian túrincha tura anañkartincha penké wayachartatuí. Antsu áyatik shuar tuke iwiaaku pujutai papinium naari aarma ainia nuke wayawartatuí. Nu papincha Murik takakui.

## 22

<sup>1</sup> Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmaya ti saawi jiinmíai. Nu pujutaisha Yusna tura Muriknauyi.

<sup>2</sup> Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukésha ashí nunkanmaya shuar tsuámatainti.

<sup>3-4</sup> Ashí yajauchia nuka atsuttawai. Uunt akupin pujutai, Yúsnasha Murikniasha, nuñ aa asamtai ni shuari ti paant wainiainiak tikishmatrartatuí. Tura nijiajncha ni naari anujmamkartatuí.

<sup>5</sup> Tura káshisha atsuttawai. Nuí pujuinia nuka shiripkincha etsancha atsumchartatuí. Uunt Yúsak tuke tsáapin awajtiatui. Tura ni shuari tuke iniañnatsuk akupkartatuí.

### *Jesukrístu tátriní penké nuntumsai*

<sup>6</sup> Nuyá suntar turutmíai “Ju chicham ti nekas asa nekas enentáimtusminiaiti. Uunt Yus yaunchu níniun etserniun ni chichamen enentáimtikramia núnisan yamaikia ni suntarín akuptuk wárik túrunatta nuna ashí ni shuarín ujakuíti.”

<sup>7</sup> “Ti wárik winittiajai” tawai Murikkia.

Shuar ju papinium Yusa Chichame áarman umirna nuka shiir warasmini-aiti.

<sup>8</sup> Wi, Juan, juna mash íisan mash antukmajai. Tura mash íisan antukan nayaimpinmaya suntar iniaktursama nuna shiir awajsataj tusan tikishmatramjai.

<sup>9</sup> Túram turutmíai “Penke áinkiaip. Wisha Yusa yáinrintjai ámijjai métek tura yatsumjijai métek. Yúsnan etserin ásar tura ju papinium áarma nuna umirainiak Yusa yáintri ániawai niisha. Yúsak shiir awajsatniuiti.”

<sup>10</sup> Nuyá ataksha turutmíai “Ju papinium aarma Yusna asamtai úukam ikusaip. Ashí túrunatin tsawant ishichik ajatesai.

<sup>11</sup> Nu jeatsajnkia yajauch shuarka tuke yajauch túruki wetí. Núnisan mujjmiainian túraka tuke túruki wetí. Antsu péñkeran túraka péñkeran túruki wetí. Núnisan esetar enentáimniusha tuke esetar Yusjai wekasati.”

<sup>12</sup> Muriksha tawai “Eta, ti wárik winittiajai. Túran ti shírmachin ashí péñker túramujai métek súsatniua nuna takukin winittiajai.

<sup>13</sup> Wiitjai. Yámankamtaiknumiá amúanmasha tuke pujuwitjai. Wisha A rétranmaya Y rétranam ashí retra áintsaitjai.” Tu tawai.

<sup>14</sup> Ni pushiri péñker nijiamatniua núnisan péñker túrinia nú shuar shiir warasminiaiti. Nu shuar nu pepru wáitirincha wayamniaiti. Túrar tuke iwiaaku pujutai numinmaya yuamniaiti.

<sup>15</sup> Tura antsu Yúsán enentáimtachuka, wawekratniuka, tsanirmatan puju-rainia nuka, maṅkartinkia, ántar-yus tikishmatniuka, tura ashí shuar wáitían wararainiak tuke túrin ainia nuka aḡ matsatainiak penké wayachmin ániawai.

<sup>16</sup> “Wi, Jesus, ashí Yus-shuaran ujakarát tusan winia suntarun akupkajai. Wikia Tawit Weeaitjai. Túrasha Tawitia Úntrintjai. Wikia ti tsáapín yaa, yáṅkuamia áintsanketjai.” Tu tawai.

<sup>17</sup> Yusa Shiir Wakanjsha tura Murik anajmarmasha “Winitiarum” tuini-awai.

Tura júna ántana nusha “Winitiarum” tití. Tura ashí kitiama nuka winití. Wakerakka tuke iwiaaku pujutai entsan penké kuítchajai umartí.

<sup>18</sup> Ashí shuar jú papinium Yus-Chicham aarma nuna antukarun júna ujaajai: Shuar júi áarman chikichan pataakka Yus nin ti wáitsatin júi aarma nuna patattsattawai.

<sup>19</sup> Núnisan shuar júi aarman emeneakuṅkia Yus ni naarin iwiaaku pujutai papiniumiá jafirattawai. Tura ti shiir péprunam wayatniun suritkiattawai. Nu péprusha tura nu papisha júi paant ujakma ániawai.

<sup>20</sup> Jú papí áantratniun ujakua nu tawai “Eta, ti wari winittiajai.”  
Pai, núnisan atí. Wari winitia, Uunt Jesúsá.

<sup>21</sup> Ii Uuntrí Jesukristu atumniasha shiir yainmakarti.  
Nuke atí.